


# Tangoa New Testament



The New Testament in the Tangoa Language of Vanuatu

**Tangoa New Testament**  
**The New Testament in the Tangoa Language of Vanuatu**  
**Le Nouveau Testament dans la langue Tangoa de Vanuatu**

copyright © 2010 Wycliffe Bible Translators, Inc.

Language: Tangoa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 22 Feb 2024 from source files dated 31 Aug 2023  
89356e5c-df58-558e-9b27-ae0321adb2df

## Contents

Matthew . . . . .	1
Mark . . . . .	49
Luke . . . . .	79
John . . . . .	129
Acts . . . . .	166
Romans . . . . .	212
1 Corinthians . . . . .	233
2 Corinthians . . . . .	254
Galatians . . . . .	268
Ephesians . . . . .	276
Philippians . . . . .	283
Colossians . . . . .	288
1 Thessalonians . . . . .	293
2 Thessalonians . . . . .	298
1 Timothy . . . . .	301
2 Timothy . . . . .	307
Titus . . . . .	312
Philemon . . . . .	315
Hebrews . . . . .	317
James . . . . .	334
1 Peter . . . . .	340
2 Peter . . . . .	346
1 John . . . . .	350
2 John . . . . .	355
3 John . . . . .	356
Jude . . . . .	357
Revelation . . . . .	360

## Retiruhu Hin Iesu Křisto Matthew Mo Ulia

### *Hin Puku Nike*

Hin puku nike, Iesu mo vujangi sohen harihi, haratu mo vaia aulu na Vutivuti (5.1–7.28), nona usiusi (6.9–13), peresi na ‘Leu Ruhu’ (7.12) ‘ha vaia isana tinapua sohen ka opoia vara la vaia isamim’ la lo toho hin puku akerihi.

Matthew mo uli mamahuni na hija pin Iesu (1.1–17) mo vujangia vara enia natu haratu sei God mo retitauhi vara i pa tai isan Supe David, haratu i pa noŕa Tamlohi Jujuri.

Matthew mo uli na sava mo masese hin rani atu Tiapolo mo vaihite Iesu na jara hasetoho (4.1–11).

*Titileu nike la lo toho hin puku ak-erih* purongo

1. Piri řuvu (13.24–30)
2. Tavgav Tavera (13.44)
3. Huřutavila Tavera (13.45–46)
4. Tara Maji (13.47–50)
5. Tavgav Matea (13.52)
6. Volitusi Sasati Matea (18.23–35)
7. Tamlohi Isa Grape Matea (20.1–16)
8. Uluvou Mo Rua (21.28–31a)
9. La Hařai Maevo Atu (25.1–12)

Matthew mo vujangia vara hinau tari la masese isan Iesu usuri na masalon God (1.22; 2.5, 15, 17, 23; 8.17; 12.17; 13.35; 21.4; 27.9). Matthew mo uli retileu atu non Iesu mata sile na vavahinau non nona tamlohi usuri mata vano na jara tari na varama (28.18–20).

### **Vujangi Hai Hin Puku Nike**

1. Pin Iesu Peresi Na Nona Rani Vora (1.1–2.23)
2. Vujangi Non John Tamlohi Paptijo (3.1–12)
3. Paptijo Non Iesu Peresi Na Nona Rani Vaihite (3.13–4.11)
4. Iesu Mo Lo Toho Na Jara Tavera Matan Galilee (4.12–18.35)
5. Mo Malue Galilee Mo Sahe Jerusalem (19.1–20.34)
6. Isoiso Wik Non Iesu: Nona Mateia (21.1–27.66)
7. Iesu Mo Mele Mauri (28.1–20)

### *Pin Iesu (Lk 3.23–38)*

<sup>1</sup> Reti nike mo vereuli na pin Iesu Křisto, mahapin Abraham enia Supe David.

<sup>2</sup> Abraham enia taman Isaac. Isaac enia taman Jacob, ale Jacob enia taman Judah tolu na voraina,

<sup>3</sup> Judah enia taman Perez peresi Zerah, ale tinara Tamar, Perez enia taman Hezron, ale Hezron enia taman Ram,

<sup>4</sup> Ram enia taman Amminadab, Amminadab enia taman Nahshon, ale Nahshon enia taman Salmon,

<sup>5</sup> ale Salmon enia taman Boaz, ale tinana Rahab, Boaz enia taman Obed,

ale tinana Ruth, ale Obed enia taman Jesse,

<sup>6</sup> Jesse enia taman Supe David, Supe David enia taman Solomon, ale tinana Bathshiba enia malepun Uriah sei,

<sup>7</sup> Solomon enia taman Rehoboam. Rehoboam enia taman Abijah, ale Abijah enia taman Asaph,

<sup>8</sup> Asaph enia taman Jehoshaphat, Jehoshaphat enia taman Joram, Joram enia pin Uzziah,

<sup>9</sup> ale Uzziah enia taman Jotham, Jotham enia mahapin Ahaz, ale Ahaz enia taman Hezekiah,

<sup>10</sup> Hezekiah enia taman Manasseh, Manasseh enia taman Amos, ale Amos enia taman Josiah,

<sup>11</sup> Josiah enia pin Jechoniah tolu na tahisana,

enira hasera purongo natu la pa lo mauri hin pongi atu mara Babylon la tauri

na tavgavuin Israel la lavira la vano Babylon. *2 Ki 24.14–15*

<sup>12</sup> Hitahun rani atu mara Babylon la lavira la vano,

ale pina mo vano sohen harihi: Jechoniah enia taman Shealtiel, ale Shealtiel enia taman Zerabbabel,

<sup>13</sup> Zerabbabel enia taman Abiud, Abiud enia taman Eliakim, ale Eliakim enia taman Azor,

<sup>14</sup> ale Azor enia taman Zadok,  
Zadok enia taman Achim,  
ale Achim enia taman Eliud,  
<sup>15</sup> Eliud enia taman Eleazar,  
Eleazar enia taman Matthan,  
ale Matthan enia taman Jacob,  
<sup>16</sup> ale Jacob enia taman Joseph,  
Joseph enia tuan Mary,  
ale Iesu mo vora isan Mary,  
enia haratu la tovia Křisto.

<sup>17</sup> Ale mo sohena natu, pin Abraham mo tikeli Supe David mo tikeli 14, ale pin Supe David mo tikeli rani atu la vano Babylon mo tikeli 14, ale pina hin rani atu tamlohi la vano Babylon mo tikeli na rani Křisto mo vora mo tikeli 14.

*Pongi Vora Non Iesu  
(Lk 2.1-7)*

<sup>18</sup> Ale reti vora non Iesu nořa Křisto mo sohen harihi: Tinana Mary, la tapuhia vara i pa naroun Joseph, pani la sopo lo lahi pani o eři hitea vara Mary mo tau natuna moiso na suihan Tanume Tapu. <sup>19</sup> Joseph sei enia i pa tuan Mary, ale matan enia tamlohi vokevoke matea, mo sopo opoia vara i vai Mary i mahanuhanu, ale mo aleale malele vara i tinařihia, ale tea la pa sopo levosahia.

<sup>20</sup> Pani Joseph mo pa lo řomřomia, ale vahatea purongo, angelo non Moli God matea mo pala isana na mavuho, ale mo vereea mara, “Joseph pin David, o sopo matahu vara o lavi Mary naroum. Hina rihirihi sei na lolona mo tai isan Tanume Tapu. <sup>21</sup> I pa vasusui na natirihi lamane matea, ale o pa tau na hijana vara Iesu matan enia i pa juri na nona tamlohi na nora hehe.” <sup>22</sup> La hinau nike, la masese matan vara i mařivisi na sava Moli God mo vereea isana přovet tuai sei mara,

<sup>23</sup> ‘Eh! Hařai maevo matea i pa pangepange, ale i pa vasusui na natuna lamane matea. La pa tau na hijana vara Immanuel.’

*Isa 7.14*

Raramin hija atu enia, ‘God mo lo toho isařa’.

<sup>24</sup> Hitahuna Joseph mara mo turu, mo vai na sava angelo atu non

Moli God mo lo vereea, ale mo lavia narouna, <sup>25</sup> pani mo sopo juruvi peresia mo mai mo tikeli na rani mo vasusui na natuna lamane matea, ale mo tau na hijana vara Iesu.

## 2

*Tamlohi Lelevosahi La Pala*

<sup>1</sup> Ale nake, Iesu mo vora Bethlehem na jara tavera Judea na pongi Herod mo lo supe ea, ale mo sopo tuai, tamlohi lelevosahi mata vitusarasara hai matan Opae la mai Jerusalem, <sup>2</sup> la lo usia lara, “Nene natirihi atu mo vora vara i pa Supe nona Jew? Kama hite na vitusarasarana hin rani atu mo vele atuvano Opae, ale kama mai vara kama lotua.”

<sup>3</sup> Supe Herod mara mo rongo nora retusia sei, enia tolu na tamlohi tari na lolon Jerusalem řomira la kaka matana. <sup>4</sup> Mo tovi na matavuhi matea nona moli nona přis peresi na tamlohi vujangi mata leu nona tamlohi, ale mo usia isara mara, “Sava jara natu, nořa Křisto i pa vora hinia?”

<sup>5</sup> La řaramia lara, “Na vanuan Bethlehem na lolon Judea, matan přovet tuai matea mo ulia sohen harihi mara,

<sup>6</sup> ‘Bethlehem sei na jara tavera atu Judah, engko ko aulu ko jeu la haratu la lo aulu Judah.

Tamlohi aulu matea i pa tai isam i pa tavui sipsip mata i kilau na noku tamlohi Israel.’ ” *Mic 5.2*

<sup>7</sup> Moiso, Herod mo mele tovi řořoi na matavuhi matea peresi la tamlohi lelevosahi atu, matan vara i levosahi na rani tataholo la hite vitusarasara atu mo lo pala hinia. <sup>8</sup> Moiso Herod mo řulera la vano Bethlehem, ale mo vereea mara, “Ha vano, ha ale mamahuni natirihi atu, ale vara ka hitea, ha mai ha vereau hinia, ale enau sohena a pa vano a lotua.”

<sup>9</sup> La tamlohi lelevosahi atu la rongo la reti atu non supe moiso la turu la vano. Ale, la mele hite pa vitusarasara atu la lo hitea Opae, mo tiromara mo vano tataholo hin jara atu natirihi atu mo lo toho ea. <sup>10</sup> La

tamlohi lelevosahi atu lara la hite vitusarasara atu, la avulahi la uloulo tavera matana. <sup>11</sup> Lara la unu hin ima atu la hite natirihia atu mo lo toho hinia peresi tinana Mary. La popovitoiho isana, ale la lotua. La roi na nora tavitav, ale la sile na nora otori mata gold peresi la hasori ruhu atu frankincense peresi na myrrh isana. <sup>12</sup> Pani God mo retiŕoaŕoahai isan la tamlohi lelevosahi atu na mavuho matea vara la sopo mele hilu la vano isan Herod. Ale la mule na jarara na malele tinapua.

### *La Rovu La Sivo Egypt*

<sup>13</sup> La tamlohi lelevosahi atu lara la mule, vahatea purongo, angelo non Moli God matea mo pala isan Joseph na mavuho matea, mo vereea mara, "O turu! O lavi natirihia sei peresi tinana ha rovu ha sivo Egypt matan nakerihia Herod i pa ale natirihia sei vara i vilimateia. Ha lo toho atu Egypt i tikeli rani atu a pa mele vere kamim hinia vara ha eŕi mele hilu." <sup>14</sup> Vahatea purongo, Joseph mo turu mo lavi natirihia atu peresi tinana la malue la sivo Egypt hin vutepongi atu, <sup>15</sup> moiso, Joseph mo lo toho Egypt mo tikeli na rani Herod mo mate. Hinai nika, mo masese sohena usuri na sava pŕovet la vereea tuai moiso lara Moli God mo vereea mara, 'Na tovi naŕihia natuku Egypt'. *Hos 11.1*

### *Herod Mo Lolokoru*

<sup>16</sup> Moiso, Herod mara mo hitevosahia vara la tamlohi lelevosahi atu la halua, ale mo lolokoru patuna, ale mo sile na retileu matea vara nona tamlohi vuro la vilimatei na pipi lamane tari sei taunira mo rua teni taunira mo sivo atano na lolon Bethlehem peresi na jara la toho ŕalihia, Herod mo vaia usuri rani atu la tamlohi lelevosahi atu la vereea. <sup>17</sup> Moiso, sava hinai pŕovet Jeremiah mo vereea mo masese sohen harihi mara, <sup>18</sup> 'Na jara atu Ramah, tamlohi la lo tangi, ale la tangtangi tavera, Rachel mo lo tangisi na natuna, ale mo ŕohu vara tea i nanau isana matan natuna la mate.' *Jer 31.15*

### *La Mele Hilu La Sinai Israel*

<sup>19</sup> Pani na rani Herod mo mate, Joseph mo pa lo toho Egypt, ale hin rani atu, angelo matea non Moli God mo pala isana na mavuho matea, <sup>20</sup> angelo atu mo vereea mara, "O turu! O lavi natirihia sei peresi tinana ha sahe Israel, matan la haratu sei la lo vaihitea vara la vilimatei natirihia sei la pete mate moiso." <sup>21</sup> Ale Joseph mo lavi natirihia atu peresi tinana la sahe Israel. <sup>22</sup> Pani mara mo rongoa vara nake natun Herod, Archelaus mo lo tauri na suiha na lolon Judea, mo matahu vara i vano atu, ale mo mele lavi na retiŕoaŕoahai na nona mavuho tinapua matea vara i sahe Galilee. <sup>23</sup> Mo vano na taon tavera matea la tovia Nazareth, ale la tohoa atu vara sava pŕovet la vereea tuai matan Kŕisto i pa masese lara, 'La pa tovia vara mara Nazareth'.

## 3

### *John Tamlohi Paptijo*

*(Mk 1.1-8; Lk 3.1-18; Jn 1.19-28)*

<sup>1</sup> Hin rani atu John tamlohi paptijo mo pala mo tapulo retivujavujangi na jara hasetoho matan Judea. <sup>2</sup> Mo vereea mara, "Ha posi na nomim hehe matan i pa sopo tuai suiha atu non God mo lo supe hinia i pa pala." <sup>3</sup> Matan enia haratu sei pŕovet Isaiah mo lo retireti hinia tuai sei mara, 'Na jara hasetoho leona mo lo ulo mara: Ha tatamahuni na malele na mapumim matan Moli God i pa hahau hinia.' *Isa 40.3* <sup>4</sup> Ale rurun John la vaia na vulu camel, mo otioi na huri buluk; hana hinai enia hatpoha peresi na wai tau sugabag sei mo meji. <sup>5</sup> Hin rani atu la haratu la lo toho Jerusalem peresi na jara tari Judea, ale na jara ŕalihi na wai Jordan la lo vano vara la hitea, <sup>6</sup> ale la taviti na nora hehe isana moiso John mo paptijo hinira na wai Jordan. <sup>7</sup> Pani John mara mo hitea vara Pharisee peresi na Sadducee matuvana la lo mai mata la paptijo, mo vereea isara mara,

“Kamim mata sasati! Hare mo re-tiŕoahai kamim vara ha rovo na aria tavera non God? <sup>8</sup> Ha vai na nomim vavahinau i vujangia vara ka posi varaŕuhu na nomim hehe. <sup>9</sup> Ha sopo ŕomaulu vara, ‘Kamam kama juri matan tamamam Abraham!’ matan na vereia isamim, God i eŕi posi la vatu nike, la mai natun Abraham! <sup>10</sup> Matan nakerihi, God mo lo tauri na rita matea moiso vara i tai na wari pahai. Vipahai tari atu la sopo vua ŕuhu, i pa taijovira, ale i pa pulahira na lolo hapu.

<sup>11</sup> Enau na lo paptijo hin la haratu la posi mata nora hehe na wai, pani i pa sopo tuai tamlohi matea i pa mai mo aulu jea hiniaua, ale enau na sopo tataholo vara a uli naŕihi na asi eve palona. Enia i pa paptijo hin kamim na Tanume Tapu peresi na hapu. <sup>12</sup> Mo lo tauri na nona foko tavera na limana, ale i pa vasahi na nona jara ase na piri wit, ale i pa takonahi piri wit atu na nona pea, pani i pa suli na pahapaha piri wit na hapu sei tea i sopo eŕi vunia hin te rani.”

*John Mo Paptijo Hin Iesu  
(Mk 1.9-11; Lk 3.21-22)*

<sup>13</sup> Moiso Iesu mo tai Galilee mo vano na wai Jordan vara John i paptijo hinia. <sup>14</sup> Pani John mo vaihitea vara i horoa. Mo vereia mara, “Mata sava ko mai isaku mata paptijo? Mo mele tataholo vara engko o paptijo hiniaua!”

<sup>15</sup> Iesu mo ŕaramia mara, “Nake mo tataholo vara o tinaŕihia i vano sohena, matan vara ŕa eŕi vai vevuhi na malele hinau tari i tataholo la masese.”

<sup>16</sup> Ale Iesu mara mo paptijo, mo lo maraha na wai, ale vahatea purongo tuka mo roi, moiso mo hite Tanumen God mo Tapu mo sinai atano mo tau isana sohena vomaha matea. <sup>17</sup> Ale vahatea leo matea mo reti na tuka mo vereia mara, “Harihi enia Natuku, na opoia mo tavera, ale na avulahi tavera hinia.”

## 4

*Tiapolo Mo Vaihite Iesu  
(Mk 1.12-13; Lk 4.1-13)*

<sup>1</sup> Moiso, Tanume Tapu mo tiroman Iesu mo vano na jara hasetoho vara Tiapolo i vaihitea. <sup>2</sup> Ale Iesu mo tapuhoro na hanhani mata rani mo ngavulu vati (40) peresi na pongi mo ngavulu vati, (40) moiso mo mate hana. <sup>3</sup> Tiapolo mo mai isan Iesu matan vara i vaihitea, ale mo vereia mara, “Vara engko Natun God, o vere la vatu sei la mai pereti.” <sup>4</sup> Pani Iesu mo ŕaramia mara, “Na Retiulia, God mo vereia mara, ‘Tamlohi i sopo eŕi mauri na pereti purongo, pani na reti tari God mo vereia.’ ” *Deut 8.3*

<sup>5</sup> Moiso Tiapolo mo lavia mo sahe na taon tapu tavera sei Jerusalem, mo taua mo turu aulu na pingopingo Temple ea, <sup>6</sup> ale mo vereia isana mara, “Vara engko Natun God o kue, matan na Retiulia God mo vereia mara, ‘Mo retileu isana nona angelo matam, matan vara la pa tauriho na limara, ale o pa sopo eŕi vujahi na palom hin te vatu.’ ” *Psa 91.11-12*

<sup>7</sup> Iesu mo ŕaramia mara, “La mele ulia na Retiulia God mo vereia mara, ‘O sopo vaihite nom Moli God.’ ” *Deut 6.16*

<sup>8</sup> Ale Tiapolo mo mele lavi Iesu mo sahe aulu na vutivuti matea mo aulu jea, ale mo vujangia na jara tari na varama supe la lo tauri na suiha hinira peresi na nora tavitav tavera sei tamlohi la lo hasohasora matara. <sup>9</sup> Tiapolo mo vereia isana mara, “Vara o popovitoho isaku, ale o lotuau a pa sileho hin la hinau tari sei.”

<sup>10</sup> Moiso, Iesu mo vereia isana mara, “Setan, o vano! Matan na Retiulia God mo vereia mara, ‘O pa lotu nom Moli God, ale o volitusi isana hasena purongo!’ ” *Deut 6.13*

<sup>11</sup> Moiso, Tiapolo mo tinaŕihi Iesu, ale vahatea purongo, angelo hai la mai isana Iesu la tuenia.

*Iesu Mo Tapulo Vavahinau  
(Mk 1.14-15; Lk 4.14-15)*

<sup>12</sup> Nake Iesu mara mo rongoa vara la tau John na ima řilangi, mo mele hilu mo vano Galilee. <sup>13</sup> Ale mo tinařihi Nazareth mo vano mo lo toho Capernaum mariviti na tasi atu, na lolo jara matan Zebulun enia Naphtali, <sup>14</sup> matan vara retimangovi non přovet Isaiah sei mara,

<sup>15</sup> 'La haratu na jara Zebulun enia Naphtali, peresi la haratu na tavalun tasi atu, peresi la haratu telesivo na wai Jordan, peresi Galilee jara tamlohi řořoha la lo toho ea,

<sup>16</sup> la tamlohi atu la lo toho hin řořoha tavera atu la hite na malarani tavera atu,

ale merana mo sasarami la haratu la lo toho na jara řořoha mata mateia.' *Isa 9.1-2*

<sup>17</sup> Hin rani atu Iesu mo tapulo vara i retivujavujangi mo vereea mara, "Ha posi na nomim hehe matan i pa sopo tuai, suiha atu non God sei mo supe hinia i pa pala."

#### *Iesu Mo Viřoni Na Nona Tamlohi* (*Mk 1.16-20; Lk 5.1-11*)

<sup>18</sup> Iesu mo lo hahau na pahisa tasin Galilee, mo hite na vorai mo rua Simon la tovia Peter enia tasina Andrew la lo tara na tasi atu matan enira tamlohi aleale maji.

<sup>19</sup> Ale Iesu mo vereea mara, "Ha mai ha usuriau a pa vai kamim ha mai tamlohi aleale tamlohi." <sup>20</sup> Vahatea la tau na nora tara, ale la usuria.

<sup>21</sup> Iesu mo mele vano makomo, mo hite na vorai mo rua, James enia John, natun Zebedee. La lo toho na boti matea peresi tamara Zebedee. La lo tulai na nora tara, ale Iesu mo tovira vara la usuria. <sup>22</sup> Vahatea la tinařihi tamara na boti, ale la usuri Iesu.

#### *Vavahinau Non Iesu Galilee* (*Lk 6.17-19*)

<sup>23</sup> Iesu mo vano řalihi na jara Galilee mo lo vujangi na ima lotu nona Jew, mo lo retivujavujangi na Retiřuhu matan mauri atu God mo aulu hinia isara. Iesu mo vai na tamlohi rojo peresi la haratu la majuejue mata rojoa la mele řuhu.

<sup>24</sup> Sorasoran Iesu mo vano na jara tari

Syria. Tamlohi la lavi la haratu la rojo na rojoa matuvana la lo rongohaji na epera, hai la lo lavi na rani řilangi matan tanume sasati mo lo toho hinira, hai la rave, hai la papao, Iesu mo vai mamahuni na nora rojoa tari. <sup>25</sup> Vao tavera la tai Galilee, Decapolis, Jerusalem, Judea, ale na tavalu wai Jordan mo vano, la lo usuria.

## 5

### *Iesu Mo Vujangi Aulu Na Vutivuti Matea*

(*Lk 6.20-23*)

<sup>1</sup> Matan Iesu mo hite na vao tamlohi la lo takonahi hin jara atu, ale mo sahe na vutivuti atu, ale mara mo sakele ea, nona tamlohi usuri la mai isana. <sup>2</sup> Moiso mo tapulo retireti mo vujangira mo vereea mara,

<sup>3</sup> "Avulahi řuhu isan la haratu la lo kilau isan God hasena mata hiniau tari, matan mauri atu God mo supe hinia i pa nora.

<sup>4</sup> Avulahi řuhu isan la haratu la lo tangtangi matan God i pa nanaura. *Isa 61.2*

<sup>5</sup> Avulahi řuhu isan la haratu la lo řomatano matan God i pa sile na varama isara. *Psa 37.11*

<sup>6</sup> Avulahi řuhu isan la haratu la lo marohati, ale la lo mařohu vara la vai na masalon God, matan enia i pa tuenira la vai na masalona, enira la pa masu. *Isa 55.1-2*

<sup>7</sup> Avulahi řuhu isan la haratu la lo řomopoi na tinapua matan God i pa řomopoiri.

<sup>8</sup> Avulahi řuhu isan la haratu mapura la vokevoke matan la pa hite God. *Psa 24.3-4*

<sup>9</sup> Avulahi řuhu isan la haratu la lo tueni na tamlohi vara la sari tamata matan God i pa tovira natuna.

<sup>10</sup> Avulahi řuhu isan la haratu tamlohi la lo tipahira mata nora posposi tataholo, matan mauri atu God mo aulu hinia i pa nora. *1Pe 3.14*

<sup>11</sup> Avulahi řuhu isamim



vara tamlohi la kali kamim  
teni vara la tipahi kamim  
teni la vere na retisasati  
tinatinapua hin kamim  
na retihaluhalu matan  
kamim noku tamlohi. *1Pe 4.14*

<sup>12</sup> Ha uloulo, ha avulahi tavera  
matan nomim otori na tuka  
mo tavera mo sohena p̄rovet  
tuai sei tiroma tamlohi la lo  
tipahira.

*2 Chron 36.16; Acts 7.52*

### *Solo Peresi Na Malarani (Mk 9.50; Lk 14.34-35)*

<sup>13</sup> Kamim ka sohena solo mata  
varama, pani vara mejina i tihai i pa  
mele lavi na mejina sohena sava? I  
pa sopo mele ŋuhu matan te hinau,  
ale la pa pulahi naŋihia, ale tamlohi  
la pa hahau hinia. <sup>14</sup> Kamim ka so-  
hena malarani mata varama. Vara te  
taon tavera i lo toho aulu na vutivuti  
i pa sopo eŋi luhu. <sup>15</sup> Ale tamlohi la  
sopo tauhoro na lamu hin te tanga,  
pani la kehohia aulu vara i sile na  
merana isana tamlohi tari na lolo  
ima. <sup>16</sup> Ale sohen haratu, ha vai na  
maurimim i memera i ŋuhu matan  
vara tamlohi la pa hite na nomim  
vavahinau ŋuhu ka lo vaira, ale la pa  
tahe aulu na hijan Tamamim na tuka.

### *Vujangi Mata Leu*

<sup>17</sup> Ha sopo ŋomŋomia vara na mai  
vara a lavi naŋihi na leu teni sava  
p̄rovet la vere. Na sopo mai vara  
a lavi naŋihira, pani vara hinau tari  
la pa masese hinira. <sup>18</sup> Varaŋuhu na  
vere kamim hinia, i pa sopo te sope  
maki teni te reti hatea i eŋi tihai na  
Leu non God vavano hinau tari hinia  
la masese tiroma moiso tuka peresi  
na varama la pa tihai. <sup>19</sup> Vara tea  
mo tope te retileu rihirihi matea na  
leu, ale mo lo vujangi na tinapua vara  
la vaia sohena, tamlohi atu i pa toho  
atano jea hin mauri atu God mo aulu  
hinia na tuka, pani vara tea mo lo  
ooloo na leu, ale mo lo vujangi na  
tinapua vara la ooloo na leu, tamlohi  
atu i pa lavi na hija aulu hin mauri  
atu God mo aulu hinia.

<sup>20</sup> Na vere kamim hinia, vara  
nomim posposi mo sopo tataholo  
varaŋuhu, i jue na posposi tataholo

halu nona Pharisee peresi na tamlohi  
vujangi mata leu, ha pa sopo eŋi unu  
hin mauri atu God mo aulu hinia.

### *Vujangi Mata Lolokoru*

<sup>21</sup> Ka rongo na sava la vere isana  
tamlohi tuai lara, 'Ha sopo vilimatei  
na tamlohi. Vara tea mo vilimatei te  
tamlohi i pa turu na aria.' *Exo 20.13;*  
*Deut 5.17*

<sup>22</sup> Pani na vere isamim, vara ka  
lolokoru peresi na voraimim matea,  
ka levosahia moiso vara ha pa turu  
na aria, ale vara ha kali te voraimim  
hatea, ka levosahia moiso vara ha  
pa turu na court tavera nona Jew,  
ale vara ha vere na voraimim matea  
vara mo ŋommate, ka levosahia  
moiso vara ha pa vano hin hapu atu  
na moruhapu.

<sup>23</sup> Ale matana, vara ka lo lavi na  
nomim silesilea vara ha pa taua na  
votavota mata malamalai, ale vara  
ka ŋomŋomia vara voraimim matea  
mo lolokoru hin kamim matan ka  
vai te hinau matea, <sup>24</sup> ale ha tau na  
nomim silesilea atu na votavota mata  
malamalai, ale ha vano ha vai na  
tamata peresia tiroma, moiso ha pa  
mele mai vara ha sohai na nomim  
silesilea. <sup>25</sup> Vara nomim meresahi  
mo opoia vara i tau kamim na court  
ha vaia i mai tapalamim matea vila  
na malele ka lo vano na court. Vara  
i vono i pa vai kamim ha vano na  
lima tamlohi aria, ale i pa tau kamim  
na lima tamlohi mata ima ŋilangi,  
ale i pa tau kamim na ima ŋilangi.  
<sup>26</sup> Varaŋuhu, na vere kamim hinia,  
ha pa sopo eŋi malue hin ima ŋilangi  
atu i tikeli na rani ha voli vevuhi na  
nomim ave ka vaira.

### *Vujangi Mata Lahi*

<sup>27</sup> Ka rongo na sava la vere moiso  
lara, 'O sopo juruvi peresi te haŋai mo  
sopo naroum'. *Exo 20.14; Deut 5.18*

<sup>28</sup> Pani na vere kamim hinia, vara  
tea mo kilau na haŋai matea ale mo  
ŋomusuri hinia, mapuna mo pete  
vaivaileu peresia moiso. <sup>29</sup> Vara  
matua matam mo hite te hinau mo  
vaiho ko opoia vara o vai na hehe,  
o julai naŋihia o pulahia. I pa mele  
ŋuhu jea vara te tavalu epem hatelete  
purongo i tihai hin haratu vara enira

mo isoiso la pulahira na moruhapu. <sup>30</sup> Vara marau limam mo vaiho ko opoia vara o vai na hehe, o tai rotoa o pulahia. I pa mele ōhuhu jea vara te tavalu epem hatelete purongo i tihai hin haratu vara enira mo isoiso la pulahira na moruhapu.

*Vujangi Mata Rohu Na Naroum*  
(Mt 19.9; Mk 10.11-12; Lk 16.18)

<sup>31</sup> La ulia moiso vara tea mo opoia vara i ōhuhu hin narouna i pa eŋi sile na certificate matea mata i ōhuhu purongo hinia. <sup>32</sup> Pani enau na lo vere kamim hinia, vara mo sopo tataholo vara tea i ōhuhu hin narouna matan te hinau, pani vara narouna mo vai na posposi viriu peresi na tamlohi tinapua, ale vara te tamlohi tinapua i lahi peresi na haŋai sohen haratu, tamlohi atu mo vaivaileu peresia.

*Vujangi Mata Retitauhi*

<sup>33</sup> Ka rongoa la vereea isana piŋa tuai lara, 'O sopo tope na nom retitauhi, ale o pa turu na nom retitauhi ko vaia na hijan Moli'. *Num 30.2*

<sup>34</sup> Pani enau na vere kamim hinia vara ha sopo vere na nomim retitauhi na hijan tuka matan tuka enia jara sakele mata suiha non God, <sup>35</sup> ha sopo vere na nomim retitauhi na hijan varama matan varama enia jara palon God. Ha sopo vere na nomim retitauhi na hijan Jerusalem, matan haratu enia taon tavera non supe tavera atu. <sup>36</sup> Ale ha sopo vere na nomim retitauhi na patumim matan ha sopo eŋi vai te vulu hatea i lulu teni i viriha. <sup>37</sup> Vara ha vere na nomim retitauhi ha vereea purongo vara 'io!' teni 'mo vono!' Ha sopo mele vere te hinau i aulu hin haratu matan hinau tinapua mo tai isan Tiapolo.

*Vujangi Mata Kelekele*  
(Lk 6.29-30)

<sup>38</sup> Ka rongoa la vereea tuai moiso lara, 'Mata matea mata mata matea' ale 'Huŋu matea mata huŋu matea'. *Exo 21.24; Lev 21.24*

<sup>39</sup> Pani nake enau na lo vere kamim hinia vara ha sopo kele haratu mo komo kamim. Vara tea i vojai na

tavalu esem o majinga hinia vara i mele vojai na tavalu esem tinapua. <sup>40</sup> Vara tea mo reveho ko vano na court matan vara o sile na nom ruru isana, o silea peresi na nom ruru mata hamariri. <sup>41</sup> Vara te tamlohi vuro mo lo ngurunguru hiniho vara o sapele na nona tanga mata kilometre matea, o sapelea mata kilometre i rua. <sup>42</sup> Vara tea i usiho matan te nona opoia o silea, ale o sopo ōhuhu vara tea mo opoi te nom hinau tako.

*Opoi Nom Meresahi*  
(Lk 6.27-28, 32-36)

<sup>43</sup> Ka rongoa la vereea moiso lara, 'O opoi na tahisam!' Ale lara, 'O ōhuhu na nom meresahi!' *Lev 19.18*

<sup>44</sup> Pani enau na lo vere kamim hinia vara, ha opoi na nomim meresahi, ale ha usiusi matan la haratu la lo tipahi kamim, <sup>45</sup> matan vara ha pa vai na vavahinai non la haratu la natun Tama varaŋuhu na tuka, matan enia mo vai na alo mo mera isana tamlohi ōhuhu peresi na tamlohi sasati, ale mo sile na usa isana tamlohi tataholo peresi na tamlohi lejileji. <sup>46</sup> Matan vara ha lo opoi la haratu purongo sei la lo opoi kamim, ha pa sopo lavi na nomim otori isan God, ale la haratu la lo lavi na mania mata takis la lo opoi na tapalara purongo, ale ka hitea, la pa sopo lavi te volira matana. <sup>47</sup> Ale vara ha lo retioloolo isana tapalamim purongo, ka sopo vai te hinai ōhuhu i jeu na tamlohi ōŋoha matan enira la lo retioloolo isana tapalara purongo sohemim. <sup>48</sup> Ale matana, na lo vereea vara tarea ha pa vai na hina tataholo sohen Tamamim na tuka mo tataholo ōhuhu."

## 6

*Vujangi Mata Tueni*

Ale Iesu mo mele vereea mara,

<sup>1</sup> "Vara ka vai na hina ōhuhu na naho tamlohi, ha sopo vaia matan vara tamlohi la pa hasohaso kamim matana, matan vara ha vaia sohen, Tamamim na tuka i pa sopo sile na otori isamim.

<sup>2</sup> Vara ka silesile isana tamlohi tilavono, ha sopo tiv na tavue

matana. Hinau atu tamlohi tapnetano la lo opoia mo tavera vara la lo vaia na naho tamlohi na ima lotu, ale na jingoima vara la pa hasohasora matana. Varaʻuhuhu, na vereā isamim, enira la pete lavi na volira moiso. <sup>3</sup> Ale vara ha sile te hinau isana tilavono, ha sopo vaia vara tinapua i levosahia, <sup>4</sup> matan vara sava ka silea na jara luhu, Tamamim mo lo hite na sava ka lo vaia na jara luhu, ale enia i pa sile na otori isamim matana.

*Vujangi Mata Usiusi*  
(Lk 11.2-4)

<sup>5</sup> Vara ka usiusi, ha sopo usiusi sohena tapnetano la lo vaia na ima lotu teni na jingoima vara tamlohi la pa hasohasora matana. Varaʻuhuhu, na vereā isamim, enira la pete lavi na volira moiso. <sup>6</sup> Pani engko vara ko usiusi o sivo na lolo ima o pelati na matarua, ale o usiusi isan Tamam tea i sopo hiteho. Tamam mo lo hite na sava ko lo vaia hin jara luhu atu, moiso o pa lavi na nom otori matana.

<sup>7</sup> Ale vara ha usiusi ha sopo verevere vono sohena tamlohi ʻroʻroha. La lo ʻromʻromia vara nora god la pa ʻfaramira matan nora reti mo matuvana. <sup>8</sup> Matan haratu, ha sopo sohera matan Tamamim mo pete levosahi na nomim opoia moiso ka pa usia isana. <sup>9</sup> Ale ha usiusi sohen harihi: God Tamamam na tuka,

kama opoia vara tamlohi tari  
la sile na ololo tavera isam  
mata engko ko tapu,

<sup>10</sup> kama opoia vara nom  
suiha aulu mata supe i pala,  
o vai na masalom na varama  
i tataholo sohen ko lo vaia na  
tuka,

<sup>11</sup> o sile kamam na hanhani  
matan nohorihi,

<sup>12</sup> o ʻromi kamam  
mata nomam hehe,  
sohen kama lo ʻromi

na hehe nona tamlohi tinapua,  
<sup>13</sup> o lavi naʻrihi kamam na vaihite,  
o juri kamam hin Tiapolo.

<sup>14</sup> Matan vara ha ʻromi na tinapua na nora hehe la vaia isamim, Tamamim na tuka i pa ʻromi kamim mata nomim hehe. <sup>15</sup> Pani vara ha

sopo ʻromi na tinapua, Tamamim i pa sopo ʻromi na nomim hehe.

*Tapuhoro Na Hanhani Mata Usiusi*

<sup>16</sup> Na rani vara ka tapuhoro na hanhani ha sopo vai na nahomim la rara sohena tapnetano la lo vaia. Varaʻuhuhu, na vereā isamim, enira la pete lavi na volira moiso. <sup>17</sup> Pani vara ko tapuhoro na hanhani, o hoje na nahom, o paspasi na patum hin te makomo wel, <sup>18</sup> matan vara tinapua la pa sopo levosahia vara ko tapuhoro na hanhani mata usiusi, pani matan vara haratu mo sopo tea i eʻri hitea enia Tamam sei, enia hasena i pa hite na sava ko lo vaia na jara luhu, moiso i pa sile na nom otori matana.

*Tavtav Na Tuka*  
(Lk 12.33-34)

<sup>19</sup> Ha sopo takonahi na tavgav na varama, matan pepe peresi ʻraeha la pa komora, ale tamlohi vavanaho la pa kauti na ima la unu vara la vanahora. <sup>20</sup> Pani ha takonahi na nomim tavgav aulu na tuka matan pepe peresi na ʻraeha la pa sopo eʻri komora, ale tamlohi vavanaho la pa sopo unu la vanahora, <sup>21</sup> matan mapum i pa lo toho tarea na jara nom tavgav mo lo toho ea.

*Malarani*  
(Lk 11.34-36)

<sup>22</sup> Matam enia mo sohena glas niro matea mata epem. Vara matam mo niro mo ʻruhu, memera i pa maʻivisi na epem. <sup>23</sup> Pani vara matam mo sovsoha, epem tari la pa ʻroʻroha. Vara malarani na lolom mo sopo malarani, pani mo ʻroʻroha, ʻroʻroha atu i pa tavera jea.

*Mania*  
(Lk 16.13)

<sup>24</sup> Mo sopo tea i eʻri volitusi varaʻuhuhu isana tamlohi tavera tinapua i rua. I pa opoi matea i jeu haratu matea, teni i pa ololo hin matea i jeu haratu matea. Ha pa sopo eʻri volitusi isan God na tavalu limam matea, ale

na tavaluna tinapua ha volitusi isana mania! \*

*Romkaka*  
(Lk 12.22-31)

<sup>25</sup> Na vere kamim hinia vara ha sopo řomkaka mata maurimim, ha sopo řomkaka vara sava ha pa hania, teni ha pa inu te sava, teni ha pa rua na sava. Sohena sava mauri mo sopo jeu na hanhani, ale epemim mo sopo jeu na ruru? <sup>26</sup> Ha to kilau sahe na maji avuavu na masapa! La sopo lalavo teni la vu na asitauni. La sopo takonahi na piri na ima piri, pani Tamamim na tuka mo lo kilaura. Sohena sava ka řom vara ka sopo řuhu jea i jeu na maji avuavu? <sup>27</sup> Romkaka, i eři vai kamim ha mauri i mele peravu?

<sup>28</sup> Mo sopo řuhu vara ha lo řomkaka mata nomim ruru. Ha kilau vano sohena sava pa vira jala la lo ulua. La sopo voko vara lakolako na epera. <sup>29</sup> Pani na vere isamim vara supe Solomon peresi na nona tavgav tari peresi na nona ruru řuhu mo lo rura, la sopo řuhu sohen te vonara hatea. <sup>30</sup> Vara God mo vai na hinau la ulua hasera na jara tavera la řuhu jea mata makomo rani purongo, pani pavuho la mate, ale la pulahira na hapu, pani ha lo levosahia, God i pa kilau mamahuni kamim i mele řuhu jea i jeu la vira jala sei. Mata sava nomim rasua mo rihirihi purongo?

<sup>31</sup> Ha sopo řomkaka vara, ‘řa pa hani te sava hinau?’ teni ‘řa pa inu na sava?’ teni ‘řa pa ru te sava?’ <sup>32</sup> Haratu sei la tamlohi řořoha la lo řomkaka matan la hinau tari sei. Tamamim na tuka mo levosahi na hinau tari ka opoira. <sup>33</sup> Pani ha ale mauri atu God mo aulu hinia tiroma peresi na nona posposi tataholo, ale hinau tari sei la pa nomim.

<sup>34</sup> Ha sopo řomkaka matan pavuho, matan pavuho i pa hasena kilaua. Ale rani hatehateahi la pa lavi na nora hina řilangi hasera.

\* **6:24:** Matam nike enia mapum, vara mapum mo hehe o pa opoi na hinau mata řořoha, ale hina řořoha la pa taurilati na maurim tari.

## 7

*Ha Sopo Ari Na Tinapua*  
(Lk 6.37-38, 41-42)

<sup>1</sup> Ha sopo ari na tinapua matan vara God i pa sopo ari kamim. <sup>2</sup> Na sava malele ka lo ari na tinapua hinia, la pa ari kamim hinia sohena, vara nomim aria mo puhoni isana tinapua, God i pa vaia sohena isamim. <sup>3</sup> Ko eři hitevosahi na utauta rihirihi na matan voraim, pani mata sava ko sopo eři hitevosahi na masunga vipahai na matam? <sup>4</sup> Teni o pa eři vere isan voraim sohena sava vara, ‘Tapala o tinařihiau a lavi nařihi na utauta rihirihi matea na matam!’ pani ko sopo hitevosahi na masunga vipahai na matam hasem? <sup>5</sup> Engko tapnetano, o lavi nařihi na masunga vipahai na matam hasem tiroma, matan vara o pa eři kilau i řuhu vara o lavi nařihi na utauta rihirihi na matan voraim.

<sup>6</sup> Ha sopo sile na hina tapu non God isana viriu, matan enira la pa posi la hatisatihiko, ale ha sopo sile na nomim huřutavila isana poi, matan la pa lo varasihira purongo.

*Usia, Alea, Rerengi*  
(Lk 11.9-13)

<sup>7</sup> Ha usia, ale la pa silea isamim, ha alea, ale ha pa vileia, ha řerengi, ale pelati i pa roi isamim. <sup>8</sup> Haratu la usia la pa lavia, haratu la alea la pa vileia, ale la haratu la lo řerengi, pelati i pa roi isara. <sup>9</sup> Teni te vonamim i pa eři sile na vatu isan natuna vara mo usia na pereti? <sup>10</sup> Teni te vonamim i pa eři sile na mata isan natuna vara mo usia na maji tasi? <sup>11</sup> Vara kamim tamlohi hehe ka levosahi na sava otori sei mo řuhu vara ha pa silea isana natumim, ka levosahia moiso vara posin Tamamim na tuka mo jeu na posposi tamlohi, ale i pa sile na otori řuhu isan la haratu la usia.

*Leu Mata Opoia*

<sup>12</sup> Ale matana, ha vaia isana tinapua sohena ka opoia vara la vaia isamim matan harihi mo mařivisi

na Leu non God peresi na reti nona pŕovet tuai.

*Malele Mo Rua*  
(Lk 13.24)

<sup>13</sup> Ha unu na matarua rihirihi, matan vao tavera la lo unu na matarua tavera, ale la lo usuri na malele mo tavera sei mo lo vano na talai non God, ale i pa komora. <sup>14</sup> Pani matarua atu mata unu na malele mata mauri mo rihirihi, malelena mo řilangi, ale tupu visaletē purongo la vileia.

*Pŕovet Haluhalu*  
(Lk 6.43-45)

<sup>15</sup> Ha lo kilau mata pŕovet haluhalu! La pa mai sohena tamlohi tuetueni, pani na lolora la sohen viriu varavarahati matan la pa komo na nomim rasua. <sup>16</sup> Ha pa eři hitevosahira na nora vavahinau. Ha sopo eři vu na vua grape na talu kaulu teni vua fig na asi matemate. <sup>17</sup> Hin malele atu pahai řuhu tari la pa sile na vua řuhu, pani pahai sati i pa sile na vua sasati. <sup>18</sup> Pahai řuhu i sopo eři sile na vua sasati, ale pahai sati i sopo eři sile na vua řuhu. <sup>19</sup> Pahai tari sei la sile vua sasati la pa taijovira, ale la pulahira na hapu. <sup>20</sup> Ha pa eři hitevosahi na pŕovet haluhalu na nora vavahinau.

*Retiřoařoahai Matea*  
(Lk 13.26-27)

<sup>21</sup> Mo sopo tamlohi tari sei la lo toviau lara, ‘Moli! Moli!’ la pa lavi mauri atu God mo aulu hinia, pani la haratu purongo sei la lo ololo hin Tamaku na tuka la pa unu hinia. <sup>22</sup> Na rani mata aria, tamlohi matuvana la pa toviau vara, ‘Moli! Moli!’ La pa vereea lara, ‘Kama lo retivujavujangi na hijam, ale na hijam kama lo titiu na tanume sasati, ale kama lo vai na hina mařurahi matuvana hinia.’ <sup>23</sup> Pani a pa vereea isara vara, ‘Kamim, ka sopo noku tamlohi! Ha malue, kamim ka tamlohi tope na leu!’

*Ima Mo Rua*  
(Lk 6.47-49)

<sup>24</sup> Ale vara tea mo rongo na noku reti, ale mo vaira, mo sohena tamlohi lelevosahi matea sei mo voro na

imana na vatu. <sup>25</sup> Tavera mo jovi, ale wai mo tavei mo mai peresi na langi řilangi la vili ima atu, pani mo sopo jovi matan mo voroa na vatu. <sup>26</sup> Ale vara tea mo rongo na noku reti, pani mo sopo vaira, mo sohena tamlohi rongorongō vono matea sei mo voro na imana na oneone. <sup>27</sup> Tavera mo jovi, ale wai mo tavei mo mai peresi na langi řilangi la vili ima atu, ale ima atu mo jovi mo maroe.”

<sup>28</sup> Hin rani atu Iesu mo vere harihi mo isoiso, vao atu la mařurahi tavera na nona vujangi, <sup>29</sup> matan mo vujan-gira sohena tamlohi aulu matea, mo sopo sohena nora tamlohi vujangi mata leu.

## 8

*Tamlohi Lepros Matea*  
(Mk 1.40-45; Lk 5.12-16)

<sup>1</sup> Hin rani atu Iesu mo lo sevuti na vutivuti atu, vao tavera jea la lo usuria. <sup>2</sup> Ale hin rani atu tamlohi leproso matea mo mai mo papaohi isana mo vereea mara, “Moli, vara o opoia, o eři vaiau a vokevoke na noku rojoa.”

<sup>3</sup> Iesu mo sohai na limana moiso mo tikelia, ale mo vereea mara, “Enau na opoia. O vokevoke!” Vahatea purongo lepros atu mo tihai. <sup>4</sup> Moiso Iesu mo vereea isana mara, “O sopo vere hiniau nike isan tea, pani o vano o hase vujangiho isana pŕis vara ko mele řuhu, ale o sile na hina silesilea sohen Moses mo retileu hinia matan vara tamlohi tari la pa levosahia vara engko ko vokevoke moiso.”

*Rasua Hin Iesu*  
(Lk 7.1-10; Jn 4.43-54)

<sup>5</sup> Ale Iesu mo pa lo unu na vanuan Capernaum, captain mata tamlohi vuro matea mo mai isana mo usia řilangi isana, <sup>6</sup> mara, “Moli, o tueniau, noku volitusi mo lo juruvi na ima, epena mo řira, mo lo lavi na rani řilangi tavera.”

<sup>7</sup> Moiso, Iesu mo vereea isana mara, “A pa vano a vai na nona rojoa i tihai!”

<sup>8</sup> Pani captain mata tamlohi vuro atu mo vereea mara, “Moli, enau na sopo řuhu matan vara o unu na

imaku, pani o vereā purongo, ale noku volitusi i pa řuhu. <sup>9</sup> Matan enau sohem, na lo toho na ruhuruhu suiha aulu tinapua, ale la sileau na suiha vara a aulu na noku tamlohi vuro, vara a vere isan te hatea vara, ‘O vano!’ ale i pa vano, vara a vere isan te tinapua vara, ‘O mai!’ ale i pa mai, vara a vereā isana noku volitusi vara, ‘O vai haranike!’ ale i pa vaia.”

<sup>10</sup> Ale Iesu mara mo rongō hinau sei mo mařurahi tavera, ale mo posi mo vereā isan vao atu la lo usuria mara, “Vara řuhu na vereā isamim vara na sopo lo tapai te rasua sohen harihi na lolon Israel. <sup>11</sup> Na vereā, tamlohi matuvana na jara tari na varama la sopo Jew, la pa mai la sakele matavuhi na hanhani tavera peresi Abraham, Isaac enia Jacob hin mauri atu God mo aulu hinia. <sup>12</sup> Pani tatua tahisan Abraham la pa pulahira na řořoha tavera, la pa tangi, ale la pa nařnařoři na huřura.”

<sup>13</sup> Ale Iesu mo vereā isan captain atu mara, “O eři vano na imam natu. Ale i pa masese sohen ko rasua.” Va-hatea nona volitusi mo mele řuhu.

*Mo Vaitihai Na Rojoa*  
(Mk 1.29-34; Lk 4.38-41)

<sup>14</sup> Iesu mo pa lo unu na iman Peter, ale mo hite vepalihan Peter mo lo juruvi na vata mo sereia. <sup>15</sup> Mo tauri na limana, ale seserei atu mo tihai moiso hařai atu mo mele turu mo vai na hanhani hani Iesu.

<sup>16</sup> Hin ravravi atu, tamlohi la lavi na tamlohi matuvana sei tanume sasati mo unu hinira la mai isan Iesu, ale mo reti purongo, ale nona reti atu mo titiu nařihi na tanume sasati isara, ale mo vai na tamlohi rojo tari la řuhu. <sup>17</sup> Ale sava přovet Isaiah mo vereā moiso mo masese sei mara:

‘Mo lavi nařihi na nořa rojoa, ale mo vaiřa řa řuhu.’ *Isa 53.4*

*Mauri Vara O Usuri Iesu*  
(Lk 9.57-62)

<sup>18</sup> Iesu mara mo hite na vao tavera atu la lo mai la lo turu porotia, ale mo vereā isana nona tamlohi vara la pa usuria la vano roto na tasin Galilee.

<sup>19</sup> La sopo lo vano tamlohi vujangi mata leu matea mo mai isana mara,

“Tija, a pa usuriho na sava jara o pa vano ea!”

<sup>20</sup> Iesu mo vereā isana mara, “Viriu jala nora jara juruvi la lo toho, ale maji avuavu taura la lo toho, pani Natun Tamlohi mo sopo te jara vara i lo toho ea.” *Dan 7.14*

<sup>21</sup> Nona tamlohi usuri tinapua matea mara, “Tija, a pa mai, pani o tinařihiā vara a tavuni tamaku tako.”

<sup>22</sup> Pani Iesu mo vereā isana mara, “O usuriau! Haratu la mate la pa tavuni na nora mate!”

*Mo Horo Na Langi Tavera*  
(Mk 4.35-41; Lk 8.22-25)

<sup>23</sup> Ale Iesu mo pa lo vele hin boti atu, nona tamlohi usuri la usuria, <sup>24</sup> ale hin rani atu la vano, ale langi tavera matea mo jovi hin tasi atu, ale mariviti suhusuhu la lo putehi na botira natu, pani Iesu mo lo juruvi, <sup>25</sup> ale na nona tamlohi la vano isana la řohaia lara, “Tija! O juriřa! Ra lo pute!”

<sup>26</sup> Pani Iesu mo vereā isara mara, “Ka matahu mata sava? Nomim rasua mo rihirihi hajavua!” Ale mo turu mo reti řilangi isana langi peresi tasi atu vara la tamata, ale hinau tari la tamata.

<sup>27</sup> Ale la nona tamlohi atu la mařurahi tavera hinia lara, “Sava tamlohi nahai sohena, matan langi peresi na tasi sohena la oloolo hinia?”

*Mara Gadara Na Taptap*  
(Mk 5.1-20; Lk 8.26-39)

<sup>28</sup> Iesu mo hoso na tavalu tasi atu mariviti hin jara tavera atu Gadarene, ale hin jara atu tamlohi mo rua tanume sasati la lo toho hinira, la tai na taptap la mai isana. La tupra rua atu enira la putu, ale la lo vaisati na tamlohi, ale la vai na tamlohi la matahu matan vara la lo hahau hin jara atu. <sup>29</sup> Ale vahatea purongo, la ulo lara, “Natun God! Engko te nom sava isamam! Ko mai nakerihi matan vara o sile na talai isamam sei mo sopo lo ranina tataholo?”

<sup>30</sup> Vao poi tavera matea mo lo toho asau makomona hinira la lo susua, <sup>31</sup> ale la tanume sasati atu la usia řilangi isan Iesu lara, “Vara o tiu

naʻihi kamam, o ʻrūle kamam kama unu hin vao poi atuvano!”

<sup>32</sup> Ale Iesu mo vereā isara mara, “Ha vano!” Moiso la malue la vano la unu hin vao poi atu, ale vahatea purongo vao poi atu la maro la solesole la jovi na pesapesa atu la pute na tasi. <sup>33</sup> Moiso tamlohi kilau na poi atu la maro la vano na taon tavera mariviti hin jara atu la vere na hināu tari la masese hin la tamlohi putu atu tanume sasati la lo toho hinira. <sup>34</sup> Ale hin rani atu tamlohi tari na nora taon tavera atu la mai vara la tapai Iesu, ale lara la hitea la usia ʻrīlangi isana vara i malue na jarara.

## 9

### *Tamlohi Papao Matea* (Mk 2.1-12; Lk 5.17-26)

<sup>1</sup> Ale Iesu mo mele vele hin boti atu mo hilu mo vano roto na tasi mo hoso mariviti hin taon atu mo lo tohoa ea. <sup>2</sup> Ale hin rani atu, tamlohi hai la lavi na tamlohi papao matea na epana la mai isana, ale Iesu mara mo hitevosahi na rasua nona tapalan tamlohi papao atu, mo vereā isana mara, “Natuku, ʻromim i ʻrīlangi! Na ʻromiho mata nom hehe.”

<sup>3</sup> Ale hin rani atu, tamlohi vujangi mata leu hai la lo toho atu la lo hasera ʻromʻromia na ʻromira lara, “Tamlohi akerihi mo lo vaia sohena enia God.”

<sup>4</sup> Pani Iesu mo levosahi na sava la tamlohi sei la lo ʻromʻromia, ale mo vereā mara, “Ka lo ʻromhehe na mapumim mata sava? <sup>5</sup> Sahara mo mele malum vara a vereā isan tamlohi papao nike? ‘Enau na ʻromiho mata nom hehe!’ Teni vara a vereā vara, ‘O turu! O hahau!’ <sup>6</sup> Pani matan vara ha pa levosahia vara Natun Tamlohi mo lavi na suiha vara i ʻromi na hehe nona tamlohi na varama, ha tapurongo!” Ale Iesu mo vereā isan tamlohi papao atu mara, “Na vereho hinia, o turu, o viriviri na epam, ale o mule!”

<sup>7</sup> Ale tamlohi papao atu mo turu mo mule. <sup>8</sup> Vao tamlohi atu lara la hitea, matahu mo sohonira, ale la tahe na hijan God matan enia mo sile na suiha sohen harihi isana tamlohi.

### *Iesu Mo Tovi Matthew* (Mk 2.13-17; Lk 5.27-32)

<sup>9</sup> Iesu mo pa lo vano, mo hite na tamlohi matea mo lo lavi na mania mata takis mo lo sakele na jara mata voli na takis. Iesu mo vereā isana mara, “Eh! O mai o usuriau!” Ale Matthew mo turu, mo usuria.

<sup>10</sup> Hitahu Iesu peresi na nona tamlohi usuri la lo sakele la lo hanhani na iman Matthew, ale hin rani atu tamlohi mata lavi na mania mata takis peresi na tamlohi hehe tinapua matuvana sohera la lo sakele la lo hanhani peresira. <sup>11</sup> Pharisee atu lara la hitea, ale la usi na tamlohi usuri non Iesu lara, “Mata sava nomim tija mo lo hanhani matavuhi peresi la haratu la lo lavi na mania mata takis peresi la tamlohi hehe tinapua sei?”

<sup>12</sup> Pani Iesu mara mo rongoa mo vereā mara, “Haratu la sopo rojo la sopo opoi na doctor, pani la haratu la rojo la opoia. <sup>13</sup> Ha vano ha levosahi na ʻraramin Retiulia sei mo vereā vara, ‘Na sopo opoi na malamalai, pani na opoia vara ha ʻromopoi na tinapua.’ Enau na sopo mai vara a tovi la haratu la tataholo moiso vara la mai noku tamlohi, pani na mai vara a tovi la haratu la hehe.” *Hos 6.6*

### *Tapuhoro Na Hanhani* (Mk 2.18-22; Lk 5.33-39)

<sup>14</sup> Na rani matea tamlohi usuri non John tamlohi paptijo la mai isan Iesu la usia lara, “Mata sava kamam peresi na Pharisee na rani matuvana kama lo tau na rani mata tapuhoro na hanhani mata usiusi, pani nom tamlohi usuri la sopo tapuhoro na hanhani mata usiusi?”

<sup>15</sup> Iesu mo ʻraramira mara, “Tavtavui tamlohi i pa lahi la sopo eʻri tapuhoro na hanhani mata usiusi hin rani atu la lo toho peresia. Pani vara nona meresahi la mai la lavi naʻihia isara, ale hin rani atu natu la pa tapuhoro na hanhani mata usiusi.

### *Tavalu Ruru Paro*

<sup>16</sup> Te tamlohi i sopo eʻri lavi te tavalu ruru paro hatea i silivi na ruru tuai hinia. Vara i vaia sohena, tavalu ruru

paro atu i pa vaia i maʻari tavera i jeu haratu tiroma.

#### *Waen Paro*

<sup>17</sup> Te tamlohi i sopo eʻi titisi na waen paro i sivo na jara waen la vaia na huri nani tuai matan waen paro atu i pa sosohi i ʻari jara waen atu, ale i pa komoa peresi waen atu matan i pa roro naʻihi. Waen paro mo tata-holo na jara waen la vaia na huri nani paro purongo matan vara jara waen atu la vaia na huri nani peresi waen atu la pa toho i ʻuhu i tuai.”

#### *Tamlohi La Tau Na Nora Rasua Hin Iesu*

(Mk 5.21-43; Lk 8.40-56)

<sup>18</sup> Iesu mo pa lo vere harihi, ale vahatea tamlohi aulu matea mo mai isana, mo papaohi isana mo vereea mara, “Venatuku mo mate nakerihi. O mai o tau na limam isana, ale i pa mele mauri.”

<sup>19</sup> Iesu peresi na nona tamlohi usuri la turu la usuri tamlohi atu. <sup>20</sup> La lo vano, ale vahatea haʻai matea mo rojo na rojo nona haʻai tauni mo sangavulu ʻromana mo rua moiso mo mai na haʻina mo tikeli na revurevu ruru non Iesu. <sup>21</sup> Mo lo vereea isana hasena mara, “Vara a eʻi tikeli na nona ruru purongo a pa mele ʻuhu.”

<sup>22</sup> Ale Iesu mo posi isana mo hitea mo vereea mara, “Romim i ʻilangi! Nom rasua mo vaiho ko mele ʻuhu.” Ale haʻai atu mo mele ʻuhu vahatea purongo.

<sup>23</sup> Hin rani atu Iesu mara mo unu na iman pa tamlohi aulu atu, mo hite na tamlohi roro la lo roro na flute peresi na vao la lo tangtangi, <sup>24</sup> mo vereea mara, “Ha malue! Haʻarihi sei mo sopo mate! Mo juruvi ʻromaliho purongo!” Tamlohi tari atu la man-aluluhi Iesu. <sup>25</sup> Pani lara la sohai vao atu la sahe na jingoima moiso, Iesu mo unu mo vano na pahisa vatan haʻarihi atu, mo tauri na limana, ale haʻarihi atu mo turu. <sup>26</sup> Ale sorasorahina mo vano ʻalihi na jara tari atu.

#### *Iesu Peresi Na Matavuso*

<sup>27</sup> Moiso Iesu mo lo malue hin jara atu, ale tamlohi matavuso mo rua la lo usuria la lo ulo lara, “Mahapin Supe David, o ʻromopoi kamam!”

<sup>28</sup> Ale Iesu mara mo unu na ima matea, la matavuso atu la mai isana. Iesu mo usira mara, “Ka rasua vara a pa eʻi vai kamim ha ʻuhu?”

La ʻaramia lara, “He'e Moli.”

<sup>29</sup> Ale Iesu mo tikeli na matara mara, “Matan nomim rasua, i pa sohena isamim.” <sup>30</sup> Ale la matavuso atu la kilau, pani Iesu mo re-tiʻoaʻoaʻhaira vara la pa sopo mele vereea isan tea, <sup>31</sup> pani la malue la lo sorahia isana tamlohi tari sei la tapaira na jara tari atu.

#### *Tamlohi Mengo Mo Retireti*

<sup>32</sup> Iesu peresi na nona tamlohi la pa lo vano, ale vahatea purongo tamlohi hai la lavi na mengo matea mo mai isana mo mengo matan tanume sasati matea mo lo toho hinia. <sup>33</sup> Ale Iesu mara mo tiu naʻihi tanume sasati atu hinia, mengo atu mo retireti. Vao tavera atu la maʻurahi tavera la lo vereea lara, “Mo sopo lo te hinau sohen harihi i malue Israel mo tikeli nake.”

<sup>34</sup> Pani Pharisee la vereea lara, “Tamlohi tavera nona tanume sasati mo silea na suiha vara i tiu naʻihi na tanume sasati sohen harihi.”

#### *Iesu Mo Romopoirā*

<sup>35</sup> Ale Iesu mo vano mo lo vujangi na nora ima lotu na taon tari peresi na vanua tari atu. Mo retivujavujangi na Retiʻuhu hin mauri atu God mo aulu hinia isara, ale mo vai la haratu la rojo peresi la haratu la majuejue mata rojoa la mele ʻuhu.

<sup>36</sup> Hin rani atu Iesu mo hite la vao tamlohi atu, mo ʻromopoirā matan ʻomira la jovi la sohena natu maʻua. La sohena sipsip mo sopo te tavuira.

#### *Num 27.17*

<sup>37</sup> Mo vereea isana nona tamlohi usuri mara, “Vua asitauni mo tavera jea, pani tamlohi isa la tupu visaletē purongo. <sup>38</sup> Ha usi tamlohi tavera atu sei mo aulu na asitauni vara i ʻule te tamlohi isa la vano na isana vara la vu na vua asitauni!”

## 10

#### *Tamlohi Usuri Non Iesu (Mk 3.13-19; Lk 6.12-16)*



<sup>1</sup> Ale Iesu mo tovi na nona tamlohi usuri mo sangavulu řomana mo rua, mo silera na suiha vara la eři tiu na tanume lumiha sasati, ale vara la eři vai la haratu la rojo peresi la haratu la mařemaře mata rojoa la sopo mele rojo. <sup>2</sup> Hija vahařule non Iesu mo sangavulu řomana mo rua enira nahai:

Simon, haratu la tovia Peter,  
tasina Andrew,  
ale James enia John natun Zebedee,

<sup>3</sup> Philip,  
Bartholomew,  
Thomas,

Matthew haratu mo lo lavi na mania mata takis,

ale James natun Alphaeus,  
Thaddeus,

<sup>4</sup> Simon mara Cana sei, enia tamlohi matea mata valum mata jarana,

ale Judas Iscariot, haratu mo lo turuposi hin Iesu.

*Mo Rule Na Nona Tamlohi  
(Mk 6.7-13; Lk 9.1-6)*

<sup>5</sup> Iesu mo řule la tupu sangavulu řomana mo rua atu, mo retileu mara, “Ha toho asau na jara tamlohi řořoha, ale ha sopo unu hin te taon non Samaria hatea, <sup>6</sup> ha vano isana tamlohin Israel purongo matan enira la sohena vao sipsip natu mařua matea, <sup>7</sup> ale ha vano ha retivujavujangi vara suiha atu non God mata supe i pa pala nohorihi. <sup>8</sup> Ha vai mamahuni la haratu la rojo, ha sauteterahi na mate, ha vai na tamlohi lepros la vokevoke, ha tiu nařihi na tanume sasati, matan ka lavi purongoi na suiha vara ha eři vai na hinau, ale ha sopo lavi te volimim matana isan tea. <sup>9</sup> Ha sopo lavi te mania na nomim tanga korohi, <sup>10</sup> ha sopo lavi te tanga mata nomim hahau, teni te ruru teni sabbat teni te tihonimim tinapua hatea matan mo tataholo vara tamlohi jara la pa lo kilau kamim tamlohi voko. <sup>11</sup> Ale vara sava taon teni vanua ka unu hinia, ha usira hinia vara sava tamlohi enia tamlohi la lo řomaulu hinia, ale ha pa toho peresia i tikeli rani atu ha mele malue hin jara atu.

<sup>12</sup> Vara ha unu hin te ima, ha sile na nomim leřuhu hinira. <sup>13</sup> Vara ka avulahi hin ima atu, ha sopo tinařihi na nomim leřuhu mata tamata, i pa lo toho isara, pani vara i vono, ha mele lavi nařihi na nomim leřuhu mata tamata isara. <sup>14</sup> Vara tea mo řohu hin kamim teni vara la sopo tapurongo na nomim retisohai, ha malue hin ima atu teni taon atu, ale ha sařsařihi nařihi na tangotango palomim isara.

<sup>15</sup> Varařuhu na vereea isamim, aria non taon akerihi i pa tavera i jeu na aria non Sodom enia Gomorrah. *Gen 19.24-28*

*Rani Rilangi La Pa Mai  
(Mk 13.9-13; Lk 21.12-17)*

<sup>16</sup> Ale nake natu, na lo řule kamim sohena natu sipsip isana vao viriu jala, matan haratu, ha pa tamlohi patuha, ale ha sopo vai te hinau i sati isara. <sup>17</sup> Ha lo kilau matan tamlohi la pa reve kamim na court, ale la pa tamaji kamim na nora ima lotu. <sup>18</sup> La pa reve tahitahi kamim ha vano isana tamlohi aulu peresi na supe na jara tinatinapua matan vara la pa ari kamim mataka, ale i pa sile na masapa vara ha vereuli na nomim rasua hiniau isana tamlohi řořoha. <sup>19</sup> Pani vara tea mo taurilati kamim ha sopo matahu vara ha pa vere na sava, teni ha pa vereea sohena sava, matan hin rani atu ha pa lavi na sava retireti ha pa vereea, <sup>20</sup> matan i pa sopo kamim ha pa retireti, pani Tanume Tapu sei mo tai isan Tamamim na tuka i pa vere kamim na sava ha pa vereea. <sup>21</sup> Vorai i pa turuposi hin voraina vara i mate. Tama i pa turuposi hin natuna. Natuvarihi la pa řohu hin tamara peresi na tinara matan vara la taura na mate. <sup>22</sup> Tamlohi tari la pa tipahi kamim matan ka lo rasuau, pani haratu mo turu řilangi mo tikeli na isoisona i pa juri. <sup>23</sup> Vara la tipahi kamim na taon matea ha rovo ha vano na taon tinapua mo mariviti isana. Varařuhu na vereea isamim, ha pa sopo lo isoiso řalihi na taon tari Israel, ale Natun Tamlohi i pa mele mai isamim.

<sup>24</sup> Tamlohi usuri la sopo aulu la jeu na nora tija, ale slev la sopo aulu la jeu na nora tamlohi tavera. <sup>25</sup> Tamlohi usuri matea i pa avulahi vara i sohen nona tija, ale slev i sohen nona tamlohi tavera. Enau na patu tamlohi tavera mata ima, pani la vereea vara patu tamlohi mata ima enia Beelzebul sei supe nona tanume sasati, ha lo levosahia vara la pa retisati hin kamim noku tamlohi.

*Ha Sopo Matahu  
(Lk 12.2-7)*

<sup>26</sup> Ha sopo matahunira. Mo sopo te hina luhu vara i pa sopo malue na jara tavera, ale hina luhu tari la pa pala na jara tavera. <sup>27</sup> Ha vere na sava na vereea isamim na řořoha ha vereea na malarani; ale ha pa retivujavujangi na jara tavera na sava na varavaramasa hinia isamim.

<sup>28</sup> Ha sopo matahuni na tamlohi sei la pa tipahi kamim. La eři vilimatei na epemim, pani la pa sopo eři komo na maurimim. Pani ha matahuni God, matan enia i eři komo na maurimim peresi na tarapemim na moruhapu. <sup>29</sup> Tamlohi tari la levosahia vara ha eři voli te vakarakara i rua na selen matea purongo. Pani mo sopo te hatelete vara i jovi na lepa Tamamim na tuka mo sopo levosahia. <sup>30</sup> Ale Tamamim mo levosahia vara yulu mo visa la lo toho na patumim. <sup>31</sup> Matan haratu, ha sopo matahu. Kamim ka aulu na nahon God ka jeu na vakarakara matuvana.

*Ha Sorahi Iesu  
(Lk 12.8-9)*

<sup>32</sup> Ale vara tea i vereea na naho tamlohi vara enia noku tamlohi, ale enau sohena a pa vereea isan Tamaku na tuka vara enia noku. <sup>33</sup> Pani vara tea i vereea vara mo řohu hiniau na naho tamlohi, a pa vereea na nahon Tamaku na tuka vara tamlohi atu mo řohu hiniau.

*Rani La Pa Sati  
(Lk 12.51-53; 14.26-27)*

<sup>34</sup> Ha sopo řomřomia vara enau na mai na varama vara a sile na tamata. Na sopo mai vara a sile na tamata, pani matan vara a ase na tamlohi.

<sup>35</sup> Matan na mai vara a vai na tamlohi i pa řohu hin tamana, ale venatuna i pa řohu hin tinana, ale narou natirihi i pa řohu hin tinan tuana. *Mic 7.6*

<sup>36</sup> Nomim meresahi la pa tai na lolo vaomim. <sup>37</sup> Haratu mo opoi tamana teni tinana teni na natuna peresi na venatun mo jeuau, enia mo sopo tataholo vara i mai noku tamlohi usuri. <sup>38</sup> Na vereea vara te mo sopo soloti na nona talopeilopei i usuriau, enia mo sopo tataholo vara i mai noku tamlohi usuri.

<sup>39</sup> Vara tea mo opoi na maurina enia i pa vaitihaia, ale vara tea mo řohu na maurina matakū, enia i pa vilei na mauri varařuhu.

*Volvoli Matan Tuka  
(Mk 9.41)*

<sup>40</sup> Haratu mo avulahi vara i lavi kamim, enia mo lo laviau, ale haratu mo laviau mo lavi haratu mo lo řuleau. <sup>41</sup> Haratu mo hitevosahi na přovet matea, ale mo avulahi mo lavia, enia i pa lavi na volina sohena přovet matea. Haratu mo hitevosahi na tamlohi tataholo matea, ale mo avulahi mo lavia, enia i pa lavi na otori sohen tamlohi tataholo atu. <sup>42</sup> Ale haratu mo hitevosahi na noku tamlohi usuri matea, ale mo silea na hina rihirihi matea sohena paniken wai hamařiri matea isana, varařuhu na vereea isamim, enia i pa lavi na nona otori matana.”

## 11

*John Tamlohi Paptijo  
(Lk 7.18-35)*

<sup>1</sup> Iesu mara mo lo retileu isan la nona tamlohi usuri atu mo sangavulu řomana mo rua moiso, mo malue mo vano řalihi na nora taon tavera la lo toho hin jara atu vara i vujangira ale i retivujavujangira.

<sup>2</sup> John mo lo toho na ima řilangi, ale mara mo rongō na sava Křisto mo lo vaira, mo řule na nona tamlohi usuri hai isana, <sup>3</sup> vara la usia isana lara, “Engko sei natu, haratu sei kama pa lo kilau matana, haratu sei God i pa řulea i sinai? Teni kama pa mele saovi matan te mele tinapua?”

<sup>4</sup> Iesu mo řaramira mara, “Ha vano ha vere John na sava ka rongoa, ale ka hitea. <sup>5</sup> Nake, matavuso la kilau, ale tamlohi papao la hahau, haratu lepros mo hatira la mele vokevoke, peropero la rongo, haratu la mate la turu na mauri, ale tilavono la lo rongo na Retiřuhu. *Isa*

*61.1* <sup>6</sup> Vara la haratu la sopo řomrua hiniāu, la pa avulahi tavera.”

<sup>7</sup> Ale la tamlohi atu la pa lo tapulo malue, ale Iesu mo sorahi John isan vao atu mara, “Hin rani atu ka lo vano vara ha hite John, ka vano hin urata hasetoho atu vara ha hite te hinau sohena talu ere sei mo sopo řilangi, ale langi mo serea mo lo hisuhisu teni mata sava? <sup>8</sup> Sava tamlohi natu, ka vano vara ha hitea? Ka hite tamlohi atu mo ru te ruru řuhu? Ka levosahia vara tamlohi sei la lo ru na ruru sohen haratu enira la tamlohi tavgav purongo sei la lo toho na ima supe. <sup>9</sup> Ka lo vano vara ha hite na sava? Te přovet matea? Varařuhu enia přovet matea, enjora, pani mo jeu na přovet, <sup>10</sup> Retiulia mo retireti hin John mara,

‘O lo levosahia vara,  
a pa řule na noku vahařule  
matea  
i tiroma hiniho vara i tatamahuni  
na hinau matam.’ *Mal 3.1*

<sup>11</sup> Varařuhu na vereā isamim, mo sopo lo tea i vora hin varama nike i jeu John tamlohi paptijo. Pani haratu enia tamlohi purongo hin la haratu la lavi mauri atu God mo aulu hiniā, enia i pa aulu i jeu John na pongi hitahu. <sup>12</sup> Mo tapulo na rani non John tamlohi paptijo mo tikeli nake, tamlohi hai la lo opoia vara la tauri na suiha vara la aulu, ale vara la vere na masalon God vara mo vano sohena sava hin varama nike, ale tamlohi sasahati sohena la lo vaihitea vara la taurilati suiha atu, <sup>13</sup> matan přovet tari peresi na Leu non Moses la lo retimangovi tuai moiso mo tikeli na rani non John. Vara ha evia ha pa levosahia vara i pa pala sohena sava. <sup>14</sup> Ale vara ka avulahi vara ha rasua, John enia Elijah, přovet atu

ka lo kilau matana, <sup>15</sup> haratu mo eři rongovosahia, o tapurongo!

<sup>16</sup> Kamim nakerihi ka sohena natu-varihi sei la lo vai na roro na jara maket, ale la lo uloulo isara lara, <sup>17</sup> ‘Kama roro na pue tangtangi, pani ka sopo velu! Kama lavi na vete mata řomi na tamlohi mate, pani ka sopo tangtangi!’ <sup>18</sup> Na vere harihi matan John tamlohi paptijo mo sopo vano řalihi vara i lo hanhani teni i lo inuinu peresi na tamlohi, pani ka vara, ‘Tamlohi sei tanume sasati matea mo lo toho hiniā!’ <sup>19</sup> Ale Natun Tamlohi mo lo hahau řalihi mo lo hanhani mo lo inu peresi na tamlohi, ale ka vara, ‘Tamlohi sei mo lo hanhani, ale mo lo inu hajavua. Enia tapala tamlohi la lo lavi na mania mata takis peresi la haratu la hehe.’ Vara ha sopo eři hitevosahi na lelevosahi kama lo vaia nake, ha pa eři hitevosahia na vuana hitahu.”

*Tamlohi Matuvana La Sopo Rasu Iesu*  
(*Lk 10.13-15*)

<sup>20</sup> Ale Iesu mo tapulo hapuhi la taon atu sei mo lo vai na hina mařurahi tavera hinira matan tamlohi hinira la řohu vara la tinařihi na nora hehe la mai isan God, Iesu mo vereā mara, <sup>21</sup> “Kamim tamlohin Chorazin, ha pa lavi na talai sasati tavera, ale kamim tamlohin Bethsaida sohena, ha pa lavi na talai sasati tavera! Matan, vara la hina mařurahi nike na vaira isamim na nomim taon la pa lo malue na taon non Tyre peresi Sidon, tamlohira la pete posi tuai moiso la vano isan God, ale la vujangia hin posposi matan tuai sei, la lo ru na parat paki, ale la tau na patmakovi na patura. *Ezek 26.1-28.26*

<sup>22</sup> Pani na vereā isamim, na rani mata aria tamlohin Tyre enia Sidon la pa malue i malum i jeu kamim. <sup>23</sup> Ale kamim tamlohin Capernaum ka řomi vara God i pa tahe kamim ha tikeli na tuka? Mo vono, ha pa sivo atano na varama mata mateia! Vara la hina mařurahi atu sei la lo malue na nomim taon la pa lo malue na taon

non Sodom, nake taon atu mo pa lo turu!

*Gen 19.24-28*

<sup>24</sup> Pani na vereā isamim, na rani mata ariā tamlohin Sodom la pa malue i malum i jeu kamim.”

*Ha Mai Isaku Ha Mapu  
(Lk 10.21-22)*

<sup>25</sup> Ale hin rani atu Iesu mo vereā mara,

“Enau na haso hasoho, Tamaku, Moli non tuka peresi na varama, matan ko jarohi la hināu tari nike isana tamlohi lelevosahi mata varama peresi na tamlohi la lavi na lelevosahi mata varama, pani ko vujangia isana tamlohi purongo.

<sup>26</sup> He'e Tamaku, matan harihi mo lo usuri na nom masalo ŋomŋuhu.

<sup>27</sup> Tamaku mo sileau na hināu tari, ale mo sopo tea, pani enia hasena purongo mo levosahi Natuna. Ale haratu purongo mo levosahi Tama, enia Natuna peresi la haratu Natuna mo opoia vara i vujangia isara.

<sup>28</sup> Vara ka malokoloko matan nomim tetēhi mo puhoni hajavua, ha mai isaku, ale a pa tueni kamim, ha pa lavi na mapu varaŋuhu. <sup>29</sup> Ha lavi na noku vujangi, ha lavi na maurimim, ale ha levosahi na malele isaku. Enau na malum, enau na ŋomatano, ale ha pa lavi na mapu varaŋuhu isaku.

*Jer 6.16*

<sup>30</sup> Noku vujangi mo sopo puhoni, noku vavahinau mo salesale purongo.”

## 12

*Retiusia Mata Sabbath  
(Mk 2.23-28; Lk 6.1-5)*

<sup>1</sup> Na rani mata Sabbath matea, Iesu mo lo hahau roto te isa wit. Ale nona tamlohi usuri la lo tapulo vesi roto na wit, ale la lo hanira.

*Deut 23.25*

<sup>2</sup> Pani Pharisee lara la hitera, la vereā isan Iesu lara, “O to kilau vano, nom tamlohi usuri la lo vai na hināu matea mo sopo tataholo vara la vaia na Sabbath.”

<sup>3</sup> Iesu mo vereā isara mara, “Korong ka sopo lo evi na sava David peresi la haratu la lo toho peresia la vaia na rani la marohati. *1 Sam 21.1-6* <sup>4</sup> Ale sohena sava mo unu hin ima

ruru atu la lo lotu God ea, ale mo hani na pereti sei mo sopo tataholo vara enia teni nona tamlohi vara la hania matan enia mata pŋis hasera?

*Lev 24.9*

<sup>5</sup> Teni korong ka sopo lo evi na Leu sohena sava na rani Sabbath, na lolo ima lotu, pŋis na Temple la lo tope na Sabbath matan la sopo mapu matan la lo vai mamahuni na nora vavahinau, pani la pa sopo ori matana?

*Num 28.9-10* <sup>6</sup> Na vereā isamim, matea mo lo toho peresi kamim mo tavera jea na Temple. <sup>7</sup> Ale vara ha pa lo levosahi na ŋaramin hināu sei, ‘Na opoi na posposi ŋomopoi, mo sopo malamalai!’ Ha pa sopo ari la haratu la sopo ori.

*Hos 6.6*

<sup>8</sup> Matan Natun Tamlohi enia Moli mata Sabbath.”

*Vujangi Mata Posposi Ruhu  
(Mk 3.1-6; Lk 6.6-11)*

<sup>9</sup> Mo malue hin jara atu mo vano mo unu na nora ima lotu ea. <sup>10</sup> Ale tamlohi matea mo lo toho atu limana mo kuti. Ale la tamlohi atu la usia isana lara, “O pa tope na leu vara o vai mamahuni te tinapua na Sabbath teni mo vono?” La usia sohena matan vara la pa tuvaia hinia. <sup>11</sup> Iesu mo vereā isara mara, “Hare vonamim matea pulana sipsip matea mo jovi hin te koko na Sabbath, i pa sopo tauria i sau naŋihia? <sup>12</sup> Ka levosahia vara tamlohi mo aulu jea mo jeu na sipsip. Ale matana, mo ŋuhu vara ŋa vai na hina ŋuhu na Sabbath.” <sup>13</sup> Moiso, mo vereā isan tamlohi atu mara, “O ŋirahi na limam.” Ale tamlohi atu mo ŋirahia, ale mo ŋuhu sohena tapala limana. <sup>14</sup> Pani Pharisee la malue atu la matavuhi na jara matea vara la aleale malele matan vara la pa vili-matei Iesu hinia.

*Iesu – Volitusi Non God*

<sup>15</sup> Pani Iesu mo levosahi na sava la lo vaia, ale mo malue hin jara atu. Vao tavera la usuria, ale mo vai mamahuni vevuhira na nora ro-joa, <sup>16</sup> ale mo retileu vara la sopo vereuli na sava nakonako mo lo vaira. <sup>17</sup> Harihi, enia matan vara reti sei pŋovet Isaiah mo vereā vara la pa masese mara,

18 'O kilau vano!  
 Noku volitusi sei enia noku viřoni,  
 enia haratu na opoi jea sei mapuku mo avulahi tavera hinia.  
 A pa tau na Tanumeku hinia, ale enia i pa vereuli na noku posposi tataholo isana tamlohi řořoha. *Isa 42.1-4*  
 19 I pa sopo vas teni i ulo řilangi, teni la pa sopo rongo na leona vara i lo hase tahea na malele tavera.  
 20 Enia i pa malum, i pa sopo kame te ere sei mo mahope moiso, teni i pa sopo vuni te vara kandelu, i tikeli pongi atu vara i pa vaitataholoi na hinu tari,  
 21 ale tamlohi řořoha tinatinapu tari la pa lo řomtoho na hijana.'

*Iesu Mo Jeu Tiapolo*  
*(Mk 3.20-30; Lk 11.14-23; 12.10)*

22 Moiso, tamlohi hai la lavi na tamlohi matea tanume sasati matea mo unu hinia mo vaia mo matavuso mo mengo, ale la lavia mo mai isana, ale mo vai mamahunia vara i eři retireti, ale mo eři kilau. 23 Moiso tamlohi tari la mařurahi tavera hinia lara, "Korong haranike natu, enia mahapin David sei, haratu God mo viřonia mata juriřa teni mo vono?"

24 Pani Pharisee lara la rongoa lara, "Tamlohi akerihi mo lo titiu nařihi na tanume sasati na liman Beelzebul, supe nona tanume sasati tari!"

25 Matan Iesu mo levosahi na řomira mo vereea isara mara,

"Vara na lolo jara matea supe la lo aseasehira hinia, i pa maroe, ale i pa sopo te taon tavera teni te vao ima vara i lo aseasehia hasena i pa eři turu. 26 Ale vara Setan mo lo titiu nařihi na tanume sasati, enia mo lo aseasehia hasena. Ale jara atu mo lo tauri na suiha hinia i pa turu sohena sava? 27 Ale vara enau na lo titiu nařihi na tanume sasati na suihan Beelzebul, ale na suihan hare natu te nomim tamlohi usuri la lo titiu nařihi hinia? Matan mo sohena, enira la pa ari kamim.

28 Pani matan enau na lo titiu nařihi na tanume sasati na suihan Tanumen God, ale mo řaramia vara suiha atu non God mata supe mo pete pala isamim moiso. 29 Ale sohena sava natu, tea i eři unu na iman te tamlohi suiha hatea vara i vanaho te nona hinahinuu hinia, pani vara mo sopo liholatia tiroma? Ale vara i liholatia i pa eři tivesi vevuhi na imana. 30 Haratu mo sopo turu peresiau, enia mo lo hasena vaia mo meresahi isaku, ale haratu mo sopo reve takonahi na tamlohi peresiau, enia mo lo levuti jalajalaira.

31 Matana, na lo vereea isamim vara hehe tari peresi na reti sati hin God tari, God i pa řomira, pani vara tea mo vere lejileji na Tanumena vara enia Tiapolo sohen ka lo vaia, God i pa sopo eři řomia. 32 Ale haratu mo lo vere lejileji Natun Tamlohi, God i pa řomia, pani haratu mo lo vere lejileji Tanume Tapu, enia, God i pa sopo eři řomia nake teni hin na pongi mo lo mai.

*Nom Reti Mo Pisuhiho*  
*(Lk 6.43-45)*

33 Vipahai matea o eři hite usuria na namana, o vai vipahai atu i řuhu, namana i pa řuhu, o vai vipahai atu i sati, namana la pa sasati. 34 Kamim natu mata sasati! Ha pa eři vere te hinuu řuhu sohena sava matan kamim ka sasati, matan sava ka lo vereea mo vujangi na sava mo lo toho na mapumim. 35 Tamlohi řuhu matea mo pa lo vai na hina řuhu mata nona posposi řuhuru, ale tamlohi sasati matea mo pa lo vai na hina sati mata nona posposi sasati. 36 Na vereea isamim, na rani tavera mata aria, tamlohi tari la pa řarami na nora reti rongorongu vono tari sei la verera moiso, 37 matan sava retireti ka verera, la pa vujangia vara ka tataholo na nahon God, ale matan sava retireti ka verera, la pa vujangia vara ka hehe na nahon God."

*Matamata Non Jonah*  
*(Mk 8.11-12; Lk 11.29-32)*

38 Moiso tatua tamlohi vujangi mata leu peresi na Pharisee, la

řaramia lara, “Tija, kama opoia vara kama hite te matamata mařurahi isam!”

<sup>39</sup> Pani Iesu mo řaramira mara, “Tamlohi nake, enira tamlohi sasati, la vaivaileu peresi na tinapua mo lahi moiso, la lo ale na matamata, pani matamata atu a pa silea isara enia sohen matamata atu God mo vaia hin přovet Jonah. <sup>40</sup> Sohen Jonah mo lo toho na lolo pangen maji tavera atu rani mo tolu peresi na vutepongi mo tolu, enau sohen, Natun Tamlohi, a pa toho na lolo lepa mata rani i tolu peresi na vutepongi i tolu. <sup>41</sup> Mara Nineveh la pa sauteterahi na rani aria tavera peresi pina nike, ale la pa vereea vara mo hehe, matan enira la posi na maurira mata retivujavujangi non Jonah, pani ka levosahia, matea mo aulu jea hin Jonah mo lo toho nike, pani ka sopo rasua. *Jonah*

*3.5* <sup>42</sup> Vesupe matan Sheba i pa sauteterahi na rani aria tavera peresi pina nike, ale i pa sile na talai isana, matan enia mo mai na jara asau na varama vara i tapurongo na reti lelevosahi non Solomon, ale nake matea mo aulu mo jeu Solomon mo lo toho nike. *1 Ki 10.1-10*

*Posposi Tanume Sasati*  
(*Lk 11.24-26*)

<sup>43</sup> Hin rani atu vara te tanume lumiha mo malue hin te tamlohi, mo lo vano roto na jara mamasa vara i vilei te jara mapu, pani mara mo sopo vilei tea, <sup>44</sup> mo vereea mara, ‘A pa mele hilu, a vano na ima na tai ea’. Ale mara mo pala mo tapai ima atu mo vuruvuru, mo hitea vara la tivesia, ale la tau tataholoi na hinau tari na jarara. <sup>45</sup> Ale nake, mo vano vara i lavi na tanume lumiha tupu limaravrua tinapua sei la mele sati la jeua. La mai, ale la unu, la lo toho atu. Na lo vereea vara i pa sati jea isan tamlohi atu i jeu tiroma. Ale i pa sohen haratu isan pina sasati nike, sei la lo řohu hiniau!”

*Tinan Iesu Peresi Na Tasina*  
(*Mk 3.31-35; Lk 8.19-21*)

<sup>46</sup> Mara mo pa lo retireti isana tamlohi, ale vahatea purongo, tinana peresi na tasina la lo turu na jingo ima, la lo usia vara la eři retireti peresia, <sup>47</sup> ale tea mo vereea isana mara, “O kilau vano sevano, tinam peresi na tasim la turu na jingo ima, la opoia vara la retireti peresiho.”

<sup>48</sup> Pani Iesu mo řarami tamlohi atu mara, “Hare natu, enia tinaku? Ale hare natu, enia tasiku?” <sup>49</sup> Mo řirahi na limana mo vano tataholo isana nona tamlohi usuri mo vereea mara, “La haranike, enira tinaku peresi na tasiku! <sup>50</sup> Matan hare mo lo vai na masalon Tamaku na tuka enia tasiku, vetasiku, ale tinaku.”

## 13

*Tamlohi Hapořahi Matea*  
(*Mk 4.1-9; Lk 8.4-8*)

<sup>1</sup> Hitahu hin rani atu, Iesu mo malue na ima, ale mo sivo mo sakele na pahisa tasi. <sup>2</sup> Ale matan vao tavera la mai la lo turu porotia, Iesu mo vele na boti matea mo sakele hinia, ale vao tari sei la lo turu na oneone. <sup>3</sup> Moiso mo verera na hinau matuvana na titileu mara, “Tamlohi hapořahi matea mo vano vara i hapořahi te piri. <sup>4</sup> Mo pa lo hapořahi na piri, tatuara la jovi na malele, ale maji avuavu la mai la hani vevuhira. <sup>5</sup> Tatu piri la jovi na vatu-vatu, lepa mo tavinvin purongo, ale la tuvu vahatea matan mo tavinvin, <sup>6</sup> pani alo mara mo vele mo sulira, ale la mahoa matan la sopo wariha. <sup>7</sup> Tatu piri tinapua la jovi na livuha vipahai ngařngařiha, ale la vipahai ngařngařiha atu la ulua la punira. <sup>8</sup> Tatu piri tinapua la jovi na lepa řuhu la namaha, hai la tikeli vaha ngavu sangavulu (100) hai vaha ngavulu limarave (60) hai vaha ngavulu tolu (30) hin haratu mo lo hapořahira tiroma. <sup>9</sup> Haratu mo peroha i tapurongo!”

*Retiusia Matan Titileu Atu*  
(*Mk 4.10-12; Lk 8.9-10*)

<sup>10</sup> Nona tamlohi usuri la mai la vereea isana lara, “Mata sava ko lo retireti na titileu isara?”

11 Moiso mo řaramira mara, “Isamim God mo majinga vara ha pa levosahi na hina luhu matan mauri atu God mo aulu hinia, pani isara, mo sopo majinga. 12 Matan isan haratu mo lavi te lelevosahi na mapuna, God i pa sile na lelevosahi i lo masurere isana, pani isan haratu mo sopo te lelevosahi na mapuna, sava hinau mo rongoa, i pa tihai. 13 Na lo retireti na titileu isara matan harihi, matan la lo hitea, pani la pa sopo rongovosahia, la lo rongoa, pani la pa peropero, ale la pa sopo levosahia. 14 Varařuhu, sava Isaiah mo reti mangovia hinia moiso mo masese hinira vara, ‘Ha pa rongoa, pani ha pa sopo eři levosahia, ale ha pa hitea, pani ha pa sopo eři rongovosahia.

15 Matan mapura la mai la praprasa, perora la peroputu, ale matara la pelati, matan vara la pa sopo hite na matara, teni rongo na perora, ale la rongovosahi na mapura matan vara la eři posi la mai isaku matan vara a vai mamahuni na mapura na nora rojoa.’ *Isa 6.9-10*

16 Pani la matamim sei, la avulahi tavera mata sava la eři hitea, ale peromim la eři rongovosahi na sava la lo rongoa. 17 Varařuhu na vere a isamim, tuai přovet matuvana peresi na tamlohi tataholo la opoia vara la eři hite na sava ka lo hitea, pani la sopo hitea, ale vara la rongo na sava ka lo rongoa, pani la sopo rongoa.

*Iesu Mo Vereuli Titileu Atu (Mk 4.13-20; Lk 8.11-15)*

18 Ha tapurongo na řarami titileu matan tamlohi hapořahi atu: 19 Vara tea mo rongo na reti matan mauri atu God mo aulu hinia, pani mapuna mo sopo levosahia, ale Tiapolo mo mai mo reve nařihi na sava mo lava na mapuna. Haranike enia piri sei mo lava na malele. 20 Hin haratu mo lava na lepa řilangi, haranike enia haratu sei mo rongo na Retiřuhu, ale vahatea purongo mo lavia na avulahi, 21 pani matan mo sopo te

nona jara turu, mo turu makomona purongo, ale vara rani řilangi mo mai teni la tipahia mata Retiřuhu, vahatea purongo i pa rovo na nona rasua. 22 Hin haratu mo lava na livuha vipahai ngařngařiha, enia haratu mo rongo na Retiřuhu, pani masalo mauri peresi na řomřomi tavgav mo turuhoro na Retiřuhu, ale mo sopo namaha. 23 Pani hin haratu mo hapořahia na lepa řuhu, enia haratu mo rongo na Retiřuhu, ale mo rongovosahia. Enia mo namaha mo tavera, hin tea i pa tikeli vaha ngavu sangavulu (100x) hai mo tikeli vaha ngavulu limarave (60x) ale hai mo tikeli vaha ngavulu tolu (30x) hin haratu mo lo lava.

*Titileu Mata Pongi Hitahu*

24 Mo mele verera na titileu tinapua matea mara, “Mauri atu God mo aulu hinia, mo sohena tamlohi matea mo lo hapořahi na piri řuhu na lolo isana, 25 pani na rani nona tamlohi voko la juruvi řomaliho, nona meresahi mo mai mo hapořahi na piri řuvu hin isa wit atu moiso mo mele řovo.

26 Ale lara la tuvuvu, ale la namaha řuvu sohena la pala.

27 Moiso volitusi non tamlohi tavera mata ima la mai isana lara, ‘Tamlohi tavera, avei, kama řom vara ko hapořahi na piri řuhu purongo na isam, pani sohena sava natu, řuvu la tuvuvu hinia?’

28 Ale mo vere a isara mara, ‘Noku meresahi matea mo vai hinau sei.’

Ale nona volitusi lara, ‘Ale ko opoia vara kama vano kama saputira?’

29 Pani mo vere a mara, ‘Mo vono! Mo sopo řuhu vara ha saputira matan ha pa eři saputi na wit peresira. 30 Ha tinařihi la ulua jara matea vavano i tikeli na rani asitauni. Na rani asitauni a pa vere na tamlohi asitauni vara la saputi na řuvu tiroma, ale la otira matan vara la pa sulira, pani la pa takonahi na wit na noku ima wit.’”

*Pira Paka (Mk 4.30-32; Lk 13.18-21)*

<sup>31</sup> Mo mele vere na titileu tinapua matea isara mara, “Mauri atu God mo aulu hinia mo sohena piri paka matea sei tamlohi matea mo lavia mo hapoŕahi na isana. <sup>32</sup> Piri atu enia mo rihirihi mo jeu na piri tari, pani vara mo ulua, mo mai mo tavera mo jeu na vipahai tari, ale maji avuavu na masapa la mai la vai na taura na rangarangana.”

<sup>33</sup> Mo mele vere na titileu tinapua matea isara mara, “Mauri atu God mo aulu hinia mo sohena isi sei haŕai matea mo lavia, ale mo hoia na flaua vavano isi sei mo vaia mo sohi.”

*Mo Vujangira Na Titileu  
(Mk 4.33-34)*

<sup>34</sup> Hinaiu tari nike, Iesu mo vereaa isan vao atu na titileu: varaŕuhu, mo sopo vere te hinaiu hatea isara vara mo sopo vereaa na titileu. <sup>35</sup> Harihi mo maŕivisi na sava pŕovet la vereaa tuai sei vara,

‘A pa vujangi na tamlohi na titileu,  
a pa vereuli na sava la luhu  
na tapulo varama mo tikeli nake.’

*Psa 78.2*

<sup>36</sup> Ale mo malue hin vao atu mo unu na ima. Moiso nona tamlohi usuri la mai isana lara, “O to vere mamahuni kamam na titileu mata ŕuvu hin isa atu.”

<sup>37</sup> Iesu mo ŕaramira mara, “Haratu mo lo hapoŕahi na piri ŕuhu enia Natun Tamlohi. <sup>38</sup> Isa sei enia varama, moiso piri ŕuhu enia la haratu sei la lavi mauri atu God mo aulu hinia, ale ŕuvu atu enia la haratu sei la tamlohi non haratu mo sasati, <sup>39</sup> ale meresahi atu mo lo hapoŕahira, enia Tiapolo. Asitauni enia pongi hitahu, ale tamlohi asitauni enira angelo.

<sup>40</sup> Sohena la saputi na ŕuvu, ale la sulira na hapu, i pa sohena na pongi hitahu. <sup>41</sup> Natun Tamlohi i pa ŕule na nona angelo, ale la pa lavi naŕihi na hinaiu tari sei la lo vai na tamlohi la hehe peresi la haratu tarea la lo tope na leu na lolo jara sei enia mo aulu hinia, <sup>42</sup> ale la pa pulahira la sulira hin jara atu mata hapu. Hin jara atu, la pa tangi, ale la pa ngaŕngaŕori na huŕura na rongohaji tavera. <sup>43</sup> Moiso

haratu la tataholo la pa mera sohena alo hin mauri atu na suihan Tamara. Haratu la peroha, ha tapurongo!

*Titileu Mata Tavtav Matea*

<sup>44</sup> Mauri atu God mo aulu hinia mo sohena tavgav tavera matea, tamlohi matea mo jarohia na lepa matea, ale tamlohi tinapua matea mo tapaia, ale mo mele tavuhoroa. Moiso mo avulahi tavera, mo vano mo haŕehi vevuhi na nona hinahinau matan vara i eŕi voli lepa atu.

*Huŕutavila Ruhuŕuhu Matea*

<sup>45</sup> Ale mele vahatea, mauri atu God mo aulu hinia mo sohena tamlohi aŕeaŕehi matea mo lo aleale huŕutavila ŕuhu, <sup>46</sup> ale enia mo vilei na huŕutavila matea mo ŕuhuŕuhu jea, mo vano mo haŕehi vevuhi na nona hinahinau, ale mo volia nona.

*Titileu Mata Tara Matea*

<sup>47</sup> Ale mele vahatea, mauri atu God mo aulu hinia mo sohena tara sei la pulahia na tasi, ale maji tinatinapua tari la kali hinia. <sup>48</sup> Mara mo maŕivi, tamlohi la reve hosohia, ale la sakele la viŕoni naŕihi na hina ŕuhu la sohonira na tanga, pani haratu la sati la pulahira. <sup>49</sup> I pa sohena na pongi hitahu. Angelo la pa mai la asehi la haratu la sasati hin la haratu la tataholo, <sup>50</sup> ale la pa pulahira na jara mata hapu. Hin jara atu, la pa tangi, ale la pa hatihati na huŕura.

<sup>51</sup> Ka lo rongovosahi la hinaiu sei?”

La ŕaramia lara, “He'e.”

<sup>52</sup> Ale mo vereaa isara mara, “Ale matana, tamlohi vujangi mata leu tari sei la lavi na lelevosahi mata usuri mauri atu God mo aulu hinia, enira la pa sohena tamlohi tavera mata ima matea sei mo lavi naŕihi na nona tavgav vara i vujangira isana tamlohi, hina paro peresi na hina tuai.”

*Mara Nazareth La Rohu Hinia  
(Mk 6.1-6; Lk 4.16-30)*

<sup>53</sup> Iesu mara mo isoiso hin la titileu atu, mo malue hin jara atu, <sup>54</sup> mo mai na jarana mo vujangira na nora ima lotu, ale la maŕurahi hinia lara, “Tamlohi nike, mo lavi na nona lelevosahi epu, mo pa lavi na suiha vara i vai na hina ŕuhuŕuhu epu?”



<sup>55</sup> Pani enia mo sopo natun tamlohi tapatu atu? Ale tinana la tovia Mary, ale tasina sei, James, Joseph, Simon peresi Judas. <sup>56</sup> Ale vetasina tari la lo toho peresiña nike, sava jara natu, tamlohi nike mo pa lavi na suiha vara i vai la hinau sei hinia?”

<sup>57</sup> Ale la lo řohu hinia, pani Iesu mo vereea isara mara, “Přovet matea i pa sopo eři lavi na ololo na jarana teni na lolo imana.”

<sup>58</sup> Ale mo sopo vai te hina řuhuřuhu matuvana ea matan la sopo rasua.

## 14

### *John Tamlohi Paptijo Mo Mate* (Mk 6.14-29; Lk 9.7-9)

<sup>1</sup> Hin rani atu supe rihirihiri Herod, mo rongo na roroan Iesu, <sup>2</sup> ale mo vereea isana nona volitusi mara, “Haranike enia John tamlohi paptijo sei! Enia mo mele sauteterahi na mateia, ale mo eři vai la hina mařurahi sei matana.” <sup>3</sup> Matan Herod natu, mo tauri John, ale mo pesia, ale mo taua na ima řilangi matan narouna Herodias, naroun tasina Philip, <sup>4</sup> matan John mo lo vereea isana mara, “Mo sopo tataholo vara o lavia naroum.” <sup>5</sup> Hina purongo vara mo opoia vara i vilimateia, mo matahuni na tamlohi matan enira la rasua vara John enia přovet matea.

<sup>6</sup> Pani na rani pongi vora non Herod mo mai, venatun Herodias mo velu na naho vao ea mo vai Herod mo avulahi tavera, <sup>7</sup> matana, enia mo vai na retitauhi řilangi matea vara i pa silea na sava hinau mo usia isana. <sup>8</sup> Tinan hařarihi atu mo retireti patuna, ale hařarihi atu mo vereea mara, “O sileau na patun John tamlohi paptijo na pusa peleti.” <sup>9</sup> Supe Herod mo rongo mo sati, pani matan nona retitauhi na naho vao, mo retileu vara la vaia. <sup>10</sup> Mo řule na nona tamlohi la tai roto na řalon John na ima řilangi, <sup>11</sup> ale la lavi na patuna na peleti matea la silea isan hařarihi atu, ale mo lavia vano isan tinana. <sup>12</sup> Tamlohi usuri non John la mai la

lavi na tarapena, ale la tavunia, ale la vano la vereea isan Iesu.

### *Mo Vahani Na Vao Tamlohi* (Mk 6.30-44; Lk 9.10-17; Jn 6.1-14)

<sup>13</sup> Iesu mara mo rongoa, mo malue mo vano mo vele na boti matea, mo vano na jara hasetoho matea vara i lo toho hasena. Pani na rani vao tamlohi lara la rongoa la malue na vanuara la hahau alea. <sup>14</sup> Mara mo sahe na jarauta, mo hite na vao tavera matea, ale mo řomopoiri, ale mo vai mamahuni na nora tamlohi rojoa.

<sup>15</sup> Ale mo lo ravravi nona tamlohi usuri la mai isana la vereea lara, “Jara nike, enia jara hasetoho matea, ale pongi mo lo mai. O řule vao sei la vano hin te vanua vara la voli te hara hinau matara hasera.”

<sup>16</sup> Pani Iesu mo vereea mara, “Mo vono, la lo toho, kamim ha vahanira.”

<sup>17</sup> La vereea isana lara, “Kama lo lavi na pereti mo lima purongo peresi na maji mo rua.”

<sup>18</sup> Ale mo vereea isara mara, “Ha řavira la mai isaku.” <sup>19</sup> Ale mo retileu isan la vao atu vara la sakele na řuvuřuvu, ale mo lavi la pereti atu mo lima peresi la maji atu mo rua, mo tařa sahe aulu na tuka mo hasohaso God, ale mo vere meje matara, ale mo tope la pereti atu mo silea isana nona tamlohi usuri, ale nona tamlohi usuri la silea isan la vao atu. <sup>20</sup> Tamlohi tari la hanhani la masu. La sohoni na sope hanhani na tanga mo sangavulu řomana mo rua la mařivi. <sup>21</sup> Ale la haratu la lo hanhani enira mariviti i tikeli tari vaha lima (5,000) haratu la sopo evi na hařai peresi na natuvarihi.

### *Iesu Mo Hahau Na Pusa Tasi* (Mk 6.45-52; Jn 6.15-21)

<sup>22</sup> Vahatea purongo, mo aji na nona tamlohi usuri vara la vano tiroma hinia na tavul tasi, ale mo řule vao atu la vano karahi. <sup>23</sup> Ale Iesu mara mo řule vao atu la vano moiso, mo vele sahe na vutivuti matan vara i usiusi enia hasena. Ravravi mo mai enia hasena mo lo toho atu, <sup>24</sup> pani botira nakerihi mo vano asau moiso na jarauta, suhusuhu la lo vilia matan la lo songahi na langi.

<sup>25</sup> Ale majou rani mo lo vele, Iesu mo mai isara, mo hahau na pusa tasi.  
<sup>26</sup> Pani na rani nona tamlohi usuri lara la hitea mo lo hahau na pusa tasi, la have na matara mo tatavera lara, “Eh, tanume matea!” la ulo na tangi matan la matahu.

<sup>27</sup> Pani vahatea purongo Iesu mo reti isara mara, “Ha řomřilangi! Enau sei, ha sopo matahu!”

<sup>28</sup> Moiso Peter mo řaramia mara, “Tija, vara engko sei, o retileu isaku vara a mai isam na pusa tasi.”

<sup>29</sup> Iesu mo vereaa mara, “O mai!” Ale Peter mo malue na boti mo hahau na pusa tasi mo lo vano isan Iesu.

<sup>30</sup> Pani mara mo hite na langi mo sere řilangi, ale mo matahu, mo tapulo marun na tasi, mo ulo mara, “Tija, o juriau!”

<sup>31</sup> Vahatea purongo Iesu mo sohai na limana, ale mo tauria, mo vereaa isana mara, “Engko nom rasu mo rihirihia hajavua, mata sava ko řom rua?” <sup>32</sup> Ale lara la mele vele na boti, langi atu mo moti.

<sup>33</sup> Haratu la lo toho na boti la lotua lara, “Varařuhu, engko Natun God!”

### *Tamlohi Rojo Gennesaret* (Mk 6.53-56)

<sup>34</sup> Ale lara la vano na tavalu tasi, la hoso na jara Gennesaret. <sup>35</sup> Ale tamlohi hin jara atu lara la hitevosahia, la sohai na reti mo řalihi jara atu vara la lavi na nora tamlohi rojoa tari la mai isana, <sup>36</sup> ale la usia řilangi vara la pa tikeli purongoi na pingo nona ruru. Ale enira mo isoiso atu sei la tikelia la řuhu.

## 15

### *Vujangi Nona Vajiahara* (Mk 7.1-13)

<sup>1</sup> Moiso, Pharisee peresi na tamlohi vujangi mata leu la mai isan Iesu la tai Jerusalem lara, <sup>2</sup> “Mata sava nom tamlohi usuri la lo tope na posposi nona vajiaha matan tuai? Matan enira la sopo hoje na limara tiroma moiso la pa hanhani.”

<sup>3</sup> Iesu mo řaramira mara, “Ale mata sava ka lo tope na retileu non God

matan ka lo usuri na posposi tamlohi? <sup>4</sup> Matan God mo retileu mara, ‘O ooloo hin tamam peresi tinam!’ Ale mara, ‘Hare mo reti sati hin tamana teni tinana, i pa mate matana.’ *Exo 20.12; Exo 21.17* <sup>5</sup> Pani ka vereaa kara, ‘Mo tataholo vara tea i vereaa isan tamana enia tinana vara sava tuetueni vara i eři silea isara, mo pete silea isan God moiso.’ <sup>6</sup> Ale enia mo sopo sile na ooloo isan tamana matan haratu. Ale matan ka lo usuri na posposi tamlohi, ka řohu na reti non God. <sup>7</sup> Kamim tamlohi tapnetano! Isaiah mo retiman-govi varařuhu hin kamim na rani mo vereaa mara,

<sup>8</sup> ‘La tamlohi nike, la lo ooloo hiniau na hurira purongo, pani mapura la lo toho asau hiniau;

<sup>9</sup> la lo vai vono na nora lotu, la lo vujangi na nora retileu lara retileu non God.’” *Isa 29.13*

### *Tamlohi La Lumiha Mata Hehe* (Mk 7.14-23)

<sup>10</sup> Ale Iesu mo tovi vao atu la mai isana mo vereaa isara mara, “Ha tapurongo, ale ha levosahia! <sup>11</sup> Sava mo unu na jingom mo sopo vaiho o lumiha, pani sava mo malue na jingom, enia mo vaiho ko lumiha.”

<sup>12</sup> Moiso nona tamlohi usuri la mai isana la vereaa lara, “Avei, ko sopo levosahia vara Pharisee la rongo mo sati na sava ko lo vereaa?”

<sup>13</sup> Mo řaramira mara, “Vipahai tari haratu Tamaku na tuka mo sopo lavora i pa saputi nařihira. <sup>14</sup> Ha sopo sahara vano isara. Enira la matavuso. La lo tiroma na tamlohi, pani la matavuso. Vara matavuso i tiroma na matavuso, la pa jovi hin te moru.”

<sup>15</sup> Pani Peter mo vereaa isana mara, “O to vere mamahuni titileu sei isamam.”

<sup>16</sup> Ale mo řaramia mara, “Kamim sohena, ka sopo lo levosahi? <sup>17</sup> Ka sopo levosahia vara sava ka hania mo unu na pangemim, ale ka mele hoti hinia? <sup>18</sup> Pani reti mo lo malue na jingo mo tapulo malue na mapu tamlohi, ale harihi mo vai na tamlohi

mo lumiha. <sup>19</sup> Matan hinau sohen harihi la lo malue na mapu tamlohi: řomřomi sasati, vilimatei, vaivaileu peresi na tinapua mo lahi moiso, posposi lumiha, vavanaho, tuetueni halu, reti sati na hija tamlohi. <sup>20</sup> La hinau sei la vai na tamlohi mo lumiha. Pani vara tea i hanhani peresi na limana mo sopo hojea, mo sopo vaia i lumiha.”

*Rasua Non Hařai Mara Cana*  
(Mk 7.24-30)

<sup>21</sup> Ale Iesu mo malue hin jara atu, mo vano na jara taverna matan Tyre enia Sidon. <sup>22</sup> Ale vahatea hin jara atu, hařai mara Cana matea mo pala mo lo tangi mara, “O řomopoiu Moli, mahapin David! Tanume sasati matea mo sohoni venatuku mo vai komokomoa!”

<sup>23</sup> Pani mo sopo řaramia hin te reti hatea. Ale nona tamlohi usuri la mai la usia řilangi isana lara, “O řulea i malue matan mo lo tangi usuriřa.”

<sup>24</sup> Mo řaramia mara, “Haratu mo řuleau, mo řuleau purongo mata sip-sip matan Israel sei la jalio.”

<sup>25</sup> Pani hařai atu mo mai mo pa-paohi na nahona mara, “Moli, o tuesday.”

<sup>26</sup> Ale Iesu mo řaramia mara, “Mo sopo tataholo vara tea i lavi nařihi na pereti hana natuvarihi i silea isana viriu.”\*

<sup>27</sup> Hařai atu mara, “He'e Moli, pani viriu la lo hani na utauta pereti sei la lo joyjovi na tep non nora tamlohi taverna.”

<sup>28</sup> Moiso Iesu mo řaramia mara, “Na vere, engko hařai matea, nom rasua mo taverna jea. I pa sohena sohen ko opoia.” Ale vahatea purongo, venatuna mo řuhu.

*Rojoa Nona Tamlohi La Tihai*

<sup>29</sup> Iesu mo mele vano mo hahau na pahisa tasin Galilee. Mo sahe aulu na vutivuti, ale mo lo sakele ea. <sup>30</sup> Moiso vao taverna mo mařivi la mai isana peresi na tamlohi hariju, matavuso, tamlohi papao, la haratu la mengo, ale vao matuvana tinapua, ale la taura na palona, moiso mo vai

mamahunira, <sup>31</sup> ale vao atu řomira mo sopo sakele matan mo vai na mengo la retireti, haratu la papao la řuhu, haratu la hariju la hahau, ale matavuso la kilau moiso vao atu la mařurahi taverna matana, ale la sile na hasohaso isan God matan Israel.

*Mo Vahani Na Vao Taverna*  
(Mk 8.1-10)

<sup>32</sup> Moiso Iesu mo tovi na nona tamlohi usuri la mai isana ale mara, “Enau na řomopoi la vao nike, matan la lo toho peresiau mata rani mo tolu moiso, ale mo sopo te hara hinau, ale na sopo opoia vara a řulera la mule marohati, vara i vono la pa matemate na malelera.”

<sup>33</sup> Ale nona tamlohi usuri la vere isana lara, “Ra pa eři lavi te pereti i tataholo hin vao taverna nike na jara hasetoho sohen harihi epu?”

<sup>34</sup> Moiso Iesu mara, “Ka lo lavi na pereti mo visa?”

Lara, “Mo limaravrua peresi na maji vavarihi mo visalete purongo.”

<sup>35</sup> Moiso mo vere vao atu vara la saksakele na lepa, <sup>36</sup> ale mo lavi la pereti atu mo limaravrua peresi na maji moiso, mo vere meje isan God, ale mo topera, ale mo silera isana nona tamlohi usuri, ale tamlohi usuri la silera isan la vao atu.

<sup>37</sup> Ale enira mo isoiso la hanhani la masu. Moiso la sohoni na sope hanhani na tanga mo limaravrua la mařivi. <sup>38</sup> Evi tamlohi purongo la hanhani mo tikeli tari vaha vati (4,000) la sopo evi na hařai peresi na natuvarihi. <sup>39</sup> Moiso hitahun haratu, mo řule la vao atu la mlemle, mo vele na boti matea, ale mo vano na jara Magadan.

## 16

*La Opoi Na Matamata*  
(Mk 8.11-13; Lk 12.54-56)

<sup>1</sup> Ale Pharisee peresi na Sadducee la mai isana vara la vaihitea. La usia vara i vujangira hin te matamata taverna matan na tuka.

<sup>2</sup> Iesu mo řaramira mara, “Vara mo ravravi, kara ‘Taro i pa řuhu

\* 15:26: Jew la tovi na tamlohi řořoha ‘viriu’.

matan telangi mo hahara!’<sup>3</sup> Ale na řalavuhō, ‘Taro i pa sati nohorihī matan telangi mo hahara, ale mo řořoha!’ Ka lo levosahia vara taro i pa sohena sava matan ka lo kilau na masapa, pani ka sopo eři hitevosahi na matamata matan rani nīke ka lo toho hinia?’<sup>4</sup> Pina sasati nīke, mo tamlohi vaivaileu, mo lo aleale mata-mata, pani i pa sopo lavi te mata-mata tinapua, pani matamata sei mo masese isan Jonah tuai.” Moiso mo malue isara mo vano.

*Pharisee Peresi Na Sadducee  
(Mk 8.14-21)*

<sup>5</sup> Nona tamlohi usuri lara la kakau na tavalu tasi, la pa řomřomia vara la sopo lavi te pereti. <sup>6</sup> Ale Iesu mo vereā isara mara, “Ha sopo řomaliho vara ha lo kilau mata isi sasati nona Pharisee peresi na Sadducee.”

<sup>7</sup> Moiso la tapulo sorahia isara hasera lara, “Eh, korong mo pa vereā matan enřa řa sopo lavi te pereti teni?”

<sup>8</sup> Pani Iesu mo levosahi na sava la lo vereā, ale mo vereā mara, “Kamim akerihī, nomim rasu mo rihirihī hajavua. Mata sava ka lo sorahia isamim hasemim vara mo sopo te pereti? <sup>9</sup> Ka sopo lo levosahia? Ka mele řomaliho hin la pereti atu mo lima matan vao atu mo tari vaha lima (5,000) ale ka sohoni na sope hanhāni na tanga mo visa hin rani atu? <sup>10</sup> Teni ka řomaliho hin pereti atu mo limaravrua matan vao atu mo tari vaha vati (4,000) ale tanga mo visa ka lavia isara? <sup>11</sup> Mo sohena sava natu, ka sopo levosahia vara enau na sopo retireti na pereti? Ha lo kilau na isi nona Pharisee peresi na Sadducee.”

<sup>12</sup> Ale la pa levosahia natu, vara mo sopo vereā vara la lo kilau mata isi mata pereti, pani mata vujangi nona Pharisee peresi na Sadducee.

*Iesu Enia Hare  
(Mk 8.27-30; Lk 9.18-21)*

<sup>13</sup> Ale na rani Iesu mo mai na jara matan Caesarea Philippi, mo usi na nona tamlohi usuri mara, “Kamim ka lo rongō na tamlohi la lo vereā vara Natun Tamlohi enia hare?”

<sup>14</sup> Moiso lara, “Hai la lo vereā vara John tamlohi paptijo, tatuara lara Elijah, ale hai lara Jeremiah teni vonan la přovet atu matea.”

<sup>15</sup> Mo vereā isara mara, “Pani kamim ka lo vereā vara enau hare?”

<sup>16</sup> Simon Peter mo řaramia mara, “Engko natu pa Křisto atu, Natun God sei mo mauri!”

<sup>17</sup> Ale Iesu mo řaramia mara, “Simon natun Jonah, God mo leřuhu hiniho matan mo sopo tea hin varama nīke i vujangia isam, pani Tamaku na tuka hasena mo vujangia isam. <sup>18</sup> Ale na vereā isam, engko Peter sei řaramin hijam enia vatu, ale hin pulo vatu nīke, a pa voro noku vao kalesia, hina purongō vara suiha non varama mata mateia mo řilangi, pani i pa sopo eři turuhoroa. <sup>19</sup> A pa sileho na kia matan mauri atu God mo aulu hinia, ale sava hināu ko horoa na varama, God na tuka mo horoa moiso, ale sava hināu ko tināřihia na varama, God na tuka mo tināřihia moiso.” <sup>20</sup> Moiso, mo retileu isana nona tamlohi usuri vara la sopo sorahia isan tea vara enia natu, Křisto atu.

*Iesu Mo Vere Na Nona Mate  
(Mk 8.31-9.1; Lk 9.22-27)*

<sup>21</sup> Mo tapulo hin rani atu natu, Iesu mo tapulo vujangi na nona tamlohi usuri hinia vara enia i pa vano Jerusalem, ale i pa lavi na rongohaji isana tamlohi aulu peresi na moli nona přis peresi na tamlohi vujangi mata leu, ale la pa vilimateia, ale hitahu na hatolu rani i pa mele turu.

<sup>22</sup> Ale Peter mo tauri na limana mo revea vano hasena, mo reti řilangi isana mara, “Moli, mo vono! Hināu atu i pa sopo eři masese isam!”

<sup>23</sup> Pani Iesu mo posi mo vereā isan Peter mara, “Setan, na sopo opoia vara a hiteho! Engko ko lo turuhoroau, matan engko ko sopo tau na řomim na hināhināu non God, pani na hināhināu nona tamlohi.”

<sup>24</sup> Moiso Iesu mo vereā isana nona tamlohi usuri mara, “Vara tea mo opoia vara i usuriau, i pa horo na masalona hasena, i lavi na nona

talopeilopei, ale i usuriau.\* <sup>25</sup> Matan haratu mo opoi na maurina mo tavera jea, i pa vaitihaia, pani haratu mo ōhū na maurina matakū, enia i pa tapai mauri varaŕuhu atu. <sup>26</sup> Sava hinau mo ŕuhu isan te tamlohi vara i lavi na hinau tari na varama, pani i vaitihai na maurina? Teni sava hinau natu, tamlohi i eŕi silea vara i mele lavi na maurina? <sup>27</sup> Matan Natun Tamlohi i pa mai peresi na nona angelo na hasohason Tamana, moiso i pa voli tataholoi na tamlohi hatehateahi mata sava mo vaia na varama. *Psa 62.12; Rom 2.6*

<sup>28</sup> Varaŕuhu na vereā isamim, tatuamim la lo turu nike nakerihi, la pa sopo eŕi mate vavano la hite Natun Tamlohi i mai na nona suiha mata Supe.”

## 17

### *Epen Iesu Mo Posi (Mk 9.2-13; Lk 9.28-36)*

<sup>1</sup> Ale mele rani mo limarave tinapua mo vano moiso, Iesu mo lavi Peter, James peresi tasina John, mo tiromara la vele sahe aulu na vutivuti tavera matea la toho hasera.

<sup>2</sup> Ale epen Iesu mo mai mo tinapua na nahora, nahona mo mera sohena alo, ruruna la lulu sohena malarani, <sup>3</sup> ale vahatea purongo, la hite Moses enia Elijah la pala la lo retireti peresi Iesu. <sup>4</sup> Moiso Peter mo vereā isan Iesu mara, “Tija, mo ŕuhu matan ŕa lo toho nike, vara ko opoia a pa vai te ima ruru i tolu akerihi, matea nom, matea non Moses, ale matea non Elijah.”

<sup>5</sup> Mo pa lo retireti, ale vahatea purongo telangi mera matea mo hovira, moiso leo matea mo malue hin telangi atu mara, “Harihi enia Natuku ŕuhuru, na opoia mo tavera jea, ha tapurongo isana!” <sup>6</sup> Nona tamlohi usuri lara la rongoleo sei, la jovi na nahora na matahu tavera.

<sup>7</sup> Pani Iesu mo mai mo tikelira mo vereā mara, “Ha turu, ha sopo

matahu!” <sup>8</sup> Ale na rani la taŕa sahe la sopo mele hite tea, pani la hite Iesu hasena. <sup>9</sup> Ale la pa lo sevuti na vutivuti, Iesu mo retileu isara mara, “Ha sopo vereā na sava ka hitea vavano i tikeli na rani Natun Tamlohi i mele turu na mateia.”

<sup>10</sup> Ale tamlohi usuri la usia lara, “Ale mata sava tamlohi vujangi mata leu la lo vereā vara Elijah i pa mai tiroma?”

<sup>11</sup> Mo ŕaramira mara, “Elijah i pa mai, ale i pa tau mamahuni na hinau tari. <sup>12</sup> Pani na vereā isamim vara Elijah mo pete pala moiso, ale la sopo hitevosahia, pani la vai masalora isana. Ale sohen haratu la pa sile na rani ŕilangi isan Natun Tamlohi.” <sup>13</sup> Ale tamlohi usuri la pa rongovosahia natu, vara mo lo verera hin John tamlohi paptijo.

### *Uluvou Matea (Mk 9.14-29; Lk 9.37-43a)*

<sup>14</sup> Ale lara la lo sevuti la mai isan vao atu, tamlohi matea mo mai isan Iesu mo papaohi na nahona, <sup>15</sup> mo vereā mara, “Moli, o ŕomopoi hin natuku matan enia mo lo matemate, ale tarea mo lo lavi na rongohaji tavera matan hin te rani mo lo jovi na hapu teni wai. <sup>16</sup> Na pete lavia mo mai isana nom tamlohi usuri moiso, pani la sopo eŕi vai mamahunia.”

<sup>17</sup> Ale Iesu mo ŕaramia mara, “Kamim mo sopo te nomim rasu hatea, kamim pina lejileji matea, a pa mele toho peresi kamim rani i visa? Na sopo levosahia vara a pa lavi na puhon nomim hinau i tikeli pangisa? O lavia i mai isaku!” <sup>18</sup> Ale Iesu mo reti ŕilangi isan tanume sasati atu, ale mo malue hinia, ale vahatea purongo natuna mo ŕuhu.

<sup>19</sup> Moiso hitahu, tamlohi usuri la mai na tavaluna la usia lara, “Mata sava kama sopo eŕi levuti naŕihia?”

<sup>20</sup> Mo vereā isara mara, “Matan nomim rasua mo rihirihi! Varaŕuhu na vereā isamim, vara nomim rasua mo ŕilangi sohena piri paka matea,

\* **16:24:** talopeilopei: Iesu mo vereā vara tamlohi rasua sei la sopo avulahi vara la turu ŕilangi na rani tamlohi la ŕohu hinira matan la lo usuri Iesu teni la lavi na rani ŕilangi matan la lo ooloo na nona reti, enira la sopo eŕi vereā vara enira nona tamlohi.

ha pa eři vereea isan vutivuti nike, vara 'O juhati o vano sevano!' Ale i pa juha. Ale sava natu, vara ha pa sopo eři vaia?

<sup>21</sup> Usiusi peresi na posposi tapuhoro na hanhani purongo i pa eři levuti nařihi na tanume sasati sohen harihi i malue."

*Retireti Mata Nona Mateia*  
(Mk 9.30-32; Lk 9.43b-45)

<sup>22</sup> Ale na rani la pa lo pulutahi Galilee, Iesu mo vereea isara mara, "Natun Tamlohi mariviti vara la turuposi hinia natu vara i vano na lima tamlohi, <sup>23</sup> ale la pa vilimateia, moiso i pa mele turu na hatolu rani." Ale la rongo mo sati tavera matana.

<sup>24</sup> Na rani la kakau Capernaum, haratu la lo lavi na makomo mania mata takis mata nora Temple la mai isan Peter lara, "Nom tija i pa voli na takis teni mo vono?"

<sup>25</sup> Ale Peter mo řaramira mara, "He'e." Ale mo lo unu na ima, ale Iesu mo retireti tiroma isana mara, "Romim mo sohena sava Simon? Supe mata varama la lo lavi na takis isan hare? Isana natura teni isana tamlohi tinapua?"\*

<sup>26</sup> Ale na rani Simon mo vereea mara, "Isana tinapua!" Iesu mo vereea isana mara, "Ale vara sohen haratu, natura la materi na takis. <sup>27</sup> Pani matan vara řa sopo komo na řomira, o sivo na tasi, o pulahi na nom asi revereve, ale sava maji mo kali hinia tiroma, o roi na vavana, ale o pa hite na mania matea mo tataholo mata voli takis nořa enřa rua."

## 18

*Hare Mo Aulu Jea*  
(Mk 9.33-37; Lk 9.46-48)

<sup>1</sup> Hin rani atu tamlohi usuri la mai isan Iesu lara, "Hare natu, enia i pa aulu jea hin mauri atu God mo aulu hinia?"

<sup>2</sup> Moiso mo tovi na natirihi matea vara i mai isana, ale mo turuhia na livuhara, <sup>3</sup> moiso mara, "Varařuhu na vereea isamim, vara ha sopo posi mai sohen natirihi nike, ha pa sopo

eři levosahi mauri atu God mo aulu hinia. <sup>4</sup> Hare mo hase taua atano sohen natirihi nike, enia mo aulu jea hin mauri atu God mo aulu hinia. <sup>5</sup> Hare mo lavi te natirihi sohen harihi na hijaku, enia mo lo laviau, <sup>6</sup> pani vara tea mo vaitihai na rasua non te vonan la natuvarihi nike la rasuau, i pa mele řuhu jea isana vara la pesi te vatu tavera na řalona la putehia na tasi puaha.

*Vaihite La Pa Mai*  
(Mk 9.42-48; Lk 17.1-2)

<sup>7</sup> Rani sasati i pa jovi na varama matan rasua i pa tihai. Matan tarea hina vaihite la pa lo mai, pani rani sasati isan haratu mo lo vaitihai na rasua nona tinapua. <sup>8</sup> Ale vara limam teni palom mo vaiho ko vano na hehe, o tai nařihia o pulahia. Mo mele řuhu jea vara o unu hin mauri atu o papao teni o hariju, mo jeu haratu vara la pulahiho peresi na limam mo rua teni palom mo rua hin hapu atu mo sopo te isoisona. <sup>9</sup> Ale vara matam mo vaiho ko lo vano na hehe, o julai nařihia o pulahia. Mo mele řuhu jea vara o unu hin mauri atu peresi na matam matelete, mo jeu haratu vara la pulahiho peresi na matam mo rua o vano hin hapu atu mo sopo te isoisona na moruhapu.

*Sipsip Atu Mo Jalio Na Malele*  
(Lk 15.3-7)

<sup>10</sup> Ha lo kilau ha sopo hitelehilehi te vonan la natuvarihi nike, matan na vereea isamim vara tarea na tuka, nora angelo, la haratu la lo kilaura, Tamaku na tuka mo tinařihia vara la eři turu na nahona matara.

*Tavui Sipsip Matea*

<sup>11</sup> Matan Natun Tamlohi mo mai vara i juri la haratu la jalio. <sup>12</sup> Ale nomim kilakilau mo sohena sava? Vara tamlohi matea pulana sipsip mo ngav sangavulu (100) ale matea mo jalio, i pa sopo tau la haratu mo ngavulu limaravati mo limaravati (99) na pahisa vutivuti atu tako ale i ale haratu mo jalio teni i vono? <sup>13</sup> Ale

\* 17:25: Tamlohi hai la řomřomia vara natura nike, enira natun supe tataholo, ale la haratu la tamlohi tinapua enira la sopo vaon supe atu.

vara mo tapaia, varaʻuhū na vereā isamim, mo avulahi tavera matana, mo jeu la haratu mo ngavulu limaravati mo limaravati sei la sopo jalio. <sup>14</sup> Mo sohena natu, mo sopo masalom Tamaku na tuka vara rasua non te vonan la natuvarihi nike i vano hina purongo.

*Vara Tea Mo Hehe  
(Lk 17.3)*

<sup>15</sup> Vara voraim mo vai te hehe isam, o vano o vere na nona hehe isana kamim rua hasemim. Vara mo tapurongo isam, voraim i pa mele tapalam. <sup>16</sup> Pani vara mo ʻrohu vara i tapurongo, o lavi te hatea teni tupra rua tinapua la vano peresiho matan vara o pa eʻi turu na nora vereulia. *Deut 19.15* <sup>17</sup> Ale vara mo ʻrohu vara i tapurongo hinira, o pa vereā isana vao kalesia. Ale vara mo ʻrohu vara i tapurongo isana vao kalesia sohen tiroma, ale i pa sohena tamlohi ʻroʻroha isamim, ale ha ʻrohu hinia sohena tamlohi ʻroʻroha matea teni haratu mo lo lavi na takis.

*Tinaʻihia Teni Horoa*

<sup>18</sup> Varaʻuhū na vereā isamim, sava kamim kalesia ka lo horoa na varama, God na tuka mo horoa moiso, ale sava ka tinaʻihia na varama, God na tuka mo tinaʻihia moiso.

<sup>19</sup> Na mele vereā isamim vara te tupra rua na varama la majinga hin te hināu la usia, Tamaku na tuka i pa vaia sohena isara. <sup>20</sup> Matan, vara te tupra rua teni tupu tolu la lo pulutahi na hijaku, enāu na lo toho peresira.”

*Romi Na Tinapua*

<sup>21</sup> Moiso Peter mo mai isana mo vereā mara, “Tija, vara voraiku mo vai na hehe isaku, a pa ʻromi voraiku vaha visa? Vaha limaravrua teni mo vono?” <sup>22</sup> Iesu mo vereā isana mara, “O pa sopo ʻromia vaha limaravrua (7x) purongo, pani vaha ngavulu limaravrua vaha limaravrua (70x7). *Gen 4.24*

<sup>23</sup> Matan harihi, mauri atu God mo aulu hinia mo sohena supe matea mo opoia vara i tau mamahuni na ave non nona slev. <sup>24</sup> Na rani mo tapulo tau mamahuni na ave, la lavi

vonara matea mo mai isana, mo ave na mania matea mo tataholo na voli tamlohi mata rani mo tari vaha sangavulu (10,000).

<sup>25</sup> Ale matan i pa sopo eʻi voli naʻihia, nona tamlohi tavera mo retileu hinia vara la haʻehia peresi narouna tolu na natuna peresi na nona hināu tari vara i spai na nona mania hinia.

<sup>26</sup> Ale slev atu mo jovi na pauna, mo tangi mara, ‘O ʻromperavu isaku, ale a pa voli vevuhi na noku ave tari isam!’

<sup>27</sup> Ale tamlohi tavera non slev atu mo ʻromopoia, mo tinaʻihia vara i vano purongo, ale mo tinaʻihia na nona ave.

<sup>28</sup> Pani na rani pa slev atu mara mo malue, mo vano mo tapai na slev tinapua matea non tamlohi tavera atu, ale slev sei mo ave isana na mania mo tataholo na voli tamlohi matea mata rani mo ngav sangavulu (100) mo taurilatia, mo tapulo punia mara, ‘O voli na nom ave isaku!’

<sup>29</sup> Ale slev atu mo jovi na pauna mo tangi isana mara, ‘O ʻromperavu isaku, a pa voli naʻihia na noku ave isam.’ <sup>30</sup> Pa slev atu, mo ʻrohu hinia, ale mo vano mo taua na ima ʻrilangi vara i lo toho atu i tikeli rani atu i voli naʻihia vevuhi na nona ave.

<sup>31</sup> Na rani la tapalan slev atu lara la hite na sava mo vaia, la rongo mo sati tavera, la vano la vereuli na hināu tari isan nora tamlohi tavera atu.

<sup>32</sup> Moiso nona tamlohi tavera mo tovi pa slev atu mo mai isana, mo vereā isana mara, ‘Engko ko slev sasati matea ko putu tataholo. Na tinaʻihia vevuhi na nom ave matan ko usia mo ʻrilangi isaku. <sup>33</sup> Ale ko sopo eʻi ʻromopoi na tapalam slev sohen enāu na ʻromopoiho?’

<sup>34</sup> Moiso nona tamlohi tavera atu mo lolokoru patuna, mo silea mo vano isana tamlohi ima ʻrilangi vara i toho atu vavano i voli naʻihia vevuhi na nona ave.

<sup>35</sup> Tamaku na tuka i pa vaia sohen harihi isamim isoiso vara ha sopo ʻromi varaʻuhū na voraimim peresi na vevoraimim na mapumim.”

## 19

*Vujangi Mata Lahi  
(Mk 10.1-12)*

<sup>1</sup> Ale Iesu mara mo vere la hinau atu mo isoiso, mo malue Galilee mo unu na jara matan Judea na tavalu vano wai Jordan. <sup>2</sup> Ale vao tavera la lo usuria, ale mo vai mamahuni na nora rojoa ea.

<sup>3</sup> Pharisee la mai isana vara la vaihitea lara, “Mo tataholo usuri na leu vara tea i efi tipahi narouna matan te hinau?”

<sup>4</sup> Pani Iesu mo faramira mara, “Ka sopo lo evia vara haratu mo vaira na pongi tiroma mo vaira lamane peresi na hafai.

*Gen 1.27; 5.2*

<sup>5</sup> Ale mo vere mara, ‘Ale matana, tamlohi i pa tinahihi tamana enia tinana, ale i sohotahi isan narouna, ale la pa epe matea?’ *Gen 2.24*

<sup>6</sup> Ale matana, la pa sopo mele tamlohi mo rua, pani epe matea purongo. Ale sava God mo sohotahia jara matea, te tamlohi i pa sopo mele asehia.”

<sup>7</sup> La vere isana lara, “Mata sava natu, Moses mo retileu vara tea i efi sile na pepa mata rohu hin narouna matan vara i tipahi narouna?” *Deut 24.1-4; Mt 5.31*

<sup>8</sup> Mo vere isara mara, “Moses mo tinahihia vara ha pa efi tipahi na naroumim matan mapumim tamlohi hin Israel la rilangi, pani na pongi tiroma mo sopo sohena. <sup>9</sup> Ale na lo vere isamim vara tea mo tipahi narouna, pani mo sopo matan te hinau tinapua, pani mata mo vaivaileu peresi te tinapua, ale vara haratu mo tipahia mo lahi na tinapua, enia mo vaivaileu peresi hafai atu.”

<sup>10</sup> Nona tamlohi usuri la vere isana lara, “Vara mo sohena natu, isana tamlohi matea peresi narouna, i pa mele ruhu jea vara tea i sopo lahi.”

<sup>11</sup> Pani mo vere isara mara, “Mo sopo tamlohi tari sei la pa efi lavi reti sei, pani haratu purongo sei God mo tinahihira vara la lavi reti sei. <sup>12</sup> Matan, te tamlohi la vora la povota moiso, ale tea tamlohi la votaira, ale tea la sopo lahi matan la hase tapuhira matan mauri atu God mo

aulu hinia. Haratu mo efi lavi reti nike, i lavia.”

*Natuvahi La Mai Isana  
(Mk 10.13-16; Lk 18.15-17)*

<sup>13</sup> Ale tamlohi la lavi na natura la mai isana vara i tau na limana isara i ususi matara, pani tamlohi usuri la reti rilangi isara, <sup>14</sup> pani Iesu mara, “Ha tinahihi na natuvahi la mai isaku, ha sopo horora matan la haratu la sohera la pa lavi mauri atu God mo aulu hinia.” <sup>15</sup> Ale mo le ruhu hinira mo tau na limana hinira moiso mo malue hin jara atu.

*Tamlohi Tavtav Matea  
(Mk 10.17-31; Lk 18.18-30)*

<sup>16</sup> Ale hin rani atu, tamlohi matea mo mai isana mara, “Tija, sava hina ruhu natu, vara a vaia a pa lavi na mauri tui matana?”

<sup>17</sup> Ale Iesu mo vere isana mara, “Mata sava ko lo usiau na sava mo ruhu? God purongo enia mo ruhu. Vara ko opoia vara o lavi na mauri, o toho usuri na retileu.”

<sup>18</sup> Ale mo usia isana mara, “Sahara nakonako?”

Iesu mo vere mara, “‘O sopo vilimatei na tamlohi, o sopo vaivaileu peresi na tinapua mo lahi, o sopo vavanaho, o sopo tuetueni na halu non tea, <sup>19</sup> o ololo hin tamam enia tinam moiso’, *Deut 5.16* ale ‘O opoi na tinapua sohen ko lo opoiho hasem’.” *Lev 19.18*

<sup>20</sup> Uluvou atu mo vere mara, “La hinau tari sei na lo vaira moiso, pani sava natu, na sopo lo vaia?”

<sup>21</sup> Iesu mo vere isana mara, “Vara o pa tataholo i ruhu, o vano, o harehi vevuhi na nom tavgav, ale o sile na volina isana tamlohi tilavono, ale o pa lavi na tavgav na tuka; ale o mai, o usuriau.” <sup>22</sup> Pa tamlohi atu mara mo rongu retireti atu, mo malue, romina mo sati matan nona tavgav mo tavera jea.

<sup>23</sup> Moiso Iesu mo vere isana nona tamlohi usuri mara, “Vara ruhu na vere isamim, mo rilangi jea vara tamlohi tavgav matea i efi lavi mauri atu God mo aulu hinia. <sup>24</sup> A mele vere isamim, vara i pa mele malum



jea isana camel matea vara i ma-jořole na koko niteli, mo jeu na tamlohi tavgav matea vara i eřilavi mauri atu God mo aulu hinia.”

<sup>25</sup> Tamlohi usuri lara la rongo reti sei, la mařurahi tavera lara, “Hare natu, i pa eři juri?”\*

<sup>26</sup> Pani Iesu mo kilau vano isara mara, “Isana tamlohi hinau atu i pa sopo te malelena, pani isan God hinau tari la maleleha.”

<sup>27</sup> Moiso Peter mo řaramia mara, “Ko hitea, kamam kama tinařihi vevuhi na nomam hinau tari, ale kama usuriho. Sava natu, i pa nomam?”

<sup>28</sup> Ale Iesu mo vereia isara mara, “Varařuhu na vereia isamim, hin varama paro atu vara Natun Tamlohi i sakele na nona jara sakele mata suiha merana mo tavera jea, kamim haratu ka lo usuriau ha pa sakele na jara sakele mata suiha mo sangavulu řomana mo rua, ha pa ari la tavgavuin Israel atu mo sangavulu řomana mo rua. <sup>29</sup> Ale tamlohi tari sei la malue la tau na imara, teni voraira, teni vevoraira, teni tamara, teni tinara, teni natura, teni nora lepa mata hijaku, God i pa silera la pa mele lavia vaha ngav sangavulu (100x) hin haratu la taua, ale la pa lavi na mauri tui hitahu, <sup>30</sup> pani tamlohi matuvana nake sei la lo aulu, la pa sopo aulu hin pongi atu mo lo mai, pani la haratu la sopo aulu nake, la pa aulu.”

## 20

### *Tamlohi Isa Grape*

Ale Iesu mo lo vereia mara,

<sup>1</sup> “Ale mauri atu God mo aulu hinia mo sohen harihi: tamlohi tavera mata ima matea mo malue na řalavuhō jea matea vara i aleale tamlohi voko mata nona isa grape.

<sup>2</sup> Ale tamlohi voko la majinga vara la pa voko mata volvoli mata rani matea, moiso mo řulera la vano na nona isa grape.

<sup>3</sup> Ale na matan alo mo limaravati na řalavuhō mo malue mo vano mo

hite te tamlohi la lo toho purongo na jara maket, <sup>4</sup> ale mo vereia isara mara, ‘Eh, kamim sohena, ha sivo na isa grape, ale a pa sile na sava mo tataholo vara ha pa lavia.’ <sup>5</sup> Moiso la malue la vano hin isa atu. Ale tamlohi atu mo mele aleale tamlohi sohen tiroma; mo mele malue na livuha rani tataholo, ale mo mele malue na matan alo mo tolu na ravravi atu. <sup>6</sup> Ale na matan alo mo tikeli mo lima na ravravi hin rani atu, mo malue mo vano mo tapai te tamlohi la lo toho purongo, ale mo vereia isara mara, ‘Eh, mata sava ka lo turu purongo nike mo tikeli nakerihi?’

<sup>7</sup> La vereia isana lara, ‘Mo sopo tea i usi kamam vara kama voko nona.’ Mo vereia isara mara, ‘Kamim sohena, ha vano na isa grape.’ Ale la vano. <sup>8</sup> Ale na ravravi jea mo vereia isan nona patu tamlohi vara i tovi na tamlohi voko vara i silera na volira, ale vara i tapulo hin la haratu la pa voko hitahu, ale i sahe i tikeli la haratu la lo voko tiroma. *Lev 19.13; Deut 24.15*

<sup>9</sup> Ale na rani la haratu mo tovira vara la voko na matan alo mo lima na ravravi la mai, mo silera hatehateahi na volira mo tataholo mata voli rani matea. <sup>10</sup> Moiso na rani la haratu mo tovira tiroma na řalavuhō mata voko la mai, la lo řomřomia vara la pa lavi na mania i jeura, pani enira hatehateahi sohena, la lavi na volira mo tataholo mata voli rani matea. <sup>11</sup> Lara la lo lavia, la lo retireti vavarihi hin tamlohi tavera atu mata ima, <sup>12</sup> lara, ‘La haranike la pa mai hitahu la voko mata aoa matelete purongo, ale ko volira sohemam sei, kama slev nom na alo tavera mo tikeli nakerihi.’

<sup>13</sup> Pani mo řarami na vonara matea mara, ‘Tapala, na sopo vai te hinau i sati isam. Ko sopo majinga peresiau na volim mata rani matea teni mo vono?’ <sup>14</sup> O lavi na sava enia nom, ale o vano. Enau na opoia vara a sile na sava na silea isam i vano isan la haranike la pa voko hitahu. <sup>15</sup> Ko hitea mo sopo tataholo vara a vai na sava na noku mania sohen na opoia?

\* **19:25:** Tamlohi hin pongi atu la lo řomřomia lara God mo leřuhu hin na tamlohi sei la tavgav, matan enira la tavgav. La hutura hin reti sei Iesu mo vereia matan enia mo vujangia vara i pa řilangi jea vara tea i lavi mauri atu God mo aulu hinia.

Teni ko mereimerei matan posiku mo řuhu?”

<sup>16</sup> Ale Iesu mo mele vereea mara, “Vao atu nake sei la lo aulu, la pa sopo aulu hin pongi atu mo lo mai, pani la haratu la sopo aulu, la pa aulu.”

*Mo Vere Na Nona Mateia  
(Mk 10.32-34; Lk 18.31-34)*

<sup>17</sup> Ale na rani Iesu mo pa lo sahe Jerusalem, mo tovi la nona tamlohi usuri atu mo sangavulu řomana mo rua mo tovira vano na tavul malele, ale mo vereea isara mara, <sup>18</sup> “Ka hitea, řa lo sahe Jerusalem. Ale la pa turu-posi hin Natun Tamlohi i pa vano na lima moli nona řis peresi na tamlohi vujangi mata leu, ale la pa sile na talai isana vara i mate, <sup>19</sup> ale la pa silea isana tamlohi řořoha vara la pa kerehia, ale la rupia na asi maja, ale vara la vosaea na talopeilopei, ale na hatolu rani i pa mele turu na mateia.”

*Retiusia Matea  
(Mk 10.35-45)*

<sup>20</sup> Ale tinan la natun Zebedee, James enia John, mo mai isana tolu na natuna, ale mo papaohi na nahona vara i usia hin te hinau. <sup>21</sup> Ale Iesu mo vereea isana mara, “Ko opoi na sava?” Mo řaramia mara, “Na opoia vara la natuku nike mo rua la sakele na pahisam vara ko tauri na nom suiha, matea na matuam, ale matea na maraum.”

<sup>22</sup> Iesu mo řaramira mara, “Kamim ka sopo levosahi na sava ka lo usia. Ha eři lavi na rani řilangi a pa lavia?”

La řaramia lara, “Enjora, kama eři lavia.”

<sup>23</sup> Mo vereea isara mara, “Ha pa lavi na sava a pa lavi, pani matan vara ha pa sakele na matuaku teni na marauku, enia mo sopo noku vara a pa majinga hinia, pani enia non la haratu sei, Tamaku mo tatamahunia matara moiso.”

<sup>24</sup> Ale na rani la tupu sangavulu tinapua atu lara la rongoa, la lolokoru hin la vorai atu mo rua. <sup>25</sup> Pani Iesu mo tovira la mai isana, ale mo vereea mara, “Ka levosahia vara tamlohi aulu hin la haratu la tamlohi řořoha, la opoia tavera vara

la pa lo aulu na nora tamlohi, ale ka levosahia sohena sava nora tamlohi tatavera la lo roro na nora suiha hinira. <sup>26</sup> I pa sopo sohena isamim, pani hare mo opoia vara i aulu jea hin kamim mo isoiso, enia i pa nomim volitusi, <sup>27</sup> ale haratu mo opoia vara i pa tiromamim, enia i pa nomim slev, <sup>28</sup> mo sohena natu, Natun Tamlohi mo sopo sinai vara tamlohi la volitusi isana, mo vono, mo sinai vara enia i volitusi, ale vara i sile na maurina vara i volituhu na matuvana.”

*Tamlohi Matavuso Mo Rua  
(Mk 10.46-52; Lk 18.35-43)*

<sup>29</sup> Ale lara la lo malue Jericho, vao tavera matea la usuria. <sup>30</sup> Ale hin rani atu tamlohi matavuso mo rua la lo sakele na pahisa malele, ale lara la rongoa vara Iesu mo lo hahau na malele mariviti atu, la ulo aulu lara, “Moli, o řomopoi kamam, Natun David!” <sup>31</sup> Vao atu la merusahira vara la toho malum, pani la mele ulo aulu mo tavera jea lara, “Moli, o řomopoi kamam, Natun David!”

<sup>32</sup> Iesu mo turu, ale mo tovira la mai isana mara, “Ka opoi vara a vai na sava isamim?”

<sup>33</sup> La vereea isana lara, “Moli, kama opoia vara matamam la kilau.”

<sup>34</sup> Moiso Iesu mo řomopaira, mo tikeli na matara, ale vahatea purongo la eři hite, ale la usuria.

## 21

*Iesu Mo Unu Jerusalem*

*(Mk 11.1-11; Lk 19.28-38; Jn 12.12-19)*

<sup>1</sup> Ale lara la lo mai mariviti hin Jerusalem, la kakau taon sei Bethphage na pahisa Vuti talu Olive, moiso Iesu mo řule na tamlohi usuri mo rua, <sup>2</sup> mo vereea isara mara, “Ha vano hin vanua aturihi, ale vara ka lo unu ha pa hite na donki matea peresi natuna la lasira ea. Ha uli nařihira, ale ha lavira la mai isaku. <sup>3</sup> Ale, vara tea mo vere te hinau isamim matana, ha pa vereea vara, ‘Nomam tamlohi tavera mo opoira!’ ale vahatea i pa řulera la mai.” <sup>4</sup> Harihi sei, mo malue sohena matan vara sava hinau

přovet mo verea moiso i pa masese sei mara,

<sup>5</sup> ‘Ha verea isan la haratu la lo toho Zion vara:

Nomim Supe mo lo mai isamim, mo řommalum, ale mo lo sakele na donki matea, ale ha kilau vano, donki sei mo lo sakele hinia enia natu donki matea!’  
*Zec 9.9*

<sup>6</sup> Ale la tamlohi usuri atu mo rua la vano la vai na sava Iesu mo verea isara moiso. <sup>7</sup> La lavi donki atu peresi na natuna, la tatavu na hařin la donki atu na nora ruru hai, ale Iesu mo sakele hinira, <sup>8</sup> moiso, la vao tavera atu la vuřangi na nora ruru na malele tavera atu, ale tatuara la tai na pere vipahai la vuřangira hin malele atu.

<sup>9</sup> Ale vao tavera atu la vano tiroma hinia peresi la haratu la lo usuria, la lo uloulo tavera lara, “Hasohaso God, matan natun David!” “Ale leřuhu hinia sei mo lo mai na hijan Moli God!”

*Psa 118.26*

“Hasohaso i sahe isan God na tuka sei mo aulu jea!”

<sup>10</sup> Ale na rani mo unu Jerusalem tamlohi tari hin taon tavera atu la hutura hinia, la lo verea lara, “Hare nahai?”

<sup>11</sup> Ale vao tavera atu lara, “Tamlohi nike, enia přovet Iesu, mara Nazareth hin Galilee.”

*Iesu Mo Unu Na Temple*

*(Mk 11.15-19; Lk 19.45-48; Jn 2.13-22)*

<sup>12</sup> Ale Iesu mo unu na Temple, moiso mo levuti la haratu la lo ařeařehi peresi la haratu la lo volvoli na lolo Temple, moiso mo tipovi na tepel non la haratu la lo jenjen mania peresi na jara sakele non la haratu la lo hařehi na vomaha.

<sup>13</sup> Mo verea isara mara, “Retiulia mo verea vara, ‘Imaku la pa tovia ima usiusi.’ Pani kamim ka vaia mo mai jara luhu non la haratu sei la tatamahu moiso mata vili na tamlohi mata vavanaho.”

*Isa 56.7; Jer 7.11*

<sup>14</sup> Moiso matavuso peresi na tamlohi papao la mai isana na lolo Temple, ale mo vai mamahunira. <sup>15</sup> Pani

moli mata přis peresi na tamlohi vujangi mata leu lara la hite na hina mařurahi řuhuřuhu mo lo vaira moiso, ale lara la mele rongo na natu-varihi la lo ulo aulu na Temple lara, “Hasohaso isan Natun David!” tamlohi tatavera atu la lolokoru. <sup>16</sup> Ale la verea isana lara, “Ko rongo na sava la lo verea?” Ale Iesu mo verea isara mara, “He’e! Kamim ka sopo lo evia na Retiulia hin te rani vara, ‘God engko ko tatamahu na nom hasohaso vara i pa malue na jingo natuvarihi peresi na pipi?’ ”

*Psa 8.2*

<sup>17</sup> Hitahun haratu, mo malue isara, mo malue Jerusalem mo vano na taon matan Bethany, ale mo juruvi atu.

*Vipahai Fig Matea*

*(Mk 11.12-14, 20-24)*

<sup>18</sup> Na řalavuhu, mo lo hilu vano Jerusalem, ale mo rongo mo marohati. <sup>19</sup> Ale mo hite na pulo fig matea na pahisa malele, mo vano mariviti, pani mo sopo hite te vuana hinia, pani rauna purongo. Ale mo reti isana mara, “O pa sopo eři mele lavi te vuam hin te rani!” Ale vahatea purongo pulo fig atu mo mahoa.

<sup>20</sup> Na rani tamlohi usuri lara la hitea, la hutura lara, “Eh, mo sohena sava natu, pulo fig nike mo mahoa vahatelete purongo?”

<sup>21</sup> Moiso Iesu mo řaramira mara, “Varařuhu na verea isamim, vara te nomim rasua, ale ha sopo řom rua, kamim ha pa eři vaia sohen harihi na vaia isan pulo fig nike, ale ha pa eři verea isan vutivuti nike, vara, ‘O hase sauho aulu, o pulahiho na lolo tasi!’ Ale i pa masese. <sup>22</sup> Ale sava ka lo usia na usiusi, ha pa lavia, vara te nomim rasua.”

*Retiusia Mata Suiha Non Iesu*

*(Mk 11.27-33; Lk 20.1-8)*

<sup>23</sup> Iesu mo unu na Temple, ale mara mo lo vujangi na tamlohi, moli mata přis peresi na tamlohi aulu matan Jerusalem la mai isana vara la usi te retiusia isana lara, “Ko lo vai la hinai nike na suiha hare? Hare mo sileho hin suiha sei?”

<sup>24</sup> Iesu mo řaramira mara, “Enau sohen a pa usi kamim na retiusia matea, ale vara ha řaramiau, enau sohen a pa vereulia vara sava suiha nahai na lo vai la hinau sei hinia. <sup>25</sup> Suiha atu John mo lo paptijo hinia mo tai epu? Mo tai na tuka, teni isana tamlohi?”

Ale la lo sorasorahia isara lara, “Vara řa vereia vara, ‘Mo tai na tuka!’ i pa vereia isařa vara, ‘Mata sava ka sopo rasua?’ <sup>26</sup> Pani vara řa vereia vara, ‘Mo tai isana tamlohi purongo!’ vao nike la pa paruřa matan enira la vereia vara John enia přovet varařuhu matea non God.”

<sup>27</sup> Ale matana, la řarami Iesu lara, “Kama sopo levosahia.”

Ale Iesu mo vereia isara mara, “Enau sohen a pa sopo vereuli kamim hinia vara sava suiha natu, na lo vai la hinau sei hinia.

<sup>28</sup> Ha to řomřomia, tamlohi matea natuna mo rua. Ale mo vereia isan matea tiroma mara, ‘Natuku, o pa vano o voko na isa grape nohorihia.’

<sup>29</sup> Ale uluvou atu mo řaramia mara, ‘Na řohu!’ pani hitahu mo posi na řomina, ale mo vano.

<sup>30</sup> Ale mo mele vano isan natuna tinapua atu, mo vereia sohen a. Ale mo řaramia mara, ‘A pa vano tata!’ pani mo pa sopo vano. <sup>31</sup> Sahara hin la haratu mo rua mo vai na masalon tamana?”

Lara, “Haratu tiroma.”

Iesu mo vereia isara mara, “Enjora, varařuhu na vereia isamim, haratu la lo lavi na takis peresi na hařai malele, la pa lavi mauri atu God mo aulu hinia tiroma hin kamim. <sup>32</sup> Matan John mo pala isamim mo vujangi na malele posposi tataholo non God, ale ka sopo rasua, pani haratu la lo lavi na takis peresi na hařai malele la rasua. Hina purongo vara ka hitea, ka řohu vara ha posi na řomimim vara ha rasu.

### *Tamlohi Isa Sasati*

*(Mk 12.1-12; Lk 20.9-19)*

<sup>33</sup> Ha mele tapurongo na titileu tinapua. Tamlohi tavera mata ima matea mo lavo na isa grape matea. Mo tiu na wořa matea řalihia, ale mo

heli na koko varavarasi grape matea, ale mo voro na ima aulu matea mata kilakilau, ale mo opoia vara tea la pakaia, ale tamlohi hai la pakaia, moiso enia mo vano na jara tinapua matea mo vano asau. <sup>34</sup> Ale taro asitauni mo lo mai mariviti, mo řule na nona slev la vano isan la tamlohi atu la lo pakai isa atu vara la lavi na řungana. <sup>35</sup> La tamlohi atu la tauri na nona slev, la tamaji matea, la vilimatei matea, ale la parumatei matea. <sup>36</sup> Tamlohi tavera atu mo mele řule na slev tinapua, evira mo jeu la haratu tiroma. Ale la tamlohi atu la vaia isara sohen la lo vaia tiroma.

<sup>37</sup> Na isoisona, mo řule natuna mo vano isara mara, ‘Korong la pa ololo hin natuku!’

<sup>38</sup> Pani na rani la tamlohi atu lara la hite natuna, la vereia isara hasera lara, ‘Nona korohi nakerihi. Ha mai, řa vilia, ale řa pa lavi na koruna.’

<sup>39</sup> Ale la tauria la pulahi nařihia hin isa atu, ale la vilimateia atu.

<sup>40</sup> Ale na usi kamim hinia vara na rani tamlohi isa atu i mele pala, i pa vai na sava isan la tamlohi atu la lo pakai na isana?”

<sup>41</sup> La řarami Iesu lara, “I pa vilimatei la tamlohi sasati atu na malele řilangi matea, ale i pa mele tinařihia isana tamlohi tinapua vara la pa pakai matana, ale la pa silea na vuana na rani asitauni.”

<sup>42</sup> Iesu mo vereia isara mara, “Enjora, ka sopo lo evi hinau nike na Retitapu hin te rani?

‘Vatu atu tamlohi voro ima la lo tipahia,

enia mo mai tapulo pulo vatu mata ima,

haranike Moli God mo vaia,

ale mo řuhu jea matan řa eři hitea.’

*Psa 118.22-23*

<sup>43</sup> Matana, na lo vereia isamim, jara ololo atu ka lo turu hinia isan God sei mo supe mo aulu hin kamim Jew hasemim purongo hinia, God i pa lavi nařihia ololo sei isamim, i pa silea isana mara jara tinatinapua sei la pa vua na vua řuhu sei God mo opoia.

<sup>44</sup> Ale haratu mo lo tialahalaha hin

vatu atu, vatu atu i pa putputia, ale vara vatu atu mo jovi hin tea i pa lomolomoa.’ ”

<sup>45</sup> Na rani moli mata p̄ris peresi na Pharisee lara la rongo titileu atu, la rongovosahia vahatea vara mo lo verera. <sup>46</sup> Pani hina purongo vara la lo aleale malele vara la taurilatia hinia, la matahuni la vao atu matan vao atu la rasua vara enia p̄rovet matea.

## 22

### *Hanhani Tavera Nona Supe Matea (Lk 14.15-24)*

<sup>1</sup> Ale Iesu mo mele vere na titileu hai isara mara, <sup>2</sup> “Ale mauri atu God mo aulu hinia mo sohen har- ihi: Supe matea mo tatamahu na hanhani tavera matea mata lahi non natuna, <sup>3</sup> ale mo řule na nona slev vara la vano la tovi la haratu sei la lo usira moiso vara la pa mai na hanhani tavera mata lahi sei, pani la řohu vara la mai. <sup>4</sup> Ale mo mele řule te slev tinapua, ale mo vere a isara mara, ‘Ha vano isan la haratu řa usira tiroma, ha vere a isara vara la mai natu, matan na tatamahuni na noku hanhani moiso, ale ka hitea, la vili na pulaku buluk hai peresi na natu buluk hai sei la řavisvis řuhu, hinau tari mo tatamahu moiso, ha mai na hanhani tavera mata lahi.’ <sup>5</sup> Pani la sopo tapurongo isara, ale la malue, matea mo vano na isana, matea mo vano na nona stoa, <sup>6</sup> ale la hina tinapua atu la taurilati na nona slev la vailehilehira, ale la vilimateira.

<sup>7</sup> Ale supe atu mo lolokoru, mo řule na nona tamlohi vuro, ale la vano la vili la tamlohi atu la sopo juri, ale la suli jovjovi na nora taon tavera. <sup>8</sup> Ale mo vere a isana nona slev mara, ‘Hanhani tavera mata lahi mo tatamahu moiso, pani haratu řa usira tiroma la sopo řuhu. <sup>9</sup> Ale matana, ha vano na malele tavera, ha usi na sava tamlohi ka tapaira ea vara la mai na hanhani tavera mata lahi.’

<sup>10</sup> Moiso la slev atu la vano na malele, ale la tovi matavuhi na tamlohi sasati, peresi na tamlohi řuhu, haratu la tapaira, ale ima lahi atu mo mařivi na tamlohi atu la lo usira.

<sup>11</sup> Pani na rani supe mo mai vara i hite la tamlohi atu la lo usira, mo hite na tamlohi matea atu mo sopo te nona ruru tataholo mata lahi. <sup>12</sup> Ale mo vere a isana mara, ‘Tapala, ko pa unu nike sohena sava matan mo sopo te nom ruru mata lahi?’ Ale tamlohi atu nona hapu mo mate. <sup>13</sup> Moiso supe atu mo vere a isana nona slev mara, ‘Ha pesi pulutahi na palona peresi na limana, ha pulahia hin jara řořoha atu mata talai. Hin jara atu la pa tangtangi, ale la pa ngařngařori na huřura mata rongohaji ea.’ <sup>14</sup> Matan God mo tovi na tamlohi matuvana, pani mo viřoni na tupu visaletete purongo.”

### *Voli Na Takis (Mk 12.13-17; Lk 20.20-26)*

<sup>15</sup> Moiso Pharisee la vano la hatihia vara la pa vaihitea vara Iesu i kali hin te nona reti. <sup>16</sup> Ale la řule na nora tamlohi usuri peresi na tamlohi non supe Herod la vano isana lara, “Tija kama levosahia vara engko ko lo varařuhu, ale ko lo vujangi na malele varařuhu mo usuri na masalon God mo tataholo, ale ko sopo řomřomi na řomi tamlohi purongo matan ko sopo tametame tea. <sup>17</sup> O to vere kamam hinia nakerihi vara mo tataholo vara tamlohi la voli na takis isana supe nona mara Rome teni mo vono?”

<sup>18</sup> Pani matan Iesu mo levosaħi na nora posposi vaisatihi na tinapua, mo vere a mara, “Kamim tapnetano, ka lo vaihiteau mata sava? <sup>19</sup> Ha to sileau hin te selen mata takis hatea.” Ale la silea na selen mata takis matea. <sup>20</sup> Moiso Iesu mo vere a isara mara, “Ale ha to vere a, niniun harepu peresi na hijana nahai?”

<sup>21</sup> Lara, “Supe nona mara Rome.”

Ale mo vere a isara mara, “Ale vara mo sohena, ha sile na hinau non supe nona mara Rome isan supe nona mara Rome, ale hinau non God isan God.” <sup>22</sup> Lara la rongoa sohena sava mo řaramira sei mo řuhuřuhu jea, la hutura hinia, ale la malue la rovo hinia.

*Mauri Na Pongi Hitahu*  
(Mk 12.18-27; Lk 20.27-40)

<sup>23</sup> Rani atu mo pa lo vano, ale Saducee la mai isana. Vao sei la vereea vara mo sopo te sauteterahi, ale la usia na retiusia matea, <sup>24</sup> lara, “Tija, Moses mara, ‘Vara te tamlohi mo mate mo sopo te natuna, tasina i pa lavi narouna mata i korohi te natun tavaina.’ *Deut 25.5* <sup>25</sup> Ale vorai mo limaravrua la lo toho nike isamam, ale vora tiroma mo lahi, ale mo mate, pani mo sopo te natuna. Vora usuria mo lavi narouna. <sup>26</sup> Ale mo sohena isan nona vora usuria atu peresi na hatolura, mo sivo mo tikeli na halimaravruara. <sup>27</sup> Hitahura, haʻrai atu mo mate. <sup>28</sup> Ale, hin pongi atu tamlohi la pa sauteterahi hinia, matan enira mo isoiso la lahi hin haʻrai atu, i pa naroun sahara hinira?”

<sup>29</sup> Ale Iesu mo ʻaramira mara, “Romimim mo sopo tataholo, matan ka sopo levosahi na Retitapu teni na suihan God. <sup>30</sup> Matan na pongi hitahu na sauteterahi la pa sopo lahi teni la pa tulatulahi, pani la pa sohena angelo na tuka. <sup>31</sup> Ale hin vujangi sei mata sauteterahi, ka sopo lo evi na sava God mo vereea isamim? <sup>32</sup> ‘Enau God non Abraham, God non Isaac, ale God non Jacob!’ God mo sopo vereea vara enia God non la haratu la mate, pani non la haratu la mauri.” *Exo 3.6*

<sup>33</sup> Ale vao tavera atu lara la rongo na nona vujangi, la maʻurahi tavera hinia.

*Retileu Mo Aulu Jea*  
(Mk 12.28-34; Lk 10.25-28)

<sup>34</sup> Pani Pharisee lara la rongoa vara Iesu mo vuni na hapu non la vao Saducee atu, Pharisee la pulutahi, ale la mai isana. <sup>35</sup> Ale vonara matea, enia tamlohi lelevosahi mata leu matea, ale mo usia na retiusia matea vara i vaihitea mara, <sup>36</sup> “Tija, sava retileu natu, mo aulu mo jeu na retileu tari na Leu?”

<sup>37</sup> Ale Iesu mo vereea isana mara, “O pa opoi Moli nom God vevuhi na mapum, na maurim, ale na nom ʻromʻromi tari’.” *Deut 6.5* <sup>38</sup> Harihi natu, enia retileu atu mo aulu jea mo tiromara. <sup>39</sup> Haruana

mo sohen harihi, ‘O opoi na tahisam sohen ko lo opoiho hasem’. *Lev 19.18*

<sup>40</sup> Hin la retileu atu mo rua, vujangi tari mata Leu non Moses peresi na pʻrovet la lo turu hinira.”

*Natun David Enia Hare*  
(Mk 12.35-37; Lk 20.41-44)

<sup>41</sup> Ale hin rani atu Pharisee la pa lo pulutahi jara matea, Iesu mo usira na retiusia matea, <sup>42</sup> mara, “Ha to vereau na ʻromimim hin Kʻristo? Enia mahapin hare?”

Ale la vereea isana lara, “Enia mahapin David.”

<sup>43</sup> Mo vereea isara mara, “Mo sohena sava natu, David, na suihan Tanume ʻruhu mo tovia Moli mara,

<sup>44</sup> ‘Moli God mo vereea isan noku Moli: O sakele na matuaku na jara ooloo nike, i tikeli pongi atu a tau na nom meresahi na ruhuruhi palom.’

*Psa 110.1*

<sup>45</sup> Vara David mo tovia Moli, mo sohena sava natu, enia natun David?”

<sup>46</sup> Ale, te vonara hatea mo sopo eʻri ʻaramia hin te reti hatea, ale mo tapulo hin rani atu, mo sopo tea i ʻromʻrilangi vara i mele usi te retiusia isana.

## 23

*Aria Mata Pongi Hitahu*

(Mk 12.38-40; Lk 11.37-52; 20.45-47)

<sup>1</sup> Ale Iesu mo vereea isan la vao atu peresi na nona tamlohi usuri mara,

<sup>2</sup> “Tamlohi vujangi mata leu peresi na Pharisee, enira natu, la haratu la lo vujangi na malele Retiulia sei Moses mo ulia vara mo lo vere na sava, <sup>3</sup> matana, mo ʻruhu vara ha vai na hinau tari la vereea isamim, ale ha turu hinira, pani ha sopo vai na sava la lo vaira, matan la sopo vai na sava la lo retivujavujangi hinira.

<sup>4</sup> La lo opoia hajavua vara la tau na hinau puhoni na mauri tamlohi, pani la ʻrohu vara la juhata na pulora vara la tuenira.

<sup>5</sup> Hinau la lo vaira la vaira matan vara tamlohi la pa eʻri hitera, sohen la lo vai na nora sope puku mata

Retiulia sei la lo lasira na patura la mele tavera, ale la vai na nora revurevu ruru la mele peravu jea. *Deut 6.8* <sup>6</sup> Ale la opoia vara la lo sakele na jara sakele nona tamlohi tatavera na hanhani tavera, ale na jara sakele nona tamlohi aulu na lolo ima lotu, <sup>7</sup> ale la opoi na rani tamlohi la tovira vara 'tija' ale la opoi na rani tamlohi la sile na retioloalo isara na jara maket. <sup>8</sup> Pani kamim ha pa sopo lavi na hija tija matan nomim Tija enia matelete, ale kamim vorai peresi na vevorai. <sup>9</sup> Ale ha sopo tovi te tamlohi na varama, 'Tama' matan Tamamim enia matelete purongo na tuka. <sup>10</sup> Sohen haratu ha sopo lavi na hija 'tija' matan nomim Tija enia Křisto. <sup>11</sup> Haratu mo aulu jea hin kamim, enia i pa nomim volitusi. <sup>12</sup> Haratu mo hase tahea sahe aulu hin kamim, God i pa taua sivo atano, haratu mo hase taua sivo atano, God i pa tahea sahe aulu.

<sup>13</sup> Rani řilangi tavera i pa mai isamim tamlohi vujangi mata leu peresi kamim Pharisee, kamim ka tapnetano, matan ka lo pelatihoro na malele vara tamlohi la sopo eři lavi mauri atu God mo aulu hinia. Matan kamim hasemim ka sopo unu, ale ka lo turuhoro la haratu la opoia vara la unu hinia. <sup>14-15</sup> Rani řilangi tavera i pa mai isamim, tamlohi vujangi mata leu, peresi kamim Pharisee, kamim ka tapnetano, matan ka lo hahau rotoroto na jara peresi na tasi vara ha vai te tamlohi hatea mo sopo mahapin Abraham i lavi na nomim rasua, ale na rani mo mai sohena vonamim matea, ka vaia mo mai natu moruhapu matea mo mele sati jea mo jeu kamim.

<sup>16</sup> Rani řilangi tavera i pa mai isamim ka tamlohi tatavera matavuso, ka lo vujangia kara, vara tea mo vere na nona retitauhi na hija Temple, ka vere vara enia hina purongo, pani vara tea mo vere na nona retitauhi na gold mata Temple, haratu i pa mele řuhu vara i taurilati na nona retitauhi. <sup>17</sup> Ka matavuso rongorongono vono! Sava mo aulu jea?

Gold teni Temple atu sei mo lo vai na gold mo tapu? <sup>18</sup> Ale ka lo vere vara, vara tea mo vere na nona retitauhi na hija jara silesilea isan God, kara enia hina purongo, pani vara tea mo vere na nona retitauhi na nona silesilea, i pa mele řuhu vara i taurilati na nona retitauhi. <sup>19</sup> Ka tamlohi matavuso! Sava mo aulu jea? Silesilea teni jara silesilea atu sei mo lo vai na silesilea mo tapu? <sup>20</sup> Ale haratu mo vere na nona retitauhi na hija jara silesilea, mo lo retitauhi na hinau tari hinia. <sup>21</sup> Moiso haratu mo lo vere na nona retitauhi na hija Temple, mo retitauhi na hijana peresi God atu mo lo toho hinia. <sup>22</sup> Ale haratu mo retitauhi hin tuka, mo lo retitauhi na jara sakele mata suiha non God peresi God sei mo lo sakele ea. *Isa 66.1*

<sup>23</sup> Rani řilangi tavera i pa mai isamim, tamlohi vujangi mata leu, peresi kamim Pharisee, kamim ka tapnetano. Kamim ka avulahi vara ha lo sile na nomim tithe na hinau sohena: solat, oke peresi na watakres, pani ka lo kilau purongoi na hinau aulu mata leu sohena: aria tataholo, řomopoia peresi na vai vevuhi na nomim retitauhi tarea. Ha vai la harihi la sopo aulu jea, pani ha sopo řomaliho hin la haratu la mele aulu jea na nahon God. *Lev 27.30*

<sup>24</sup> Ka tamlohi tatavera matavuso! Ka lo spuni nařihi na hina varihi la sati, pani ka lo řolomi jarohi na hina tavera la sasati!

<sup>25</sup> Rani řilangi tavera i pa mai isamim, tamlohi vujangi mata leu, peresi kamim Pharisee. Kamim ka tapnetano, matan ka lo hoje na pahisa paniken peresi na peleti, pani na lolona mo mařivi na posposi hanmarua peresi posposi řomřomi hasemim. <sup>26</sup> Ka Pharisee matavuso! Ha hoje na lolo paniken peresi na peleti tiroma matan vara pahisara la pa vokevoke.

<sup>27</sup> Rani řilangi tavera i pa mai isamim, tamlohi vujangi mata leu, peresi kamim Pharisee. Kamim ka tapnetano! Matan kamim ka sohena ima taptap laem lulu, pani lolona

mo mařivi na sui tamlohi peresi na lumira. <sup>28</sup> Ale kamim sohena, la hite kamim sohen ka vokevoke, pani ka mařivi na tapnetano peresi na vaivaileu.

<sup>29</sup> Rani řilangi tavera i pa mai isamim, tamlohi vujangi mata leu, peresi kamim Pharisee. Kamim ka tapnetano! Matan ka voro na ima taptap nona přovet, ale ka lakolako na taptap tamlohi tataholo na storera la ulia na tapura, <sup>30</sup> kara, 'Vara kama pa lo toho na pongi non la nomam tata, kama pa sopo tuenira vara la vili na přovet.'

<sup>31</sup> Ale matana, ka lo vereulia vara kamim ka natun la tamlohi atu la lo vili na přovet. <sup>32</sup> Ha vai mařivisi na sava tamamim la tapulona, <sup>33</sup> ka sohena mata! Ka natu mata sasati. Ha pa juri kamim sohena sava na talai mata moruhapu? <sup>34</sup> Matan haratu, a pa řule te přovet peresi te tamlohi lelevosahi tolu na tamlohi vujangi mata leu, tatuara ha pa vilimateira na talopeilopei, ale tatuara ha pa rupira na asi maja na nomim ima lotu, ale ha pa tipahira na taon tavera tari la pa vano ea, <sup>35</sup> matan haratu i pa sohen harihi: kamim ha pa lavi na talai mata řae tari nona přovet tuai mo tapulo na řaen Abel, tamlohi tataholo atu, mo tikeli na řaen Zechariah natun Barachiah, haratu ka vilia na livuha jara tapu na lolo Temple peresi na jara mata silesilea atu. *Gen 4.8; 2 Chron 24.20-21*

<sup>36</sup> Varařuhu na vereia isamim, la talai sei la pa pala isan pina nike."

### *Iesu Mo Tangisi Jerusalem* (Lk 13.34-35)

Iesu mo mele vereia mara,

<sup>37</sup> "Jerusalem o Jerusalem, taon tavera sei tamlohi tatavera la lo vilimatei na přovet hinia, ale la lo parumatei la haratu God mo řulera isana. Ko sopo levosahia vara vaha visa moiso na opoia vara a hohovi na natun, sohena tina toa mo lo hohovi na natuna na ruhuru hapana, pani kamim tamlohi tatavera hinia ka řohu! <sup>38</sup> Ko hitea, imam nike, i pa

mai sohena jara hasetoho matea. *Jer 22.5*

<sup>39</sup> Matan na vereia isamim, ha pa sopo mele hiteau vavano i tikeli rani atu ha pa vereia vara, 'Leřuhu hin haratu mo lo mai na hijan Moli God'." *Psa 118.26*

## 24

### *Temple I Pa Maroe* (Mk 13.1-2; Lk 21.5-6)

<sup>1</sup> Hitahu, Iesu mara mo lo malue na Temple non Jerusalem, nona tamlohi usuri la mai isana vara la vereia vara la ima tavera atu la řuhu sohena sava. <sup>2</sup> Pani Iesu mo řaramira mara, "Ka hite la ima tari akerihi? Varařuhu na vereia isamim vara i pa sopo te vatu hatea i pa lo toho aulu na vatu tinapua sei vara la pa sopo atu jovjovira!"

### *Rani Rilangi Tavera* (Mk 13.3-13; Lk 21.7-19)

<sup>3</sup> Hitahuna, Iesu mo lo sakele na vuti talu Olive, ale nona tamlohi usuri la mai řořo isana, la vereia lara, "O to vere kamam hinia vara sava matamata natu, kama pa lo kilau matana, vara kama pa levosahia vara nom mele mai peresi na pongi hitahu mo pala."

<sup>4</sup> Iesu mo řaramira mara, "Ha lo kilau ha sopo tinařihi tea i halu kamim, <sup>5</sup> matan tamlohi matuvana la pa mai na hijaku la pa vereia vara enira natu pa Křisto atu, la pa tikau leji na tamlohi matuvana. <sup>6</sup> Ale ha pa rongo na vuro peresi na sorasorahi vuro, pani ha sopo matahu matan harihi natu, i pa mai tiroma, pani pongi hitahu mo sopo lo pala. <sup>7</sup> Mara jara tavera tinatinapu la pa meresahi hinira, ale supe matea i pa meresahi na supe tinapua. Marua tavera i pa mai, ale mihi i pa hisuhi na jara matuvana. <sup>8</sup> La hinau tari sei la sohena tapulo rongohaji na epe hařai vara i lavilavi.

<sup>9</sup> Ale la pa tauri kamim ha vano na rani řilangi sati, la pa vilimatei kamim. Tamlohi tari na jara tavera na varama la pa hitesatihi kamim mata hijaku. <sup>10</sup> Vao tavera la pa tinařihi na nora rasua hin rani atu,



ale la pa turuturuposi hinira, la pa hitesasatihira. <sup>11</sup> Ale p̄rovet haluhalu matuvana la pa pala, la pa tikau leji na tamlohi matuvana. <sup>12</sup> Ale matan vaivaileu i pa tavera jea, o poia nona tamlohi matuvana la pa tihai. <sup>13</sup> Pani harepu mo lo turu řilangi mo tikeli na pongi hitahu, i pa juri. <sup>14</sup> Ale tamlohi la pa retivujavujangi na Retiřuhu matan mauri atu God mo aulu hinia isana mara jara tinatinapua na varama matan vara la pa levosahia, moiso pongi hitahu i pa pala.

*Hina Sasati Na Lolo Temple  
(Mk 13.14-23; Lk 21.20-24)*

<sup>15</sup> Vara ha hite hina lumiha sei God mo řohu hinia, haratu sei p̄rovet Daniel mo lo vereea tuai moiso, vara mo turu na jara tapu na lolo Temple, hare mo lo evi reti nike i levosahi na řaramina, *Dan 9.27* <sup>16</sup> mo řuhu vara la haratu la lo toho Judea la rovo la sahe na vutivuti. <sup>17</sup> Mo řuhu vara haratu mo lo toho aulu na pusa imana i pa sopo sevuti sivo na lolona vara i lavi nařihi na nona hinahinau hinia, <sup>18</sup> Ale mo řuhu vara haratu mo lo voko na isa i pa sopo posi vara i ale na nona jaket. <sup>19</sup> I pa rani řilangi isana hařai sei la pangepange peresi la haratu la pa lo vasusui na nora pipi hin rani atu! <sup>20</sup> Ha usiusi isan God vara nomim rovorovo i pa sopo jovi na taro hamariri teni na rani Sabbath. <sup>21</sup> Mo sopo lo te rani sohen rani řilangi tavera atu, mo tapulo na pongi tiroma mo tikeli nake, ale i pa sopo mele tea sohen hin te rani. *Dan 12.1*

<sup>22</sup> Ale vara God i sopo lo vai la rani řilangi atu evira la mele vejuveju, i pa sopo te tamlohi hatea i pa mauri. Pani matan la haratu God mo viřonira, enia i pa vai la rani atu evira la mele vejuveju.

<sup>23</sup> Moiso vara tea mo vereea mara, 'Ha kilau mai nike! Křisto atu enia nahai, teni enia natu, sevano' — mo

vono, ha sopo rasua. <sup>24</sup> Matan křisto haluhalu peresi na p̄rovet haluhalu la pa pala, ale la pa vai na matamata tatavera peresi na hinau mařurahi, matan vara la vaihitea vara la eři tikau leji la haratu Moli mo viřonira. <sup>25</sup> Ka hitea, mo sopo lo ranina tataholo pani na lo vere kamim hinia moiso.

<sup>26</sup> Ale vara la vereea isamim lara, 'Ha kilau vano, enia natuvano na jara tano koru!' — ha sopo vano atu! Teni vara la vereea lara, 'Ha kilau mai nike, enia nahai mo lo toho na lolo ima nike!' — ha sopo rasua! <sup>27</sup> Matan rani mata mele mai non Natun Tamlohi i pa mera sohen vaha sei mo vilasi, merana mo tai Opae mo sivo Marino. <sup>28</sup> Vara ko hite na karai la lo avu vano hin te jara, o pa levosahia vara te pahai mo mena atu.\*

*Rani Atu Natun Tamlohi I Pa Mele  
Mai Hinia  
(Mk 13.24-27; Lk 21.25-28)*

<sup>29</sup> La hinau řilangi atu vara la vano moiso, 'Vahatea purongo mera alo i pa tihai, vitu i pa sopo mele sile na memerana, vitusarasara la pa jovjovi na masapa, ale God i pa hutehi na suiha tari na tuka'. *Isa 13.10; Joel 2.10*

<sup>30</sup> Ale matamata matan Natun Tamlohi i pa pala na masapa aulu, ale tavitavi tari mata varama la pa tangi mata matahu, moiso la pa hite Natun Tamlohi i pa lo mai na telangi matan tuka na nona suiha peresi na merana tavera. *Dan 7.13; Zec 12.10-14* <sup>31</sup> I pa řule na nona angelo na tiv tavera mata trumpet matea, moiso la pa takonahi la haratu mo viřonira řalihi na varama na jara tari na masapa aulu na varama.

*Vujangi Mata Vipahai Fig  
(Mk 13.28-31; Lk 21.29-33)*

<sup>32</sup> Ha lo levosahi na titileu mata vipahai fig: na rani rangana la lo

\* **24:28:** Iesu mo vere na hija maji avuavu sei 'vulture'. Enia posina mo sohen karai pani enira tamlohi mata ale na hinau mo mate mo ranga moiso. v. 28 Translesen tinapua matea: Vara ko hite na vulture la lo takonahi jara matea, o pa levosahia vara te hinau mo mate atu, ale sohen haratu, vara o hite la matamata sei la malue usuri na noku reti, o pa levosahia vara i pa sopo tuai Natun Tamlohi i pa mele pala.

sasañira, ha pa levosahia vara taro mamasa mo lo mai. <sup>33</sup> Ale kamim sohena, vara ha hite la hinau nike, na lo vereea isamim la lo tapulo masese, ha pa levosahia vara Natun Tamlohi mo lo mai mariviti moiso, mo lo turu na matarua. <sup>34</sup> Varañuhu na vereea isamim, vara pina nike sei mo lo mauri hin rani atu, la pa sopo eñi tihai, vavano la hinau nike, la masese vevuhi tiroma. <sup>35</sup> Tuka enia varama la pa tihai, pani noku reti la pa sopo eñi tihai hin te rani.

### *Tea Mo Sopo Levosahia*

*(Mk 13.32-37; Lk 17.26-30, 34-36)*

<sup>36</sup> Pani rani atu tea i pa sopo eñi levosahia vara enia sava rani teni aoa natu. Mo sopo te angelo na tuka, teni Natuna, pani Tama hasena purongo mo levosahia.

<sup>37</sup> Hin rani atu Natun Tamlohi i pa mele mai, i pa sohena rani non Noah. *Gen 6.5-8*

<sup>38</sup> Matan sohen hin pongi atu tuai wai tavera mo sopo lo lolovi na varama, tamlohi la lo vai na hanhahi tavera, ale la lo vai na lahi, la lo tulatulahi vavano Noah mo unu na Ark. <sup>39</sup> Ale tamlohi la sopo levosahi na sava i pa mai mo sinai wai tatave tavera atu mo mai mo tivesi vevuhira. I pa sohen haratu hin pongi atu Natun Tamlohi i pa mele mai hinia. *Gen 7.6-24*

<sup>40</sup> Hin pongi atu, tamlohi mo rua la pa lo voko na isa, la pa lavi nañihi matea, matea i pa lo toho. <sup>41</sup> Ale hañai mo rua la pa lo visi na flaua, la pa lavi nañihi matea, matea i pa lo toho. <sup>42</sup> Ale matan haratu, ha tatamahu! Ka sopo levosahia vara sava rani natu, nomim Moli i pa mele mai hinia.

<sup>43</sup> Ale ha lo levosahi hinau akerihi, vara tamlohi tavera mata ima matea i pa lo levosahi na sava aoa na vutepongi sei vara tamlohi vavanaho i pa mai hinia, i pa lo kilau, ale i pa sopo tinañihia vara i unu na imana. <sup>44</sup> Ale matan haratu, kamim sohena ha tatamahu, matan ha pa sopo levosahi aoa atu Natun Tamlohi i pa mele mai hinia.

*Hare Enia Tamlohi Lelevosahi?*  
*(Lk 12.35-48)*

<sup>45</sup> Harepu natu, enia sohen volitusi lelevosahi matea, ale mo lo ñomturu ñilangi tarea, vara nona tamlohi tavera mo viñonia vara i lo kilau na vao volitusi na imana matan vara i sile na hara hinau isara na rani tataholo? <sup>46</sup> Avulañi tavera isan volitusi atu mo lo vai na sava nona tamlohi tavera mo vereea hin rani atu vara i mele mai. <sup>47</sup> Varañuhu, na vereea isamim, tamlohi tavera atu i pa taua i aulu na nona hinahinau tari. <sup>48</sup> Pani vara volitusi sasati matea mo lo hase ñomñomia vara, 'Noku tamlohi tavera i pa sopo mai vila sei!' <sup>49</sup> Moiso mo tapulo tamaji na tatuana volitusi tinapua, ale mo lo hanhahi, ale mo inu peresi la haratu la lo sasañuhu. <sup>50</sup> Nona tamlohi tavera atu i pa pala na rani teni aoa sei volitusi atu mo sopo levosahia vara i pa pala hinia, <sup>51</sup> ale i pa tai rotoa i taua peresi na tapnetano. Hin jara atu la pa tangtangi, ale la pa ngañgañori na huñura mata rongohaji."

## 25

### *Hañai Maevo Mo Sangavulu*

Iesu mo vereea mara,

<sup>1</sup> "Hin pongi atu, mauri atu God mo aulu hinia i pa sohen hañai maevo mo sangavulu sei la lavi na nora lamu potele la vano vara la tapai na tamlohi i pa lahi. <sup>2</sup> Mo lima hinira la rongorongo vono, ale mo lima la lelevosahi. <sup>3</sup> Matan la haratu la rongorongo vono lara la lavi na nora lamu potele, la sopo lavi te wel matara, <sup>4</sup> pani la haratu la lelevosahi la lavi na potele wel peresi na nora lamu potele. <sup>5</sup> Ale tamlohi vara i pa lahi mo sopo mai vila, ale la hañai maevo tari atu la tapulo peka, ale la juruvi. <sup>6</sup> Pani na livuha vutepongi la rongo na leo matea mo ulo mara, 'Tamlohi i pa lahi nahai. Ha mai ha tapaia.'

<sup>7</sup> Ale la hañai maevo atu la kilau, ale la tai nañihi na korukoru pingo ruru na nora lamu potele vara lamu la mele memera i ñuhu. <sup>8</sup> Pani la haratu la rongorongo vono, la vereea isan la haratu la lelevosahi lara, 'Ha sile te nomim wel makomona

isamam matan nomam lamu potele la lo tapulo mate.’

<sup>9</sup> Pani la haratu la lelevosahi la řaramira lara, ‘Wel mo sopo tataholo hiniřa mo isoiso. Ha vano na stoa ha voli te nomim!’

<sup>10</sup> Ale la pa lo vano vara la voli tea, tamlohi vara i pa lahi mo pala, ale la haratu la lo tatamahu la usuria la vano na hanhani lahi, ale la pelatihoro na matarua. <sup>11</sup> Mo sopo tuai la hařai maevo tinapua atu la pala lara, ‘Tamlohi tavera! Tamlohi tavera, o roi isamam!’

<sup>12</sup> Pani mo řaramira mara, ‘Varařuhu na vereia isamim, na sopo levosahi kamim.’ ”

<sup>13</sup> Iesu mo mele vereia mara, “Matan hinau atu ha tatamahu, matan ka sopo levosahia vara sava rani teni aoa Natun Tamlohi i pa mele mai hiniia.”

### *Slev Mo Tolu (Lk 19.11-27)*

<sup>14</sup> Mo mele vereia mara, “I pa sohena tamlohi matea mo vano na nona hahau matea. Mo tovi na nona slev, ale mo tau na nona hinahinai na limara. <sup>15</sup> Isan matea, mo silea na selen mo lima. Selen matea hinira, mo tataholo mata voli tamlohi matea mata voko mata rani i tari vahatea (1,000). Ale isan matea mo sile na selen mo rua, ale isan matea mo sile na selen matea. Mo silea isara mo tataholo na nora eřia, moiso mo malue mo vano na nona hahau. <sup>16</sup> Haratu mo lo sile na selen mo lima isana tiroma, mo vano vahatea mo voko peresia, ale mo mele tikeli na selen mo lima tinapua. <sup>17</sup> Haratu mo lo lavi na selen mo rua mo sohena mo mele tikeli na selen mo rua tinapua. <sup>18</sup> Pani haratu sei mo lo lavi na selen matea, mo vano mo heli na koko matea na lepa mo tavuni jarohi mania atu nona nona tamlohi tavera.

<sup>19</sup> Rani matuvana la vano moiso, ale tamlohi tavera non la slev atu mo mele hilu vara i levosahia vara la vai na sava hin la mania atu. <sup>20</sup> Ale haratu mo lo lavi na selen mo lima mo juha mai isana, mo lavi na selen mo lima tinapua hin la haratu mo lo lavira tiroma mo vereia mara, ‘Tamlohi tavera, ko sileau na selen

mo lima; ale na mele vai na selen mo lima tinapua.’ <sup>21</sup> Ale nona tamlohi tavera mo vereia isana mara, ‘Ko vai na voko řuhu. Ko řomturu řilangi na nom makomo hinai, ale nake a pa tauho o aulu na hinai mo mařivi. O unu na avulahi tavera non nom tamlohi tavera.’

<sup>22</sup> Ale haratu mo lo lavi na selen mo rua mo juha mai isana, mo lavi na selen mo rua tinapua hin la haratu mo lo lavira tiroma mo vereia mara, ‘Tamlohi tavera, ko sileau na selen mo rua; ale na mele vai na selen mo rua tinapua.’

<sup>23</sup> Ale nona tamlohi tavera mo vereia isana mara, ‘Ko vai na voko řuhu. Ko řomturu řilangi na nom makomo hinai, ale nake a pa tauho o aulu na hinai mo mařivi. O unu na avulahi tavera non nom tamlohi tavera.’

<sup>24</sup> Ale haratu mo lo lavi na selen matea mo juha mai isana mo vereia mara, ‘Tamlohi tavera, na levosahia vara engko tamlohi řilangi matea, ko lo lavi na vua pahai engko ko sopo lavoa. Ko lo takonahi na wit na jara engko ko sopo hapořahi tea ea, <sup>25</sup> ale na matahu, na vano na jarohi na nom mania na lepa. Nahai, o mele lavi na sava enia nom.’

<sup>26</sup> Pani nona tamlohi tavera mo řaramia mara, ‘Engko tamlohi sasati, ko slev maloko vari. Ko řomi vara enau tamlohi řilangi matea, ale na lo lavi na vua pahai na sopo lavoa, ale na lo takonahi na wit na jara na sopo hapořahi tea ea? <sup>27</sup> Vara mo sohena, i pa mele řuhu jea vara o lo tau na mania isana tamlohi bank matan vara a mele pala a pa eři lavi na noku mania peresi haratu makomona bank i pa mele silea aulu na noku mania.’

<sup>28</sup> Ale mo vereia isan te nona slev tinapua mara, ‘Ha lavi nařihi selen atu isana, ha silea isan haratu mo lavi na selen mo sangavulu, <sup>29</sup> matan isan la haratu la lavi te hinai, la pa mele silera hin te hinai, ale i pa mařurere isana. Pani isan haratu mo lekoleko, sava enia nona tiroma i pa lavi nařihia. <sup>30</sup> Ale ha pulahi slev atu mo sopo řuhu hin te hinai hatea i vano na jara řořoha. Hin jara atu la

pa tangtangi, ale la pa ngaŋngaŋori na huŋura mata hajhaji ea.’

### *Aria Tavera Mo Lo Mai*

<sup>31</sup> Na rani vara Natun Tamlohi i mai na nona sasarami peresi na angelo tari, hin rani atu natu i pa sakele na nona jara sakele mata suiha nona Supe. <sup>32</sup> Mara jara tinatinapua na varama la pa turu na nahona moiso i pa asera hatehateahi sohena tavui sipsip matea mo lo ase na pulana sipsip na nani. <sup>33</sup> Ale i pa tau na sipsip na matuana, ale nani na marauna. <sup>34</sup> Ale i pa vereea isan la haratu na matuana vara, ‘Ha mai, kamim sei Tamaku mo leŋuhu hin kamim! Ha lavi mauri atu God mo aulu hinia sei mo tau mamahunia matamim tuai tiroma moiso mo pa vai na varama. <sup>35</sup> Matan na marohati ka sileau na hanhani, na maŋohu ka sileau na inu, enau na vinano matea ka toviau na imamim, <sup>36</sup> mo sopo te noku ruru ka sileau na ruru, na rojo ka mai ka rohiau, na lo toho na ima ŋilangi, ale ka mai ka hiteau.’

<sup>37</sup> Moiso la tamlohi tataholo atu la pa ŋaramia vara, ‘Moli, nangisa kama hiteho ko marohati, ale kama vahaniho, teni ko maŋohu, ale kama sileho na wai? <sup>38</sup> Ale nangisa natu, kama pa hiteho ko vinano, ale kama toviho na imamam, teni ko malamala, ale kama ruruho? <sup>39</sup> Ale nangisa natu, kama hiteho ko rojo teni ko lo toho na ima ŋilangi, ale kama rohiho?’

<sup>40</sup> Ale Supe i pa ŋaramira, vara ‘Varaŋuhu na vereea isamim, na rani ko vaia te hinau mo ŋuhu isan te voraiuku teni te vevorai rihirihatea, ko lo vaia isaku.’

<sup>41</sup> Ale i pa vereea isan la haratu na marauna vara, ‘Ha malue na nahoku, kamim ka lo toho na ruhururu lesati, ha unu na hapu matan tui tui atu na tatamahunia matan Tiapolo peresi na nona angelo sati, <sup>42</sup> matan na marohati, pani ka sopo sileau hin te hanhani, na maŋohu, pani ka sopo sileau hin te wai, <sup>43</sup> enau na vinano matea, pani ka sopo toviau na imamim, enau na malamala, pani ka sopo ruruau, na rojo, ale ka sopo

mai vara ha rohiau, ale na lo toho na ima ŋilangi, pani ka sopo mai isaku.’

<sup>44</sup> Ale enira sohena la pa ŋaramia vara, ‘Moli, nangisa natu, kama hiteho ko marohati, teni ko maŋohu, teni ko vinano matea, teni ko malamala, teni ko rojo teni ko lo toho na ima ŋilangi, ale kama sopo tueniho?’

<sup>45</sup> Ale i pa ŋaramira vara, ‘Varaŋuhu na vereea isamim, matan ka sopo vai te hinau ŋuhu isan te voraiuku rihirihatea ka sopo vaia isaku.’ <sup>46</sup> Ale la haratu, la pa vano la unu na talai matan tui tui, pani la haratu la tataholo la pa unu na mauri tui.’ ” *Dan 12.2*

## 26

### *La Opoia Vara Iesu I Mate*

*(Mk 14.1-2; Lk 22.1-2; Jn 11.45-53)*

<sup>1</sup> Iesu mara mo vereea la hinau sei moiso mo vereea isana nona tamlohi usuri mara, <sup>2</sup> “Ka levosahia vara rani mo rua mo lo toho moiso rani Passover i pa mai, ale la pa sile Natun Tamlohi vara la vosaea na talopeilopei.”

*Exo 12.1-27*

<sup>3</sup> Hin rani atu moli mata pŋis peresi na tamlohi aulu nona tamlohi la pulutahi na ima tavera non pŋis aulu sei, hijana Caiaphas, <sup>4</sup> ale la hatihia jara matea vara la pa taurilati Iesu na malele halu vara la vilia.

<sup>5</sup> Pani la vereea lara, “I pa sopo na livuha hanhani Passover, matan vara i vono, tamlohi la pa lolokoru tavera, ale ŋa sopo eŋi vaira la toho malum.”

### *Haŋai Matea Mo Sile Na Oloolo Tavera Isan Iesu*

*(Mk 14.3-9; Jn 12.1-8)*

<sup>6</sup> Ale hin rani atu Iesu mo lo toho Bethany na iman Simon, tamlohi leproso matea, <sup>7</sup> Iesu mo pa lo sakele na tepel ea, ale haŋai matea mo mai isana, mo lo tauri na potele hasori matea la tovia alabaster, volina mo tavera jea, ale mo rengia na patuna. <sup>8</sup> Nona tamlohi usuri lara la hitea la lolokoru lara, “Mata sava mo lo surei komokomoa? <sup>9</sup> Matan hinau sei o eŋi haŋehia mata mania tavera, ale o silea isana tilavono.”

<sup>10</sup> Pani Iesu mo levosahi na sava la lo vereia, ale mo vereia isara mara, “Mata sava ka lo ari harai nike? Enia mo vai na hinai rufufuhu matea isaku. <sup>11</sup> Matan tilavono la pa lo toho peresi kamim tarea, pani enau a pa sopo toho peresi kamim tarea. *Deut 15.11*

<sup>12</sup> Enia mo surei hasori nike na epeku matan vara i tatamahuni na epeku mata noku tavuni. <sup>13</sup> Varaŕuhu na vereia isamim, sava jara Retiŕuhu la pa sorahia ea na varama, la pa sorahi na sava mo vaia vara tamlohi la pa mele ŕomŕomia.”

*Judas Mo Turuposi Hin Iesu*  
(*Mk 14.10-11; Lk 22.3-6*)

<sup>14</sup> Ale vonan la tupu sangavulu ŕomana mo rua atu hijana Judas Iscariot mo vano isana moli mata pŕis, <sup>15</sup> mo vereia mara, “Ha pa sile na sava isaku vara a taua na limamim?” Ale la vuti la silea na silver selen mo ngavulu tolu. *Zec 11.12*

<sup>16</sup> Moiso, mo tapulo hin rani atu mo tapulo aleale masapa vara i turuposi hinia.

*Hanhani Mata Passover*  
(*Mk 14.12-21; Lk 22.7-13; Jn 13.21-30*)

<sup>17</sup> Na rani tiroma mata hanhani tavera mata pereti mo sopo te isi hinia, tamlohi usuri la mai isan Iesu lara, “Ko opoia vara kama pa tatamahu epu vara o pa hani na Passover ea?”

<sup>18</sup> Mo vereia mara, “Ha unu na taon tavera, ale ha hite na tamlohi matea, ale ha vereia isana vara, ‘Tija mo vereia mara, noku rani mo mai mariviti, a pa hani na hanhani mata Passover peresi na noku tamlohi usuri na imam.’” <sup>19</sup> Ale nona tamlohi usuri la vaia sohena mo vereia isara, ale la tatamahuni na hanhani Passover.

<sup>20</sup> Ale na ravravi mo sakele na tepel peresi la tamlohi usuri tupu sangavulu ŕomana mo rua atu. <sup>21</sup> Ale la pa lo hanhani mo vereia mara, “Varaŕuhu na vereia isamim, vonamim matea i pa turuposi hinia.”

<sup>22</sup> La rongo mo sati, ale la tapulo vereia isana enira hatehateahi lara, “Tija, enau teni mo vono?”

<sup>23</sup> Mo ŕaramia mara, “Matea mo lo seri na pereti peresiau na pesin matea, i pa turuposi hinia. *Psa 41.9*

<sup>24</sup> Natun Tamlohi i pa vano na malele mata mateia sohen la ulia na Retiulia matana, pani rani ŕilangi tavera isan haratu mo lo turuposi hin Natun Tamlohi. I pa mele ŕuhu jea isana vara tamlohi atu i sopo vora.”

<sup>25</sup> Judas haratu sei i pa turuposi hinia mo ŕaramia mara, “Tija, korong enau teni mo vono?”

Iesu mo vereia isana mara, “Engko ko hase vereho moiso.”

*Isoison Hanhani Tavera Atu*  
(*Mk 14.22-26; Lk 22.14-23; 1Co 11.23-25*)

<sup>26</sup> Ale lara la lo hanhani, Iesu mo lavi na pereti mo topea mo vere meje isan God matana, ale mo silea isana nona tamlohi usuri, ale mara, “Ha lavia, ha hania, enia epeku.” <sup>27</sup> Ale mo tauri na paniken matea, mara mo vere meje isan God, mo silea isara mara, “Ha inu hinia, kamim mo isoiso, <sup>28</sup> matan harihi enia ŕaeku mata retitauhi God mo vaia matan vara ŕaeku i pa roro matan vara i ŕomi na hehe nona tamlohi matuvana. *Exo 24.8; Jer 31.31-34*

<sup>29</sup> Na vere kamim hinia, enau a pa sopo mele inu waen nike i tikeli pongi atu a pa mele inua peresi kamim hin mauri atu Tamaku mo supe hinia.”

<sup>30</sup> Lara la lalavete na vete matea moiso la malue la sahe na Vuti talu Olive.

*Retitauhi Non Peter*  
(*Mk 14.27-31; Lk 22.31-34; Jn 13.36-38*)

<sup>31</sup> Ale Iesu mo vereia isara mara, “Kamim mo isoiso ha pa rovo hinia nohorihina vutepongi. Matan la ulia na Retiulia moiso vara, ‘A pa vilijovi na tavui sipsip

ale sipsip la pa rovorovo.’ *Zec*

*13.7*

<sup>32</sup> Pani hitahu na noku sauteterahi, a pa vano tiroma hin kamim Galilee.” *Mt 28.16*

<sup>33</sup> Peter mo řaramia mara, “Vara enira mo isoiso la rovo hiniho, enau a pa sopo eři rovo hiniho.”

<sup>34</sup> Iesu mo vereea mara, “Varařuhu na vereea isam, hin vutepongi akerihi purongo, engko o pa vunvuniau vaha tolu, tiroma moiso toa vari i pa tarere.”

<sup>35</sup> Peter mo vereea isana mara, “Vara a pa mate peresiho, a pa sopo vunvuniho!” Nona tamlohi usuri mo isoiso la vereea sohana.

*Iesu Mo Usiusi*  
(Mk 14.32-42; Lk 22.39-46)

<sup>36</sup> Moiso, Iesu mo vano peresira na jara matea hijana Gethsemane, ale mo vereea isana nona tamlohi usuri mara, “Ha sakele nike tako, a pa vano sevano a usiusi.” <sup>37</sup> Moiso mo lavi Peter peresi la natun Zebedee atu mo rua John enia James, ale mo tapulo rongo mo sati, ale řomina mo sopo sakele. <sup>38</sup> Ale mo vereea isara mara, “Mapuku mo rongo mo sati tavera vara i mate. Ha lo toho nike, ha lo kilau peresiau.”

<sup>39</sup> Mo mele juha vano makomona, ale mo popovitoho na nahona na lepa, ale mo usiusi mara, “Tamaku, vara mo tataholo, o nařihi rani řilangi nike isaku, pani o sopo usuri na masaloku, o usuri na masalom purongo.” <sup>40</sup> Moiso mo mele mai isana nona tamlohi usuri mo hitera la juruvi řomaliho. Mo vereea isan Peter mara, “Kamim, ka sopo eři kilau peresiau mata aoa matea purongo?” <sup>41</sup> Ha kilau, ha usiusi vara ha pa sopo eři jovi na rani vaihite sei la lo mai isamim, řomimim mo řuhu, pani na suihamim purongo ha sopo eři vaira.”

<sup>42</sup> Mo mele sahe haruana vara i usiusi mara, “Tamaku, vara o sopo nařihi paniken akerihi vavano a inua, o usuri na masalom.” <sup>43</sup> Ale mo mele mai isara mo hitera la juruvi řomaliho matan matara la puhoni.

<sup>44</sup> Ale mo mele malue isara, mo vano mo mele usiusi hatoluna, mo mele vereea la retireti atu tiroma mo lo verera. <sup>45</sup> Moiso mo mai isana nona tamlohi usuri mo vereea isara mara, “Ha pa juruvi, ale ha mapu hin

te rani tinapua. Ka hitea, mariviti vara la turuposi hin Natun Tamlohi natu, ale i pa vano na lima tamlohi hehe. <sup>46</sup> Ha turu, řa lo vano! Ka hitea, tamlohi atu mo lo turuposi hiniau mo lo mai mariviti.”

*La Taurilati Iesu*  
(Mk 14.43-50; Lk 22.47-53; Jn 18.3-12)

<sup>47</sup> Mo pa lo retireti, Judas mo pala, vonan la tupu sangavulu řomana mo rua atu matea peresi na vao tavera matea la tai isan moli mata přiš peresi na nora tamlohi aulu, ale la lo lavi na sita vuro peresi na maja. <sup>48</sup> Tamlohi turuposi atu mo pete verera na matamata matea moiso mara, “Haratu a pa pungosia, enia natu tamlohi atu; ha pa taurilatia.” <sup>49</sup> Ale mo mai isan Iesu vahatea mara, “Tija, mo řuhu!” Ale mo pungosia.

<sup>50</sup> Iesu mo vereea isana mara, “Tapala, o vai na sava ko mai vara o vaia.” Moiso la mai isana la tauria vara la taurilatia. <sup>51</sup> Ale vahatea purongo, vonan la haratu matea mo lo toho peresi Iesu mo řirahi na limana, mo reve nařihi na nona sita vuro, ale mo langa na tavalu pero slev nona přiš aulu.

<sup>52</sup> Moiso Iesu mo vereea isana mara, “O mele tau na nom sita na jarana. Matan haratu la lo lavi na sita vuro la pa mate na sita vuro. <sup>53</sup> Ka sopo levosahia vara a eři tovi isan Tamaku vara i řule na angelo i jeu 72,000, ale vahatea purongo la pa tingiřa?” <sup>54</sup> Pani sohana sava natu, hinau la pa masese sohana Retitapu mo vereea vara i sohana?”

<sup>55</sup> Hin rani atu Iesu mo vereea isan vao atu mara, “Ka mai peresi na sita vuro peresi na maja sohana vara ka lo vano mata taurilati na tamlohi sasati matea? Tarea na lo sakele na lolo Temple na lo vujangi, pani ka sopo tauriau!” <sup>56</sup> Pani la hinau sei la pala sohana matan vara Retitapu nona přovet tuai la pa masese.” Moiso nona tamlohi usuri tari la malue la rovo hinia.

*Mo Turu Na Naho Tamlohi  
Tatavera*

(Mk 14.53-65; Lk 22.54-55, 63-71;  
Jn 18.13-14, 19-24)

<sup>57</sup> Ale la haratu sei la lo taurilati Iesu la tiroma hinya mo vano na iman Caiaphas, enia p̄ris aulu, tamlohi vujangi mata leu peresi na nora tamlohi aulu la lo takonahi hin jara atu. <sup>58</sup> Ale Peter mo lo usuria asau makomona, mo vano mo tikeli na rope iman p̄ris aulu atu, ale mo unu na lolona, ale mo lo sakele peresi na tamlohi kilau atu matan vara i pa hite na isoisona.

<sup>59</sup> Ale moli mata p̄ris peresi na tamlohi tari tinapua mata council la lo aleale tamlohi vara la pa vere te retireti halu na sava Iesu mo lo vaia moiso matan vara la pa efi vilimateia matara, <sup>60</sup> pani mo sopo tea, hina purongo vara tamlohi halu mo maŕivi la turu na nahora. Hitahuna, mo rua la pala mai, <sup>61</sup> lara, “Tamlohi akerihi mo vereea mara, ‘Enau a efi komo na Temple non God, ale a mele voroa na rani i tolu purongo.’”

<sup>62</sup> Ale p̄ris aulu atu mo turu sahe mara, “O pa řaramia teni mo vono? Sava nahai la tamlohi nike, la lo retivuhesia matam?” <sup>63</sup> Pani Iesu mo lo turu tapanono. Ale p̄ris aulu mo vereea isana mara, “Na usiho vara o retitauhi hin God mauri vara o vere kamam hinya vara engko natu, Křisto atu Natun God?”

<sup>64</sup> Iesu mo vereea isana mara, “Engko ko pete vereea moiso, pani na vereea isam vara i pa sopo tuai o pa hite Natun Tamlohi i sakele na matua suiha na tuka, ale mo lo mai na telangi matan tuka.” *Dan 7.13*

<sup>65</sup> Moiso p̄ris aulu mo řari na nona ruru mara, “Mo lo vaia sohena enia God. Ra sopo mele opoi te tamlohi tuetueni tinapua, ka pete rongo na nona reti hehe hin God nakerihi moiso. *Lev 24.16* <sup>66</sup> Nomim aria i pa vano sohena sava?”

La řaramia lara, “Mo tataholo vara i mate.”

<sup>67</sup> Moiso la litovi na nahona, la tuhia, ale hai la vojahia, *Isa 50.6* <sup>68</sup> lara, “O reti mangovi isamam Křisto, hare natu, mo tuhiho?”

*Peter Mo Vunvuni Iesu*

(Mk 14.66-72; Lk 22.56-62; Jn 18.15-18, 25-27)

<sup>69</sup> Hinau atu mo lo vano, ale Peter mo lo sakele na jingoima na lolon ropen ima atu, ale slev hařai matea mo sinai isana mara, “Engko sohena, ko lo toho peresi Iesu mara Galilee atu!”

<sup>70</sup> Pani mo vunvunia na nahon vao atu mara, “Enau na sopo levosahi na sava ko lo vereea.”

<sup>71</sup> Ale mara mo malue na matarua atu slev hařai tinapua matea mo hitea mo vereea isan la haratu la lo turu mariviti isana mara, “Tamlohi nike, mo lo toho peresi Iesu mara Nazareth.”

<sup>72</sup> Ale mele vahatea mo vunvunia na retitauhi matea mara, “Na sopo halu, na sopo levosahi tamlohi sei.”

<sup>73</sup> Ale mo sopo tuai la haratu la lo turu ea la mai isan Peter lara, “Enjora, engko vonara matea matan leom mo vereuliho.”

<sup>74</sup> Ale mo tapulo lesati hinya hasena moiso mo retitauhi mara, “Na sopo levosahi tamlohi sei.” Ale vahatea purongo toa vari matea mo tarere.

<sup>75</sup> Moiso Peter mo mele řomřomi na retireti non Iesu, “Toa i sopo lo tarere o pa vunvuniau vaha tolu.” Ale mo malue hin jara atu mo tangi řomina mo sati tavera.

## 27

*La Lavia Mo Vano Isan Pilate*

(Mk 15.1; Lk 23.1-2; Jn 18.28-32)

<sup>1</sup> Mo mele rani sahe na řalavuhou jea, moli mata p̄ris tari peresi na tamlohi aulu nona tamlohi la pulutahi vara la vai nora řomřomi tavera vara la pa tau Iesu na mateia. <sup>2</sup> Ale la lihoa la tiroma hinya mo malue la taua na liman Pontius Pilate, tamlohi tavera matan Rome sei mo lo aulu hin Israel.

*Judas Mo Mate*

(Acts 1.18-19)

<sup>3</sup> Moiso Judas, haratu sei mo lo turuposi hinya mara mo hitea vara la pa sile na talai tavera isan Iesu, mo posi na řomina, ale mo mele lavi la silver selen atu mo ngavulu tolu mo hilu mo vano isana moli mata p̄ris peresi na

tamlohi aulu,<sup>4</sup> mara, “Na vai na hehe matan na turuposi na ŋae vokevoke.”

Lara, “Kama sopo opoia vara kama levosahia, enia nom hinau.”<sup>5</sup> Ale mo pulahi la silver selen atu la sivo na lolo Temple, mo malue mo vano mo lihoa hasena.<sup>6</sup> Pani moli mata pŋis la lavi la silver selen atu lara, “Vara ŋa mele taura na jara mania na Temple i pa tope na leu matan mania akerihi enia mania mata ŋae.”<sup>7</sup> Ale la matavuhi la hatihia vara la pa lavi mania atu, la voli na lepa matea la tovia ‘Lepa non Potter’ matan vara la pa lo tavuni na tamlohi la sopo Jew hinia.<sup>8</sup> Matana, lepa atu la tovi ‘Lepa mata Rae’ mo tikeli nake.<sup>9</sup> Ale sava reti pŋovet Jeremiah mo vereea mo masese mara, ‘Ale la lavi na silver selen mo ngavulu tolu (30), voli mauri sei tatua natun Israel la hatihia vara mo tataholo hinia,<sup>10</sup> ale la silera mata voli lepa non Potter sohen Moli God mo retileu hiniau.’ *Zec 11.12-13*

#### *Pilate Mo Tapai Iesu*

*(Mk 15.2-5; Lk 23.3-5; Jn 18.33-38)*

<sup>11</sup> Moiso Iesu mo turu na nahon tamlohi tavera matan Rome, ale tamlohi tavera atu mo usia isana mara, “Engko natu, Supe nona Jew?”

Iesu mara, “Engko ko pete vereea moiso.”

<sup>12</sup> Pani moli mata pŋis peresi na vajiahara sei la aulu lara la tuvaia hin te hinau, Iesu mo sopo ŋaramira.<sup>13</sup> Moiso Pilate mo vereea isana mara, “Ko sopo rongo na hinau matuvana sei la lo retivuhesia matam?”<sup>14</sup> Pani Iesu mo sopo ŋaramia, mo sopo ŋarami te tuvai hatelete, ale tamlohi tavera atu mo maŋurahi tavera matana.

#### *La Taua Vara I Mate*

*(Mk 15.6-15; Lk 23.13-26; Jn 18.39-19.16)*

<sup>15</sup> Hin rani atu, tarea na hanhani tavera, tamlohi tavera atu mo lo juri na tamlohi matea na ima ŋilangi mo lo toho isana vao atu vara sava tamlohi vao atu mo opoia vara i pa juria.<sup>16</sup> Ale hin rani atu tamlohi sasati matea la levosahi mamahunia hijana Barabbas mo lo toho na ima ŋilangi.

<sup>17</sup> Ale la tamlohi tavera atu lara la pulutahi moiso, Pilate mo vereea isara mara, “Ka opoia vara a teri hare, Barabbas teni Iesu sei la tovia Kŋristo?”<sup>18</sup> Mo vere haratu matan mo levosahia moiso vara la tau Iesu na limana mata nora mereimerei purongo.

<sup>19</sup> Mo sopo haratu purongo, pani na rani mo pa lo sakele na nona jara sakele mata aria, narouna mo sohai na retisohai matea isana mara, “O sopo tikeli tamlohi vokevoke sei, matan ŋomiku mo sopo sakele matan noku mamavuhu hinia nahapani mo sasati.”

<sup>20</sup> Ale moli mata pŋis peresi na vajiahara sei la aulu la haluhalu vao atu vara la usi Barabbas vara la pa komo Iesu.<sup>21</sup> Tamlohi tavera atu mo mele vereea isara mara, “Sahara hinira mo rua ka opoia vara a juria nomim?”

Ale lara, “Barabbas!”

<sup>22</sup> Pilate mo vereea isara mara, “Vara sohena a pa vai na sava isan Iesu haratu la tovia Kŋristo?”

Enira mo isoiso lara, “Vosaea na talopeilopei!”

<sup>23</sup> Ale mo vereea mara, “Mata sava? Mo vai na sava hina sati?”

Pani la mele ngara lara, “Ha vosaea na talopeilopei!”

<sup>24</sup> Ale na rani Pilate mo hitea vara i pa sopo eŋi jeu na ŋomira, ale mara mo hitea vara tamlohi la tapulo lolokoru moiso pani mo hitea vara i pa sopo eŋi vaira la toho malum, mo lavi na wai, ale mo javulahi na limana na nahon vao atu mo vereea mara, “Enau na vokevoke na ŋaen tamlohi nike: enia nomim hinau.” *Deut 21.6-9*

<sup>25</sup> Tamlohi tari hin vao atu la ŋaramia lara, “Raena i pa toho hin kamam peresi na natumam!”

<sup>26</sup> Moiso mo vai Barabbas mo materi usuri na ŋomira, ale nona tamlohi vuro la rupi Iesu na asi maja, moiso la lavia vara la vosaea na talopeilopei.

#### *Tamlohi Vuro La Vaivai Iesu* *(Mk 15.16-21; Jn 19.2-3)*

<sup>27</sup> Moiso tamlohi vuro non tamlohi tavera atu la lavi Iesu mo sivo na jara tavera matea na lolo patu ima



non tamlohi tavera atu, ale la tovi matavuhi na tamlohi vuro matuvana la mai la turu na nahona, <sup>28</sup> ale la naŕihi na nona ruru, la rua na ruru peravu matea majhina mo perpel, <sup>29</sup> ale la viriviri na řongořongo matea la vaia na kaulu la taua na patuna, ale la tau na mavuro matea na matua limana, ale la popovitoho na nahona la lo vaivaia lara, “Ha kilaua! Supe nona Jew.” <sup>30</sup> Moiso la litovia la lavi naŕihi mavuro atu, ale la lo hamaji na patuna hinia.

### *La Vosaea Na Talopeilopei*

(Mk 15.22-32; Lk 23.27-43; Jn 19.17-27)

<sup>31</sup> Ale lara la vaivaia mo isoiso, la naŕihi pa ruru peravu atu la mele rua na nona ruru, ale la tiroma hinia vara la vano la vosaea na talopeilopei. <sup>32</sup> La pa lo malue na malele, ale tamlohi vuro la tapai na tamlohi matea Simon mara Cyrene. La ngurunguru hinia vara i lavi na talopeilopei non Iesu. <sup>33</sup> Moiso na rani la kakau na jara matea hijana Golgotha, – řaramin Golgotha enia Jara Sui Patu Tamlohi <sup>34</sup> la sile Iesu na waen la hohoia peresi na hiniau matea mo hohona vara i inua, pani mara mo inu mo rongoa mo řohu vara i inua. *Psa 69.21*

<sup>35</sup> Ale lara la vosaea na talopeilopei moiso, la asehi na nona ruru isara na nora roro matea. *Psa 22.18*

<sup>36</sup> Moiso la sakele la lo kilaua la lo saovia hin jara atu. <sup>37</sup> La vosae na retiarua matea aulu na patuna mo vereea mara,

### **Haranike nahai enia Iesu Supe nona Jew**

<sup>38</sup> Hin rani atu la vosae na tamlohi vili na tamlohi mata vavanaho mo rua tinapua na talopeilopei peresia, matea na matuana ale matea na marauna. <sup>39</sup> Ale la haratu la lo hahau roto jara atu la lo vaivaia, la lo pulapulahia na patura isana *Psa 22.7; 109.25* <sup>40</sup> lara, “Engko sei vara o pa komo na Temple, ale a pa mele voroa na rani i tolu purongo, o hasem juriho! Vara engko Natun God, o sevuti hin talopeilopei sei!” *Mt 26.61; Jn 2.19*

<sup>41</sup> Ale moli mata pŕis peresi na tamlohi vujangi mata leu peresi na tamlohi aulu sohena la vaivaia lara, <sup>42</sup> “Mo lo juri na tamlohi tinapua: mo sopo eŕi juria hasena. Enia Supe non Israel, řa hitea vara i sevuti nakerihi na talopeilopei, ale řa pa eŕi rasua. <sup>43</sup> Enia mo tau na nona rasu hin God, mo řuhu vara God i pa juria nakerihi vara na masalona, matan mo lo vereea mara, ‘Enau Natun God.’ ” *Psa 22.8* <sup>44</sup> Ale la tamlohi mata vili na tamlohi mata vavanaho atu sohena la vaivaia hin malele atu.

### *Iesu Mo Mate*

(Mk 15.33-41; Lk 23.44-49; Jn 19.28-30)

<sup>45</sup> Ale na livuha rani řořoha tavera matea mo tavuni na jara tari mo tikeli na matan alo mo tolu na ravravi. <sup>46</sup> mariviti na matan alo mo tolu na ravravi, Iesu mo ulo aulu na leo řilangi matea mara, “Eli, Eli, lema sabatani?” Raramina, ‘Noku God, noku God, mata sava ko rovo hiniau?’ *Psa 22.1*

<sup>47</sup> Ale tamlohi hai la lo turu mariviti atu la rongoa lara, “Tamlohi nike, mo lo tovi Elijah.” <sup>48</sup> Ale vahatea purongo, vonara matea mo maro vano mo lavi na tavalu ruru matea la řuřunia na waen hohona, ale mo sohaia na mavuro mo sahe isana vara i inua. *Psa 69.21*

<sup>49</sup> Pani tatuara lara, “O lo saovi tako, řa pa hitea vara Elijah i pa sinai i juria teni i vono!”

<sup>50</sup> Ale Iesu mo mele ulo řilangi na leo tavera matea, ale maromaronona mo isoiso.

<sup>51</sup> Ale vahatea purongo, ruru tavera atu na lolo Temple mo mařari mo rua mo tapulo aulu mo tikeli atano. Ale lepa mo hisu, ale vatu la mavua. *Exo 26.31-33*

<sup>52</sup> Ale taptap la roi moiso, ale tapuhi matuvana non God sei la mate moiso la mele turu, <sup>53</sup> ale la malue na tapura hitahu na sauteterahi non Iesu, ale la unu Jerusalem la pala isana tamlohi matuvana ea.

<sup>54</sup> Na rani captain mata tamlohi vuro peresi la haratu la lo kilau saovi Iesu, lara la hite na mihi, ale sava mo masese, la mařurahi tavera jea lara,

“Varaʻuhu, tamlohi nike, enia Natun God!”

<sup>55</sup> Hin rani atu, haʻrai matuvana sei la tai Galilee la lo usuri Iesu la lo tuenia la lo turu asau la lo kilaua. <sup>56</sup> Mary Magdalene peresi Mary tinan James enia Joseph, ale tinan la natun Zebedee, James enia John, la lo toho hin vao atu.

### *La Tau Iesu Na Tapuna*

(Mk 15.42-47; Lk 23.50-56; Jn 19.38-42)

<sup>57</sup> Mo lo ravravi tamlohi tavgav matea mo tai Arimathea mo mai hijana Joseph, enia sohena tamlohi usuri non Iesu matea. <sup>58</sup> Enia mo vano mo hite Pilate mo usia vara i eʻi lavi na tarapen Iesu. Ale Pilate mo retileu vara la silea isana. <sup>59</sup> Moiso Joseph mo lavi tarape atu, mo leputia na ruru lulu matea mo vokevoke, <sup>60</sup> ale mo taua na tapuna paro sei mo taia na vatu. Mo kuresi horo na vatu tavera matea na mataruan tapu atu, ale mo mele vano. <sup>61</sup> Mary tinapua atu peresi Mary Magdalene la lo toho atu la lo sakele na tavalu taptap.

<sup>62</sup> Mo mele rani sahe, hin rani atu mo usuri na rani mata Tatamahu mata Passover, moli mata pʻris peresi na Pharisee la pulutahi na nahon Pilate. <sup>63</sup> Ale lara, “Tamlohi tavera, kama ʻromʻomia vara tamlohi halu atu mo vereea na rani mo pa lo mauri mara, ‘Rani i tolu i vano moiso, a pa mele turu.’ <sup>64</sup> Matana, o retileu vara la turuhoro na tapuna i tikeli na hatolu rani, vara i vono, nona tamlohi usuri la pa vano la vanaho na tarapena, ale la pa vereea isana tamlohi vara, ‘Mo mele turu na nona mateia.’ Ale halu atu hitahu i pa mele sati jea i jeu haratu tiroma.”

<sup>65</sup> Pilate mo vereea isara mara, “Kamim nomim tamlohi kilau hai, ha vano ha kilau mamahunia sohena ha eʻi vaia.” <sup>66</sup> Ale la vano la kaluti horo na vatu mataruan taptap atu, ale la tau na tamlohi kilau la lo kilaua.

## 28

### *Iesu Mo Mele Mauri*

(Mk 16.1-8; Lk 24.1-12; Jn 20.1-10)

<sup>1</sup> Sabbath mo isoiso, ale mariviti vara i rani na ʻralavuhu na Sunday,

ale Mary Magdalene peresi Mary tinapua atu matea la vano vara la hitea na tapuna. <sup>2</sup> Vahatea purongo mihi tavera matea mo vili na jara, ale angelo non Moli God matea mo sevuti na tuka. Mo kuresi naʻihi vatu atu, ale mo lo sakele aulu hinia. <sup>3</sup> Angelo atu mo memera sohena vaha, ale nona ruru mo lulu sohena katen. <sup>4</sup> Pa la tamlohi kilau atu la savaravara na matahu la jovi na lepa sohen la mate.

<sup>5</sup> Angelo atu mo vereea isan la haʻrai atu mara, “Ha sopo matahu! Na levosahia vara ka lo ale Iesu, haratu la vosaea na talopeilopei. <sup>6</sup> Enia mo sopo toho nike. God mo sauteterahia moiso, mo mele mauri, mo sohen haratu Iesu mo vereea vara i pa sohena. Ha mai, ha hite na jara sei la tau na tarapena ea. <sup>7</sup> Ha vila, ha vere na nona tamlohi usuri vara mo turu na mateia mo mele mauri, ale ha levosahia vara enia mo lo vano tiroma Galilee hin kamim. Ha vano atu, ha pa hitea ea. Hinau nike natu, na sinai vara a vereea isamim.”

<sup>8</sup> Pa la haʻrai la matahu, pani la avulahi tavera na rani la malue na tapuna, la maro vila vara la vano la vereea isana nona tamlohi usuri. <sup>9</sup> Vahatea purongo Iesu mo tapaira mo sile na retioloolo isara. La vano mariviti isana, la popovitoho la tauri na palona, la lotua. <sup>10</sup> Moiso Iesu mo vereea mara, “Ha sopo matahu! Ha vere na noku tamlohi usuri vara la vano Galilee. La pa hiteau atu.”

### *Retireti Nona Tamlohi Kilau*

<sup>11</sup> Na rani la haʻrai atu la pa lo toho na malelera, ka levosahia, tamlohi vuro hai sei la lo kilau na tapuna, la vano la unu Jerusalem. La vere na hinau tari sei la masese isana moli mata pʻris. <sup>12</sup> Ale matana, moli mata pʻris lara la pulutahi peresi na vajia-hara sei la aulu, la hatihia vara la pa sile te mania tavera luhu isana tamlohi vuro. <sup>13</sup> La vereea isana tamlohi vuro lara, “Ha vereea isana tamlohi tari vara tamlohi usuri non Iesu la mai na vutepongi la vanaho na tarapena na rani ka lo juruvi. <sup>14</sup> Vara nomim tamlohi tavera i rongo hinau nike, kamam kama pa retireti isana.

Romimim i sopo kaka hinia.” <sup>15</sup> Ale pa la tamlohi vuro atu la lavi pa mania atu la vaia sohen la vereea isara. Ale Jew matuvana la pa lo vujangi na tatuara hin sorasorahina atu mo tikeli nake.

*Nona Tamlohi Usuri La Hitea*  
(Mk 16.14-18; Lk 24.36-49; Jn 20.19-23; Acts 1.6-8)

<sup>16</sup> Ale la tamlohi usuri tupu sangavulu romana matea atu non Iesu, la sahe na vutivuti matea Galilee, jara atu natu, Iesu mo vereea vara i pa tapaira ea. <sup>17</sup> Ale lara la hitea, la lotua. Pani tatuara la lo rom rua.

<sup>18</sup> Iesu mo mai isara, ale mo vereea mara, “God mo sileau na suiha tari vara a aulu na tuka peresi na varama.

<sup>19</sup> Ha vano isana mara jara tinatnapua na varama, ale ha vujangira vara la mai noku tamlohi usuri. Ha paptijo hinira na hijan Tama, Natuna peresi na Tanume Tapu, <sup>20</sup> moiso ha vujangira vara la taurilati na hinau tari sei na vereea isamim moiso, ale ha lo levosahia, enau a pa toho peresi kamim tarea i tikeli na isoison pongi nike!”

## Retiruhu Hin Iesu Křisto Mark Mo Ulia Puku Nike

Tamlohi hai la lo řomřomia lara John Mark natu mo ulia, hara sei Paul mo lavia hitahu na nona tiroma hahau (Acts 12.25). Mo ulia na sava vavahinau Iesu mo lo vaira: Tiroma Iesu mo viřoni tamlohi mo vati vara la usuria (1.16–20), moiso mo pa tapulo vai na hina mařurahi, mo titiu nařihi na tanume sasati na tamlohi matea (1.21–28), mo tueni vepalihan Peter (1.30–31), vao tamlohi rojoa (1.32–34), peresi na tamlohi lepros matea (1.40–45), Iesu mo vai na hinau tari nika na suihin God.

Haratu la lo tiroma na Jew la řohu hin Iesu mata nona retireti (2.2–3.6), ale la aleale malele vara la pa vilimateia hinia (11.18). Tanume sasati la hitevosahi na suihinana, la levosahia vara enia Natun God tataholo, pani Iesu mo reti horora vara la sopo mele vereea isana tamlohi hin rani atu.

Ra eři hitea vara řomřomi tavera non Mark enia vara Iesu enia tamlohi matea mo lavi na rani řilangi matan enia Jujuri atu sei God mo řulea mo sinai na varama, enia Natuna tataholo (8.31–33; 9.30–31; 10.33–34), Tamlohi atu Přovet Daniel mo lo vereea tuai jea moiso (Dan 7.14).

### Hinahinau Hin Puku Akerihi

1. Reti Hin John Tamlohi Paptijo (1.1–8)
2. Paptijo Non Iesu, Tiapolo Mo Vaihitea (1.9–13)
3. Iesu Hin Galilee (1.14–9.50)
4. Iesu Mo Sahe Jerusalem (10.1–52)
5. Isoiso Rani Non Iesu (11.1–15.47)
6. Iesu Mo Mele Mauri (16.1–8)
7. Iesu Mo Pala (16.9–20)

### *John Tamlohi Paptijo* (Mt 3.1–12; Lk 3.1–18; Jn 1.19–28)

<sup>1</sup> Harihi enia tapulo Retiruhu hin Iesu Křisto, Natun God.

<sup>2</sup> Sohen přovet Isaiah mo ulia mara, 'Eh! Ko hitea? Na lo řule na noku vahařule vara i tiroma hiniho,

i pa vai na malele la tataholo matam.'

*Mal 3.1*

<sup>3</sup> 'Na jara hasetoho leona mo lo ulo mara:

Ha vasahi na malelen Moli God!  
Ha tano na malelena i tataholo.'

*Isa 40.3*

<sup>4</sup> Ale John mo pala, mo lo paptijo na tamlohi na jara hasetoho matan Judea, mo lo retivujavujangi isana tamlohi vara la lavi na paptijo mata posi na hehe matan vara Moli i řomira. <sup>5</sup> Ale tamlohi tari na lolon Judea peresi Jerusalem, la lo vano vara la hite John, ale enia mo lo paptijo hin la haratu la lo taviti na nora hehe na wai Jordan. <sup>6</sup> John mo ru na ruru la vaia na vulu camel, ale mo otioti na huri buluk; hana hinau enia hatpoha peresi na tau sugabag sei waina mo meji.

*2 Ki 1.8*

<sup>7</sup> Ale mo lo retivujavujangi mara, "Tamlohi matea i pa mai hitahu hiniau mo aulu mo jeuau, enau na sopo tataholo vara a rautoho a lavi nařihi na asi eve palona.

<sup>8</sup> Enau na lo paptijo hin kamim na wai purongo, pani enia i pa paptijo hin kamim na Tanume Tapu."

### *John Mo Paptijo Hin Iesu*

*(Mt 3.13–17; Lk 3.21–22)*

<sup>9</sup> Hin rani atu Iesu mo tai Nazareth na jara Galilee, mo mai atu ale John mo paptijo hinia na wai Jordan.

<sup>10</sup> Iesu mara mo malue na lolo wai, vahatea purongo tuka mo roi, ale John mo hite Tanume Tapu mo sinai atano sohena vomahete matea, ale mo tatau hin Iesu. <sup>11</sup> Leon God na tuka mo reti mara, "Engko Natuku řuhuru, enau na opoiho mo tavera jea, na avulahi tavera hiniho."

### *Tiapolo Mo Vaihite Iesu*

*(Mt 4.1–11; Lk 4.1–13)*

<sup>12</sup> Vahatea purongo, Tanume Tapu mo tiroma hin Iesu vara i sahe na jara hasetoho. <sup>13</sup> Iesu mo lo toho atu mata rani mo ngavulu vati, Setan mo lo vaihitea. Iesu mo lo toho peresi na maji jala hin jara atu, ale angelo non God la lo matahia.

### *Iesu Mo Tapulo Vavahinau*

*(Mt 4.12–17; Lk 4.14–15)*

14 Mo sopo tuai, Supe Herod mo taurilati John, mo taua na ima řilangi. Ale hitahuna, Iesu mo sivo Galilee, mo lo retivujavujangi na Retiruhu non God mara, 15 “Rani tataholo atu God mo lo viřonia mo mai moiso! Mauri atu God mo aulu hinia mo lo mai mariviti. Ha posi na nomim hehe, ale ha rasu Retiruhu nike!”

*Mo Tovi Na Nona Tamlohi Mo Vati  
(Mt 4.18-22; Lk 5.1-11)*

16 Na rani matea, Iesu mo lo hahau usuri na pahisa tasin Galilee, mo hite Simon enia tasina Andrew, la lo pulahi na tara matea na tasi matan enira tamlohi aleale maji. 17 Ale mo vereia isara mara, “Ha mai ha usuriau. Enau a pa vai kamim ha mai tamlohi aleale tamlohi.” 18 Vahatea purongo, la tinařihi na nora tara la usuria.

19 Iesu mo mele hahau mo vano makomona, mo hite James natun Zebedee, enia tasina John la lo sakele na lolo botira, la lo tulai na nora tara. 20 Iesu mo tovira ale vahatea purongo la tinařihi tamara Zebedee na lolo botira peresi na nona volitusi ale la usuria.

*Tanume Sasati La Levosahi Iesu  
(Lk 4.31-37)*

21 Iesu tolu la tupu vati atu la sahe Capernaum, ale na Sabbath mo unu na ima lotu nona Jew, ale mo lo vujangira. 22 La haratu la lo tapurongo isana, la mařurahi tavera na nona vujangi, matan mo sopo vujangira sohena nora tamlohi vujangi mata leu matea pani sohena tamlohi matea nona vujangi mo sopo te retiusia matana.

23 Hin rani atu tamlohi matea tanume lumiha sasati matea mo lo toho hinia mo lo toho atu hin ima lotu atu, ale mo ulo isan Iesu mara, 24 “Iesu mara Nazareth, ko opoia vara o vai na sava isamam? Ko mai vara o komo kamam teni! Enau na levosahia vara engko hare, engko haratu mo tapu non God!”

25 Pani Iesu mo savurahia mara, “Ha! O toho malum! O malue isana nakerihi!” 26 Ale tanume lumiha sasati atu mo hisuhi řilangi na epen

tamlohi atu moiso mo ulo aulu mo malue hinia.

27 Tamlohi tari hin ima lotu atu la mařurahi, ale la lo usiusira hasera hinia lara, “Avei, sava nahai? Vujangi paro matea peresi na suiha vahatea mo pala! Ka hitea mo retileu isana tanume lumiha sasati, ale vahatea purongo la oloolo hinia.” 28 Ale vahatea purongo retin la nona suiha atu mo řalihi na jara tari Galilee.

*Vepalihan Peter*

*(Mt 8.14-17; Lk 4.38-41)*

29 Ale Iesu mo malue hin ima lotu atu, mo vano mo unu na iman Simon enia Andrew, enia tolu James enia John. 30 Ale vepalihan Simon mo lo juruvi na vatana matan mo sereia mo tavera, ale la vereia isan Iesu. 31 Moiso Iesu mo mai mo tauri na limana mo sauva mo sakele, ale seserei atu mo rovo hinia, ale mo tapulo tatamahuni na hara hiniau.

32 Na ravravin rani atu, tamlohi la lavi na tamlohi rojo tari peresi la haratu tanume sasati la lo toho hinira la mai isan Iesu. 33 Tamlohi tari hin taon tavera atu la takonahi na mataruan ima atu. 34 Ale Iesu mo vai tihai na rojoa nona tamlohi matuvana, ale mo titiu nařihi na tanume sasati matuvana. Mo sopo sile te masapa vara te tanume sasati i eři retireti matan enira la levosahia vara enia hare.

*Iesu Mo Retivujavujangi Galilee*

35 Na řalavuho jea mo pa lo řořoha, Iesu mo turu mo vano hasena na jara hasetoho matea vara i usiusi ea. 36 Ale Simon tolu la haratu la lo toho peresia la kilau alea, 37 ale la tapaia la vereia isana lara, “Eh! Tamlohi tari la lo aleho.”

38 Pani Iesu mo řaramira mara, “Ra malue! Ra vano hin te vanua tinapua matan vara a eři retivujavujangi na Retiruhu isara sohena, matan enau na tai na tuka na sinai na varama matan hiniau atu natu.”

39 Iesu mo unu role na jara tari Galilee, mo lo retivujavujangi na nora ima lotu, ale mo lo titiu nařihi na tanume sasati.

*Tamlohi Lepros Matea*  
(Mt 8.1-4; Lk 5.12-16)

<sup>40</sup> Tamlohi lepros matea mo mai isan Iesu, mo papaohi isana mo usia řilangi mara, “Vara o opoia, o eři vaiau a mele vokevoke.”

<sup>41</sup> Iesu mo řomopoia mo tavera, ale mo tau na limana hinia mara, “Na opoia. O mele vokevoke!” <sup>42</sup> Vahatea purongo, lepros atu mo tihai, ale mo mele vokevoke. <sup>43</sup> Moiso Iesu mo reti řilangi isana, ale mo řulea vano mara, <sup>44</sup> “O tapurongo! O sopo vere te hiniau isan tea, pani o vano o hase vujangiho isana pńis, ale o sile na nom otori sohen Moses mo retileu hinia matan vara la eři hitea vara ko mele vokevoke.” *Lev 14.1-32*

<sup>45</sup> Pani mo turu mo vano mo lo sorahia, ale nona sorasora mo vano řalihi, ale mo vaia Iesu i sopo eři mele unu hin te taon tamlohi la sopo levosahia, pani mo lo toho na jara hasetoho ale tamlohi la lo mai na jara tari vara la tapaia atu.

## 2

*Iesu Mo Romi Na Hehe*  
(Mt 9.1-8; Lk 5.17-26)

<sup>1</sup> Te rani la vano moiso Iesu mo mele vano Capernaum, ale mo sopo tuai tamlohi lo la vereea lara mo mele mai na ima moiso. <sup>2</sup> Vila řuhu purongo mo sopo mele te masapa na lolo ima teni na mataruana. Ale Iesu mo lo retivujavujangi na reti non God isara. <sup>3</sup> Ale, tamlohi tupu vati la ali na tamlohi papao matea mo mai. <sup>4</sup> Ale matan la sopo eři vano mariviti isana, la sahe aulu na pusa ima, la vai na marole matea mo sivo tataholo hinia, ale la tuhu pa tamlohi papao atu na epana mo sivo na nahon Iesu. <sup>5</sup> Iesu mara mo hite na rasua hin hiniau atu la lo vaia, mo vereea isan tamlohi papao atu mara, “Natuku, na řomi na nom hehe.”

<sup>6</sup> Pani tamlohi vujangi mata leu hai la lo sakele atu, la lo vereveera isara hasera lara, <sup>7</sup> “Mata sava tamlohi nike mo lo retireti sohen haratu? Mo lo vaia sohen enia God. God hasena i eři řomi na hehe.”

<sup>8</sup> Ale Iesu mara mo levosahia vara la lo usiusira hinia isara hasera ale,

mo vereea isara mara, “Mata sava ka lo řomřomi na hiniau sohen? <sup>9</sup> Sava hiniau mo mele malum vara a vereea isan tamlohi papao nike, ‘Na řomi na nom hehe!’ teni a vereea vara, ‘O turu! O viriviri na epam, o hahau!’

<sup>10</sup> Pani matan vara ha pa levosahia vara Natun Tamlohi mo lavi na suiha vara i řomi na hehe nona tamlohi na varama, ha tapurongo na sava a pa vereea!” Moiso Iesu mo vereea isan tamlohi papao atu mara, <sup>11</sup> “O turu, o lavi na epam, o mule!”

<sup>12</sup> Tamlohi papao atu mo turu vahatea, mo lavi na epana ale mo hahau mo malue na nahora, ale mo vaira enira mo isoiso la mařurahi ale la tahe na hijan God lara, “Hare mo pete hite te hiniau sohen harihi moiso?”

*Iesu Mo Tovi Matthew*  
(Mt 9.9-13; Lk 5.27-32)

<sup>13</sup> Iesu mo mele sivo na pahisa tasi, ale tamlohi tari la lo mai isana, ale mo lo vujangira. <sup>14</sup> Ale mara mo lo hahau atu mo hite Levi natun Alphaeus mo lo sakele na jara mata lavi na takis, ale mo vereea isana mara, “O usuriau!” Levi mo turu vahatea, mo usuria.

<sup>15</sup> Hin vutepongi atu na iman Levi, Iesu mo lo hanhani peresi na tamlohi matuvana mata lavi na takis peresi na tamlohi hehe tolu na nona tamlohi usuri, matan tamlohi matuvana sohera la lo usuri Iesu. <sup>16</sup> Pani tamlohi vujangi mata leu peresi na Pharisee lara la hite Iesu mo lo hanhani peresi na tamlohi hehe tolu na tamlohi mata lavi na takis, la vere isana nona tamlohi usuri, lara, “Mata sava mo lo hanhani peresi na tamlohi mata lavi na takis tolu na tamlohi hehe?”

<sup>17</sup> Ale Iesu mara mo rongoa mo vereea isara mara, “La haratu epera la lo řuhu la sopo opoi na doctor, pani la haratu la rojo purongo. Na sopo mai vara a tovi na tamlohi tataholo pani la haratu la hehe.”

*Tapuhoro Na Hanhani*  
(Mt 9.14-17; Lk 5.33-39)

<sup>18</sup> Hin rani atu, tamlohi usuri non John tamlohi paptijo peresi na Pharisee la tapuhoro na hanhani mata

usiusi. Tamlohi hai la mai isan Iesu, la usia lara, “Mata sava tamlohi usuri non John peresi la haratu la lo usuri na Pharisee la lo tapuhoro na hanhahi mata usiusi, pani nom tamlohi usuri la sopo tapuhoro na hanhahi?”

<sup>19</sup> Ale Iesu mo vereia isara mara, “Ka řomřomia vara la tamlohi atu sei la mai na lahi la pa tapuhoro na hanhahi vara tamlohi lahi mo lo toho peresira? Vara tamlohi lahi mo lo toho peresira, la sopo eři tapuhoro na hanhahi. <sup>20</sup> Pani rani matea mo lo mai vara la pa lavi nařihi na tamlohi lahi isara. Hin rani atu natu, la pa tapuhoro na hanhahi.”

#### *Hina Tuai Peresi Na Hina Paro*

Iesu mo mele vereia mara, <sup>21</sup> “Te tamlohi i sopo eři lavi te tavalu ruru paro hatea i silivi na ruru tuai hinia. Vara i vaia sohena, tavalu ruru paro atu i pa vaia i mařari tavera i jeu haratu tiroma. <sup>22</sup> Te tamlohi i sopo eři titisi na waen paro i sivo na jara waen la vaia na huri nani tuai matan waen paro atu i pa sosohi i řari jara waen atu, ale i pa komoa peresi waen atu matan i pa roro nařihi. Waen paro mo tataholo na jara waen la vaia na huri nani paro purongo.”

#### *Moli Mata Sabbath* (Mt 12.1-8; Lk 6.1-5)

<sup>23</sup> Na Sabbath matea, Iesu mo lo hahau role na isa wit matea tolu na nona tamlohi usuri, ale la lo tapulo vesi roto na pere wit. <sup>24</sup> Ale Pharisee la vereia isan Iesu lara, “Eh! Mata sava la lo vai na hinau matea mo sopo tataholo vara la vaia na Sabbath?”

<sup>25</sup> Ale Iesu mo vereia isara mara, “Avei, korong ka sopo lo evi na sava supe David tolu na nona tamlohi la vaia hin rani atu la vejuveju ale la marohati, <sup>26</sup> ale sohena sava mo unu na Iman God na rani non Abiathar enia mo lo přiis aulu, moiso mo lavi pereti atu sei mo tapu přiis hasera la eři hania. David mo hania, ale mo silea isan la haratu la lo toho peresia?”

*Lev*  
*24.9*

<sup>27</sup> Ale mo vereia isara mara, “God mo tau na Sabbath vara i tueni na tamlohi, mo sopo taua vara tamlohi

la lo toho mata Sabbath. <sup>28</sup> Matan haratu, Natun Tamlohi enia mo Moli mata Sabbath.”

## 3

#### *Tamlohi Lima Kuti Matea* (Mt 12.9-14; Lk 6.6-11)

<sup>1</sup> Na Sabbath tinapua matea, Iesu mo mele unu na ima lotu nona Jew matea, ale tamlohi lima kuti matea mo lo toho atu. <sup>2</sup> Ale meresahi non Iesu la lo kilau Iesu vara i pa vai mamahuni tamlohi atu na Sabbath teni, matan vara la pa tuvaia matana. <sup>3</sup> Iesu mo vereia isan tamlohi lima kuti atu mara, “O mai nike!” <sup>4</sup> Ale mo vereia isara mara, “Na Sabbath, mo tataholo vara řa tueni na tamlohi teni vara řa komo tea? Mo tataholo vara řa juri te mauri teni řa vilia?” Pani la řohu vara la řaramia. <sup>5</sup> Iesu mo kilau řalihira na lolokoru, matan mapura mo řilangi, ale mo vereia isan tamlohi lima kuti atu mara, “O řirahi na limam.” Tamlohi atu mo vaia sohena ale limana atu mo mele řuhu. <sup>6</sup> Pa la Pharisee atu la malue vahatea, la vano la tovi takonahi na tamlohi la lo usuri supe Herod, ale la aleale malele matan vara la pa vilimatei Iesu hinia.

#### *Tamlohi Matuvana La Usuria*

<sup>7</sup> Iesu tolu na nona tamlohi usuri la malue, la sivo na tasin Galilee, ale vao tavera matea mo usuria. La tai Galilee, Judea, <sup>8</sup> Jerusalem, Idumaea, hai la tai na tavalu wai Jordan, ale na jara řalihia Tyre enia Sidon. Vao tavera atu lara la rongo la hinau atu Iesu mo lo vaira, la mai isana.

<sup>9</sup> Ale hin jara atu Iesu mo vereia na nona tamlohi usuri vara la tau mamahuni te boti hatea matana matan vao tavera atu, vara i vono la pa tohoia, <sup>10</sup> matan Iesu mo vai tihai na rojoa nona tamlohi matuvana moiso, mo vai la haratu la rojo la lo vartohoi řalihia vara la tikelia. <sup>11</sup> Ale tanume lumiha sasati na tamlohi lara la hitea, la jovi sivo na nahona la ngara lara, “Engko Natun God!” <sup>12</sup> Pani Iesu mo reti řilangi isara vara la sopo vereulia vara enia hare.

#### *Mo Viřoni Na Nona Tamlohi Usuri* (Mt 10.1-4; Lk 6.12-16)

<sup>13</sup> Moiso, Iesu mo sahe aulu na vutivuti matea, ale mo tovi la haratu mo opoira, ale la mai isana. <sup>14</sup> Ale mo viřoni na tupu sangavulu řomana mo rua sei mo tovira vara la vařule, matan vara i pa řulera la vano isana tamlohi mata retivujavujangira, <sup>15</sup> ale mo silera na suiha mata titiu nařihi na tanume sasati. <sup>16</sup> Mo viřoni la tupu sangavulu řomana mo rua atu sohen harihi:

Simon sei Iesu mo tau na hijana vara Peter.

<sup>17</sup> James enia John natun Zebedee, Iesu mo silera na hija vara Boanerges' řaramina, 'Natu Piri' matan jingora mo lo tupali tarea.

<sup>18</sup> Andrew,

Philip,

Bartholomew,

Matthew,

Thomas,

James natun Alphaeus,

Thaddeus,

Simon mara Cana enia tamlohi matea mata valum mata jarana,

<sup>19</sup> ale Judas Iscariot, haratu mo lo turuposi hinia.

#### *Suiha Non Iesu*

(Mt 12.22-32; Lk 11.14-23; 12.10)

<sup>20</sup> Moiso Iesu mo mele vano hin ima atu mo lo toho hinia. Mo sopo tuai vao tavera la mele mai la takonahi, ale la vaia mo sopo te masapa vara la eři hanhani. <sup>21</sup> Tavtavuin Iesu lara la rongoa, la vano vara la taurilatia matan la lo vereea lara, "Hara sei, řomina mo tihai sei!"

<sup>22</sup> Ale tamlohi vujangi mata leu sei la tai Jerusalem la lo vereea lara, "Tamlohi sei, supe nona tanume sasati sei Beelzebul mo sohonia, ale mo lo titiu nařihi na tanume sasati na suihana!"

<sup>23</sup> Pani Iesu mo tovira mai isana ale mo vereea mara, "Mo sohena sava natu Setan i eři mele levuti nařihi Setan? <sup>24</sup> Jara tari sei supe la lo aseasehira hinira hasera la pa maroi, ale i pa sopo te taon tavera teni te vao ima vara i lo aseasehia hasena i pa eři turu. <sup>25</sup> Vara vao ima matea i lo levuti na vaona, tamlohi hinia la pa eři toho řuhu sohena sava? <sup>26</sup> Ale

Setan peresi na vaona vara la lo levlevutira hasera purongo, suihan Setan i pa turu sohena sava matan suihana i pa isoiso. <sup>27</sup> Ka hitea? Vara tamlohi matea mo opoia vara i unu na ima tamlohi suiha matea mata i vanaho te nona hinahinai, i pa lavi te asi hatea i pesi tamlohi suiha atu tako, moiso i pa lavi na nona hinahinai.

<sup>28</sup> Varařuhu, na vereea isamim vara hehe tari tamlohi la lo vaira teni na nora retisasati hin God, God i pa řomira. <sup>29</sup> Pani hare mo lo vere lejileji Tanume Tapu, enia, God i pa sopo eři řomia hin te rani." <sup>30</sup> Iesu mo lo verera hin la hinai sei matan la lo vereea vara tanume sasati lumiha matea mo lo toho hinia.

#### *Vaon Iesu La Alea*

(Mt 12.46-50; Lk 8.19-21)

<sup>31</sup> Tinan Iesu peresi na voraina la pala hin ima atu, la lo turu na jingoima ale la sohai na reti sivo isan Iesu vara i mai i hitera. <sup>32</sup> Vao matea mo lo sakele řalihi Iesu ale la vereea isan Iesu lara, "Eh! Tinam peresi na voraim peresi na vevoraim la lo toho na jingoima la lo aleho!"

<sup>33</sup> Pani Iesu mo řaramira mara, "Tinaku enia hare? Voraiku enira hare?" <sup>34</sup> Mo kilau řalihi la haratu la lo sakele řalihia mara, "Ka hitea? Tinaku peresi na voraiku enira nahai! <sup>35</sup> Sava tamlohi mo lo vai na masalon God, enia voraiku teni vetasiku teni tinaku."

## 4

#### *Tamlohi Isa Matea*

(Mt 13.1-9; Lk 8.4-8)

<sup>1</sup> Na rani tinapua matea, Iesu mo lo vujangi na tamlohi na pahisa tasin Galilee. Hin rani atu vao tamlohi la lo mai la lo turu porotia. Ale matana, mo vele na boti matea mo lo sale hin tasi atu, ale mo sakele hinia. Vao tavera atu la lo toho na jarauta na pahisa tasi. <sup>2</sup> Iesu mo lo vujangira na titileu matuvana, ale mo lo vujangira mara,

<sup>3</sup> "Ha tapurongo! Tamlohi hapořahi matea mo malue mo vano vara i hapořahi na pulana piri wit. <sup>4</sup> Mo lo hapořahira, pani hai la jovi



na malele tavera, maji avuavu la mai la hani vevuhira. <sup>5</sup> Hai la jovi na vatuvatu, uluara la vila, matan tano mo sopo tavera. <sup>6</sup> Pani alo mara mo vele, la wit atu la nunu la mate mata warira la sopo sivo atano jea. <sup>7</sup> Hai la jovi na urata, pani urata atu mo rovira mo punira ale la sopo vua. <sup>8</sup> Pani hai la jovi na tano řuhu, hin tano řuhu atu la ulua. La ulua la vai na vuara, hai namara mo ngavulu tolu (30), hai mo ngavulu limarave (60), hai mo ngavulu sangavulu (100)!” <sup>9</sup> Iesu mo mele vereea mara, “Haratu mo eři rongovosahia, o tapurongo!”

*Mata Sava Mo Vere Na Titileu*  
(Mt 13.10-17; Lk 8.9-10)

<sup>10</sup> Hitahuna, mara mo lo toho enia hasena, tamlohi hai peresi la nona tamlohi usuri tupu sangavulu řomana mo rua atu la usia hin la titileu atu.

<sup>11</sup> Ale Iesu mo vereea isara mara, “God mo majinga hin kamim vara ha levosahi na řaramin mauri atu God mo aulu hinia, pani na lo vere la hinau nike na titileu vara a jarohira isana vinano, <sup>12</sup> matan vara Retiulia i masese sei mara,

‘La pa hite na sava na lo vaia,  
pani la pa sopo eři hitevosahia.  
La pa rongo na noku reti,  
pani la pa sopo eři rongovosahia.  
Matan, vara i vono,

la pa posi mai isaku ale a pa řomira na nora hehe.’” *Isa*  
6.9-10

*Raramin Titileu Atu*  
(Mt 13.18-23; Lk 8.11-15)

<sup>13</sup> Iesu mo vereea isara mara, “Ka sopo rongovosahi titileu akerihi? Vara mo vono, sohena sava natu ha pa eři levosahi vevuhi na titileu tinapua? <sup>14</sup> Tamlohi hapořahi na piri mo hapořahi na reti non God. <sup>15</sup> Ale la haratu la jovi na malele tavera, hin rani atu tamlohi la rongora, Setan mo mai vahatea purongo ale mo lavi nařihi la reti atu sei la lo toho na mapura. <sup>16</sup> La haratu la lo jovi na vatuvatu, enira la haratu sei lara la rongo na reti non God, la

lavia vahatea purongo na avulahi. <sup>17</sup> Pani mo sopo te warira ale reti non God mo lo toho mata makomo rani purongo. Ale vara rani řilangi la mai teni tamlohi la turuleji hinira mata reti non God, la jovi nařihi vahatea purongo. <sup>18</sup> Ale la haratu la lo jovi na urata, enira la haratu sei la lo rongo na reti non God, <sup>19</sup> pani řomkaka mata varama peresi na tavitav haluhalu ale masalora mata hinau tinatinapu mo unu hinira mo puni pa reti atu la lo lavia, ale mo sopo eři vua. <sup>20</sup> Ale la haratu la lo jovi na tano řuhu, enira la haratu sei la lo rongo na reti non God, ale la lavia na maurira ale la avulahi hinia. Mo vua mo tikeli mo ngavulu tolu (30), hai mo ngavulu limarave (60), ale hai la tikeli mo ngavulu sangavulu (100).”

*Titileu Mata Hinau Sei La Luh*  
(Lk 8.16-18)

<sup>21</sup> Iesu mo mele vereea isara mara, “Ka řom vara mo tataholo vara tea mo hasahi te lamu ale i taua na ruhuruhun te tanga teni te vata pani mo sopo na jara sakele mata lamu?

<sup>22</sup> Hinau tari la lo luhu, la pa pala na jara tavera. Ale mo sopo te hinau luhu hatea vara i pa sopo pala na jara tavera. <sup>23</sup> Vara tea te perona, i lo rongo na noku reti!”

*Ha Tapurongo Mamahu*

<sup>24</sup> Iesu mo mele vereea isara mara, “Ha tapurongo na noku retireti i řuhu matan vara nomim lelevosahi i pa ulua i tavera. <sup>25</sup> Haratu mo lo vaihitea vara i levosahi na noku reti, enia i pa eři mele levosahia i tavera i mařivi jea. Pani haratu mo sopo tapurongo i řuhu, sava mo lo toho isana moiso la pa lavi nařihi isana.”

*Titileu Mata Piri*

<sup>26</sup> Iesu mo mele vereea mara, “Mauri atu God mo aulu hinia mo sohena piri vipahai tamlohi mo hapořahira na lepa. <sup>27</sup> Vara mo hapořahira moiso, i pa sopo eři mele vai te hinau hinira. Tamlohi atu mo lo juruvi ale mo lo mele kilau na rani hatehateahi, ale piri atu mo tupali ale mo ulua pani tamlohi atu mo sopo

levosahia vara mo pa sohena sohena sava. <sup>28</sup> Lepa atu hasena mo vai la piri atu la ulua. Tiroma la juliha, ale lahora la peravu, ale mo sopo tuai la vira, la vua. <sup>29</sup> Pani vara vuana la mena, tamlohi atu i pa vura na sita matan nora asitauni natu.”

*Titileu Mata Piri Paka  
(Mt 13.31-32; Lk 13.18-19)*

<sup>30</sup> Iesu mo mele vereea mara, “A pa tovongi na sava hin mauri atu God mo aulu hinia, teni sava titileu natu i pa tataholo vara a vereulia hinia? <sup>31</sup> Mo sohena piri paka matea vara la lavoa na lepa, mo rihirihi mo jeu na piri pahai tari. <sup>32</sup> Pani vara mo ulua mo tavera mo jeu na vipahai tinatinapua tari, ale mo sohahi na rangaranga tavera matan vara maji avuavu la efi vai na taura na malumaluna.”\*

*Mo Vujangira Na Titileu Mata Sava  
(Mt 13.34-35)*

<sup>33</sup> Iesu mo lo vujangi na nona reti na titileu matuvana sohen harihi, matan vara la pa rongovosahira usuri na nora lelevosahi. <sup>34</sup> Iesu mo lo vujangi na vao tamlohi na titileu purongo, pani hitahu vara mo lo toho hasena peresi na nona tamlohi usuri, mo pa lo vereuli na řaramira isara.

*Iesu Mo Horo Na Langi Tavera  
(Mt 8.23-27; Lk 8.22-25)*

<sup>35</sup> Iesu mo lo toho hin boti atu, ale alo mara mo pa lo sivo vara i tihai, mo vereea isara mara, “Ra sua roto tasi nike, řa vano na tavaluna.” <sup>36</sup> La tinařihi vao atu ale la vano, pani mo sopo enira hasera purongo, boti tinapua hai sohena la lo usurira. <sup>37</sup> Mo sopo tuai langi tavera matea mo sere, mo vai na suhusuhu la lo kamekame sivo na lolo boti, ale tungu mo lo mařivi.

<sup>38</sup> Pani Iesu mo lo juruvi na elunga matea na pulo boti. Ale nona tamlohi la řohaia lara, “Tija! Ko sopo levosahia vara řa pa pute!”

<sup>39</sup> Iesu mo kilau ale mo reti řilangi isan langi atu, ale mo vereea isan

tasi atu mara, “Ha isoiso! Ha toho malum!” Vahatea purongo langi atu mo moti, ale tasi tavera atu mo tamata mo tamata. <sup>40</sup> Iesu mo vereea isara mara, “Ka matahu tavera sohena mata sava? Mo sopo lo te nomim rasua teni?”

<sup>41</sup> Ale matahu tavera mo sohonira ale la lo vereea isara hasera lara, “Avei, sava tamlohi nahai? Mo reti purongo ale langi peresi na tasi la ololo hinia!”

## 5

*Mara Gerasenes Matea  
(Mt 8.28-34; Lk 8.26-39)*

<sup>1</sup> Iesu peresi na nona tamlohi la hoso na jara Gerasenes. <sup>2</sup> Lara la hoso na jarauta hin jara atu, tamlohi matea tanume lumiha sasati matuvana la lo toho hinia mo malue na taptap, mo sinai mo tapaia. <sup>3</sup> Tamlohi nike mo lo toho na taptap, ale tea i sopo efi pesia hin te asi teni te jen. <sup>4</sup> Hina purongo vara la pesi na limana peresi na palona na jen teni te aen, mo rotorotoro mo kamekamera. Tea i sopo efi vaia i toho malum. <sup>5</sup> Na rani peresi na vutepongi hatehateahi, mo lo ulo řalihi na taptap peresi na vutivuti atu, ale mo lo tangi mo lo hasena tai na epena na vatu.

<sup>6</sup> Ale mara mo hite Iesu mo pa lo toho asau, mo maro vano isana mo jovi papaohi na nahona. <sup>7</sup> Ale mo tangi na leo tavera matea mara, “Iesu Natun God Aulu Jea, engko te nom sava isaku? Na usiho na hijan God vara o sopo vailejilejiau!” <sup>8</sup> Mo pa vereea sohena matan Iesu mo lo vereea isana mara, “Tanume lumiha sasati, o malue isan tamlohi nike nakerihi!” <sup>9</sup> Iesu mo usia mara, “Eh, engko hijam hare?”

Tanume sasati atu mo řaramia mara, “Hijaku enia Legion, matan kamam kama vao tavera jea!” <sup>10</sup> Tanume sasati atu mo usia řilangi isan Iesu vara i sopo levuti nařihira na jara Gerasenes.

<sup>11</sup> Ale vao tavera mata poi matea la lo susua na pahisan vuti atu. <sup>12</sup> Ale

\* **4:32:** piri paka: Iesu mo vere na piri mustard, enia piri matea mo varihi jea.

tanume sasati atu la usia řilangi isan Iesu lara, “O řule kamam kama vano isana poi, o tinařihi kamam kama unu hinira.”<sup>13</sup> Ale Iesu mo tinařihira. La tanume lumiha sasati atu la malue isan pa tamlohi atu, la vano la unu isan la poi atu, evira korong mo tikeli tari vaha rua (2000). Ale vao poi atu la solesole usuri pesapesa atu la jovi sivo na tasi ale la pute enira mo isoiso.

<sup>14</sup> Tavuin la poi atu la rovo la sahe la vereea na lolon řaon tavera atu peresi na jara řalihi ea. Ale tamlohi la maro la mai vara la hitea vara sava natu mo masese atu.<sup>15</sup> Ale la mai isan Iesu, pani lara la hite pa tamlohi atu sei tanume sasati la lo sohonía mo lo sakele ea ale mo ru na ruru, ale řomina mo mele řuhu moiso, matahu mo sohonira.<sup>16</sup> Ale la haratu sei la lo hite na sava mo masese la sorahi na sava mo masese isan tamlohi atu sei tanume sasati la lo toho hinia peresi la poi atu.<sup>17</sup> Ale la tapulo usia řilangi isan Iesu vara i malue na jarara.

<sup>18</sup> Iesu mo pa lo vele na boti, pa tamlohi atu sei tanume sasati la lo sohonía mo usia řilangi isan Iesu vara i pa usuria.<sup>19</sup> Pani Iesu mo sopo tinařihia pani mo vereea isana mara, “O mule, o vano isana tapalam ale o vereea na sava Moli God mo vaia matam, ale sohena sava mo řomopoiho mo tavera jea.”<sup>20</sup> Ale pa tamlohi atu mo mele hilu ale mo tapulo vereuli na sava Iesu mo vaia matana hin la řaon atu mo sangavulu sei la tovia Decapolis. Ale tamlohi tari la mařurahi tavera hinia.

### *Venatun Jairus* (Mt 9.18-26; Lk 8.40-56)

<sup>21</sup> Ale Iesu mara mo mele hilu mo hoso na tavalun tasi atu, vao tamlohi tavera jea matea la mai la turu řalihia na pahisa tasi.<sup>22</sup> Tamlohi tavera matea na ima lotu nona tavitavin Israel hin jara atu hijana Jairus, mo mai mara mo hite Iesu mo papaohi sivo na palona.<sup>23</sup> Jairus mo usia řilangi isana mara, “Venatuku rihirihí, i sopo tuai i pa mate. O mai o tau na limam hinia matan vara i mele řuhu ale i mauri.”

<sup>24</sup> Ale Iesu mo usuria. Ale vao tavera matea la lo usuria la lo tiatia hinira.<sup>25</sup> Ale hařai matea mo lo toho hin vao atu. Ale mo rojo na rojoa nona hařai mata tauni mo sangavulu řomana mo rua moiso.<sup>26</sup> Mo jalahi na mania tavera isana doctor matuvana moiso, ale la doctor atu la sopo eři tuenia, la sopo vaia i řuhu pani mo mele sati jea.<sup>27</sup> Mo rongo na tamlohi la lo sorahi Iesu ale mo mai na hařin Iesu hin vao atu mo tikeli na pingopingo nona ruru.<sup>28</sup> Matan řomina mara, “Vara a eři tikeli purongoi na nona ruru, noku rojoa i pa tihai!”<sup>29</sup> Ale vahatea purongo řae atu sei mo lo maro mo mamasa, ale mo rongovosahia na epena vara nona rojoa mo tihai.

<sup>30</sup> Ale Iesu sohena mo rongovosahia vara suiha mo malue hinia, ale mo posi vahatea isan vao atu ale mara, “Hare mo tikeli na noku ruru?”

<sup>31</sup> Nona tamlohi usuri la vereea lara, “Ko pa usia vara hare mo tikeliho sohena sava, ko sopo hitea vara vao nike la lo tiatia isam?”

<sup>32</sup> Ale Iesu mo kilau řalihira vara i vileia vara hare natu, mo tikelia.<sup>33</sup> Pani hařai atu sei mo levosahi na sava mo lo masese isana mo mai isan Iesu na matahu, mo popovitoho na palona ale mo vereea na hinu tari.<sup>34</sup> Iesu mo vereea isana mara, “Venatuku, nom rasua mo vaiho ko mele řuhu. O vano na tamata ale nom rojoa i pa tihai jejeu.”

<sup>35</sup> Iesu mo pa lo retireti isana hařai atu, tamlohi hai la tai na iman Jairus la mai la vereea isan Jairus lara, “Venatum mo mate moiso, o sopo mele usi tamlohi vujangi vara i mai.”

<sup>36</sup> Pani Iesu mara mo rongo na sava la lo vereea mo vereea isan Jairus mara, “O sopo matahu! O rasuau!”

<sup>37</sup> Ale Iesu mo sopo tinařihia vara tea i usuria pani Peter enia James peresi John tasin James.<sup>38</sup> La vano la pala na iman tamlohi tavera mata ima lotu nona Jew atu, ale Iesu mo hite na tamlohi la lo tangtangi, la lo tangi aulu, la lo vai na vavaore tavera.<sup>39</sup> Ale Iesu mara mo unu mo

verea isara mara, “Mata sava ka lo vai na vavaore tavera, ale ka lo tang-tangi? Hařarihi nike mo sopo mate, mo juruvi řomaliho purongo.”

<sup>40</sup> Ale tamlohi la manaluluhi Iesu, pani mo řulera enira mo isoiso la malue. Ale mo lavi taman hařarihi atu peresi tinana peresi na nona tamlohi usuri la unu sivo na jara hařarihi atu mo lo toho ea. <sup>41</sup> Iesu mo tauri na liman hařarihi atu mo vereea mara, “Talitha kumi!” Ale řaramin reti nike enia ‘Venatuku, o turu!’ <sup>42</sup> Ale vahatea purongo hařarihi atu sei taunina mo sangavulu řomana mo rua mo mele turu ale mo tapulo hahau. Ale mařurahi tavera mo sohoni tamana peresi tinana peresi na nona tamlohi usuri. <sup>43</sup> Iesu mo vereea isara mo isoiso vara la sopo mele sorahia isan tea, ale mo vereea isara vara la silea hin te hinai i hania.

## 6

### *Mara Nazareth La Rohu Hin Iesu (Mt 13.53-58; Lk 4.16-30)*

<sup>1</sup> Ale Iesu peresi na nona tamlohi usuri la malue hin jara atu la mai na nona taon, Nazareth. <sup>2</sup> Na Sabbath matea Iesu mo tapulo vujangi na ima lotu ea, ale vao tamlohi la rongo na nona vujangi la mařurahi tavera lara, “Tamlohi nike mo pa lavi la hinai nike epu? Ale nona lelevosahi mo pa tai epu? La hinai mařurahi nike la pa pala na limana sohena sava? <sup>3</sup> Mo sopo pa tamlohi voro ima nahai teni, natun Mary ale vorain James, Joses, Judas peresi Simon? Mo sopo vetasina nahai la lo toho peresiřa?” La řongo mo sati matan mo lo vai la hinai sei.

<sup>4</sup> Pani Iesu mo vereea isara mara, “Tamlohi jara tinapua la pa sile na ooloo isana přovet matea, pani i pa sopo eři lavi te ooloo na jarana tataholo teni na naho tahisana teni na naho voraina.”

<sup>5</sup> Iesu mo sopo vai te matamata tavera isana tahisana, pani mo tau na limana na tamlohi rojoa tupu visalete purongo, ale nora rojoa la tihai. <sup>6</sup> Iesu mo mařurahi matan la sopo rasua.

### *Tamlohi Usuri La Malue (Mt 10.5-15; Lk 9.1-6)*

Moiso mo vano na jara tinatinapua mo lo vujangi na tamlohi ea. <sup>7</sup> Mo tovi la tamlohi atu tupu sangavulu řomana mo rua la mai isana, ale mo řulera la vano mo ruarua, ale mo silera na suiha vara la titiu nařihi na tanume lumiha sasati na tamlohi. <sup>8</sup> Iesu mo vereea isara vara la sopo lavi te hinai na nora hahau sohena hahani teni te tanga, teni te mania, pani tihonira purongo. <sup>9</sup> La pa ru na sabat pani la pa sopo mele lavi te harua rurura tinapua. <sup>10</sup> Iesu mo vereea isara mara, “Sava ima ka lo toho hinai hin te vanua, ha lo toho atu i tikeli rani atu ka mele malue hin vanua atu. <sup>11</sup> Pani vara te vanua la řohu hin kamim teni la sopo tapurongo isamim, ha sařsařihi nařihi na tangotango palomim hin jara atu vara i vujangia vara God i pa arira.”

<sup>12</sup> Ale la malue la vano la retivu-javujangi na tamlohi vara la posi na hehe. <sup>13</sup> La titiu nařihi na tanume sasati matuvana, ale la tau na wel na patu tamlohi rojoa matuvana ale nora rojoa la tihai.

### *John Tamlohi Paptijo Mo Mate (Mt 14.1-12; Lk 9.7-9)*

<sup>14</sup> Hin rani atu, supe Herod Antipas mo rongo na sorasora hin Iesu, matan tamlohi tari la lo sorahia. Hai la vereea lara, “John tamlohi paptijo mo mele turu na mateia. Hinai atu natu mo vaia mo suiha vara i eři vai la matamata sei.” <sup>15</sup> Pani hai la vereea lara Iesu enia Elijah, ale hai la vereea lara enia přovet matea matan tuai. <sup>16</sup> Pani Herod mara mo rongoa mo vereea mara, “John tamlohi paptijo! Pani enai natu na tai nařihi na patuna, varařuhu mo mele turu na mateia!”

<sup>17</sup> Matan Herod natu sei mo řule na tamlohi vuro vara la taurilati John, ale la pesia na ima řilangi vara i vai Herodias, naroun tasina Philip i avulahi matan Herod mo lavia sohena narouna. <sup>18</sup> Matan John mo lo vereea isan Herod mara, “Usuri na leu mo sopo tataholo vara o lavi naroun tasim sohena naroun.”

19 Ale Herodias mo lo vaihitea vara i vilimatei John, pani i sopo efi vaia hasena. 20 Matan Herod mo matahuni John matan mo levosahia vara John enia tamlohi tataholo matea mo tapu ale Herod mo lo matahia. Hina purongo vara John mo lo vaia mo lo romkaka tavera, enia mo opoia vara i lo tapurongo na retireti non John.

21 Pani Herodias mo hite na masapa matea na hanhani tavera mata pongi vora non Herod. Herod mo usi na nona tamlohi aulu peresi na nona tamlohi tatavera mata vuro ale la haratu la lo aulu Galilee la mai hini. 22 Matan venatuna sei hijana Herodias mo unu mo velu ale mo vai Herod peresi la haratu la lo toho atu la avulahi tavera. Ale Herod mo vereia isan venatuna mara, "O usiau hin te hinau ko opoia, ale a pa silea isam." 23 Ale Herod mo retitauhi mara, "A pa sileho na sava hinau ko usia, hina purongo vara i tikeli na sope jara na lo aulu hinira."

24 Moiso mo malue mo vano isan tinana mo usia mara, "Nana, a pa usi na sava isana?"

Ale tinana mara, "Na opoi na patun John tamlohi paptijo!"

25 Ale vahatea purongo mo mele unu mo vereia isan Herod mara, "Na opoia vara o sileau nakerihi na patun John tamlohi paptijo hin te peleti hatea!"

26 Herod mo rongong mo sati tavera matana. Pani mo mahanuhanu vara i tope na nona retitauhi sei mo vaia na nahon la haratu la lo toho atu.

27 Ale vahatea purongo mo rule na nona tamlohi mata vilimatei na tamlohi matea vara i tai roto na patun John. Tamlohi atu mo vano na ima rilangi ale mo tai roto na patuna, 28 moiso, mo lavi na patuna na peleti matea mo silea isan harai atu. Ale harai atu mo lavia mo silea isan tinana. 29 Tamlohi usuri non John lara la rongoa, la mai la lavi na tarapena, ale la taua na papa vatu matea.

*Vao Tavera La Lo Usuri Iesu  
(Mt 14.13-21; Lk 9.10-17; Jn 6.1-14)*

30 Pa la tamlohi usuri atu Iesu mo lo rulera la mele mai ale la vere vevuhi na sava la lo vaira ale la lo vujangira.

31 Ale Iesu mo vereia isara mara, "Ra malue hin vao nike ra vano hin te jara hasetoho ra mapu makomona tako." Matan tamlohi mo marivi la lo mai ale la lo vano ale mo sopo te masapa vara la efi hanhani. 32 Ale la vele na boti matea la vano na jara hasetoho matea enira hasera. 33 Pani vao tavera mata taon matuvana la hitera la lo vano, ale la maro usurira na jarauta, ale la kakau tiroma hin jara atu la pa hoso ea. 34 Iesu mara mo hoso mo hite na vao tavera matea, ale mo romopoiri matan la sohena sip-sip mo sopo te tavuira. Ale mo tapulo vujangira na hinau matuvana.

35 Alo mo sivo moiso, ale nona tamlohi usuri la mai isana lara, "Moli jara hasetoho nahai, ale nake mo pongi moiso. 36 O rulera la vano ralihi jara nike ale na vanua vara la voli te hara hinau."

37 Pani Iesu mo raramira mara, "Kamim purongo ha vahanira!"

Pani lara, "Voli tamlohi mata rani ngavulu sangavulu rua mo sopo lo navu mata i voli te pereti vara i vahanani vao tamlohi nike."

38 Iesu mo usira mara, "Ha vano ha hitea vara ka lo lavi na hanhani mo visa."

La mele mai lara, "Pereti mo lima peresi na maji mo rua." 39 Moiso Iesu mo retileu vara la sakele na vao na talu ruvu. 40 Ale la sakele na vao mo tikeli mo ngavulu lima (50) teni mo ngavulu sangavulu (100).

41 Moiso, Iesu mo lavi pa pereti atu mo lima peresi pa la maji atu mo rua mo taia sahe na tuka mo vere meje isan God matara moiso mo topera mo silera isana nona tamlohi usuri vara la asera isana vao tamlohi hatehateahi atu. 42 Enira mo isoiso la hanhani ale la masu mo ruhu. 43 La sohoni na tanga mo sangavulu romana mo rua na mesin la pereti atu mo lima peresi la maji atu mo rua.

44 Evi tamlohi purongo sei la lo hani pereti atu mo tikeli mo tari vaha lima (5000).

*Mo Hahau Na Pusa Tasi*  
(Mt 14.22-33; Jn 6.15-21)

<sup>45</sup> Vahatea purongo atu Iesu mo vere na nona tamlohi usuri vara la vele na boti la vano tiroma na tavalu tasi na vanuan Bethsaida, ale Iesu mo lo řule la vao atu vara la mule. <sup>46</sup> Moiso, enia mo malue isara mo sahe aulu na vuti vara i usiusi.

<sup>47</sup> Pongi mo mai ale pa boti mo lo toho na livuha tasi moiso, ale Iesu hasena mo lo toho na jarauta. <sup>48</sup> Ale mo hitera la lo vaihitea řilangi vara la suahia boti atu matan la lo songahi na langi. Na toa tarere mo hahau na pusa tasi mo mai isara. Mo vano sohena vara i jeura, <sup>49</sup> pani lara la hitea mo lo hahau na pusa tasi, la řomi vara nunua matea, ale la uloulo <sup>50</sup> matan enira mo isoiso la hitea ale la matahu tavera. Pani vahatea purongo Iesu mo retireti isara mara, "Ha sopo matahu, enau sei!" <sup>51</sup> Ale mo vele sivo na lolo boti peresira, ale vahatea purongo langi atu mo moti. Ale la mařurahi tavera. <sup>52</sup> Pani la sopo lo hitevosahia vara Iesu enia hare, hina purongo na matamata sei Iesu mo lo vaia na suišana hin la maji atu peresi la pereti atu matan mapura la řilangi mata la rasua.

*Tamlohi Rojoa Matuvana Gennesaret*  
(Mt 14.34-36)

<sup>53</sup> Iesu tolu na nona tamlohi lara la vano roto na tasi la pala Gennesaret la sahe la hoso, <sup>54</sup> ale lara la sevuti hin boti atu, vila řuhu purongo tamlohi hin jara atu la hitevosahi Iesu. <sup>55</sup> La maro la vano na jara tari řalihi jara atu la lavi na tamlohi rojoa na epara la mai isana na sava jara la rongoa vara mo lo toho ea. <sup>56</sup> Ale na sava jara Iesu mo pala hinia, hina purongo vara hin te vanua, teni te taon tavera, teni na ima hasetoho, tamlohi la lavi na nora tamlohi rojoa la taura na jara maket, ale la lo usia řilangi isana vara la eři tikeli na pingo nona ruru purongo. Ale tamlohi tari sei la tikelia, nora rojoa la tihai.

## 7

*Vujangi Mata Mapu Tamlohi*  
(Mt 15.1-9)

<sup>1</sup> Na rani matea Pharisee peresi na tamlohi vujangi mata leu, la tai Jerusalem la mai isan Iesu. <sup>2</sup> La mai ale la hitea vara tatua nona tamlohi usuri la lo hanhani pani la sopo hoje na limara tiroma sohena Leu non Moses mo vere. <sup>3</sup> Matan Pharisee peresi na Jew tari, la sopo eři hanhani vara la sopo javulahi na limara tiroma, matan la lo usuri na posposi nona vajiaha matan tuai. <sup>4</sup> Ale la pa sopo eři hani te hinau la lavia na maket vara la sopo javulahi na limara tiroma. Hinau akerihi enia vonan la leu atu matuvana sei la lo usurira, sohena posposi mata hoje na paniken teni peleti teni jilivi teni pesin. <sup>5</sup> Ale Pharisee peresi na tamlohi vujangi mata leu la usia isan Iesu lara, "Mata sava nom tamlohi usuri la sopo usuri na posposi nona vajiaha matan tuai, matan la lo hanhani peresi na lumi limara?"

<sup>6</sup> Iesu mo řaramira mara, "Kamim tamlohi tapnetano, Isaiah mo retimangovi varařuhu hin kamim sei hin haratu mo vere mara,

<sup>7</sup> 'La tamlohi nike la lo ooloo hiniau na nora retireti purongo, pani nora řomřomi mo pa lo toho asau hiniau. Nora lotu enia lotulotu vono purongo, ale la lo vere lara nora retileu enia retileu non God.' *Isa 29.13*

<sup>8</sup> Ka lo řomřomi purongo na leu non God, ale ka lo usuri na vujangi nona tamlohi purongo."

<sup>9</sup> Ale mo vere mara, "Kamim ka řohu na retileu non God matan vara ha pa taurilati na nomim posposi matan tuai. <sup>10</sup> Matan Moses mo ulia na leu mara, 'O ooloo hin tinam enia tamam!' ale 'Vara te tamlohi i retisati hin tinana teni tamana ha vilimateia!' *Exo 20.12; Lev 20.9; Deut 5.16*

<sup>11</sup> Pani kamim ka lo vere vara mo tataholo purongo vara tamlohi la sopo tueni na tamara teni tinara na nora vejuveju, ale ka lo vere kara,

‘Mo vono, a pa taurilati na mania na retitauhi hinia moiso vara a pa silea isan God.’\* <sup>12</sup> Ale Ka lo horoa vara i sopo efi tueni tamana enia tinana. <sup>13</sup> Ka lo vai na leu non God mo lo mai hina purongo na nomim posposi matan tuai sei la silea isamim. Ale mele hinau matuvana sohena ka lo vaira.”

### *Hinau Mo Vai Na Lumiha (Mt 15.10-20)*

<sup>14</sup> Ale Iesu mo mele tovi na tamlohi la mele mai isana, ale mo vereea mara, “Kamim mo isoiso ha tapurongo i ruhu isaku, ale ha lo levosahi na noku reti. <sup>15</sup> Mo sopo te hinau hatea vara ha hania i sivo na lolomim i efi vai kamim ha lumiha na nahon God. Pani la hinau sasati sei la lo malue na mapumim, enira natu la lo vai kamim ka lumiha na nahon God.”

<sup>16-17</sup> Moiso Iesu mo unu na ima matea vara i tinafihi vao tamlohi atu, ale nona tamlohi usuri la usi na faramin titileu atu isana. <sup>18</sup> Iesu mo vereea isara mara, “Kamim sohena, ka sopo rongovosahia? Ka sopo lo hitevosahia vara sava tamlohi la hania i sopo efi vaira la lumiha na nahon God. <sup>19</sup> Hanhani mo sopo sivo na mapumim. Mo sivo na pangemim purongo moiso mo mele malue.” Hin retireti akerihi Iesu mo lo vereea vara hanhani tari la ruhu purongo.

<sup>20</sup> Ale Iesu mo mele vereea mara, “Sava mo lo malue na mapu tamlohi, enia natu i efi vai na tamlohi i lumiha na nahon God. <sup>21</sup> Matan sava mo lo malue na mapu tamlohi enia: romromi hehe, posposi viriu, vavanaho, vilimatei na tamlohi, <sup>22</sup> vaivaileu peresi na tinapua mo lahi moiso, hanmarua, lejileji, haluhalu, posposi maji, maŕivi na mereimerei, retireŕen, romaulu, peresi na posposi rongorongono vono. <sup>23</sup> La hinau sasati nike natu, la lo malue na mapu tamlohi, ale la vaia mo lumiha na nahon God.”

### *Tanume Sasati Matea (Mt 15.21-28)*

<sup>24</sup> Iesu mo malue Galilee mo vano na jara matan Tyre enia Sidon. Ale

mo unu na ima matea mo sopo opoia vara tea i levosahia, pani mo sopo efi luhu. <sup>25</sup> Pani mo sopo tuai haŕai matea sei venatuna tanume lumiha sasati matea mo sohonia, mo rongoa ale mo mai isana mo jovi na palona. <sup>26</sup> Haŕai atu enia haŕai ŕoroŕa matea mara Syria Phonecia. Ale mo usia ŕilangi vara i titiu naŕihi tanume sasati atu isan venatuna. <sup>27</sup> Ale Iesu mo vereea isana mara, “Ha tinafihi na natuvarihi la hanhani tiroma, matan mo sopo tataholo vara a lavi na hara pereti a pulahia isana viriu!”

<sup>28</sup> Pani pa haŕai mo farami Iesu mara, “Ko varaŕuhu Moli, pani viriu sei la lo toho na ruhuruŕu tep la lo hani na utauta hanhani hana natuvarihi sei la lo jovi sivo na lepa!”

<sup>29</sup> Moiso Iesu mara, “Nom farami mo ruhu jea! O vano, tanume sasati atu mo malue hin venatum moiso!” <sup>30</sup> Haŕai atu mo turu mo mule, ale mo hite venatuna mo lo juruvi malum na vatana, ale tanume sasati atu mo malue isana moiso.

### *Peropero Matea*

<sup>31</sup> Iesu mo malue Tyre ale mo hahau vano na taon matan Sidon ale mo sivo na tasin Galilee, hin jara atu sei la lo tovia Decapolis. <sup>32</sup> Ale tamlohi la lavi na tamlohi matea mo mengo ale mo peropero mo mai isana, ale la usia ŕilangi isana vara i tau na limana hinia. <sup>33</sup> Iesu mo lavi tamlohi atu mo vano hasena hin vao atu, mo tau na varangona na lolo perona, moiso mo lito sivo na varangona, ale mo tikeli na memen tamlohi atu na litona. <sup>34</sup> Iesu mo taŕa sahe aulu na tuka, ale mo mapsoro mo vereea na leora mara, “Ephphatha!” Ale faramina enia ‘O roi!’ <sup>35</sup> Vahatea purongo perona mo roi, ale memena mo retireti mo mera.

<sup>36</sup> Iesu mo vereea ŕilangi isara vara la sopo sorahi hinau atu isan te tamlohi, pani mara mo vereea mo ŕilangi enira sohena la opoia mo tavera jea vara la vereulia. <sup>37</sup> Matan la maŕurahi tavera ale la lo vereea lara, “Hinau tari mo lo vaira la ruhuŕuhu

\* **7:11:** hinau la retitauhi: vara i mania teni silesilea.

hajavua. Hina purongo vara la peropero mo vaira la rongo, teni vara la mengo mo vaira la retireti.”

## 8

### *Iesu Mo Vahani Na Tamlohi* (Mt 15.32-39)

<sup>1</sup> Hin la rani atu, vao tavera matea mo mele toho peresi Iesu, ale mo sopo te hara hinau. Iesu mo tovi na nona tamlohi usuri la mai isana, ale mo vere a isara mara, <sup>2</sup> “Enau na řomopoi vao nike matan enira la lo toho peresiau mata rani mo tolu moiso, ale mo sopo te hanhani vara la pa hania. <sup>3</sup> Vara a řulera la mule marohati, la pa talekoleko na malele matan tatuara la tai asau řove.”

<sup>4</sup> Nona tamlohi usuri lara, “Pani řa pa vahani la tamlohi nike sohena sava hin jara hasetoho nike?”

<sup>5</sup> Iesu mo usia isara mara, “Ka lo lavi na pereti mo visa?” Lara, “Mo limaravrua!”

<sup>6</sup> Ale Iesu mo vere vao atu vara la sakele, moiso mo lavi la pereti atu mo limaravrua mo vere meje isan God matara, mo topera ale mo silera isana nona tamlohi usuri vara la aseasera isan vao atu, ale la vaia sohena. <sup>7</sup> Ale la vilei na maji vavarahi mo visalete purongo, ale Iesu mo vere meje matara ale mo vere a isana nona tamlohi usuri vara la aseasera isan vao atu.

<sup>8</sup> Tamlohi tari la hanhani vavano la masu. Hitahu nona tamlohi usuri la sohoni na sope hanhani na tanga mo limaravrua. <sup>9</sup> Evi tamlohi korong mo tikeli tari vaha vati (4000). Ale lara la hanhani moiso Iesu mo řulera la mule. <sup>10</sup> Hitahu Iesu mo vele na boti matea peresi na nona tamlohi usuri la vano na jara matan Dalmanutha.

### *Pharisee La Usi Na Matamata* (Mt 16.1-4)

<sup>11</sup> Pharisee lara la rongoa vara Iesu mo pala atu, la mai vara la usi arearea hin te hinau, la opoia vara i vai te matamata matan na tuka vara i vujangia vara enia hare.

<sup>12</sup> Pani Iesu mara mo rongoa mo mapsoro ale mara, “Kamim ka lo usi na matamata mata sava? Varařuhu

na vere a isamim vara enau a pa sopo vai te matamata vara kamim pin tamlohi nake ha pa hitea.” <sup>13</sup> Iesu mo malue isara ale mo vele hin pa boti atu, mo mele vano roto tasi atu.

### *Hehe Nona Pharisee* (Mt 16.5-12)

<sup>14</sup> Pani nona tamlohi usuri la řomaliho vara la lavi te pereti, ale la lo toho peresi na pereti matelete purongo na lolo boti. <sup>15</sup> Ale la pa lo vano roto tasi atu, Iesu mo retiřoařoahaira mara, “Ha lo kilau mata isi nona Pharisee peresi Herod!”

<sup>16</sup> Nona tamlohi usuri lara la rongoa la řomi vara mo lo vere a sohena matan la sopo lavi te pereti. <sup>17</sup> Pani Iesu mo levosahi na sava mo lo toho na řomira, ale mo vere a isara mara, “Mata sava ka lo sorahia vara ka sopo lavi te pereti? Ka sopo lo levosahia? Korong řomimim la pelati. <sup>18</sup> Matamim la vuso? Teni ka peropero? Ka sopo mele řomřomi na sava na lo vaira tiroma? <sup>19</sup> Hin rani atu sei na lo ase na pereti mo lima isan la tamlohi atu mo tari vaha lima (5000), ale tanga sope hanhani mo visa ka pa mele takonahira?”

La řaramia lara, “Kama sohoni na tanga mo sangavulu řomana mo rua.” <sup>20</sup> Ale mo mele vere a mara, “Hin rani atu na vahani na tamlohi mo tari vaha vati (4000) na pereti mo limaravrua, ale tanga mo visa ka pa mele takonahira?”

Lara, “Mo limaravrua.”

<sup>21</sup> Iesu mo mele vere a isara mara, “Ka lo levosahi na sava na lo vere a teni mo vono?”

### *Tamlohi Vuso Matea*

<sup>22</sup> Iesu peresi na nona tamlohi usuri lara la pala Bethsaida, tamlohi hai la lavi na tamlohi vuso matea la mai isana, ale la usia řilangi isana vara i tikelia na limana. <sup>23</sup> Ale Iesu mo tauri na liman tamlohi atu mo tiroma hinia la malue hin vanua atu. Ale mara mo litovi na matana, ale mo tau na limana hinia moiso mo usia isana mara, “Ko hite te hinau?”



<sup>24</sup> Tamlohi atu mo kilakilau řalihi ale mara, “Na hite na tamlohi, pani la sohena vipahai la lo hahau řalihi.”

<sup>25</sup> Ale Iesu mo mele tau na limana na matana, moiso tamlohi atu mara mo mele roi na matana mo eři hite na hinau tari la memera. <sup>26</sup> Iesu mo vereea isana mara, “O mule, pani o sopo hahau na vanua.”

*Iesu Enia Křisto*  
(Mt 16.13-20; Lk 9.18-21)

<sup>27</sup> Iesu peresi na nona tamlohi usuri la malue Galilee ale la sahe na vanua sei la lo toho na jara matan Caesarea Philippi. La pa lo hahau Iesu mo usi na nona tamlohi usuri mara, “Ka rongo na tamlohi la lo vereea vara enau hare?”

<sup>28</sup> La řaramia lara, “Tamlohi hai la vereea vara engko John tamlohi pap-tijo, hai la vereea vara engko Elijah. Hai la lo vereea vara engko přovet matea.”

<sup>29</sup> Moiso Iesu mo pete usia isara mara, “Pani kamim, ka lo vereea kara enau hare?”

Peter mo řaramia mara, “Engko natu pa Křisto atu!” <sup>30</sup> Ale Iesu mo vereea řilangi isara vara la sopo mele vereea isan tea vara enia hare.

*Mo Retireti Na Nona Mateia*  
(Mt 16.21-28; Lk 9.22-27)

<sup>31</sup> Iesu mo tapulo vereea isara mara Natun Tamlohi i pa lavi na rani řilangi na hinau matuvana. Ale tamlohi aulu matan Israel peresi na přis aulu, peresi na tamlohi vujangi mata leu la pa řohu hinia, ale la pa vili-mateia, pani i pa mele turu na hatolu rani. <sup>32</sup> Mara mo lo vere la hinau atu sohena, Peter mo lavi Iesu mo vano hasena, ale mo reti řilangi isana vara i sopo retireti sohen haratu.

<sup>33</sup> Pani Iesu mo posi mo kilau vano isana nona tamlohi usuri, mo reti řilangi isan Peter mo vereea mara, “O rovo isaku Setan. Romřomi atu mo tai isana tamlohi, mo sopo tai isan God.”

<sup>34</sup> Ale Iesu mo tovi la vao atu peresi na nona tamlohi usuri vara la mai isana, ale mo vereea mara, “Vara te vonamim hatea mo opoia vara i usuriau, o vaihitea vara o řomalihō

na masalom moiso o soloti na nom talopeilopei ale o usuriau! <sup>35</sup> Matan sava tamlohi vara mo opoia vara juri na maurina, i pa vaitihaia, pani hare vara mo vaitihai na maurina matakū peresi na Retiřuhu i pa juri na maurina. <sup>36</sup> Sava hinau mo řuhu hinia vara o lavi na hinau tari matan varama nike, pani o pa vaitihai na maurim? <sup>37</sup> Sava hinau natu, o pa eři vaia vara o eři volituhu na maurim hinia?

<sup>38</sup> Matan sava tamlohi vara mo mahānuhanu hiniau peresi na noku retireti hin pina vaivaileu nike sei mo lejileji, enia sohena Natun Tamlohi i pa sopo avulahi hinia hin rani atu i pa mai peresi na nona angelo tapu peresi na mera tavera non Tamana.”

## 9

<sup>1</sup> Iesu mo mele vereea isara mara, “Varařuhu na vereea isamim vara tat-uamim sei la lo turu nakerihi, la pa sopo lo mate la pa hite mauri atu God mo aulu hinia i mai na suihana tavera.”

*Epen Iesu Mo Posi*  
(Mt 17.14-21; Lk 9.28-36)

<sup>2</sup> Rani mo limarave la vano moiso, ale Iesu mo lavi Peter, James peresi John, la sahe aulu na vutivuti enira hasera. Hin rani atu la hite na epen Iesu mo posi, <sup>3</sup> ale la hite na nona ruru la mera hajavua, la lulu tinapua, la jeu na hinau lulu tari nike na varama. <sup>4</sup> Moiso la hite přovet Elijah enia Moses la pala ale la lo sorasora peresi Iesu. <sup>5</sup> Peter mo vereea isan Iesu mara, “Moli, mo řuhu matan kama lo toho akerihi. Mo řuhu řa vai te tent i tolu akerihi, matea nom, matea non Moses ale matea non přovet Elijah.” <sup>6</sup> Matan Peter mo sopo levosahia vara i pa vere na sava matan la matahu hajavua.

<sup>7</sup> Ale telangi matea mo mai mo hohovira, moiso la rongo na leo matea mo malue hinia mara, “Harihi enia Natuku sei na opoia mo tavera jea. Ha tapurongo isana!” <sup>8</sup> Vahatea purongo la pa ale Moses enia Elijah pani la tihai, pani la hite Iesu hasena mo pa lo toho atu. <sup>9</sup> Ale

lara la lo sevuti na vutivuti, Iesu mo reti horora vara la sopo mele vereea na sava la hitea isan te tamlohi vavano Natun Tamlohi i mele mauri na mateia. <sup>10</sup> Ale la sopo mele vereea isan tea, pani la lo usia vara řaramin reti sei vara i pa mele turu na mateia enia sava.

### *Elijah I Pa Mele Mai*

<sup>11</sup> Ale la usia isana lara, “Mata sava natu, tamlohi vujangi mata leu la vereea lara, ‘Elijah i pa mai tiroma?’ ”

<sup>12</sup> Iesu mo řaramira mara, “Varařuhu, Elijah i pa mai tiroma vara i vai tataholoi na hinau tari. Pani mata sava natu la ulia na Retiulia vara Natun Tamlohi i pa lavi na řilangi ale la pa vailejleja na nora hiteřeřesi? <sup>13</sup> Pani na vereea isamim vara Elijah mo pete mai moiso, ale tamlohi la vailejleja usuri na masalora sohena Retitapu mo lo vereea.”

### *Iesu Mo Tueni Na Uluvou Matea (Mt 17.14-20; Lk 9.37-43a)*

<sup>14</sup> Iesu peresi la tupu tolu atu, lara la mele sevuti sivo na pulon vuti atu, la hite na tapalara tamlohi usuri peresi na vao tavera matea la lo turu řalihira, ale la hite na tamlohi vujangi mata leu hai la lo vasvasi perezira. <sup>15</sup> Ale la vao tamlohi atu lara la hite Iesu la hutura hinia, ale vahatea la avulahi la maro vano isana.

<sup>16</sup> Iesu mo usi na nona tamlohi mara, “Eh! Kamim ka lo vauriuri na sava?”

<sup>17</sup> Vonara matea mo vereea isan Iesu mara, “Tija, na lavi natuku na mai isam matan tanume mata mengo mo lo toho isana. <sup>18</sup> Vara mo vaia, mo lo pulahia atano na lepa, ale epena la lo řira mo lo hatihati na huřuna moiso jingona mo lo valval. Ale na usia isana nom tamlohi usuri vara la titiu nařihi tanume sasati nike, pani la sopo eři vaia.”

<sup>19</sup> Iesu mo řaramira mara, “Kamim nomim rasua mo sohena sava! A pa toho peresi kamim i tikeli pangisa? A pa tueni kamim i tikeli pangisa? Ha lavi uluvou atu i mai isaku!”

<sup>20</sup> Moiso la lavi uluvou atu mo mai isana, ale tanume sasati atu mara mo hite Iesu, mo tuatuahi pa uluvou

atu mo jovi atano na lepa, ale mo lo makurekure, moiso valval jingona mo lo malue.

<sup>21</sup> Iesu mo usia isan tamana mara, “Tanume sasati nike mo tapulo vaia nangisa?”

Ale tamana mo řaramia mara, “Na rani mo lo natirihi. <sup>22</sup> Hin te rani mo vaia mo jovi na hapu teni na wai vara i vilimateia. Pani vara o eři vai te hinau, o řomopoi kamam, o tueni kamam.”

<sup>23</sup> Iesu mara, “Ko vereea vara a eři vaia! Vara te nom rasua o eři vai na hinau tari!”

<sup>24</sup> Vahatea tamana mo řaramia mara, “Na rasua, pani o nařihi na noku řomkaka!”

<sup>25</sup> Ale Iesu mara mo hite na vao matea la lo maro la mai vara la pa turu porotia matana, mo reti řilangi isan tanume lumiha sasati atu mara, “Tanume mengo, na vereea isam vara o malue isan uluvou sei nakerihi! O sopo mele unu hinia hin te rani!”

<sup>26</sup> Tanume sasati atu mo ulo sasati, mo mele tuatuahia mo jovi sivo atano moiso mo malue hinia. Tamlohi la hitea sohena vara uluvou atu mo mate moiso, ale lara, “Eh, mo mate!”

<sup>27</sup> Pani Iesu mo sau, ale mo mele turu.

<sup>28</sup> Ale hitahu Iesu mara mo mele unu hin ima atu, nona tamlohi usuri la usia lara, “Mata sava natu, kamam kama sopo eři titiu nařihi tanume sasati atu?”

<sup>29</sup> Ale Iesu mo vereea isara mara, “Tanume sasati sohen haratu, usiuri purongo i eři titiu nařihia.”

### *Iesu Mara I Pa Mate (Mt 17.22-23; Lk 9.43b-45)*

<sup>30</sup> Iesu peresi na nona tamlohi la malue hin jara atu, ale la hahau roto na jara Galilee, matan hin rani atu Iesu mo sopo opoia vara tea i levosahia vara mo lo toho atu. <sup>31</sup> Matan mo opoia vara i vujangi na nona tamlohi usuri hasera. Mo mele vereea isara mara, “Tamlohi la pa turuposi hin Natun Tamlohi, ale la pa taua na lima tamlohi vara la vilimateia. Pani na hatolu rani i pa mele turu na mateia.” <sup>32</sup> Pani la sopo rongovosahi na sava hinau mo lo vereea isara, ale

la matahu vara la usi na řarami nona retireti.

*Hare Mo Aulu*  
(Mt 18.1-5; Lk 9.46-48)

<sup>33</sup> Lara la kakau Capernaum, ale la unu na ima matea mata la pa toho hinia. Iesu mo usia isara mara, "Sava natu, ka lo sorahia na malele?" <sup>34</sup> Pani la sopo řaramia matan la lo vauriuri vara hare natu mo aulu jea hinira. <sup>35</sup> Ale Iesu mo sakele mo tovi la tupu sangavulu řomana mo rua atu la mai isana mara, "Vara tea mo opoia vara i aulu i jeu na tinapua, enia i pa hasena taua atano i jeu na volitusi nona tamlohi tari."

<sup>36</sup> Moiso Iesu mo lavi na natirihia matea hin vao atu ale mo taua na livuhara. Moiso mo tulia mara, <sup>37</sup> "Vara tea mo lavi te natirihia sohen haranike na hijaku, enia mo lo laviau. Ale vara tea mo laviau, mo sopo laviau haseku, pani mo lo lavi Tamaku sei mo lo řuleau sohenā."

*Vavahinau Na Hijan Iesu*  
(Lk 9.49-50)

<sup>38</sup> John mo vereā isan Iesu mara, "Tija, kama hite na tamlohi matea mo lo titiu nařihia na tanume sasati na hijam, pani kama horoa vara i isoiso matan enia mo sopo tatuařa." <sup>39</sup> Pani Iesu mo vereā isara mara, "Ha sopo horoa, matan i pa sopo te tamlohi hatea vara mo lo vai na matamata tavera na hijaku i eři mele verelelejiaiu hin te rani. <sup>40</sup> Matan la haratu la sopo turuleji hiniřa, enira nořa. <sup>41</sup> Varařuhu na vereā isamim, vara tea mo sile te paniken wai hamariři isamim matan ka tamlohi non Křisto, varařuhu enia i pa lavi na otori matana!"

*Ha Lo Kilau Mata Posposi Hehe*  
(Mt 18.6-9; Lk 17.1-2)

<sup>42</sup> "Pani vara tea mo vai na natirihia matea sohen harihi sei mo rasuau i jovi na hehe, i pa mele řuhu jea vara la lasi te vatu tavera na řalona, ale la putehia na tasi puaha. <sup>43</sup> Vara limam mo lo vaiho ko lo vai na hehe, o tai nařihia! I pa mele řuhu jea vara o lavi mauri atu na tuka peresi te limam hatelete purongo, mo jeu haratu vara o pa vano na hapu mata moruhapu

sei mo sopo eři mate peresi na limam mo rua! <sup>44-45</sup> Vara palom mo lo vaiho ko lo vai na hehe, o tai nařihia! I pa mele řuhu jea vara o unu hin mauri atu na tuka peresi te palom hatelete purongo, mo jeu haratu vara la pulahiho peresi na palom mo rua na moruhapu. <sup>46-47</sup> Vara matam mo lo vaiho ko lo vai na hehe, o hoti nařihia! Mo mele řuhu jea vara o unu hin mauri atu God mo aulu hinia peresi te matam hatelete purongo, mo jeu haratu vara la pulahiho peresi na matam mo rua na moruhapu. <sup>48</sup> 'Hin jara atu hulesira la sopo eři mate, ale hapu mo sopo mate hin te rani.'

*Isa 66.24*

<sup>49</sup> Matan God i pa tau na hapu mata rani řilangi na mauri tamlohi tari, matan vara i hani nařihia na hehe na maurira sohenā solo mo lo vai na mit mo sopo ranga. <sup>50</sup> Solo mo řuhu, pani vara mejina mo tihai, ha pa eři vaia i mele meji sohenā sava? Ha taurilati na řomimim mata řohu na hehe, ale ha toho na tamata peresi kamim hatehateahi!"

## 10

*Vujangi Mata Lahi*  
(Mt 19.1-12; Lk 16.18)

<sup>1</sup> Ale Iesu mo malue Capernaum, mo sivo na jara matan Judea, ale mo vano na tavalu wai Jordan na jara Opae hinia. Hin jara atu vao tamlohi la mele mai isana sohen tarea, ale mo lo vujangira sohen tarea.

<sup>2</sup> Pharisee hai la mai isana la vaihitea hin retiusia akerihi lara, "Tamlohi i pa tope na leu vara mo řohu hin narouna teni mo vono?"

<sup>3</sup> Iesu mo řaramira mara, "Leu non Moses mo vereā vara sava?"

<sup>4</sup> La tamlohi atu la vereā lara, "Moses mo majinga hinia mara i pa uli na certificate matea matana, moiso i pa eři řule nařihia i vano." *Deut 24.1-4; Mt 5.31*

<sup>5</sup> Pani Iesu mo řaramira mara, "Moses mo pa uli leu atu matan patumim mo řilangi. <sup>6</sup> Pani na pongi tiroma sei God mo vai na varama, 'Mo vai na lamane peresi na hařai.' *Gen 1.27; 5.2*

<sup>7</sup> Mata hinau atu natu, tamlohi matea i pa soʻrotahi isan narouna, i pa malue isan tamana enia tinana. <sup>8</sup> La tupra rua atu la pa mai epe matelete purongo.’ Matan la sopo mele mo rua, pani la pa matea, *Gen 2.24* <sup>9</sup> i pa sopo te tamlohi hatea i eʻri mele tauhasehira matan God mo soʻrotahira la mai matea moiso.’” <sup>10</sup> Ale hitahuna, Iesu mara mo lo toho hasena na ima peresi na nona tamlohi usuri, ale la mele usia hin pa vujangi atu. <sup>11</sup> Ale Iesu mo vereia isara mara, “Vara te tamlohi mo ʻrohu hin narouna, moiso mo mele lavi na haʻrai tinapua, enia mo lo vaivaileu peresi haʻrai atu. <sup>12</sup> Ale vara te haʻrai mo ʻrohu hin tuana, moiso mo mele lahi isana tamlohi tinapua, enia mo lo vaivaileu peresi tamlohi atu.”

*Iesu Mo Leʻruhu Na Natuvarihi  
(Mt 19.13-15; Lk 18.15-17)*

<sup>13</sup> Na rani tinapua, tamlohi hai la lavi na natura la mai isan Iesu matan vara i tau na limana hinira, ale i leʻruhu hinira, pani nona tamlohi usuri la lo horora. <sup>14</sup> Pani Iesu mara mo hitea mo lolokoru hinira, ale mo vereia isara mara, “Ha tinaʻrihi na natuvarihi la mai isaku, ha sopo horora matan mauri atu God mo aulu hinia, enia non la haratu sei la sohera. <sup>15</sup> Varaʻruhu na vereia isamim vara te tamlohi mo sopo eʻri lavi mauri atu God mo aulu hinia sohen natirihi nike, enia i pa sopo eʻri unu hin mauri atu hin te rani.” <sup>16</sup> Moiso Iesu mo tuli na natuvarihi na limana, ale mo tau na limana aulu na patura mo leʻruhu hinira.

*Tamlohi Tavgav Matea  
(Mt 19.16-30; Lk 18.18-30)*

<sup>17</sup> Na rani matea, Iesu mo pa tapulo vara i mele vano na nona hahau matea na jara tinapua matea, uluvou matea mo maro mo mai ale mo papahi isan Iesu mo usia mara, “Tija ʻruhuʻruhu, a pa vai na sava natu vara a lavi na mauri tui hinia?”

<sup>18</sup> Iesu mo vereia mara, “Mata sava ko vereau vara na ʻruhu? God hasena mo ʻruhu. <sup>19</sup> Engko ko levosahi na leu, ‘O sopo vilimateia na tamlohi, o sopo vaivaileu peresi na tinapua mo lahi

moiso, o sopo vavanaho, o sopo halu, o sopo retiʻhalu hin tahisam, o sopo vai te halu mata vavanaho, moiso o oloolo hin tamam enia tinam.’” *Exo 20.12-16; Deut 5.16-20*

<sup>20</sup> Uluvou atu mo vereia mara, “Tija, la leu tari atu na lo usurira na pa lo natirihi mo sinai mo kakau nake.”

<sup>21</sup> Iesu mo kilau tataholo isan tamlohi atu na opoia, ale mo vereia isana mara, “Ko pa lo vejuveju na hinau matea. O vano o haʻrehi vevuhi na nom hinau tari, ale o sile na maniana isana tilavono, ale o pa lavi na tavgav na tuka. Moiso, o pa mai, o usuriau!” <sup>22</sup> Pa tamlohi atu ʻromina mo jovi mata sava Iesu mo vereia isana, matan enia tamlohi tavgav matea.

*Vujangi Mata Suihan God*

<sup>23</sup> Iesu mo kilau ʻralihi, ale mo vereia isana nona tamlohi usuri mara, “I pa ʻrilangi isan la haratu la tavgav vara la unu hin mauri atu God mo aulu hinia.” <sup>24</sup> Nona tamlohi usuri la maʻurahi na nona reti matan la lo ʻromʻromia lara God mo leʻruhu na tamlohi tavgav. Iesu mo mele vereia isara mara, “Natuvarihi, mo ʻrilangi jea vara tea i eʻri unu hin mauri atu God mo aulu hinia! <sup>25</sup> Mo mele malum jea vara camel i unu na koko niteli matea mo jeu haratu vara tamlohi tavgav matea i eʻri unu hin mauri atu God mo aulu hinia.”

<sup>26</sup> Nona tamlohi la maʻurahi tavera hinia, ale la lo usiusira hinia lara, “Hare natu, i pa eʻri juri?”

<sup>27</sup> Iesu mo kilau tataholo isara mara, “Hinau tamlohi la sopo eʻri vaia, God i eʻri vaia. Matan God i eʻri vai na hinau tari.”

<sup>28</sup> Moiso Peter mo tapulo vereia isan Iesu mara, “Kama tinaʻrihi na hinau tari vara kama usuriho!”

<sup>29</sup> Ale Iesu mara, “Varaʻruhu, na vereia isamim, vara tea mo tinaʻrihi na imana, teni tasina teni vetasina, teni tamama teni tinana teni te natuna, teni jarana, ale mo tinaʻrihira matakū teni mata Retiʻruhu, <sup>30</sup> enia i pa mele lavia nike nake na varama i vaha ngavulu sangavulu (100) na imana, na voraina peresi na vetasina, tinana, peresi na natuna

teni jarana, ale i pa lavi na rani řilangi na lima tamlohi, pani na pongi hitahu i pa lavi na mauri tui.  
<sup>31</sup> Pani la haratu sei la lo řomřomia vara enira la aulu na tamlohi nake, la pa atano jea, ale la haratu sei la lo atano nake, la pa aulu hinira.”

*Iesu Mo Mele Verea Vara I Pa Mate  
 (Mt 20.17-19; Lk 18.31-34)*

<sup>32</sup> Ale lara la lo vano na malele vara la sahe Jerusalem, Iesu mo lo vano tiroma, ale la haratu na harina la mařurahi na nona reti, ale la tupu sangavulu řomana mo rua atu la matahu matan Iesu mo mele tapulo vere na sava i pa masese isana Jerusalem. <sup>33</sup> Mo verea isara mara, “Ka hitea, řa lo sahe Jerusalem nahai, pani i pa sopo tuai la pa tau Natun Tamlohi na lima moli mata přis peresi na tamlohi vujangi mata leu, ale la pa silea na talai vara i mate, moiso la pa taua na lima mara Rome.  
<sup>34</sup> La pa retikerekerehia, la pa litovia, la pa rupia na asi maja, ale la pa vilimateia. Pani na hatolu rani i pa mele turu na mateia.”

*Vujangi Mata Volitusi  
 (Mt 20.20-28)*

<sup>35</sup> Ale James enia John natun Zebedee, la mai isan Iesu la verea isana lara, “Tija, kama opoi na hinau matea vara o pa vaia matamam.”  
<sup>36</sup> Iesu mara, “Ka opoia vara a vai na sava matamim?”

<sup>37</sup> La verea lara, “Kamam kama opoia vara kama pa sakele na pahisam na nom rani suiha. Matea na matuam, ale matea na maraum.”

<sup>38</sup> Ale Iesu verea isara mara, “Ka sopo levosahi na sava hinau ka lo usia. Kamim ha eři inu hin paniken atu mata rani řilangi sei a pa inu hinia? Kamim ha eři lavi paptijo atu mata rongohaji sei a pa lavia?”

<sup>39</sup> La řaramia lara, “Kama eři vaia.”  
 Ale Iesu mo verea isara mara, “Ha pa inu hin paniken atu sei a pa inu hinia, ale ha pa lavi paptijo atu sei a pa lavia, <sup>40</sup> pani mo sopo noku hinau vara a pa verea vara hare natu i pa sakele na matuaku teni na marauku. God Tama mo tatamahuni la

jara atu moiso matan la haratu sei mo viřonira moiso.”

*Haratu Mo Aulu Varařuhu*

<sup>41</sup> La tupu sangavulu tinapua atu lara la rongo hinau atu la lolokoru hin James enia John. <sup>42</sup> Ale matana, Iesu mo tovi matavuhira mai isana mo verea isara mara, “Ka levosahia vara la haratu la lo aulu na tamlohi řořoha la lo řomřomira hasera purongo, ale la lo vailehilehi na tamlohi la lo toho na ruhuruhura. <sup>43</sup> Pani i pa sopo sohen haratu isamim. Vara te vonamim mo opoia vara i aulu hin kamim, enia i pa mai sohena nomim volitusi. <sup>44</sup> Ale vara tea mo opoia vara i tiroma, enia i pa mai sohena slev nona tamlohi tari. <sup>45</sup> Matan hina purongo vara enau na Natun Tamlohi, na sopo mai vara tamlohi la volitusi isaku. Pani na mai vara a volitusi, ale vara a hase sile na mauriku vara i volituhu na tamlohi matuvana.”

*Iesu Mo Tueni Bartimaeus  
 (Mt 20.29-34; Lk 18.35-43)*

<sup>46</sup> La kakau Jericho, ale hitahu Iesu mara mo pa lo malue Jericho tolu na nona tamlohi usuri peresi na vao tavera matea, tamlohi matavuso matea hijana Bartimaeus natun Timaeus, mo lo sakele na pahisa malele, ale mo lo usi na mania isana tamlohi. <sup>47</sup> Ale mara mo rongoa vara Iesu mara Nazareth mo lo hahau hin jara atu, mo tapulo tangi aulu mara, “Iesu, natun Supe David, o řomopoiau!”

<sup>48</sup> Pani tamlohi matuvana la merusahia lara i toho malum, pani mo mele ulo aulu jea mara, “Natun Supe David, o řomopoiau!”

<sup>49</sup> Iesu mara mo rongoa mo turu atu, mo verea isara mara, “Ha vere a i mai isaku!”

Ale tamlohi la tovi matavuso atu lara, “Eh, řomim i sopo sati! O turu! Iesu mo toviho.” <sup>50</sup> Mo pulahi nařihi na nona ruru hamariri, mo vai vilavila mo mai isan Iesu.

<sup>51</sup> Iesu mo usia mara, “Ko opoi na sava vara a vaia isam?”

Matavuso atu mo řarami Iesu mara, “Tija, na opoia vara a eři kilau.”

<sup>52</sup> Ale Iesu mara, “O vano! Nom rasua mo vaiho ko řuhu moiso.”

Ale vahatea purongo matana la kilau, moiso mo usuri Iesu na malele.

## 11

### *Iesu Mo Unu Jerusalem*

(Mt 21.1-11; Lk 19.28-40; Jn 12.12-19)

<sup>1</sup> Iesu tolu na nona tamlohi usuri la lo usuri na malele mo sahe Jerusalem, ale la mai na vanua matan Bethphage peresi Bethany na pahisa vutivuti sei la tovia Vuti talu Olive. Iesu mo řule na nona tamlohi usuri mo rua vara la vano tiroma hinira.

<sup>2</sup> Mo vereea mara, “Ha vano hin vanua aturihi ale ha unu hinia, ale ha pa hite na natu donki matea la lihoa. Tea mo sopo lo sakele hinia hin te rani. Ha uli na asina, ale ha lavia i mai isaku. <sup>3</sup> Vara tea mo usi kamim vara, ‘Ka lo vai na sava?’ ha vereea vara, ‘Moli mo opoia, ale i pa mele sohaia i mai nohorihī.’”

<sup>4</sup> La vano hin vanua atu, moiso la hite natu donki atu mo lo toho na pahisa malele la lihoa na jingoima ima matea, ale la uli na asina. <sup>5</sup> Pani tamlohi hai sei la lo turu atu la usira lara, “Mata sava ka lo uli na asin natu donki sei?” <sup>6</sup> La řaramira sohen Iesu mo vereea isara moiso, ale la tamlohi atu la tinařihia vara la lavi natu donki atu i vano. <sup>7</sup> La lavia mo mai, la vuřangi na nora ruru aulu na hařin natu donki atu, ale Iesu mo sahe mo sakele hinia.

<sup>8</sup> Tamlohi matuvana la vuřangi na nora ruru na malele, ale hai la lo tai na rau pahai na pahisa malele la vuřangira na malele vara natu donki atu i pa hahau hinia. <sup>9</sup> Tamlohi hai la lo hahau tiroma, hai la lo hitahu, ale Iesu mo lo toho na livuhara, ale la lo uloulo tavera lara,

“Hasohaso God!” *Psa 118.25*

Ale “Leřuhu isan haratu sei mo lo mai na hijan Moli God”. *Psa 118.26*

<sup>10</sup> “Avulahi tavera mo lo mai mata rani suiha non tamařa Supe David mo pala.”

“Hasohaso God aulu na tuka sei mo aulu jea!”

<sup>11</sup> Iesu mo unu Jerusalem, ale mo unu na rope Temple. Ale mara mo vano řalihi mo hite na hinau tari moiso, ale matan pongi mo mai mariviti moiso mo malue mo vano Bethany peresi la nona tamlohi atu mo sangavulu řomana mo rua.

### *Mo Lesati Na Vipahai Fig Matea*

(Mt 21.18-19)

<sup>12</sup> Na harua rani na řalavuho, la malue Bethany ale la lo vano, Iesu mo marohati. <sup>13</sup> Mo hite na vipahai fig matea mo lo turu asau na pahisa malele, ale mo hahau mo vano hinia vara i hitea vara te vuana, pani mo sopo te vuana, mo lo rauha purongo matan mo sopo lo taro mata i vua.

<sup>14</sup> Iesu mo reti isan vipahai atu mara, “I pa sopo mele tea i eři mele hani te vuam hin te rani.” Ale nona tamlohi usuri la rongo reti atu mo lo vereea isana.

### *Iesu Mo Levutira Na Temple*

(Mt 21.12-17; Lk 19.45-48; Jn 2.13-22)

<sup>15</sup> La vano la mele tikeli Jerusalem moiso Iesu mo unu na rope Temple, mo tapulo levuti la haratu sei la lo hařehi na hinahinau peresi la haratu sei la lo voli na nora hinahinau. Iesu mo tarasahi na tep non la haratu la lo jeni na mania nona tamlohi sei la mai Jerusalem. Mo vano mo tohoi roiroi na palapala non la haratu la lo hařehi na vomaha. <sup>16</sup> Mo horo la haratu sei la opoia vara la lavi na nora hinahinau mata hařehira na lolo ropen Temple atu. <sup>17</sup> Ale Iesu mo vujangira mo vereea isara mara, “Ka sopo lo levosahi na sava la ulia na Retiulia sei mo vereea vara,

‘Imaku enia ima mata usiusi nona tamlohi tari na varama.’ *Isa 56.7*

Pani nake ka vaia mo mai sohena, ‘Papa tamlohi vili tamlohi mata mania matea.’” *Jer 7.11*

<sup>18</sup> Přis aulu peresi na tamlohi vujangi mata leu lara la rongo na sava Iesu mo vaira na Temple, la tapulo aleale malele vara la vilimateia hinia. Pani la matahuni Iesu matan tamlohi

tari la lo maʻurahi tavera na nona vujangi. <sup>19</sup> Na ravravi Iesu enia tolu na nona tamlohi usuri la mele malue Jerusalem.

*Pa Vipahai Fig Atu Mo Koru  
(Mt 21.20-22)*

<sup>20</sup> Na ʻalavuhu tinapua, lara la mele vano maʻiviti hin pa vipahai fig atu, la hite na rauna la menumenu, ale lahona peresi na warina la koru moiso. <sup>21</sup> Peter mo mele ʻomʻomi pa reti atu non Iesu sei mo vereea isan vipahai atu, ale mara, “Tija, o to kilau vano! Pa fig atu ko lo lesati hinia mo koru moiso.”

<sup>22</sup> Moiso Iesu mo ʻaramia mara, “Ha tau na nomim rasua hin God! <sup>23</sup> Varaʻuhu na vereea isamim, vara tea nona rasua mo ʻilangi, ale mo sopo ʻomkaka hinia, i eʻi vereea isan vuti tavera akerihi vara, ‘O hase taheho o sahe aulu, ale o pulahiho sivo na tasi tavera!’ ale i pa ololo hinia! <sup>24</sup> Ha tapurongo isaku! Na vereea vara sava hinia ka usia na nomim ususi, vara ka rasua mo ʻilangi i pa sohena. <sup>25-26</sup> Pani vara ka lo ususi, ha ʻomi na hehe nona tinapua sei la vaia isamim, ha ʻomira tiroma, matan vara Tamamim na tuka sohena i eʻi ʻomi na nomim hehe.”

*Tamlohi Tavera La Mai Isan Iesu  
(Mt 21.23-27; Lk 20.1-8)*

<sup>27</sup> Iesu peresi na nona tamlohi usuri la mele unu Jerusalem, ale lara la lo hahau na lolo rope Temple, ʻis aulu tolu na tamlohi vujangi mata leu peresi na tamlohi aulu tinapua hai la mai isana, moiso la reti isana lara, <sup>28</sup> “Sava suiha natu ko lo vai la hinia nika hinia teni hare mo sileho na suiha matana?”

<sup>29</sup> Iesu mo vereea isara mara, “A pa usi kamim na retusia matea, ale vara ha ʻaramiau, enau a pa vere kamim hinia vara na lavi na suiha isan hare natu na lo vai la hinia nika hinia. <sup>30</sup> Ha to vereau hinia, paptijo non John mo tai isan God teni isana tamlohi?”

<sup>31</sup> Ale la lo hasera sorasorahia lara, “Vara ʻa vereea vara enia mo tai isan God, i pa usiʻa vara, ‘Mata sava natu,

ka sopo rasu John?’ <sup>32</sup> Pani vara ʻa vereea vara enia mo tai isana tamlohi, la vao nika la pa lo lolokoru hiniʻa.” La lo vereea matan la matahu vara la pa vai la vao tamlohi atu la lolokoru ale la sopo eʻi mele vaira la toho malum, matan la vao atu la rasua vara John enia ʻovet varaʻuhu matea. <sup>33</sup> Matan haratu, la tamlohi tatavera atu la ʻarami Iesu lara, “Kama sopo levosahia.”

Ale Iesu mo vereea isara mara, “Enau sohena, a pa sopo vere kamim hinia vara sava suiha natu, na lo vavahinau hinia.”

## 12

*Vujangi Mata Tamlohi Sasati  
(Mt 21.33-46; Lk 20.9-19)*

<sup>1</sup> Ale na lolo rope Temple Iesu mo tapulo vujangi na titileu isara mara, “Tamlohi tavera matea mo lavo na isa mata grape matea. Mo vai na ropena, mo voro na jara mata lavi naʻihi na waena hinia. Mo voro na ima aulu matea mata kilau na isana. Ale mo sile isana atu vara tamlohi lalavo tinapua la pakaia, ale la lalavo hinia. Moiso pa tamlohi tavera atu mo vano na jara tinapua mata i tohoa ea. *Isa 5.1-2*

<sup>2</sup> Taro mata vua grape la mena, ale pa tamlohi tavera atu mo ʻule na nona volitusi matea mo vano vara i lavi na ʻungana vuara. <sup>3</sup> Pani pa la tamlohi atu la tauri pa volitusi, la hamajia, moiso la ʻulea mo vano lekoleko.

<sup>4</sup> Tamlohi tavera atu mo mele ʻule na volitusi tinapua matea. Mo vano, pani la hamajia na patuna, ale la vaimahanuhanu hinia. <sup>5</sup> Tamlohi tavera atu mo mele ʻule na volitusi tinapua matea. Pani la vilimateia. Tamlohi tavera atu mo mele ʻule te nona volitusi tinapua matuvana, pani hai la hamajira, ale hai la vilimateira vavano, <sup>6</sup> tamlohi tavera atu mo hitea vara natuna tataholo purongo mo pa lo toho. Enia mo opoia mo tavera jea, ale mo ʻomʻomia mara, ‘Na levosahia vara a ʻule natuku i sivo, la pa ololo hinia.’

<sup>7</sup> Pani pa la tamlohi sasati atu la lo verevera isara hasera lara, ‘Natuna

tataholo nakerihi mo lo mai, vara řa vilimateia, řa pa lavi na koruna tari!’

<sup>8</sup> La tauria, ale la vilimateia moiso la pulahia mo sahe na jingoiman rope atu.”

<sup>9</sup> Iesu mo usia isara mara, “Ka řom vara tamlohi tavera atu i pa vai na sava? A vereia tataholo isamim, i pa sinai i vilimateira enira mo isoiso, ale i pa sile isa atu isana tamlohi tinapua vara la mele pakaia. <sup>10</sup> Varařuhu, ka sopo lo evi hinai nika na Retiulia?

‘Vatu atu tamlohi voro ima la lo tipahia,

enia mo mai tapulo pulo vatu mata ima.

<sup>11</sup> Hinai atu Moli God hasena mo vaia.

Kama hitea vara mo řuhu jea.’ ”

*Psa 118.22-23*

<sup>12</sup> Tamlohi tatavera non Jew la opoia vara la taurilatia matan la hitevosahia vara Iesu mo lo vere titileu atu matan vara i pisuhira, pani la matahu vara la tauria matan la vao atu. Matan haratu, la malue atu, ale la rovo.

*Ha Voli Na Takis*

*(Mt 22.15-22; Lk 20.20-26)*

<sup>13</sup> Ale la řule na Pharisee hai peresi na tamlohi hai non Herod Antipas la vano isan Iesu matan vara la vaihitea vara i ori hin te nona retireti. <sup>14</sup> Ale la mai isana la vereia lara, “Tija, kama levosahia vara engko ko lo varařuhu, ale ko sopo tametame na řomřomi nona tamlohi, matan ko sopo usuri na kilakilau nona tamlohi isana tamlohi aulu, pani engko ko lo vujangi na malele tataholo non God usuri na retivarāřuhu.

Nomam retiusia isam nahai, mo tataholo vara tavitavin Israel la voli na takis isana supe nona mara Rome teni mo vono? Ra pa silea teni i toho?” <sup>15</sup> Pani Iesu mo levosahi na nora tapnetano, ale mo vereia isara mara, “Mata sava ka lo vaihitea so-hena? Ha lavi te selen hatea i mai isaku a hitea.” <sup>16</sup> Ale la lavi matea la silea isana moiso mo usia isara mara, “Niniun hare nahai, ale hijan hare nahai la ulia hin selen nika?”

Lara, “Nahon supe nona mara Rome.”

<sup>17</sup> Ale Iesu mo vereia isara mara, “Ale ha sile na hinai non supe nona mara Rome isan supe nona mara Rome, ale hinai non God isan God.”

Ale lara la rongo mo řaramira so-hena, la mařurahi tavera hinia.

*Vujangi Mata Sauteterahi Na Mateia*

*(Mt 22.23-33; Lk 20.27-40)*

<sup>18</sup> Ale Sadducee hai la mai isan Iesu, enira vao matea na Jew sei la sopo rasua vara God i pa sauteterahi na tamlohi na mateia. La mai isana la usia na retiusia matea lara, <sup>19</sup> “Tija, Moses mo ulia mara vara tamlohi lahi matea mo mate, pani narouna mo sopo vasusu, tasina i pa lavi na malepuna i mai narouna matan vara hařai atu i eři lavi te natun tavaina. *Deut 25.5*

<sup>20</sup> Tuai, vorai mo limaravrua la lo toho. Ale vora tiroma mo lavi na hařai matea, pani mo sopo lo te natuna, ale mo mate. <sup>21</sup> Vora usuria mo pete lavi hařai atu, pani enia so-hena mo mate, mo sopo te natuna. Hatolura mo pete lavia, ale mo mate mo sopo te natuna. <sup>22</sup> Mo so-hena mo tikeli na vora hitahu, ale enira mo isoiso la mate. Hařai atu so-hena mo mate, pani mo sopo te natuna. <sup>23</sup> O to vere kamam hinia vara hařai atu i pa naroun hare na pongi sauteterahi matan enia mo lahi isan la vorai atu enira mo isoiso.”

<sup>24</sup> Iesu mo vereia isara mara, “Nomim řomřomi mo sopo tataholo, matan ka sopo levosahi mamahuni na Retitapu teni na suihan God!

<sup>25</sup> Matan hin rani atu tamlohi la pa mele turu na mateia, la pa sopo mele lahi, pani la pa so-hena angelo na tuka. <sup>26</sup> Pani hin vujangi sei mata sauteterahi na mateia, korong ka sopo lo evia matan vipahai rihirihi atu sei Moses mo hite na hapu mo lo hani hinia? God mo vereia isan Moses mara, ‘Enau God non Abraham, God non Isaac, ale God non Jacob.’ *Exo 3.6*

<sup>27</sup> God enia mo sopo God nona tamlohi mate, pani nona tamlohi mauri, matan isana, tamlohi tari la lo mauri. Kamim ka jalio mo tavera.”



*Retileu Atu Mo Jeu Na Tinapua*  
(Mt 22.34-40; Lk 10.25-28)

<sup>28</sup> Ale hin rani atu tamlohi vujangi mata leu matea mo mai mo lo tapurongo na vauriuri nona Saducee, ale mo rongu sohena sava Iesu mo řaramira sei mo řuhu jea, ale mo usi Iesu hinia mara, "Sava leu natu mo aulu mo jeu na leu tari?"

<sup>29</sup> Iesu mo řaramia mara, "Leu atu mo aulu mo jeu na leu tari enia vara, 'Israel, ha tapurongo! Moli nořa God, enia Moli matelete. <sup>30</sup> O pa opoi Moli nom God vevuhi na mapum, na maurim, na řomim, peresi na suiham.' *Deut 6.4-5*

<sup>31</sup> Ale haruana enia nahai, 'O opoi na tahisam sohen ko lo opoiho hasem.' Moiso mo sopo mele te leu tinapua i aulu i jeu la leu sei mo rua." *Lev 19.18*

<sup>32</sup> Tamlohi vujangi mata leu atu mo vereea mara, "Tija, ko varařuhu vara God enia matelete purongo, ale mo sopo mele te tinapua. <sup>33</sup> Ale mo tataholo vara řa opoi vevuhia na mapuřa, na řomiřa, na suihařa, ale vara řa opoia na tahisařa sohena řa lo opoiřa haseřa. La leu akerihi la aulu la jeu na maji tari mata malamalai řa lo sulira na nořa silesilea isan God usuri na leu." *Hos 6.6*

<sup>34</sup> Iesu mara mo hitevosahi na lelevosahi non tamlohi akerihi, mo vereea isana mara, "Engko ko lo toho mariviti moiso hin mauri atu God mo aulu hinia."

Ale hitahun haratu, mo sopo te vonara hatea i mele opoia vara i usia hin te retiusia hatea.

*Křisto Enia Natun God*  
(Mt 22.41-46; Lk 20.41-44)

<sup>35</sup> Na rani tinapua Iesu mo lo vujangi na tamlohi na lolo rope Temple, mo lo vereea isara mara, "Sohena sava natu, tamlohi vujangi mata leu la lo vereea vara Křisto enia natun Supe David? <sup>36</sup> Na lo usia sohena matan tuai David mo retireti na suihan Tanume Tapu mo vereea mara, 'Moli God mo vereea isan noku Moli mara:

O sakele na matuaku,  
o lo sasaovi i mai i tikeli

a tau na nom meresahi  
na ruhuruhu palom.' *Psa 110.1*

<sup>37</sup> David sohena mo tovia 'Moli'. Vara mo sohen haratu, sohena sava natu, Křisto enia natun David?"

Ale vao tavera atu la avulahi tavera vara la lo tapurongo na nona vujangi.

*Vujangi Mata Posposi Aulu*  
(Mt 23.1-36; Lk 20.45-47)

<sup>38</sup> Iesu mo lo vujangira mara, "Ha lo kilau na tamlohi vujangi mata leu. Matan la lo opoia vara tamlohi la hitera la lo hahau peresi na nora ruru peravu, ale la opoia vara tamlohi la lo popovitoho isara na jara maket. <sup>39</sup> La opoia vara la lo sakele nahonaho tarea na lolo ima lotu teni na rani matan te hanhani tavera. <sup>40</sup> Ale la lo haluhalu na hařai malepu mata voli nařihi na imara na volina makomona purongo, pani la lo tatavu horo na nora posposi sasati na usiusi peravu na naho tamlohi. Matan hinau atu, nora talai i pa mele tavera jea."

*Malepu Tilavono Matea*  
(Lk 21.1-4)

<sup>41</sup> Iesu mo lo sakele mariviti na jara silesilea na Temple. Ale mo lo kilau na vao tamlohi la lo tau na nora mania. Tamlohi tavgav matuvana la tau na mania tavera hinia. <sup>42</sup> Mo sopo tuai mo hite na malepu tilavono matea mo mai, ale mo tau na nona mania, selen mo rua purongo. <sup>43</sup> Iesu mo tovi na nona tamlohi usuri la mai isana mara, "Varařuhu na vereea isamim, malepu tilavono nike, mo taua mo jeu na tamlohi tinapua tari sei la lo tau na nora silesilea nike. <sup>44</sup> Matan la haratu sei la silea mo tavera pani la levosahia vara nora tavgav tavera mo pa lo toho. Pani malepu tilavono nike mo sile vevuhi na sava mo lo toho mata maurina."

## 13

*Hinai La Pa Masese Hitahu*  
(Mt 24.1-2; Lk 21.5-6)

<sup>1</sup> Iesu mo pa lo malue na Temple, ale nona tamlohi usuri matea mo vereea isana mara, "Tija, o to kilau vano sevano hin la vatu tavera sevano la voro na roro ima hinira, ale o to kilau la ima tatavera sevano!"

<sup>2</sup> Ale Iesu mo vereā isana mara, “Ko lo hite ima tavera nike? I pa sopo te vatu hatea i pa lo toho aulu na vatu tinapua vara la pa sopo atu jovjovira.”

*Rani Rilangi La Pa Mai*  
(Mt 24.3-14; Lk 21.7-19)

<sup>3</sup> Ale hitahu, Iesu mara mo lo sakele na pahisa Vuti talu Olive mo lo kilau sivo na Temple, Peter, James, John enia Andrew la mai ņoņo hasera, ale la usia lara, <sup>4</sup> “O to vere kamam hinia, la hināu sei la pa masese pangisa? Ale sava matamata atu i pa mai tiroma vara kama pa levosahi mamahunia vara i sopo tuai natu la hināu tari natu la pa masese?”

<sup>5</sup> Iesu mo vereā isara mara, “Ha lo kilau i ņuhu! Mo sopo ņuhu vara tea i halu kamim. <sup>6</sup> Matuvana la pa mai na hijaku. La pa vereā vara, ‘Enāu natu, tamlohi atu!’ ale la pa halu na tamlohi matuvana. <sup>7</sup> Ale vara ka rongo te vuro teni sorasora mata vuro, ņomim i sopo kaka hin la hināu sei la pa mai tiroma, pani mo sopo isoisona. <sup>8</sup> Mara jara tavera tinatinapu la pa lo meresahi hinira, ale supe matea i pa meresahi na supe tinapua. Ale mihi i pa hisuhi na tatua jara na varama. Tamlohi la pa marohati na marua. Pani la hināu sei enira tapulona purongo. La hināu tari sei la sohena tapulo rongohaji na epe haņai vara i lavilavi. <sup>9</sup> Ha lo kilau! Tamlohi la pa tauri kamim la pa ari kamim. La pa hamaji kamim na ima lotu. Ha pa turu na naho tamlohi aulu nona gavman peresi na naho supe matakū. Enia i pa masapamim matea vara ha eņi vereā isara vara enāu hare. <sup>10</sup> Retiņuhu atu la pa retivujavujangia na jara tari na varama tiroma, moiso isoisona i pa mai. <sup>11</sup> Ale vara la lavi kamim la vai kamim ka turu na nahora vara la vaihite kamim, ha sopo ņomkaka na sava ha pa vereā, pani ha pa vere na sava God i pa silea isamim, matan i pa sopo kamim ka lo retireti pani Tanumen God hin kamim.

<sup>12</sup> Vorai matea i pa turuposi hin voraina vara i mate. Tama i pa turuposi hin natuna. Natuvarihi la pa turuposi na tamara peresi na tinara la pa vaira tamlohi la vilimateira. <sup>13</sup> Tamlohi tari la pa ņohu hin kamim matakū. Pani haratu mo turu ņilangi mo tikeli na isoisona i pa juri.

*Hina Lumiha Matea Na Lolo Temple*

(Mt 24.15-21; Lk 21.20-24)

<sup>14</sup> Rani matea i pa mai ha pa hite hina lumiha atu God mo lo ņohu hinia i pa turu na jara tapu na lolo Temple. *Dan 9.27; 11.31; 12.11* Hare mo evi harihi, i lo lelevosahi na ņaramina! Hin rani atu, i pa ņuhu vara tamlohi hin Judea la rovo la sahe na vutivuti.

<sup>15</sup> I pa ņuhu vara haratu mo lo toho na pusa ima, i sopo mele unu na lolo ima vara i lavi te hināu hinia, <sup>16</sup> ale i pa ņuhu vara haratu mo lo voko na isana i sopo mele posi i sivo mata i lavi na nona ruru na lepa. *Lk 17.31*

<sup>17</sup> Hin rani atu, i pa ņilangi jea isana haņai mo tau natuna, teni te haņai mo lo vasusui te natuna. <sup>18</sup> Ha usiusi vara rani atu i pa sopo masese na taro hamariri.

<sup>19</sup> Rani sati tavera atu i pa jeu na rani sati tamlohi la lo hitera mo tapulo hin rani atu God mo vai na varama mo tikeli nake i pa sopo mele te rani sasati i sohena hin te rani. *Dan 12.1; Rev 7.14*

<sup>20</sup> Vara Moli God i sopo vai rani ņilangi atu i vejuveju, i pa sopo tea i eņi juri, pani mata nona tapuhi, la haratu sei mo viņonira i pa vai rani atu i vejuveju.

<sup>21</sup> Hin rani atu, vara tea mo vereā isamim vara, ‘Ha kilau nike, Kņisto nahai!’ Teni tea i pa vereā vara, ‘Ko hitea, enia nahai!’ Pani ha sopo ratura. <sup>22</sup> Matan kņisto haluhalu peresi na tamlohi tapu haluhalu la pa mai. La pa vai na matamata tatavera. La pa vaihite la tamlohi atu God mo viņonira moiso vara la tinarihi na nora rasua. <sup>23</sup> Ha lo kilau! Enāu na lo vere kamim hinia tiroma moiso.

*Natun Tamlohi I Pa Mai*  
(Mt 24.29-31; Lk 21.25-28)

<sup>24</sup> Moiso hitahu hin rani sasati atu, 'Alo i pa řořoha, ale vitu i pa sopo mele sile na merana.'

*Isa 13.10*

<sup>25</sup> 'Vitusarasara la pa jovjovi na masapa, ale suiha tari na masapa la pa hisu.'

*Isa 34.4; Joel 2.10*

<sup>26</sup> Hitahuna natu, tamlohi tari la pa hite na Natun Tamlohi mo lo mai na telangi na suiha tavera peresi na merana tavera.

*Dan 7.13*

<sup>27</sup> Natun Tamlohi i pa řule na nona angelo la vano řalihi na varama vara la takonahi na nona tapuhi na jara tari na varama, ale aulu na masapa.

*Tea Mo Sopo Levosahia*

*(Mt 24.32-35; Lk 21.29-33)*

<sup>28</sup> Ha levosahi na posi vipahai fig sei julina la mai la malum, ale mo tivu, ka levosahia vara rani mata hulihuli mo pala. <sup>29</sup> I pa sohena na pongi hitahu vara ka hite na hinau tari sei na lo vere kamim hinira moiso. Ha pa levosahia vara i sopo tuai Natun Tamlohi i pa pala. <sup>30</sup> Varařuhu na vere isamim, pina akerihi nake i pa sopo lo mate vevuhi vavano la hinau tari akerihi la pa masese. <sup>31</sup> Tuka enia varama la pa tihai, pani noku reti la pa toho jejeu.

*Ha Tatamahu Tarea*

*(Mt 24.36-44)*

<sup>32</sup> Mo sopo tea i levosahi rani tataholo atu teni matan alo matana, angelo na tuka sohena, la sopo levosahia teni Natun Tamlohi. God Tama hasena mo levosahia. <sup>33</sup> Ha lo kilau! Ha sopo juruvi! Matan ka sopo levosahia vara pongi atu i pa pala pangisa!

<sup>34</sup> I pa sohena tamlohi matea mo vano na nona hahau matea na jara tinapua matea, ale mo tau na imana na lima nona volitusi, ale la lo vai na nora vavahinau hatehateahi hinia. Ale mo vere haratu mo lo kilau na pelati mara, 'O lo kilau tarea mata noku mele pala!' <sup>35</sup> Matan haratu, ha lo kilau! Matan ka sopo levosahia vara tamlohin ima sei i pa mele pala pangisa, i eři pala na ravravi teni

na livuha pongi, teni na toa tarere teni na řalavuho, ha lo kilau! <sup>36</sup> Mo sopo řuhu vara ha hutu kamim na nona pala, ale i vilei kamim ka lo juruvi. <sup>37</sup> Sava na vere kamim hinia, na vere isamim kamim isoiso, ha lo kilau i řuhu mata nona rani pala!"

## 14

*Jew La Aleale Malele Mata Taurilia Hinia*

*(Mt 26.1-5; Lk 22.1-2; Jn 11.45-53)*

<sup>1</sup> Rani mo rua mo lo toho vara i tikeli na pongi rani Passover peresi rani atu la lo hani na pereti hinia sei mo sopo te isi hinia. Pŗis aulu peresi na tamlohi vujangi mata leu la lo aleale malele vara la pa tauri luhu Iesu hinia vara la vilimateia. *Exo 12.1-27*

<sup>2</sup> Matan lara, "Ra sopo eři vaia hin rani tavera sei matan tamlohi la pa levutiřa."

*Hařai Matea Mo Rengi Na Hasori Hin Iesu*

*(Mt 26.6-13; Jn 12.1-8)*

<sup>3</sup> Iesu mo pa lo toho Bethany na iman Simon, tuai enia tamlohi leproso matea, ale lara la pa lo hanhahi na tep, hařai matea mo sinai isana, mo lavi na potele hasori matea la vaia na lepa hijana alabaster, hasori řuhu mo lo toho na lolona la tovia nard ponana mo řuhu ale volina mo aulu jea. Hařai atu mo lavia mo kosahi na řalo potelena, ale mo rengia na patun Iesu. <sup>4</sup> Tamlohi hai la lo toho atu la rongo mo sati matana, la lo vere isara hasera lara, "Mata sava mo rengi komokomoi hasori sei sohena? <sup>5</sup> Volina mo sohena voli voko nona tamlohi matea mata tauni matea! Vara i hařehia i pa eři sile na volina isana tilavono." La savurahi hařai atu.

<sup>6</sup> Pani Iesu mo vere mara, "Eh, ha tinařihi hařai sei. Mo lo vai na hina řuhu matea isaku. <sup>7</sup> Tamlohi tilavono la pa lo toho tarea isamim, ale vara ka opoia ha pa eři tuenira. Pani enau, a pa sopo toho tarea isamim. <sup>8</sup> Hařai nike mo vai na sava i eři vaia isaku. Mo rengi na hasori na epeku mo vaia mo tatamahu mata noku tavuni mata

noku mateia. <sup>9</sup> Varaŕuhu na vereā isamim, sava hināu haŕai nike mo vaia isaku la pa sorahia na jara tari na varama mata ŕomŕomia vara la vere na Retiŕuhu matakū.”

*Judas Mo Turuposi Hin Iesu*  
(Mt 26.14-16; Lk 22.3-6)

<sup>10</sup> Judas Iscariot, vonan la tupu sangavulu ŕomana mo rua atu matea, mo vano isana pŕis aulu nona tavitavin Israel, matan vara i tau Iesu na limara. <sup>11</sup> Pŕis aulu la avulahi jea matana, ale la retitauhi vara la pa voli Judas matana. Judas mo tapulo aleale masapa vara i pa sile Iesu i vano isara hinia.

*Hanhani Passover*  
(Mt 26.17-25; Lk 22.7-14, 21-23; Jn 13.21-30)

<sup>12</sup> Na rani tiroma mata pereti sei mo sopo te isi hinia sei la lo sile na natu sipsip mata Passover sohen malamalai hinia, tamlohi usuri non Iesu la vereā isana lara, “Eh! Ko opoia vara kama pa tatamahu mata hani na Passover epu?”

<sup>13</sup> Mo ŕule na nona tamlohi usuri tupra rua, mo vereā isara mara, “Ha vano ha unu Jerusalem, ale ha pa hite na tamlohi matea mo lo soloti na jara wai tavera matea, ale ha usuria.

<sup>14</sup> Ale sava ima i pa unu hinia, ha vere na tamlohin ima atu vara, “Tija mo usia mara, sava jara ko tatamahunia moiso matakū vara a pa hani na Passover hinia peresi na noku tamlohi?” <sup>15</sup> I pa vujangi kamim na jara matea mo lo toho aulu hin ima atu. Mo tatamahuni na hināu tari moiso. Ha tatamahuni na haŕa hināu ea.”

<sup>16</sup> La tamlohi usuri tupra rua atu la malue la sivo hin taon tavera atu, ale hināu tari mo masese sohena Iesu mo vereā, ale la tatamahuni na hanhani mata Passover ea.

*Hare I Pa Turuposi*

<sup>17</sup> Ale mara mo ravravi, Iesu mo sahe hin ima atu peresi la tupu sangavulu ŕomana mo rua atu. <sup>18</sup> La sakele ŕalihi na tep la lo hanhani, ale Iesu mara, “Varaŕuhu, vonamim

matea i pa turuposi hiniau, enia vonamim matea sei mo lo hanhani peresiau nakerihi.” *Psa 41.9*

<sup>19</sup> Nona tamlohi la tapulo rongo mo sati, ale enira hatehateahi la lo usia isana lara, “Hare, enāu teni mo vono?”

<sup>20</sup> Iesu mo vereā mara, “Vonamim matea la tupu sangavulu ŕomana mo rua, ale enia mo lo seseri peresiau nakerihi. <sup>21</sup> Matan Natun Tamlohi i pa vano sohena Retiulia mo vereā moiso matana. Pani rani sasati tavera isan tamlohi atu sei mo turuposi hiniau. I pa mele ŕuhu jea vara i sopo vora.”

*Retitauhi Paro*  
(Mt 26.26-30; Lk 22.14-23; 1Co 11.23-25)

<sup>22</sup> La pa lo hanhani, Iesu mo lavi na pereti, mo vere meje matana, mo topea mo silea isana nona tamlohi ale mara, “Ha lavia. Harihi enia epeku!”

<sup>23</sup> Mo mele lavi na paniken waen, mo vere meje isan God matana, moiso mo silea isara, ale enira isoiso la inua hinia. <sup>24</sup> Moiso, mo vereā isara mara, “Harihi enia ŕaeku sei i pa roro mata tamlohi matuvana matan vara i vai na retitauhi paro non God peresi na nona tamlohi i turu. *Jer 31.31-34*

<sup>25</sup> Varaŕuhu na vereā isamim, a pa sopo eŕi mele inu te waen i tikeli rani atu a pa mele inua peresi kamim hin mauri atu God mo aulu hinia.” <sup>26</sup> La lalavete na vete matea moiso, la malue la sahe na Vuti talu Olive.

*Peter I Pa Vunvuni Iesu*  
(Mt 26.31-35; Lk 22.31-34; Jn 13.36-38)

<sup>27</sup> Na malele Iesu mo vereā isara mara, “Kamim mo isoiso ha pa rovo hiniau, matan Retiulia non God mo vereā mara, ‘A pa vili na tavui sipsip.

Sipsip la pa rovo.’ *Zec 13.7*

<sup>28</sup> Pani hitahu vara na mele turu na mateia, a pa vano tiroma hin kamim Galilee.”

<sup>29</sup> Peter mo vereā isana mara, “Hina purongo vara enira mo isoiso la rovo hiniho, enāu i vono!”

<sup>30</sup> Iesu mo vereā isan Peter mara, “Varaʻrūhu na vereā isam, o pa vunvuniau vaha tolu nohorihī na vutepongi, moiso toa i pa tarere vaha rua.”

<sup>31</sup> Pani Peter mo reti ʻrīlangi mara, “Vara a pa mate peresiho, i pa sohena! A pa sopo eʻrī vunvuniho!” Enira mo isoiso la vereā sohena.

*Mo Usiisi Gethsemane*  
(Mt 26.36-46; Lk 22.39-46)

<sup>32</sup> La sahe na jara la tovia Gethsemane, Iesu mo vereā isana nona tamlohi usuri mara, “Ha lo sakele nīke tako. Enau a sahe a usiisi.” <sup>33</sup> Mo lavi Peter, James, John la vano peresia, ale mo tapulo rongo mo sati tavera jea, ale ʻrōmina mo sopo sakele. <sup>34</sup> Ale mo vereā isara mara, “ʻRōmiku mo jovi tavera vara a mate matana. Ha lo toho peresiau, ha sopo juruvi!”

<sup>35</sup> Mo mele vano makomona, mo jovi sivo na lepa mo usiisi isan God mara vara te malele tinapua, i pa sopo vano hin nona rani ʻrīlangi nīke. <sup>36</sup> Ale Iesu mara, “Tata! Tamaku! Ko eʻrī vai na hinau tari. O lavi naʻrīhi na noku rani ʻrīlangi nīke, pani o sopo vaia sohena masaloku, pani sohena masalom.”

<sup>37</sup> Mo mele sinai mo hite Peter la juruvi ʻrōmaliho. Mo vereā isan Peter mara, “Simon, varaʻrūhu ko lo juruvi? O sopo eʻrī kilau peresiau matan te matan alo hatelete purongo?” <sup>38</sup> Ha lo kilau! Ha lo usiisi, matan vara ha pa sopo jovi na vaihite. Tanumemim mo opoia vara i ololo, pani masalomim mo ʻrīlangi jea.”

<sup>39</sup> Moiso, mo mele sahe vara i usiisi, mo mele vere la nona reti atu tiroma. <sup>40</sup> Mo mele sinai, mo mele vileia vara la mele juruvi moiso, ale matan matara mo puhoni, la sopo eʻrī ʻfaramia.

<sup>41</sup> Iesu mara mo mele mai hatoluna, mo vereā isara mara, “Varaʻrūhu ka pa lo juruvi, ka pa lo mapu? Mo isoiso natu, la tau Natun Tamlohi na lima tamlohi hehe natu. <sup>42</sup> Ha turu! Ra vano! Ka hitea, noku meresahi mo lo mai moiso.”

*La Taurilati Iesu*  
(Mt 26.47-56; Lk 22.47-53; Jn 18.1-11)

<sup>43</sup> Iesu mo pa lo retireti Judas vonan la tupu sangavulu ʻrōmana mo rua atu matea mo pala isara peresi na vao tavera matea, la mai la lo lavi na sita mata valum peresi na nalnal. Pʻrīs aulu peresi na tamlohi vujangi mata leu peresi na vajiahara natu la ʻrūlera la mai isan Iesu. <sup>44</sup> Ale tamlohi atu mo lo turuposi hinia mo vereā na matamata matea isara moiso mara, “Tamlohi atu a pa pungosia, enia tamlohi atu natu. Ha tauria, ha lavia i vano.”

<sup>45</sup> Judas mo kakau jara atu, mo vano isan Iesu mo vereā mara, “Tija.” Ale mo pungosia. <sup>46</sup> Ale la tamlohi atu la mai la tauri Iesu. <sup>47</sup> Pani vonara matea sei mo lo turu atu mo lavi na nona sita vuro mo langai naʻrīhi na pero volitusi non pʻrīs aulu.

<sup>48</sup> Iesu mo vereā isara mara, “Ka mai peresi na sita peresi na nalnal sohena vara enau tamlohi vili tamlohi mata vavanaho matea?” <sup>49</sup> Tarea na lo toho peresi kamim na lolo Temple na lo vujangi, pani ka sopo tauriau. Pani i pa sohen harihi matan vara Retiulia i pa masese matakū.”

<sup>50</sup> Nona tamlohi la malue isana, ale la rovo. <sup>51</sup> Uluvou matea mo lo usuri Iesu, enia mo lavolavo purongo, ale la tauria, <sup>52</sup> pani la lo taurilati na nona ruru purongo, ale mo tinaʻrīhira mo rovo malamala.

*Iman Pʻrīs Aulu*  
(Mt 26.57-68; Lk 22.54-55, 63-71; Jn 18.13-14, 19-24)

<sup>53</sup> La lavi Iesu mo vano na iman pʻrīs aulu. Ale moli nona pʻrīs tari peresi na vajiahara peresi na tamlohi vujangi mata leu la matavuhi jara matea. <sup>54</sup> Ale Peter mo lo usuri Iesu asau makomona mo sivo vahatea na lolo ropen iman pʻrīs aulu atu. Mo lo sakele peresi la tamlohi kilau matan ima atu, la lo marijo na hapu.

<sup>55</sup> Moli nona pʻrīs peresi la tamlohi tari mata council Aulu, la lo aleale tamlohi vara i vereuli te hinau hin Iesu matan vara la pa vilimateia matana, pani la sopo vilei

tea. <sup>56</sup> Tamlohi matuvana la vai na retihalu hinia, pani nora retihalu la sopo matea. <sup>57</sup> Hai la turu sahe la retihalu hinia lara, <sup>58</sup> “Kama rongoa mo vereea mara, ‘Enau a pa viliroiroi Temple nike sei tamlohi la vaia na limara, moiso na rani i tolu purongo a pa mele voroa na hina tinapua sei tamlohi la sopo voroa na limara.’” <sup>59</sup> Pani mo sohen tiroma, nora řomřomi mo sopo matea.

<sup>60</sup> Moiso nora řis aulu mo turu na livuhara, mo vereea isan Iesu mara, “Mo sopo te nom retireti vara o vereea matan la retireti nike? Sava nahai, la tamlohi nike la lo vereulia matam?” <sup>61</sup> Pani Iesu mo sopo langati na jingona, ale mo sopo řaramia. řis aulu atu mo mele usia vahatea mara, “Engko natu Křisto atu, Natun God teni mo vono?”

<sup>62</sup> Iesu mo řaramia mara, “Enau natu, ale ha pa hite Natun Tamlohi i pa sakele na tavalu liman God na jara mata suiha, ale ha pa hite Natun Tamlohi i mele mai na telangi matan tuka.”

*Dan 7.13*

<sup>63</sup> Ale řis aulu mara mo rongoa sohena, mo hasena řari na nona ruru, ale mo vereea mara, “Mata sava řa pa lo mele aleale retireti vara řa pa tuvaia hinia? Enia hasena mo vereea!” <sup>64</sup> Ka pete rongoa sohena sava mo vereea moiso vara enia God. Ha pa vai na sava?” Enira mo isoiso la vereea lara i mate.

<sup>65</sup> Hai la tapulo litovia, hai la tatavuhoro na nahona la tutuhia, ale la usia isana lara, “Vara engko řřovet matea, o to vereea vara hare natu mo tutuhiho?” Ale tamlohi kilau sohena lara la lavia mo vano la tutuhia.

#### *Peter Mo Vunvuni Iesu*

*(Mt 26.69-75; Lk 22.56-62; Jn 18.15-18, 25-27)*

<sup>66</sup> Hinau atu mo lo masese, Peter mo lo toho atano na lolo rope matan ima atu na jingoima. Ale volitusi hařai matea non řis aulu mo mai, <sup>67</sup> mara mo hite Peter mo lo marijo, mo lo kilau mamahunia, ale mara, “Engko vonara matea ko lo usuri Iesu mara Nazareth!”

<sup>68</sup> Pani Peter mo vunvunia, ale mara, “Na sopo levosahia teni a levosahi na sava ko lo vereea.” Mo malue atu mo vano mo turu na mataruan rope atu, ale toa mo tarere.

<sup>69</sup> Pa hařai atu mo mele hite Peter mo lo turu atu ale mo vereea isana tamlohi mara, “Tamlohi aturihi enia vonara matea!”

<sup>70</sup> Peter mo mele vunvunia.

Ale tamlohi hai la lo turu atu la vereea isan Peter lara, “Varařuhu engko vonara matea matan engko mara Galilee!”

<sup>71</sup> Pani Peter mo tapulo lesati hinia hasena, mo varakali ale mo vereea mara, “Na sopo levosahi tamlohi nike ka lo vereea.” <sup>72</sup> Ale vahatea purongo, toa mo tarere haruana. Peter mo mele řomřomi na reti non Iesu sei mara, “Engko o pa vunvuniau vaha tolu, moiso toa i pa tarere vaha rua.” Moiso řomin Peter mo jovi tavera, ale mo tangi tavera.

## 15

### *Iesu Enia Pilate*

*(Mt 27.1-2, 11-14; Lk 23.1-5; Jn 18.28-38)*

<sup>1</sup> Na řalavuhu jea, moli mata řis peresi na vajiahara tolu na tamlohi vujangi mata leu peresi na tamlohi mata council tari la matavuhi vara la vai te řomřomi. La lasi Iesu la lavia mo vano la taua na liman Pilate, tamlohi aulu nona gavman matan Rome.

<sup>2</sup> Ale Pilate mo usia mara, “Engko Supe nona Jew?”

Iesu mo vereea mara, “He'e, mo sohen ko vereea.”

<sup>3</sup> Moli nona řis la tuvaia na retireti matuvana. <sup>4</sup> Pilate mo mele usi Iesu vahatea mara, “Mata sava ko sopo talaira? Ko hitea, la lo tuvaiho na hina sati matuvana!” <sup>5</sup> Pani Iesu mo sopo mele řaramia, ale Pilate mo mařurahi jea.

### *Pilate Mo Ari Iesu*

*(Mt 27.15-26; Lk 23.13-25; Jn 18.39--19.16)*

<sup>6</sup> Tarea na hanhani tavera mata Passover, Pilate mo lo teri na tamlohi matea na ima řilangi sei enira la opoia. <sup>7</sup> Vonara matea hin la haratu la lo toho na ima řilangi hin

rani atu, hijana Barabbas. Enia mo lo toho atu matan mo vilimateia na tamlohi matea na rani la turu mata valum mata jarara. <sup>8</sup> Vao atu la mai isan Pilate ale la usia vara i mele vaia sohen tarea mo lo vaia isara. <sup>9</sup> Ale Pilate mo usia isara mara, “Ka opoia vara a tinarihi Supe nona Jew nike teni mo vono?” <sup>10</sup> Matan Pilate mo levosahia vara la pa lavi Iesu mo mai isana mata nora mereimerei purongo. <sup>11</sup> Pani moli nona pris la haluhalu na tamlohi mata usi Pilate vara i teri Barabbas na jaran Iesu. <sup>12</sup> Ale Pilate mo mele usia isara vahatea mara, “Vara i sohena, a pa vai na sava hin tamlohi nike sei ka lo tovia vara enia Supe nona Jew?”

<sup>13</sup> La mele ngara lara, “O vosaea na talopeilopei!”

<sup>14</sup> Pilate mo mele usira hinia mara, “Sava hinau natu mo vaia mo sati?”

Pani la mele ngara mo rilangi jea lara, “O vosaea na talopeilopei!”

<sup>15</sup> Ale matan Pilate mo opoia vara i vai vao atu i avulahi, mo teri Barabbas sohen la usia. Ale mo retileu vara la rupi Iesu, moiso mo taua na lima tamlohi vuro nona mara Rome vara la vosaea na talopeilopei.

#### *La Vailejeji Iesu*

(Mt 27.27-30; Jn 19.2-3)

<sup>16</sup> La tamlohi vuro atu la tiroma hin Iesu la unu na lolo nora patu ima mata vuro non Pilate. La tovi vevuhi na vao tamlohi vuro la mai na jara matea. <sup>17</sup> La mai la rua na ruru perpel matea, ale la viriviri na asi ngaŋngaŋiha matea sohena rongorongo nona supe, ale la taua na patuna. <sup>18</sup> La tapulo salute isana la lo vereea lara, “Tamlohi tavera, engko Supe nona Jew!” <sup>19</sup> La lo tamaji na patuna na apo matea. La lo litovia, ale la lo popovitoho isana sohena vara la lo lotua. <sup>20</sup> Lara la kerehia moiso la mele lavi narihi pa ruru perpel atu isana, ale la mele rurua na nona ruru. Ale la tiroma hinia la vano vara la vosaea na talopeilopei.

#### *Simon Mara Cyrene Matea Mo Tueni Iesu*

<sup>21</sup> Ale mara Cyrene matea, hijana Simon, enia tamana Alexander enia

Rufus, mo pa lo tai purongo asau rove na jara vutivuti mo lo sinai na malele, ale la ngurunguru hinia vara i soloti na talopeilopei non Iesu.

#### *La Vosae Iesu Na Talopeilopei*

(Mt 27.31-44; Lk 23.27-43; Jn 19.17-27)

<sup>22</sup> La lavi Iesu mo sahe hin jara atu sei la tovia ‘Golgotha’, raramin hija sei enia ‘Jara Sui Patu Tamlohi’. <sup>23</sup> La vaihitea vara la sile na waen la hoihoia peresi na myrrh, pani mo rohu hinia. <sup>24</sup> La vosae Iesu na talopeilopei, moiso la tamlohi vuro atu la roro mata nona ruru na taes matan vara la vileia vara hare natu i pa lavi na sava nona ruru. *Psa 22.18*

<sup>25</sup> Matan alo mo limaravati na ralavuho natu la vosaea na talopeilopei hinia. <sup>26</sup> La uli na reti matea mata nona aria na tavalu tapea matea la vosaea aulu na patuna mo vereea vara,

#### **Supe Nona Jew**

<sup>27</sup> La vosae na tamlohi vili na tamlohi mata vavanaho tupra rua na tavalun Iesu. Matea na matuana, ale matea na marauna. *Isa 53.12*

<sup>28-29</sup> Tamlohi sei la lo hahau hin malele atu la lo taŋa sahe la lo kerehia, ale la lo pulapulahi na patura, la lo vereea lara, “Ko vara, vara o pa vilijovjovi na Temple, ale o eri mele voroa rani i tolu? *Psa 22.7; 109.25*

<sup>30</sup> Vara mo sohena, o hasem juriho o sevuti hin talopeilopei sei!”

<sup>31</sup> Moli nona pris peresi na tamlohi vujangi mata leu sohena la lo vaivaia isara hasera lara, “Mo lo juri na tamlohi tinapua, pani enia i sopo eri hase juria! <sup>32</sup> Vara engko Kŋristo, Supe non Israel, o sevuti na talopeilopei nakerihi matan vara kama pa hitea ale kama rasuho!” La tamlohi atu sei la vosaea na pahisan Iesu sohena, la lo kerehia.

#### *Iesu Mo Mate*

(Mt 27.45-56; Lk 23.44-49; Jn 19.28-30)

<sup>33</sup> Na livuha rani, roŋoŋa tavera mo jovi mo tavuni na jara tari, mo lo toho mo tikeli na matan alo mo tolu na ravravi. <sup>34</sup> Na matan alo mo tolu, Iesu mo tangi na ulo tavera matea

mara, “Eloe, eloe, lema sabatani?” Raramina reti sei enia ‘Noku God, noku God, mata sava ko posi na nahom isaku?’ *Psa 22.1*

<sup>35</sup> Tamlohi hai la lo turu atu lara lo rongoa, lara, “Ka hitea! Mo lo tovi Elijah!”

<sup>36</sup> Tamlohi matea mo maro mo vano mo lavi na tavalu ruru matea la řuřunia na waen hohona mo pesia na apo matea, ale mo sohaia sahe isan Iesu vara i inua. Vonara matea mara, “Tako, řa pa hitea vara Elijah i pa mai i lavi nařihia na talopeilopei i sivo atano teni i vono.” *Psa 69.21*

<sup>37</sup> Iesu mo mele ulu tavera vahatea, ale maromaronana mo isoiso.

<sup>38</sup> Ruru tavera atu mo lo toho horo na Jara Tapu atu na lolo Temple mo mařari hasena tavaluna mo rua, mo mařari mo tapulo aulu mo sivo atano. <sup>39</sup> Moiso captain mata tamlohi vuro atu sei mo lo turu tataholo na nahon Iesu, mara mo hitea sohena sava mo mate mo vereea mara, “Varařuhu, tamlohi nike enia Natun God tataholo!”

<sup>40</sup> Hařai hai la lo turu asau makomona la lo kilau vano na talopeilopei. La hařai sei la tupu tolu, Mary Magdalene, Salome, Mary tinan uluvou sei James peresi Joses.

<sup>41</sup> La hařai sei la lo usuri Iesu na rani mo lo toho Galilee, ale la lo kilaua. Vao hařai matuvana sohena, enira tolu natu la lo usuria la sinai Jerusalem.

### *Joseph Mo Tavunia*

*(Mt 27.57-61; Lk 23.50-56; Jn 19.38-42)*

<sup>42</sup> La hinau sei la masese na Fridayravravi, enia rani mata tatamahu mata nora Sabbath. <sup>43</sup> Joseph mara Arimathea, enia tamlohi aulu matea mata nora council tavera, ale enia matea sei mo lo kilau toho matan mauri atu God mo aulu hinia vara i pala. Ale řomina mo řilangi mo mai mo turu na nahon Pilate mo usia vara i lavi na tarapen Iesu.

<sup>44</sup> Pilate mo rongoa vara Iesu mo mate vila, moiso mo mařurahi tavera matana. Pilate mo tovi na nona captain mata tamlohi vuro matea, mo

usia mara, “Varařuhu, Iesu mo pete mate moiso?” <sup>45</sup> Captain atu mo vere Pilate hinia mara varařuhu mo mate moiso. Pilate mo vereea isan Joseph mara i eři lavi na tarapen Iesu.

<sup>46</sup> Joseph mo vano mo voli na ruru lulu matea. Mo juri na tarapen Iesu aulu na talopeilopei mo sivo atano. Mo leputia na ruru. Mo lavi na tarapen Iesu mo taua na papa vatu matea enia mo taia. Mo tai na pelatina vatu tavera matea vara mafaruana. <sup>47</sup> Mary Magdalene enia Mary tinan Joses la hite jara atu la tau na tarapen Iesu ea.

## 16

### *Iesu Mo Mele Turu Na Mateia* *(Mt 28.1-8; Lk 24.1-12; Jn 20.1-10)*

<sup>1</sup> Saturday na ravravi jea na isoison rani mapu atu, Mary Magdalene, Mary tinan James enia Salome, la vano la voli te hasori řuhu vara la pa vano la taua na tarapen Iesu vara i mele rani sahe. <sup>2</sup> Sunday řalavuhu jea alo mo pa lo tapulo vele purongo, la vano hin papa vatu atu. <sup>3</sup> La pa lo vano la lo vereveea isara lara, “Hare i pa tueniřa vara i kuresi nařihi vatu atu na mataruan papa atu?” <sup>4</sup> Ale lara la tařa sahe aulu, la hite vatu tavera atu la pete kuresi nařihia moiso. <sup>5</sup> La sahe la unu hin papa atu ale la hite na uluvou matea, mo ru na ruru lulu mo lo sakele na matuana, ale la hutura hinia. <sup>6</sup> Ale mo vereea isara mara, “Ha sopo matahu! Ka lo ale Iesu mara Nazareth haratu sei la vosaea na talopeilopei? Mo turu na mateia moiso, enia mo sopo toho nike. Ha to hite na jara sei la taua hinia. <sup>7</sup> Pani ha vano ha vereea isana nona tamlohi usuri peresi Peter, ha verera vara Iesu mo vano Galilee tiroma hin kamim moiso. Ha vano ha pa hitea ea sohen mo lo vereea isamim tiroma moiso.”

<sup>8</sup> La hařai atu lara la malue la rovo hin papa atu matan matahu mo sohonira ale la savaravara. La sopo vere te hinau isan tea matan la matahu.

*e Tiroma Isoison Mark -*  
*(Mt 28.9-10; Jn 20.11-18)*



Ale la vere vevuhi na hinau tari isan Peter peresi na tapalana. Hitahuna Iesu mo řulera la vano na varama, la vano Opae mo sivo mo tikeli Marino, la lavi nona Retiřuhu tapu mata juri sei mo lo sile na mauri tui sei i sopo eři tihai hin te rani. Amen.

*e Harua Isoison Mark -*

*Mary Magdalene*

<sup>9</sup> Iesu mo mele turu na Sunday na řalavuho jea, ale Mary Magdalene natu enia hařai tiroma mo hitea, enia natu Iesu mo titiu nařihi na tanume sasati mo limaravrua isana. <sup>10</sup> Hitahu Mary mo vano mo vere isana nona tamlohi usuri sei la lo rongo mo sati ale la lo tangisia. <sup>11</sup> Pani lara la rongoa vara Mary mo hite Iesu mo mele mauri, la sopo rasua.

*Nona Tamlohi Mo Rua La Hite Iesu (Lk 24.13-35)*

<sup>12</sup> Hitahun la hinau atu Iesu mo mele pala isana tupra rua sei la lo hahau mata jara tinapua matea, pani la sopo hitevosahia matan mo posi na nahona. <sup>13</sup> Hitahuna lara la hitevosahia la mele hilu vilavila la sahe vara la vere isana tatuara, pani tea i sopo rasura.

*Iesu Mo Turu Na Livuhara (Mt 28.16-20; Lk 24.36-49; Jn 20.19-23; Acts 1.6-8)*

<sup>14</sup> Hitahuna Iesu mo pala isan la tupu sangavulu řomana matea atu lara la lo hanhani. Ale mo reti řilangi isara matan mo sopo te nora rasua, ale mata řomira mo řilangi jea. Mo reti řilangi sohena matan la sopo rasu la haratu sei la hitea vara mo mele mauri.

<sup>15</sup> Ale mo vere isara mara, “Ha vano na jara tari na varama, ale ha vereuli na noku Retiřuhu isana tamlohi tari. <sup>16</sup> Sava tamlohi mo rasua ale mo paptijo, God i pa juria, pani haratu mo sopo rasua, God i pa aria.

<sup>17</sup> God i pa sile la matamata tavera ak-erihhi natu i usuri la haratu la rasuau: na hijaku la pa eři titiu nařihi na tanume sasati, ale la pa eři retireti na leo paro tinapua, <sup>18</sup> ale la pa tauri na

mata sasati jea na limara, ale vara la inu te wai mata vilimatei na tamlohi la pa sopo eři mate matana. La pa tau na limara na tamlohi rojoa moiso ale nora rojoa i tihai.”

*Iesu Mo Sahe Aulu Na Tuka (Lk 24.50-53; Acts 1.9-11)*

<sup>19</sup> Iesu mara mo vere la hinau atu isara mo isoiso, God mo lavi nařihi mo sahe aulu na tuka, ale mo sakele na jara mata suiha na matuan God. <sup>20</sup> Ale nona tamlohi usuri la vano la retivujavujangi na jara hatehateahi. Moli Iesu mo lo tuenira na nora vavahinau, ale mo vujangia vara nora reti mo tai isana na mata-mata matuvana.

**Retiruhu Hin Iesu Krīsto**  
**Luke**  
**Mo Ulia**  
**Puku Nike**

Opoia non God enia mata tamlohi tari! Iesu mo mai na varama matan enia Jujuri nona tamlohi tari. Vujangi hai o efi hitera hin puku nike purongo, te hinau sohen harihi Luke mo ulia: Mara Samaria matea (10.25–37), Sipsip mo jalio (15.1–7), Uluvou atu mo jalio (15.11–32). Luke mo vereulia vara Iesu mo lo toho na iman Zacchaeus (19.1–10), ale mo uli retitauhi atu sei Iesu mo lo silea isan tamlohi sasati atu na talopeilopei (23.39–43).

Luke mo vere na vavahinau non Tanume Tapu mo jeu na tinapua. Mo ulia mara Tanume Tapu mo lo toho peresi John Tamlohi Paptijo na rani mo vora (1.15), isan Mary (1.35), ale sohen sava Iesu mo usuria (4.1, 14, 18; 10.21), Iesu mo vujangia vara Tanumen God enia otori atu mo jeu na tinapua God i pa silea isana tamlohi (11.13).

Luke mo ulia vara Iesu mo lo romromi na tilavono, mo sile na Retiruhu non God isara (4.18; 7.22), la pa lavi na hina ruhuruhu isana (6.20), God mo usi na tilavono na nona hanhani tavera (14.13, 21), tilavono atu Lazarus mo sahe na tuka peresi na angelo (16.20, 22), ale Iesu mo retileu vara nona tamlohi usuri la lo sile na mania isana tilavono (12.33).

Luke mo vereulia mata sava mo uli puku nike ale mara, “enau sohen na usuri mamahuni la hinau sei mo tapulo na tapulona, matan vara o pa efi levosahi mamahunia vara la hinau sei la vujangiho hinira moiso la varaŕuhu.” (1.3–4) Luke mo vujangia vara Iesu mo usiusi na rani mo opoi na tueni non God: hin rani atu mo paptijo (3.21), hin rani atu mo viŕoni na nona tamlohi usuri (6.12), mo usiusi matan retiusia atu lara enia hare (9.18), hin rani atu mariviti i mate (23.34, 46), ale nona vujangi mata usiusi (11.5–9; 18.1–8,

9–14), ale vara nona tamlohi la pa sile na mania isana tilavono (12.33). Luke mo opoia vara tamlohi la levosahi mamahunia vara Iesu mo mele turu na mateia, mo ulia vara Iesu mo hani te maji hin rani atu matan enia tamlohi matea mo sopo nunua tamlohi purongo (24.42–43).

*Hin puku nike*

1. Mata sava Luke mo uli puku nike (1.1–4)
2. Rani vora non Iesu, John tamlohi paptijo mo pala (1.5–2.52)
3. Retisohai non John tamlohi paptijo (3.1–20)
4. Paptijo peresi na vaihite non Iesu (3.21–4.13)
5. Vavahinau non Iesu Galilee (4.14–9.50)
6. Iesu mo malue Galilee mo sahe Jerusalem (9.51–19.27)
7. Isoiso wik non Iesu: Nona mateia (19.28–23.56)
8. Iesu mo mele mauri (24.1–12)
9. Iesu mo pala, mo sahe na tuka (24.13–53)

*Reti Tiroma Non Luke*

<sup>1</sup> Enau Luke, na uli reti nike isam tamlohi tavera Theophilus. Tamlohi matuvana la vaihitea vara la uli na sorasora mata sava mo masese isaŕa mo tikeli nake, <sup>2</sup> sohen la sorasora atu ŕa lavia isan la haratu enira la hitea na matara, ale enira la volitusi mata reti non God mo tapulo na tapulona. <sup>3</sup> Ale matana, enau sohen, mo tataholo vara a uli na hinau tari sei la masese na tapulona mo sinai nake isam tamlohi tavera ruhuruhu Theophilus, matan enau sohen na usuri mamahuni la hinau sei mo tapulo na tapulona, <sup>4</sup> matan vara o pa efi levosahi mamahunia vara la hinau sei la lo vujangiho hinira moiso la varaŕuhu.

*Angelo Gabriel Mo Pala*

<sup>5</sup> Na rani non Herod supe non Judea, pŕis matea hijana Zechariah enia mo tai na vao pŕis non Abijah, ale narouna sohen, enia mahapin Aaron, hijana Elizabeth. <sup>6</sup> Ale la tupra rua sei maurira la tataholo mo ruhu na nahon God. La lo ololo

mamahu na nona retileu peresi na leu tari, ale tea i sopo eři tuvaira hin te hinau. <sup>7</sup> Pani mo sopo te natura matan Elizabeth mo aroaro, ale la vajiaha moiso.

<sup>8</sup> Na rani matea, hinau matea mo maseše isana hin rani atu mo lo voko peresi na nona vao pŕis na Temple non God. <sup>9</sup> Vao pŕis atu la viřonia usuri na nora posposi mata viřoni sohen la lo vaia tarea vara i unu na Temple non Moli vara i suli na hasori ea. <sup>10</sup> Ale rani tataholo mata suli na hasori mo mai, vao tavera mata lotu la lo pulutahi mata usiusi na jingoima.

<sup>11</sup> Zechariah mo lo toho atu, ale angelo non Moli matea mo pala isana, mo turu na matua votavota mata suli na hasori. <sup>12</sup> Zechariah mara mo hite angelo atu mo hutua, ale matahu tavera mo sohonia. <sup>13</sup> Pani angelo atu mo vereā isana mara, “Zechariah, o sopo matahu! Nom usiusi God mo rongoa moiso, ale naroum Elizabeth i pa vasusui na natum lamane matea, ale o pa tau na hijana vara John. <sup>14</sup> Ale i pa vaiho o avulahi, o avulahi tavera jea, ale tamlohi matuvana sohena, la pa avulahi na nona rani vora, <sup>15</sup> matan God i pa silea na vavahinau matea mo aulu jea. I pa sopo inu na waen teni te wai řilangi tinapua hin te rani, ale Tanume Tapu i pa mařivisia i tapulo na lolo pangen tinana. <sup>16</sup> Ale enia i pa posi na natun Israel matuvana la mele mai isan Moli nora God. <sup>17</sup> Ale enia i pa vano tiroma hin Moli hin suiha atu Tanumen God mo silea isan pŕovet Elijah, matan vara i posi na řomřomi nona tama vara la řomřomi na natura, ale la haratu la sopo oloolo hin God la usuri na posposi nona tamlohi tataholo, matan vara i vai na vao tamlohi matea la tatamahu matan Moli.” *Mal 4.5*

<sup>18</sup> Ale Zechariah mo vereā isan angelo atu mara, “Avei, sohena sava natu a pa eři levosahia vara i pa sohen ko lo vereā? Matan enau na vajiaha moiso, ale taunin narouku mo jeu na rani mata nona tatape moiso.”

<sup>19</sup> Ale angelo atu mo řaramia mara, “Enau Gabriel, haratu sei mo lo turu na nahon God, ale God mo řuleau vara a sinai isam vara a vereho hin retiřuhu nike. <sup>20</sup> Ale nakerihi, o pa mengo, o sopo eři vere te reti vavano i tikeli rani atu i maseše matan ko sopo rasu na noku reti, sei la pa maseše na ranira tataholo.”

<sup>21</sup> Ale vao tamlohi la lo saovi Zechariah na jingoima, ale la lo řomřomia vara mo pa lo toma na lolo Temple. <sup>22</sup> Ale mara mo malue, mo sopo eři retireti isara, ale la hitevosahia vara God mo vujangia na hinau matea na lolo Temple, ale mo lo vai na matamata nakonako isara, ale mo sopo eři retireti.

<sup>23</sup> Ale nona rani mata vavahinau mo isoiso, ale mo mele mule. <sup>24</sup> Hitahun la rani atu, narouna Elizabeth mo tau natuna, ale mo luhu mata vitu mo lima mara, <sup>25</sup> “Moli mo řomřuhu isaku, mo lavi nařihi na noku mahanuhanu mata aroaro na tamlohi.”

#### *Retisohai Matan Iesu*

<sup>26</sup> Elizabeth mo epe puhoni mata vitu mo limarave moiso, ale God mo řule pa angelo atu, Gabriel vara i sivo Nazareth, vanua matea hin Galilee, <sup>27</sup> mo sivo isana hařai maevo matea hijana Mary. La tauhoroa moiso vara i pa lahi vano isana tamlohi matea hijana Joseph, enia mahapin Supe David matea. <sup>28</sup> Gabriel mo pala isana mara, “Raniřuhu isam, engko hařai matea God mo řomřuhu isam mo tavera jea! Moli mo lo toho pereiho.” <sup>29</sup> Pani Mary, řomina mo tuturahi hajavua hin retireti atu, ale mo vaihitea vara i levosahi na řaramin retioloolo atu. <sup>30</sup> Ale angelo atu mo vereā isana mara, “O sopo matahu! Mary, matan na masalon God mo opoia vara i řuhu isam. <sup>31</sup> Ale mo tapulo nake, o pa tau natum, ale o pa tape na lamane matea, ale o pa tau na hijana vara Iesu. <sup>32</sup> Enia i pa tamlohi aulu jea, ale la pa tovia Natun God, sei mo aulu jea. Ale Moli God i pa silea na suiha nona supe non tamana Supe David. <sup>33</sup> Enia i pa tauri na suiha vara

i aulu na vaon Israel tui tui, ale i pa sopo te isoiso rani mata nona tauri na suiha.”

<sup>34</sup> Mary mo usia isan angelo atu mara, “Hinau atu i pa mai sohena sava, matan enau haʻrai maevo matea?”

<sup>35</sup> Angelo atu mo ʻraramia mara, “Tanume Tapu i pa mai hiniho, ale suihan God Aulu jea i pa hohoviho; ale matana, natirihī sei i pa vora i pa tapu, la pa tovia – Natun God. <sup>36</sup> Ale ko levosahia vara tahisam Elizabeth na nona vajiaha enia sohena, mo tau natuna lamane matea, ale vitu akerihī enia nona halimarave vitu isana haʻrai matea la vereā vara enia haʻrai aroaro matea! <sup>37</sup> Matan mo sopo te hinau hatea i ʻrilangi jea vara God i sopo eʻri vaia.”

<sup>38</sup> Ale Mary mara, “Varaʻruhu enau haʻrai slev non God purongo. Na opoia vara hinau atu i mai isaku sohena ko vereā.” Ale angelo atu mo mele malue mo vano.

#### *Mary Mo Rohi Elizabeth*

<sup>39</sup> Hitahun rani atu, Mary mo vele sahe na jara vutivuti, mo sivo vila na taon matea na lolon jara matan Judea. <sup>40</sup> Mo unu na iman Zechariah, ale mo vere na retioloolo isan Elizabeth. <sup>41</sup> Ale Elizabeth mara mo rongo na retioloolo non Mary, pipi atu na lolona mo hisu, ale Tanume Tapu mo maʻrivi Elizabeth, <sup>42</sup> mo vereā aulu mara, “Avulahi tavera jea isam mo jeu na haʻrai tinapua. God mo leʻruhu hin natirihī sei mo lo toho na lolom. <sup>43</sup> Ale enau hare vara tinan noku Moli i eʻri mai vara i rohiau? <sup>44</sup> Matan, vahatea purongo atu sei nara na rongo na nom retioloolo, pipi nike, na loloku mo hisu na avulahi. <sup>45</sup> Avulahi tavera isam matan ko rasu Moli vara i pa vai na sava mo vereā isam!”

#### *Vete Hasohaso Non Mary*

<sup>46</sup> Ale Mary mo vereā mara, “Na ʻromiku na hasohaso God mo tavera jea, <sup>47</sup> ale mauriku mo avulahi tavera hin God noku Jujuri, <sup>48</sup> matan mo kilau mai isaku nona haʻrai volitusi atano,

ale mo tapulo nake, mahapi tari la pa vereā vara avulahi tavera mo mai isaku, <sup>49</sup> matan haratu sei mo ʻrilangi jea mo vai na hinau tavera isaku, ale hijana mo tapu.

<sup>50</sup> Ale nona ʻromopoia mo vano isana mahapi tari, isan la haratu sei la lo sile na ooloo tavera isana.

<sup>51</sup> Enia mo vujangi na nona suiha, mo leputi jalajalai la haratu la mangisi na mapura.

<sup>52</sup> Mo lavi naʻrihi la haratu la lo tauri na suiha nona supe, ale mo tahe la haratu ʻromira la atano la sahe aulu.

<sup>53</sup> Mo sohoni la haratu la marohati na hina ʻruhu, pani mo ʻrule naʻrihi la haratu la tavgav la vano lekoleko.

<sup>54</sup> Mo tueni nona volitusi Israel, usuri na nona retitauhi mata nona ʻromopoia hinira,

<sup>55</sup> matan mo retitauhi vara i pa ʻromopoi isan Abraham peresi na tania na rani tui tui.”

<sup>56</sup> Mary mo lo toho atu isan Elizabeth mata vitu mo tolu, moiso mo pa mele mule vano na jarana.

#### *John Tamlohi Paptijo Mo Vora*

<sup>57</sup> Ale vitu non Elizabeth mo asi vara i lavlavi, ale mo vasusui na nona pipi lamane matea. <sup>58</sup> Ale tavgavuina peresi na tahisana la rongoa vara Moli mo ʻromʻruhu tavera jea isana, ale la avulahi peresia. <sup>59</sup> Ale na halimaravtolu rani la mai vara la vai na nona taiʻralihi. Tatuara la lo opoia vara la tau na hijana vara Zechariah vara i lavi na hijan tamana, <sup>60</sup> pani tinana mo vereā mara, “Mo vono, enia hijana John.”

<sup>61</sup> Ale la vereā isan Elizabeth lara, “Mo sopo te tavgavuim hijana i sohen haratu!” <sup>62</sup> Ale la vai na matamata hai isan tamana na limara vara sava hija natu, enia mo opoia vara i silea isana. <sup>63</sup> Ale Zechariah mo usia vara la lavi te hinau mata uliuli hinia i mai isana, ale la maʻrurahi tavera matan mo ulia mara, “Hijana enia John.” <sup>64</sup> Ale vahatea purongo memena mo

mele materi, ale mo retireti mo haso-  
haso God.

<sup>65</sup> Tahisara tari la hutura, ale la  
matahu, ale sorasora atu mo řalihi  
vevuhi na jara tari na jara vutivuti  
Judea. <sup>66</sup> Ale tamlohi tari sei la ron-  
gora la sopo levosahia vara natirihi  
atu i pa sava tamlohi pavuho natu  
matan liman Moli mo lo toho hinia.

### *Tanumen God Mo Mařivisi Zechariah*

<sup>67</sup> Ale tamana, Zechariah, Tanume  
Tapu mo mařivisia, ale mo retiman-  
govi mara,

<sup>68</sup> “Hasohaso tavera isan Moli God  
matan Israel,

matan nake mo rohi na nona  
tamlohi vara i jurira,

<sup>69</sup> God mo sileřa na Tamlohi Jujuri  
matea mo suiha tavera mo tai  
na iman nona volitusi supe  
David,

<sup>70</sup> sohena nona přovet tapu tuai la  
verea

<sup>71</sup> lara vara i pa juriřa isana nořa  
meresahi, ale na liman la  
haratu sei la řohu hiniřa.

<sup>72</sup> Mo mařivisi na nona retitauhi tapu  
sei vara i pa řomi na nomam  
pua,

<sup>73</sup> retitauhi atu mo silea  
isan tamařa Abraham vara i pa  
vaia,

<sup>74</sup> ale vara i juriřa isana nořa mere-  
sahi, ale i pa tueniřa vara řa  
volitusi isana i sopo te matahu  
isařa,

<sup>75</sup> na mauri tapu mo tataholo na na-  
hona mata nořa rani tari.

<sup>76</sup> Ale engko natuku, la pa toviho  
přovet non haratu mo aulu jea;  
matan engko o pa vano tiroma  
hin Moli,

mata vai mamahuni na male-  
lena,

<sup>77</sup> o pa vere na tamlohi sohena sava  
God i pa jurira matan i pa řomi  
na nora hehe.

<sup>78</sup> matan nořa God enia God  
mata řomi na tamlohi na nona  
řomřuhu,

matan mai non nona Jujuri mo  
sohena alo mo vele aulu mo  
sinai isařa na tuka,

<sup>79</sup> vara i mera isan la haratu

la lo toho na řořoha,  
ale na liman mateia,  
matan vara i tiromařa  
na malele mata tamata.”

### *John Tamlohi Paptijo Mo Ulua*

<sup>80</sup> Ale pa natirihi atu mo ulua, ale  
Tanume Tapu na maurina mo suiha,  
ale mo lo toho na tano koru mo tikeli  
na rani mata nona pala na naho tam-  
lohin Israel.

## 2

### *Iesu Mo Vora (Mt 1.18-25)*

<sup>1</sup> Hin pongi atu, supe nona mara  
Rome, enia Augustus, ale mo vere  
mara la evi vevuhi na tamlohi řalihi  
na jara tari sei enia mo lo tauri na  
suiha hinira na varama. <sup>2</sup> Harihi  
enia tiroma evi na tamlohi hin pongi  
atu Quirinius, tamlohi aulu matea  
mara Rome mo lo aulu hin Syria.

<sup>3</sup> Ale, tamlohi tari la vano na jarara  
tataholo vara la pa sile na hijara  
ea. <sup>4</sup> Ale Joseph mo malue Galilee  
na taon matan Nazareth mo sahe na  
taon non pin supe David sei Bethle-  
hem na jara matan Judea, matan enia  
tahisan supe David, <sup>5</sup> vara i tau na  
hijana peresi Mary, hařai atu sei mo  
tauhoroa moiso mata lahi, ale mo tau  
natuna.

<sup>6</sup> Ale hin pongi atu la pa lo toho atu,  
nona rani mo mai vara i lavilavi. <sup>7</sup> Ale  
mo vasui natuna vora tiroma lamane  
matea. Mo leputi mamahunia na  
ruru, ale mo taua sivo na puhoro  
řuvu hana maji palovati, matan mo  
sopo te mele masapa na lolon ima  
malele atu nona tamlohi la lo hahau.

### *Tavui Sipsip La Hite Na Angelo*

<sup>8</sup> Hin vutepongi atu, hin jara atu,  
na pahisan taon atu, tavui sipsip  
hai la lo toho saovi na pulara sip-  
sip na jara řuvuřuvu tavera. <sup>9</sup> Ale  
la pa hutura purongo, angelo non  
God matea mo pala isara, ale meran  
God mo merasahira, ale matahu mo  
sohoni vevuhi na epera. <sup>10</sup> Angelo  
atu mo vere isara mara, “Ha sopo  
matahu, matan enau na lavi na re-  
tiřuhu mata avulahi tavera matea

vara a silea isamim sei i pa nona tamlohi tari. <sup>11</sup> Matan, nakerihi, natirihia matea mo vora isamim na taon non supe David, enia Křisto sei i pa juri na tamlohi, nořa Moli. <sup>12</sup> Ha pa eři hitevosahia sohen harihi: ha pa hite na pipi matea, la leputia na ruru la taua mo lo juruvi na puhoro řuvu hana maji palovati.”

<sup>13</sup> Ale, la pa hutura, vao angelo vuro na tuka la pala vahatea na hařin pa angelo atu, ale la lo hasohaso God lara,

<sup>14</sup> “Hasohaso i sahe isan God na jarana aulu jea na tuka!

Ale na varama, tamata i pa toho isan la haratu God mo avulahi hinira.”

<sup>15</sup> Na rani la angelo atu la malue isara la sahe na tuka, la tavui sipsip atu la lo vereverea isara lara, “Ale řa vano, řa vano Bethlehem vara řa hite hinau sei Moli God mo lo vereřa hinia.”

<sup>16</sup> La tamlohi atu la vano vilavila la tapai Mary enia Joseph, ale pa natirihia atu mo lo juruvi na řuvu na puhoro matea. <sup>17</sup> Lara la hitea, la vereuli na sava pa angelo atu mo lo vereea isara matan natirihia atu. <sup>18</sup> Ale tamlohi tari sei la rongoa la retireti atu, la mařurahi tavera na sava la tavui sipsip atu la vereea isara. <sup>19</sup> Pani Mary mo tau mamahuni la hinau nike na řomina, ale mo lo řomřomira. <sup>20</sup> Ale pa la tavui sipsip atu la mele hilu vano isana pulara sipsip, la lo tahe na hijan God, ale la sile na hasohaso isana mata sava la rongoa, ale sava la hitea sohen la vereea isara.

### *La Tau Na Hijan Iesu*

<sup>21</sup> Mo kakau na halimaravtolu rani, vara i lavi na nona taiřalihi, ale la tau na hijana vara Iesu, hija atu sei angelo atu mo lo silea tiroma moiso Mary mo pa tau natuna.

### *La Lavi Iesu Vano Na Temple*

<sup>22</sup> Ale mo kakau na rani mata malamalai matan vara i vai Joseph enia Mary la vokevoke usuri na Leu non Moses, la lavia mo sahe Jerusalem

mata silea isan Moli God <sup>23</sup> sohen la ulia na leu non Moli God lara,

‘Lamane vora tiroma tari sei la malue na pangen tinara tiroma, enira la tapuhi non Moli God.’ *Exo*

### *13.2-12*

<sup>24</sup> Ale la sile na malamalai usuri na sava leu non Moli God mo vereea vara la vaia,

‘vomahe i rua teni te wepe i rua.’

*Lev 12.2-8*

### *Simon Mo Hite Iesu*

<sup>25</sup> Ale hin pongi atu, mara Jerusalem matea, hijana Simon, enia tamlohi tataholo matea, ale řomina mo řilangi mata lotu tarea. Mo lo kilau matan Jujuri non Israel, ale Tanume Tapu mo mařivisia.

<sup>26</sup> Tanume Tapu mo vujangia hinia moiso vara i pa sopo mate vavano i tikeli pongi atu i hite Křisto non Moli God.

<sup>27</sup> Ale Tanume Tapu mo vai na řomina vara i vano na lolo Temple, ale na rani taman Iesu enia tinana la lavia mo sinai matan vara la vai na posposi sei leu mo opoia, <sup>28</sup> mo tulia, ale mo sile na hasohaso isan God mara,

<sup>29</sup> “Moli God, nake natu, na levosahia moiso vara o eři majinga hiniau nom volitusi,

vara a mate na tamata matan nom retitauhi isaku mo mase,

<sup>30</sup> matan matakau mo hite na nom Jujuri moiso,

<sup>31</sup> ko tatamahunia mata tamlohi tari,

<sup>32</sup> enia malarani matea mata vuhesi God isana tamlohi řořoha tari, ale mata hasohaso nona nom tamlohin Israel.”

<sup>33</sup> Taman Iesu enia tinana la mařurahi tavera na sava mo vereea matana. <sup>34</sup> Ale Simon mo leřuhu hinira, ale mo vereea isan tinana Mary mara, “God mo viřoni natirihia nike,

vara i pa vai na tamlohi matuvana Israel la jovi, ale i pa tahe na tamlohi matuvana hinia, enia i pa matamata matea tamlohi la pa verelejeleja,

<sup>35</sup> matan vara řomřomi nona tamlohi matuvana la pa mavuhesi, ale ko hitea, sita vuro i pa hoti na maurim tataholo.”

*Přovet Hařai Sei Anna*

<sup>36</sup> Přovet hařai matea mo lo toho atu hijana Anna, venatun Phanuel tavgavu in Asher. Enia mo vajiha sasati moiso, mo lo toho peresi tuana mata tauni mo limaravrua purongo hin la rani atu mo pa lo hařai maevo, <sup>37</sup> moiso mo lo toho sohena hařai malepu matea mo tikeli na taunina mo ngavulu limaravtulu mo vati (84). Enia mo sopo lo malue hin Temple atu, mo lo lotu God na nona tapuhoro na hanhani peresi na nona usiuseri terea na rani peresi na vutepongi. <sup>38</sup> Ale mo sinai tataholo hinira atu, ale mo tapulo vere meje isan God. Mo retireti matan natirihia atu isan la haratu sei la lo kilau toho matan rani atu vara God i pa volituhu Jerusalem hinia.

*Joseph Enia Mary La Mele Mule*

<sup>39</sup> Ale na rani Joseph enia Mary la vai vevuhi na sava leu non God mo oopia, la mele vano na jarara Galilee, na nora taon matan Nazareth. <sup>40</sup> Natirihia atu mo ulua, mo mai mo řilangi, ale řomina mo mařivi na lelevosahi. Ale řomřuhu non God mo lo toho isana.

*Iesu Mo Uluvou Mo Sahe Na Temple*

<sup>41</sup> Na tauni hatehateahi tamana enia tinana la lo sahe Jerusalem mata Hanhani mata Passover. <sup>42</sup> Ale hin rani atu Iesu taunina mo tikeli mo sangavulu řomana mo rua, la mele sahe usuri na posposi sohen la lo vaia terea matan Hanhani atu. <sup>43</sup> Ale na rani Hanhani atu mara mo isoiso, na malele la lo mele mule, uluvou atu Iesu mo pa lo toho Jerusalem. Tamana enia tinana la sopo levosahia, <sup>44</sup> pani mata rani matea la řomřomia vara mo lo hahau peresi na vaora, pani mo sopo tuai la tapulo alea isana tahisara peresi na tapalara na malele, <sup>45</sup> ale lara la sopo hitea, la mele hilu la vano vara la alea Jerusalem. <sup>46</sup> La alea, ale na hatolu rani la pa tapaia na lolo Temple, mo lo sakele na livuha tamlohi vujangi ea, mo lo tapurongo isara, ale mo lo usi na retiusia. <sup>47</sup> Ale tamlohi tari sei la rongoa la mařurahi tavera na nona

lelevosahi peresi na nona řarami reti isara.

<sup>48</sup> Ale tamana enia tinana lara la tapaia, la hutura tavera hinia. Ale tinana mo vere isana mara, “Natuku, mata sava ko vailehilehi kamam sohena? Enau tamam kama aleho vavano řomimam mo jovi tavera!”

<sup>49</sup> Ale mo vere isara mara, “Ka lo aleau mata sava? Ka sopo levosahia vara enau a pa lo toho na iman tamaku?” <sup>50</sup> Pani la sopo levosahi na řaramin reti atu sei mo vere isara.

<sup>51</sup> Ale mo usurira la sivo Nazareth, ale mo hase taua na ruhuruhi limara. Ale tinana mo tau mamahuni la hinau nike na řomina, ale mo lo řomřomira. <sup>52</sup> Ale Iesu mo ulua mo mai tamlohi, nona lelevosahi mo ulua, ale mo ulua na řomřuhu non God peresi na řomřomi nona tamlohi tari isana.

**3***Vujangi Non John Tamlohi Paptijo (Mt 3.1-12; Mk 1.1-8; Jn 1.19-28)*

<sup>1</sup> Na sangavulu řomana mo lima tauni, Tiberias Caesar, Supe nona mara Rome mo lo tauri na suiha, ale Pontius Pilate mo lo aulu hin Judea. Herod Antipas mo lo aulu hin Galilee, ale tasina Philip, mo lo kilau Ituraea peresi Trachonitis, ale Lisantias mo lo aulu hin Abilene, <sup>2</sup> ale tataholo hin rani atu Annas peresi Caiaphas la lo přis aulu, God mo sile na retisohai matea isan John natun Zechariah hin rani atu mo lo toho na jara tano koru.

<sup>3</sup> Ale John mo hahau řalihi na jara tari Jordan, ale mo vano mo lo retivujavujangi isana tamlohi vara la lavi na paptijo mata posi na hehe matan vara Moli i řomira. <sup>4</sup> Sohen přovet Isaiah mo ulia mara,

‘Na jara hasetoho leon matea mo lo ulo mara:

Ha vasahi na malelen Moli God!  
Ha tano na malelena i tataholo.

<sup>5</sup> God i pa tavuni na vakoa tari,  
ale i pa mavalolohi na vutivuti  
tari la mai la tataholo i řuhu,  
ale kolekole la pa tataholo,

ale malele morumoruha la pa tataholo,  
 6 ale tamlohi tari la pa hite malele sei God i pa juri na tamlohi hinia.’

*Isa 40.3-5*

7 Vao tamlohi la lo mai mata paptijo isan John, ale mo lo vereea isara mara, “Kamim mata sasati! Hare mo retiŕoaroahai kamim vara ha rovo na talai lolokoru non God mata hehe sei mo lo mai? 8 Ha namaha usuri na nomim posi na hehe. Ha sopo ŕomaulu vara, ‘Kamam kama juri matan tamamam Abraham!’, matan na vereea tataholoi kamim hinia vara, God i eŕi vai la vatu nike la mai natun Abraham! 9 Matan nakerihi, God mo lo ava na nona rita moiso mata wari. Matan, vipahai tari sei la sopo lavi na vuara ŕuhu, i pa tai jovjovira, ale i pa pulahira la vano na hapu.”

10 Ale vao atu la usia isana lara, “Vara mo sohena, kama pa vai na sava?”

11 John mo ŕaramira mara, “Vara nom ruru mo rua, o sile te hatea isan haratu mo sopo te nona ruru, ale haratu hana hiniau mo matuvana, i vaia sohena.”

12 Tamlohi mata lavi na takis sohena, la mai isana mata paptijo, la vereea isana lara, “Tija, kamam kama pa vai na sava?”

13 Ale mo vereea isara mara, “Ha sopo lavi na mania i jeu na sava mo tataholo vara ha lavia.”

14 Moiso, tamlohi vuro hai la usia lara, “Ale kamam, kama pa vai na sava?” Ale John mo vereea isara mara, “Ha sopo vai na tamlohi la matahu mata lavi te mania isara, ha sopo tuvai na tamlohi na halu mata mania, ha avulahi na volimim.”

15 Ale matan tamlohi la lo kilau moiso mata rani pala non nora Kŕisto, enira mo isoiso la lo ŕomŕomia na mapura lara korong, John enia pa Kŕisto atu.

16 Pani John mo ŕaramira mara, “Enau na lo paptijo hin kamim na wai purongo, pani tamlohi matea mo aulu jea hiniau mo lo mai, enau na sopo tataholo vara a uli naŕihi na asi eve palona. Enia i pa paptijo hin kamim na Tanume Tapu peresi

na hapu. 17 Mo lo tauri na nona foko tavera na limana vara i vasahi na nona jara ase na piri wit, ale matan vara i takonahi piri wit atu na nona pea, pani i pa suli na pahapaha piri wit na hapu sei tea i sopo eŕi vunia hin te rani.” 18 Ale hin na reti tinatinapua matuvana John mo retiŕoaroahai na tamlohi, ale mo retivujavujangi na Retiŕuhu isara hinira.

19 Ale hin pongi atu John mo retihoro Herod tamlohi aulu non Judea, mata nona vaivaileu peresi Herodias, naroun tasina, ale mata hina sasati tinatinapua tari sei Herod mo lo vaira, 20 ale aulu hin la hina sati atu mo lo vaira, Herod mo tau John na ima ŕilangi.

*John Mo Paptijo Hin Iesu*

*(Mt 3.13-17; Mk 1.9-11)*

21 Pani hin pongi atu John mo sopo lo toho na ima ŕilangi, tamlohi tari la lavi na paptijo, ale John mo paptijo hin Iesu. Ale Iesu mo pa lo usiusi, tuka mo maroi, 22 ale Tanume Tapu mo sinai atano sohena vomaha matea, ale mo tau hinia; ale leon matea mo tai na tuka mara, “Engko Natuku ŕuhuŕuhu jea, enau na avulahi tavera jea hiniho.”

*Pina Iesu Tuai*

*(Mt 1.1-17)*

23 Taunin Iesu maŕiviti i ngavulu tolu (30) moiso mo pa tapulo na nona vavahinau.

Iesu la vereea vara enia natun Joseph,

Joseph, enia natun Heli,

24 Heli, enia natun Matthat,

Matthat, enia natun Levi,

Levi, enia natun Melchi,

Melchi, enia natun Jannai,

Jannai, enia natun Joseph,

25 Joseph, enia natun Mattathias,

Mattathias, enia natun Amos,

Amos, enia natun Nahum,

Nahum, enia natun Esli,

Esli, enia natun Naggai,

26 Naggai, enia natun Maath,

Maath, enia natun Mattathias,

Mattathias, enia natun Semein,

Semein, enia natun Josech,



Josech, enia natun Joda,  
<sup>27</sup> Joda, enia natun Joanan,  
 Joanan, enia natun Rhesa,  
 Rhesa, enia natun Zerabbabel,  
 Zerabbabel, enia natun Shealtiel,  
 Shealtiel, enia natun Neri,  
<sup>28</sup> Neri, enia natun Melchi,  
 Melchi, enia natun Addi,  
 Addi, enia natun Cosam,  
 Cosam, enia natun Elmadam,  
 Elmadam, enia natun Er,  
<sup>29</sup> Er, enia natun Joshua,  
 Joshua, enia natun Eliezer,  
 Eliezer, enia natun Jorim,  
 Jorim, enia natun Matthat,  
 Matthat, enia natun Levi,  
<sup>30</sup> Levi, enia natun Simeon,  
 Simeon, enia natun Judah,  
 Judah, enia natun Joseph,  
 Joseph, enia natun Jonam,  
 Jonam, enia natun Eliakim,  
<sup>31</sup> Eliakim, enia natun Melea,  
 Melea, enia natun Menna,  
 Menna, enia natun Mattatha,  
 Mattatha, enia natun Nathan,  
 Nathan, enia natun David,  
<sup>32</sup> David, enia natun Jesse,  
 Jesse, enia natun Obed,  
 Obed, enia natun Boaz,  
 Boaz, enia natun Sala,  
 Sala, enia natun Nahshon,  
<sup>33</sup> Nahshon, enia natun Ammi-  
 nadab,  
 Amminadab, enia natun Admin,  
 Admin, enia natun Arni,  
 Arni, enia natun Hezron,  
 Hezron, enia natun Perez,  
 Perez, enia natun Judah,  
<sup>34</sup> Judah, enia natun Jacob,  
 Jacob, enia natun Isaac,  
 Isaac, enia natun Abraham,  
 Abraham, enia natun Terah,  
 Terah, enia natun Nahor,  
<sup>35</sup> Nahor, enia natun Serug,  
 Serug, enia natun Reu,  
 Reu, enia natun Peleg,  
 Peleg, enia natun Eber,  
 Eber, enia natun Shelah,  
<sup>36</sup> Shelah, enia natun Cainan,  
 Cainan, enia natun Arphaxad,  
 Arphaxad, enia natun Shem,  
 Shem, enia natun Noah,  
 Noah, enia natun Lamech,  
<sup>37</sup> Lamech, enia natun Methuselah,

Methuselah, enia natun Enoch,  
 Enoch, enia natun Jared,  
 Jared, enia natun Mahalaleel,  
 Mahalaleel, enia natun Cainan,  
<sup>38</sup> Cainan, enia natun Enos,  
 Enos, enia natun Seth,  
 Seth, enia natun Adam,  
 Adam, enia natun God.

## 4

### *Tiapolo Mo Vaihite Iesu (Mt 4.1-11; Mk 1.12-13)*

<sup>1</sup> Ale Tanume Tapu mo mařivisi Iesu, ale Iesu mo malue na wai Jordan, ale Tanume Tapu mo tiroma hinia mo vano na jara tano koru.

<sup>2</sup> Tiapolo mo vaihite Iesu atu mata rani mo ngavulu vati. Hin la rani atu, Iesu mo sopo hani te hinau hatea, ale rani atu la isoiso Iesu mo marohati jea.

<sup>3</sup> Tiapolo mo vereea isana mara, “Vara engko Natun God, o vere watu sei i mai pereti!”

<sup>4</sup> Iesu mo řaramia mara, “Retiulia mo vereea vara, “Tamlohi i pa sopo mauri na pereti purongo!” ” *Deut 8.3*

<sup>5</sup> Ale Tiapolo mo lavi Iesu mo sahe aulu na masapa, ale vahatea purongo, mo vujangia na jara tari na varama sei supe la lo tauri na suiha hinira, <sup>6</sup> ale mo vereea isana mara, “A pa sileho na nora suiha peresi na nora hasohaso, matan hinau tari sei la lo toho na limaku, ale a eři silera isan hare na opoia. <sup>7</sup> Vara o lotuau purongo, hinau tari sei la pa nom!”

<sup>8</sup> Ale Iesu mo řaramia mara, “Retiulia mo vereea vara, ‘O pa lotu Moli nom God, ale o pa volitusi isana hasena!’ ” *Deut 6.13*

<sup>9</sup> Ale Tiapolo mo lavi Iesu mo taua aulu na pusa Temple, ale mo vereea isana mara, “Vara engko Natun God, o kue! <sup>10</sup> matan Retiulia mo vereea vara, ‘God i pa retileu isana nona angelo vara la pa lo kilau mamahu-niho,

<sup>11</sup> ale la pa tauriho na limara matan vara o sopo vujahi na palom hin te watu.’ ” *Psa 91.11-12*

<sup>12</sup> Iesu mo řaramia mara, “Retiulia mo vereea vara, ‘O pa sopo vaihite Moli nom God!’ ” *Deut 6.16*

<sup>13</sup> Ale na rani Tiapolo mo isoiso na nona vaihite isan Iesu, mo malue mo vano, pani mo lo kilau matan te masapa řuhu tinapua.

### *Iesu Mo Tapulo Vujangi Na Tamlohi Galilee*

*(Mt 4.12-17; Mk 1.14-15)*

<sup>14</sup> Iesu mo mele vano Galilee na suihan Tanume Tapu, ale sorasorahina mo řalihi jara atu. <sup>15</sup> Mo vujangi na tamlohi na nora ima lotu, ale tamlohi tari la hasohasoa.

### *La Turuleji Hin Iesu*

*(Mt 13.53-58; Mk 6.1-6)*

<sup>16</sup> Ale Iesu mo pala Nazareth, jara atu sei mo ulua ea. Ale sohena mo lo vaia tarea mo vano na nora ima lotu na Sabbath, ale mo turu na naho tamlohi mata i evi na Retiulia, <sup>17</sup> ale la silea hin viriviri pepa atu sei Isaiah mo lo ulia, mo vuhesia ale mo vano hin jara atu sei mo opoia vara i evia, ale mo vereea mara,

<sup>18</sup> “Tanumen Moli mo lo toho hiniu matan enia mo viřoniau vara a vereuli na Retiřuhu isana tilavono.

Mo řuleau vara a vere na materi isan la haratu la lo taurilatira,

ale vara a vai na tamlohi matavuso la kilau,

ale vara a teri la haratu la lo toho na ruhuruhu tamlohi sasati,

<sup>19</sup> ale vara a vereulia vara nake enia pongi řomřuhu non Moli.” *Isa 61.1-2a*

<sup>20</sup> Ale Iesu mo mele viriviri pepa atu, mo silea isan tamlohi atu mo lo silea isana, ale mo sakele. Tamlohi tari na lolon ima lotu atu matara la lo toho hinia, <sup>21</sup> ale mo tapulo vereea isara mara, “Nahapani natu Retitapu nike mo pa masese na peromim.”

<sup>22</sup> Ale tamlohi tari la hasohasoa, la mařurahi na retiřuhu mo lo verera, ale la vereea lara, “Avei, tamlohi nike enia natun Joseph teni!”

<sup>23</sup> Ale Iesu mo vereea isara mara, “Na levosahi mamahunia vara ha pa vereau hin titileu sei mo vereea vara, ‘Doctor, o hase vai mamahuniho!’ Ha pa vereea vara, ‘Sava hina mařurahi

kama rongoa vara ko lo vaia Capernaum, o vaia nike na jaram sohena!’ ” <sup>24</sup> Ale mo vereea isara mara, “Varařuhu na vereea isamim, vara mo sopo te přovet hatea i eři lavi na řomřuhu nona tamlohi na vanuana.

<sup>25</sup> Pani, na varařuhu hin haratu na vereea vara, ‘Malepu matuvana Israel la lo toho na rani non Elijah, hin rani atu usa mo sopo jovi mata tauni mo tolu vitu mo limarave, ale marua tavera mo voroi Israel, <sup>26</sup> ale God mo sopo řule Elijah i vano isan te vonara, pani isana hařai malepu matea mo lo toho Zarephath na jara Sidon. <sup>27</sup> Ale tamlohi lepros matuvana hin Israel la lo toho na rani non Elisha, God mo sopo vai mamahuni te vonara hatea pani Naaman purongo mara Syria matea.”

<sup>28</sup> Ale lara la rongoa la hinu atu Iesu mo lo verera, tamlohi tari na lolon ima lotu la lolokoru patura. <sup>29</sup> La turu la titiua vara i malue hin taon atu, ale la lavia mo vano na tavalu taon matan vara la pa pulahia na pesapesan vutivuti atu sei la voro na nora taon hinia. <sup>30</sup> Pani Iesu mo hahau roto na livuhara mo vano.

### *Iesu Mo Titiu Nařihi Na Tanume Sati*

*(Mk 1.21-28)*

<sup>31</sup> Ale Iesu mo sahe Capernaum, taon tavera matea Galilee. Mo lo vujangira na Sabbath, <sup>32</sup> ale la haratu la rongoa la mařurahi tavera na nona vujangi, matan nona reti mo suiha.

<sup>33</sup> Na lolon ima lotu atu tamlohi matea, tanume lumiha sasati matea mo lo toho hinia, mo ulo aulu řilangi mara, <sup>34</sup> “Aaah! Ko mai isamam mata sava, Iesu mara Nazareth? Ko mai vara o komo kamam? Na levosahia vara engko hare – haratu mo tapu non God!”

<sup>35</sup> Pani Iesu mo merusahia mara, “O sopo retireti! O malue isan tamlohi sei!” Ale tanume sasati atu mo sařihi tamlohi atu sivo atano na livuhan vao atu, ale mo malue hinia, pani mo sopo komo te epena.

<sup>36</sup> Tamlohi tari la mařurahi matana, ale la lo hase verevereea isara lara, “Eh! Sava reti nahai? Matan na suiha nona retileu purongo, mo titiu

nañihi na tanume lumiha sasati la malue!”<sup>37</sup> Ale sorasorahina mo vano řalihi na jara tari ea.

### *Iesu Mo Tueni Na Tamlohi Matuvana*

(Mt 8.14-17; Mk 1.29-34)

<sup>38</sup> Ale hitahun haratu, Iesu mo turu mo malue na ima lotu, mo vano na iman Simon Peter mo unu hinia. Hin rani atu vepalihan Peter mo rojo na seserei řilangi matea, ale la usi Iesu matana vara i tuenia. <sup>39</sup> Iesu mo turu na pahisa vatana, mo kilau sivo isana, ale mo řule nañihi seserei atu, ale seserei atu mo malue isana, ale vahatea purongo mo turu mo tapulo tatamahuni na hara hinau.

<sup>40</sup> Alo mo lo tapulo majo, ale la haratu te tahisara la rojo na rojoa tinatinapua la lavira la mai isan Iesu, ale mo tau na limana hinira hatehateahi mo isoiso, ale nora rojoa la tihai. <sup>41</sup> Ale tanume sasati sohena la malue isana tamlohi matuvana la ulo lara, “Engko Natun God!” Pani Iesu mo merusahira, ale mo sopo tinañihira vara la vere te hinau, matan la levosahia vara enia natu pa Křisto atu.

### *Iesu Mo Retivujavujangi*

<sup>42</sup> Ale na rani tinapua na řalavuho, Iesu mo malue mo vano na jara hase-toho matea. Ale tamlohi la alea la mai isana, la opoia vara i lo toho peresira tako, <sup>43</sup> pani Iesu mo vere isara mara, “A pa vano na taon tinatinapua vara a retivujavujangi hin mauri atu God mo aulu hinia isara sohena na vaia isamim, matan God mo řuleau matana.” <sup>44</sup> Ale mo malue mo vano řalihi na jara Judea mo lo retivujavujangi na nora ima lotu.

## 5

### *Mo Tovi Na Nona Tamlohi Usuri*

(Mt 4.18-22; Mk 1.16-20)

<sup>1</sup> Na rani matea, Iesu mo lo turu na pahisa tasin Galilee, vao tamlohi matuvana la lo turu porotia mata tapurongo na reti non God, <sup>2</sup> ale mo hite na boti mo rua la seretahira na oneone, mo hite na tamlohin la boti atu la lo turu na jarauta, la lo hoje na nora tara. <sup>3</sup> Iesu mo vele na vonan la

boti atu matea sei enia botin Simon Peter, mo usia vara i sohai nañihia makomona na jarauta. Ale Iesu mo sakele na boti mo vujangi pa vao tamlohi atu.

<sup>4</sup> Mara mo isoiso na nona retireti isara, mo vere isan Simon mara, “Eh, o sohai nañihia i sivo na jara puaha, ale ha tuhu na nomim tara mata tarai te maji.”

<sup>5</sup> Moiso, Simon mo řaramia mara, “Tamlohi tavera, kama kalvono vutepongi jarohi, ale kama sopo tikeli tea, pani matan ko vere, a pa tuhu na tara.” <sup>6</sup> Ale lara la vaia sohena, la řalihi na takonahi maji, ale nora tara la tapulo mañari. <sup>7</sup> La alovi na tapalara hin boti tinapua atu vara la mai la tuenira, ale la mai la sohoni la boti atu mo rua, mariviti vara la pute.

<sup>8</sup> Pani Simon Peter mara mo hite hinau atu mo jovi sivo mo papaohi na paun Iesu mara, “O malue isaku Moli! Matan enau na tamlohi hehe matea!” <sup>9</sup> Matan Simon Peter enira tolu la haratu la lo toho peresia la mañurahi tavera na maji la tikelira, <sup>10</sup> ale James enia John sohena, enira natun Zebedee sei la tapalan Simon Peter na bisnis mata aleale maji.

Ale Iesu mo vere isan Simon mara, “O sopo matahu! Mo tapulo nake, engko o pa tamlohi tara tamlohi!” <sup>11</sup> Ale lara la tahe na botira sahe na jarauta, la tinañihi na hinau tari nora mata botira, ale la usuri Iesu.

### *Tamlohi Lepros Matea*

(Mt 8.1-4; Mk 1.40-45)

<sup>12</sup> Ale na rani matea Iesu mo lo toho na taon tavera matea atu, tamlohi matea mo mai isana lepros mo hati vevuhi na epena, ale mara mo hite Iesu, mo jovi na nahona, mo tangi isan Iesu mara, “Moli, vara o maringa, o eñi vaiau a vokevoke.”

<sup>13</sup> Moiso Iesu mo řirahi na limana mo tikelia mara, “Ale a vaia! O vokevoke!” Vahatea purongo lepros atu mo tinañihia. <sup>14</sup> Iesu mo vere isana vara i sopo mele vere isan tea, pani mo vere mara, “O vano o hase vujangiho isan te pñis hatea, ale o sile

te silesilea hatea mata nom vokevoke usuri na sava Moses mo retileu hinia, matan vara i efi vereia vara engko ko mele řuhu.”<sup>15</sup> Pani nake natu sorasorahina mo mele tavera jea mo vano asau, ale vao tavera la lo mai vara la tapurongo na nona retireti, ale mo vai na nora rojoa la tihai. <sup>16</sup> Pani tarea Iesu mo lo vano hasena na jara hasetoho mata usi.

*Tamlohi Hariju Matea*  
(Mt 9.1-8; Mk 2.1-12)

<sup>17</sup> Ale na rani matea hin la rani atu, Iesu mo lo vujangi, Pharisee peresi na tamlohi vujangi mata leu, la lo sakele mariviti atu, enira la tai na vanua tari matan Galilee, Judea peresi Jerusalem. Ale suiha tavera non God mata titiu nařihi na rojoa mo lo toho hinia. <sup>18</sup> Tamlohi la hutura matan tamlohi hai la lo lavi na tamlohi rojoa matea na epa matea, epena tari la mate, ale la lo aleale malele vara la lavia i unu sivo na nahon Iesu. <sup>19</sup> Pani la sopo hite te malele vara la pa unu hinia, la vele sahe aulu na pusa ima la řole na masapa matea, ale la tuhua na epana mo sivo atano na livuha vao tataholo na nahon Iesu. <sup>20</sup> Ale Iesu mara mo hite na nora rasua, mo vereia isan tamlohi rojoa atu mara, “Tapala, na řomiho mata nom hehe.”

<sup>21</sup> Ale tamlohi vujangi mata leu peresi na Pharisee la tapulo usiusira lara, “Sava tamlohi nahai mo lo vaia sohena enia God? God hasena i efi řomi na hehe!”

<sup>22</sup> Iesu mo levosahi na řomira ale mo řaramira mara, “Mata sava řomimim mo lo sati na sava na vereia? <sup>23</sup> Sava natu, mo mele malum jea? Vara a vereia isan tamlohi hariju nika vara, ‘Na řomi na nom hehe!’ teni ‘O turu! O hahau!’ <sup>24</sup> Pani matan vara ha efi levosahia vara Natun Tamlohi mo lavi na suiha mata řomi na hehe na varama, ha tapurongo na sava a pa vereia!” Moiso Iesu mo vereia isan tamlohi hariju atu mara, “Na vereia isam, o turu, o lavi na epam, ale o mule!”

<sup>25</sup> Vahatea purongo, mo turu na nahora, mo lavi na epana mo mule, ale mo lo hasohaso God. <sup>26</sup> Mařurahi

tavera mo taurilatira, ale enira mo isoiso la hasohaso God, matahu mo sohonira lara, “Na vereia! Mele hina mařurahi tinatinapua nahai řa lo hitera nakerihi!”

*Iesu Mo Viřoni Matthew*  
(Mt 9.9-13; Mk 2.13-17)

<sup>27</sup> Hitahuni haratu, Iesu mo malue mo vano, ale mo hite na tamlohi mata lavi na takis matea, hijana Levi, mo lo sakele na jarana, ale mo vereia isana mara, “O usuriau!” <sup>28</sup> Ale mo turu, mo tinařihi vevuhi na nona voko tari mo usuri Iesu.

<sup>29</sup> Moiso, Levi mo vai na hanhani tavera matea non Iesu na imana, ale takonahi tamlohi mata lavi na takis peresi na tamlohi tinapua hai la lo hanhani peresira na tep atu. <sup>30</sup> Ale Pharisee peresi na nora tamlohi vujangi mata leu hai la lo ngutungutu isana nona tamlohi usuri lara, “Mata sava ka lo hanhani ale ka lo inu peresi na tamlohi mata lavi na takis peresi na tamlohi hehe?”

<sup>31</sup> Ale Iesu mo řaramira mara, “Haratu la sopo rojo la sopo opoi na doctor, pani haratu purongo sei la rojo. <sup>32</sup> Na sopo sinai matan vara a tovi la haratu la tataholo la posi, pani mata tamlohi hehe.”

*Tapuhoro Na Hanhani*  
(Mt 9.14-17; Mk 2.18-22)

<sup>33</sup> Pharisee la vereia isana lara, “Tamlohi usuri non John tamlohi paptijo la lo tapuhoro na hanhani hin te rani mata usi, ale tamlohi usuri nona Pharisee la lo vaia sohena, pani nom la lo hanhani la lo inu!”

<sup>34</sup> Iesu mo řaramira mara, “Ha efi vai na tamlohi ka tovira mata mai na hanhani lahi la tapuhoro na hanhani vara tamlohi lahi mo lo toho peresira? <sup>35</sup> Pani rani mo lo mai vara la pa lavi nařihi na tamlohi lahi isara, ale la pa tapuhoro na hanhani hin la rani atu natu.”

*Ruru Tuai Peresi Na Ruru Paro*

<sup>36</sup> Iesu mo mele verera na titileu matea mara, “Mo sopo tea i řari te nona ruru paro vara i lavi tavalu ruru atu i silivi horo na mařari ruru tuai matea hinia. Vara i vaia sohena, i pa řari ruru paro atu, ale tavalu ruru

paro atu i pa sopo efi sofo i ruhu hin ruru tuai atu.

### *Waen Tuai – Waen Paro*

<sup>37</sup> Ale mo sopo tea i tisi na waen paro i sivo na huri waen tuai. Vara i vaia sohena, waen paro atu i pa vali i sohi i kosahi huri waen tuai atu sei mo masa moiso, ale waen atu i pa roro narihi, ale huri atu i pa sopo mele ruhu matan te hinau.

<sup>38</sup> Pani ha pa tisi na waen paro na lolo huri waen paro purongo matan mo malum. <sup>39</sup> Ale mo sopo tea vara i lo inu na waen tuai i opoi na waen paro, matan i pa vereva vara, 'Waen tuai mo meji.' ”

## 6

### *Iesu Enia Supe Mata Sabbath (Mt 12.1-8; Mk 2.23-28)*

<sup>1</sup> Na Sabbath matea, Iesu mo pa lo hahau roto na isa wit matea, ale nona tamlohi usuri la vesi roto na perera hai, ale la savasavahira na limara, moiso la hanira. <sup>2</sup> Pani tatua Pharisee lara, "Eh! Mata sava ka lo vai na hinau matea mo sopo tataholo vara ha vaia na Sabbath?"

<sup>3</sup> Iesu mo faramira mara, "Ka sopo lo evi na sava David mo vaia hin rani atu mo marohati, enia peresi la haratu la lo toho peresia? <sup>4</sup> Ka evia ka hitea sohena sava mo unu na Tabernacle non God mo lavi na pereti tapu, pereti atu pris hasera la efi hania, ale David mo hania mo silea isana tatuana la hania sohena." <sup>5</sup> Ale Iesu mo vere isara mara, "Natun Tamlohi, enia Moli mata Sabbath."

### *Tamlohi Matea Tavalu Limana Mo Rihirihi (Mt 12.9-14; Mk 3.1-6)*

<sup>6</sup> Na Sabbath tinapua matea, Iesu mo unu na lolo ima lotu, ale mo lo vujangi. Tamlohi matea mo lo toho atu matua limana mo rihirihi. <sup>7</sup> Ale tamlohi vujangi mata leu peresi na Pharisee la lo kilau Iesu vara i pa titiu narihi na rojo na Sabbath teni mo vono, matan vara la efi vilei te hinau mata pisuhia hinia. <sup>8</sup> Pani hina purongo vara Iesu mo levosahi na romira, mo vereva isan tamlohi lima

rihirihi atu mara, "O mai o turu ak-erihahi!" Ale tamlohi atu mo turu mo vano isana. <sup>9</sup> Ale Iesu mo vereva isara mara, "Na lo usi kamim vara mo tataholo vara o vai na hina ruhu na Sabbath, teni vara o sile na rongohaji isan tea na Sabbath, teni vara o juri na mauri, teni vara o komoa?"

<sup>10</sup> Mo kilau ralihira mo isoiso, moiso mo vereva isan tamlohi atu mara, "O rirahi na limam!" Ale pa tamlohi atu mo vaia sohena, ale limana mo mele ruhu vevuhi. <sup>11</sup> Pani la Pharisee atu la lolokoru patura, la lo usiusira hinia lara, sava natu la pa efi vaia isan Iesu.

### *Iesu Mo Vironi Na Nona Vahaŕule (Mt 10.1-4; Mk 3.13-19)*

<sup>12</sup> Hin la rani atu Iesu mo malue isara, mo sahe aulu na vutivuti mata ususi, mo ususi rani isan God. <sup>13</sup> Ale na ralavuhō mo tovi na nona tamlohi usuri, ale mo vironi na tupu sangavulu romana mo rua hinira, enira mo tovira vahaŕule;

<sup>14</sup> Simon sei Iesu mo tau na hijana vara Peter, tasina Andrew, ale James enia John, Philip, Bartholomew,

<sup>15</sup> Matthew, Thomas,

James natun Alphaeus, Simon sei, enia tamlohi matea mata valum mata jarana,

<sup>16</sup> ale Judas natun James, ale Judas Iscariot sei mo lo turuposi hin Iesu.

### *Iesu Mo Vujangi Na Tamlohi (Mt 4.23-25)*

<sup>17</sup> Ale Iesu mo sevuti mo sinai atano peresira, ale la turu na mavalolo matea. Ale vao nona tamlohi usuri tolu na vao tamlohi tinapua tavera jea matea la takonahi moiso, la tai na jara tari Judea, Jerusalem ale na pahisa tasi Tyre peresi Sidon, <sup>18</sup> sei la mai vara la rongō na nona retireti, ale matan vara i titiu narihi na nora rojoa. Ale la haratu sei tanume lumiha sasati mo lo vaira, Iesu mo vaira la mele ruhu. <sup>19</sup> Ale enira mo isoiso la lo vaihitea vara la tikeli Iesu matan suiha tavera mo lo malue

isana mo lo titiu naʻihi na nora rojoa tari.

*Avulahi Atu God I Pa Silea  
(Mt 5.1-12)*

<sup>20</sup> Iesu mo taʻa sahe isana nona tamlohi usuri mo vereea mara, “Avulahi isamim sei ka tilavono, matan mauri atu God mo aulu hinia enia nomim.

<sup>21</sup> Avulahi isamim sei ka lo marohati nake, matan ha pa masu. Avulahi isamim sei ka lo tangi nake, matan ha pa mana.

<sup>22</sup> Avulahi isamim na rani sei tamlohi la ʻrohu hin kamim, teni la lo horo kamim, teni la lo veresatihi kamim, teni la lo vereleji kamim, matan ka tamlohi non Natun Tamlohi.

<sup>23</sup> Hin la pongi atu ha pa avulahi tavera, ale ha kuekue na avulahi, matan ka levosahia vara nomim otori na tuka mo tavera jea; matan tuai tamara la vaia sohena moiso isana pʻrovet.

*Rani Sasati God I Pa Silea*

<sup>24</sup> Pani rani sasati isamim sei ka tavitav,

matan ka lavi na volimim moiso.

<sup>25</sup> Rani sasati isamim sei ka lo mana nake, matan ha pa tangtangi ale ha tangi.

<sup>26</sup> Rani sasati isamim na rani tamlohi la vere na retireti ʻruhu matamim, matan tuai tamara la vaia sohena moiso isana pʻrovet haluhalu.

*O Opoi Na Nom Meresahi  
(Mt 5.38-48; 7.12a)*

<sup>27</sup> Pani na vereea isamim nakerihi ka lo tapurongo vara ha opoi na nomim meresahi, ha vai na hina ʻruhu isan haratu mo ʻrohu hin kamim. <sup>28</sup> Ha leʻruhu hin la haratu la lesati hin kamim, ha usiisi matan la haratu la lo vailehilehi kamim.

<sup>29</sup> Isan haratu mo vojahi na esem, o tinaʻihia i mele vojahi na tavalu esem. Ale haratu mo reve naʻihi na nom ruru hamariri, o sopo horoa vara mo opoia vara i reve naʻihi na nom ruru. <sup>30</sup> O silea isana tamlohi tari sei la usia ʻrilangi isam, ale isan

haratu mo reve naʻihi na nom hinau, o sopo ngurunguru hinia vara i mele sileho hinia. <sup>31</sup> Ale sava ka opoia vara tamlohi la vaia isamim, ha vaia sohena isara.

<sup>32</sup> Vara ha opoi la haratu la lo opoi kamim purongo, ka ʻrom vara God i pa avulahi hin kamim? Matan tamlohi hehe sohena, la lo opoi la haratu la opoira. <sup>33</sup> Ale vara ha lo vai na hina ʻruhu isan la haratu la lo vai na hina ʻruhu isamim purongo, ka ʻrom vara God i pa avulahi hin kamim? Matan tamlohi hehe sohena la lo vaia sohena. <sup>34</sup> Ale vara ha lo sile na mania isan la haratu sei ko levosahia vara la pa mele spaia, ka ʻrom vara God i pa avulahi hin kamim? Matan tamlohi hehe sohena, la lo sile na mania isana tamlohi hehe matan vara la pa mele lavi na spaina tataholo.

<sup>35</sup> Pani ha opoi na nomim meresahi, ale ha vai na hina ʻruhu, ha sile na mania vara tea mo usia, ha sopo ʻromʻromia vara ha pa mele lavi na spaina. Matan nomim otori i pa tavera jea, ale kamim ha pa natun haratu mo aulu jea, matan enia mo ʻruhu isan la haratu mo sopo te vere meje isara, peresi la haratu la sasati. <sup>36</sup> Ha ʻromopoia sohena Tamamim mo lo ʻromopoia.

*Ha Sopo Ari Na Tinapua  
(Mt 7.1-5)*

<sup>37</sup> Ha isoiso na nomim ari na tamlohi tinapua, ale God i pa sopo ari kamim, ale ha isoiso na nomim sile na talai isana tamlohi tinapua, ale God i pa sopo sile na talai isamim, ha ʻromi na tinapua, ale God i pa ʻromi kamim, <sup>38</sup> ha silesile, ale God i pa sile purongoia isamim, i pa silea i tavera jea i jeu na ʻromimim, i pa saʻihia, i hutehutehia, ale i lo masurere. Vara ka silea sohena sava, i pa mele silea sohena isamim.”

*O Hase Kilau Na Maurim*

<sup>39</sup> Iesu mo mele verera na titileu matea mara, “Matavuso matea i eʻi tiroma na matavuso tinapua? Ra levosahia vara la pa jovi hin te koko. <sup>40</sup> Tamlohi usuri matea mo sopo aulu na nona tamlohi vujangi, pani vara i

levosahi vevuhi na sava mo lo vujangia, i pa sohen nona tamlohi vujangi atu.

<sup>41</sup> Mata sava ko eři hitevosahi na utauta tapea rihirihī na matan voraim matea, pani ko sopo eři hitevosahi na laho pahai na matam?

<sup>42</sup> Mo sohena sava natu ko eři vereā isan voraim vara, ‘A eři nařihi utauta tapea rihirihī sei na matam!’ pani ko sopo hitevosahi na laho pahai na matam hasem? Ko tapnetano! O nařihi na laho pahai na matam hasem tiroma, ale o pa eři kilau i memera matan vara o eři lanarihi na utauta tapea rihirihī na matan voraim.

### *Vua Vipahai*

*(Mt 7.21-27; 12.34b, 35)*

<sup>43</sup> Mo sopo te pulo vipahai řuhu hatea i eři sile na vua sasati, teni te pulo vipahai sasati i eři sile na vua řuhu, <sup>44</sup> matan, pulo vipahai hatehateahi o eři hitevosahira na vuara. Matan la sopo vu na fig na pahai ngařngařiha, teni la sopo vu na grape na asikauli. <sup>45</sup> Tamlohi řuhu, hina řuhuřuhu na mapuna i pa sile na hina řuhu, tamlohi sasati, hina sasati na mapuna i pa sile na hina sasati. Matan sava mo tavera na mapu tamlohi, haratu natu i pa malue na jingona.

### *Tamlohi Voro Ima Mo Rua*

*(Mt 7.24-27)*

<sup>46</sup> Mata sava ka lo toviau vara, ‘Moli! Moli!’ pani ka sopo vai na sava na vereā isamim? <sup>47</sup> Sava tamlohi mo mai isaku, mo rongo na noku reti ale mo vaira, a pa vujangia isamim vara enia mo sohena sava: <sup>48</sup> Enia mo sohena tamlohi matea mo lo voro na ima matea, mo heli na moru mo sivo atano na vatu matan vara i tau na pulo ima hinia. Ale na rani wai tavei mara mo vele, mo sari ima atu, pani mo sopo eři hisuhia matan mo voro mamahunia. <sup>49</sup> Pani haratu mo rongoa pani mo sopo vaia, mo sohena tamlohi matea mo voro na ima na lepa purongo, ale mo sopo te pulona řuhu. Ale wai tavei mara mo vele mo saria, vahatea purongo ima atu mo jovi, ale nona jovi atu mo tavera jea.”

## 7

### *Volitusi Matea Mo Mele Ruhu* *(Mt 8.5-13; Jn 4.43-54)*

<sup>1</sup> Hitahun la nona titileu atu mo vereā isana tamlohi, mo mele unu Capernaum. <sup>2</sup> Ale slev matea nona captain mata tamlohi vuro nona mara Rome matea mo rojo, mariviti vara i mate. Tamlohi tavera atu mo opoi volitusi atu mo tavera jea. <sup>3</sup> Ale pa captain atu mara mo rongo te hināu matan Iesu, mo řule na vajiaha Jew hai la vano isana vara la usia vara i eři mai vara i titiu nařihi na rojo non nona volitusi atu. <sup>4</sup> Ale la mai isan Iesu, la lo usia řilangi isana lara, “Tamlohi tavera sei enia tamlohi řuhu matea, mo tataholo vara o tuenia, <sup>5</sup> matan enia mo opoi na nořa tamlohi, ale enia natu mo voro na nomam ima lotu.”

<sup>6</sup> Ale Iesu mo usurira. Mo pa lo mai mariviti na ima, ale pa captain atu mo řule na tapalana hai la mai isana, la lo lavi na nona reti ale lara, “Moli, o sopo kalvono purongo, matan enāu mo sopo tataholo vara o eři unu na imaku. <sup>7</sup> Matan haratu, na sopo hitea vara i tataholo vara enāu haseku a mai a usia isam. Pani vara o sile te reti hatea purongo, na levosahia vara noku volitusi i pa mele řuhu. <sup>8</sup> Matan enāu sohena, enāu tamlohi matea na lo toho na ruhuruhi suiha tamlohi tinapua matea, ale tamlohi vuro hai la lo toho na ruhuruhi suiaku: vara a vereā isan matea vara, ‘O vano!’ i pa vano, ale isana tinapua vara, ‘O mai!’ i pa mai, ale vara a vereā isan noku volitusi vara, ‘O vai haratu!’ i pa vaia.”

<sup>9</sup> Iesu mara mo rongo la reti atu, mo mařurahi tavera hin tamlohi atu, ale mo posi vano isan vao atu sei la lo usuria, mo vereā isara mara, “Varařuhu, na vereā vara na sopo lo tapai te tamlohi nike Israel i lavi na rasua sohen tamlohi nike!” <sup>10</sup> Ale na rani la haratu sei tamlohi tavera atu mo lo řulera isan Iesu la mele hilu vano na imana, la hitea vara pa volitusi atu mo pete řuhu moiso.

### *Uluvou Matea Mo Turu Na Mateia*

<sup>11</sup> Mo sopo tuai usuri haratu, Iesu mo vano na taon matea hijana Nain, ale nona tamlohi usuri peresi na vao tavera matea la lo usuria. <sup>12</sup> Mara mo lo mai mariviti na mataruan taon atu, ale la hutura na tamlohi la lo ali na tamlohi mate matea, mo lo malue na taon, enia vorahese non tinana, ale haʻrai atu enia malepu matea. Vao tamlohi matan taon atu la lo usuria. <sup>13</sup> Ale mara mo hite haʻrai atu, Iesu mo ʻromopoia, ale mo vereia isana mara, “O sopo tangi!” <sup>14</sup> Ale mo vano na vatan tamlohi mate atu, mara mo tau na limana hinia, la haratu la lo alia la turu vahatea. Ale mo vereia mara, “Uluvou, o turu.” <sup>15</sup> Moiso, tamlohi mate atu mo sakele, ale mo tapulo retireti, moiso Iesu mo silea isan tinana.

<sup>16</sup> Matahu mo sohoni na tamlohi tari, ale la hasohaso God lara, “Pʻrovet aulu matea mo lo turu na livuhaʻa!” ale lara, “God mo rohi na nona tamlohi!” <sup>17</sup> Ale sorasarahina sei, mo vano asau mo ʻralihi na jara Judea peresi na jara tari ʻralihia.

### *John Tamlohi Paptijo (Mt 11.1-19)*

<sup>18</sup> Tamlohi usuri non John tamlohi paptijo, la sorahi la hinia tari sei isana. Moiso John <sup>19</sup> mo tovi na vonara mo rua la mai isana matan vara i ʻruler la vano isan Moli vara la usia isana vara, “Engko natu haratu sei i pa mai, teni kama pa lo mele kilau matan te tinapua?”

<sup>20</sup> Ale lara la kau isan Iesu lara, “John tamlohi paptijo mo ʻrule kama kama mai isam mara, ‘Engko natu haratu sei i pa mai, teni kama pa lo mele kilau matan te tinapua?’ ”

<sup>21</sup> Hin aoa atu, Iesu mo titiu naʻihi na rojoa na tamlohi matuvana, ale mo titiu naʻihi na tanume sasati matuvana, ale isan la haratu la matavuso mo vaira vara la eʻi kilau. <sup>22</sup> Ale Iesu mo ʻraramira mara, “Ha vano ha vere John na sava ka hitea, ale ka rongoa: matavuso la mele kilau, tamlohi papao la hahau, tamlohi lepros la vokevoke, peropero la rongo, haratu la mate la mauri, ale la haratu la tilavono la rongo

na Retiʻruhu. <sup>23</sup> Ale avulahi isan la haratu la pa sopo ʻrohu hiniau hin te rani.”

<sup>24</sup> Na rani vahaʻule non John la mele hilu vano, Iesu mo tapulo retireti isan vao atu matan John mara, “Ka vano na jara tano koru vara ha hite na sava ea? Apo matea langi mo lo serea ea? <sup>25</sup> Pani sava natu ka vano vara ha eʻi hitea ea? Tamlohi matea mo ru na ruru ʻruhu matea ea? Ka levosahia vara la haratu la lo ru na ruru ʻruhu jea, la lo toho na jara Supe tavera purongo. <sup>26</sup> Sava natu ka opoia vara ha hitea ea? Pʻrovet matea? Varaʻruhu, pani na vereia isamim vara enia mo jeu na pʻrovet. <sup>27</sup> Sava la ulia tuai matana mo vereia vara,

‘Ha kilau nike! Na lo ʻrule na noku vahaʻule na nahom, vara i vai na malelem i roi.’ *Mal 3.1*

<sup>28</sup> Varaʻruhu na vere isamim vara la haratu la vora isana haʻrai, mo sopo tea i eʻi lavi na oloulo i jeu John, pani haratu mo hitahu hin mauri atu God mo aulu hinia, enia mo aulu jea mo jeu John.”

<sup>29</sup> Na rani tamlohi tari peresi na tamlohi mata lavi na takis la rongo reti nike, la majinga vara sava God mo vaia mo tataholo, matan enira la lavi na paptijo non John moiso, <sup>30</sup> pani Pharisee peresi na tamlohi vujangi mata leu, la ʻrohu na masalon God matara, matan la sopo lavi na nona paptijo.

<sup>31</sup> Iesu mo mele vereia mara, “Na sopo levosahia vara a pa vereia vara tamlohi matan nake la sohena sava?

<sup>32</sup> La sohena natuvarihi la lo sakele na jara maket la lo uloulo isara hasera lara, ‘Kama roro na vete mata lahi, pani ka ʻrohu vara ha velu; ale kama lalavete na vete mata ʻromsati matea, pani ka sopo tangi.’ <sup>33</sup> Matan John tamlohi paptijo mo mai, mo tapuhoro na pereti peresi na waen, ale kara, ‘Tanume sasati mo lo toho hinia!’ <sup>34</sup> Ale Natun Tamlohi mo mai, mo hanhani ale mo inu, ale kara, ‘Ha to kilaua! Hanhani jea matea, tamlohi drong matea, enia mo tapala peresi na tamlohi la lo



lavi na takis peresi na tamlohi hehe!<sup>35</sup> Pani o pa efi hitevosahia vara malele lelevosahi non God mo tataholo mata vuana ruhu.”

### *Opoia Tavera*

<sup>36</sup> Ale Pharisee matea mo usi Iesu vara i hanhani peresia, ale mo vano mo unu na iman Pharisee atu mo sakele na tep. <sup>37</sup> Ale atu, haʻai malele matea hin taon atu mo levosahia vara Iesu mo lo hanhani na iman Pharisee atu, ale mo lavi na potele matea la vaia na alabaster, hasori ruhu mo lo toho hinia, <sup>38</sup> mo turu na haʻina ale mo papaohi mo lo tangi na palona, ale mo tapulo kamoti na wai matana sei la jovi na palona na vuluna, ale mo lo pungosi na palona, mo rengi na hasori hinira.

<sup>39</sup> Pa Pharisee atu sei mo lo usia vara i vano na imana mara mo hite hinau atu, mo vereea isana hasena mara, “Vara tamlohi nike enia pʻovet matea, i pa levosahia vara sava haʻai nahai mo lo tikelia, matan enia haʻai hehe matea.”

<sup>40</sup> Ale Iesu mo ʻarami tamlohi atu mara, “Simon, na opoia vara a vereho na hinau matea.”

Ale mo ʻaramia mara, “Tija, o vereea.”

<sup>41</sup> Iesu mara, “Tamlohi matea, tamlohi la lo usi na mania isana moiso la pa mele spaia, tupra rua la ave na mania isana. Matea mo ave na denarii mo ngavulu sangavulu lima, matea mo ave na ngavulu lima. <sup>42</sup> Na rani la sopo efi mele spaia, tamlohi atu mo ʻomira mo ʻomaliho hinia, Ale, sahara hinira i pa opoi tamlohi atu i tavera jea?”

<sup>43</sup> Simon mo ʻaramia mara, “Korong haratu sei nona ave isana mo tavera jea.” Ale Iesu mo vereea isana mara, “Nom kilakilau mo tataholo.”

<sup>44</sup> Moiso mo posi vano isan haʻai atu, ale mo vereea isan Simon mara, “Ko hite haʻai nike? Na unu na imam, ko sopo sileau hin te wai vara a hoje na paloku hinia, pani enia mo hoje na paloku na wai matana, ale mo kamotira na vuluna. <sup>45</sup> Ko sopo pungosiau, pani mo tapulo hin haratu mo unu, mo sopo lo mapu mata pungosi

na paloku. <sup>46</sup> Ko sopo rengi na wel na patuku, pani enia mo rengi na hasori ruhu jea na paloku. <sup>47</sup> Matan harahi, na vereea isam, varaʻruhu nona hehe mo matuvana, pani na ʻomira moiso matan nona opoia mo tavera jea. Pani haratu nona hehe mo sopo maʻivi jea, nona opoia mo sopo tavera.” <sup>48</sup> Ale mo vereea isan haʻai atu mara, “Na ʻomiho mata nom hehe.”

<sup>49</sup> Ale la haratu la lo sakele peresia na tep, la tapulo vereveera isara hasera lara, “Sava tamlohi nahai, matan mo hitea vara i efi ʻomi na hehe?”

<sup>50</sup> Mo vereea isan haʻai atu mara, “Nom rasua mo juriho; o vano o toho na tamata.”

## 8

### *Haʻai La Usuri Iesu*

<sup>1</sup> Hitahun haratu Iesu mo lo vano toho na taon tavera peresi na vanua. Mo lo retivujavujangi ale mo lo sile na Retiʻruhu matan mauri atu God mo aulu hinia. Ale la nona tamlohi atu mo sangavulu ʻomana mo rua la lo toho peresia, <sup>2</sup> ale peresi na haʻai hai sei Iesu mo lo titiu naʻihi na tanume sasati isara peresi na nora rojoa: Mary la tovia Magdalene, enia natu, tanume sasati mo limaravrua la malue isana, <sup>3</sup> peresi Joanna, naroun Chuza, patu tamlohi mata kilau na iman supe Herod, peresi Susanna, enira peresi na vao matuvana tinapua la lo tueni Iesu peresi na nona tamlohi na nora tadvav purongo.

### *Tamlohi Lavo Na Piri (Mt 13.1-9; Mk 4.1-9)*

<sup>4</sup> Ale na rani vao tavera la lo tapulo takonahi, ale tamlohi mata taon tari la lo mai isana, moiso Iesu mo vere na titileu matea mara, <sup>5</sup> “Tamlohi hapoʻahi piri matea mo vano vara i hapoʻahi na piri. Mo lo hapoʻahi na piri mo lo vano, tatuara la jovi na malele, ale tamlohi la varasi kosakosahira, ale maji avuavu la hanira. <sup>6</sup> Tatua piri la jovi na vatuvatu, ale na rani la ulua la mele mahoa matan mo sopo te heu i tikelira. <sup>7</sup> Ale tatua piri la jovi na livuha vipahai ngaʻngaʻiha, ale

vipahai ngaŋgaŋiha la punira. <sup>8</sup> Ale tatua piri la jovi na lepa ŋuhu, ale la ulua la vua la namaha mo vaha ngavu sangavulu hin la haratu mo lo hapoŋahira tiroma. Haratu mo eŋi rongovosahia, o tapurongo!”

*Mo Sile Na Titileu Mata Sava  
(Mt 13.10-17; Mk 4.10-12)*

<sup>9</sup> Ale na rani nona tamlohi usuri lara la usia na ŋaramin titileu atu, <sup>10</sup> mo vereea mara, “Isamim God mo tinaŋihia vara ha pa levosahi na hina luhu matan mauri atu God mo aulu hinia, pani isana tamlohi tinapua enia mo lo toho na titileu matan vara Retitapu i pa masese:

‘La hite na sava na lo vaia  
pani la pa sopo hitevosahia,  
la pa rongo na sava na lo vereea,  
pani la pa sopo rongovosahia.’  
*Isa 6.9*

*Titileu Atu  
(Mt 13.18-23; Mk 4.13-20)*

<sup>11</sup> Ale ŋaramin titileu atu enia nahai: Piri atu enia reti non God. <sup>12</sup> La haratu na malele enira la haratu la rongoa moiso, ale Tiapolo mo mai, mo lanaŋihi reti atu na mapura matan vara la pa sopo eŋi rasua, ale vara la eŋi juri hinia. <sup>13</sup> La haratu na vatuvatu enira la haratu la rongo reti atu, la lavia na avulahi. Pani mo sopo te warira, la rasua mata makomo rani purongo, ale na rani vaihite, la jovi. <sup>14</sup> La haratu la jovi na livuha vipahai ngaŋgaŋiha enira la haratu la rongo reti atu pani lara la vano, ŋomkaka peresi na ŋom tavgav peresi na masalo tamlohi mo punira, ale vuara la sopo jea. <sup>15</sup> Pani la haratu la jovi na lepa ŋuhu, enira la haratu la rongo reti atu, ale la tauria mo ŋilangi na mapura ŋuhu na posposi varaŋuhu, ale la vua peresi na ŋomperavu.

*I Pa Sopo Te Hinai I Eŋi Luhu  
(Mk 4.21-25)*

<sup>16</sup> Mo sopo te tamlohi vara i hasahi na nona lamu matea ale i povia hin te baket teni i taua na ruhuru vata matea, mo vono. Pani i pa kehoia aulu na jarana matan vara tea la

unu na imana la pa hite na merana. <sup>17</sup> Matan i pa sopo te hinai hatea i eŋi luhu vara i pa sopo pala, teni te hina luhu vara i pa sopo pala na jara tavera. <sup>18</sup> Ha lo levosahi na sava ka lo rongoa, matan isan haratu mo lavia, i pa mele lavia i tavera jea, ale isan haratu mo sopo te nona, hina purongo vara sava mo ŋomŋomia vara mo lavi moiso, la pa lanaŋihia isana.”

*Tasin Peresi Na Vetasin Iesu  
(Mt 12.46-50; Mk 3.31-35)*

<sup>19</sup> Ale tinana peresi na tasina la mai isana, pani la sopo eŋi mai mariviti isana matan vao tavera atu. <sup>20</sup> Hai la vereea isana lara, “Tinam tolu na tasim la lo turu na jingoima, la opoia vara la hiteho.”

<sup>21</sup> Pani Iesu mo ŋaramira mara, “Tinaku peresi na tasiku enira la haratu sei la rongo na reti non God ale la vaia.”

*Iesu Mo Savurahi Na Langi  
(Mt 8.23-27; Mk 4.35-41)*

<sup>22</sup> Na rani matea mo vele na boti matea tolu na nona tamlohi usuri, ale mo vereea isara mara, “Ra vano tavalu vano na tavalu tasin Galilee.” Ale la malue, <sup>23</sup> ale la pa lo vano, ale Iesu mo juruvi ŋomaliho. Ale langi tavera matea mo jovi hin tasi atu, botira mo lo utua, mariviti la pute.

<sup>24</sup> Ale nona tamlohi la vano la ŋohaia lara, “Moli, Moli, ŋa lo tapulo tihai!” Ale mo turu mo reti savurahi langi atu peresi la leputi tavera atu ale la isoiso mo tamata. <sup>25</sup> Mo vereea isara mara, “Nomim rasua mo lo toho epu?” Ale la matahu la maŋurahi tavera hinia, la lo verevere isara lara, “Sava tamlohi nahai? Enia mo reti purongo isana langi peresi na tasi, ale la ololo hinia!”

*Tanume Sasati Na Mara Gerasenes  
Matea*

*(Mt 8.28-34; Mk 5.1-20)*

<sup>26</sup> Hitahun haratu la hapahapan la vano na jara mara Gerasenes, jara atu enia mo lo toho na tavalun Galilee. <sup>27</sup> Iesu mara mo sevuti na jarauta, tamlohi matea tanume sasati la lo toho hinia mo pala isana. Tuai

moiso tamlohi atu mo lo malamala purongo, ale mo sopo toho na lolon te ima pani tarea mo lo toho na jara taptap. <sup>28</sup> Ale pa tamlohi atu mara mo hite Iesu, mo ulo aulu, ale mo mai mo jovi na nahon Iesu mo vereea na leo tavera matea mara, “Engko te nom sava isaku, Iesu Natun God Aulu Jea? Na tangi isam, aah! O sopo vailejilejiau!” <sup>29</sup> Matan mo retileu isan tanume lumiha sasati atu vara i malue hin tamlohi atu. Matan rani mo visa moiso tanume sasati atu mo lo sohoni tamlohi atu. Tamlohi la taurilatia ale la tau na jen na limana peresi na palona, pani mo lo roto la jen atu, ale tanume sasati atu mo tiroma hinia mo lo vano na jara hase-toho.

<sup>30</sup> Iesu mo usia isana mara, “Hijam hare?” Ale mo vereea mara, “Legion!” Hija atu mo vereea matan tanume sasati matuvana jea la lo toho hin tamlohi atu. <sup>31</sup> Ale tanume sasati la tangi isana vara i pa sopo retileu isara vara la sivo hin koko tavera jea atu sei mo sivo atano jea na lolo varama mata mateia. <sup>32</sup> Hin jara atu vao poi matea la lo hahani na pahisa vutivuti atu, ale la tanume sasati atu la tangi isana vara i tinañihira la unu hinira, ale mo tinañihira. <sup>33</sup> Ale la tanume sasati atu la malue hin tamlohi atu la unu hin pa vao poi atu, moiso vao poi atu la maro sevuti hin pesapesa atu la jovi sivo na tasi la pute.

<sup>34</sup> Ale tamlohi kilau la poi atu lara la hite hinau atu mo masee, la rovo ale la sorahia na taon tavera peresi na jara řalihi atu. <sup>35</sup> Ale moiso tamlohi la vano vara la hite na sava mo masee, ale la kau isan Iesu la tapai pa tamlohi atu sei tanume sasati la lo malue hinia moiso mo lo sakele na palon Iesu, mo ruru ale řomina mo řuhu moiso, ale la matahu. <sup>36</sup> Ale la haratu sei la lo hite hinau atu la vereea isara sohena sava tanume sasati la malue hin tamlohi atu. <sup>37</sup> Ale tamlohi tari řalihi hin jara atu Gerasenes la usia vara i malue isara, matan matahu tavera mo sohonira. Ale mo mele vele hin pa boti atu ale mo mele hilu. <sup>38</sup> Pa tamlohi atu sei tanume

sasati la lo malue isana, mo usia řilangi vara i usuria, pani Iesu mo řulea mara, <sup>39</sup> “O mule, ale o vereuli na sava God mo vaia matam.” Ale mo vano, mo retivujavujangi na jara tari hin taon tavera atu na sava Iesu mo vaia matana.

*God Mo Lo Kilau Mata Rasua  
(Mt 9.18-26; Mk 5.21-43)*

<sup>40</sup> Ale na rani Iesu mo mele hilu, pa vao tamlohi atu la avulahi matan la lo saovia.

<sup>41</sup> Ale hin jara atu, tamlohi matea hijana Jairus mo mai isana, enia tamlohi aulu hin ima lotu atu. Ale mo jovi na palon Iesu mo tangi isana vara i mai na imana, <sup>42</sup> matan venatuna vorahese matea, taunina mo sangavulu řomana mo rua, mariviti i mate.

Ale Iesu mo lo vano, tamlohi la lo tiatia hinia. <sup>43</sup> Ale hañai matea, rojo nona hañai mo lo toho mo tuai isana mata tauni mo sangavulu řomana mo rua moiso, hina purongo vara mo jalahi vevuhi na nona mania isana Doctor, mo sopo tea i eñi vai mamahunia. <sup>44</sup> Mo mai na hañin Iesu, ale mo tikeli na revrevu nona ruru, ale vahatea purongo nona rojo mo isoiso.

<sup>45</sup> Ale Iesu mara, “Hare natu mo tikeliau?”

Tamlohi tari lara enira mo vono, ale Peter mara, “Moli, vao nike la porotiho, la lo tiatia isam!”

<sup>46</sup> Pani Iesu mara, “Tamlohi matea mo tikeliau, matan na rongovosahia vara suiha mo malue isaku.” <sup>47</sup> Ale na rani hañai atu mo hitea vara i sopo eñi mele luhu, mo mai isana mo savaravara, mo jovi na nahona, ale mo vereulia na naho tamlohi vara mata sava natu mo tikelia, ale sohena sava Iesu mo vai na nona rojoa mo tihai vahatea purongo. <sup>48</sup> Ale Iesu mo vereea isana mara, “Venatuku, nom rasua mo vaiho ko řuhu; o vano peresi na tamata.”

<sup>49</sup> Na rani mo pa lo retireti, volitusi matea na iman tamlohi aulu atu mo mai isan tamlohi aulu atu mara, “Venatum mo tihai moiso; o sopo mele vereea isan Tija sei.”

<sup>50</sup> Pani Iesu mara mo rongō hināu atu mo vereā isana mara, “O sopo matahu; o rasuau purongo ale venatum i pa ŋuhu.”

<sup>51</sup> Ale na rani mo mai mo kau na iman pa tamlohi aulu atu, mo sopo tināhīhia vara tea i unu peresia, pani Peter purongo enia John, James, peresi taman haŋarihi atu enia tinana. <sup>52</sup> Ale tamlohi la lo tangi, ale la lo tangtangi matana, pani Iesu mo vereā mara, “Ha sopo tangi matan enia mo sopo mate, pani mo lo juruvi purongo.”

<sup>53</sup> Ale la manaluluhia matan la levosahia vara enia mo mate moiso. <sup>54</sup> Pani mo tauri na limana mo tovia mara, “Natirihi, o turu!” <sup>55</sup> Ale maurina mo mele unu hinia, ale mo turu vahatea. Iesu mo vereā isara vara la silea hin te hināu vara i hania. <sup>56</sup> Ale tamana enia tinana la maŋurahi tavera, pani mo vereā isara vara la sopo mele vere te tamlohi hatea na sava mo masese.

## 9

### *Iesu Mo Rule Na Nona Vahaŋule* (Mt 10.5-15; Mk 6.7-13)

<sup>1</sup> Ale mo tovi la tupu sangavulu ŋomana mo rua atu la mai jara matea, ale mo silera na suiha vara la aulu na tanume sasati tari, ale vara la eŋi vai na rojoa la tihai, <sup>2</sup> ale mo ŋulera la vano vara la retivujavujangi hin mauri atu God mo aulu hinia, ale vara la vai mamahuni na tamlohi na nora rojoa. <sup>3</sup> Ale Iesu mo vereā isara mara, “Ha vano lekoleko na malelemim, ha sopo lavi te tihonimim teni te tanga, teni te pereti, teni te mania, ale ha sopo lavi te ruru i rua. <sup>4</sup> Ale sava ima ka unu hinia, ha lo toho atu i tikeli na rani ka opoia vara ha mele malue hin taon atu. <sup>5</sup> Ale sava jara la ŋohu vara la lavi kamim, vara ka malue hin taon atu, ha saŋsaŋhi naŋihi na tangotango palomim sohena matamata matea matan God mo tipahira.”

<sup>6</sup> Nona tamlohi la malue la vano na vanua tari, la retivujavujangi na Retiŋuhu, la vai na rojoa la tihai na jara tari la vano ea.

### *Supe Herod Antipas Mo Romikaka* (Mt 14.1-12; Mk 6.14-29)

<sup>7</sup> Hin rani atu, Herod Antipas natun supe Herod mo lo tamlohi aulu hin Judea, ale mo rongō la hināu atu la lo masese, ŋomina mo sopo sakele matan hai la lo vereā lara John tamlohi Paptijo mo mele turu na mateia, <sup>8</sup> ale hai lara Elijah mo mele pala, hai tinapua isara lara pŋovet matan tuai matea mo mele turu.

<sup>9</sup> Herod mara, “Enau na tairoto na patun John moiso, pani sava tamlohi nahai sei na lo rongō na sorasorahina?” Ale Herod mo opoia vara i hitea.

### *Mo Vahani Na Vao Tavera Matea* (Mt 14.13-21; Mk 6.30-44; Jn 6.1-14)

<sup>10</sup> Na rani vahaŋule non Iesu la mele pala, la vere na hināu tari la vaira isana. Ale mo lavira la malue la vano hasera na taon matea la tovia Bethsaida. <sup>11</sup> La vao atu lara la levosahia, la usuria ale mo avulahi hinira mo vujangira hin mauri atu God mo aulu hinia, ale mo vai na rojoa non la haratu la rojo la tihai. <sup>12</sup> Ravravi mo lo sivo, ale la tupu sangavulu ŋomana mo rua atu la mai la vereā isana lara, “O ŋule vao nike la vano la aleale hara hināu peresi na nora jara juruvi na vanua tari hin jara tavera nike, matan ŋa lo toho na jara hasetoho nahai.”

<sup>13</sup> Pani mo vereā isara mara, “Kamim natu ha silera hin te hināu vara la hania.”

Lara, “Kama lo lavi na pereti mo lima peresi na maji mo rua purongo, avei ko lo vereā vara kama pa vano mata voli te hināu han la tamlohi tari nike?” <sup>14</sup> Matan evi tamlohi purongo korong mo tikeli tari vaha lima (5000) Iesu mo vereā isana nona tamlohi usuri mara, “Ha vaira la sakele tamlohi mariviti i ngavulu lima na vao matea.” <sup>15</sup> Ale la vaia sohena, la vaira enira mo isoiso la sakele. <sup>16</sup> Ale Iesu mo lavi la pereti atu mo lima peresi la maji atu mo rua, mo taŋa sahe aulu na tuka mo leŋuhu hinira, moiso mo tope la pereti atu mo silea isana nona tamlohi usuri vara la taua na

nahon la vao atu. <sup>17</sup> Ale tamlohi tari la hanhahi la masu. Ale la takonahi na sope hanhahi, la sohonia na tanga mo sangavulu řomana mo rua.

*Iesu Enia Křisto*  
(Mt 16.13-19; Mk 8.27-29)

<sup>18</sup> Na rani tinapua matea, Iesu mo lo usiisi enia hasena, ale nona tamlohi usuri la lo toho atu, ale mo usia isara mara, “La vao nika la lo vereaa lara enau hare?”

<sup>19</sup> Ale la řaramia lara, “John tamlohi paptijo. Pani hai lara Elijah, ale tatuara lara přovet matea matan tuai mo mele turu.”

<sup>20</sup> Moiso mo vereaa isara mara, “Pani kamim kara enau hare?” Ale Peter mo řaramia mara, “Engko Křisto non God!”

<sup>21</sup> Ale mo horora vara la sopo mele vere hinau atu isan te tinapua hatea, <sup>22</sup> mara, “Natun tamlohi i pa lavi na rongohaji na hinau matuvana, ale tamlohi aulu hin Israel peresi na Moli mata přis tolu na tamlohi vujangi mata leu, la pa řohu hinia, la pa vilimateia, ale na hatolu rani i pa mele turu na mateia.”

<sup>23</sup> Ale mo vereaa isara mo isoiso mara, “Vara tea mo opoia vara i usuriau, i řohu na masalona, ale i soloti na nona talopeilopei tarea ale i usuriau. <sup>24</sup> Matan sava tamlohi mo opoia vara i hase juri na maurina, maurina i pa tihai; pani sava tamlohi mo vaitihai na masalona matak, i pa juri na maurina. <sup>25</sup> Matan sava mo řuhu isana tamlohi matea vara i lavi vevuhi na hinau tari na varama, pani hitahu maurina i pa tihai? <sup>26</sup> Matan hare mo mahanuhanu hinia peresi na noku reti, Natun Tamlohi i pa mahanuhanu hinia hin rani atu vara i mai na hasohasona tolu na hasohason Tama peresi na angelo tapu. <sup>27</sup> Pani varařuhu na vereaa isamim, vara tatuamim la lo turu nakerihi ak-erihhi la pa sopo hite na mate vavano la hite mauri atu God mo aulu hinia i pala.”

*La Hite Na Hasohason Iesu*  
(Mt 17.1-8; Mk 9.2-8)

<sup>28</sup> Ale korong rani mo limaravtolu mo vano moiso hin la nona retireti

atu, Iesu mo lavi Peter, John peresi James la sahe aulu na vutivuti mata usiisi. <sup>29</sup> Ale mo lo usiisi, nahona mo posi, ale nona ruru merara la řilangi jea mata kilaura. <sup>30</sup> Eh! Tamlohi mo rua la lo retireti peresia, Moses enia Elijah, <sup>31</sup> la pala na hasohaso tavera la lo sorahia na nona malue sei i pa masese Jerusalem i pa sopo tuai.

<sup>32</sup> Ale Peter tolu na tapalana sei la lo toho peresia la malokoloko sati na juruvi, pani mara la hite na hasohasona peresi na tamlohi mo rua la lo turu peresia matara mo řilangi. <sup>33</sup> Ale la tamlohi atu lara la lo malue isana, Peter mo vereaa isan Iesu mara, “Tamlohi tavera, mo řuhu jea matan kama lo turu ak-erihhi nakerihhi. Mo řuhu vara kama turuhi te tent i tolu ak-erihhi, nom matea, matea non Moses, ale matea non Elijah!” Pani Peter mo sopo levosahi na sava mo lo vereaa. <sup>34</sup> Mo pa lo vere la hinau sei, telangi matea mo jovi tataholo isara, ale matahu tavera mo sohonira matan telangi atu mo hovira.

<sup>35</sup> Ale leo matea mo malue hin telangi atu mara, “Haranika enia Natuku, haratu na viřonia; ha tapurongo isana!” <sup>36</sup> Leo atu mara mo reti mo isoiso, Iesu hasena mo pa lo toho atu. Ale la nona tamlohi usuri atu la sopo mele verevereaa, ale la sopo vere na sava la hitea isan tea hin la rani atu.

*Natun Tamlohi Matea*  
(Mt 17.14-21; Mk 9.14-29)

<sup>37</sup> Mo mele rani sahe, lara la sevuti hin vutivuti atu moiso, vao tavera matea mo tapaira. <sup>38</sup> Ale moiso, tamlohi matea hin vao atu mo ulo mara, “Tija, na usia řilangi isam vara o mai o hite natuku matan enia vorahese. <sup>39</sup> Tanume sasati matea mo sohonia, ale vahatea purongo mo ngara. Mo lo tuatuahia vavano valval jingona mo lo malue; mo lohilohe na epena tari, mo řohu vara i malue hinia. <sup>40</sup> Na usia řilangi isana nom tamlohi usuri vara la pa titiu nařihia, pani la sopo eři vaia!”

<sup>41</sup> Iesu mo řaramia mara, “Kamim mo sopo te nomim rasua, ka pina

lejileji, na sopo levosahia vara a pa toho i tikeli pangisa isamim natu ha pa rongovosahi. O lavi natum i mai!”  
<sup>42</sup> Mo pa lo mai, tanume lumiha sasati atu mo mele vujahia sivo na lepa, ale mo tuatuhia. Pani Iesu mo savurahi tanume sasati atu, ale mo vai na epena tari la mele řuhu, moiso mo silea isan tamana. <sup>43</sup> Ale tamlohi tari la mařurahi tavera na suiha tavera non God.

### *Iesu Mo Mele Retireti Vara I Pa Mate*

*(Mt 17.22-23; Mk 9.30-32)*

Pani la pa lo mařurahi na hinau tari sei mo lo vaira, Iesu mo vereea isana nona tamlohi usuri mara, <sup>44</sup> “Ha lo levosahi na sava a pa vereea isamim: i pa sopo tuai la pa tau Natun Tamlohi na lima tamlohi.” <sup>45</sup> Pani la sopo levosahi nona reti sei, God mo jorohia isara matan vara la pa sopo eři rongovosahia, pani la matahu vara la usia na řaramin reti atu.

### *Hare Mo Aulu Mo Jeu Na Tinapua*

*(Mt 18.1-5; Mk 9.33-37)*

<sup>46</sup> Mo sopo tuai vauriuri matea mo malue isara vara hare isara enia mo aulu jea. <sup>47</sup> Pani Iesu mo levosahi na řomira, mo turu mo lavi na natirihia matea mo taua na pahisana, <sup>48</sup> ale mo vereea isara mara, “Vara tea mo lavi te natirihia sohen harihi na hijaku, enia mo laviau. Ale sava tamlohi mo laviau mo lavi haratu mo lo řuleau. Matan haratu mo atano jea hin kamim, enia natu mo aulu jea.”

### *Hare Enia Tapalan Iesu?*

*(Mk 9.38-40)*

<sup>49</sup> John mo řaramia mara, “Moli, kama hite na tamlohi matea mo lo titiu nařihia na tanume sasati na hijam, ale kama vaihitea vara kama horoa matan enia mo sopo vonamam matea.”

<sup>50</sup> Pani Iesu mo vereea isana mara, “Ha sopo horoa, matan haratu mo sopo meresahi isamim enia tatuamim.”

### *Mara Samaria La Tipahi Iesu*

<sup>51</sup> Rani mo lo mai mariviti vara i sahe na tuka, Iesu mo tau na řomina vara i sahe Jerusalem. <sup>52</sup> Ale mo řule

na tamlohi hai la vano tiroma hinia, ale la vano la unu na vanua matea nona mara Samaria matan vara la pa tatamahu matana. <sup>53</sup> Pani la tamlohi atu la řohu hinia matan mo tau na řomina vara i sahe Jerusalem. <sup>54</sup> Ale nona tamlohi usuri sei James enia John lara la rongoa lara, “Moli, ko opoia vara kama usi na hapu na tuka i jovi sivo i sulira?” <sup>55</sup> Pani Iesu mo posi mo reti isara. <sup>56</sup> Ale la malue la vano na vanua tinapua.

### *Hare I Pa Usuri Iesu*

*(Mt 8.19-22)*

<sup>57</sup> La pa lo vano na malele, ale tamlohi matea mo vereea isana mara, “A pa usuriho vano na sava jara ko vano ea.”

<sup>58</sup> Ale Iesu mo vereea isana mara, “Viriu jala enira nora jara juruvi mo lo toho, maji avuavu enira taura, pani Natun Tamlohi mo sopo te nona jara juruvi.”

<sup>59</sup> Isana tinapua mo vereea mara, “O usuriau!”

Pani tamlohi atu mara, “Moli, o tinařihiau a vano a tavuni tamaku tako.”

<sup>60</sup> Ale Iesu mo vereea isana mara, “O tinařihia la haratu la mate la tavuni na nora mate. Pani engko, o vano, o retivujavujangi mauri atu God mo aulu hinia.”

<sup>61</sup> Ale mele tamlohi tinapua matea mo vereea mara, “A pa usuriho Moli, pani o tinařihia vara a vano a tulahi na tahisaku tako.”

<sup>62</sup> Iesu mo vereea isana mara, “Haratu mo sopo tau na řomina i řilangi vara i tikeli na isoisona, mo sopo tataholo vara i unu hin mauri atu God mo aulu hinia.”

*1 Ki 19.19-21*

## 10

### *Vavahinau Nona Tamlohi Usuri*

<sup>1</sup> Hitahun haratu, Moli mo viřoni na tupu ngavulu limaravrua mo rua tinapua

*(72)*, ale mo řule

la vano tiroma hinia, la vano mo rua rua na taon tari peresi na jara sei i pa vano ea i pa sopo tuai. <sup>2</sup> Ale Iesu mo vereea isara mara, “Vua asitauni mo mařivi hajavua pani tamlohi voko

enira tupu visalete purongo. Matana, ha usiuseri isan Moli mata asitauni vara i řule na tamlohi voko la vano mata vu na nona asitauni. <sup>3</sup> Ha vano na malelemim; ha lo levosahia vara na lo řule kamim ka lo vano sohena natu sipsip na livuha viriu jala. <sup>4</sup> Ha sopo lavi te tanga korohi, teni te tanga, teni te sapat, ale ha sopo sile na retiolooolo isan tea na malele.

<sup>5</sup> Sava ima ka unu hinia, tiroma ha vereha vara, "Tamata i pa toho hin ima akerihi!"

<sup>6</sup> Ale vara tea hin ima atu mo avulahi hin kamim, nomim leruhu i pa lo toho isana, pani vara mo vono, i pa mele hilu mai isamim. <sup>7</sup> Ale ha lo toho hin ima atu purongo, ale ha lavi na sava la silea mata inua peresi na hanhani, matan mo tataholo vara tamlohi voko i lavi na volina. Ha lo juruvi na ima matea purongo.

<sup>8</sup> Vara ka unu na taon matea, ale la lavi kamim, ha hani na sava la taua na nahomim. <sup>9</sup> Ha vai na nora rojoa la tihai, ale ha vereha isara vara, 'Mauri atu God mo aulu hinia mo mai mariviti isamim moiso.' <sup>10</sup> Pani vara ka unu na taon matea, ale la řohu hin kamim, ha sivo na nora malele tavera, ale ha vereha vara, <sup>11</sup> 'Kama sařsařhi nařihi na tangotango nomim taon na palomam sohena matamata matea na nahomim matan ka řohu hin kamam, ale matana, God i pa řohu hin kamim. Ha lo levosahia vara mauri atu God mo aulu hinia mo lo mai mariviti.' <sup>12</sup> Varařuhu na vereha isamim, vara talai non Sodom i pa sopo řilangi i tikeli na talai nona taon sohen harihi na rani mata aria.

### *Tamlohi Matuvana Israel La Sopo Rasua* (Mt 11.20-24)

<sup>13</sup> Rani sasati isam Chorazin! Rani sasati isam Bethsaida! Matan vara la hina mařurahi nike sei la vaira isamim la pa lo vaira hin Tyre enia Sidon, enira la pete posi moiso tuai, la ru na paraparati paki, ale la vuluvului na patmakovi moiso mata nora hehe. <sup>14</sup> Pani talai non Tyre enia Sidon i pa sopo řilangi i tikeli na nomim talai na rani mata aria. <sup>15</sup> Ale engko Capernaum, ko řom vara God i

pa taheho o sahe na tuka? I pa tauho sivo atano na varama mata mateia!

<sup>16</sup> Haratu sei mo tapurongo isamim mo tapurongo isaku, ale haratu mo řohu hin kamim mo řohu hinia; ale haratu mo řohu hinia mo řohu hin haratu sei mo lo řuleau."

<sup>17</sup> Hitahu la tupu ngavulu limaravrua mo rua atu la mele hilu mai isan Iesu na avulahi lara, "Moli, tanume sasati sohena, la oloolo hin kamam mata hijam!" <sup>18</sup> Ale Iesu mo vereha isara mara, "Na hite Setan mo jovi sivo atano sohena vaha na masapa mo sari na varama. <sup>19</sup> Ha lo levosahia vara na sile kamim na suiha vara ha varasi na mata peresi na novu lepa peresi na suiha tari tinatinapua non Setan matan ha pa aulu hinira mo isoiso, ale i pa sopo te hinia hatelete hinira i eři komo kamim. <sup>20</sup> Varařuhu, pani ha sopo avulahi matan tanume sasati la oloolo hin kamim; pani ha avulahi matan God mo uli na hijamim moiso na tuka!"

### *Iesu Mo Vere Meje Isan God Tama* (Mt 11.25-27; 13.16-17)

<sup>21</sup> Na ranin hinia atu, Iesu mo avulahi na suihan Tanume Tapu ale mara, "Na vere meje isam Tama, Moli matan tuka peresi na varama, matan ko jarohi la hinia nika isana tamlohi lelevosahi peresi na tamlohi rongovosahi, ale ko vujangira isana natuvarihi purongo. Varařuhu Tama, ko avulahi hinia matan mo usuri na masalom řuhuřuhu!"

<sup>22</sup> Tamaku mo sileau na hinia tari, ale mo sopo tea i levosahia vara Natuna enia hare pani Tama purongo, ale mo sopo tea i levosahi Tama pani Natuna purongo peresi na sava tamlohi Natuna mo viřonia vara i vujangia isana."

<sup>23</sup> Moiso mo posi vano isana nona tamlohi usuri mo varavaramasa isara mara, "Avulahi isamim matan ka hite na sava ka lo hitea. <sup>24</sup> Varařuhu na vereha isamim, přovet peresi na supe matuvana la lo kilau vara la hite na sava ka lo hitea, ale vara la rongo na sava ka lo rongoa, pani la sopo rongoa."

### *Retileu Atu Mo Aulu Jea*

<sup>25</sup> Ale na rani matea tamlohi lelevosahi mata leu matea mo turu vara i vaihite Iesu na retiusia matea sohen harihi, “Tija, a pa vai na sava natu, vara a lavi na mauri tui hinia?”

<sup>26</sup> Iesu mo vereia isana mara, “La uli na sava na Leu? Na nom kilakilau mo vereia sohena sava?”

<sup>27</sup> Ale mo řaramia mara, “‘O opoi Moli nom God vevuhi na mapum, na maurim, na suiham peresi na řomim’; *Deut 6.5* ale, ‘O opoi na tahisam sohen ko lo opoiho hasem’.” *Lev 19.18*

<sup>28</sup> Moiso, Iesu mo vereia isana mara, “Ko vereia mo tataholo. O vaia sohena, ale o pa mauri matana.”

### *Hare Enia Tahisaku?*

<sup>29</sup> Tamlohi atu mo opoia vara i hasena vaia i tataholo na nahon Iesu, ale mo vereia isan Iesu mara, “Ale, hare enia tahisaku?”

<sup>30</sup> Iesu mo řaramia mara, “Ale na rani matea tamlohi matea mo tai Jerusalem mo lo sivo Jericho, ale tamlohi vili na tamlohi mata vavanaho hai la tauria la řari nařihi na nona ruru, la lavi nařihi na nona mania, moiso la vilia la pulahia na malele mariviti i mate, ale la malue.

<sup>31</sup> Ale mo sopo tuai pñis matea mo lo sevuti hin malele atu mo hitea, pani mara mo hite tamlohi atu mo hahau pahipahi hinia. <sup>32</sup> Ale sohen haratu purongo, tamlohi voko na Temple matea na vaon Levi mara mo mai hin jara atu mo hitea, ale mo hahau pahipahi hinia. <sup>33</sup> Pani hitahu, mara Samaria matea na nona hahau mo mai hin jara atu, ale mara mo hitea mo řomopoia. <sup>34</sup> Mo rautoho na pahisana, mo rengi na wel peresi na waen na matara maja, ale mo pesira, moiso mo taua aulu na haři pulana donki, ale mo lingia mo mai na ima mapu matea, mo lo kilaua atu. <sup>35</sup> Mele rani sahe tamlohi atu mo sile na tamlohin ima mapu atu na mania mo tataholo mata voko mata rani mo rua mara, ‘O lo kilaua, ale sava hinau ko jalahia matana, a pa mele spaia na rani na mele pala nike.’ ”

<sup>36</sup> Ale Iesu mo usia isana mara, “Na řomim, sava tamlohi natu hin la haratu mo tolu enia tahisan tamlohi atu sei tamlohi vili na tamlohi mata vavanaho la tauria?”

<sup>37</sup> Moiso pa tamlohi atu mo řaramia mara, “Haratu mo řomopoia.” Ale Iesu mo vereia isana mara, “O vano o vaia sohena.”

### *Martha Enia Mary*

<sup>38</sup> Ale na malelera la lo vano Jerusalem, Iesu mo unu na vanua matea, ale hařai matea hijana Martha mo avulahi vara i unu na imana. <sup>39</sup> Ale vetasina matea hijana Mary, mo sakele na palon Moli mo lo tapurongo na nona vujangi. <sup>40</sup> Pani Martha mo tiatia na nona tatamahu, ale mo mai isan Iesu mara, “Moli, ko sopo řomiau matan vetasiku mo rovo hiniau, ale enau haseku purongo na lo tatamahu? O vereia isana vara i mai i tueniau!”

<sup>41</sup> Pani Moli mo řaramia mara, “Martha, Martha engko ko řomkaka na hinau matuvana, <sup>42</sup> pani hinau matea mo aulu jea. Mary mo viřoni na sava mo mele řuhu jea sei tea i pa sopo eři lavi nařihia isana.”

## 11

### *Vujangi Mata Usiusi* (Mt 6.9-15; 7.7-11)

<sup>1</sup> Ale Iesu mo lo usiusi na jara matea, ale mara mo isoiso, nona tamlohi usuri matea mo vereia isana mara, “Moli, o vujangi kamam mata usiusi sohen John tamlohi paptijo mo lo vujangi na nona tamlohi usuri hinia.”

<sup>2</sup> Ale Iesu mo vereia isara mara, “Vara ka usiusi, ha vereia vara:  
God Tama, kama opoia vara tamlohi tari la sile na ololo tavera isam  
matan engko ko tapu.  
Kama opoia vara nom suiha aulu mata supe i pala.

<sup>3</sup> O sile kamam na hanhani matan nohorihii,

<sup>4</sup> O řomi kamam matan nomam hehe sohena kama lo řomi na hehe nona tinapua isamam.

O lavi nařihi kamam na hina vaihite.”



<sup>5</sup> Ale mo vereia isara mara, “Ra levosahia vara, vara te tapalam mo mai isam na livuha vutepongi ale mo vereia isam vara, ‘Tapala, o eři sileau hin te pereti i tolu, ale a pa mele spaia, <sup>6</sup> matan tapalaku matea mo pa pala purongo na nona hahau, ale mo sopo te sope hanhani vara a silea isana.’ <sup>7</sup> Ale na lolo ima o pa ulo isan tapalam na jingoima vara, ‘O sopo vaore, matarua mo pelati ale natuku la lo juruvi peresiau na vata. A sopo eři turu vara a sileho hin te hinau.’ <sup>8</sup> Varařuhu na vereia isamim, hina purongo vara enia tapalam matea, o pa sopo eři turu vara o silea hin te hinau hatea, pani o pa turu vara o sile na sava mo opoia matan mo lo ajiho matana.

<sup>9</sup> Varařuhu na vereia isamim, ha usia, ale i pa mai isamim; ha alea, ale ha pa lavutia; ha řerengi, ale i pa roi isamim. <sup>10</sup> Matan tamlohi tari sei la usia la lavia, ale haratu mo alea, mo lavutia, ale isan haratu mo lo řerengi, pelati i pa roi.

<sup>11</sup> Ale sava tama isamim, vara natuna mo usia na maji matea, i pa turu i sile na mata sasati matea isana, pani mo sopo maji sei mo usia? <sup>12</sup> Teni vara mo usia hin te esile toa, i pa turu i silea na novu lepa? <sup>13</sup> Vara kamim sei ka sasati jea, pani ka levosahia sohena sava vara ha sile na otori řuhuřuhu isana natumim, ha lo levosahia vara God Tama na tuka i pa sile na hinau mo řuhuřuhu jea sohena Tanume Tapu, isan la haratu la usia!”

*Beelzebul Enia Setan*  
(Mt 12.22-30; Mk 3.20-27)

<sup>14</sup> Na rani matea Iesu mo titiu nařihi na tanume sasati matea sei mo vai na tamlohi matea mo mengo. Pa tanume sasati mara mo malue, pa mengo atu mo retireti, ale tamlohi la mařurahi tavera. <sup>15</sup> Pani tatuara lara, “Enia mo lo titiu nařihi na tanume sasati na hijan Beelzebul, tamlohi tavera nona tanume sasati!” <sup>16</sup> Ale tatuara, matan la opoia vara la vaihitea, la ajia vara i vai te matamata mařurahi hatea i tai na tuka.

<sup>17</sup> Pani matan Iesu mo levosahi na řomira mo vereia isara mara, “Jara supe tari sei la patumasa na lolora la pa puru, ale patumasa na lolo ima matea i pa aseasera la jovi. <sup>18</sup> Ale, vara Setan sohena mo lo hase valum isana hasena matan enia mo vaiu na eři titiu nařihi na nona tanume sasati, nona suiha mata supe i pa turu sohena sava? <sup>19</sup> Ale, vara na lo titiu nařihi na tanume sasati na hijan Beelzebul, hare natu mo lo tueni na natumim na rani la lo titiu nařihi na tanume sasati? Matan haratu, enira natu la pa nomim tamlohi aria. <sup>20</sup> Pani vara na lo titiu nařihi na tanume sasati na suihan God, ka levosahia vara mauri atu God mo aulu hinia mo pala isamim. <sup>21</sup> Vara tamlohi suiha matea sei mo tatamahu mata valum, enia mo lo matahi na imana tavera, nona tavgav la pa lo toho i řuhu. <sup>22</sup> Pani vara tea mo mele suiha mo jeua mo mai mo valum peresia, ale mo jeua, enia i pa lavi nařihi na nona hinahinau mata vuro sei mo lo tau na nona rasua hinira, ale i pa ase na nona tavgav.

<sup>23</sup> Haratu mo sopo turu peresiau enia mo lo turuleji hinia, ale haratu mo sopo vilevilei peresiau mo lo levuti jalajalai.

*Vujangi Mata Tanume Sasati*  
(Mt 12.43-45)

<sup>24</sup> Vara te tanume lumiha sasati mo malue na tamlohi matea, mo vano řalihi na jara hasetoho mo lo aleale nona jara mapu, ale mara mo sopo hite tea mo vereia mara, ‘A pa mele vano na imaku sei na tai ea!’ <sup>25</sup> Ale, mara mo mele mai mo hite imana atu la tivesia, ale la vai mamahunia. <sup>26</sup> Moiso, mo mele vano mo lavi na tanume lumiha sasati mo limaravrua tinapua sei la sati la jeua, ale la unu hin ima atu ale la lo toho hinia. Ale hitahu, maurin tamlohi atu i pa sati i jeu tiroma.”

<sup>27</sup> Iesu mo pa lo vere la hinau nike, hařai matea hin vao atu mo ulo isana mara, “Avulahi isan hařai atu mo tapeho ale mo kilauho!”

<sup>28</sup> Iesu mo řaramia mara, “Avulahi i pa mele řuhu jea isan la haratu la

rongo na reti non God ale la hahau hinira.”

*Matamata Non Jonah  
(Mt 12.38-42; Mk 8.12)*

<sup>29</sup> Ale vao atu mara mo lo tavera jea Iesu mo tapulo vereia isara mara, “Pina nike enia pina sasati matea. Mo lo ale na matamata, pani i pa sopo efi hite te matamata pani matamata non Jonah purongo. <sup>30</sup> Matan sohen Jonah enia matamata matea isana mara Nineveh, Natun Tamlohi sohena isan pina nike. <sup>31</sup> Ale Vesupe non Sheba i pa turu na rani aria peresi na tamlohin pina nike nake, ale i pa vereia vara talai non pina akerihi mo tataholo, matan enia mo tai na jara asau rove mo sinai vara i tapurongo na lelevosahi non Solomon; pani hinau matea mo mele aulu jea hin Solomon mo lo toho nike. <sup>32</sup> La tamlohi atu matan Nineveh la pa turu na rani aria peresi pina nike nake, ale la pa vereia vara talai non pina nike mo tataholo, matan enira la posi mata retivujavujangi non Jonah; pani tamlohi matea mo aulu jea hin Jonah mo lo toho nike nake.

*Malarani Na Maurim  
(Mt 5.15; 6.22-23)*

<sup>33</sup> Mo sopo te tamlohi i hasahi na lamu, vara i taua na jara jarohi matea na lolo ima, teni i taua na ruhuruhun te tanga; pani i pa kehoia na jarana matan vara la haratu la unu na ima la pa hite na merana. <sup>34</sup> Matam enia lamu mata epem. Vara matam mo lo ruhu, epem tari la lo mařivi na mera; pani vara matam mo sati, epem tari la pa mařivi na řořoha. <sup>35</sup> Matan haratu, o lo kilau mamahu vara sava ko lo řom vara enia mera na lolom mo sopo mera vara ruhu pani řořoha. <sup>36</sup> Pani vara epem tari mo mařivi na mera, ale mo sopo te řořoha hinia, i pa mera vevuhi sohena sasarami lamu matea sei mo lo sileho na merana.”

*Iesu Mo Retiřoařoahaira  
(Mt 23.1-36; Mk 12.38-40; Lk 20.45-47)*

<sup>37</sup> Iesu mo pa lo retireti, ale Pharisee matea mo usia vara i vano na imana i hanhani peresia, ale mo vano mo sakele na jara hanhani. <sup>38</sup> Pharisee atu mo hutua matan Iesu mo sopo javula tiroma vara i pa hanhani. <sup>39</sup> Ale Moli mo vereia isana mara, “Kamim Pharisee ka lo hoje na paniken peresi na peleti na hařira, pani na lolomim ka mařivi na hanmarua peresi na posposi sasati jea. <sup>40</sup> Kamim ka rongorongo vono! Haratu sei mo lo vai na hařina enia mo vai na lolona. <sup>41</sup> Pani ha sile na silesilea na avulahi isan la haratu la vejuveju, ale ha pa vokevoke vevuhi na maurimim tari.

<sup>42</sup> Pani rani sasati isamim Pharisee! Matan ka lo sile na sangavulu solat, oke peresi na pere pahai tari, ale ka lo řomřomi purongo na hinau mo aulu na nahon God sohena nomim ariari, ale ka sopo opoi God. Pani i pa mele ruhu jea vara ha vaira enira mo isoiso.

<sup>43</sup> Rani sasati isamim Pharisee! Matan ka opoi na jara sakele nona tamlohi aulu na lolo ima lotu, ale ka opoi vara tamlohi la lo sile na retioloolo isamim na jara maket.

<sup>44</sup> Rani sasati isamim Pharisee! Matan kamim, ka sohena taptap sei tamlohi la sopo levosahia vara enira taptap, ale tamlohi la hahau aulu hinira pani la sopo levosahia, ale mo vaira la lumiha matana.”

<sup>45</sup> Tamlohi lelevosahi mata leu matea hin la haratu la lo turu atu mo řaramia mara, “Tija, sava ko lo vereia ko vai mahanuhanu hin kamam sohera!”

<sup>46</sup> Ale Iesu mara, “Rani sasati sohena isamim tamlohi lelevosahi mata leu! Matan ka tau na tetehi puhoni isana tamlohi la sopo efi lavira, ale te vonamim hatea mo sopo vai te hinau hatelete vara i tuenira. <sup>47</sup> Rani sasati isamim! Matan ka voro na matamata mata řomřomi na přovet sei tamamim la vilira. <sup>48</sup> Matan haratu, kamim ka nora tuetueni ale ka majinga na sava tamamim la vaira, matan enira la vilira ale kamim ka vai na matamata mata řomřomira na tapura. <sup>49</sup> Matan haratu, God na nona

lelevosahi mo vereā mara, ‘A pa řule te pŗovet peresi na vahařule isara, la pa vilimatei te tatuara ale la tipahi te tatuara.’

<sup>50</sup> Matana, řae pŗovet tari sei mo roro mo tapulo na rani vavahinau hin varama nike, God i pa taua na liman pina nike nake, <sup>51</sup> mo tapulo na řaen Abel mo tikeli na řaen Zechariah, hara sei mo mate na livuha votavota peresi na jara tapu na Temple. Varařuhu na vereā isamim, God i pa sile na talai tavera isan pina nike nake.

<sup>52</sup> Rani sasati isamim tamlohi lelevosahi mata leu! Matan ka lo turuhoro na malele tamlohi vara la eři levosahi God, ale kamim sohena ka sopo levosahi God, ale ka lo turuhoro na tamlohi sei la opoia vara la levosahi God.”

<sup>53</sup> Ale Iesu mara mo malue hin jara atu, Pharisee peresi na tamlohi vujangi mata leu, la tapulo area řilangi, la jinea vara i mele vere te hinau matuvana, <sup>54</sup> la lo sasaovi řořo matana vara la eři tuvaia hin te hinau i pa vereā.

## 12

### *Posposi Tapnetano*

<sup>1</sup> Iesu mo pa lo vano makomona, ale vao tamlohi matuvana la lo takonahi la tiatia hajavua la lo tapulo turu aulu hinira hasera, ale Iesu mo tapulo vereā isana nona tamlohi usuri mara, “Ha lo kilau mata isi nona Pharisee, isi sei enia posposi tapnetano. <sup>2</sup> Mo sopo te hinau vara la jarohia i pa sopo pala, teni te hina luhu vara la pa sopo levosahia. <sup>3</sup> Matan haratu, sava ka vereā na řořoha, la pa rongoa na malarani, ale sava ka varavaramasa hinia na jara luhu, la pa vereulia na jara tavera.

### *Retiřoāřohai Matea* (Mt 10.28-31)

<sup>4</sup> La tapalaku, varařuhu na vereā isamim vara ha sopo matahuni la haratu la lo vilimatei na epemim, pani hitahu la sopo eři mele vai te hinau tinapua. <sup>5</sup> Pani a pa retiřoāřohai kamim hin haratu vara

ha pa matahunia: ha matahuni God sei matan enia mo lo tauri na suiha vara i vilimatei kamim, ale i eři pulahi kamim na moruhapu. Enia natu ha pa matahunia!

<sup>6</sup> Tamlohi tari nike isařa la levosahia vara ha eři voli te vakarakara i lima na selen mo rua purongo, pani God mo sopo řomaliho hin te hatelete. <sup>7</sup> Vulumim hatehateahi na patumim sohena, God mo sopo řomaliho hin te hatelete. Ha sopo matahu matan kamim ka mele aulu jea na vakarakara matuvana na nahon God.

### *Ha Sorahi Iesu Isana Tinapua* (Mt 10.32-33; 12.32)

<sup>8</sup> Ale na vereā isamim vara te vonamim hatea i vereā vara enia noku na naho tamlohi, Natun Tamlohi sohena i pa vereā vara enia nona na naho angelo non God, <sup>9</sup> pani haratu mo vunvunia vara enia noku na naho tamlohi, enau a pa vunvunia vara enia noku na naho angelo non God. <sup>10</sup> Ale tamlohi tari sei la lo veresatihi Natun Tamlohi, God i pa řomira, pani haratu mo veresatihi Tanume Tapu, God i pa sopo řomia.

<sup>11</sup> Ale na rani vara tamlohi la lavi kamim na lolo nora ima lotu, teni na naho tamlohi aulu peresi la haratu la lo tauri na suiha, ha sopo řomkaka vara ha pa řaramira sohena sava teni vara ha pa vere na sava, <sup>12</sup> matan Tanume Tapu i pa vujangi na sava ha pa vereā hin rani atu.”

### *Haratu La Sopo Romřomi God*

<sup>13</sup> Tamlohi matea hin vao atu mo vereā isana mara, “Tija, o vereā isan voraiku vara i ase na korun tamam peresiau.” <sup>14</sup> Pani Iesu mo vereā isana mara, “Tapala, na sopo sinai matan vara a ari teni a ase na nomim hinahinau.” <sup>15</sup> Ale Iesu mo vereā isara mara, “Ha lo kilau, ha toho asau na posposi tari mata marohati na hinau mo sopo te nomim, matan mauri varařuhu enia mo sopo na sava nakonako ka lo lavira.”

<sup>16</sup> Ale mo vere na titileu matea isara mara, “Tamlohi tavgav matea, isana la jea la matuvana hajavua i sopo eři vaira, <sup>17</sup> ale mo lo hase

řomřomia mara, ‘A pa vai na sava natu, matan mo sopo te jara vara a pa tau mamahuni la vua isaku nike hinia?’<sup>18</sup> Ale mara, ‘Ale! Na levosahi na hinau matea a pa vaia, a pa kauti nařihi la noku pea nike, ale a mele vorora la mele tavera jea, ale a pa takonahi na vua isaku peresi na noku hinahinau hinira.’<sup>19</sup> Ale a pa vereaa isaku haseku vara, ‘Engko nom hinau řuhu mo mařivi, ko takonahira la eři toho mata tauni matuvana: o mapu, o hanhani, o inu ale o avulahi.’

<sup>20</sup> Pani God mo vereaa isana mara, ‘Tamlohi rongorongono vono! Hin vutepongi akerihi purongo, a pa nařihi na maurim, ale la hinau sei ko lo tatamahunira la pa sopo řuhu matan te hinau isam.’

<sup>21</sup> I pa sohenaa isan haratu sei mo lo takonahi na nona tavgav mata masalona, pani mo sopo řomřomia vara i tapala řuhu peresi God.”

#### *Ha Sopo Romkaka (Mt 6.25-34)*

<sup>22</sup> Ale Iesu mo vereaa isana nona tamlohi usuri mara, “Matan haratu, na vereaa isamim, ha sopo řomkaka mata maurimim vara sava ha pa hania, teni na epemim vara sava ha pa rua.”<sup>23</sup> Matan mauri mo aulu jea, mo jeu na hanhani, ale epemim mo aulu jea, mo jeu na ruru.<sup>24</sup> Ha to řomřomi na maji avuavu, enira la sopo lavo teni la sopo vu, ale mo sopo te nora jara tatamahu teni te pea, pani God mo lo vahanira. Ka levosahia vara na nahon God kamim ka mele aulu jea na maji avuavu!<sup>25</sup> Ale sava tamlohi isamim na nona řomkaka i eři vai na maurina i mele peravu matan te aoa hatea?<sup>26</sup> Ale vara ha sopo eři vai te hina rihirihi hatea sohen haratu, mata sava natu ka lo řomkaka na hinau tari?

<sup>27</sup> Ha to řomřomi na lili wai sohenaa sava la lo ulua, la sopo voko, la sopo tulai na nora ruru, pani na vereaa isamim vara ruru řuhuřuhu non Solomon na nona tavgav tavera, la sopo řuhu sohenaa ruru non te lili wai hatea.<sup>28</sup> Pani vara God mo ru na řuvuřuvu matan nahapani purongo,

pani pavuho mo mahoa, ale la pulahia na hapu, mo sohenaa sava, ka řom vara God i pa sopo ruru kamim? Kamim akerihi, nomim rasua mo rihirihi hajavua!<sup>29</sup> Ale ha sopo ale na sava ha pa hania teni na sava ha pa inua, teni ha lo řomkaka.<sup>30</sup> Matan la haratu la sopo levosahi God la lo ale la hinau atu, pani Tamamim mo levosahia vara ka opoira.<sup>31</sup> Pani ha ale mauri atu sei God mo lo silea sei enia mo supe hinia, ale enia i pa silea na hinau tinapua sei ka opoira peresia isamim.

#### *Hinau Atu Na Tuka (Mt 6.19-21)*

<sup>32</sup> Natuvarihi, ha sopo matahu, matan Tamamim enia mo avulahi tavera vara i silea kamim hin mauri atu enia mo supe hinia.<sup>33</sup> Ha harehi na nomim hinahinau, ale ha sile-silea isan la haratu la vejuveju hin te hinau. Ha vai na nomim tanga korohi sei la pa sopo eři řovo hin te rani la mařivi na tavgav matan tuka sei la pa lo toho tui tui ea. Mo sopo te tamlohi vavanaho ea teni te majmaj vara i eři komora atu.<sup>34</sup> Matan sava jara nomim tavgav la lo toho ea, mapumim sohenaa la pa lo toho atu.

#### *Ha Tatamahu Tarea (Mt 24.45-51)*

<sup>35</sup> Ha tatamahu matan Moli, ale ha vai na nomim lamu la lo hani,<sup>36</sup> ale ha sohenaa tamlohi sei la lo saovi nora moli vara i pa mele mule na hanhani lahi matea matan vara la eři roi na matarua isana vahatea na rani mo pala ale mo řerengi.<sup>37</sup> Avulahi tavera isana volitusi tari vara nora moli mo tapaira la pa lo kilau na rani mo pala. Varařuhu na vereaa isamim vara na nona avulahi tavera, moli atu i pa ru na ruru nona volitusi, ale i verera vara la sakele na jara hanhani, moiso i pa lavi na hara hinau i silea isara.<sup>38</sup> Vara mo pala na livuha vutepongi teni na toa tarere ale mo tapaira la pa lo kilau, la volitusi atu la pa avulahi tavera.

<sup>39</sup> Pani ha lo levosahi harihi: vara moli mata ima i pa lo levosahia vara sava rani tataholo tamlohi vavanaho i pa pala hinia, i pa sopo malue na

imana vara tamlohi vavanaho i eři unu na imana. <sup>40</sup> Kamim sohena, ha lo tatamahu, matan Natun Tamlohi i pa mai na rani ka řom vara i pa sopo mai hinia.”

<sup>41</sup> Ale Peter mara, “Moli, ko lo vere titileu nike nomam purongo teni nona tamlohi tari?”

<sup>42</sup> Ale Moli mo vereea mara, “Hare natu enia patu tamlohi lelevosahi matea sei mo lo turu řilangi tarea mata kilau na iman nona moli? Ale nona moli mo taua mo aulu na imana matan vara i vahani na nona volitusi mata imana na rani hanhani tataholo. <sup>43</sup> Avulahi tavera isan volitusi atu vara nona moli mo tapaia mo lo vaia sohena na rani mo pala.

<sup>44</sup> Varařuhu na vereea isamim vara moli atu i pa tau volitusi atu i aulu na nona hinahinau tari. <sup>45</sup> Pani vara volitusi atu mo hase vereea isana vara, ‘Noku moli mo sopo mai vila!’ Ale mo tapulo tamaji na volitusi hařai peresi na lamane, ale mo hanhani ale mo inu mo drong, <sup>46</sup> moli non volitusi atu i pa pala na rani mo sopo řom vara i pa pala hinia na aoa matea mo sopo levosahia, moiso i pa sile na talai tavera jea isana, ale i pa taua peresi la haratu la sopo řuhu. <sup>47</sup> Ale sava volitusi sei mo levosahi na masalon nona moli pani mo sopo tatamahu teni mo sopo vavahinau usuri na masalon nona moli, enia i pa lavi na talai řilangi.

<sup>48</sup> Pani isan volitusi sei mo sopo levosahia vara mo vai na hinau mo sopo tataholo, nona talai i pa sopo řilangi. Isana tamlohi tari sei God mo tau na hinau matuvana na limara, God mo lo kilau mata hinau matuvana jea la pa tai isara.

*Patumasa Matan Rasua Hin Iesu  
(Mt 10.34-36)*

<sup>49</sup> Na sinai vara a pulahi na hapu na varama mata ase na tamlohi vara hare i pa toho jejeu, ale na opoia jea vara mo lo tapulo hani moiso. <sup>50</sup> A pa lavi na paptijo sasati matea mo lo toho na nahoku, ale enia tetehi puhoni matea moiso isaku, ale i pa sohena i tikeli rani atu na lavi vevuhia. <sup>51</sup> Ka řom vara na sinai matan vara a sile na tamata na varama?

Mo vono, pani vara a sile na patumasa. <sup>52</sup> Matan mo tapulo nakerihi mo lo vano, vao ima matea tamlohi mo lima la pa patumasa, mo tolu la pa meresahi hin mo rua, ale mo rua la pa meresahi hin mo tolu. <sup>53</sup> La pa patumasa, tamana i pa meresahi isan natuna, natuna isan tamana, ale tinana i pa meresahi isan venatuna, ale venatuna isan tinana, hařai i pa meresahi isan tinan tuana, ale tinan tuana isan naroun natuna.”

*Ha Hitevosahi Na Hinau Non God  
(Mt 16.2-3; 5.25-26)*

<sup>54</sup> Ale Iesu mo vereea isan vao atu mara, “Vara ka hite na telangi matea mo lo vele Marino, ka vereea vahatea vara, ‘Usa matea mo lo mai.’ Ale mo pala sohena. <sup>55</sup> Ale vara ka hite na langin tahuna mo lo sere kara, ‘Alo i pa tutuni sati!’ Ale mo pala sohena. <sup>56</sup> Ka tapnetano! Ka levosahia vara ha eři vereea vara i pa sohena sava na sava ka lo hitera na varama peresi na masapa, pani mata sava natu, ka sopo eři vereea vara sava rani nahai řa lo toho hinia nake?

<sup>57</sup> Ale mata sava natu ka sopo eři hase hitevosahi na sava mo tataholo? <sup>58</sup> Vara ko lo vano na court, ale i pa mele řuhu vara o tapai haratu mo lo tau kamim na court na malele tako, ale o vaihitea vara o vai tataholoi hinau atu peresia tiroma; vara i vono, o pa turu na nahon tamlohi aria, ale i pa ariho o vano na lima tamlohi ima řilangi, ale i pa tauho na ima řilangi. <sup>59</sup> Varařuhu na vereea isam, o pa sopo eři malue vavano o voli vevuhi na nom ave tari.”

## 13

<sup>1</sup> Hin pongi atu, tamlohi hai la lo toho atu, la vereea isan Iesu lara Pilate mo vilimatei na mara Galilee hai hin rani atu la lo sile na nora malamalai na Temple, ale řaera mo hoi peresi na řae nora malamalai. <sup>2</sup> Ale mo řaramira mara, “Ka řom vara la mara Galilee atu la hehe mo jeu na mara Galilee tinapua matan la lavi na mateia sohena teni mo vono? <sup>3</sup> Mo vono, pani na vereea isamim vara ha sopo posi, kamim mo isoiso ha

pa tihai sohera. <sup>4</sup> Teni la tupu sangavulu ōmana mo limaravtolu atu sei taoa matan Siloam mo jovi mo vilimateira, ka ōm vara enira la hehe mo jeu na tamlohi tari tinatinapua sei la lo toho Jerusalem? <sup>5</sup> Mo vono, pani na vereā isamim, vara ha sopo posi, kamim sohena ha pa tihai sohera.”

#### *Vipahai Pulo Fig Matea*

<sup>6</sup> Ale Iesu mo vereā titileu akerihi mara, “Tamlohi matea mo lavo na pulo fig matea na isana, ale mo mai mo aleale vuana pani mo sopo hite tea. <sup>7</sup> Ale mo vereā isan nona tamlohi voko mata isa mara, ‘Ko hitea, na mai tauni mo tolu moiso vara a hite te naman pulo fig akerihi ale na sopo hite tea. O tai jovia. Mo lo turuhoro na jara purongo.’

<sup>8</sup> Ale mo ōramia mara, ‘Tamlohi tavera, o mele tinaŀhia hin tauni akerihi, a pa heli ŀalihia, ale a pa tau na te buluk i ŀalihia. <sup>9</sup> Ale tavalu tauni korong i pa vua, vara i sohena mo ŀuhu, pani vara mo vono, o eŀi tai jovia.’”

#### *Iesu Mo Vavahinau Na Sabbath*

<sup>10</sup> Na rani matea Iesu mo lo vujangi na ima lotu matea atu na Sabbath. <sup>11</sup> Ale haŀai matea tanume sasati matea mo vai na haŀina mo hoho mata tauni mo sangavulu ōmana limaravtolu. Haŀina mo hoho ale i sopo eŀi turu tataholo. <sup>12</sup> Na rani Iesu mo hitea, mo usia mo mai isana, mo vereā isana mara, “Haŀai, engko ko materi na nom rojoa.” <sup>13</sup> Ale mo tau na limana hinia; ale vahatea purongo haŀina mo tataholo, ale haŀai atu mo hasohaso God.

<sup>14</sup> Pani patu tamlohi mata ima lotu atu mo lolokoru matan Iesu mo vai na rojoa mo tihai na Sabbath, ale mo vereā isana tamlohi mara, “Rani mo limarave la lo toho mata vavahinau hinira. Ha sinai hin la rani atu matan vara i vai na nomim rojoa la tihai, mo sopo na rani Sabbath.”

<sup>15</sup> Moiso Moli mo ōramia mara, “Kamim ka tapnetano! Na levosahia vara kamim hatehateahi ka lo uli naŀihi na pulamim buluk teni donki na nora jara juruvi hin te Sabbath,

ale ka lavia vano vara i inu te wai. <sup>16</sup> Ale ka ōmi vara mo tataholo teni mo vono vara haŀai akerihi venatun Abraham matea sei Setan mo lihoa mata tauni mo sangavulu ōmana limaravtolu moiso, vara i eŀi materi na nona rani ŀilangi na Sabbath?” <sup>17</sup> Ale mara mo lo vereā la hināu atu, nona meresahi tari la mahanuhanu, ale tamlohi mo isoiso la avulaŀi na hina ŀuhuhuhu tari sei mo lo vaira.

#### *Vujangi Mata Piri Paka* (Mt 13.31-33; Mk 4.30-32)

<sup>18</sup> Moiso Iesu mo vereā mara, “Mauri atu God mo aulu hinia mo sohena sava? A pa vereā vara mo sohena sava hināu? <sup>19</sup> Mo sohena piri paka matea tamlohi matea mo lavia mo pulahia purongo, ale mo ulua mo mai vipahai tavera matea; ale maji avuavu la lo vai na taura na rangarangana.”

#### *Vujangi Mata Isi*

<sup>20</sup> Ale mo mele vereā mara, “A pa mele vereā vara mauri atu God mo aulu hinia mo sohena sava hināu? <sup>21</sup> Enia mo sohena makomo isi sei haŀai matea mo lavia mo hoia na paki flaua matea vavano isi mo vaia mo sosohi vevuhi.”

#### *Hare I Pa Juri?* (Mt 7.13-14, 21-23)

<sup>22</sup> Iesu na nona hahau mo unu ŀole na taon peresi na vanua mo lo vujangi, ale mo hahau mo lo vano Jerusalem. <sup>23</sup> Ale tamlohi matea mo vereā isana mara, “Moli, la haratu sei la pa juri, enira i pa tupu visaletē purongo?” Ale mo vereā isara mara, <sup>24</sup> “Ha vaihitea vara ha eŀi unu hin matarua rihirihi atu. Maŀan na vereā, vao tavera la pa opoia vara la unu pani la pa sopo eŀi vaia. <sup>25</sup> Na rani tamlohi tavera mata ima mo turu mo pelati na matarua, ale kamim na jingoima ka tapulo ŀerengi na pelati kara, ‘Moli, o roi isamam!’ Ale i pa ŀarami kamim vara, ‘Na sopo levosahia vara ka tai epu!’ <sup>26</sup> Moiso ha pa tapulo vereā isana vara, ‘Pani kamam kama lo hanhani, ale kama lo inu peresiho, ale engko ko lo vujangi na malele tavera na nomam taon.’ <sup>27</sup> Pani i pa vereā vara, ‘Na vereā

isamim, na sopo levosahia vara ka tai epu! Ha malue na nahoku, kamim tamlohi lejileji!

<sup>28</sup> Na jara talai, la pa tangtangi ale la pa naʻnaʻori na huʻura na rani la hite Abraham, Isaac, Jacob peresi na pʻovet tari hin mauri atu God mo aulu hinia, pani kamim ka hase horo kamim hinia. <sup>29</sup> Ale tamlohi la pa tai Opae, Marino, Tahuna peresi Auta, ale la pa sakele na jara hanhahi hin mauri atu God mo aulu hinia, ale la pulahi kamim. <sup>30</sup> Ale ha lo levosahia vara, tatuara sei la lo hitahu nake, la pa tiroma, ale tatuara la lo tiroma nake, la pa hitahu.”

### *Iesu Mo Tangi Matan Jerusalem*

<sup>31</sup> Tataholo hin rani atu, Pharisee hai la mai la vereia isana lara, “O rovo nike, matan Herod mo opoia vara i vilimateiho.”

<sup>32</sup> Ale Iesu mo vereia isara mara, “Ha vano ha vereia isan pusi atu vara, ‘O levosahia vara nohorihhi peresi pavuho enau a pa titiu naʻihhi na tanume sasati, ale a pa vai na rojia la tihai, ale na hatolu rani a pa isoiso na maleleku. <sup>33</sup> Hina purongo, a pa vano na maleleku nohorihhi, pavuho peresi pongi tolu, matan i pa sopo tataholo vara pʻovet matea i mate na jingoiman Jerusalem!’

### *Iesu Mo Tangisi Jerusalem (Mt 23.37-39)*

<sup>34</sup> Jerusalem, o Jerusalem, taon tavera sei mo vilimatei na pʻovet, ale mo paru la haratu God mo ʻulera isana. Vaha visa moiso na opoia vara a takonahi na natum jara matea sohena toa haʻrai matea mo hovi na natuna na ruhuru hapana, pani ko ʻohu! <sup>35</sup> O lo levosahia vara imam mo puru! Ale na vereia isam vara engko o pa sopo mele hitea i tikeli rani atu o pa vereia vara, ‘Avulahi isan haratu mo lo mai na hijan Moli!’ ” *Psa 118.26*

## 14

### *Iesu Mo Vai Na Rojia La Tihai*

<sup>1</sup> Na Sabbath matea, Iesu mo vano na ima tamlohi aulu matea na vao

Pharisee, ale la tamlohi atu la lo kilau ʻoʻoia. <sup>2</sup> Ale tamlohi purapura matea mo lo toho atu na nahon Iesu. <sup>3</sup> Iesu mo usi na Pharisee peresi na tamlohi lelevosahi mata leu mara, “Mo tataholo vara tea i vai na rojia i tihai na Sabbath teni mo vono?” <sup>4</sup> Pani la sakele tapnono. Moiso Iesu mo tauri tamlohi atu mo vai na nona rojia mo tihai, ale mo ʻulea mo vano. <sup>5</sup> Moiso mo usia isara mara, “Vara te vonamim hatea te natuna teni pulana buluk hatea mo jovi sivo atano hin te moru wel matea na rani Sabbath matea; hare natu i pa sopo reve naʻihhi vila?” <sup>6</sup> Ale enira la sopo eʻi ʻarami la hinu nika.

### *Vujangi Mata Posposi Romatano*

<sup>7</sup> Ale Iesu mo vere na titileu matea isan la haratu sei la usira la mai atu, matan mo hitea sohena sava la lo hase viʻoni na jara sakele ʻuhu atu na tep, ale mo vereia isara mara, <sup>8</sup> “Na rani tamlohi matea mo usiho vara o mai na hanhahi lahi, o sopo sakele na jara ʻuhu tako, matan ko sopo levosahia vara tamlohi lahi atu mo usi te tamlohi aulu tinapua mo aulu hiniho teni mo vono, <sup>9</sup> ale haratu mo lo usi kamim tupra rua sei i pa mai isam i vereia vara, ‘O sile na masapam isan tamlohi akerihhi!’ Ale o pa mahanuhanu o sivo na jara sakele atano.

<sup>10</sup> Pani vara la usiho, o vano o sakele na jara sakele nona tamlohi purongo tiroma, matan vara tamlohi lahi atu vara i mai isam i vereia vara, ‘Tapala, o juha o sahe na jara matea mo mele ʻuhu!’ Moiso, matan haratu o pa lavi na ololo na naho tamlohi tari sei la lo sakele hin jara hanhahi atu peresiho. <sup>11</sup> Matan tamlohi tari sei la hase taura aulu, God i pa taura atano, haratu mo hase taua atano, God i pa taua aulu.”

<sup>12</sup> Iesu mo mele vereia isan tamlohin ima atu mara, “Vara o vai na hanhahi teni te hanhahi tavera hatea, o sopo usi te tapalam teni te voraim, teni te tahisam teni la haratu la tavitav sei la lo toho mariviti isam, matan enira la pa mele usiho na

imara matan vara la mele vaia so-hena isam. <sup>13</sup> Pani vara o vai na hanhani tavera, o usi na tamlohi tilavono, haratu la kuti, haratu la papao peresi na matavuso, <sup>14</sup> ale God i pa leŕuhu hiniho matan enira la sopo eŕi mele spaia. God i pa voliho na rani mata sauteterahi na tamlohi tataholo.”

*Hanhani Tavera Nona Supe Matea  
(Mt 22.1-10)*

<sup>15</sup> Moiso, tamlohi matea mo lo sakele peresi Iesu hin tep atu, mara mo rongo la hinau nike, mo vereia isan Iesu mara, “Avulahi isana tamlohi tari sei la pa hani pereti atu hin mauri atu God mo aulu hinia!”

<sup>16</sup> Pani Iesu mo vereia isana mara, “Na rani matea tamlohi tavera matea mo vai na hanhani tavera matea, ale mo usi na tamlohi matuvana la mai hinia. <sup>17</sup> Ale hin rani mata hanhani tavera atu mo ŕule na nona volitusi isan la haratu mo usira moiso vara i vereia isara vara, ‘Ha mai matan hinau tari la tatamahu moiso!’ <sup>18</sup> Pani enira mo isoiso la tapulo posi na ŕomira. Tiromara mo vereia isana mara, ‘Na voli na lepa matea, ale a pa vano vara a hitea. O vereia vara a pa sopo mai.’ <sup>19</sup> Ale mele tinapua mo vereia mara, ‘Na voli na buluk mo sangavulu, ale a pa vano vara a lo kilau usurira. O vereia vara a pa sopo mai.’ <sup>20</sup> Ale mele tinapua mo vereia mara, ‘Na pa lahi na narouku matea, ale matan haratu a sopo eŕi mai.’

<sup>21</sup> Ale volitusi atu mo mai mo vere la hinau sei isan nona tamlohi tavera. Moiso tamlohi tavera atu mata ima mo lolokoru, ale mo vereia isan nona volitusi mara, ‘O vano vila na malele tavera peresi na malele vavarihi hin taon tavera nike, ale o lavi la haratu la tilavono, haratu la kuti, haratu la matavuso peresi la haratu la papao.’ <sup>22</sup> Ale volitusi atu mo vereia mara, ‘Tamlohi tavera, sava ko retileu hinia na vaia moiso, ale masapa mo pa lo toho na lolo ima.’ <sup>23</sup> Ale tamlohi tavera atu mo vereia isan nona volitusi atu mara, ‘O vano asau na malele tavera peresi na pahisa malele, ale o haluhalu na tamlohi tari vara la mai la unu, matan na opoia vara imaku

i maŕivi. <sup>24</sup> Matan na vereia isamim, i pa sopo te vonan te tamlohi atu na lo usira tiroma moiso vara la pa eŕi hatiŕoro hin te hinau hatea hin noku hanhani tavera nike.’ ”

*Ha Opoi God Ale Ha Usuri Iesu  
(Mt 10.37-38)*

<sup>25</sup> Tataholo hin rani atu, vao tavera la lo toho peresia, ale Iesu mo posi mai isara mo vereia isara mara, <sup>26</sup> “Vara tea mo mai isaku, pani mo sopo ŕohu hin tamana peresi tinana peresi na natuna, peresi na voraina peresi na vevoraina, teni mo sopo ŕohu na maurina hasena, enia i pa sopo eŕi mai noku tamlohi usuri. <sup>27</sup> Sava tamlohi mo sopo soloti na nona talopeilopei ale i usuriau, enia i pa sopo eŕi mai noku tamlohi usuri.

<sup>28</sup> Matan sava tamlohi isamim natu, vara mo opoia vara i voro na ima aulu matea mata kilau vano asau, mo sopo sakele tiroma matan vara i evia vara nona mania mo tataholo mata i eŕi voro vevuhi ima aulu atu mata kilau vano asau teni mo vono? <sup>29</sup> Vara i vono, vara mo tau na pulona, pani mo sopo eŕi voro vevuhia, tamlohi tari sei la hitea la pa lo kerehia matana, <sup>30</sup> lara, ‘Tamlohi akerihi mo tapulo voro, pani mo sopo eŕi vaia vevuhia!’

<sup>31</sup> Teni, sava supe natu, mo vano vara i vai na vuro peresi na supe tinapua matea, mo sopo sakele tiroma matan vara i hitea vara la nona tamlohi vuro atu tupu tari vaha sangavulu (10,000) vara la ŕilangi mata la turuhoro supe atu sei mo lo mai peresi na nona tamlohi vuro tupu tari vaha sangavulu rua (20,000).

<sup>32</sup> Vara mo vono, i pa ŕule te tamlohi la vano isan nona meresahi atu vara mo pa lo toho asau vara la usia hin te malele mata i sari tamata. <sup>33</sup> Matan haratu, te vonamim i sopo eŕi mai noku tamlohi usuri vara mo sopo tinaŕihi na nona hinahinau tari.

*Solo Peresi Na Malarani  
(Mt 5.13; Mk 9.50)*

<sup>34</sup> Niu la saoroia enia mo ŕuhu, pani vara mo sopo mele te ngaŕpulu hinia, ngaŕpulu i pa mele sivo hinia sohena



sava? <sup>35</sup> Jamana mo sopo mele řuhu mata řavao peresi te hinau. La pa pulahia purongo. Haratu mo eři rongvosahia, o tapurongo!”

## 15

### *Sipsip Atu Mo Jalio* (Mt 18.12-14)

<sup>1</sup> Moiso tamlohi lavi na mania mata takis peresi na tamlohi hehe, la lo mai isana vara la rongoa. <sup>2</sup> Pani Pharisee peresi na tamlohi vujangi mata Leu la lo reti vavarihi lara, “Tamlohi akerihi mo lo pulutahi peresi na tamlohi hehe, ale mo lo hanhani pere-sira.”

<sup>3</sup> Ale Iesu mo verera hin titileu akerihi mara, <sup>4</sup> “Hare isamim, vara pulana sipsip mo tikeli mo ngavulu sangavulu (100) vara matea mo jalio, mo sopo mele vano vara i alea? I pa tinařihi la haratu mo ngavulu limaravati mo limaravati (99) la lo hanhani na jara tavera vavano i mele lavuti pa haratu mo lo tihai. <sup>5</sup> Ale mara mo hitea, i pa solotia na pilina na avulahi. <sup>6</sup> Vara mo pala na imana, i pa tovi na tapalana peresi na tahisana la pulutahi peresia, ale i vereea vara, ‘Ha avulahi peresiau matan na mele lavuti pa pulaku sipsip atu mo lo tihai.’ <sup>7</sup> Ale i pa sohen haratu natu, tuka i pa avulahi jea hin haratu matea sei mo mele posi, mo jeu la haratu mo ngavulu limaravati mo limaravati (99) sei la tataholo la sopo jalio na malelera.

### *Hařai Matea Mo Ale Na Selen*

<sup>8</sup> Teni sava hařai vara nona selen mo sangavulu, pani mo vaitihai matea, mo sopo hasahi na lamu vara i tivesi na imana i alea vavano i lavutia? <sup>9</sup> Ale vara mo lavutia, i pa tovi na tapalana peresi na tahisana la pulutahi peresia, ale mo vereea mara, ‘Ha avulahi peresiau matan na mele lavuti pa selen atu sei na lo vaitihaia!’ <sup>10</sup> Ale na vereea isamim, vara i pa sohen haratu natu, avulahi tavera mo lo toho na naho angelo non God

matan tamlohi hehe atu sei mo mele posi na nona hehe.”

### *Natun Tamlohi Tavera Mo Jalio*

<sup>11</sup> Ale Iesu mo mele vereea isara mara, “Tamlohi matea natuna mo rua. <sup>12</sup> Ale vora hitahu mo vereea isan tamana mara, ‘Tata, o sileau hin korum atu sei enia řungaku.’ Ale tamana mo ase na koruna isara tupra rua.

<sup>13</sup> Mo sopo tuai, vora hitahu atu mo takonahi na nona hinahinau tari, ale mo vano vara i hitehite jara, ale mo jalahi vevuhi na nona tavgav na posposi rongorongono vono. <sup>14</sup> Ale mara mo jalahi vevuhi na nona mania, marua tavera matea mo pala hin jara tavera atu, ale mo vejuveju. <sup>15</sup> Ale mo vano mo voko isana tamlohi matea hin jara atu, ale tamlohi tavera atu mo řulea vara i vano na isana i vahani na pulana poi.

<sup>16</sup> Ale mo marohati mo tikeli na makina vahatea, ale mo opoia vara i hani te hanhani sei mo lo silea isana poi, pani tea mo sopo silea hin te hanhani. <sup>17</sup> Pani řomina mara mo mele mai, mo hase vereea isana mara, ‘Tamlohi voko tari non tamaku, hara hinahinau mo mařivi savulevule, pani enau na lo marohati mate nike. <sup>18</sup> A pa vano isan tamaku ale a vereea isana vara, ‘Tata, na hehe isan tuka peresiho. <sup>19</sup> Na sopo mele tataholo vara o toviau natum. O vaiiau sohen nom volitusi matea.’”

<sup>20</sup> Ale mo turu mo mele vano isan tamana. Pani mo pa lo toho asau, ale tamana mo hitea ale mo řomia, ale mo maro vano isana mo rahoa, ale mo pungosia. <sup>21</sup> Moiso, natirihi atu mo vereea isan tamana mara, ‘Tata, na hehe isan tuka peresiho. Na sopo mele tataholo vara o toviau natum.’

<sup>22</sup> Pani tamana mo vereea isana nona volitusi mara, ‘Ha lavi na noku ruru peravu řuhuřuhu jea i mai ha rua hinia, ale ha tau te ringhatea na varangona, ale sabat na palona. <sup>23</sup> Ale ha lavi na natu buluk řavisvisi atu sei řa lo kilau mamahunia ha vilia, ale řa hania řa avulahi. <sup>24</sup> Matan natuku nike mo mate moiso,

\* **15:8:** selen: selen matea mo tataholo na volvoli mata rani matea, la selen akerihi enira oso puhoro mata nona lahi.

ale mo mele mauri, mo jalio, ale na mele lavutia!’ Ale la tapulo vai na hanhahi tavera na avulahi.

<sup>25</sup> Ale natuna vora tiroma mo lo toho na isa, ale mara mo lo mai mariviti na ima mo rongo na vete, ale la lo velu, <sup>26</sup> moiso mo tovi na volitusi matea ale mo usia mara, ‘Ka lo vai na sava sei?’ <sup>27</sup> Ale mo vereia isana mara, ‘Tasim mo mele pala, ale tamam mo vili pa natu buluk řavisvisi atu sei řa lo kilau mamahunia matan mo mele pala mo lo řuhu.’

<sup>28</sup> Pani mo lolokoru, ale mo řohu vara i unu na ima. Tamana mo malue mo sinai mo usia vara i unu, <sup>29</sup> pani mo řarami tamana mara, ‘Ko hitea, la takonahi tauni nike enau na lo voko mate nom sohena slev matea, ale na sopo lo tope na nom retileu hin te rani, pani ko sopo sileau hin te natu nani hatelete matan vara a eři avulahi hinia peresi na tapalaku. <sup>30</sup> Pani natum akerihi mara mo pala, haratu sei mo lo jalahi vevuhi na korum na hařai malele, ale ko vili pa natu buluk řavisvisi atu sei ko lo kilau mamahunia, matana.’

<sup>31</sup> Ale tamana mo vereia isan natuna atu mara, ‘Natuku, engko ko lo toho peresiau tarea, ale hinau tari noku enira nom. <sup>32</sup> Mo tataholo vara řa vai na hanhahi řa avulahi matana, matan tasim nike mo mate pani mo mele mauri; mo jalio ale na mele lavutia.’”

## 16

### *Patu Tamlohi Lelevosahi Matea*

<sup>1</sup> Iesu mo mele vereia isana nona tamlohi usuri mara, “Na rani matea tamlohi tavgav matea, mo rongoa vara nona patu tamlohi sei mo lo kilau na nona hinahinau, mo lo roro purongo na nona hinahinau. <sup>2</sup> Ale mo tovi pa nona patu tamlohi atu, ale mo vereia isana mara, ‘Sava nahai na lo rongoa matam? O sileau na nom puku mata kilau na mania matan engko ko isoiso sohena patu tamlohi.’

<sup>3</sup> Ale patu tamlohi atu mo hase vereia isana mara, ‘A pa vai na sava, matan noku tamlohi tavera mo tau nařihiau sohena patu tamlohi

matea? Enau na sopo řilarilangi vara a eři heli na lepa, ale na mahanuhanu vara a usi na tuetueni. <sup>4</sup> Ale, na levosahi na sava a pa vaia nake, matan vara i tau nařihiau ale tamlohi la pa avulahi mata laviau na imara.’

<sup>5</sup> Ale, mo tovi vevuhi la haratu la lo ave isan nona tamlohi tavera la mai matea matea. Ale mo vereia isan haratu tiroma mara, ‘Nom ave isan noku tamlohi tavera mo visa?’

<sup>6</sup> Mara, ‘Na ave na litre wel, mo tari vaha tolu (3,000).’

Ale mo vereia isana mara, ‘Ale o jarai nařihi na nom ave, ale o ulia vara ko ave mo tari vaha hatea mo ngavulu sangavulu lima (1,500).’

<sup>7</sup> Ale mo vereia isana tinapua mara, ‘Nom ave mo visa?’ Ale mo vereia mara, ‘Na ave na piri wit, kilo mo tari vaha ngavulu tolu (30,000).’ Ale mo vereia isana mara, ‘Ale o jarai nařihi na nom ave, ale o ulia vara ko ave na piri wit, kilo mo tari vaha ngavulu rua mo vati (24,000).’

<sup>8</sup> Ale tamlohi tavera atu mo hitea vara nona patu tamlohi atu mo patuha na sava mo vaia, hina purongo vara mo lejileji. Matan tamlohi hin varama nike, enira la patuha na nora bisnis la lo vaira peresi na tamlohi tinapua na varama, mo jeu la haratu la natun malarani. <sup>9</sup> Ale na lo vereia isamim, vara ha vai na nomim hinahinau nike na varama la tueni na tinapua ale ha tapala peresira. Hin malele nike, vara nomim hansohai hin varama nike mo isoiso, pa la tapalamim atu na tuka la pa avulahi hin kamim.

<sup>10</sup> Haratu mo eři turu řilangi na hinau rihirih purongo, i pa turu řilangi na hinau matuvana, ale haratu mo lejileji na hinau rihirih matea purongo, i pa lejileji na hinau matuvana. <sup>11</sup> Ale vara ka sopo eři turu řilangi na tavgav matan varama nike, hare i pa eři tau na tavgav varařuhu na limamim? <sup>12</sup> Ale vara ka sopo eři turu řilangi na hinau nona tinapua, hare i pa eři tau te hinau na limamim vara nomim?

<sup>13</sup> Tea i sopo eři volitusi isana tamlohi tavera i rua, matan i pa opoi

matea, ale i řohu hin matea, teni i pa volitusi isan matea, ale i hitelehilehi matea. Ha sopo eři volitusi isan God peresi na mania.”

*Te Vujangi Non Iesu*

(Mt 11.12-13; 5.31-32; Mk 10.11-12)

<sup>14</sup> Pharisee la opoi na mania, ale la haratu la lo toho atu, lara la rongo la hinau sei, la kerehia. <sup>15</sup> Ale Iesu mo vereia isara mara, “Kamim ka la tamlohi atu sei la lo vai tataholoira hasera na naho tamlohi, pani God mo levosahi na mapumim. Matan sava tamlohi la lo řomřomia vara la aulu, enira hina niketa na nahon God.

<sup>16</sup> Leu non Moses peresi na sava přovet la vereia la lo turu mo kakau na rani non John tamlohi paptijo, ale mo tapulo atu mo mai nake. Retiřuhu matan mauri atu God mo aulu hinia, la lo retivujavujangi hinia, ale la lo ngurunguru na tamlohi vara la unu hinia. <sup>17</sup> Pani i pa mele malum vara tuka peresi na varama la tihai, mo jeu haratu vara tea i jarai nařihi te sope leta hatea na lolo leu, ale suihana i mai hina purongo.

<sup>18</sup> Tamlohi tari sei la řohu hin naroura, ale la lahi na tinapua la vaivaileu, ale haratu sei mo lahi na hařai lahi matea mo rovo hin tuana, mo vaivaileu.”

*Tamlohi Tavgav Enia Lazarus*

<sup>19</sup> Iesu mara, “Na rani matea tamlohi tavgav matea tarea mo lo ru na perpel peresi na ruru lulu malum, ale mo lo hani na hanhahi řuhu tarea. <sup>20</sup> Ale na nona matarua, tamlohi la tau na tamlohi tilavono matea mo solasola vevuhi na epena hijana Lazarus, <sup>21</sup> mara mo lo toho atu tarea mo opoia vara i eři hani te sope hanhahi na jara hanhahi non tamlohi tavgav atu, pani mo vono. Aulu hin haratu, viriu la lo mai la lo řamesi na solana. <sup>22</sup> Hitahu pa tamlohi tilavono atu mo mate, ale angelo la lavi nařihia vara i toho peresi Abraham. Pa tamlohi tavgav atu sohena mo mate, ale la tavunia, <sup>23</sup> ale enia mo sivo na jara talai na varama mata mateia, ale na nona rongohaji tavera,

ale mo kilau vano mo hite Abraham enia Lazarus la lo turu asau hinia.

<sup>24</sup> Ale mo ulo mara, ‘Pua Abraham, o řomopoiau, ale o řule Lazarus vara i vano i weti na pisuna na wai, ale i mai i taua na memeku vara i hamařiřia, matan na lo rongohaji hajava na pepe hapu nike.’

<sup>25</sup> Pani Abraham mara, ‘Natuku, o to řomřomia, na maurim, ko lo lavi na hinau řuhuřuhu, pani Lazarus, mo lo lavi na hinau mo sati, pani nake enia mo lo nanau nike, ale engko ko lo lavi na rongohaji. <sup>26</sup> Ale mo sopo haratu purongo, pani masapa tavera matea mo lo toho na livuhařa, ale mo sopo te malele vara tea nike i eři vano sei isam, teni tea sei i eři mai nike isamam.’

<sup>27</sup> Ale mara, ‘Vara sohena, na lo tangi isam vara o řulea i sivo na iman tamaku <sup>28</sup> matan enau tasiku mo lima, ale vara i retiřoarařahaira. Vara i vono, enira sohena la pa sinai hin jara nike mata vailejileji na tamlohi.

<sup>29</sup> Pani Abraham mara, ‘Retiulia non Moses peresi na přovet la lo toho isara moiso; mo tataholo vara la tapurongo isara.’ <sup>30</sup> Ale mara, ‘Mo vono, pua Abraham, vara tea i tai nike na varama mata mateia i sivo isara, la pa posi.’ <sup>31</sup> Abraham mo vereia isana mara, ‘Vara la sopo tapurongo isan Moses peresi na přovet, la pa sopo eři rasu tea vara i mele turu na varama mata mateia.’ ”

## 17

*Vujangi Mata Romi Na Tinapua*

(Mt 18.6-7, 21-22; Mk 9.42)

<sup>1</sup> Ale Iesu mo vereia isana nona tamlohi usuri mara, “Hinai vaihite mata hehe la pa lo mai tarea, pani rani sasati isan haratu mo lo lavira la mai. <sup>2</sup> I pa mele řuhu jea isana, vara la liho te vatu tavera na řalona, ale la pulahia na lolo tasi puaha. Matan i pa mele sati jea isana, vara i vai te vonan la natuvarihi nike la hehe. <sup>3</sup> Ha hase kilau mamahuni kamim! Vara voraim mo hehe, o reti isana, ale vara mo posi o řomia, <sup>4</sup> ale vara mo hehe isam vaha limaravrua na rani matea, ale mo mele mai isam vaha

limaravrua mo vereia isam mara, 'Na posi!' o pa řomia."

<sup>5</sup> Nona vahařule la vereia isan Moli Iesu lara, "O vai na nomam rasu i tavera!"

<sup>6</sup> Ale Moli Iesu mara, "Hina purongo vara nomim rasu mo so-hena piri paka matea purongo, ha eři vereia isan pulo hatapola nike vara, 'O hase saputiho, o sivo o lavoho na tasi!' Ale i pa ooloo hin kamim.

<sup>7</sup> Sava nomim slev matea vara mo isoiso na nona voko na isa teni mo lo kilau na sipsip, i pa mai vara i sakele vahatea mata hanhahi? <sup>8</sup> Ka levosahia vara i pa tatamahuni na hinau hani nona tamlohi tavera, ale i volitusi isana tako, moiso natu i pa hani na hana hinau. <sup>9</sup> Ale mo sopo te hinau vara nona tamlohi tavera mo sopo vere meje isana, matan enia mo lo vai na sava mo tataholo vara i pa vaia. <sup>10</sup> Mo sohena purongo, vara ka lo ooloo hiniau, mo tataholo vara ha vereia vara, 'Mo sopo tataholo vara kama lavi na hasohaso isam. Kamam volitusi sei kama lo vai na sava mo tataholo purongo vara kama vaira.'"

### *Tamlohi Lepros Mo Sangavulu*

<sup>11</sup> Na malelena mo lo vano Jerusalem, mo hahau na livuhan Samaria enia Galilee. <sup>12</sup> Mara mo lo unu na vanua matea, tamlohi lepros mo sangavulu la lo turu asau, <sup>13</sup> la ulo lara, "Iesu, tamlohi tavera, o řomi kamam!"

<sup>14</sup> Mara mo hitera, mo vereia isara mara, "Ha vano, ha vujangi kamim isana přis." Na rani la pa lo vano, lepros atu mo tihai na epera.

<sup>15</sup> Moiso vonara matea mara mo hitea vara mo vokevoke, mo mele hilu isan Iesu mo lo ulo aulu mo lo hasohaso God. <sup>16</sup> Mo jovi na nahona sivo na palon Iesu mo vere meje isan Iesu mata sava mo vaia isana, tamlohi akerihi enia mara Samaria matea.

<sup>17</sup> Iesu mo usia isana mara, "Avei, na řom vara kamim tupu sangavulu? Tupu limaravati la haipu? <sup>18</sup> Tavasau akerihi hasena purongo mo mele hilu vara i sile na hasohaso isan

God?" <sup>19</sup> Ale Iesu mo vereia isan tamlohi atu mara, "O turu, o vano. Nom rasua mo vaiho ko řuhu."

### *Mauri Atu God Mo Supe Hinia (Mt 24.23-28, 37-41)*

<sup>20</sup> Na rani matea Pharisee la usi Iesu lara mauri atu God mo aulu hinia i pa mai pangisa. Ale Iesu mo řaramira mara, "Mauri atu God mo aulu hinia i pa sopo mai na matamata tavera vara ha eři hitera, <sup>21</sup> teni ha pa eři vereia vara, 'Ha kilau mai, enia nahai!' teni 'Enia sevano!' matan mauri atu God mo aulu hinia mo lo toho na livuhamim."

<sup>22</sup> Ale mo vereia isana nona tamlohi usuri mara, "Pongi matea mo lo mai ha pa marohati vara ha hite te rani hatea non Natun Tamlohi, pani ha pa sopo eři hitea. <sup>23</sup> Ale tamlohi la pa vereia isamim vara, 'Ha kilau vano, enia sevano!' teni 'Ha kilau mai, enia nahai!' Pani ha sopo malue teni ha usurira. <sup>24</sup> Matan sohena vaha mo vilasi na tavalu masapa mo vano na tavaluna, i pa sohena natu isan Natun Tamlohi na nona rani. <sup>25</sup> Pani tiromana enia i pa lavi na rani řilangi matuvana, ale pina nike nake la pa tipahia.

<sup>26</sup> Sava mo masese na pongi non Noah i pa sohena na rani non Natun Tamlohi. <sup>27</sup> Tuai tamlohi la lo hanhahi, la lo inu, la lo lahi, ale la lo silesilera mata lahi mo tikeli rani atu Noah mo unu na aka. Ale wai tatave mo maro ale mauri tamlohi tari la sopo juri.

<sup>28</sup> I pa sohena natu, sohen na pongi non Lot, tamlohi la lo hanhahi, la lo inu, la lo volvoli, la lo ařeařehi, la lo lalavo ale la lo voro na ima — <sup>29</sup> pani hin rani atu Lot mara mo malue Sodom, hapu peresi na vatu tutuni mata volkeno mo jovi na tuka sivo isara, ale enira mo isoiso la mate. <sup>30</sup> Ale i pa sohen haratu natu na rani Natun Tamlohi i pala. <sup>31</sup> Hin rani atu, vara tea mo lo toho na jingoima, ale vara te nona hinahinau la lo toho na lolo ima, i pa sopo sivo vara i tau mamahunira, ale i pa sohena isan haratu mo lo toho na isa, i pa sopo posi vara i sivo na ima. <sup>32</sup> Ha to

řomřomi naroun Lot! <sup>33</sup> Sava tamlohi mo opoia vara i hase juri na maurina, i pa vaitihaia, pani sava tamlohi mo vaitihai na maurina, i pa taurilatia. <sup>34</sup> Na vereia isamim vara, hin vutepongi atu tamlohi mo rua la pa lo juruvi na vata matea, ale la pa lavi nařihi matea, matea purongo i pa lo toho atu. <sup>35</sup> Hařai i rua la pa lo pete kosakosahi na piri wit jara matea, ale la pa lavi nařihi matea, ale matea purongo i pa lo toho atu.”

<sup>36-37</sup> Moiso nona tamlohi usuri la usia lara, “Moli la hinau sei la pa masese epu?” Mo řaramira mara, “Vara řo hite na karai la lo avu vano hin te jara, o pa levosahia vara pahai matea mo mena atu.”\*

## 18

### *Hařai Malepu Matea*

<sup>1</sup> Ale Iesu mo vere na titileu matea isara vara i vujangira vara la pa lo usiusi tarea, ale vara řomira la sopo jovi na sava la usia. <sup>2</sup> Mo vereia mara, “Na taon tavera matea, tamlohi aria matea mo lo toho ea, mo sopo matahuni God teni vara i sile na oloolo isan te tamlohi tinapua hatea. <sup>3</sup> Ale hařai malepu matea sohen na mo lo toho atu, mo lo mai tarea mo lo usia isana mara ‘O sile na talai mo tataholo vara noku mere-sahi i lavia.’ <sup>4</sup> Tiroma mo lo řohu hinia, pani hitahu mo hase vereia isana mara, ‘Hina purongo vara na sopo matahuni God teni a sile na oloolo isan tea, <sup>5</sup> pani matan hařai malepu akerihi tarea mo lo areau mo sopo te isoisona, a pa silea na sava mo lo usia matan vara i sopo mele hotiau hinia.’ ”

<sup>6</sup> Ale Moli mo mele vereia mara, “Ha tapurongo na sava tamlohi ari hehe atu mo lo vereia. <sup>7</sup> Ale ka řom vara God i pa sopo eři sile na sava sei nona tapuhi la lo usia isana tarea? <sup>8</sup> Na vereia isamim, enia i pa sile na talai mo tataholo vara nora meresahi la lavia i vila purongo. Hina purongo

hin haratu, vara Natun Tamlohi i mele mai, i pa vilei te rasua na varama teni i vono?”

### *Pharisee Peresi Na Tamlohi Hehe Matea*

<sup>9</sup> Ale mo mele vere titileu akerihi isan la haratu sei la lo hase řomřomia vara enira la tataholo na nahon God, ale la lo hitelehilehi na tinapua: <sup>10</sup> “Tamlohi mo rua la lo toho na lolo Temple, ale la lo usiusi, matea enia Pharisee matea, ale haratu matea enia tamlohi mata lavi na mania mata takis matea. <sup>11</sup> Pharisee atu mo turu atu mo lo hase usiusi matana hasena mara, ‘God, na vere meje isam matan enau na sopo sohen na tamlohi tinapua, haratu la lo ngurunguru mata mania, haratu la hehe, haratu la lo vaivaileu peresi na tinapua mo lahi moiso, teni sohen tamlohi mata lavi na mania mata takis akerihi. <sup>12</sup> Enau na tapuhoro na hanhani vaha rua na wik matea; tarea na lo sile na sangavulu hinau tari na lo lavira.’

<sup>13</sup> Pani tamlohi mata lavi na mania mata takis atu mo turu asau, mo sopo eři tahe na matana i kilau sahe na tuka, pani mo vilivili na řumana mo vereia mara, ‘God, o řomopoiau, enau tamlohi hehe matea!’ <sup>14</sup> Varařuhu na vereia isamim vara tamlohi akerihi mo mele mule mo tataholo na nahon God, pani mo sopo haratu matea. Matan tamlohi tari sei la lo hase tahera, God i pa taura la sivo atano, pani haratu mo hase tau atano God i pa tahea sahe aulu.”

### *Iesu Mo Leřuhu Na Natuvarihhi (Mt 19.13-15; Mk 10.13-16)*

<sup>15</sup> Na rani matea, tama natuvarihhi hai peresi na tinara la lavi na natura la mai isan Iesu vara i tau na limana hinira, ale i leřuhu hinira. Pani nona tamlohi usuri la tapulo horora. <sup>16</sup> Pani Iesu mo tovira vara la mai isana, ale mo vereia isana nona tamlohi usuri mara, “Ha tinařihi na natuvarihhi la mai isaku, ha sopo horora! Matan mauri atu God mo aulu hinia enia nona tamlohi sohen la harihi.

\* **17:36-37:** karai: řarami reti hin sope jara rihirihhi akerihi enia vara pongi hitahu mo mai mariviti, vara tamlohi la hite la hinau sei la pala, la pa eři hitevosahia i řuhu vara i pa sopo tuai, Natun Tamlohi (Iesu) i pa mele pala hin varama nike.

17 Varaŕuhu na vereā isamim, vara sava tamlohi mo sopo lavi mauri atu God mo aulu hinia sohena natirihi matea, i pa sopo eŕi unu hinia hin te rani.”

*Tamlohi Tavitav Matea*  
(Mt 19.16-30; Mk 10.17-31)

18 Ale na rani matea tamlohi aulu matea mo usia isana mara, “Tija ŕuhu, a pa vai na sava natu vara a eŕi lavi na mauri tui hinia?”

19 Ale Iesu mo vereā isana mara, “Mata sava ko toviau ŕuhu? God hasena mo ŕuhu, mo sopo mele te tamlohi tinapua i ŕuhu. 20 Ko levosahi na retileu, ‘O sopo vaivaileu peresi na tinapua mo lahi moiso, o sopo vilimatei, o sopo vavanaho, o sopo tuetueni na halu, o oloolo hin tamam enia tinam’.” *Exo 20.12; Deut 5.16*

21 Ale tamlohi aulu atu mo vereā mara, “La hinau tari sei na tapulo vaira na pa lo uluvou purongo.”

22 Iesu mara mo rongoa, mo vereā isana mara, “Hinau matea ko vejuveju hinia. O aŕehi vevuhi na nom hinahinau, ale o asea isana tilavono, ale hitahu tavitav na tuka i pa nom; ale o mai o usuriau!” 23 Pani tamlohi atu mara mo rongo la hinau sei mo rongo mo sati taverna, matan enia tamlohi tavitav taverna matea.

24 Iesu mara mo hitea vara mo rongo mo sati, mo vereā mara, “Mo ŕilangi hajavua vara tamlohi tavitav la unu hin mauri atu God mo aulu hinia! 25 A pa vereā vara mo mele malum jea vara camel matea i unu na koko niteli matea, mo jeu haratu vara tamlohi tavitav matea i unu hin mauri atu God supe hinia.”

26 Ale la haratu la lo rongo la reti atu lara, “Avei, vara mo sohena, sava tamlohi natu i pa eŕi juri?”

27 Pani mo vereā isara mara, “Sava tamlohi la sopo eŕi vaira, God i eŕi vaira.”

28 Ale Peter mara, “Ko hitea, kama tinaŕihi vevuhi na imamam ale kama usuriho.”

29 Ale Iesu mo vereā isana mara, “Varaŕuhu na vereā isamim, mo sopo te tamlohi hatea vara i tinaŕihi na imana, teni narouna, teni te voraina,

teni tamana enia tinana, teni natuna matan mauri atu God mo aulu hinia, 30 vara God i pa sopo volia nake na varama, i jeu na sava mo tinaŕihira moiso, ale hitahu i pa lavi na mauri tui hin pongi atu mo lo mai.”

*Iesu Mo Sorahi Na Nona Mateia*  
(Mt 20.17-19; Mk 10.32-34)

31 Ale Iesu mo tovi matavuhi la nona tupu sangavulu ŕomana mo rua atu, ale mo vereā isara mara, “Ka levosahia vara ŕa lo sahe Jerusalem. Ale hinau tari sei pŕovet la ulia matan Natun Tamlohi la pa masese atu. 32 Matan la pa silea i vano na liman la haratu la tamlohi ŕoŕoha, ale la pa kerehia, la pa vai na hina mahanuhanu isana, ale la litovia. 33 Ale la pa rupia na asi maja, moiso la pa vilimateia, ale na hatolu rani i pa mele turu.”

34 Pani la sopo levosahi te hinau hatea sei mo lo vereā isara. La reti atu God mo jarohira isara, ale la sopo rongovosahi na sava mo lo vereā.

*Matavuso Matea Mo Tovi Iesu*  
(Mt 20.29-34; Mk 10.46-52)

35 Mara mo lo mai mariviti Jericho, tamlohi matavuso matea mo lo sakele na pahisa malele, mo lo usi na tuetueni. 36 Ale mara mo rongo na roroa vao tamlohi la lo hahau na pahisana, mo usia mara sava natu.

37 La vereā isana lara, “Iesu mara Nazareth mo lo hahau roto jara nike.”

38 Ale mo ulo aulu mara, “Iesu, natun supe David, o ŕomopoiau!” 39 Ale la haratu la lo toho na nahona, la reti isana lara i toho malum. Pani mo mele ulo aulu mo ŕilangi jea mara, “Natun David, o ŕomopoiau!”

40 Ale Iesu mo turu mo retileu mara la lavia i mai isana. Ale mara mo mai mariviti isana, mo usia isana mara, 41 “Ko opoi vara a vai na sava isam?”

Mo vereā mara, “Moli, o tinaŕihia vara a mele kilau.”

42 Ale Iesu mo vereā isana mara, “O mele kilau, nom rasua mo vaiho ko ŕuhu.” 43 Ale vahatea purongo, mo mele kilau, ale mo usuria mo lo tahe na hijan God. Ale tamlohi tari lara la hitea, enira sohena la hasohaso God.

## 19

### *Iesu Enia Zacchaeus*

<sup>1</sup> Iesu mo unu Jericho, ale mo lo vano vara i hahau roto jara atu. <sup>2</sup> Hin jara atu tamlohi matea hijana Zacchaeus, enia patu tamlohi matea mata lavi na mania mata takis, ale enia mo tavtav. <sup>3</sup> Enia mo lo vaihitea vara i hite Iesu, matan enia pejulana matea purongo, ale vao atu la lo turuhoroa. <sup>4</sup> Ale matana, mo maro mo vano tiroma mo vele aulu na pulo sycamore matea vara i efi hitea, matan i pa sopo tuai Iesu i pa hahau hin malele atu.

<sup>5</sup> Ale Iesu mara mo tikeli jara atu, mo taʻa sahe, ale mo vereea isana mara, “Zacchaeus, o vila. O sevuti matan a pa toho na imam nohorihī.”

<sup>6</sup> Ale mo jurete vilavila sivo atano, ale mo avulahi tavera vara i lavia. <sup>7</sup> Ale tamlohi lara la hitea, la reti vavarihi lara, “Eh, mo lo vano vara i toho na ima tamlohi hehe matea.”

<sup>8</sup> Ale Zacchaeus mo turu na naho tamlohi atu mo vereea isan Moli mara, “Ko hitea Moli, nakerihī a pa sile na sope noku hinahinau isana tilavono. Ale vara na halu tea hin te hinau, a pa mele silea isana i aulu vaha vati!”

<sup>9</sup> Ale Iesu mo vereea isana mara, “Nahapani, juri mo mai hin ima nike, matan enia sohena enia natun Abraham matea. <sup>10</sup> Matan Natun Tamlohi mo sinai vara i ale la haratu la jalio ale i jurira.”

### *Volitusi Mo Sangavulu (Mt 25.14-30)*

<sup>11</sup> Tamlohi lara la lo tapurongo hin la hinau nike, ale matan Iesu mo lo mai mariviti Jerusalem, mo tapulo vere na titileu matea isara, matan la lo romromia lara mariviti vara God i turu na suihana natu, <sup>12</sup> matan haratu mo vereea isara mara, “Tamlohi aulu matea mo vano na jara asau tinapua matea, vara i tauri na suiha mata supe ea, ale mara i pa mele mai. <sup>13</sup> Pani tiromana, mo tovi na nona volitusi tupu sangavulu vara la mai isana, ale mo silera na selen mo tataholo na volvoli mata rani voko mo ngavulu sangavulu (100) isara hatehateahi, ale mo vereea isara mara,

‘Ha lavi mania akerihī; ha vavahinau peresia i tikeli rani atu vara a mele pala.’ <sup>14</sup> Pani nona tamlohi la ŋohu hīnia, moiso la ŋule na tamlohi hai la lo usuria vara la vere vara, ‘Kama sopo opoia vara tamlohi nike i supe hin kamam.’

<sup>15</sup> Pani pa tamlohi aulu atu, mo vano mo tauri na suiha hin jara tinapua atu, moiso mo mele hilu mai na jarana. Ale mo tovi la nona volitusi atu, sei mo lo silera na mania matan mo opoia vara i levosahia vara la vai na sava hin mania atu mo lo silea isara. Mo opoia vara i levosahia vara la mele lavi na mania mo visa aulu hin haratu mo lo silea isara. <sup>16</sup> Tiromara mo mai, mo turu na nahona mo vereea mara, ‘Moli na nom mania na mele vai mo vaha sangavulu tinapua hīnia.’ <sup>17</sup> Ale mo vereea isana mara, ‘Ko vaia mo ŋuhu jea, ko volitusi ŋuhu matea. Matan ko kilau mamahuni hinau rihirihī sei na taua na limam; ale a pa tauho vara o pa aulu na taon tavera i sangavulu.’

<sup>18</sup> Harua tamlohi mo mai, mo vereea mara, ‘Tamlohi tavera, na nom mania na mele vai mo vaha lima tinapua hīnia.’ <sup>19</sup> Ale supe atu mo vereea isana mara, ‘Ale engko o pa aulu na taon tavera i lima.’

<sup>20</sup> Moiso mele volitusi tinapua matea mo mai mo vereea mara, ‘Tamlohi tavera, nom mania nahai. Na jarohi mamahunia na tavalu ruru matea vara i lo toho ŋuhu hīnia. <sup>21</sup> Matan na matahuniho matan engko tamlohi ŋilangi matea. Matan ko lo lavi na hinau tamlohi tinapua mo lo taua, ale ko lo vu na isa engko ko sopo lavaa.’

<sup>22</sup> Supe atu mo vereea isana mara, ‘Engko volitusi lejileji sati matea! A pa ariho usuri na nom retireti. Ko levosahia moiso vara enau tamlohi ŋilangi matea, ale vara na lo lavi na hinau tamlohi tinapua mo lo taua, ale na lo vu na isa na sopo lavaa. <sup>23</sup> Mata sava ko sopo tau na noku mania na bank matan vara a mele mai a efi lavi noku mania sei peresi haratu bank mo lo vaia noku?’ <sup>24</sup> Ale mo vereea isan la nona volitusi atu sei la lo turu mariviti atu mara, ‘Ha lavi naŋihī na

mania isana, ha silea isan haratu mo lavi mo sangavulu!’

<sup>25</sup> Pani la vereea isana lara, ‘Pani enia mo lavi mo sangavulu moiso!’

<sup>26</sup> Supe atu mo vereea mara, ‘Na vereea isamim vara tamlohi tari sei la lo tauri te hinau moiso, la pa mele silea isara i aulu hin haratu la lo tauria tiroma. Pani isan la haratu la sopo tauri te hinau, la pa lavi nañihi na sava la lo taurira moiso. <sup>27</sup> Pani isan la noku meresahi nike, sei la řohu vara a nora supe; ha lavira la mai nike, ale ha vilimateira na nahoku.’ ”

### *Iesu Mo Unu Jerusalem*

(Mt 21.1-11; Mk 11.1-11; Jn 12.12-19)

<sup>28</sup> Ale Iesu mara mo vere la hinau atu mo isoiso, mo mele vano na malelena, mo vele mo sahe Jerusalem.

<sup>29</sup> Iesu mara mo pa lo mai mariviti na taon matan Bethphage enia Bethany hin vutivuti atu sei la tovia Vuti talu Olive, mo řule na nona tamlohi usuri mo rua la vano la tiroma hinira,

<sup>30</sup> mara, “Ha vano, ha unu hin vanua sei na nahomim, ale vara ka lo unu, ha pa hite na natu donki matea la pesia mo lo turu atu; tea mo sopo lo vele i sakele hinia hin te rani. Ha uli nañihia ale ha lavia i mai. <sup>31</sup> Vara tea mo usia vara, ‘Mata sava ka lo uli nañihia?’ Ha pa vereea sohen harihi vara, ‘Moli mo opoia.’ ”

<sup>32</sup> Ale la vano la tapai natu donki atu sohen Iesu mo lo vereea isara. <sup>33</sup> Ale la pa lo uli nañihia, tavuina mo usia isara mara, “Mata sava ka lo uli nañihi natu donki sei?” <sup>34</sup> Ale lara, “Moli mo opoia.”

<sup>35</sup> Ale la lavia mo mai isan Iesu, ale la vuřangi na nora ruru tavera na hařina, ale la vai Iesu mo sakele hinia. <sup>36</sup> Ale mara mo lo hahau hinia mo lo vano, la pulahi na nora ruru na malele. <sup>37</sup> Ale Iesu mara mo lo mai mariviti hin jara atu na malele mo lo tapulo sevuti na Vuti talu Olive, vao nona tamlohi usuri la tapulo lalavete, ale la lo hasohaso God na leo tavera matea, mata sava vavahinau mata suiha la hitera moiso lara, <sup>38</sup> “Avulahi isan supe atu mo lo mai na hijan Moli. Tamata i toho na tuka ale ololo tavera i vano isan God Aulu Jea!”

<sup>39</sup> Pani tatua Pharisee hin vao atu la vereea isan Iesu lara, “Tija, o reti isana nom tamlohi usuri mata sava la lo vereea.” <sup>40</sup> Iesu mo řaramira mara, “Varařuhu na vereea isamim, vara la toho malum, la vatu nike, la pa ulo aulu!”

<sup>41</sup> Iesu mara mo pa lo mai mariviti ale mo hite taon tavera atu Jerusalem, mo tangisia, <sup>42</sup> mara, “Tahisaku, vara o pa lo levosahi na nom rohi hin rani akerihi, o pa hite na tamata, pani nakerihi, God mo vusohi na matam moiso. <sup>43</sup> Matan i pa sopo tuai nomim meresahi la pa voro na vořa řalihiho, matan vara la pa piruhu na jara tari.

<sup>44</sup> La pa viliroiroiho, engko peresi na natum vahatea na lolo ropem, la pa ase vevuhi na vatu vořam tari matan ko sopo hitevosahi na rani God mo rohiho.” <sup>45</sup> Moiso, Iesu mo unu na rope Temple, ale mo lo tapulo levuti nañihi la haratu la lo ařeařehi hinia, <sup>46</sup> ale mo vereea isara mara, “La ulia vara, ‘Imaku enia ima mata ususi’, *Isa 56.7* pani kamim ka vaia mo mai ‘jara luhu nona tamlohi vili na tamlohi mata vavanaho matea’.” *Jer 7.11*

<sup>47</sup> Hitahun haratu, na rani hatehateahi Iesu mo lo vujangi na lolo Temple. Tamlohi aulu nona pñis, tamlohi vujangi mata leu peresi na patu tamlohi tinapua hai, la aleale malele vara la vilimateia hinia, <sup>48</sup> pani la sopo hite te malele matan tamlohi tari la pa lo marohati hajavua mata nona retireti.

## 20

### *Suihan Iesu Mo Tai Epu*

(Mt 21.12-17; Mk 11.15-19; Jn 2.13-22)

<sup>1</sup> Na rani matea, Iesu mo pa lo vujangi na tamlohi na lolo Temple na retivujavujangi mata Retiřuhu, ale tamlohi aulu nona pñis peresi na tamlohi vujangi mata leu, peresi na vajahan Israel la mai isana, <sup>2</sup> ale la vereea isana lara, “O to vere kamam hinia, vara sava suiha nahai, ko lo vai la hinau nike hinia, teni ko lo vai la hinau nike na suihan hare?”



<sup>3</sup> Mo řaramira mara, “Enau sohena, a pa usi kamim na retiusia matea, ale ha to vereea isaku vara <sup>4</sup> paptijo non John mo tai na tuka teni isana tamlohi?” <sup>5</sup> Moiso la sorasorahia isara lara, “Vara řa vereea vara, ‘Mo tai na tuka!’ enia i pa vereea vara ‘Mata sava ka sopo rasua?’ <sup>6</sup> Pani vara řa vereea vara, ‘Isana tamlohi!’ tamlohi tari la pa parumateiřa matan la řom vara John enia přovet matea.” <sup>7</sup> Ale matana la řaramia lara, “Kama sopo levosahia vara mo tai epu.”

<sup>8</sup> Ale Iesu mo vereea isara mara, “Vara sohena, enau sohena a pa sopo eři vere kamim hinia vara na lo vai la hinau nike na suiħan hare.”

*Titileu Mata Tamlohi Isa Sasati  
(Mt 21.33-46; Mk 12.1-12)*

<sup>9</sup> Ale, Iesu mo tapulo vere na tamlohi hin titileu akerihi mara, “Tamlohi tavera matea mo lavo na isa grape matea, ale tamlohi la lo pakaia isana. Ale enia mo vano na jara tinapua mo toho mo peravu ea. <sup>10</sup> Na rani asitauni mo mai, mo řule na nona volitusi matea mo vano vara i lavi te vua asitauni isara. Pani la tamlohi atu la tamajia, ale la řulea mo vano lekoleko. <sup>11</sup> Ale tamlohi tavera atu mo mele řule na volitusi tinapua matea, pani la mele tamajia la vailejlejia, ale la mele řulea mo vano lekoleko. <sup>12</sup> Ale tamlohi tavera atu, mo mele řule na hatolura. Enia sohena la vili kitkitia, ale la tipahia. <sup>13</sup> Pa tamlohi tavera matan isa grape atu mara, ‘A pa vai na sava natu? Na levosahia, a pa řule natuku řuhuřuhu nike; korong la pa ololo hinia.’ <sup>14</sup> Pani la tamlohi atu lara la hitea la hase vereea isara lara, ‘Avei korong natuna nahai, řa vilimateia matan koruna i pa nořa.’ <sup>15</sup> Ale la pulahi nařihia hin isa atu ale la vilimateia.” Ale Iesu mo usira mara, “Ka levosahia vara tamlohi tavera matan isa grape atu i pa vai na sava isan la tamlohi atu? <sup>16</sup> I pa mai i vaikomokomora, ale i mele sile isa grape sei isan te tamlohi tinapua.” La tamlohi tavera atu lara la rongo la reti atu lara, “I pa sopo sohen haratu!”

<sup>17</sup> Pani Iesu mo kilau vano tataholo isara mo vereea mara, “Vara mo vono, řaramin reti sei la ulia tuai enia sava lara,

‘Vatu atu, tamlohi voro na ima la tipahia mo mai pulo vatu atu mata ima?’ *Psa 118.22*

<sup>18</sup> Tamlohi tari vara la tialahalaha hin vatu atu, vatu atu i pa putputira, ale vara i jovi hin tea i pa lomolomoa.”

<sup>19</sup> Tamlohi vujangi mata leu peresi na tamlohi aulu nona přis la aleale malele vara la taurilatia hin rani atu purongo, matan la rongovosahia vara Iesu mo lo vereea titileu atu matara, pani la matahuni na tamlohi.

*Iesu Mo Voli Na Takis  
(Mt 22.15-22; Mk 12.13-17)*

<sup>20</sup> Moiso la lo kilau řořohia, ale la řule hai vara la usuri řořohia la lo tiasia vara i vere te hinau la eři taurilatia matana, ale la eři taua na lima tamlohi aulu matan Rome matana.

<sup>21</sup> Matan haratu, la usia lara, “Tija, kama levosahia vara nom reti peresi na nom vujangi la tataholo, ale ko sopo tametame tea, pani tarea ko lo vujangi na malele varařuhu non God. <sup>22</sup> Kama opoia vara kama usiho na retiusia matea. Mo tataholo vara kama sile na takis isan Supe nona mara Rome teni mo vono?” <sup>23</sup> Pani Iesu mo levosahi na nora halu, ale mo vereea isara mara, <sup>24</sup> “Ha vujanġiau hin te selen hatea mata takis. Niniun hare nakerihi, ale sava uliuli nahai hinia?” Lara, “Non Supe nona mara Rome.” <sup>25</sup> Iesu mo vereea isara, “Vara sohena, ha sile Supe nona mara Rome na sava enia nona, ale isan God na sava enia non God.” <sup>26</sup> Ale la tamlohi atu la sopo eři pisuhia hin te hinau mo lo vereea na naho tamlohi, pani la mařurahi tavera na nona řarami reti, ale la lo turu tapanono.

*Sauteterahi Na Mateia  
(Mt 22.23-33; Mk 12.18-27)*

<sup>27</sup> Sadducee hai la mai isana, enira vao matea la sopo rasua vara God i pa sauteterahi na tamlohi, <sup>28</sup> ale la usi na retiusia matea isana lara, “Tija, Moses mo ulia mara vara vorai tamlohi matea mo mate, enia narouna

matea pani mo sopo te natuna, tamlohi atu i pa lavi na malepun voraina ale i pa tape te natun voraina. <sup>29</sup> Ale na rani matea, vorai mo limaravrua la lo toho. Vora tiroma mo lavi na narouna matea, ale mo mate mo sopo te natuna. <sup>30</sup> Ale vora usuria mo pete lavia, <sup>31</sup> moiso hatolura mo mele lavia, ale la tupu limaravrua atu la mate enira mo isoiso, pani la sopo tape te natuvarihi. <sup>32</sup> Hitahuna haʻai atu mo mate. <sup>33</sup> Hin rani atu vara God i sauteterahi na tamlohi, haʻai atu i pa naroun hare? O to vereea isamam, matan enira tupu limaravrua la lahi hinia!”

<sup>34</sup> Ale Iesu mo vereea isara mara, “Nake na varama, tamlohi la lo lahi, ale la lo sile na haʻai mata lahi, <sup>35</sup> pani la haratu God mo hitea vara la tataholo mata turu na sauteterahi na mateia mata unu hin pongi atu mo lo mai, enira la pa sopo lahi teni tea i pa sopo silera mata lahi, <sup>36</sup> matan la pa sopo eʻi mele mate hin te rani matan enira la pa sohena angelo, la natun God matan enira la natun sauteterahi atu. <sup>37</sup> Pani usuri ʻomʻomi atu sei vara tamlohi la pa mele turu na mateia teni mo vono, Moses sohena mo ulia na Retiulia, sei mo vereea hin rani atu God mo retireti isana hin vipahai atu mo lo pepe, Moses mo tovi Moli God mara, ‘God non Abraham, God non Isaac ale God non Jacob’.” *Exo 3.6*

<sup>38</sup> God enia mo sopo God nona tamlohi mate, pani nona tamlohi mauri, matan isana, tamlohi tari la lo mauri.”

<sup>39</sup> Moiso tatua tamlohi vujangi mata leu la ʻaramia lara, “Tija, ko vereea ko varaʻuhu.” <sup>40</sup> Mo sopo te vonara hatea i mele opoia vara i usia hin te retiusia hatea.

*Kristo Enia Natun Hare  
(Mt 22.41-46; Mk 12.35-37)*

<sup>41</sup> Pani Iesu mo mele vereea isara mara, “Mo sohena sava natu la pa vereea vara Kristo enia natun supe David? <sup>42</sup> Matan David hasena mo vereea na puku non psalms mara, ‘Moli God mo vereea isan noku Moli mara:

O sakele na matuaku, <sup>43</sup> vavano a vai na nom meresahi la mai la toho na ruhuruhu palom.’ *Psa 110.1*

<sup>44</sup> David mo tovia Moli, sohena sava natu enia mo pa natuna?”

<sup>45</sup> Ale na peron vao atu la lo tapurongo mo vereea isana nona tamlohi usuri mara, <sup>46</sup> “Ha lo kilau mata tamlohi vujangi mata leu, sei la lo opoia vara la lo hahau ʻalihi peresi na ruru peravu mata hapahapa, ale la opoia vara la lo lavi na retioloole na naho tamlohi na jara maket, ale la opoi na jara sakele la taura mata tamlohi aulu na ima lotu, ale la opoia vara la lo sakele na jara sakele nona tamlohi sei la tovira mata mai na hanhani tavera, <sup>47</sup> ale ha lo kilau mata nora halu sei la lo lavi naʻihi na hinahinau tari nona haʻai malepu hinia, ale la lo tavuhoro na nora vavahinau na ususi peravu. La pa lavi na talai tavera i jeu na tinapua.”

## 21

*Silesilea Nona Malepu Matea  
(Mk 12.41-44)*

<sup>1</sup> Iesu mo kilau vano mo hite na tamlohi tavgav, la lo tau na nora silesilea na jara silesilea na lolo Temple. <sup>2</sup> Ale mo hite na haʻai malepu tilavono matea, mo tau na selen mo rua. <sup>3</sup> Ale mo vereea mara, “Varaʻuhu na vereea isamim, haʻai malepu tilavono nike mo taua mo jeu na tamlohi tavgav mo isoiso. <sup>4</sup> Matan sava la silea mo malue na nora tavgav tavera, pani sava enia mo silea, mo malue na nona tilavono, mo tau vevuhi na sava sei vara i pa eʻi tueni na maurina.”

*Temple I Pa Maroe  
(Mt 24.1-2; Mk 13.1-2)*

<sup>5</sup> Ale, la pa lo vereveveea vara Temple atu mo ʻuhu sohena sava, ale sohena sava la tau mamahuni na vatu ʻuhuruhu hinia, ale sohena sava tamlohi hai la sile na silesilea ʻuhuruhu mata lakolako hinira, ale Iesu mo vereea isara mara, <sup>6</sup> “La hinia sei ka lo hitera, pongi matea mo lo mai vara i pa sopo mele te vatu hatea,

i lo sakele aulu na vatu tinapua sei matan la pa atu jovjovira.”

*Rani Rilangi La Pa Mai*  
(Mt 24.3-14; Mk 13.3-13)

<sup>7</sup> Ale la usia isana lara, “Tija, pangisa natu la hinau sei la pa masele, ale sava matamata natu i pa vujangia vara mariviti natu vara la hinau atu la pa masele?” <sup>8</sup> Ale mo verele mara, “Ha sopo tinañihia vara tea i tikauleji kamim! Matan tamlohi matuvana la pa mai na hijaku lara, ‘Enau natu, Křisto!’ ale ‘Nake natu nona rani pala mo lo mai mariviti!’ Pani ha sopo usurira! <sup>9</sup> Ale vara ka rongo vara jara tavera la lo vai na vuro, ale vara la lo vuro na lolo jarara hasera, ha sopo matahu matan la hinau atu, la pa masele tiroma, ale pongi hitahu, i pa sopo mai vahatea.”

<sup>10</sup> Iesu mo mele verele isara mara, “Mara jara tavera tinatinapu la pa meresahi hinira, ale supe matea i pa meresahi na supe tinapua. <sup>11</sup> Mihi tavera la pa hisu na jara tinatinapua, ale marua peresi na rojoa tavera la pa vili na jara tinatinapua. Ale ha pa hite na hinau matahu tavera peresi na matamata tavera aulu na masapa. <sup>12</sup> Pani tiroma, hin la hinau nike, tamlohi la pa taurilati kamim, ale la pa tipahi kamim, la pa sile kamim isan la haratu la lo kilau na ima lotu peresi na ima řilangi, ale la pa lavi kamim la turuhi kamim na naho supe peresi na patu tamlohi, matan ka lo lavi na hijaku. <sup>13</sup> Enia masapa matea vara ha pa eři vereuliau na naho tamlohi. <sup>14</sup> Ha lo levosahia nake vara, ha sopo matahu vara ha pa řaramira sohena sava, <sup>15</sup> matan enau a pa sile kamim na reti tataholo, vara ha pa verera isana nomim meresahi, ale la pa sopo eři řaramira teni la eři verele vara ka lo halu. <sup>16</sup> Tamamim peresi na tinamim, voraimim, tahisamim peresi na tapalamim, enira sohena, la pa tau te vonamim vara la pa vilimateira. <sup>17</sup> Tamlohi tari la pa řohu hin kamim mata hijaku. <sup>18</sup> Pani te vulumim hatea na patumim i pa sopo

eři tihai purongo. <sup>19</sup> Mauri tui i pa nomim mata nomim turu řilangi.”

*Jerusalem I Pa Jovi Na Lima Tamlohi Rořoha*

(Mt 24.15-21; Mk 13.14-19)

<sup>20</sup> Pani vara ka hite na tamlohi vuro la řalihi Jerusalem, ka levosahia vara nona pongi maroi mo pala natu. <sup>21</sup> Ale la haratu la lo toho Judea, la pa rovo la sahe na vutivuti, ale la haratu la lo toho na lolon taon tavera atu la malue, ale ha pa horo la haratu la lo toho řalihi taon tavera atu vara la sopo unu hinia, <sup>22</sup> matan harihi, enira rani mata talai tavera matan vara sava la ulira moiso la pa masele. <sup>23</sup> I pa mele sati jea isana hařai sei la epe puhoni, teni la haratu la pa lo susui na natura. Matan rani sasati tavera na varama peresi na lolokoru tavera non God mata hehe, i pa jovi isan la tamlohi nike.

*Natun Tamlohi Mo Mele Mai*

<sup>24</sup> La pa vilimateira na sita vuro, ale la pa tiroma hinira sohena slev la vano na jara tinatinapua na varama. Ale la haratu la tamlohi rořoha, la pa varasi Jerusalem i tikeli isoiso rani atu sei God mo taua na limara moiso.

*Hin Rani Atu Iesu I Pa Mele Pala*  
(Mt 24.29-31; Mk 13.24-27)

<sup>25</sup> Ale matamata la pa pala na alo, na vitu peresi na vitusarasara. Ale na varama, tamlohi na jara tinatinapua la pa řomkaka tavera mata roroa tasi peresi na lolopotuna. <sup>26</sup> Tamlohi la pa matemate mata nora matahu peresi na sava la levosahia vara la pa masele usuri na hinau la pa mai na varama, matan suiha la lo tauri na tuka peresi na masapa la pa malue na jarara. <sup>27</sup> Moiso natu tamlohi tari la pa hite Natun Tamlohi i pala na telangi na suihana peresi na merana tavera. <sup>28</sup> Ale vara la hinau atu la lo lavi na jara, ha turu tataholo ha tařa sahe aulu matan nomim jujuri mo lo mai mariviti.”

*Titileu Matea Mata Vipahai Fig*  
(Mt 24.32-35; Mk 13.28-31)

<sup>29</sup> Moiso, Iesu mo verera na titileu matea mara, “Ha kilau usuri na pulo

fig peresi na pulo pahai tari tinatina-pua, <sup>30</sup> vara la tapulo sohai na perera ka hitevosahia vara taro alo mo lo mai mariviti moiso. <sup>31</sup> Ale mo sohena purongo, vara ka hite la hinai sei la lo mai, ka levosahia vara mauri atu God mo aulu hinia, mo lo mai mariviti. <sup>32</sup> Varaŕuhu na vereia isamim vara pina nike i pa sopo lo tihai vevuhi vavano hinai tari la masese. <sup>33</sup> Tuka peresi varama la pa tihai, pani noku retireti la pa sopo eŕi tihai.

<sup>34</sup> Pani ha lo kilau! Mo sopo ŕuhu vara a tapai kamim ka lo toho purongo, teni ka lo drong, teni nomim ŕomkaka la lo taurilati kamim. Ha sopo tinaŕihia vara pongi atu i pala isamim i saŕumahi kamim. <sup>35</sup> Matan i pa saŕumahi na tamlohi tari la lo toho na varama. <sup>36</sup> Pani tarea ha lo kilau, ha lo usiusera ha pa eŕi jelu hin la hinai tari sei la pa masese, ale ha pa eŕi turu na nahon Natun Tamlohi.”

<sup>37</sup> Rani tarea, Iesu mo lo vano mo lo vujangi na lolo Temple; moiso na ravravi mo lo hilu mo lo sahe na Vuti talu Olive, ale mo lo toho ea na vutepongi. <sup>38</sup> Ale na ŕalavuhio jea, tamlohi tari la lo mai isana na Temple vara la tapurongo isana.

## 22

### *Judas Mo Turuposi Hin Iesu*

(Mt 26.1-5, 14, 16; Mk 14.1-2, 10-11; Jn 11.45-53)

<sup>1</sup> Hanhani tavera mata pereti atu mo sopo te isi hinia mo lo mai, haratu la tovia Passover. <sup>2</sup> Ale tamlohi aulu nona pŕis peresi na tamlohi vujangi mata leu, la lo aleale malele vara la pa vilimatei Iesu hinia, matan la matahu vara la vaia na naho tamlohi.

<sup>3</sup> Ale Setan mo sohoni Judas Iscariot, vonara matea hin la tupu sangavulu ŕomana mo rua atu. <sup>4</sup> Mo malue mo vano mo sorasora peresi na tamlohi aulu nona pŕis peresi na patu police mata Temple. Matan la pa vereia vara i pa turuposi hinia sohena sava matan vara i pa taua na limara. <sup>5</sup> Ale la avulahi, la hatihia vara la pa sile te mania isana. <sup>6</sup> Ale matana mo majinga hinia, moiso mo aleale

masapa vara i pa turuposi hinia, vara i eŕi taua na limara hin te jara, mo sopo te vao tamlohi hinia.

### *Isoiso Hanhani Non Iesu*

(Mt 26.17-25; Mk 14.12-21; Jn 13.21-30)

<sup>7</sup> Moiso rani mata pereti sei mo sopo te isi hinia mo pala, enia rani atu la lo sile na natu sipsip mata Passover sohena malamalai isan God. <sup>8</sup> Matana, Iesu mo ŕule Peter enia John mara, “Ha vano ha tatamahu mata noŕa hanhani mata Passover vara ŕa eŕi hania.”

<sup>9</sup> La usia isana lara, “Ko opoia vara kama pa tatamahunia epu?”

<sup>10</sup> Mo vereia isara mara, “Ha tapurongo, vara ka lo unu na taon tavera, ha pa tapai na tamlohi matea mo lo utu na jara wai tavera matea. Ha usuria ha unu hin ima atu enia mo unu hinia, <sup>11</sup> ale ha vereia isan tamlohi tavera mata ima atu vara, “Tija mo vereia isam mara, “Nene jara mata matavuhi na imam sei vara a eŕi hani na hanhani mata Passover peresi na noku tamlohi usuri ea?”

<sup>12</sup> Ale i pa vujangi kamim na jara tavera matea aulu na imana sei mo tatamahunia moiso, ha tatamahu atu.” <sup>13</sup> Ale la malue la vano la hitea mo tataholo sohen mo vereia isara, ale la tatamahu mata Passover atu.

### *Hanhani Mata Passover Atu*

(Mt 26.26-30; Mk 14.22-26; 1Co 11.23-25)

<sup>14</sup> Ale aoa matan hanhani atu mo tataholo, Iesu mo sakele na jara hanhani na tep moiso, ale nona vahaŕule la lo toho peresia. <sup>15</sup> Ale mo vereia isara mara, “Na opoia mo tavera jea vara a hani Passover nike peresi kamim, moiso a pa lavi na rongohaji tavera. <sup>16</sup> Matan na vereia isamim, vara a pa sopo mele hania vavano i tikeli rani atu hinai tari la masese hin mauri atu God mo aulu hinia.” <sup>17</sup> Ale mo lavi na paniken matea ale mara mo vere meje moiso mo vereia mara, “Ha lavia, ha aseia isamim ha inua. <sup>18</sup> Matan na vereia isamim, vara a pa sopo mele inu waen akerihi vavano i tikeli rani atu, mauri atu God mo aulu hinia i mai.”

19 Moiso, mo lavi na pereti, ale mara mo vere meje moiso, mo topetopea mo silea isara mara, “Har-  
ihi enia epeku sei na silea matamim.  
Ha lo vaia sohena mata řomřomiau  
hinia.” 20 Ale lara la hanhani moiso,  
mo mele vaia sohena hin paniken  
waen atu mara, “Paniken nike, na lo  
sureia matamim, enia retitauhi paro  
sei na lo vaia na řaeku.

21 Pani ha tapurongo, haratu sei  
i pa turuposi hiniau, mo lo sahara  
na hanhani na tep peresiau nakerihi.  
22 Matan Natun Tamlohi i pa vano  
i usuri na masalon God, pani rani  
sasati isan haratu sei mo turuposi  
hinia.”

23 Moiso, enira mo isoiso la tapulo  
usiusia isara hatehateahi vara sava  
tamlohi isara natu i pa vai hinau atu.

24 Pani mo sopo tuai, vauriuri  
matea mo malue isara vara hare  
natu enia i pa aulu hin mauri atu  
God mo aulu hinia. 25 Ale Iesu mo  
verea isara mara, “Hin varama nike  
supe nona tamlohi řořoha la aulu  
na nora tamlohi peresi la haratu  
suiha mo lo toho na limara, ale la  
lo retileu isara tarea vara la vai na  
masalora, pani hina purongo vara la  
lo toho na ruhuruhura, la lo tovara  
lara ‘Tuetueni nona tamlohi’. 26 Pani  
i pa sopo sohena isamim: haratu enia  
mo opoia vara i aulu i jeu na tinapua,  
i pa hase taua atano sohena vora  
hitahu matea, ale haratu mo opoia  
vara i tiroma na tamlohi, i pa mai i lo  
volitusi. 27 Hare natu enia tamlohi  
tavaera? Haratu mo sakele na tep  
teni haratu mo volitusi isana? Enia  
haratu mo sakele na tep. Pani enau  
na lo mai isamim sohena volitusi  
matea.

28 Kamim natu, ka lo toho pere-  
siau na noku rani řilangi. 29 Matan  
haratu, na lo silea isamim sohen  
Tamaku mo silea isaku vara, ha pa  
aulu sohena supe, 30 matan vara ha  
pa hanhani ale ha inu na noku tep  
na rani vara na lo tauri na suiha, ale  
ha pa sakele na jara sakele nona supe  
mata ari la tavitavui tupu sangavulu  
řomana mo rua atu non Israel.

*Rani Vaihite La Pa Mai*  
(Mt 26.31-35; Mk 14.27-31; Jn  
13.36-38)

31 Simon, Simon, o lo levosahia  
vara Setan mo usia řilangi vara i pa  
laviho matan vara i hutehutehiho so-  
hena tamlohi mo lo asehi na piri wit,  
32 pani na usiusi moiso matam matan  
vara nom rasua i pa sopo jovi, ale hin  
rani atu sei ko mele posi, o pa tueni  
na voraim vara la turu řilangi.”

33 Peter mo vereea isana mara,  
“Moli, enau na tatamahu vara a vano  
peresiho na ima řilangi, teni a mate  
matam.”

34 Iesu mo vereea mara, “Varařuhu  
na vereea isam Peter, toa i sopo lo  
tarere nohorihhi vavano, i tikeli rani  
atu ko vunvunia vaha tolu vara ko  
sopo levosahiau.”

35 Ale Iesu mo vereea isara mara,  
“Hin rani atu sei na řule kamim ka  
vano ka sopo lavi te tanga korohi teni  
te tanga, teni te sabat – ka vejuveju  
hin te hinau teni mo vono?”

Lara, “Mo vono.”

36 Mo vereea isara mara, “Pani nake  
natu, haratu vara te nona tanga ko-  
rohi teni te tanga i pa lavia. Ale  
haratu mo sopo lo te nona sita vuro,  
i pa ařehi na nona ruru hamariri,  
ale i voli te hatea. 37 Matan na  
verea isamim vara Retitapu nike i  
pa masese hiniau sei mo vara, ‘La  
evia peresi la haratu la lo tope na  
leu’. Matan sava la ulia matakuku i pa  
masese.”

38 Ale la vereea lara, “Eh Moli, sita  
vuro mo rua nahai moiso!”

Ale mo vereea mara, “Mo isoiso  
natu.”

*Iesu Mo Usiusi*  
(Mt 26.36-46; Mk 14.32-42)

39 Ale mo malue hin ima atu mo  
mele vano na Vuti talu Olive sohen  
mo lo vaia tarea, ale nona tamlohi  
usuri la usuria. 40 Ale mara mo kakau  
jara atu mo vereea isara mara, “Ha  
usiusi matan vara ha pa sopo jovi  
na vaihite.” 41 Ale mo hahau vano  
makomona, mo papaohi atano, ale  
mo usiusi 42 mara, “Tata, vara ko  
opoia, o eři lavi nařihhi na noku rani  
řilangi nakerihi, pani o sopo vai na  
masaloku, pani o vai na masalom

purongo.”<sup>43</sup> Ale angelo matea mo pala isana mo tuenia vara i mele řilangi.<sup>44</sup> Ale na nona řom sati taverna mo usiusi mo mele řilangi jea; ale masmasuna mo hoi peresi na řae mo tuturu sivo na lepa.<sup>45</sup> Ale mo mele turu na nona usiusi mo mai isana nona tamlohi usuri, mo hitera la juruvi řomaliho, matan la malokoloko taverna, matan řomira mo sati na sava i pa masese,<sup>46</sup> ale mo vereea isara mara, “Ka lo juruvi mata sava? Ha turu, ha usiusi matan vara ha pa sopo jovi na vaihite.”

*La Taurilati Iesu*  
(Mt 26.47-56; Mk 14.43-50; Jn 18.3-11)

<sup>47</sup> Ale Iesu mo pa lo retireti, vao taverna matea mo pala, ale pa tamlohi atu sei la tovia Judas, enia vonara matea hin la tupu sangavulu řomana mo rua atu, mo lo tiroma hin vao atu, mo mai mariviti isan Iesu vara i pungosia,<sup>48</sup> pani Iesu mo vereea isana mara, “Judas, o pa turuposi hin Natun Tamlohi na pungosi matea?”<sup>49</sup> Ale la haratu la lo toho řalihia, lara la hitevosahi na sava i pa masese lara, “Avei Moli, řa taira na sita vuro teni mo vono?”<sup>50</sup> Ale vonara matea mo langa nařihi na peron volitusi non přis aulu.<sup>51</sup> Pani Iesu mara, “Ha isoiso!” ale mo tikeli na perona, ale mo mele sořoa vano na patuna.<sup>52</sup> Moiso, Iesu mo vereea isana tamlohi aulu nona přis peresi na police mata Temple, peresi na vajiahara sei la mai matana mara, “Ka mai peresi na sita vuro peresi na maja sohen ka lo vano mata taurilati na tamlohi vili na tamlohi mata vavanaho matea?”<sup>53</sup> Tarea na lo toho peresi kamim na lolo Temple pani ka sopo taurilatiau. Pani nakerihi enia nomim rani peresi na rani non suihan řořoha.”

*Peter Mo Vunvuni Iesu*  
(Mt 26.57-58, 67-75; Mk 14.53-54, 66-72; Jn 18.12-18, 25-27)

<sup>54</sup> Moiso la taurilatia, la tiroma hinia la malue la vano na iman přis aulu, ale Peter mo lo usurira asau makomona.<sup>55</sup> Ale lara la vai na hapu matea na livuha jara na lolon

rope ima atu moiso, la sakele řalihia ale Peter mo vano mo sakele pere-sira.<sup>56</sup> Moiso, volitusi hařarihi matea mara mo hite Peter mo lo sakele atu, mo mele kilau mamahunia mara, “Tamlohi nike sohena, mo lo toho peresi Iesu.”<sup>57</sup> Pani Peter mo vunvunia mara, “Hařai, na sopo levosahia.”<sup>58</sup> Ale moiso, tamlohi tinapua matea mo hitea mo mele vereea mara, “Engko vonara matea.” Pani Peter mo vereea mara, “Tapala, enau mo vono.”<sup>59</sup> Ale korong mele aoa matea mo vano moiso, tamlohi tinapua matea mo mele vereea mara, “Varařuhu sei, tamlohi nike enia mo lo toho peresia, matan enia mara Galilee matea.”<sup>60</sup> Pani Peter mara, “Tapala, na sopo levosahi na sava ko lo vereea.” Ale mo pa lo vereea toa mo tarere.<sup>61</sup> Ale Moli mo posi mo kilau vano isan Peter, ale Peter mo mele řomřomi na sava Moli mo vereea isana mara, “Toa i sopo lo tarere, o pa vunvuniau vaha tolu.”<sup>62</sup> Ale mo malue mo sahe na jingoima mo tangi huruhuru.

<sup>63</sup> Ale la haratu la lo taurilati Iesu la tamajia, ale la lo kerehia.<sup>64</sup> La pesihoro na matana ale la lo usia hinia lara, “O to retimangovi! Hare natu mo tutuiho?”<sup>65</sup> Ale la mele vere na hiniau sati tinapua matuvana isana, ale la lo kalia.

*Iesu Mo Turu Na Naho Pulutahi Taverna*  
(Mt 26.59-66; Mk 14.55-64; Jn 18.19-24)

<sup>66</sup> Mara mo rani sahe, matavuhi nona vajiahara la pulutahi peresi na tamlohi aulu nona přis peresi na tamlohi vujangi mata leu. Ale la haratu la lo taurilatia la tiroma hinia mo vano isan nora matavuhi atu, ale la vereea isana lara,<sup>67</sup> “Vara engko natu, Křisto atu, o vereea isamam!” Pani mo vereea isara mara, “Vara a vereea isamim, ha pa sopo rasua,<sup>68</sup> ale vara a usi kamim hin te retiusia, ha pa sopo řaramiau.<sup>69</sup> Pani mo tapulo nake natu, Natun Tamlohi i pa sakele na tavalu suihan God.”

*Psa 110.1*  
<sup>70</sup> Ale matana, enira mo isoiso lara, “Engko natun God teni mo vono?” Moiso mo vereea isara mara, “Ka pete

verea moiso, enau natu.” <sup>71</sup> Moiso, la vereia lara, “Ra pa mele opoi na sava vereulia tinapua! Ra rongoa mo pete hase vereia moiso vara enia Natun God.”

## 23

*Iesu Mo Turu Na Nahon Pilate*  
(Mt 27.1-2, 11-14; Mk 15.1-5; Jn 18.28-38)

<sup>1</sup> Moiso enira mo isoiso la turu, ale la lavi Iesu mo vano isan Pilate. <sup>2</sup> La tapulo tuvaia lara, “Kama hite tamlohi nike mo lo tikauleji na nomam tamlohi, ale mo lo horo kamam vara kama sopo sile te takis isan supe matan Rome, ale enia mo lo vereia vara enia natu, Křisto, supe atu sei i pa mai.” <sup>3</sup> Ale Pilate mo usia isana mara, “Engko Supe nona Jew?” Ale mo řaramia mara, “Engko ko vereia moiso.” <sup>4</sup> Moiso Pilate mo vereia isana tamlohi aulu nona pñis peresi vao tavera atu mara, “Na sopo vilei te hehe hin tamlohi nike.” <sup>5</sup> Pani la vereia toho hinia mo řilangi lara, “Enia mo vai na tamlohi la lo usuri na řomina, mo vujangira na jara tari Judea mo tapulo Galilee mo sinai mo kau nike.”

<sup>6</sup> Pilate mara mo rongoa sohena, mo usia mara enia mara Galilee matea teni. <sup>7</sup> Ale Pilate mara mo levosahia vara Iesu mo tai na jara Galilee mo lo toho na ruhuruhun Herod, mo řulea mo vano isana matan mo lo toho Jerusalem hin rani atu. <sup>8</sup> Na rani Herod mara mo hite Iesu, mo avulahı tavera matan tuai moiso, mo opoia vara i hitea matan mo lo rongoa na sorasorahina, ale mo lo řomtau vara i pa hite Iesu i vai te matamata. <sup>9</sup> Ale mo usia na retiusia mo usia mo tuai, pani Iesu mo sopo řaramira. <sup>10</sup> Tamlohi aulu nona pñis peresi na tamlohi vujangi mata leu la lo turu na pahisana, la lo tuvaia mo řilangi. <sup>11</sup> Ale Herod peresi na nona tamlohi vuro, la vaisatihia na nora retireti, ale la kerehia. Moiso la rua na ruru řuhuruhu, la řulea mo mele vano isan Pilate. <sup>12</sup> Hin rani atu purongo, Herod mo tapala peresi

Pilate. Pani tiroma enira tupra rua la meresahi.

*La Taua Vara I Pa Mate*  
(Mt 27.15-26; Mk 15.6-15; Jn 18.39-19.16)

<sup>13</sup> Moiso Pilate mo tovi matavuhi na tamlohi aulu nona pñis peresi na tamlohi aulu non Israel peresi na tamlohi, <sup>14</sup> ale mo vereia isara mara, “Ka lavi tamlohi nike mo mai isaku, ale ka vereia vara enia mo lo tikauleji na tamlohi. Ale nara na kilau usuri na sava ka lo vereia matana moiso, ale ha levosahia vara na sopo vileia vara tamlohi nike mo ori hin te hinau hatea sei ka lo tuvaia hinia. <sup>15</sup> Herod sohena, mo sopo vilei te hinau, matan enia mo mele řulea mai isařa. Ka hitea, mo sopo vai te hinau vara i pa mate matana. <sup>16</sup> Matana, a pa sile na talai matea isana, moiso a pa tinařihia vara i vano.”

<sup>17-18</sup> Pani la ulo enira mo isoiso vahatea lara, “O vilimatei tamlohi sei! Ale o sile Barabbas isamam!”

<sup>19</sup> Barabbas enia tamlohi matea la pulahia na ima řilangi matan mo lo tiroma na tamlohi mata valum hin taon tavera atu, ale matan mo lo vilimatei na tamlohi. <sup>20</sup> Pilate mo mele sile na retireti isara matan mo opoia vara i tinařihia Iesu, <sup>21</sup> pani la lo ulo toho lara, “Ha vosaea na talopeilopei! Ha vosaea na talopeilopei!” <sup>22</sup> Ale Pilate mo mele sile na nona hatolu reti isara mara, “Mata sava? Mo vai na sava mo sati? Enau na sopo vilei te hinau vara i pa mate matana. Ale matana, a pa sile na talai matea isana moiso a tinařihia vara i vano.” <sup>23</sup> Pani la lo ulo toho isana la lo usia lara la vosaea na talopeilopei. Ale nora reti mo vili na reti non Pilate. <sup>24</sup> Matana, Pilate mo tinařihia vara sava la usia i pa sohena. <sup>25</sup> Matan la usia, mo tinařihia pa tamlohi atu sei mo lo taua na ima řilangi matan mo lo tiroma na tamlohi mata valum, ale matan enia mo lo vilimatei na tamlohi, pani mo sile Iesu vara i vano na masalora.

*La Vosae Iesu Na Talopeilopei*  
(Mt 27.31-44; Mk 15.21-32; Jn 19.17-27)

<sup>26</sup> Ale la pa lo tiroma hinia mo lo malue, la taurilati na tamlohi matea hijana Simon mara Cyrene, enia mo tai asau ŀove na jara vutivuti, ale la tau na talopeilopei isana matan vara i solotia, ale mo usuri Iesu. <sup>27</sup> Ale vao tavera jea nona tamlohi peresi na haŀai la lo tangisia, la lo tangtangi, ale la lo usuria. <sup>28</sup> Pani Iesu mo verea isara mara, “La venatun Jerusalem, ha sopo tangisiau, pani ha tangisi kamim hasemim peresi na natumim. <sup>29</sup> Matan ha lo levosahia vara rani matea mo lo mai sei la pa verea vara, ‘Avulahi isana haŀai aroaro, ale isan haratu la sopo tatape, ale isan la haratu la sopo lo vasusu hin te rani.’ <sup>30</sup> Hin rani atu, ‘Tamlohi la pa tangi isana vutivuti lara – ha jovjovi isamam! Ale isana pesapesa la pa verea lara – ha tavuni kamam!’

#### *Hos 10.8*

<sup>31</sup> Matan vara, vara la vai la hinau nike na rani ŀuhu sei vipahai la lo ulua mo ŀuhu, i pa sohena sava hin rani atu mo kuru?”

<sup>32</sup> Tamlohi tinapua mo rua sei la tamlohi sasati, la tiromara la vano matan vara la pa vilimateira peresi Iesu. <sup>33</sup> Ale lara la kakau jara atu sei la tovia ‘Sui Patu Tamlohi’ la vosaea hin jara atu na talopeilopei peresi la tamlohi sasati atu, matea na matuana, ale matea na marauna.

<sup>34</sup> Ale Iesu mara, “Tata, o ŀomira matan la sopo levosahi na sava la lo vaia!” Ale tamlohi vuro atu la vai na roro matea mata hitea vara hare natu i pa lavi te nona ruru. *Psa 22.18*

<sup>35</sup> Tamlohi la lo turu atu, la lo kilaua, pani tamlohi aulu natu la lo kerehia lara, “Enia mo juri na tinapua! I to hase juria vara enia natu, Kŀristo non God, hara sei God mo viŀonia!” <sup>36</sup> Tamlohi vuro atu sohena la lo kerehia, la mai isana la sile na waen hohona isana vara i inua, <sup>37</sup> ale lara, “Vara engko Supe nona Jew, o hase juriho!” <sup>38</sup> La uli na uliuli matea la taua aulu hinia, mo verea vara,

#### **Harihi Enia Supe Nona Jew**

<sup>39</sup> Vonara matea hin la tamlohi sasati mo rua atu, la lo sevu na

pahisana, mo kerehi Iesu mara, “Engko Kŀristo atu teni mo vono? O hase juriho, ale o juri kamam!” <sup>40</sup> Pani tamlohi sasati tinapua atu matea mo merusahia mara, “Eh, ko sopo matahuni God? Ko sopo levosahia vara enŀa ŀa lo toho na ruhuruhu talai nike peresia? <sup>41</sup> Enŀa mo tataholo vara ŀa lavia, matan enŀa ŀa lavi na volvoli tataholo mata noŀa vavahinau, pani tamlohi nike mo sopo vai te hina sati.” <sup>42</sup> Ale mo verea isan Iesu mara, “Iesu, o lo ŀomŀomiau hin rani atu vara ko tauri na nom suiha mata supe.” <sup>43</sup> Ale Iesu mo verea isana mara, “Varaŀuhu, na verea isam, engko o pa toho peresiau hin jara avulahi atu Paradise nohorihhi.”

#### *Iesu Mo Mate*

(*Mt 27.45-56; Mk 15.33-41; Jn 19.28-30*)

<sup>44</sup> Matan alo mo sangavulu ŀomana mo rua na rani tavera, ale ŀoŀoŀo tavera mo tahavuni jara tavera atu mo tikeli na matan alo mo tolu na ravravi <sup>45</sup> matan mera alo mo tihai. Ale ruru tavera atu mo lo horo na jara tapu mo tapu jea na lolo Temple, mo maŀari mo rua. <sup>46</sup> Moiso Iesu mo ulo aulu mara, “Tata, na tau na mauriku na limam!” Mara mo verea moiso maromaronana mo isoiso. <sup>47</sup> Ale captain mata tamlohi vuro mara mo hite la hinau sei la lo masese, mo haso-haso God mo verea mara, “Varaŀuhu. Tamlohi nike mo sopo vai te hina sati hatea.” <sup>48</sup> Ale vao tamlohi tari atu sei la lo pulutahi mata hite hinau akerihhi, lara la hite la hinau sei la masese, la mule peresi na tangtangi tavera. <sup>49</sup> Ale tapalana tari, peresi la haŀai atu sei la tapulo usuria Galilee, la lo turu asau makomona, la lo kilau la hinau akerihhi.

#### *La Tavuni Na Tarapen Iesu*

(*Mt 27.45-56; Mk 15.33-41; Jn 19.28-30*)

<sup>50</sup> Ale tamlohi matea hijana Joseph mo lo toho atu, mo tai na taon nona Jew la tovia Arimathea. Enia vonara matea na lolo council tavera non Israel, pani enia tamlohi ŀuhu matea posina mo tataholo, <sup>51</sup> ale enia mo



sopo avulahi na sava la hatihia teni na sava la vaira, enia mo tai Ari-mathea na jaran Judea, ale enia mo lo kilau matan rani atu God i pa tauri na suiha hinia. <sup>52</sup> Tamlohi atu mo vano vara i hite Pilate matan vara i usi na tarapen Iesu. <sup>53</sup> Mo juria sivo atano, ale mo viriviria na ruru lulu řuhu matea mata mate, ale mo taua na taptap matea la taia na pesapesa, ale mo sopo lo te tarape i juruvi hinia hin te rani. <sup>54</sup> Rani atu enia Rani mata Tatamahu nona Jew, ale mariviti Sabbath i tapulo. <sup>55</sup> La hařai sei la lo usuria la tai Galilee la usuria vara la hitea vara la pa taua na sava taptap, ale la pa hitea vara la pa tau na tarapena sohena sava. <sup>56</sup> Moiso, la mele mule, ale la tatamahuni na lai ponaha řuhu peresi na hasori mata taua na tarapena.

Na Sabbath la mapu usuri na retileu non Moses.

## 24

*Sauteterahi Non Iesu*  
(Mt 28.1-10; Mk 16.1-8; Jn 20.1-10)

<sup>1</sup> Pani na Sunday na řalavuhō jea, pa la hařai atu la vano na taptap, la lavi na lai ponaha řuhu sei la tatamahunira moiso. <sup>2</sup> Ale lara la kau na taptap la hite vatu tavera atu mata matarua la kuresi nařihia moiso, <sup>3</sup> pani lara la unu la sopo hite na tarapen Moli Iesu, <sup>4</sup> řomira mo pa lo tihai, ale la pa hutura purongo, tamlohi mo rua la lo turu na pahisara, nora ruru la memera tavera. <sup>5</sup> Ale la matahu tavera, la popovi na nahora atano na lepa, ale la tamlohi atu la vereā isara lara, “Mata sava ka lo ale na tamlohi mauri na jara mate?” <sup>6</sup> Enia mo sopo toho nike, pani mo mele turu moiso. Ka lo řomřomi na sava mo vereā isamim hin rani atu mo pa lo toho Galilee, <sup>7</sup> mara Natun Tamlohi i pa vano na lima tamlohi sasati matan vara la pa vosaea na talopeilopei, ale i pa mele turu na hatolu rani.” <sup>8</sup> Ale la pa mele řomřomi na nona retireti, <sup>9</sup> ale la malue na taptap la vano la vere na hināu tari isan la tupu sangavulu řomana matea atu, peresi la haratu la lo toho peresira.

<sup>10</sup> Ale Mary Magdalene, Joanna, Mary tinan James peresi na hařai tinapua hai sei la lo toho peresira, enira natu la vere la hināu sei isan la vahařule atu. <sup>11</sup> Pani la rongoa sohena sora-sora rongorongō vono matea, ale la sopo rasura.

*Iesu Na Malele Emmaus*

<sup>12</sup> Pani Peter mo turu mo maro mo vano na taptap, mo riorio sivo mo hite na tavalu ruru lulu purongo la pa lo toho atu, ale mo mele mule mo mařurahi tavera na sava mo masese.

*Iesu Mo Pala Isana Tamlohi Mo Rua*  
(Mk 16.12-13)

<sup>13</sup> Tataholo hin rani atu, tamlohi mo rua isara, la lo vano na vanuan Emmaus, mariviti kilometre i sangavulu řomana matea hin Jerusalem.

<sup>14</sup> Ale la lo sorahi na hināu tari sei la masese Jerusalem. <sup>15</sup> La pa lo retireti la lo sorahia, Iesu mo mai mo hahau peresira. <sup>16</sup> Pani la sopo hitevosahia matan God mo horora. <sup>17</sup> Ale mo vereā isara mara, “Avei, sava sei ka lo sorahia na nomim hahau?”

La turu vahatea ale nahora mo vujangia vara řomira mo sati.

<sup>18</sup> Ale vonara matea, hijana Cleopas mo řaramia mara, “Avei, korong engko hasem purongo sei ko rohi Jerusalem, ale ko sopo levosahi na sava mo masese hin la rani akerihi sei la vano moiso?”

<sup>19</sup> Ale Iesu mo vereā isara mara, “Sava hināu natu?”

Ale la vereā isana lara, “Hināu la vaia isan Iesu mara Nazareth, enia přovet sei nona retireti peresi na suihana la řuhuřuhu jea na nahon God, peresi na tamlohi tari. <sup>20</sup> Ale sohena sava nomam tamlohi aulu nona přis peresi na tamlohi aulu la taua na liman Pilate, vara i sile na talai isana mata mate, ale la vosaea na talopeilopei. <sup>21</sup> Pani kama lo řomtoho vara enia natu, haratu sei i pa juri Israel. Pani mo sopo haratu purongo, nahapani enia hatolu rani usuri la hināu sei la masese. <sup>22</sup> Ale aulu hin haratu, nomam hařai hai, la vai kamam kama mařurahi jea. Enira la lo toho na tapuna na

řalavuhu jea. <sup>23</sup> Ale lara la sopo hite na tarapena, ale la mele hilu mai, la vereea isamam vara la hite na angelo hai, ale la vereea isara vara mo mele mauri. <sup>24</sup> Tatuamam la rongoa la vano na tapuna vara la hitea, ale la hitea mo tataholo sohen haratu la hařai atu la lo vereea, ale la hitea varařuhu tarapen Iesu mo tihai.”

<sup>25</sup> Ale Iesu mo vereea isara mara, “Ka tamlohi rongorongono vono! Mapumim la řilangi mata rasu na hinau tari přovet la vereea moiso! <sup>26</sup> Mo mera purongo na sava la ulia lara Křisto i pa lavi na rongohaji tiroma, moiso i pa lavi na hasohasona tavera.” <sup>27</sup> Ale Iesu mo tapulo vereuli na hinau tari sei Moses peresi na přovet la ulira na jara tari na Retitapu sei la vereulia vara maurina i pa sohena sava.

<sup>28</sup> Ale lara la lo mai mariviti hin vanua atu sei la lo hahau matana, Iesu mo lo hahau o hitea sohena vara i pa jeu vanua atu, <sup>29</sup> pani la vereea řilangi isana lara, “O lo toho peresi kamam matan mo ravravi moiso, ale alo mo sakele na vuti moiso.” Ale mo usurira, mo lo toho peresira. <sup>30</sup> La sakele na tep, ale mo lavi na pereti mo leřuhu hinia, mo topea, moiso mo silea isara. <sup>31</sup> Ale vahatea purongo, matara la roi la hitevosahia, ale mo tihai isara. <sup>32</sup> La vereea isara hasera lara, “Varařuhu sei matan mapuřa la avulahi jea na rani Iesu mo lo retireti peresiřa na malele sei mo vai na Retiulia la roi isara?” <sup>33</sup> Ale la turu vahatea la hilu, la mele vano Jerusalem, la tapai la tupu sangavulu řomana matea atu peresi la haratu la lo toho peresira la lo pulutahi na jara matea. <sup>34</sup> Ale la vereea isan la tupra rua atu lara, “Varařuhu, Moli mo mele turu, mo pala isan Simon Peter moiso!” <sup>35</sup> Moiso la tupra rua atu la pete vere na sava mo masese na malele, ale sohena sava la pa hitevosahia na rani mo tope na pereti.

*Vavahinau Non Nona Tamlohi Usuri*  
(Mt 28.16-20; Mk 16.14-18; Jn 20.19-23; Acts 1.6-8)

<sup>36</sup> La pa lo sorahi la hinau sei, Iesu mo turu na livuhara, mo vereea isara mara, “Tamata i toho isamim!” <sup>37</sup> Pani la hutura hinia, la matahu tavera matan la řom vara la hite na tanume matea. <sup>38</sup> Moiso mo vereea isara mara, “Ka matahu mata sava? Ale řomkaka mo malue na mapumim mata sava? <sup>39</sup> Ha hite na limaku peresi na paloku vara enau varařuhu nahai. Ha tikeliau, ale ha levosahia, matan tanume mo sopo te epena soheku sohen ka lo hitea.” <sup>40</sup> Ale mara mo vereea moiso, mo vujangi na limana peresi na palona isara. <sup>41</sup> Ale la sopo lo rasu na sava la hitera matan la mařurahi tavera hinia, ale mo vereea isara mara, “Avei, te hanhahi nike?” <sup>42</sup> Ale la silea na tavalu maji matea mo noha na wai tutuni, <sup>43</sup> ale mo lavia mo hania na nahora.

#### *Iesu Mo Retileu Isara*

<sup>44</sup> Ale Iesu mo vereea isara mara, “Reti nike enira noku reti sei na pete vereea moiso isamim hin rani atu na pa lo toho peresi kamim, vara hinau tari sei la ulia na Leu non Moses peresi na Retiulia nona přovet peresi na puku non psalms la pa masese.” <sup>45</sup> Moiso mo vai na řomira la roi matan vara la eři rongovosahi na Retitapu, <sup>46</sup> ale mo vereea isara mara, “La ulia sohen harihi lara, Křisto i pa lavi na rongohaji moiso i mate, ale na hatolu rani i pa mele turu na mateia, <sup>47</sup> ale la pa retivujavujangi na posi mata hehe, ale God i pa řomi na nora hehe na hijan Křisto, la pa retivujavujangia i vano isana tamlohi mara jara tinatinapua tari i tapulo Jerusalem i vano. <sup>48</sup> Kamim ka hite la hinau sei na matamim. <sup>49</sup> Ale ha levosahia vara na lo řule na Tanume Tapu usuri na retitauhi non Tamaku isamim. Pani ha lo toho Jerusalem i tikeli rani atu suiha aulu matan na tuka i jovi hin kamim.”

#### *Iesu Mo Sahe Na Tuka* (Mk 16.19, 20; Acts 1.9-11)

<sup>50</sup> Moiso mo tiromara la malue la vano la tikeli Bethany, ale mo tahe na limana mo leřuhu hinira. <sup>51</sup> Mo pa lo leřuhu hinira, God mo lavi nařihia mo sahe aulu na tuka. <sup>52</sup> Ale la lotua,

la mele hilu la vano Jerusalem peresi  
na avulahi tavera, <sup>53</sup> ale la vano la lo  
toho tarea na Temple mata hasohaso  
God ea.

## Retiruhu Hin Iesu Křisto John Mo Ulia Puku Nike

John mo vujangia vara Iesu Křisto enia 'Reti non God' sei mo vai na hinau tari la lo toho (1.3-4). Mo vujangia vara John Tamlohi Paptijo mo levosahia vara enia 'Natu Sipsip non God tataholo, enia natu, i pa lavi nařihi na hehe nona tamlohi na varama'. (1.29) Philip mo vereea mara Iesu enia haratu Moses mo lo vereea mara i pa mai (1.45).

John mo vujangia vara Iesu enia sava tamlohi, ale nona vavahinau sohena, la vujangia vara enia God mo mai tamlohi.

### Matamata Mo Limaravrua Non Iesu:

1. Mo posi na wai mo mai waen (2.1-12)
2. Natun tamlohi tavera Capernaum mo mele řuhu (4.43-54)
3. Tamlohi rojoa matea Bethzatha mo mele řuhu (5.1-47)
4. Iesu mo vahani na tamlohi (6.1-15)
5. Iesu mo hahau na pusa tasi (6.16-21)
6. Tamlohi matavuso matea (9.1-41)
7. Lazarus mo mele mauri (11.1-57)

### 'Enau na' Reti non Iesu mo limaravrua

1. Enau na pereti mata mauri (6.35, 51)
2. Enau na malarani mata varama (8.12)
3. Enau na matarua (10.7, 9)
4. Enau na tavui sipsip řuhu (10.11, 14)
5. Enau na sauteterahi peresi na mauri (11.25)
6. Enau na malele, retivararuhu peresi na mauri (14.6)
7. Enau na asi grape vararuhu (15.1)

John mo uli puku nike matan vara ha pa eři tau na nomim rasua hin Iesu vara enia Křisto atu, Natun God. Vara

ha tau nomim rasua hinia ha pa lavi na mauri vararuhu. (20.31)

'Matan God mo opoi na tamlohi na varama sohen harihi: mo sile Natuna sei enia vorahese, vara sava tamlohi mo rasua i pa sopo vano na komo, pani i pa lavi na mauri tui.' (3.16)

### Hin Puku Nike

1. Iesu enia Reti non God (1.1-18)
2. Vujangi non John Tamlohi Paptijo (1.19-34)
3. Iesu mo viřoni na nona tamlohi usuri (1.35-51)
4. Tatua matamata tavera Iesu mo lo vaira (2.1-12.50)
5. Isoiso wik non Iesu; nona mateia (13.1-19.42)
6. Iesu mo turu na mateia (20.1-10)
7. Iesu mo pala isana nona tamlohi usuri (20.11-21.25)

### *Iesu Enia Reti Non God*

<sup>1</sup>Tuai tiroma, Reti atu mo pete toho moiso. Mo lo toho peresi God, ale Reti sei enia God tataholo. <sup>2</sup>Tuai tiroma, enia mo lo toho peresi God, <sup>3</sup>ale hinia, God mo vai na hinau tari, mo sopo te hinau hatea vara mo sopo vaia hinia. <sup>4</sup>Pulo mauri mo lo toho isana. Mauri atu enia mo lavi na malarani mo mai isana tamlohi. <sup>5</sup>Malarani atu mo sasarami na řořoha. Rořoha atu mo sopo eři turuhoroa.\*

### *God Mo Rule John*

<sup>6</sup>God mo řule na tamlohi matea mo mai, hijana John. <sup>7</sup>Enia mo mai mo sohena tuetueni matea vara i vereuli na tamlohi hin malarani atu. Mo vereea matan vara tamlohi tari la pa rasu malarani atu. <sup>8</sup>Tuetueni atu enia mo sopo malarani atu, pani enia mo mai vara i vereuli malarani atu.

### *Malarani Mata Varama*

<sup>9</sup>Malarani atu mo mai na varama, enia mo malarani vararuhu. Malarani vararuhu atu mo sile na malarani vara tamlohi tari la pa levosahia.

<sup>10</sup>Hina purongo vara God mo vai na varama hinia, pani varama mo sopo hitevosahia. <sup>11</sup>Mo mai na nona varama, isan la tadvavuina tataholo,

\* 1:5: turuhoroa: teni 'hitevosahia'.

pani la řohu hinia. <sup>12</sup> Pani isan la haratu la lavia, la rasu na hijana, ale enia mo tinařihira vara enira la pa eři mai natun God. <sup>13</sup> La mai natun God mata masalon God hasena. La sopo mai natun God na posposi tamlohi mo vora teni na masalo tamlohi.

### *Reti Atu Mo Mai Tamlohi*

<sup>14</sup> Reti sei mo mai tamlohi, mo lo toho peresiřa. Kama hite na hina řuhuřuhu matuvana na maurina moiso, hina řuhuřuhu matuvana non haratu hasena enia mo tai isan Tama, enia pulo řomřuhu, ale enia pulo retivarařuhu.

<sup>15</sup> John mo ulu aulu mara, “Hara sei natu, na lo vereia vara i pa mai hitahu hiniau, enia mo aulu hiniau, matan enia mo lo toho tiroma tuai hiniau.”

<sup>16</sup> Matan nona tavgav mo tavera, ale enřa mo isoiso řa lo lavi na nona otori řuhu matuvana, ale matana, nona řomřuhu mo lo mařivisihiřa la lo masurare hiniřa, <sup>17</sup> matan Moses mo sileřa na Leu, pani řomřuhu peresi na retivarařuhu la tai isan Iesu Křisto. <sup>18</sup> Te tamlohi mo sopo lo hite God hin te pongi, pani haratu enia God sei mo lo toho na tavalun Tama, enia mo vujangia isařa vara God enia mo sohena sava.

### *John Tamlohi Paptijo*

*(Mt 3.1-12; Mk 1.1-8; Lk 3.15-17)*

<sup>19</sup> Hin rani atu tamlohi tatavera nona Jew la řule na přis peresi na tatua vao Levi enira tuetueni nona přis la lo toho Jerusalem vara la mai la usia isan John vara, “Engko natu Křisto atu teni mo vono?” Ale John mo řaramira, <sup>20</sup> mo sopo vunvunia, mo taviti isara mara, “Enau mo sopo Křisto atu!” <sup>21</sup> Ale la usia isana lara, “Ale o to vereia vara, engko hare? Engko Elijah teni mo vono?”† Pani mo řaramira mara, “Mo vono, mo sopo enau.” La mele usia lara, “Engko natu, přovet atu teni mo vono?” Mo mele vereia isara mara, “Mo vono.” *Deut 18.15, 18; Isa 40.3*

<sup>22</sup> Ale la vereia isana lara, “Engko hare? O vere kamam hinia matan kama pa eři řarami la haratu la lo

řule kamam. O to vere kamam hiniho vara engko hare.” <sup>23</sup> John mo vereia sohen přovet Isaiah mo vereia mara,

‘Enau leo atu mo lo ulo na jara hase-toho,

ha vasahi na malele matan vara Moli God i pa hahau hinia!’ *Isa 40.3*

<sup>24</sup> Ale tatuara la mai isana enira la tai na vao Pharisee. <sup>25</sup> La mele usi John hinia lara, “Kama rongoho moiso vara engko mo sopo Křisto atu, teni Elijah teni přovet atu Moses mo vereia vara i pa mai, ale vara mo sohena, mata sava ko lo paptijo na tamlohi?” *Deut 15.15-18*

<sup>26</sup> John mo řaramira mara, “Paptijo nike, enau na lo vaia na wai purongo, pani matea mo lo turu na livuhamim moiso kamim ka sopo lo hitevosahia, <sup>27</sup> haratu sei i pa mai usuriau enia mo aulu hiniau, ale enau na sopo tataholo vara a uli nařihi na asi eve palona.” <sup>28</sup> La hinia sei la masese na taon Bethany, tavalu vano na wai Jordan. Hin jara atu John mo lo paptijo na tamlohi ea.

### *Iesu Enia Natu Sipsip Non God*

<sup>29</sup> Mo mele rani sahe, John mo hite Iesu mo lo hahau mo lo mai isana, mo vereia isan vao atu mara, “Eh! Ha kilau vano sevano isan tamlohi sei mo lo mai. Enia natu, Natu Sipsip non God tataholo, enia natu, i pa lavi nařihi na hehe nona tamlohi na varama. <sup>30</sup> Enau na pete vere kamim hinia moiso vara, ‘Tamlohi matea i pa mai hitahu hiniau mo aulu jea hiniau!’ matan mo lo mauri mo lo toho moiso tiroma na noku pongi vora.’ <sup>31</sup> Enau na sopo hitevosahia vara enia hare, pani enau na mai na lo paptijo na wai matan vara enia i pa pala isan Israel.”

<sup>32</sup> Moiso, John mo lo vereulia mara, “Na hite Tanumen God mo tai aulu na tuka sohena vomahē matea, mo tau hinia. <sup>33</sup> Tiroma na sopo hitevosahia vara enia hare, pani haratu sei mo řuleau vara a paptijo na wai mo vereau hinia mara, ‘Vara o hite na

† **1:21:** Elijah: tavgavuin Israel la levosahia vara Moses mo vereia tiroma vara tamlohi matea God mo viřonia vara i pa pala isara hin te rani.

Tanume Tapu i sevuti i tau na tamlohi matea, tamlohi atu natu, ko lo kilau matana. Enia haratu i pa řuřuni na tamlohi na suiħan Tanume Tapu.’  
<sup>34</sup> Matan na hitea moiso enau a eři vereea kamim ĥinia vara varařuhu haranike natu, enia Natun God.”

#### *Andrew Enia Peter La Hite Iesu*

<sup>35</sup> Mo mele rani sahe, John mo lo turu atu mo lo sorasora peresi na nona tamlohi usuri mo rua ĥin jara atu. <sup>36</sup> Moiso, John mo hite Iesu mo lo ĥahau na tavalura, moiso John mo vereea isara mara, “Ka hite tamlohi sevano, enia natu, enia Natu Sipsip non God tataholo.” <sup>37</sup> Tamlohi usuri non John lara la rongoa, la vano vahatea vara la pa usuri Iesu.

<sup>38</sup> Moiso Iesu mo posi vano isara mo hite vara la lo usuria mara, “Ka opoi na sava?”

La řaramia lara, “Rabbi, imam mo lo toho epu?” Ale řaramin ĥija nike ‘rabbi’ enia ‘tija’. <sup>39</sup> Moiso mo vereea isara mara, “Ĥa mai, ĥa pa hitea.” La vano enira tolu Iesu la hite jara atu Iesu mo lo toho ea. Matan alo mo vati na ravravi moiso, ale la lo toho peresia mo sinai mo ravravi ĥea.

<sup>40</sup> Vonara matea atu sei mo rongoa John mo lo verera ĥin Iesu, ale mo usuria enia Andrew, vorain Simon Peter. <sup>41</sup> Ĥinau tiroma Andrew mo vaia mo vano vara i ale tavaina Simon vara i vereea isana vara, “Kama hite tamlohi atu, enia natu pa Tamlohi Jujuri atu!” Tamlohi Jujuri na leon tavitavu ĥin Israel řaramina enia ‘Křisto’ na leo mara Greek.

<sup>42</sup> Andrew mo vereea isana moiso mo lavia mo mai isan Iesu. Moiso Iesu mo vereea isana mara, “Engko Simon natun John, pani nake a pa tau na ĥijam vara Cephas.” Raramin ĥija sei ‘Cephas’ enia ‘Peter’.

#### *Iesu Mo Tovi Philip Peresi Nathanael*

<sup>43</sup> Mo mele rani sahe Iesu mo vano Galilee. Mo tapai Philip ea, ale mo

verea isana mara, “O pa mai noku tamlohi o usuriau!” <sup>44</sup> Philip mo tai ĥin taon sei Bethsaida, jaran Andrew enia Peter. <sup>45</sup> Philip mo malue vara i ale Nathanael, moiso mo vereea isana mara, “Kama tapai pa tamlohi tataholo atu sei Moses mo lo ulia na Leu, ale přovet sohena la uliuli matana vara i pa mai.‡ Kama hitea enia mara Nazareth, natun Joseph, ĥijana Iesu.”

<sup>46</sup> Pani Nathanael mara mo rongoa mo vereea mara, “Nazareth! I vono! Sava ĥinau i řuhu i eři malue ĥin jara atu?”

Philip mo řaramia mara, “O mai, o pa hitea engko hasem.”

<sup>47</sup> La pa lo mai, Iesu mo ĥitera, mo vereea isan Nathanael mara, “Varařuhu, na lo hite na tamlohi matea enia mahapin Israel tataholo matea, mo sopo te ĥalu ĥinia.” <sup>48</sup> Ale Nathanael mo usia mara, “Pani engko ko levosahiau sohena sava?”

Iesu mo řaramia mara, “Ĥin rani atu Philip mo sopo lo vano matam, enau na pete ĥiteho moiso, ko lo sakele na malumalu pulo fig vipahai atu.”

<sup>49</sup> Nathanael mo řaramia mara, “Tija, engko Natun God tataholo! Engko Supe non Israel!”§

<sup>50</sup> Iesu mo řaramia mara, “Enau na vereea purongoa vara na ĥiteho ko lo sakele na pulo fig matea, moiso vahatea purongoa ko rasuau, pani o pa mele hite na ĥina mařurahi matuvana, la pa ĥeu haratu sei ko lo ĥitera! <sup>51</sup> Varařuhu na vereea isamim mo isoiso, ĥa pa hite tuka i roi, moiso ĥa pa hite na angelo non God la pa lo mai, la pa lo sahe aulu, moiso la pa lo sevuti isan Natun Tamlohi.”\*

## 2

#### *Lahi Matea Cana*

<sup>1</sup> Rani mo tolu mo vano moiso, ale ĥinan Iesu mo lo toho na lahi matea na taon matan Cana na jara Galilee.

‡ 1:45: la ulia: Reti sei řaramina enia Retiulia tuai la ulia matařa. § 1:49: Nathanael mo hutua matan Iesu mo sopo hitea na matana, matan Nathanael mo sopo toho ĥin te jara mariviti isan Iesu.

\* 1:51: la pa lo mai, la pa lo sahe aulu: Na rani Jacob mo rovo isan Esau, mo mavuho mo hite na angelo la lo mai, la lo sahe aulu na tuka na lada matea.

<sup>2</sup> La usi Iesu tolu na nona tamlohi usuri vara la pa mai hin lahi atu.

<sup>3</sup> Pani hin rani atu waen mo isoiso, mo sopo mele tea. Tinan Iesu mo vere Iesu hinia mara, “Mara waen mo isoiso, mo sopo mele tea.” <sup>4</sup> Iesu mo řaramia mara, “Eh, nana, mo sopo te nořa hinia, matan noku rani mo sopo lo mai.”\*

<sup>5</sup> Tinana mo vere isan la tamlohi tuetueni hin jara atu mara, “Ha vai na sava hinia i pa vere isamim.”

<sup>6</sup> Moiso mo kilau vano mo hite na jara wai tatavera mo limarave la vaira na lepa; Jew la lo utu na wai loso mata nora lotu hinira. La eři tau na wai i tikeli 50 lita hinira hatehateahi. <sup>7</sup> Iesu mo vere isan la tamlohi tuetueni atu mara, “Ha mařivisira na wai!” Ale la vaia sohena, <sup>8</sup> ale mo vere isara mara, “Ha rengi tea, ha silea isana tamlohi tavera mata hanhani vara i inu rongonga.”

Ale la vaia sohena mo vere. <sup>9</sup> Pa tamlohi sei mo lo kilau na hanhani mo rongoa vara waen, pani enia mo sopo levosahi te hinia hinia, pani tamlohi tuetueni purongo enira la levosahia, ale mo vano mo tovi pa tamlohi atu vara i pa lahi mo mai isana, <sup>10</sup> mo vere isana mara, “Tarea na lahi, tamlohi lahi mo lo sile na waen řuhu mo memeje tiroma vara tamlohi la pa putu makomona hinia, moiso i pa sile na waen mo sopo řuhu jea, pani engko ko tau na waen řuhu sei vara řa pa inua hitahu!” <sup>11</sup> Matamata tavera atu enia tiroma matamata tavera Iesu mo vaia, ale mo vaia na taon Cana na jara Galilee.† Iesu mo vuhesi na nona suiha řuhuru isana nona tamlohi usuri ea, ale la tau na nora rasua hinia. <sup>12</sup> Hitahun haratu Iesu mo sahe Capernaum peresi tinana, la tasina tolu na nona tamlohi usuri, vara la pa toho atu te makomo rani.

### *Iesu Mo Rohi Na Temple*

(Mt 21.12-13; Mk 11.15-17; Lk 19.45-46)

\* **2:4:** noku rani: rani sei vara tamlohi la pa hitevosahia vara Iesu enia Natun God tataholo. Hite: Jn 12.23. † **2:11:** matamata tavera: matamata atu mo vujangia vara la pa rasu na suiha God mo lo toho hin Iesu.

<sup>13</sup> Nake mo lo mai mariviti mata hanhani tavera nona Jew la tovia Passover, ale Iesu mo sahe Jerusalem matana. <sup>14</sup> Iesu mo unu na Temple mo hite na vao tamlohi matuvana la lo hařehi na buluk, sipsip peresi na vomahe mata malamalai ea. Ale mo hite na tamlohi mata jenjen mania la lo jeni na mania na mania mata silesilea na lolo Temple, la lo sakele na nora tep. <sup>15</sup> Moiso mo vai na maja na oti asihai, mo levuti nařihira peresi na pulara maji mo isoiso na lolon Temple atu. Mo jarai jovi na nora mania, ale mo tipovi na nora tep.

<sup>16</sup> Isan la haratu la lo hařehi na vomahe mo vere isara mara, “Ha lavi nařihi la hinia nika! Ha sopo vai na Iman Tamaku ima ařeařehi matea!”

<sup>17</sup> Nona tamlohi usuri la hitea, la mele řomřomi na sava Retiulia mo vere mara, ‘Noku opoia mata imam mo tavera jea, ale mo joleau vara a kilau’.

<sup>18</sup> Ale tamlohi tavera nona Jew lara, “O pa eři vai te matamata hatea nakerihi vara kama pa levosahia vara engko natu, tamlohi tataholo sei vara o pa eři vai hinia sei?”

<sup>19</sup> Iesu mo řaramira mara, “Ha kauti Temple nika, moiso na rani i tolu purongo, a pa mele turuhia.”

<sup>20</sup> Moiso tamlohi tatavera nona Jew atu la řaramia lara, “La voro Temple nika mata tauni mo ngavulu vati mo limarave (46), pani o pa mele turuhia na rani i tolu purongo sohena sava?”

<sup>21</sup> Pani Iesu mo lo retireti na epena sohena Temple matea. <sup>22</sup> Hin rani atu mo mele turu na mateia, nona tamlohi usuri la mele řomřomi nona retireti atu, ale la rasu na Retitapu peresi na retireti non Iesu.

### *Iesu Mo Levosahi Na Tamlohi*

<sup>23</sup> Hin rani atu Iesu mo lo toho Jerusalem na hanhani Passover, vao tavera la rasua vara enia tamlohi atu la lo kilau matana, matan la hite na matamata mo lo vaira. <sup>24</sup> Pani Iesu

mo sopo rasura matan mo levosahi na sava mo lo toho na mapura. <sup>25</sup> Tea i sopo eři vereulia isana vara tamlohi la sohen sava. Enia mo levosahira moiso.

### 3

#### *Nicodemus Mo Mai Isan Iesu*

<sup>1</sup> Ale tamlohi tavera matea na vao Pharisee hijana Nicodemus, enia tamlohi aulu matea nona Jew, <sup>2</sup> mo mai isan Iesu na vutepongi matea mo vereea isana mara, “Tija, kama levosahia vara God mo řuleho vara o vujangi kamam, matan mo sopo te tamlohi hatea vara i eři vai na matamata vara God mo sopo toho isana.”

<sup>3</sup> Iesu mo řaramia mara, “Varařuhu na vereho hinia, vara tamlohi la sopo lavi na vora paro tiroma,\* la pa sopo eři hitevosahi mauri atu God mo aulu hinia.”

<sup>4</sup> Nicodemus mo usia mara, “Pani tamlohi mo vajiaha moiso i pa mele vora sohen sava? I pa eři mele unu na pangen tinana vara i pa mele vora teni i vono?”

<sup>5</sup> Iesu mo řaramia mara, “Varařuhu, varařuhu na vereea isam vara te tamlohi i sopo vora na wai peresi na Tanumen God, i pa sopo eři unu hin mauri atu God mo aulu hinia. <sup>6</sup> Tamlohi la sile na mauri tamlohi isan natura, pani Tanumen God mo lo sile mauri atu mo tai isana. <sup>7</sup> Ha sopo mařurahi hin noku reti sei, na lo vereea isam vara ha pa lavi vora paro atu mo tai na tuka. <sup>8</sup> Tanumen God hasena mo lo sile na mauri paro. Tanumen God mo sohen langi sei mo lo sere mo vano na jara mo opoia, ko rongoa, pani ko sopo levosahia vara mo tai epu teni na sava jara mo lo vano ea.”

<sup>9</sup> Nicodemus mo usia mara, “La hinai sei la pa sohen haratu sohen sava?”

<sup>10</sup> Iesu mo řaramia mara,

“Engko natu, tija nona tavgavuın Israel, pani ko sopo lo levosahi la hinai sei mata sava? <sup>11</sup> Varařuhu na vereea isam, kama lo vereuli na sava kama levosahira, matan kama hasemam hitera, pani ka sopo rasu nomam vereulia sei. <sup>12</sup> Vara a vere kamim na hinai mata varama, pani ha sopo rasuau, ha pa rasuau sohen sava vara a vere kamim na hinai matan na tuka? <sup>13</sup> Tea mo sopo lo sahe na tuka, ale i mele sinai, pani Natun Tamlohi hasena, enia mo tai atu mo sinai nika. <sup>14</sup> Sohen tuai Moses mo tahe na mata mo vaia na bronze na tano koru, ale sohen haratu natu la pa tahe Natun Tamlohi aulu,† <sup>15</sup> vara sava tamlohi mo tau na nona rasua isana, enia i pa lavi na mauri tui.

<sup>16</sup> Matan God mo opoi na tamlohi na varama sohen harihi: mo sile Natuna sei enia vorahese, vara sava tamlohi mo rasua i pa sopo vano na komo, pani i pa lavi na mauri tui.

<sup>17</sup> Matan God mo sopo řule Natuna na varama vara i ari na tamlohi, mo vono. Mo řulea vara i jurira hinia. <sup>18</sup> Haratu mo rasu na Natun God enia i pa sopo lavi na talai, pani isan la haratu la sopo rasua, God mo pete tau na nora talai moiso matan la sopo rasu na hijan Natun God vorahese.

<sup>19</sup> Pulo nora talai mo sohen harihi: matan malarani mo mai na varama, pani tamlohi la opoi na řořoha mo tavera mo jeu na malarani matan nora vavahinau la hehe. <sup>20</sup> Pani la haratu la lo vai na hehe la pa sopo eři mai na malarani, la řohu vara la mai na malarani matan vara i vono, malarani i pa vuhesi na nora hehe. <sup>21</sup> Pani la haratu la lo ololo na reti- varařuhu na maurira, enira la pa mai na malarani, matan vara i vujangia vara nora vavahinau la tai isan God.”

#### *John Mo Vereuli Iesu*

<sup>22</sup> Hitahun harihi, Iesu tolu na nona tamlohi usuri, la mai na jara Judea. Enia mo lo toho peresira

\* **3:3:** vora paro: vora atu mo tai aulu. † **3:14:** mata mo vaia na bronze: hin pongi atu tuai God mo sile na talai isana tavgavuın Israel. Mo sohai na mata vara la hatimateira. Moses mo vai na mata na bronze aen mo tahea aulu matan God mo vereea mara, vara tea i kilau sahe isana i pa mele ruhu, ale la haratu la rasua la mauri.



makomona, ale mo lo paptijo na tamlohi.

<sup>23-24</sup> Hin rani atu la sopo lo tau John na ima řilangi, enia mo lo paptijo na tamlohi la lo mai isana na jara Aenon mariviti Salim mata wai mo mařivi ea.

<sup>25</sup> Hin rani atu tamlohi usuri non John la lo vasvas peresi na Jew matea mata nora posposi mata hoje vara la vokevoke.† <sup>26</sup> Ale la mai isan John la vere a isana lara, “Tija, pa tamlohi atu ko lo vere a hin rani atu, na tavalu wai Opae Jordan, nakerihi mo lo paptijo na tamlohi, moiso tamlohi tari la lo marongia.”

<sup>27</sup> John mo řaramira mara, “Tea i sopo eři vai te hinau hatea, pani vara God mo tinařihia, enia i pa eři vaia. <sup>28</sup> Kamim ka levosahi na sava na pete vere a isamim moiso vara enau, mo sopo Křisto atu, pani God mo řuleau vara a mai tiroma hinia. <sup>29</sup> Ka sopo levosahia vara tamlohi i pa lahi natu, mo lahi na hařai, pani tapalan tamlohi atu mo avulahi vara mo rongo na leona, ale vara i turu mariviti isana. Enia natu, noku avulahi tavera mo vano sohena natu. <sup>30</sup> Enia hijana i pa mai i mele aulu jea, pani hijaku i pa lo sivo atano jea.

#### *Haratu Mo Tai Na Tuka*

<sup>31</sup> Haratu mo tai na tuka, enia mo aulu na tamlohi tari. Haratu mo tai na varama, enia non varama, ale enia mo eři vere na hinau na varama purongo. Pani haratu mo tai na tuka mo aulu na tamlohi tari. <sup>32</sup> Mo lo vere na sava mo hitera, mo rongora, pani tamlohi la sopo rasua. <sup>33</sup> La haratu la rasua enira la vere a vara God enia varařuhu. <sup>34</sup> Matan God mo řule Natuna vara i vere na nona reti, matana, mo sile vevuhi na suiha Tanumena isana.

<sup>35</sup> Tama sei, mo opoi Natuna, ale mo tau na hinau tari na limana vara i aulu hinira. <sup>36</sup> Haratu mo rasu Natuna mo pete lavi na mauri tui moiso. Pani haratu mo sopo ololo hin Natuna, i pa sopo eři lavi mauri

tui atu, matan talai lolokoru non God mata hehe mo lo toho isana.”

## 4

### *Hařai Mara Samaria Matea*

<sup>1</sup> Na rani Iesu mo levosahia vara Pharisee la rongoa moiso vara tamlohi la lo usuria, la jeu la haratu la lo usuri John, <sup>2</sup> mo řuhu vara ha levosahia vara Iesu hasena mo sopo paptijo na tamlohi, pani nona tamlohi usuri hasera la lo paptijo na tamlohi, <sup>3</sup> ale matana, Iesu mo malue Judea mo mele vano Galilee.

<sup>4</sup> Hin rani atu mo lo hahau roto Samaria, <sup>5</sup> mo hahau mo mai Samaria na taon matan Sychar mariviti hin lepa atu sei tuai Jacob mo silea isan natuna Joseph. <sup>6-8</sup> Wel atu Jacob mo helia tuai mo pa lo toho ea, ale Iesu mo sakele na tavaluna matan mo hahau jara peravu mo malokoloko.

Ale na livuha rani, tamlohi usuri non Iesu la vano vara la voli te hanhahi na taon. Hařai mara Samaria matea mo mai vara i utu te wai na wel. Iesu mo usia isana mara, “O eři utu te maku wai?” <sup>9</sup> Hařai atu mo řaramia mara, “Engko Jew matea, ale enau hařai mara Samaria! Vara sava engko ko usiau vara a utu te mam wai?” Mo usia sohena matan mara Judea peresi na mara Samaria la lo hitelehilehira.

<sup>10</sup> Moiso Iesu mo řaramia mara, “Engko ko sopo levosahi na sava God mo opoia vara i silea isam. Ale engko ko sopo levosahia vara harepu nahai mo lo usiho na wai mata i inua. Vara o pa lo levosahia, o pa usiau na wai sei mo sile na mauri.”

<sup>11</sup> Ale hařai atu mo usia isana mara, “Tapala, mo sopo te nom baket, ale wel sei mo sivo atano. O pa eři utu wai atu mo sile na mauri epu? <sup>12</sup> Pimam Jacob mo heli wel sei mata-mam, moiso enia peresi na vaona peresi na pulana maji palovati tari la inu hinia. Engko o pa eři jeu na sava Jacob mo vaia?”

† **3:25:** hoje vara la vokevoke: tavgavin Israel tuai la tau na posposi matuvana mata hoje na nora jilivi teni te hinau sohena matan la řomřomia vara God i pa avulahi hinira matana.

<sup>13</sup> Iesu mo řaramia mo vereea mara, “Tamlohi tari la lo inu wai sei la pa mele mařohu. <sup>14</sup> Pani la haratu vara la inu na wai a pa silea, la pa sopo eři mele mařohu na rani sei la pa mai. Wai atu a pa silea enia patu wai sei mo sile na mauri tui.”

<sup>15</sup> Ale hařai atu mo řaramia mara, “Tapala, o sileau a inu wai atu matan vara a sopo mele mařohu vara a pa mele mai hin wel nike.”

<sup>16</sup> Ale Iesu mo vereea isana mara, “O vano o lavi tuam i mai.”

<sup>17</sup> Hařai atu mo řaramia mara, “Enau mo sopo te tuaku.” Iesu mo vereea isana mara, “Ko vereea ko varařuhu, mo sopo te tuam. <sup>18</sup> Engko ko lahi, ale tuam mo lima moiso, ale nake tamlohi atu ko lo toho peresia enia mo sopo tuam tataholo. Haratu ko vereea mo varařuhu.”

<sup>19</sup> Ale hařai atu mo vereea isana mara, “Moli, na hitevosahia vara engko přovet matea. <sup>20</sup> Pimam la lo lotu na vutivuti nike,\* pani kamim Jew ka vara Jerusalem purongo enia jara tataholo vara tamlohi la lo lotu ea.”

<sup>21</sup> Ale Iesu mo vereea isana mara, “O rasuau, pongi matea mo lo mai vara ha pa sopo mele lotu Tama hin vutivuti nike teni Jerusalem. <sup>22</sup> Kamim mara Samaria, ka sopo levosahia varařuhu vara ka lo lotu hare. Pani kamam Jew, kama levosahi God atu kama lo lotua. Hin na mahapi Jew God i pa juri na varama. <sup>23</sup> Pani pongi matea mo lo mai, ale mo tapulo moiso vara la haratu la lotu varařuhu, la pa lotu Tama sohena Tanumena mo vujangira na malele retivararu. Tama mo lo ale na tamlohi sohen harihi vara la lotua. <sup>24</sup> God enia Tanume, la haratu sei la lotu God la pa lotua sohena Tanumena i pa tiromara vara la pa usuri na malele retivararu.”

<sup>25</sup> Hařai atu mara, “Enau na levosahia vara Tamlohi Jujuri i pa mai, enia natu kama tovia Křisto. Ale

hin pongi atu vara i mai, i pa vere mamahuni na hinau tari isamam.”

<sup>26</sup> Iesu mo vereea mara, “Enau natu, tamlohi atu mo lo toho jejeu. Na lo retireti isam nakerihi.”

<sup>27</sup> Vahatea atu, tamlohi usuri non Iesu la mele hilu, moiso la mařurahi tavera matan Iesu mo lo retireti peresi na hařai matea. Pani te vonara mo sopo usia vara, ‘Ko opoi na sava?’ teni ‘Mata sava ko lo retireti isan hařai nike?’†

<sup>28</sup> Moiso hařai atu mo tau nona jara wai, ale mo mele maro hilu mo vano na taon. Mo vereea isana tamlohi mara, <sup>29</sup> “Ha mai! Ha hite na tamlohi matea sei mo vereau na hinau tari na vaira moiso. Korong enia natu, Křisto atu teni?” <sup>30</sup> Ale tamlohi tari hin taon atu la vano la hite Iesu. <sup>31</sup> La hinau atu la lo vano, moiso tamlohi usuri non Iesu la lo vereea isana lara, “Tija, o hani te hinau.”

<sup>32</sup> Pani Iesu mo verera hinia mara, “Haku hinau kamim ka sopo levosahia te hinau hinia.”

<sup>33</sup> Nona tamlohi usuri la lo usiusira hinia lara, “Tea mo sile te hanhani isana teni mo vono?”

<sup>34</sup> Pani Iesu mo vereea isara mara, “Haku hinau, enia mata a vai na masalon God. Enia natu, mo řuleau, ale enau a pa vai vevuhi na nona vavahinau sei mo taua isaku vara a vaira. <sup>35</sup> Ha sopo vereea vara vitu mo vati mo lo toho vara i tikeli na asitauni. Pani enau na lo vere kamim hinia vara ha to kilau vano, ha pa hite vara isa la jea la lo mena mata lavi na asitauni moiso. <sup>36</sup> Tamlohi asitauni la lo lavi na volira, mata la lo vu na vua mata mauri tui. La haratu la lo hapořahi na piri peresi la haratu la lavi na vua asitauni la pa avulahi jea na jara matea.

<sup>37</sup> Hin haratu reti nike mo varařuhu, ‘Hai la hapořahi na piri, hai la lavi na vua asitauni.’ <sup>38</sup> Enau na lo řule kamim vara ha pa lavi na vua asitauni na isa sei tamlohi tinapua la vai na voko řilangi ea moiso.”

\* **4:20:** Vutivuti nike: Vutivuti Gerizim, mariviti na taon Shechem. † **4:27:** mo lo retireti peresi na hařai matea: la řomřomia vara nona tamlohi usuri la hutura hin Iesu matan posposi tavgavin Israel tuai mo sopo tataholo vara te tamlohi vujangi hatea i sorasora peresi te hařai hasena teni vara Iesu mo lo sorasora peresi na hařai Samaria enira nora meresahi.

### *Mara Samaria La Rasu Iesu*

<sup>39</sup> Vao tavera mara Samaria hin taon atu la tau na nora rasua hin Iesu matan haʻrai atu mo vere mara, “Tamlohi nike, mo vereau na hinau tari na vaira moiso.” <sup>40</sup> La mai la usia isana vara i lo toho na taon nona mara Samaria. Ale mo lo toho ea mata rani mo rua.

<sup>41</sup> Ale vao tavera mara Samaria la tau na nora rasua hin Iesu, mata sava la rongoa mo lo vereau. <sup>42</sup> La vereau isan haʻrai atu lara, “Kama sopo rasu Iesu matan la hinau atu ko lo vereau isamam purongo, pani matan kama hasemam rongoa, ale kama levosahia mo řuhu vara enia natu, Jujuri mata Varama!”

### *Tamlohi Tavera Matea Mo Rasu Iesu*

*(Mt 8.5-13; Lk 7.1-10)*

<sup>43</sup> Mo mele rani mo rua tinapua moiso, mo malue mo vano Galilee, <sup>44</sup> matan Iesu mo vereau moiso vara tamlohi la pa ooloo na pŗovet na jara tari, pani mo sopo na jarara tataholo, <sup>45</sup> ale mo sinai Galilee, ale mara Galilee atu la avulahi na nona mai matan la hite la hinau tari atu mo lo vaia Jerusalem na hanhahi Passover ea matan enira sohena la sahe Jerusalem mata hanhahi ea.

<sup>46</sup> Ale hin rani atu mo lo toho Galilee, mo mele hilu mo vano Cana taon sei mo posi na wai mo mai waen ea tiroma. Ale tamlohi tavera matea atu Capernaum natuna mo rojo. <sup>47</sup> Pa tamlohi tavera mo rongoa vara Iesu mo tai Judea mo mai Galilee moiso, mo vano vara i usia řilangi vara i eři vai mamahuni natuna.

<sup>48</sup> Iesu mo vereau isan tamlohi tavera atu mara, “Kamim tamlohi, i pa sopo te nomim rasua vara ha sopo hite na matamata tavera peresi na hina mařurahi!”

<sup>49</sup> Pani tamlohi atu, mo řaramia mara, “Moli! O eři mai vila? Vara i vono, natuku i pa mate!”

<sup>50</sup> Iesu mo řaramia mara, “Natum i pa mauri. O mule, o vano isana!”

Tamlohi atu mo rasu na sava Iesu mo vereau isana, ale mo tapulo mule.

<sup>51</sup> Te slev non tamlohi tavera atu la tapaia na malele, ale la vereau isana lara, “Natum mo mele řuhu moiso!”

<sup>52</sup> Mo usira mara, mo mele řuhu nangisa, ale la řaramia lara, “Seserei atu mo malue isana nanovi na matan alo matea.”

<sup>53</sup> Vahatea taman uluvou atu mo řomřomia vara matan alo matea nanovi Iesu mo vereau isana mara, “Natum i pa mauri!” Ale tamlohi atu peresi na vao imana la tau na nora rasua hin Iesu.

<sup>54</sup> Matamata tavera sei enia harua matamata Iesu mo vaia hin rani atu, hitahun haratu mo malue Judea mo vano Galilee.‡

## 5

### *Tamlohi Rojoa Matea*

<sup>1</sup> Hitahun la hinau sei, Iesu mo sahe Jerusalem mata hanhahi tavera matea nona Jew. <sup>2</sup> Na lolon Jerusalem paltungu tavera matea la vaia mata loloso mo lo toho ea na leon tavgavin Israel la tovia Bethsaida. Mo lo toho mariviti na matarua matea mata sipsip sei la tauhasehira mata malamalai vara la lo unu na rope Temple atu. Paltungu atu la voro na palapala mo lima mo řalihia.\*

<sup>3-4</sup> Tamlohi matuvana la rojo, la haratu la matavuso, la haratu tavalu epera la mate, la haratu epera la mate, sohen la papao, la lo juruvi řalihi paltungu sei.

<sup>5</sup> Na pahisan paltungu tavera atu, tamlohi matea tavalu epena mo mate mata tauni mo ngavulu tolu mo li-maravtolu (38). <sup>6</sup> Ale Iesu mo hite tamlohi sei mo hitevosahia vara enia tavalu epena mo mate mata tauni matuvana moiso, ale mo usia isana mara, “Eh, ko opoia vara o řuhu teni mo vono?”

<sup>7</sup> Ale tamlohi atu mo řaramia mara, “Tapala, mo sopo te tapalaku vara i pa eři tauau na lolo paltungu hin rani

‡ 4:54: matamata: o hite reti sei hin jara rihi sei 2.11. \* 5:2: paltungu: peravun paltungu atu 95 metre, ale hin la pongi atu tamlohi la rasua vara wai i vali hin paltungu atu matan la vereau vara angelo matea mo tai na tuka vara i ariaria. Ale haratu mo sevuti tiroma hin paltungu atu i pa mele řuhu.

atu wai mo lo vali. Na vaihitea vara a pa sivo tiroma, pani tamlohi tinapua la lo sivo tiroma hiniau.”

<sup>8</sup> Iesu mo vereea isana mara, “O lavi na epam o hahau!” <sup>9</sup> Vahatea tamlohi atu mo mele ŋuhu. Mo lavi na epana mo tapulo hahau ŋalihi. Rani atu hiniau atu mo masese hinia, enia Sabbath matea.

<sup>10</sup> Moiso tamlohi tavera nona Jew la hite tamlohi atu mo lo ŋalihi mo lo lavi na epana, la vereea isana lara, “Haranike Sabbath nahai! Tea i sopo eŋi lavi na epa i lo hahau na Sabbath!”

<sup>11</sup> Pani mo ŋaramira mara, “Tamlohi atu mo vaiau na ŋuhu mo vereea isaku vara a lavi na epaku a hahau.”

<sup>12</sup> La usia isana lara, “Sava tamlohi natu, mo vereho vara o pa lavi na epam o hahau?” <sup>13</sup> Pani enia mo sopo levosahia vara Iesu enia hare, ale Iesu mo malue moiso mata vao hin jara atu.

<sup>14</sup> Hitahun haratu, Iesu mo tapai tamlohi atu na lolo Temple, ale mo vereea isana mara, “Engko ko ŋuhu moiso, pani o sopo mele vai te hehe, vara i vono te hiniau i mele sati jea i pa tikeliho.” <sup>15</sup> Ale tamlohi atu mo malue mo vano mo vereea isana tamlohi tavera nona Jew mara Iesu natu, mo vaia mo ŋuhu. <sup>16</sup> Ale matana, tamlohi tavera nona Jew la tapulo tipahi Iesu matan mo vai na hiniau sohena na Sabbath.

<sup>17</sup> Pani Iesu mo vereea mara, “Tamaku mo lo vavahinau mo tikeli nakerihi, ale enau sohena na lo vavahinau.”

<sup>18</sup> Ale matan haratu, tamlohi tavera nona Jew la vaihitea ŋilangi vara la vilimateia. Mo sopo matan haratu vara mo lo tope na Sabbath purongo, pani matan mo lo vereea vara God enia Tamana, retireti atu mo vaia enia mo tataholo hin God.

#### *Suiha Non Natun God*

<sup>19</sup> Iesu mo ŋaramira mara, “Varaŋuhu na vereea, Natun Tama hasena i sopo eŋi vai te hiniau hatea, pani haratu purongo sei mo hite Tamana mo lo vaia tiroma, ale enia i pa vaia. Matan sava hiniau Tamana mo lo vaia, Natuna sohena

i pa vaia. <sup>20</sup> Matan Tama mo opoi Natuna, ale mo vujangia na hiniau tari enia mo lo vaia. Tama i pa mele vujangi na hiniau matuvana la jeu haranike isana matan vara ha pa maŋurahi tavera. <sup>21</sup> Mo sohen Tama mo sauteterahi na mate mo silera na mauri, ale Natuna sohena i pa sile na mauri isan hare enia mo opoia.

<sup>22</sup> Tama mo sopo ari te tamlohi, pani mo tau na aria mata tamlohi tari isan Natuna, <sup>23</sup> matan Tama mo opoia vara tamlohi tari la oloolo hin Natuna sohen la lo oloolo hinia. Vara tea mo sopo oloolo hin Natuna, mo sohena mo sopo oloolo hin Tama sei mo lo ŋulea.

<sup>24</sup> Varaŋuhu na vereea isamim, vara harepu mo rongo na noku reti, ale mo rasu haratu mo ŋuleau, enia mo pete lavi na mauri tui moiso, enia i pa sopo lavi na talai hin pongi atu, pani mo malue moiso na mateia, ale mo lavi na mauri.

<sup>25</sup> Varaŋuhu na vereea isamim, pongi matea mo lo mai, mo pete mai moiso, vara mate la pa rongo na leon Natun God, moiso la haratu purongo sei la tapurongo isana, la pa mauri.

<sup>26</sup> Ale matan Tama enia pulo mauri enia mo sile Natuna vara enia sohena, i pa lavi pulo mauri atu. <sup>27</sup> Moiso, mo silea vara Natuna i lavi na suiha vara i ari na tamlohi, matan enia Natun Tamlohi.

<sup>28</sup> Ale ha sopo maŋurahi matan hiniau sei! Matan pongi matea mo lo mai vara la haratu la lo toho na taptap la pa rongoa na leon Natun Tamlohi, <sup>29</sup> ale la pa malue, la haratu la vai na hina ŋuhu la pa sauteterahi la vano na mauri, la haratu la lo vai na hina hehe la pa sauteterahi la lavi na talai.

#### *Retivuhesi Non Iesu*

<sup>30</sup> Enau haseku a sopo eŋi vai te hiniau. Haratu mo lo ŋuleau, enia mo vereau vara a pa ari sohena sava. Enau na ari tataholo matan na lo oloolo hinia, ale na sopo vai na masaloku matan na lo vai na masalona.

<sup>31</sup> Vara a lo vereau enau haseku, tamlohi la pa sopo rasua vara na lo varaŋuhu. <sup>32</sup> Tamlohi tinapua

matea mo lo vere na hinau varaʻuhu matakū. Ale na levosahia vara la hinau atu mo lo verera matakū enira la varaʻuhu. <sup>33</sup> Kamim ka ʻrule na tamlohi la vano isan John moiso, ale enia mo vereuli na retivaraʻuhu matakū isara, <sup>34</sup> pani na sopo turu na vereulia nona tamlohi matakū, pani na lo vere la hinau sei matan vara ha pa eʻi juri hinira.

<sup>35</sup> Ale John enia lamu matea mo lo hani mo memera, ale kamim ka lo avulahi jea mata makomo rani na memerana.

<sup>36</sup> Pani hinau matea mo mele ʻruhu jea, mo jeu vereulia atu John mo lo vere matakū. La hinau atu Tama mo silea isaku vara a vaira, enira natu, la vujangia vara Tama hasena mo lo ʻruleau.

<sup>37</sup> Ale Tama sei mo lo ʻruleau, enia mo lo vereau, pani kamim ka sopo lo rongo na leona teni hitea hin te rani. <sup>38</sup> Ale ka sopo lavi na nona reti na mapumim matan ka sopo rasu haratu mo lo ʻruleau na mai.

<sup>39</sup> Kamim ka lo ale na Retiulia matan ka ʻromia vara hinira ha pa lavi na mauri tui. Retitapu sei la lo vereuliau, <sup>40</sup> pani ka ʻrohu vara ha mai isaku mata mauri tui.

<sup>41</sup> Na sopo lavi na ololo nona tamlohi matakū, <sup>42</sup> pani na levosahi kamim vara mo sopo te vonamim hatea i opoi God. <sup>43</sup> Na lo mai na suiha hijan Tamaku, pani ka lo tipahiau. Vara te tamlohi i mai na hijana hasena, kamim ha pa avulahi vara ha lavia. <sup>44</sup> Ha pa rasu sohena sava matan kamim, ka lo opoia vara tea i sile na ololo isan te vonamim, ale ka sopo opoia vara God hasena i pa sile na ololo isamim.

<sup>45</sup> Ha lo levosahia vara enau a pa sopo retitalai hin kamim isan Tama! Pani Moses sei, ka lo tau na nomim ʻromtoho hinia, enia i pa retitalai hin kamim. <sup>46</sup> Varaʻuhu, vara ha rasu Moses varaʻuhu, ha pa rasuau, matan enia mo uliuli matakū. <sup>47</sup> Pani vara ka sopo eʻi rasu na sava Moses

mo ulia, ha pa eʻi rasu na noku reti sohena sava?"

## 6

*Iesu Mo Vahani Na Tamlohi*  
(Mt 14.13-21; Mk 6.30-44; Lk 9.10-17)

<sup>1</sup> Hitahun la hinau sei, Iesu mo vano na tavalu tasin Galilee la tovia Tiberias. <sup>2</sup> Vao tavera la lo usuria matan la hite na matamata tavera mo lo vaia isana tamlohi rojoa la mele ʻruhu. <sup>3</sup> Ale matan vao atu Iesu tolu na nona tamlohi usuri la sahe aulu na vutivuti, ale la sakele ea. <sup>4</sup> Pongi Passover hanhani tavera nona Jew mo lo mai.

<sup>5</sup> Hin rani atu, Iesu mo hite na vao tavera la lo mai isana, mo usia isan Philip mara, "Ra pa lavi te hanhani epu vara ʻra pa vahani vevuhi la tamlohi nike hinia?" <sup>6</sup> Iesu mo vere sohena isan Philip vara i vaihitea matan enia mo levosahia moiso vara i pa vai na sava.

<sup>7</sup> Philip mo ʻfaramia mara, "Voli tamlohi matea mata rani mo ngavulu sangavulu rua i sopo eʻi navu vara i vahanira hatehateahi na makomo pereti!" <sup>8</sup> Vonara, tamlohi usuri non Iesu matea, hijan Andrew, enia tasin Simon Peter, mo vere isana mara, <sup>9</sup> "Natirihi matea nahai, mo lavi na pereti vavarihi mo lima la vaia na piri barley\* peresi na maji mo rua, pani haratu mo ʻruhu na sava isan la tamlohi nike?"

<sup>10</sup> Iesu mo vere mara, "Ha vere na tamlohi tari la saksakele nike!" Mo vere sohena matan ʻruvuʻruvu ʻruhu hin jara atu mo maʻivi. Evi tamlohi purongo la lo sakele atu mo tikeli tari vaha lima (5000).

† <sup>11</sup> Ale Iesu mo lavi pa la pereti atu mo vere meje isan God matara, moiso mo asease na pereti isan la haratu la lo sakele. Mo lavi la maji atu mo vaia sohena. Mo vahani na tamlohi, la hanhani sohen la opoia, la masu. <sup>12</sup> Hitahun haratu enira mo isoiso la masu, Iesu mo vere na nona tamlohi usuri vara la takonahi na sopesope hanhani vara tea i pa sopo

\* **6:9:** barley: piri matea mo sohena piri wit mata flaua, pani tamlohi tilavono la hania. † **6:10:** Evi tamlohi purongo: mo sopo evievi te haʻai teni natuvarihi la lo toho ea.

sati purongo. <sup>13</sup> Tamlohi non Iesu, la sohoni na tanga tavera mo sangavulu řomana mo rua na sopesopen la pereti atu mo lima. <sup>14</sup> Hitahun matamata tavera atu Iesu mo vaia, tamlohi la tapulo vereea vara, “Tamlohi nike, enia pŗovet atu Moses mo lo vereea vara i pa sinai na varama!” *Deut 18.15-18*

<sup>15</sup> Moiso Iesu mo hitevosahia vara la pa ngurunguru isana vara la pa tahea nora supe. Ale matana, mo rovo mo sahe aulu na vutivuti vara i toho enia hasena.

*Iesu Mo Hahau Na Pusa Tasi  
(Mt 14.22-27; Mk 6.45-52)*

<sup>16</sup> Hin ravravi atu tamlohi usuri non Iesu la sevuti sivo na tasin Galilee, <sup>17</sup> moiso la vele na boti matea, la tapulo sua roto na tasi matan Capernaum, ale mo řořoha moiso, Iesu mo sopo lo sinai isara, <sup>18</sup> ale langi matea mo tapulo sere mo řilangi, mo vaia mo tasiha.

<sup>19</sup> Nona tamlohi la sua, la jeu na kilometre mo limarave moiso, ale la hite Iesu mo lo hahau na pusa tasi mo lo mai isara, la matahu tavera matana. <sup>20</sup> Pani Iesu mo vereea isara mara, “Enau sei! Iesu! Ha sopo matahu!” <sup>21</sup> Nona tamlohi la opoia vara i vele na boti, ale vahatea purongo boti atu mo lo hosu hin jara atu la lo vano matana.

*Iesu Enia Pereti Mata Mauri*

<sup>22</sup> Mo mele rani sahe, la vao atu la lo toho na tavalu tasi boti mo tai isara, la levosahia vara mo sopo mele te boti tinapua i lo toho atu, la levosahia vara Iesu mo sopo vele hin boti rihirihiri atu peresi na nona tamlohi usuri, pani enira hasera purongo la malue. <sup>23</sup> Hin rani atu, boti hai nona mara Tiberias la hosu mariviti hin jara atu Iesu mo lo vere meje mata hanhania ea. <sup>24</sup> Ale vahatea purongo, la levosahia vara Iesu peresi na nona tamlohi usuri la sopo toho atu. Ale la vele hin la boti atu la sivo Capernaum vara la ale Iesu. <sup>25</sup> Ale la vano la tapaia na tavalu tasi, la usia isana lara, “Tija, ko pa mai nangisa?”

<sup>26</sup> Iesu mo řaramira mara, “Varařuhu na vereea isamim, ka sopo aleau mata matamata tavera ka lo hitera, pani matan ka lo hani vevuhi na hanhania ka opoia vara ha hanira. <sup>27</sup> Ha sopo kalvono mata hanhania sei i pa tihai purongo, pani ha vavahinau matan hanhania sei i pa sopo eři tihai ale i pa sile na mauri tui. Natun Tamlohi i pa sile kamim hin hanhania atu matan, Tama mo tinařihia vara enia i vaia.”

<sup>28</sup> Vao atu la usia lara, “Sava hinau tataholo natu, God mo opoia vara kama pa vaia?”

<sup>29</sup> Iesu mo řaramira mara, “Vavahinau sei God mo opoia mo sohen harihi: vara ha tau na nomim rasua hin haratu mo lo řulea.”

<sup>30</sup> La řaramia lara, “Sava matamata o pa vaia, matan vara kama pa tau na nomam rasua hiniho? Engko o pa vai na sava? <sup>31</sup> Pimam tuai la hani na mana na tano koru. Sohen la ulia na Retiulia vara, ‘Mo silera na pereti mo tai na tuka vara la hania’.” *Exo 16.4*

<sup>32</sup> Iesu mo verera hiniha mara, “Varařuhu na vereea isamim, Moses mo sopo sile na pereti mo tai na tuka isamim, pani Tamaku natu mo lo sile kamim na pereti varařuhu sei mo tai na tuka. <sup>33</sup> Pereti atu God mo silea enia haratu mo tai na tuka, matan vara i sile na mauri na varama.”

<sup>34</sup> Ale la tamlohi atu la vereea lara, “Moli, tarea o pa sile kamam hin pereti atu!”

<sup>35</sup> Iesu mo řaramira mara, “Enau pereti atu mo lo sile na mauri! Vara tea i mai isaku i pa sopo eři mele marohati. Mo sopo tea vara i tau na nona rasua hiniha i pa mele mařohu. <sup>36</sup> Na vereea isamim moiso vara kamim ka hiteau, pani ka sopo lo rasuau! <sup>37</sup> La haratu enira mo isoiso Tama mo lo sileau hinira la pa mai isaku. Ale haratu mo mai isaku a pa sopo tipahia.

<sup>38</sup> Matan enau na sevuti na tuka vara a pa vai na masalon God. Na sopo mai vara a pa vai na masaloku haseku. <sup>39</sup> Hara nike masalon haratu mo lo řuleau, vara a sopo vaitihai te vonan la haratu mo lo sileau hinira, pani enau a pa sauteterahira

na pongi hitahu.‡ <sup>40</sup> Masalon Tamaku mo sohen harihi, mo opoia vara la haratu la hite Natuna, la pa tau na nora rasua isana, ale vara la lavi na mauri tui. Ale na pongi hitahu, enau a pa sauteterahira.”

<sup>41</sup> Ale tamlohi tavera nona Jew atu la tapulo ngutungutu matan mo vereea vara, ‘Enau natu, pereti atu mo tai na tuka!’ <sup>42</sup> Ale la vereea lara, ‘Avei, tamlohi akerihi, enia Iesu natun Joseph sei teni mo vono? Enra ra levosahi tamana enia tinana, pani mo pa vere vara enia mo tai na tuka sohena sava?’

<sup>43</sup> Iesu mo vereea isara mara, ‘Ha sopo mele ngutungutu! <sup>44</sup> Tama mo ruleau, ale masalon Tama hasena sei mo vai na tamlohi i efi mai isaku, vara i vono, i pa sopo tea i efi mai isaku. Pani vara tea i mai isaku, a pa sauteterahia na pongi hitahu. <sup>45</sup> Sava sei la uli na reti nona pfovet tuai lara, ‘God i pa vujangira enira mo isoiso’. *Isa 54.13* Ale la haratu la lo tapurongo hin Tama, la pa lavi na levosahi isana, enira la pa mai isaku.

<sup>46</sup> Haratu hasena sei mo tai isan God mo hite Tama atu. Mo sopo mele te tinapua vara i hite Tama hin te pongi. <sup>47</sup> Varaŕuhu na vereea vara la haratu la lo tau na nora rasua hiniau, la pete lavi na mauri tui moiso. <sup>48</sup> Enau pereti atu mo lo sile na mauri! <sup>49</sup> Pimim tuai la hani na mana na tano koru, ale la mate. <sup>50</sup> Pani pereti atu mo lo tai na tuka mo sevuti matan vara tea vara i hania i pa sopo efi mate hin te pongi. <sup>51</sup> Enau pereti mauri atu mo tai na tuka! Vara tea i hani pereti atu enia i pa mauri jejeu. Pereti mauri atu a pa silea isana tamlohi na varama, enia epeku.”

<sup>52</sup> Ale, tamlohi tavera nona Jew atu la rohu hin Iesu la tapulo vauriuri isara hasera lara, ‘Sohena sava natu, tamlohi nike i efi sileŕa na epena vara ra hania?’

<sup>53</sup> Iesu mo vereea isara mara, ‘Varaŕuhu na vereea isamim, vara ha sopo hani na epen Natun Tamlohi, ale vara ha sopo inu na raena, i pa

sopo te mauri varaŕuhu hin kamim.

<sup>54</sup> Pani haratu mo hani na epeku, mo inu na raeku, enia mo pete lavi na mauri tui moiso, ale enau a pa sauteterahia na pongi hitahu. <sup>55</sup> Epeku, enia hanhani varaŕuhu, ale raeku, enia wai inu varaŕuhu. <sup>56</sup> Vara tea i hani na epeku, ale i inu na raeku, enia i pa toho hiniau, enau a pa toho hinia.

<sup>57</sup> Tama sei mo ruleau, enia mo lo mauri, ale enau na lo mauri matana. Nake, tamlohi tari sei la haniau la pa mauri matakau. <sup>58</sup> Pereti nike, mo tai na tuka mo sinai, mo sopo sohen haratu pimim la hania tuai matan enira la mate, pani hare mo hani pereti nike, i pa mauri jejeu.” <sup>59</sup> Iesu mo lo retivujavujangi na ima lotu nona Jew Capernaum na rani mo lo vere la hiniau sei.

### *La Vahaŕi Hinia*

<sup>60</sup> Nona tamlohi usuri matuvana la rongo nona reti atu lara, ‘Avei, hara sei mo lo vere na sava sei?’

<sup>61</sup> Iesu mo levosahia vara nona tamlohi usuri la lo ngutungutu, ale mo usira mara, ‘Ka rongo hiniau sei mo sati? <sup>62</sup> I pa sohena sava vara ha hite Natun Tamlohi i mele sahe na tuka sei mo tai ea mo sinai? <sup>63</sup> Tanumena enia natu, mo lo sile na mauri! Suiha tamlohi i sopo efi vai te hiniau. Noku reti na lo vereea isamim, la tai isan Tanume atu sei mo lo sile na mauri. <sup>64</sup> Pani te vonamim la sopo rasuau.’ Iesu mo vereea sohena matan na pongi tiroma mo levosahia moiso vara harepu i pa rasua, ale harepu i pa turuposi hinia.

<sup>65</sup> Ale Iesu mo mele vereea mara, ‘Matan haratu na vereea isamim moiso vara, ‘I pa sopo tea i efi mai isaku vara Tama enia i sopo tinaŕihia vara i mai tiroma’.”

<sup>66</sup> Matan la hiniau sei Iesu mo verera, nona tamlohi usuri matuvana la vahaŕi hinia, la sopo mele usuria. <sup>67</sup> Iesu mo usi la nona tamlohi usuri atu tupu sangavulu romana mo rua (12) mara, ‘Kamim sohena ha pa rovo hiniau?’ <sup>68</sup> Simon Peter mo ŕaramia mara, ‘Moli, mo sopo mele

‡ 6:39: pongi hitahu: pongi atu God i pa ari na tamlohi tari hinia.

te tamlohi vara kama pa efi vano isana. Nom reti la sile na mauri tui. <sup>69</sup> Kama rasuho, kama levosahia mo ruhu nake vara engko natu, tamlohi atu mo tapu non God!”

<sup>70</sup> Iesu mo vereia isana nona tamlohi mara, “Na viřoni kamim tupu sangavulu řomana mo rua (12) pani vonamim matea enia tanume sasati matea!” <sup>71</sup> Iesu mo lo vere hinau sei matan Judas natun Simon Iscariot matan hitahu i pa halu na hijan Iesu, hina purongo hin haratu vara enia mo vonan la tupu sangavulu mo rua (12) atu, tamlohi non Iesu.

## 7

### *Tasin Iesu La Sopo Rasua*

<sup>1</sup> Iesu mo hahau řalihi Galilee, pani mo sopo vano mariviti Judea matan tamlohi tavera nona Jew la opoia vara la vilimateia. <sup>2</sup> Hanhani tavera nona Jew la tovia Tabernacle, pongina mo lo mai mariviti. <sup>3</sup> Ale tasin Iesu la lo vereia isana lara, “O vano Judea matan vara nom tamlohi usuri la pa efi hite na nom matamata tavera sei ko lo vaira. <sup>4</sup> Vara tamlohi matea mo opoia vara tamlohi la levosahia, i pa turu na naho tamlohi, i pa sopo jarohi na nona vavahinau. Vara ko lo vai la hinau atu varařuhu, mo ruhu vara o vai na nom vavahinau na naho tamlohi.” <sup>5</sup> Tasina sohena la sopo lo rasua.

<sup>6</sup> Pani Iesu mo řaramira mara, “Noku pongi mo sopo lo mai, pani kamim ka tatamahu na rani tari. <sup>7</sup> Tamlohi varama la pa sopo tipahi kamim, pani la pa tipahiau matan na lo vereuli na nora sasati la lo vaira. <sup>8</sup> Kamim hasemim, ha sahe hin hanhani tavera atu. A pa sopo sahe nakerihi matan noku pongi mo sopo lo pala vevuhi.” <sup>9</sup> Iesu mo vere hinau atu, ale mo lo toho atu Galilee.

### *Iesu Mo Vujangi Na Temple*

<sup>10</sup> Ale tasin Iesu la sahe hin hanhani tavera atu, Iesu mo pa lo sahe hitahu, tea mo sopo levosahia. <sup>11</sup> Hin hanhani tavera atu tamlohi tatavera nona Jew la lo ale Iesu lara, “Enia nene?”

<sup>12</sup> Vao tamlohi atu sohena la lo vasvas matana. Hai lara, “Iesu enia tamlohi ruhu matea.”

Ale hai lara, “Enia mo lo halu na tamlohi.”

<sup>13</sup> Pani tamlohi la matahuni na tamlohi tatavera nona Jew ea, ale la sopo sorahi Iesu na naho vao.

<sup>14</sup> Na sope rani matan hanhani tavera atu, Iesu mo unu na Temple, ale mo tapulo vujangi. <sup>15</sup> Tamlohi tavera nona Jew la mařurahi hinia, ale lara, “Tamlohi nike, mo pa patuha sohena sava? Tea mo sopo vujangia!”

<sup>16</sup> Iesu mo řaramira mara, “Enau na sopo vujangi na sava vara a haseku řomřomia. Sava na lo vujangia mo tai isan haratu mo lo řuleau.

<sup>17</sup> Vara ha pa lo opoia varařuhu vara ha oloolo hin God, ha pa levosahia vara enau na lo vujangi na sava mo tai isan God, pani mo sopo isaku haseku. <sup>18</sup> Haratu mo opoia vara tamlohi la sile na oloolo isana matan mo lo řomřomia vara nona retireti mo tai isana hasena enia hapahapa, pani haratu sei mo opoia vara i sile na oloolo isan haratu mo lo řulea, enia tamlohi matea mo lo vere na varařuhu, ale mo sopo te hehe isana. <sup>19</sup> Moses mo sile kamim na Leu teni mo vono? Pani mo sopo te vonamim hatea i oloolo hinia! Ka opoia vara ha vilimateiau mata sava?”

<sup>20</sup> Vao atu la řaramia lara, “Ko putu! Sava tanume mo unu hiniho mo vaiho ko řomia vara tea mo opoia vara i vilimateiho?”

<sup>21</sup> Iesu mo řaramira mara, “Enau na vai na matamata tavera matea purongo, ale kamim mo isoiso ka mařurahi tavera hinia. <sup>22</sup> Moses mo retileu vara ha pa taiřalihi na natumim, pani retileu atu mo sopo tai isan Moses, mo tai isan pimim tuai atu Abraham, pani nake kamim ka lo taiřalihi na natumim na Sabbath, <sup>23</sup> Ale vara ha taiřalihi te tamlohi hatea na Sabbath matan vara ha pa sopo tope na Leu non Moses, mata sava ka lo lolokoru hiniau matan enau na lo vai na tamlohi rojoa epena tari la mele ruhu na Sabbath? <sup>24</sup> Ha



sopo ari na tamlohi na nomim kilakilau purongo! Ha ari na malele tataholo.”

### *Iesu Enia Křisto*

<sup>25</sup> Mara Jerusalem hai, la lo vereea lara, “Avei, mo sopo tamlohi nike natu, sei la lo vaihitea vara la pa vilimateia? <sup>26</sup> Pani enia nahai! Mo lo retireti isana naho vao, pani la sopo vere te hinau hatea isana, la tamlohi tavera nike la toma? Korong la pa hitevosahia vara enia natu, Křisto atu? <sup>27</sup> Pani tamlohi nike, enřa řa levosahi na jarana, pani hare i pa levosahi na sava jara Křisto i pa tai hinia?”

<sup>28</sup> Iesu mo lo vujangi na lolo Temple atu, ale mo ulo mara, “Kamim ka řomi vara ka levosahiau, ale sava jara na tai ea. Enau na sopo mai na masaloku. Haratu mo řuleau enia mo varařuhu, pani kamim ka sopo levosahia. <sup>29</sup> Pani enau na levosahi haratu mo lo řuleau, matan enau na tai isana.”

<sup>30</sup> Tatura tamlohi la vaihitea vara la taurilatia atu natu, pani pongina mo sopo lo masese. <sup>31</sup> Pani tamlohi matuvana hin vao atu la tau na nora rasua hinia lara, “Avei, vara Křisto atu i pala, ka řomi vara enia i pa eři vai te matamata tavera i jeu tamlohi nike?”

### *La Vaihite Vara La Taurilati Iesu*

<sup>32</sup> Pharisee lara la rongo na vao atu la lo ngutungutu hin Iesu moiso la pulutahi peresi na moli pñis, ale la řule na police mata Temple atu vara la taurilatia. <sup>33</sup> Pani Iesu mo vereea isara mara, “Enau a pa mele toho isamim i peravu makomona purongo, moiso enau a pa sahe isan haratu mo lo řuleau. <sup>34</sup> Ha pa aleau, pani ha pa sopo eři hiteau. Ha pa sopo eři vano na jara enau a pa vano ea.”

<sup>35</sup> Ale tamlohi tavera nona Jew la lo usiusira hinia lara, “Enia i pa vano epu vara řa pa sopo eři tapaia? Korong i pa vano hin te jara tinapua sei nořa tamlohi la lo toho ea vara i vujangira peresi na mara Greek teni mo lo vereea sohena sava sei?” <sup>36</sup> Raramin nona retireti atu, enia sava sei mo

verea mara, “Ha pa aleau, pani ha pa sopo hiteau. Ha pa sopo eři vano na jara enau a pa vano ea.”

### *Retitauhi Mata Wai Mauri*

<sup>37</sup> Isoiso rani matan hanhani tavera atu, enia rani tavera matara, ale Iesu mo turu mo ulo aulu mara, “Vara tea mo mařohu, i mai isaku i inu! *Isa 55.1* <sup>38</sup> Vara ha rasuau, i pa sohena Retitapu mo vereea mara, ‘Wai mauri i pa roro malue na mapumim sohena wai roro matea.’” *Isa 58.11* <sup>39</sup> Iesu mo lo retireti hin Tanume Tapu atu God i pa silea i pa sopo tuai isan la haratu la rasua. God mo sopo lo sile na Tanumena isan tea matan Iesu mo sopo lo turu na nona mateia.

### *Tamlohi La Patumasa*

<sup>40</sup> Taturan vao atu la rongo Iesu mo vere hinau sei, ale lara, “Avei, enia natu, přovet atu Moses mo lo vereea!” *Deut 18.15*

<sup>41</sup> Tatura lara, “Enia natu, Křisto atu!”

Pani tatura la lo vereea vara, “Křisto atu i pa sopo eři tai Galilee!

<sup>42</sup> Retitapu mo sopo vereea vara Křisto atu i pa vora na vaon Supe David na vanua Bethlehem?” *Psa 7.12; Mic 5.2* <sup>43</sup> Vao tamlohi atu la tapulo hase asera matan Iesu. <sup>44</sup> Tatura la opoia vara la taurilatia, pani tea mo sopo tau na limana hinia.

### *Tamlohi Tavera La Rohu Hinia*

<sup>45</sup> Police mata Temple la mele hilu lekoleko, la vano isana pñis tatavera peresi na Pharisee, ale Pharisee la usi na police lara, “Mata sava ka sopo lavi Iesu i mai nike?”

<sup>46</sup> La řaramira lara, “Tea mo sopo lo vujangi i sohen tamlohi atu.”

<sup>47</sup> Pharisee la kilau řalihi isara, ale lara, “Mo halu kamim sohera?

<sup>48</sup> Avei, tea hin la haratu la lo tauri na suiha teni te Pharisee la rasua?

<sup>49</sup> Ka levosahia vara la jarařoha nike la sopo levosahi te hinau hatea na Leu. La lo toho na ruhuruhi lesati non God moiso.”

<sup>50</sup> Hin rani atu, Nicodemus mo lo toho peresira matan enia mo lo sakele na nora pulutahi, nona tamlohi tatavera atu, enia natu, tamlohi tiroma mo mai isan Iesu. Mo vereea

mara, <sup>51</sup> “Avei, noŕa Leu mo vara řa sopo eři sile na talai isan te tamlohi vavano řa sakele řa rongo na nona retireti tiroma matan vara řa pa levosahi na sava mo vaia.”

<sup>52</sup> Ale la vereia isana lara, “Nicodemus, engko ko tai Galilee teni mo vono? O vano o evi na Retiulia! O sopo eři hitea vara te pŕovet hatea i pa tai Galilee!”

<sup>53</sup> Ale tamlohi tari atu, la mele mule.

## 8

### *Iesu Mo Romi Na Hařai Matea*

<sup>1</sup> Pani Iesu mo hahau mo vano na vutivuti la tovia Vuti talu Olive. <sup>2</sup> Ale na řalavuho jea mo mele vano na Temple. Vao tamlohi la lo mai isana, mo sakele mo pa lo tapulo vujangira.

<sup>3</sup> Ale Pharisee peresi na tamlohi vujangi mata leu la mai isana la taurilati na hařai matea la vileia mo lo juruvi peresi na tamlohi matea mo sopo tuana. La vaia mo turu na livuha vao, <sup>4</sup> ale la vereia isan Iesu lara, “Rabai, hařai nike la taurilatia mo lo vaivaileu peresi na tamlohi matea mo sopo tuana. <sup>5</sup> Leu non Moses mo vujangia vara hařai sohen haranike la pa parumateia! Pani, engko ko vereia sohena sava?”

*Lev 20.10; Deut 22.22-24*

<sup>6</sup> La usi retiusia sei matan vara la vaihite Iesu vara sava reti i pa vereia, ale la pa tau na talai hinia. Pani Iesu mo rautoho sivo atano, mo tapulo uliuli na varangona na lepa.

<sup>7</sup> La lo area hin retiusia sei matan hařai atu, moiso mo turu mo vereia mara, “Vara te vonamim mo sopo lo vai te hehe hin te rani, enia i parua tiroma!” <sup>8</sup> Ale mo mele rautoho mo mele uliuli na lepa. <sup>9</sup> La tamlohi atu la rovo hinia hatehateahi, vajiahara la tiroma. Hitahu Iesu enia hařai atu purongo la pa lo toho atu. <sup>10</sup> Iesu mo turu mo usi hařai atu mara, “Tamlohi tari la haipu? Mo sopo tea vara i sile na talai isam?” <sup>11</sup> Hařai atu mo řaramia mara, “Mo vono, tija.” Ale Iesu mo vereia isana mara, “Enau sohena, a pa sopo sile na talai isam. O

vano natu, ale nake o sopo mele vai na hehe!”

### *Iesu Enia Malarani Varama*

<sup>12</sup> Moiso Iesu mo mele retireti isana tamlohi, mo vere mara, “Enau malarani mata varama! Vara ha usuriau, ha pa sopo hahau na řořoha, ha pa lavi na malarani sei mo sile na mauri.”

<sup>13</sup> Pharisee la reti isana lara, “Engko, ko lo vereuliho hasem, ale sava ko lo vereia mo sopo varařuhu!”

<sup>14</sup> Iesu mo řaramira mara, “Hina purongo vara na lo hase vereuliau, sava na lo vereia mo varařuhu matan enau na levosahi na jara na tai ea, ale enau na levosahia vara na lo vano epu. Pani kamim ka sopo levosahia vara enau na tai epu teni sava jara na lo vano hinia. <sup>15</sup> Kamim ka lo ari na tamlohi na kilakilau nona tamlohi purongo, pani enau na sopo ari tea.

<sup>16</sup> Pani vara a sile na aria, aria atu i pa tataholo matan mo sopo enau haseku a pa vaia. Pani enau Tama sei mo lo řuleau kama pa turu na jara matelete purongo. <sup>17</sup> Na nomim Leu la ulia lara, vara tamlohi tupra rua la vere na hinia matelete moiso mo varařuhu, o pa eři rasua. *Deut 19.15*

<sup>18</sup> Enau na lo hase retivuhesiau, ale Tama sei mo lo řuleau, enia mo lo retivuhesiau.”

<sup>19</sup> La usia lara, “Tamam mo lo toho epu?”

Iesu mo řaramira mara, “Ka sopo levosahiau teni Tamaku! Vara ha pa lo levosahiau ha pa levosahi Tamaku.”

<sup>20</sup> Iesu mo lo vere la reti atu hin rani atu mo lo vujangi hin jara atu tamlohi la lo tau mamahuni na nora silesilea hinia na Temple. Pani mo sopo tea i taurilatia matan pongina mo sopo lo mai.

<sup>21</sup> Mele vahatea Iesu mo vereia isara mara, “Enau a pa malue, ale kamim ha pa aleau, pani kamim ha sopo eři vano na jara enau na lo vano ea, moiso kamim ha pa mate na nomim hehe matan God i pa sopo řomira.”

<sup>22</sup> Tamlohi tavera nona Jew la usiusira lara, “Avei, mo lo vai na řomina vara i pa vilimateia hasena

matan enia mara, 'Ha pa sopo efi usuriau ha vano hin jara atu enau na lo vano ea! teni sava?'

<sup>23</sup> Iesu mo řaramira mara, "Kamim matan atano, pani enau na tai aulu. Kamim mata varama, pani enau mo vono. <sup>24</sup> Na pete vere a isamim moiso vara ha pa mate na nomim hehe vara ha sopo rasua vara enau haratu sei mo lo toho jejeu, ha pa mate na nomim hehe."

<sup>25</sup> La usia lara, "Engko hare?"

Iesu mo řaramira mara, "Sava na lo vere a isamim na pete vere a isamim moiso na pongi tiroma.\*

<sup>26</sup> Hinau matuvana a efi vere a isamim matan vara a ari kamim matana, pani haratu mo lo řuleau, enia mo varařuhu, ale sava hinau mo lo vere a isaku enia natu, na lo vere a isana tamlohi na varama."

<sup>27</sup> Tea mo sopo lo levosahia vara Iesu mo lo vere na hinau matan Tama. <sup>28</sup> Iesu mo mele vere a mara, "Hin pongi atu vara ha tahe Natun Tamlohi, ha pa levosahia vara enau natu, haratu mo lo toho jejeu. Ha pa levosahia vara enau haseku a pa sopo efi vai te hinau haseku, na lo vere na sava purongo, Tama mo vujangiau hinia. <sup>29</sup> Haratu mo řuleau, enia mo lo toho peresiau. Tarea na lo usuri na masalona, ale enia i pa sopo tinařihiau."

<sup>30</sup> Hin pongi atu Iesu mo lo vere la hinau sei, tamlohi matuvana la tau na nora rasua hinia.

#### *Retivarařuhu I Pa Teriho*

<sup>31</sup> Ale Iesu mo vere a isana tamlohi tavera nona Jew atu la rasua ea mara, "Vara ha lo ololo hin na noku vujangi, ha pa noku tamlohi usuri varařuhu, <sup>32</sup> ale ha pa levosahi na retivarařuhu, moiso retivarařuhu atu i pa teri kamim."

<sup>33</sup> La řaramia lara, "Kamam mahapin Abraham tataholo! Kama sopo lo slev isan te tamlohi hatea, ko pa vere a sohena sava vara kama pa materi?"

<sup>34</sup> Ale Iesu mo řaramira mara, "Varařuhu na vere kamim hinia,

haratu mo lo hehe enia slev non hehe! <sup>35</sup> Slev mo sopo toho na lolo vao ima matea jejeu, pani Natuna i pa toho jejeu. <sup>36</sup> Ale vara Natuna i vai kamim ha materi, ha pa materi varařuhu. <sup>37</sup> Na levosahia vara kamim mahapin Abraham, pani ka lo opoia vara ha vilimateiau matan noku reti mo sopo toho na maurimim varařuhu. <sup>38</sup> Enau na lo vere kamim na sava Tamaku mo vujangiau hinia, mo sohen kamim ka lo vai na sava tamamim mo lo vujangi kamim hinia."

<sup>39</sup> La tamlohi atu la řaramia lara, "Abraham enia tamamam."

Iesu mo řaramira mara, "Vara kamim natun Abraham, ha pa vai na sava Abraham mo lo vaia. <sup>40</sup> Pani kamim ka opoia vara ha vilimateiau matan na lo vere kamim na retivarařuhu God mo sileau hinia. Abraham mo sopo vai te hinau sohena. <sup>41</sup> Pani kamim ka lo vai na hinau tataholo sohen tamamim mo lo vaia."

Ale la řaramia lara, "Pani kamam kama sopo natu malele! Kamam tamamam matea purongo, kama natun God!"

<sup>42</sup> Iesu mo řaramira mara,

"Vara God enia tamamim, kamim ha pa opoiau matan enau na tai isan God. Enia mo řuleau, ale enau na sopo mai na masaloku haseku. <sup>43</sup> Mata sava ka sopo efi levosahi na sava na lo vere a isamim? Ka opoia vara ha peropero na sava na lo vere a isamim? <sup>44</sup> Tamamim enia Tiapolo, kamim ka lo vai na masalona. Pongi tiroma enia tamlohi vilimatei na tamlohi, ale enia tamlohi halu. Mo sopo te hinau varařuhu hinia. Enia mo lo vere na masalona purongo, ale hinau tari mo vere a enira halu. Mo sopo vara enia tamlohi halu purongo, pani enia tina halu.

<sup>45</sup> Pani hinau tari na lo vere kamim hinia la varařuhu, pani kamim ka pa lo řohu vara ha rasuau. <sup>46</sup> Te vonamim i efi vere a vara na vai te hehe?

\* **8:25:** hai la posi sope jara akerihi sohen harihi, 'Kamim ka tinapua, a pa mele retireti peresi kamim mata sava?'

Vara na vere na varaŕuhu, ka sopo rasuau mata sava? <sup>47</sup> Haratu enia non God i pa tapurongo na nona reti, pani kamim ka ŕohu vara ha tapurongo matan ka sopo non God.”

<sup>48</sup> Ale tamlohi tavera nona Jew la vereea isan Iesu lara, “Kamam kama varaŕuhu hin haratu kama vereea vara, engko mara Samaria matea, ale tanume sasati matea mo lo toho hiniho!”

<sup>49</sup> Iesu mo ŕaramira mara, “Mo sopo te tanume sasati hiniho! Enau na lo ooloo hin Tamaku, pani kamim ka ŕohu vara ha ooloo hiniho. <sup>50</sup> Enau na sopo opoia vara a lavi na ooloo matakū haseku, mo vono, pani matea enia mo opoia vara a lavi na noku ooloo, ale enia natu, haratu i pa sile na aria. <sup>51</sup> Varaŕuhu na vereea kamim hiniho, vara ha ooloo na noku reti, ha pa sopo eŕi mate!”

<sup>52</sup> Tamlohi tavera nona Jew sei la lo toho atu la lo tapurongo hiniho lara, “Nake natu, kama levosahia vara tanume sasati matea mo lo toho isam. Abraham mo mate moiso, ale la pŕoвет atu tuai sohena. Mo sohena sava natu, ko pa vereea vara, la haratu la lo ooloo na nom reti, la pa sopo eŕi mate? <sup>53</sup> Engko ko aulu ko jeu tamamam Abraham? Enia mo mate, ale la pŕoвет atu tuai sohena la mate. Engko ko ŕomi vara engko hare?” <sup>54</sup> Iesu mo ŕaramira mara, “Vara enau a lo hase tahe hijaku aulu, hijaku i pa sopo aulu varaŕuhu. Tamaku natu, enia mo lo tahe na hijaku aulu, enia haratu kamim ka lo tovia nomim God, <sup>55</sup> ka lo vereea, pani ka sopo levosahia varaŕuhu. Vara enau a vereea vara na sopo levosahia, enau a pa tamlohi halu matea sohemim kamim mo isoiso, pani enau na levosahia, ale na lo vai na sava mo lo vereea. <sup>56</sup> Tamamim Abraham mo avulahi tavera matan mo hite na noku pongi pala, ale mo avulahi matana.”

<sup>57</sup> Ale la tamlohi tavera nona Jew atu la vereea isana lara, “Pani engko taunim mo sopo lo tikeli ngavulu lima (50)! Ko pa hite Abraham sohena sava?”

<sup>58</sup> Iesu mo ŕaramira mara, “Varaŕuhu

na vereea isamim, Abraham mo sopo lo vora, enau na lo toho moiso, enau haratu mo lo toho jejeu.” <sup>59</sup> La rongo nona reti atu, la vilevilei vatu vara la pa paru Iesu, pani mo luhu hinira, ale mo malue hin Temple atu.

## 9

### *Tamlohi Vuso Mo Kilau*

<sup>1</sup> Iesu mo pa lo hahau, ale hin rani atu mo hite na tamlohi matea mo vora mo matavuso moiso. <sup>2</sup> Tamlohi usuri non Iesu la usia isana lara, “Avei, Tija, mata sava tamlohi nike mo vora matana mo vuso? Mata nona hehe teni hehe non tamana enia tinana?”

<sup>3</sup> Iesu mo ŕaramira mara, “Mo vono, mo sopo mata nona hehe teni hehe non tamana teni tinana. Pani matan mo matavuso, ha pa eŕi hite God i vai na matamata tavera hiniho. <sup>4</sup> Nake mo lo rani, ŕa pa vai na masalon haratu mo lo ŕuleau. Pongi mo lo mai, ale i pa sopo tea i eŕi vai te vavahinau hiniho. <sup>5</sup> Ale nakerihi na pa lo toho na varama, enau na malarani mata varama.”

<sup>6</sup> Iesu mo vereea reti atu moiso, mo litovi na lepa, mo hoi na lepa peresi na litona, ale mo jarai makamaka atu na matan tamlohi atu. <sup>7</sup> Ale mo vereea isana mara, “O vano, o hoje naŕihi na lepa na paltungu Siloam!” Tamlohi atu mo vano na paltungu Siloam, ŕaramin hija atu enia ‘Haratu la ŕulea’. Hin rani atu mo hoje naŕihi na lepa moiso mo eŕi kilau, ale mo mule.

<sup>8</sup> Hin rani atu tahisana peresi la haratu la hitea la lo usiusira lara, “Avei, tamlohi sei natu, enia tamlohi sei tarea mo lo sakele mo lo usiusi teni mo vono?”

<sup>9</sup> Tatuara lara, “Enia natu, tamlohi atu!”

Ale tatuara lara, “Mo vono, pani mo sohen tamlohi atu.”

Pani tamlohi atu hasena mo vereea mara, “Enau sei, tamlohi atu!”

<sup>10</sup> La usia lara, “Pani nake, ko pa kilau sohena sava?”

<sup>11</sup> Mo ŕaramira mara, “Tamlohi matea hijana Iesu, mo vai na makamaka mo jaraia na matakū, mo

řuleau vara a vano a hoje nařihia na paltungu Siloam. Vahatea atu na vaia na eři kilau.”

<sup>12</sup> La usia lara, “Mo lo toho epu nakerihi?”

Mo řaramira mara, “Na sopo levosahia.”

### *Sorasorahin Iesu*

<sup>13-14</sup> Hin rani atu Iesu mo vai tamlohi atu mo řuhu na lepa peresi na litona, enia Sabbath matea. Tahisana la lavia mo vano isana Pharisee.

<sup>15</sup> Pharisee la mele usia vara mo pa kilau sohen sava. Tamlohi atu mo řaramira mara, “Enia mo jarai na lepa na matak moiso na hoje nařihia, ale nake na eři kilau.”

<sup>16</sup> Tatua Pharisee la vere a isana lara, “Tamlohi nake, mo sopo tai isan God matan mo lo tope na Sabbath!”

Pani tatuara la vere a lara, “Sohena sava natu, tamlohi hehe matea i pa eři vai te matamata tavera sohen harihi?” Ale matana, Pharisee la patumasa, <sup>17</sup> la mele usi tamlohi atu lara, “Pani engko ko řomia vara tamlohi atu mo vaiho ko kilau, enia hare?”

Mo řaramira mara, “Enia přovet matea!”

<sup>18</sup> Pani la tamlohi tatavera atu nona Jew la řohu vara la rasua vara tamlohi sei natu, matana mo matavuso tiroma. Ale, la vahařule matan tamana enia tinana. <sup>19</sup> Ale, la mai moiso la usira lara, “Haranike natu, enia natumim sei ka vere a vara mo vora mo vuso? Sohen sava mo pa kilau nake?”

<sup>20</sup> Tamana enia tinana la řaramira lara, “Kama levosahia vara enia natumam, ale kama levosahia vara mo vora mo vuso, <sup>21</sup> pani kama sopo levosahia vara mo pa kilau sohen sava, teni hare mo vaia vara i eři kilau. Ha usia isana! Enia mo tamlohi moiso, ale enia hasena i pa vere a.”

<sup>22-23</sup> Tamana enia tinana la vere a sohen matan la matahuni na nora tamlohi tatavera nona Jew. Matan nora tamlohi tatavera la hatihia moiso vara la pa tipahi te tamlohi na nora ima lotu vara la lo vere a vara, Iesu enia Křisto.

<sup>24</sup> Tamlohi tatavera la mele tovi pa tamlohi sei mo vuso tiroma mo mele

sinai, la vere a isana lara, “O reti tataholo na nahon God vara o pa vere na hinau varařuhu! Kama levosahia vara Iesu enia tamlohi hehe matea.”

<sup>25</sup> Tamlohi atu mo řaramira mara, “Na sopo levosahia vara enia tamlohi hehe teni mo vono. Na levosahia vara tiroma na vuso, pani nake na kilau.”

<sup>26</sup> La usia isana lara, “Mo vai na sava isam? Mo vai mamahuni na matam sohen sava?”

<sup>27</sup> Tamlohi atu mo řaramira mara, “Na pete vere a isamim vahatea moiso, pani ka řohu vara ha tapurongo. Ka opoia vara a mele vere a mata sava? Kamim sohen ka opoia vara ha mai na nona tamlohi usuri?”

<sup>28</sup> La kalia moiso, ale lara, “Engko nona tamlohi usuri! Kamam tamlohi usuri non Moses! <sup>29</sup> Kama levosahia vara God mo reti isan Moses, pani kama sopo levosahia vara harakerihi mo tai epu.”

<sup>30</sup> Tamlohi atu mo řaramira mara, “Kamim ka tinapua! Tamlohi atu mo vai mamahuni na matak, pani kamim ka sopo levosahia vara mo tai epu! <sup>31</sup> Ra levosahia vara God mo lo tueni la haratu la opoia, ale la ololo hinia. God mo sopo tueni na tamlohi hehe. <sup>32</sup> Tuai jea na tapulo varama mo tikeli nake hare mo rongoa vara te tamlohi mo mele vai mamahuni te tamlohi mo vora mo vuso vara i kilau. <sup>33</sup> Vara tamlohi atu i sopo tai isan God, i pa sopo eři vai te hinau hatea sohen harihi.”

<sup>34</sup> La řaramia lara, “Tarea engko ko tamlohi hehe na rani ko vora mo tikeli nake. Engko ko řomřomia vara o pa eři vujangi kamam hin te hinau hatea?” Ale la pulahi nařihia la tipahia.

<sup>35</sup> Iesu mo rongu hinau atu mo mase moiso mo vano vara i ale tamlohi atu, ale mo tapaia mo usia mara, “Engko ko rasu na Natun Tamlohi?”

<sup>36</sup> Mo řaramia mara, “Moli, vara o vere a hinia vara enia hare, a pa tau na noku rasua hinia.”

<sup>37</sup> Iesu mo vere a isana mara, “Engko ko hitea moiso, ale nakerihi enia mo lo retireti peresiho.”

<sup>38</sup> Tamlohi atu mara, “Moli, na ra-sua.” Ale mo papaohi mo lotua.

<sup>39</sup> Moiso Iesu mo vereea mara, “Na mai vara aria i mai na tamlohi na varama. Na mai nike, vara a roi na matavuso la kilau, ale vara a vai la haratu la eʻi kilau, matara la vuso.”

<sup>40</sup> Pharisee la rongo Iesu mo veree hinau atu moiso, la usia lara, “Kamam kama matavuso?”

<sup>41</sup> Iesu mo ʻaramira mara, “Vara ka vuso i pa sopo te nomim hehe, pani nake matan ka lo vereea vara kamim ka lo kilau, kamim ha pa lo toho na nomim hehe.”

## 10

### *Iesu Enia Tavui Sipsip ʻruhu*

<sup>1</sup> “Varaʻruhu na vereea isamim, tamlohi vavanaho peresi la haratu la lo vili na tamlohi mata vavanaho, la lo vele palausi na voʻa vara la unu na jara sipsip, la sopo unu na matarua voʻa.

<sup>2</sup> Pani haratu mo unu na matarua jara sipsip enia tavui sipsip tataholo.

<sup>3</sup> Tamlohi kilau na matarua atu i pa roi na matarua matan vara tavui sipsip hasena i pa unu, ale sipsip la pa levosahi na leon tavuira moiso enia i tovi na pulana sipsip na hijara hatehateahi moiso i tiromara la malue.

<sup>4</sup> Hin rani atu vara tavui sipsip mo tiroma na pulana sipsip tari vara la malue hin rope sipsip atu, enia mo tiromara, ale la usuria matan la rongovosahi na leona. <sup>5</sup> La pa sopo eʻi usuri te vinano hatea matan la pa sopo rongovosahi na leon vinano atu, pani la pa rovo hinia.”

<sup>6</sup> Iesu mo veree titileu atu isara, pani la sopo levosahi na sava mo lo vereea isara.

<sup>7</sup> Ale Iesu mo mele vereea mara, “Varaʻruhu na vereea isamim, enau matarua mata sipsip. <sup>8</sup> Tamlohi tari la mai tiroma hinia, enira tamlohi vavanaho peresi la haratu la lo vili na tamlohi mata vavanaho, pani sipsip la pa sopo tapurongo isara. <sup>9</sup> Enau matarua. Vara tea i unu hinia, enia i pa juri, i pa eʻi unu, ale i pa mele

malue vara i vilei na ʻruvuʻruvu ʻruhu mata hanhani.

<sup>10</sup> Tamlohi vavanaho mo mai matan vara i pa vanaho i vilimatei, ale i komokomo purongo. Enau na mai vara haratu la unu hinia, la pa lavi na mauri ʻruhuʻruhu jea.

<sup>11</sup> Enau tavui ʻruhu mata sipsip. Tavui ʻruhu mata kilau na sipsip mo tau na maurina mata pulana sipsip.

<sup>12</sup> Tamlohi voko mata mania,\* enira la sopo sohena tavui sipsip matan mo sopo pulara sipsip ale hin rani atu vara la hite na wolf i mai,† la pa rovo na sipsip, ale la pa sopo turuhoro na wolf sei enia viriu jala matea mo sati. Wolf i pa komora la rovorovo.

<sup>13</sup> Tamlohi voko la rovo matan la sopo ʻromʻromia vara la pa kilau na sipsip.

<sup>14</sup> Enau tavui ʻruhu mata sipsip. Enau na levosahi na pulaku sipsip, enira la levosahiau <sup>15</sup> sohena Tama mo levosahiau, ale enau na levosahi Tama, ale enau na sile na mauriku mata pulaku sipsip. <sup>16</sup> Tatu pulaku sipsip la sopo lo toho na lolon voʻa nike. A pa lavira la mai sohera, ale la pa tapurongo na leoku. La pa mai matea, ale tavui sipsip i pa matelete.

<sup>17</sup> Ale Tama mo opoiau matan enau na sile na mauriku matara, ale a pa mele eʻi lavia. <sup>18</sup> Mo sopo tea i eʻi lavi naʻihia isaku, pani enau na silea na masaloku purongo. Enau na lavi na suiha matan vara a silea, ale na lavi na suiha matan vara a mele lavia sohen Tamaku mo retileu vara a vaia.”

<sup>19</sup> Tamlohi tatavera nona Jew atu la mele patumasa mata sava Iesu mo lo vereea isara. <sup>20</sup> Matuvana lara, “Tanume sati matea mo lo toho hinia! Mo putu! Mata sava ka lo tapurongo isana?”

<sup>21</sup> Pani tatuara lara, “Vara tamlohi matea tanume sasati mo lo toho hinia i pa eʻi vere na hinau sohen harihi sohena sava? I pa sopo te tanume sasati i eʻi vai na matavuso vara i kilau!”

### *La Tipahi Iesu*

\* **10:12:** tamlohi voko: haratu la kilau na sipsip mata mania purongo. † **10:12:** wolf: enia viriu jala tavera matea i eʻi vilimatei na tamlohi peresi na sipsip.

<sup>22</sup> Hin rani atu na taro hamariri, hanhani tavera mata Dedication mo tapulo mata rani turuhi na Temple Jerusalem. <sup>23</sup> Na rani matea Iesu mo lo hahau na lolo Temple hin jara atu la lo tovia Palapalan Solomon na roro ropen Temple atu, <sup>24</sup> ale tamlohi tatavera nona Jew la řalihia la vereea isana lara, “O pa vereuli kamam hiniho pangisa? Vara engko Křisto atu, o vere tataholo kamam hini!”

<sup>25</sup> Iesu mo řaramira mara, “Na vere isamim moiso, pani ka řohu vara ha rasuau. Hinau na vaira na hijan Tamaku, enira la vujangia vara enau hare. <sup>26</sup> Pani matan kamim mo sopo pulaku sipsip, ka sopo rasuau. <sup>27</sup> Pulaku sipsip la rongovosahi na leoku, enau na levosahira, ale la pa usuriau. <sup>28</sup> Na silera na mauri tui, ale i pa sopo te hatea i eři tihai hin te rani, ale mo sopo tea i eři tuahi nařihira na limaku. <sup>29</sup> Tamaku natu, mo silera isaku, ale enia mo aulu jea mo sopo tea i sohena, ale mo sopo tea i eři tuahi nařihira na liman Tama, <sup>30</sup> ale enau na matea peresi Tama.”

<sup>31</sup> Mele vahatea tamlohi tatavera nona Jew atu la lavi na vatu vara la pa parumatei Iesu hinira. <sup>32</sup> Pani mo vereea isara mara, “Enau na vujangi kamim na hina řuhu matuvana Tama mo řuleau vara a vaira. Sahara hinira natu, ka opoia vara ha paruau matana?”

<sup>33</sup> La tamlohi tatavera nona Jew atu la řaramia lara, “Kama sopo paruho matan te hinau řuhu ko vaia, pani matan engko tamlohi purongo ko lo hase vaiho ko sohen God matan ko lo retihehe vara engko God!” *Lev 24.16*

<sup>34</sup> Iesu mo řaramia mara, “Na nomim leu la ulia vara, ‘Na vereea vara kamim god’. *Psa 82.6* <sup>35</sup> Ale, kamim ha sopo eři tope na Retitapu sei mo vereea vara God mo retireti isana tamlohi, ale mo tovira vara enira god. <sup>36</sup> Ale, mata sava ka lo vere lejilejiau vara na lo retihehe matan na lo vereea vara enau Natun God? Pulon hinau sei Tama enia mo tauhasehiau mata masalona vara a pa vai la hinau sei. Enia natu, haratu

mo lo řuleau na varama. <sup>37</sup> Vara a sopo vai la hinau sei Tamaku mo lo vaira, ha sopo rasuau, <sup>38</sup> pani vara a vai na hinau Tama mo lo vaia, hina purongo vara ha sopo rasuau, pani mo řuhu vara ha rasu God matan la hina mařurahi sei na lo vaira. Matan hinau atu ha pa levosahia varařuhu vara Tama enia mo matea peresiau, ale enau na matea peresi Tama.”

<sup>39</sup> Mele vahatea la opoia vara la taurilati Iesu, pani mo majuri na limara, <sup>40</sup> ale mo vano roto na wai Jordan hin jara atu John mo lo paptijo ea tiroma. Hin rani atu Iesu mo lo toho atu, <sup>41</sup> tamlohi matuvana la mai isana. La lo vereea lara, “John mo sopo vai te matamata tavera hatea, pani hinau tari mo vereea matan Iesu, enira la varařuhu.” <sup>42</sup> Tamlohi matuvana la tau na nora rasua hin Iesu hin jara atu.

## 11

### *Lazarus Mo Mate*

<sup>1-2</sup> Tamlohi matea hijana Lazarus, mo rojo na vanuan Bethany. Vetasina mo rua, Mary enia Martha la lo toho peresia. Mary enia hařai atu sei mo lo surei na hasori na palon Moli peresi na patuna, ale mo kamoti na palona na vuluna. <sup>3</sup> Vetasin Lazarus la sohai na reti isana lara, “Tija, tapalam řuhu sei Lazarus mo rojo tavera.”

<sup>4</sup> Hin rani atu Iesu mo rongoa, mo vereea mara, “Rojo atu, i pa sopo isoiso na mate, pani i pa sile na ooloo isan God, ale Natuna i pa lavi na ooloo matan haratu i pa vaia.” <sup>5</sup> Iesu mo opoi Martha enia vetasina peresi Lazarus. <sup>6</sup> Ale matan mo rongo vara mo rojo Iesu mo mele toho atu rani mo rua. <sup>7</sup> Hitahun haratu, mo vereea isana nona tamlohi usuri mara, “Nake řa mele sahe Judea.”

<sup>8</sup> Nona tamlohi usuri la řaramia lara, “Tija, mo řuhu, pani mo sopo tuai sei tamlohi tatavera atu nona Jew la opoia vara la pa parumateiho! Avei, ko opoia vara o pa mele vano atu?”

<sup>9</sup> Iesu mo řaramia mara, “Matan alo mo visa na rani matea? Ka levosahia vara mo sangavulu řomana mo rua <sup>(12)</sup>. Vara o hahau na rani o pa hite na mera alo, ale o pa sopo tialahalaha. <sup>10</sup> Pani vara o hahau na vutepongi o pa tialahalaha matan mo sopo te mera hinia.” <sup>11</sup> Ale mo vere a isara mara, “Tapalařa Lazarus mo lo juruvi, pani enau a pa vano vara a pa řohaia.”

<sup>12</sup> Nona tamlohi usuri la řaramia lara, “Tija, vara enia mo lo juruvi, enia i pa mele rongo i řuhu.” <sup>13</sup> Iesu mo levosahia vara Lazarus mo mate, pani enira la lo řomřomia vara enia mo lo vere a vara mo lo juruvi řomaliho purongo.

<sup>14</sup> Moiso Iesu mo vere tataholoia isara mara, “Lazarus mo mate, <sup>15</sup> na avulahi matamim matan na sopo toho atu matan nake masapa matea vara ha pa tau na nomim rasua hinia, řa vano isana!”

<sup>16</sup> Ale Thomas sei la lo tovia Havo, mo vere a isan tamlohi usuri tinapua non Iesu atu mara, “Eh! Ha turu, řa vano! Enřa řa vano vara řa pa tolu mate peresi Moli.”

#### *Lazarus Mo Mele Mauri*

<sup>17</sup> Na rani Iesu mo kakau Bethany, mo rongoa vara Lazarus la taua na papavatu rani mo vati moiso. <sup>18</sup> Taon sei Bethany mo lo toho mariviti kilometre mo tolu, ale mele sopena asau hin Jerusalem, <sup>19</sup> ale tamlohi tatavera nona Jew matuvana la mai isan Martha enia Mary, vara la tangtangi peresira matan tavaira mo tihai.

<sup>20</sup> Vahatea atu Martha mo rongoa vara Iesu mo pala, mo malue vano vara i tapaia, pani Mary mo lo toho na ima. <sup>21</sup> Martha mo vere a isan Iesu mara, “Tija, vara o pa lo toho nike tavaiku i pa sopo mate, <sup>22</sup> pani hina purongo hin haratu matan na levosahia vara God i pa vai na sava hinu vara o usia.”

<sup>23</sup> Iesu mo vere a isana mara, “Tavaim i pa mele mauri!”

<sup>24</sup> Martha mo řaramia mara, “Na levosahia vara i pa mele mauri na

pongi hitahu hin rani atu vara tamlohi mate la mele turu.”

<sup>25</sup> Iesu mo vere a mara, “Enau pulo mauri, ale enau na sauteterahi na mateia, matan la haratu la rasuau la pa mauri, hina purongo vara la pa mate. <sup>26</sup> Moiso la haratu la rasuau, la pa lo mauri, la pa sopo eři mate varařuhu. Martha, ko rasu hinu sei?”

<sup>27</sup> Martha mo řaramia mara, “He'e Moli! Na lo rasua vara engko natu, Křisto, Natun God. Engko haratu kama lo kilau toho matana vara i pa mai na varama!”

<sup>28</sup> Martha mo retireti isan Iesu, moiso mo mele hilu vara i vere malumia isan Mary mara, “Tija mo mai, mo opoia vara i hiteho.” <sup>29</sup> Mary mo rongoa, vahatea mo turu mo malue, mo vano isana. <sup>30</sup> Iesu mo sopo lo unu na vanua, mo pa lo toho hin jara atu Martha mo tapaia ea. <sup>31</sup> Na rani tamlohi tatavera nona Jew matuvana la lo nanau Mary na lolo ima, la hitea mo malue vilavila, ale la lo řomřomia vara mo vano vara i tangtangi na papa, ale la usuria.

<sup>32</sup> Mary mo vano hin jara atu Iesu mo lo toho ea. Mo hitea, ale vahatea mo papaohi na palona, mo vere a mara, “Moli, vara o pa lo toho nike, tavaiku i pa sopo mate.”

<sup>33</sup> Na rani Iesu mo hite Mary tolu na tamlohi tavera nona Jew la lo tangtangi, enia mo rongo mo sati hajavua. <sup>34</sup> Iesu mo usia mara, “Ka tau na tarapena epu?” La řaramia lara, “Moli, o mai vara o pa hitea.”

<sup>35</sup> Iesu mo tangi. <sup>36</sup> Ale tamlohi tavera nona Jew lara, “Ka hitea, mo řomia mo tavera.”

<sup>37</sup> Pani tatuara la vere a lara, “Enia mo vai na vuso mo mele kilau, pani mo sopo eři vai Lazarus vara i sopo mate mata sava?”

<sup>38</sup> Iesu mo mele řomia hajavua, ale mo vano na papa, enia papa matea la kuresi na vatu matea mo lo turuhoro na mataruana. <sup>39</sup> Iesu mo verera mara, “Ha kuresi nařihi vatu sei!” Pani Martha mo vere a mara, “Tija, engko ko levosahia vara nahapani



enia havati pongin Lazarus, ale i pa ponaha.”

<sup>40</sup> Iesu mo řaramia mara, “Na vereia isamim moiso, vara ha rasuau, ha pa hite na hina řuhuřuhu matea na suiħan God.”

<sup>41</sup> Ale la kuresi nařihi vatu atu, ale Iesu mo tařa sahe na tuka mo usiusi mara, “Tamaku, na vere meje isam matan ko lo tapurongo isaku. <sup>42</sup> Na levosahia vara tarea ko lo řarami na noku usiusi, pani na vere hinau nike, vara la tamlohi nike la pa rasua vara engko ko řuleau.”

<sup>43</sup> Iesu mo usiusi moiso, mo ulo mara, “Lazarus, o malue!” <sup>44</sup> Tamlohi atu mo mate moiso, mo malue hin papa atu. Limana peresi na palona la pesira na tavalu ruru lulu, la tavu na nahona na tavalu ruru matea.

Iesu mo vere isana tamlohi mara, “Ha uli nařihia vara i malue.”

*La Hatihia Vara La Vilimatei Iesu  
(Mt 26.1-5; Mk 14.1-2; Lk 22.1-2)*

<sup>45</sup> Ale Jew matuvana la lo toho peresi Mary atu, la rasu Iesu matan la hite hinau atu mo vaia ea. <sup>46</sup> Pani tatuara la vano la hite na Pharisee, la vereuli na sava Iesu mo vaia isara. <sup>47</sup> Moiso moli mata přis tolu na Pharisee la tovi na matavuhi matea, la vereia lara, “Ra pa vai na sava? Tamlohi nike, mo vai na matamata tavera matuvana. <sup>48</sup> Vara řa sopo horoa nakerihi, tamlohi tari la pa tau na nora rasua hinia. Vara i sohena mara Rome la pa mai la komo na nořa Temple tapu peresi na nořa tamlohi jara mo isoiso.”

<sup>49</sup> Vonara matea, Caiaphas enia přis aulu hin tauni atu mo vereia mara, “Ka sopo levosahi te hinau hatea, <sup>50</sup> ka sopo hitevosahia vara i pa mele řuhu vara tamlohi matelete purongo i mate matan la tamlohi tari nike, mo jeu haratu vara tamlohi jara mo isoiso hin Israel la mate!”

<sup>51</sup> Caiaphas mo sopo vere hinau sei hasena, pani matan hin tauni atu enia přis aulu, ale mo lo retiman-govia sohen God mo opoia vara Iesu i pa mate mata tamlohi jara tari hin Israel, <sup>52</sup> pani i pa sopo mate mata

tamlohi jara tari hin Israel hasena, i pa mate mata tamlohi tari sei la natun God na sava jara la lo toho ea la pa mai matea. <sup>53</sup> Mo tapulo hin pongi atu vao atu la hatihia vara la pa vilimatei Iesu.

<sup>54</sup> Matan hinau atu Iesu mo sopo mele hahau na jara tavera isana tamlohi tatavera nona Jew, pani mo vano asau na taon Ephraim enia mariviti na jara hasetoho tavera atu, ale mo lo toho atu peresi na nona tamlohi usuri.

<sup>55</sup> Rani Passover nona Jew mo lo mai mariviti. Tamlohi matuvana la lo toho řalihi hin jara atu la vano Jerusalem matan vara la vai na nora posposi mata onehi na hinahinau mata Passover. <sup>56</sup> La lo ale Iesu řalihi ea. Ale hin rani atu la lo toho na Temple la lo usiusira lara, “Avei, ka levosahia vara i pa mai mata hanhani tavera mata Passover teni i vono?”

<sup>57</sup> Haratu la moli mata přis tolu na Pharisee la vereia isana tamlohi lara vara la hite Iesu, la pa vereulia isara vara la pa taurilatia.

## 12

*Mary Mo Rengi Na Hasori Isan Iesu*

*(Mt 26.6-13; Mk 14.3-9)*

<sup>1</sup> Rani mo limarave mo lo toho vara i tikeli na rani Passover. Iesu mo mele sivo Bethany, taon atu sei Iesu mo lo vai Lazarus mo lo turu na mateia ea. <sup>2</sup> La tatamahu na hanhani matan Iesu. Martha natu, mo lo julai na hanhani, ale Lazarus enia vonara matea hin la haratu la lo sakele peresia atu. <sup>3</sup> Ale Mary mo lavi na potele hasori řuhu matea sohena sope lita matea, ale volina mo tavera jea, ale mo rengia na palon Iesu, ale mo kamotira na vuluna, ale ponana řuhu mo mařivisi na lolo ima. <sup>4</sup> Tamlohi usuri non Iesu matea, hijana Judas Iscariot mo lo toho atu. Enia natu, i pa turuposi hin Iesu hitahu, ale mo usia mara, <sup>5</sup> “Mata sava mo sopo hařehi hasori sei matan volina mo tataholo na voli tamlohi voko mata tauni matea, ale mania atu i pa eři vano isana tamlohi la

tilavono?”<sup>6</sup> Pani Judas mo sopo řomi na tamlohi tilavono matan enia mo lo lavi na nora tanga mania, ale enia tamlohi vavanaho matea, ale hin te rani i pa vanaho hinia.

<sup>7</sup> Iesu mo vereea mara, “Ha sopo hitesatihia! Enia mo tauhasehia mata noku tavun. <sup>8</sup> Tamlohi tilavono la lo toho peresi kamim tarea, pani enau a pa sopo toho peresi kamim tarea.” *Deut 15.11*

### *Pharisee La Opoia Vara La Vili-matei Lazarus*

<sup>9</sup> Na rani vao tamlohi taverna nona Jew atu la levosahia vara Iesu mo lo toho atu. La sopo opoia vara la hite Iesu hasena, pani vara la hite Lazarus sohena matan Iesu mo vaia mo mele turu na mateia. <sup>10</sup> Ale moli mata pñis la tau na řomira vara la pa vilimatei Lazarus, <sup>11</sup> matan la hite na Jew matuvana la lo rovo hinira, ale la lo tau na nora rasua hin Iesu.

### *Iesu Mo Unu Jerusalem*

*(Mt 21.1-11; Mk 11.1-11; Lk 19.28-40)*

<sup>12</sup> Rani tinapua mo mele sahe, vao taverna la lo mai Jerusalem mata hanhahi taverna mata Passover. Pa vao atu la rongoa vara Iesu i pa mai matan hanhahi taverna atu moiso, <sup>13</sup> la lavi na rau viniu, ale la vano vara la tapaia. La lo ulu lara, ‘Moli, o juri nakerihi!’

‘God o leřuhu hin haratu mo lo mai na hijan Moli God!’ *Psa 118.26*

‘God o leřuhu na Supe non Israel!’

### *Zep 3.15*

<sup>14</sup> Iesu mo vilei na natu donki matea, ale mo vele hinia sohena Retiulia mo vereea,

<sup>15</sup> ‘Ha sopo matahu

kamim tamlohi hin Zion,\*

Nomim supe mo lo mai

na haři natu donki.’ *Zec 9.9*

<sup>16</sup> Tiroma, tamlohi usuri non Iesu la sopo levosahia, pani la pa mele řomřomia hin pongi atu mo turu na nona mateia mo sahe na tuka. Hinau tari la masese la tataholo hin haratu la ulia na Retiulia vara la pa sohena.

<sup>17</sup> Ale vao atu la pa lo toho peresi Iesu hin rani atu mo tovi Lazarus mo malue na papa, ale la lo sorahia.

<sup>18</sup> Ale vao atu la tapaia matan la rongoa matamata taverna atu mo lo vaia. <sup>19</sup> Pani Pharisee la lo verevera hinia lara, “Ra sopo eři vai te hinau hatea! Tamlohi tari na varama la lo usuri Iesu.”

### *Mara Greek Hai La Mai Isan Iesu*

<sup>20</sup> Mara Greek hai tolu na tamlohi la sahe Jerusalem vara la lotu na rani mata Passover. <sup>21</sup> Philip sohena, mara Bethsaida na jara Galilee mo lo toho ea. Mara Greek la vano isana la usia lara, “Tapala, kama opoia vara kama tapai Iesu.” <sup>22</sup> Philip mo vereea isan Andrew, ale enira tupra rua la vano isan Iesu la vereea isana.

<sup>23</sup> Iesu mo řaramia mara, “Pongi tataholo mo pala vara Natun Tamlohi i lavi na nona ooloo taverna. <sup>24</sup> Varařuhu na vereea isamim, vara piri wit matea i sopo jovi na lepa i mate atu, i pa sopo ulua, i pa lo toho atu purongo, pani vara i jovi i mate na lepa i pa eři ulua, ale i pa sile na vuana i mařivi. <sup>25</sup> Vara tea mo opoi na maurina, i pa vaitihaia. Vara i řohu na maurina nake na varama enia i pa taurilatia pongi tui tui. <sup>26</sup> Vara tea mo volitusi noku enia i pa usuriau. Noku volitusi i pa toho peresiau na sava jara enau na lo toho ea. Vara tea mo volitusi Tama i pa sile na ooloo isana.

<sup>27</sup> Nake řomiku mo puhoni hajava. A pa vere na sava? A pa vere vara, ‘Tamaku o juriau hin rani řilangi sei?’ Pani mo vono, matan na lo mai na varama matan rani řilangi sei. <sup>28</sup> Tamaku, o tahe na hijam aulu.” Ale leo matea mo tai na tuka mo vereea mara, “Enau na pete tahe na hijaku aulu moiso, ale a pa mele tahea aulu.” <sup>29</sup> Vao tamlohi la lo turu atu la rongoa leo atu, pani hai la lo řomřomia vara mo piri, hai la lo řomřomia vara angelo matea mo lo retireti isan Iesu.

<sup>30</sup> Moiso, Iesu mo verera mara, “Leo atu mo sopo mai mataku, pani

\* **12:15:** Zion: Zion enia Jerusalem. † **12:31:** moli mata varama: Iesu mo lo vere Tiapolo.

matamim. <sup>31</sup> Nake aria varama mo lo tapulo. Nake God mo tapulo vara i tipahi tamlohi tavera sasati atu matan varama nike.† <sup>32</sup> Hin pongi atu vara la taheau aulu na lepa, a pa vai na tamlohi tari vara la mai isaku.” <sup>33</sup> Iesu mo lo vereulia vara i pa mate sohena sava.

<sup>34</sup> Vao tamlohi atu la vereea isana lara, “Retiulia mo vujangia vara Křisto atu enia i pa toho jejeu. Mo sohena sava natu, engko ko lo vereea vara la pa tahe Natun Tamlohi aulu? Hare natu, enia Natun Tamlohi atu ko lo vereea?” <sup>35</sup> Iesu mo řaramira mara, “Malarani i pa toho isamim mata makomo rani purongo. Ha hahau na merana matan nake mo lo rani, pani haratu mo lo hahau na řořoha i pa sopo levosahi na sava jara mo lo vano ea. <sup>36</sup> Ha rasu na malarani nake mo lo toho peresi kamim, ale kamim ha pa natu malarani!” Hitahun la hinau atu Iesu mo lo verera, mo malue mo vano mo sopo mele hahau na naho vao.

#### *Tamlohi La Rohu Hin Iesu*

<sup>37</sup> Hina purongo vara Iesu mo vai na matamata tavera matuvana na nahora, pani tamlohi la sopo tau na nora rasua hinia, <sup>38</sup> hinau sei mo masese sohena retireti non přovert Isaiah mo vereea mara, ‘Moli God, hare mo rasu na nomam reti?’

Hare mo levosahi na suiha tavera non Moli God?’ *Isa 53.1*

<sup>39-40</sup> Matan retireti sei, tamlohi la sopo eři rasua, matan Isaiah mo mele vereea mara,

‘Enia mo vaira la matavuso, ale mo vai na mapura la řilangi matan vara la pa sopo eři kilau na matara,

ale vara la sopo eři levosahi na řomira,

vara la pa posi mai isaku

– matan vara enau a pa vaira la řuhu.’ *Isa 6.10*

<sup>41</sup> Isaiah mo vere la hinau sei matan mo hitea vara Tamlohi Jujuri mo řuhuřuhu jea sohena sava, ale mo vereulia. <sup>42</sup> Hina purongo hin haratu, tamlohi tauri na suiha nona Jew matuvana la rasua, pani matan la

matahuni na Pharisee enira la sopo taviti na nora rasua hinia matan vara la vereea, ale Pharisee la pa tipahira na nora ima lotu. <sup>43</sup> Matan enira la řomřomi na hasohaso nona tamlohi mo jeu hasohaso atu God mo lo silea.

#### *Iesu Mo Retireti Isara*

<sup>44</sup> Pani Iesu mo ulo aulu mara, “Vara te tamlohi mo rasuau, mo sopo rasuau haseku, pani mo rasu haratu mo lo řuleau, <sup>45</sup> haratu mo hiteau, enia mo hite haratu mo lo řuleau. <sup>46</sup> Enau na mai na varama sohena malarani vara tamlohi tari la rasuau, la pa sopo mele toho na řořoha.

<sup>47</sup> Enau mo sopo haratu sei i pa ari la haratu la sopo ololo na noku vujangi. Enau na mai vara a juri na tamlohi hin varama nike, na sopo mai vara a sile na talai. <sup>48</sup> Pani na vereea vara la haratu la lo řohu hiniau peresi na noku vujangi vara nora hina aria mo lo toho moiso, na sava na verera moiso enira natu, la pa arira na pongi hitahu. <sup>49</sup> Na sopo retireti haseku, pani na lo vere na sava Tama sei mo lo řuleau mo retileu isaku vara a vereea. <sup>50</sup> Matan na levosahia vara vua nona retileu sei la pa sile na mauri tui, ale na lo vere tataholoi na sava Tama mo vereau hinia.”

## 13

#### *Mo Vujangi Na Nona Tamlohi*

<sup>1</sup> Ale rani mo tiroma na rani Passover mo lo mai, Iesu mo levosahia vara nona rani mo mai vara i malue na varama, ale vara i mele hilu sahe isan Tamana. Tarea mo lo opoi na nona tamlohi na rani mo lo toho hin varama nike, mo opoira mo tikeli na isoisona.

<sup>2</sup> La pa lo hanhani na ravravi, Tiapolo mo posi na řomin Judas natun Simon Iscariot, vara i turuposi hin Iesu.

<sup>3</sup> Iesu mo levosahia vara Tama mo tau na hinau tari na limana, Iesu mo levosahia vara enia mo tai isan God, ale vara i pa mele sahe isan God, ale matan haratu, <sup>4</sup> Iesu mo turu hin hanhani atu, mo lavi nařihi na ruruna matea, ale mo lavi na ruru kamoti mo talihia na otiotina, <sup>5</sup> ale mo tau

na wai na pesin tavera matea moiso mo tapulo hoje na palo nona tamlohi usuri, ale mo kamotira peresi ruru kamoti atu mo lo talihia hinia.

<sup>6</sup> Pani hin masapa atu Iesu mara i hoje na palon Simon Peter, Peter mo usia mara, “Tija, mata sava ko opoia vara o hoje na paloku?”

<sup>7</sup> Iesu mo řaramia mara, “Nake engko ko sopo hitevosahi na sava na lo vaia, pani hitahu, o pa levosahia.”

<sup>8</sup> Peter mo vereia mara, “Mo vono! Engko o pa sopo eři hoje na paloku hin te rani!” Iesu mo vereia isana mara, “Vara a sopo hojeho, engko o pa sopo noku!”

<sup>9</sup> Ale Simon Peter mo vereia mara, “Tija, o sopo hoje na paloku purongo, pani limaku peresi na patuku sohena!”

<sup>10</sup> Iesu mo řaramia mara, “Isan la haratu la loloso moiso, epera la vokevoke vevuhi moiso, la pa hoje na palora purongo. Ale kamim ka vokevoke moiso, pani vonamim matea mo vono.”

<sup>11</sup> Iesu mo levosahia vara hare natu i pa turuposi hinia hin haratu mo vereia mara, ‘vonamim matea.’

<sup>12</sup> Hitahun haratu Iesu mo hoje na palo nona tamlohi moiso, mo mele ru na nona ruru, ale mo mele sakele. Mo vereia isara mara, “Ka levosahi na sava hinu na lo vaia matamim? <sup>13</sup> Ka lo toviau nomim tija, ale nomim tamlohi tavera. Haratu ka vereia mo tataholo, matan ka lo retivarařuhu. <sup>14</sup> Vara enau na hoje na palomim, pani enau nomim tamlohi tavera, ale nomim tija, mo řuhu vara ha hojehoje na palomim isamim hasemim. <sup>15</sup> Enau na lo vai na tovongi matea isamim, mo řuhu vara ha vaia isamim sohen enau na vaia isamim. <sup>16</sup> Varařuhu na vereia isamim vara slev la sopo aulu na nora tamlohi tavera moiso vahařule la sopo aulu hin la haratu la lo řulera. <sup>17</sup> Vara ka levosahi la hinu sei moiso, God i pa leřuhu hin kamim vara ha vaira.

<sup>18</sup> Na sopo retireti hin kamim mo isoiso. Na levosahi la haratu na viřonira moiso, pani matan vara sava hinu sei Retitapu mo lo vereia i

masese, mo vereia mara, “Tamlohi atu mo lo hanhani peresiau, mo pete turuposi hinia moiso!”

*Psa 41.9* <sup>19</sup> Na lo vere kamim hinia tiroma moiso i pa masese matan hin pongi atu vara i masese ha pa rasua vara enau natu, haratu mo lo toho jejeu. <sup>20</sup> Varařuhu na vereia isamim, vara tea mo lavi na noku vahařule, enia mo lo laviau, vara tea mo laviau, enia mo lavi haratu mo lo řuleau.”

*Iesu Mo Vereuli Na Sava I Pa Mase*  
(Mt 26.20-25; Mk 14.17-21; Lk 22.21-23)

<sup>21</sup> Iesu mo vere la haratu moiso, mo rongo řomina mo puhoni hajavua, mo vereia isana nona tamlohi mara, “Varařuhu na vereia isamim, vonamim matea i pa turuposi hinia!” <sup>22</sup> Nona tamlohi usuri la lo hase kilakilaura matan la sopo levosahia vara mo lo vere hare.

<sup>23</sup> Tamlohi usuri non Iesu matea mo olo vano na řuman Iesu hin hanhani atu, ale tamlohi atu natu Iesu mo opoia, <sup>24</sup> moiso Simon Peter mo tianaho na patuna isana vara i usia isan Iesu vara mo lo vere hare. <sup>25</sup> Ale nona tamlohi usuri atu mo olo vano na ruman Iesu, ale mo usia mara, “Tija, hare natu?”

<sup>26</sup> Iesu mo řaramia mara, “A pa seri na tavalu pereti na wai pih, ale a pa silea isana.”

Moiso Iesu mo seri tavalu pereti atu mo silea isan Judas, natun Simon Iscariot. <sup>27</sup> Vahatea purongo, Setan mo unu hin Judas. Iesu mo vereia mara, “Judas, o vano o vai na sava ko opoi vara o pa vaia vila!” <sup>28</sup> Te vonara mo sopo levosahi na řaramin reti atu Iesu mo lo vereia isana. <sup>29</sup> Pani matan Judas mo lo tauri na tanga mania, hai la lo řomřomia vara Iesu mo lo řulea vara i voli te hinu mata hanhani, hai la lo řomřomia vara Iesu mo řulea vara i sile te mania isan la haratu la tilavono. <sup>30</sup> Judas mo lavi tavalu pereti atu, ale mo malue vahatea. Mo řořoha moiso.

*Retileu Paro*

<sup>31</sup> Judas mo vano moiso, ale Iesu mo vereia mara, “Nake God mo lo tahe na hijan Natun Tamlohi, ale enia i pa

tahe na hijan God matana. <sup>32</sup> Vara maurin Natun Tamlohi mo tahe na hijan God, God i pa hase tahe na hijana aulu vahatea. <sup>33</sup> Na natuku, enau a pa mele toho peresi kamim mata makomo rani. Ha pa aleau, pani ha pa sopo eři hiteau. Na lo vere isamim sohen haratu na pete vere isana tamlohi tavera nona Jew moiso nara, ‘Ha pa sopo eři vano hin jara atu enau na lo vano ea’. <sup>34</sup> Pani nake, na lo sile na retileu paro matea isamim. Ha pa opoiopoi kamim hatehateahi sohen enau na lo opoi kamim. <sup>35</sup> Vara ha opoiopoi kamim, tamlohi tari la pa hitea la pa levosahia vara kamim ka noku tamlohi usuri varařuhu.”

*Peter Mo Retitauhi Isan Iesu*  
(Mt 26.31-35; Mk 14.27-31; Lk 22.31-34)

<sup>36</sup> Simon Peter mo usia mara, “Tija, engko ko lo vano epu?”

Iesu mo řaramia mara, “Nake o pa sopo eři usuriau na jara na lo vano ea, pani hitahu o pa usuriau.”

<sup>37</sup> Peter mo usia mara, “Tija, mata sava a sopo eři usuriho nakerihi? A eři mate matam!”

<sup>38</sup> Iesu mo usia mara, “O eři mate matakū? Varařuhu na vere isam, engko o pa vunvuniau vaha tolu, moiso toa vari i pa tarere.”

## 14

### *Ra Pa Toho Peresi Iesu*

<sup>1</sup> Iesu mo vere isana nona tamlohi usuri mara, “Ha sopo matahu! Ha rasu God, ale ha rasuau sohenā, <sup>2</sup> matan na iman Tamaku jara matuvana la lo toho ea. A pa sopo vereuli kamim hiniā vara mo sopo varařuhu. A pa sahe vara a tatamahuni na jara matamim. <sup>3</sup> Vara a tatamahunia i isoiso, a pa mele mai, a pa lavi kamim vara na sava jara na lo toho ea, kamim sohenā ha pa toho ea. <sup>4</sup> Kamim ka levosahi na malelen jara atu enau na lo vano ea.”

<sup>5</sup> Thomas mo vere isana mara, “Tija, kama sopo levosahi na jara ko lo vano ea. Kama pa levosahi na malele sohenā sava?”

<sup>6</sup> Iesu mo vere isana mara, “Enau malele varařuhu, enau pulo hina varařuhu, enau pulo mauri! Vara i sopo matakū, te vonamim i pa sopo eři sahe isan Tama. <sup>7</sup> Vara ha pa lo levosahiau, ha pa levosahi Tama, ale mo tapulo nake ka levosahia, ale ka hitea moiso.”

<sup>8</sup> Philip mo vere isana mara, “Tija, o vujangi kamam hin Tama! Haratu purongo kama opoia.”

<sup>9</sup> Iesu mo řaramia mara, “Philip, na lo toho peresi kamim mo tuai moiso. Kamim ka sopo lo levosahia vara enau hare? Vara ka hiteau, ka hite Tama. Mo sohenā sava natu, ka lo usia vara a vujangi kamim hin Tama? <sup>10</sup> Ka sopo rasua vara enau na matea peresi Tama, ale Tama enia mo matea peresiau? Sava na lo vere isana sopo vere isana haseku. Tama sei mo lo toho hiniā, mo lo vai la nona mata-mata řuhuřuhu atu.

<sup>11</sup> Ha rasuau hin haratu na vere isana vara Tama enia mo matea peresiau, ale enau na matea peresi Tama. Pani vara i vono, ha rasu mata vavahinau hasera purongo. <sup>12</sup> Varařuhu na vere isamim, vara ha rasuau, ha pa eři vai na sava hinau na lo vaira. Ha pa vai na hinau la pa jeuau, matan nake na lo mele hilu sahe isan Tama. <sup>13</sup> Ha usia, ale enau a pa vai na sava ka usia na hijaku matan vara Natuna i pa sile na ololo i sahe isan Tama. <sup>14</sup> Vara ha usi te hinau na hijaku, a pa vaia.”

### *Tanume Tapu I Pa Mai*

<sup>15</sup> Iesu mo vere isana nona tamlohi usuri mara, “Vara ha opoia, ha pa vai na sava na lo retileu hinira. <sup>16</sup> Ale, a pa usi Tama vara i mele řule na meramim matea isamim, i pa toho peresi kamim tui tui, <sup>17</sup> meramim atu enia Tanumena, ale i pa vujangi na hina varařuhu hin God. Tamlohi na varama la pa sopo eři lavi na Tanumena matan la pa sopo eři hitea teni la levosahia. Pani kamim ka levosahi na Tanumena matan enia mo lo toho peresi kamim, i pa lo toho hin kamim.

<sup>18</sup> A pa sopo rovo hin kamim sohenā natu mařua, pani a pa mai

isamim. <sup>19</sup> I pa sopo tuai, tamlohi varama la pa sopo efi mele hiteau, pani kamim ha pa hiteau, ale matan enau a pa mauri, kamim ha pa mauri. <sup>20</sup> Hin pongi atu ha pa levosahia vara enau na matea peresi Tama. Ha pa levosahia vara kamim ka matea peresiau, ale enau na matea peresi kamim. <sup>21</sup> Haratu mo lavi na noku retileu, ale mo ooloo hinira enia haratu mo opoiau, ale Tamaku i pa opoia, ale enau sohena a pa opoia, ale a pa hase vujangiau isana.”

<sup>22</sup> Moiso Judas, mo sopo Judas Iscariot, mo reti mo usia mara, “Tija, řaramin nom reti sei vara o pa vujangihio isamam, pani i pa sopo isana tamlohi varama, enia sava?”

<sup>23</sup> Iesu mo řaramia mara, “Vara tea mo opoiau, i pa ooloo hina noku reti, moiso Tamaku i pa opoia, kama pa mai isana, kama pa toho hinia. <sup>24</sup> Pani haratu mo sopo opoiau, mo sopo ooloo hina noku reti. Sava reti ka rongo na vereā, la sopo noku, pani non Tamaku sei mo lo řuleau.

<sup>25</sup> Na lo vere kamim hin la hinau sei nake matan na pa lo toho peresi kamim. <sup>26</sup> Pani Tuetueni řuhu atu i pa mai, enia Tanume Tapu, Tama i pa řulea i lavi na jaraku, enia i pa vujangi kamim na hinau tari, ale i pa vai kamim ha mele řomřomi na hinau tari na lo vereā isamim moiso.

<sup>27</sup> Na lo sile kamim na tamata, noku tamata atu, enau haseku a efi silea, mo sopo sohena tamata varama nike i efi silea. Ale ha sopo řomkaka, ha sopo matahu.

<sup>28</sup> Ka pete rongoa, na vereā isamim moiso vara a pa vano, ale a pa mele mai isamim. Vara ka opoiau varařuhu, ha pa avulahi matan enau na lo sahe isan Tama, matan Tama enia mo aulu jea hinia.

<sup>29</sup> Na lo vere la hinau nike tiroma isamim matan vara pongi atu vara i masese ha pa rasuau. <sup>30</sup> A sopo efi retireti peravu isamim matan tamlohi taverařasati matan varama nike mo lo mai, pani enia mo sopo lavi te suiha vara i aulu hinia. <sup>31</sup> Pani vara tamlohi tari na varama la pa

levosahia vara enau na opoi Tamaku, na lo vai na sava enia mo retileu vara a vaira.

Ale ha turu, řa malue!”

## 15

### *Iesu Enia Asi Grape Varařuhu*

<sup>1</sup> Iesu mo vereā isana nona tamlohi mara, “Enau asi grape varařuhu, ale Tamaku enia tamlohi isa. <sup>2</sup> Mo tai nařihi vevuhi na rangaku sei la sopo vua hinia. Pani hin haratu la lo vua, mo jalo na rangana vara i pa namaha i mařivi. <sup>3</sup> Kamim ka vokevoke moiso mata sava na lo vereā isamim moiso.

<sup>4</sup> Ha toho hinia, ale enau a pa lo toho hin kamim. Sohena ranga matea i sopo efi vua matan mo sopo sořotahi peresi na lahona, kamim ha pa sopo efi vua vara ha sopo toho hinia. <sup>5</sup> Enau pulo asi grape, ale kamim rangarangana, pani vara kamim ha sořotahi isaku, ale enau a lo sořotahi isamim, kamim ha pa vua i mařivi, pani vara enau a sopo toho isamim, ha pa sopo efi vai te hinia hatea. <sup>6</sup> Vara ha sopo toho hinia, la pa pulahi kamim sohena ranga mahoa sei la takonahira, ale la pa sulira na hapu.

<sup>7</sup> Vara ha lo toho hinia, ale vara noku reti i lo toho hin kamim, sava ka usia Tamaku i pa vaia nomim. <sup>8</sup> Tamaku mo lo lavi na ooloo tavera hin malele sei, vara ha vua tavera ka lo vujangia vara ka noku tamlohi usuri varařuhu. <sup>9</sup> Na lo opoi kamim sohen Tama mo opoiau. Ha toho na noku opoia. <sup>10</sup> Vara ha ooloo na noku retileu, ha pa lo toho na noku opoia sohen enau na lo ooloo na retileu non Tamaku, ale na lo toho na nona opoia.

<sup>11</sup> Na lo vere la hinia sei isamim vara ha pa avulahi tavera soheku. <sup>12</sup> Noku retileu na lo vereā isamim nakerihi, vara ha opoiopoi kamim sohen enau na lo opoi kamim tiroma mo mai nake. <sup>13</sup> Mo sopo tea nona opoia i jeu haranike: vara tea i tau na maurina mata tapalana. <sup>14</sup> Ale kamim ha pa tapalaku vara ha lo ooloo na sava na retileu hinia isamim. <sup>15</sup> Slev la sopo levosahia

vara nora tamlohi tavera mo lo vai na sava, ale enau na sopo mele retireti isamim sohena noku slev. Na tovi kamim tapalaku matan enau na vere vevuhi na sava Tamaku mo vereau hinia.

<sup>16</sup> Kamim ka sopo viřoniau, pani enau na viřoni kamim matan vara ha pa vano ha vua na vua sei i pa lo toho jejeu. Ale sava hinau ka usia na hijaku, Tamaku i pa silea isamim. <sup>17</sup> Ale na riteileu isamim vara ha opoiopoi kamim.”

### *Tamlohi Varama La Pa Rohu Hiniho*

Iesu mo vereea mara:

<sup>18</sup> “Vara tamlohi varama la řohu hin kamim, ha řomřomia vara la řohu hiniau tiroma. <sup>19</sup> Vara kamim tamlohi non varama, tamlohi hinia la pa opoi kamim. Pani kamim ka sopo tamlohi non varama, mo vono. Enau na viřoni nařihi kamim vara ha pa tau na varama na hařimim, ale matan haratu, tamlohi non varama la pa řohu hin kamim. <sup>20</sup> Ha řomřomi na sava na lo vere kamim hinia moiso, ‘Slev mo sopo aulu i jeu na nona tamlohi tavera’.

*Jn 13.16*

Vara tamlohi la vailejilejiau, la pa vailejileji kamim. Vara la ooloo na sava na vereea, la pa ooloo na sava ka lo verera. <sup>21</sup> Tamlohi la pa vailejileji kamim matan ka lo lavi na hijaku, ale matan la sopo levosahi haratu sei mo lo řuleau. <sup>22</sup> Vara a sopo lo sinai a vereea isara, enira la pa sopo ori na hehe, pani nake, la sopo eři vereea vara mo sopo te nora hehe.

<sup>23</sup> Haratu sei mo řohu hinia, enia i pa řohu hin Tamaku. <sup>24</sup> Vavahinau sei na vaira, mo sopo lo te tamlohi i vaira hin te rani, vara la sopo lo hiteau a vai la hinu atu, la pa sopo ori na hehe, pani la hiteau na vai la hinu atu, ale la řohu tavera hinia peresi Tamaku. <sup>25</sup> Pani matan sava la pete ulia na nora leu moiso i pa masese, ale mo vereea mara, ‘Tamlohi la řohu tavera hinia, pani mo sopo matan te hinu’.

*Psa 35.19; 69.4*

<sup>26</sup> Pani a pa řule na Tuetueni řuhu matea i pa tai isan Tama i sinai isamim, enia Tanumena, i pa vujangi

na hina varařuhu mo malue isan Tama, ale Tanumena i pa vereuliau.

<sup>27</sup> Ale kamim sohena, ha pa vereuliau matan kamim ka lo toho peresiau na tapulo noku rani nike.”

## 16

### *Iesu Mo Vereulia Vara I Pa Mate*

Iesu mo mele vereea mara:

<sup>1</sup> “Na lo vere kamim hin la hinu nike, matan vara ha sopo kali hin te hinu. <sup>2</sup> La pa tipahi kamim na ima lotu nona Jew. Ale pongi matea i pa mai, tamlohi la pa vilimatei kamim, ale matana, la pa řomřomia vara la lo vai na masalon God. <sup>3</sup> La pa vai hinu atu matan la sopo levosahi Tama teni enau. <sup>4</sup> Pani na lo vere hinu sei isamim nake, matan vara pongina i masese, ha pa řomřomi na sava na lo vere kamim hinia moiso. Tiroma na sopo vere la hinu nike, matan enau na lo toho peresi kamim, <sup>5</sup> pani nake na lo sahe isan haratu mo lo řuleau, ale mo sopo te vonamim i usiau hinia vara, ‘Ko lo haipu?’ <sup>6</sup> Mata sava na vereea isamim, ale ka rongo mo sati tavera. <sup>7</sup> Pani na vereea isamim, i pa mele řuhu isamim vara a malue. Vara a sopo malue, Tuetueni řuhu atu i pa sopo eři mai vara i tueni kamim. Vara a vano a pa řule na Tanume Tapu i mai isamim.

<sup>8</sup> Tanume Tapu i pa mai i tuvai na tamlohi na varama na sava mo hehe, ale na sava mo vokevoke, mata aria non God. <sup>9</sup> Ale i pa mai i tuvai na tamlohi na varama na sava mo hehe matan la sopo rasuau. <sup>10</sup> Ale i pa mai i tuvai na tamlohi na varama na sava mo vokevoke matan mauriku mo vokevoke, ale enau na lo sahe isan Tama ale kamim ha pa sopo eři mele hiteau nike, <sup>11</sup> ale i pa mai i tuvai na tamlohi na varama mata aria non God matan mo pete ari haratu mo lo tauri na suiha non varama nike moiso.

<sup>12</sup> Na opoia vara a vere kamim na hinu matuvana, pani nakerihi i pa řilangi vara ha pa levosahira.

<sup>13</sup> Pani hin pongi atu vara Tanume Tapu i mai, enia i pa vujangi na hina varařuhu, ale i pa tiroma hin

kamim na malele varaŕuhu tari vara ha pa levosahira. Tanume Tapu mo sopo vere na hinau enia hasena, pani enia i pa vere kamim purongo na sava mo rongoa isaku. Moiso enia i pa vai kamim ha levosahi na sava i pa masese hitahu. <sup>14</sup> Tanume Tapu i pa vuhesia isamim vara enau na řuhuŕuhu jea sohen sava, i pa vaia sohen harihi: i pa lavi na noku reti vara i vuhesia isamim. <sup>15</sup> Hinau tari non Tama enia noku. Matan hinau atu na lo vere vara Tanume Tapu i pa lavi na noku reti, ale i vuhesia isamim.

### *Avulahi I Pa Mai*

<sup>16</sup> I pa sopo tuai ha pa sopo mele hiteau, pani hitahun haratu, ha pa mele hiteau.”

<sup>17</sup> Nona tamlohi usuri la lo verevera hinia lara, “Raramin nona reti sei isaŕa enia sava sei enia mara, ‘I pa sopo tuai ha pa sopo hiteau, pani hitahun haratu ha pa mele hiteau mata makomo rani!’ teni ‘matan a pa mele sahe isan Tama?’ ” <sup>18</sup> Nona tamlohi usuri la lo mele usiusira hinia lara, “Raramin nona reti sei, ‘I pa sopo tuai!’ enia sava řa sopo levosahi na sava mo lo vereau.”

<sup>19</sup> Iesu mo levosahia vara la opoia vara la usia hin la hinau sei, ale mo vereau isara mara, “Avei, ka lo usiusi kamim na řaramin noku reti sei, ‘I pa sopo tuai ha pa sopo hiteau, pani hitahun haratu, ha pa mele hiteau?’ ”

<sup>20</sup> Varaŕuhu na vereau isamim vara ha pa tangi, moiso ha pa rongo i sati, pani tamlohi na varama la pa avulahi. Ha pa rongo i sati, pani hitahu ha pa avulahi. <sup>21</sup> Vara haŕai mariviti vara i lavilavi, enia i pa rongohaji tavera, pani vara mo isoiso, mo řomaliho na rongohaji, ale mo avulahi matan mo vasusui na natirihimata matea mo pala na varama. <sup>22</sup> Ale sohen haratu nake řomimim la lo sati, pani hitahu hin pongi atu vara a mele hite kamim, ha pa avulahi tavera, ale tea i pa sopo eŕi posi na nomim avulahi. <sup>23</sup> Vara pongi atu i masese, ha pa sopo eŕi mele usiau hin te hinau. Varaŕuhu na vereau isamim vara Tama i pa sile kamim na sava

hinau ka usia na hijaku. <sup>24</sup> Mo tikeli nake ka sopo lo usi te hinau na hijaku, pani nake, ha pa usia na hijaku moiso i pa mai isamim matan vara ha pa avulahi jea.

<sup>25</sup> Na lo retireti na titileu isamim matan vara i vuhesi na sava na lo vereau. Pani pongi matea mo lo mai, a pa vere tataholoi kamim hin Tama, ale a pa sopo mele titileu sohen haranike. <sup>26</sup> Hin pongi atu enau a pa sopo mele usia nomim matan kamim hasemim ha pa usi na hinau isan Tama na hijaku. <sup>27</sup> Matan Tama mo opoi kamim matan ka opoiau, ale ka rasua vara enau na tai isana. <sup>28</sup> Na tai isan Tama na mai na varama, pani nake na lo malue na varama vara a mele hilu a sahe isan Tama.”

<sup>29</sup> Nona tamlohi usuri lara, “Nakerihi ko reti tataholo isamam, ko sopo titileu. <sup>30</sup> Nake natu, kama levosahia vara engko ko levosahi na hinau tari, ale te i sopo eŕi usi te retiusia isam. Nake kama rasua vara engko ko tai isan God.”

<sup>31</sup> Iesu mo řaramira mara, “Kamim ka rasuau varaŕuhu? <sup>32</sup> Rani matea mo lo mai, ale nake mo masese moiso vara kamim mo isoiso ha pa rovorovo, enau haseku a pa lo toho, pani Tamaku i pa lo toho peresiau, ale a pa sopo toho haseku. <sup>33</sup> Na lo vere hinau sei isamim matan vara tamata i pa toho na mapumim mataku. Nake ka lo toho na varama kamim ha pa lavi na rani řilangi, pani ha lo řomřilangi matan enau na jeu na noku meresahi na varama moiso.”

## 17

### *Usiusi Non Iesu Isan Tamana*

<sup>1</sup> Iesu mo vere la hinau sei moiso, mo taŕa sahe aulu na tuka, mo vereau mara, “Tamaku, pongi atu mo mai vara o tahe na hijan Natum aulu matan vara Natum i eŕi tahe na hijam aulu. <sup>2</sup> Ale matan ko sile na suiha isaku moiso vara a aulu na tamlohi tari matan vara a pa sile na mauri tui isan la haratu ko lo sileau hinira. <sup>3</sup> Mauri tui enia vara la levosahiho vara engko hasem God varaŕuhu, ale vara la levosahi Iesu Křisto, haratu



ko lo řulea. <sup>4</sup> Enau na vujangi la tamlohi nike na varama vara nom řuhuřuhu mo sohena sava matan na vai vevuhi na hinau tari ko lo taura isaku vara a vaira. <sup>5</sup> Nake Tamaku, o mele taheau na noku suiha aulu peresiho na tuka i sohen haratu mo lo toho isaku tiroma varama mo sopo lo tapulo.

<sup>6</sup> Enau na vereulihio isan la tamlohi atu, engko ko lo sileau hinira na varama vara la pa levosahiho. Enira nom, moiso ko sileau hinira, ale la lo ololo na nom reti. <sup>7</sup> Nake, la levosahia vara hinau tari ko sileau enira la tai isam. <sup>8</sup> Na vere na noku tamlohi moiso na sava ko lo vereau hinira vara a vereau, ale la lavia. La levosahia mo řuhu vara enau na tai isam, moiso la rasua vara engko ko řuleau na mai. <sup>9</sup> Na lo usiusi matara, pani mo sopo matan la haratu non varama. Noku tamlohi enira nom, ale na lo usiusi matara matana. <sup>10</sup> Hinau tari noku, enira nom moiso, ale na lavi na ololo tavera matan la lo vereuliau.

<sup>11</sup> I pa sopo tuai enau a sopo mele toho na varama, pani enira la lo pa toho na varama, ale enau na lo mai isam. Tama Tapu o pa tingira hin suiham atu ko lo silea isaku. Moiso la pa matea peresira hasera sohen engko peresiau řa matea. <sup>12</sup> Hin rani atu na lo toho peresira, na lo tingira hin suiha atu ko lo sileau hinia. Na lo kilaura, ale mo sopo te vonara hatea i tihai, pani tamlohi atu matea purongo sei mo lo vano na komo matan vara Retitapu i pa masese. *Psa 41.9*

<sup>13</sup> Na lo mai isam, pani na lo vere la hinau nike nake na lo toho na varama vara noku tamlohi, la pa eři avulahi tavera soheku matana. <sup>14</sup> Na silera na nom reti moiso, ale tamlohi non varama la řohu hinira, matan enira la sopo tamlohi non varama, mo soheku, la řohu hiniau matan enau na sopo non varama.

<sup>15</sup> Tata, na sopo usiho vara o lavi nařihi na noku tamlohi na varama, pani vara o tingira matan Tiapolo. <sup>16</sup> Enira la sopo non varama, sohen enau na sopo non varama. <sup>17</sup> O

tapuhira na retivarařuhu, nom reti enia varařuhu. <sup>18</sup> Enau na lo řulera vara la vano isana tamlohi řalihi na varama sohen engko ko řuleau. <sup>19</sup> Enau na tapuhiau haseku vara a vai na masalom purongo, matan vara la pa eři hitevosahia, ale la mai tamlohi non retivarařuhu.

<sup>20</sup> Enau na sopo usiusi matan la noku tamlohi nike hasera, pani na lo usiusi mata tamlohi tari sei la pa tau na nora rasua hiniau na sava la pa lo vereau mataku. <sup>21</sup> Na opoia vara enira mo isoiso la pa matea peresihira hatehateahi, sohen enau na lo matea peresiho, ale engko ko matea peresiau. Na opoia vara la pa matea peresifa, matan vara tamlohi hin varama nike, la pa rasua vara engko ko řuleau.

<sup>22</sup> Suiha řuhuřuhu atu ko lo sileau hinia, na pete silea isara moiso, matan vara la pa matea sohen enřa řa matea, <sup>23</sup> enau hinira, ale engko hiniau, matan vara la pa matea na hinau tari, matan vara tamlohi na varama la eři levosahia vara engko ko řuleau, ale ko lo opoira sohen ko opoiau.

<sup>24</sup> Tata, na opoia vara la haratu ko lo sileau hinira, la pa toho peresiau na jara na lo toho ea, matan vara la pa eři hite noku ololo tavera atu sei ko lo sileau hinia, matan ko opoiau hin pongi atu varama mo sopo lo toho. <sup>25</sup> Tata ko vokevoke, hina purongo vara tamlohi na varama la sopo levosahiho, enau na levosahiho, ale la tamlohi nike la levosahia vara engko ko řuleau. <sup>26</sup> Ale enau na vereau isara vara engko ko sohena sava, ale a pa mele vereau isara vara opoia atu ko opoiau hinia, i pa toho isara, ale enau a pa toho hinira.”

## 18

*La Turuposi Hin Iesu*  
(Mt 26.47-56; Mk 14.43-50; Lk 22.47-53)

<sup>1</sup> Iesu mo usiusi mo isoiso, enia tolu na nona tamlohi usuri, la vano roto na Vakoan Kidron na talu olive matea atu. <sup>2</sup> Tarea Iesu tolu na nona

tamlohi usuri la lo pulutahi ea, ale Judas haratu mo lo turuposi hin Iesu mo levosahi jara atu.

<sup>3</sup> Ale Judas mo vano hin talu olive atu peresi na tamlohi vuro hai nona mara Rome peresi na police mata Temple. Nora moli mata p̄ris peresi na Pharisee la řulera. La lavi na hapu jilangi, lamu peresi na hinau mata valum, ale la mai isan Iesu. <sup>4</sup> Iesu mo pete levosahi na sava i pa masese moiso, pani mo usi isara mara, “Ka lo ale hare?” <sup>5</sup> Ale Judas haratu mo lo turuposi hinia mo lo turu peresira atu. La řaramia lara, “Kama lo ale Iesu mara Nazareth!”

Iesu mo vereea isara mara, “Enau natu, haratu na lo toho jejeu!” <sup>6</sup> Vahatea purongo enira mo isoiso la turu juha hinia, ale la jovi na lepa.

<sup>7</sup> Iesu mo mele usia mara, “Ka lo ale hare?”

La řaramia lara, “Kama lo ale Iesu mara Nazareth!”

<sup>8</sup> Iesu mo řaramira mara, “Na pete vereea moiso vara enau natu. Vara ka lo aleau, ha tinařihi la tamlohi nike la vano!” <sup>9</sup> Mo vereea sohena matan vara nona reti atu mo lo vereea tiroma i pa masese mara, ‘Enau na sopo vaitihai te vonara hatea hin la haratu ko lo sileau hinira’. *Jn 6.39*

<sup>10</sup> Ale Simon Peter enia nona sita vuro matea, ale mo reve nařihi sita vuro atu mo langa na matua pero slev non p̄ris aulu atu, hijan slev atu enia Malchus. <sup>11</sup> Pani Iesu mo reti isan Peter mara, “O tau nařihi na nom sita vuro! Vara sava, ko řom vara enau a pa sopo eři lavi rani řilangi sei Tama mo lo sileau hinia?”

*La Lavia Mo Vano Isan Annas*  
(Mt 26.57-58; Mk 14.53-54; Lk 22.54)

<sup>12</sup> Ale vao tamlohi vuro matea nona mara Rome peresi nora commander peresi na police mata Temple nona Jew, la taurilati Iesu, ale la pesia.

<sup>13</sup> La lavia mo vano tiroma isan Annas, enia palihan Caiaphas, p̄ris aulu hin tauni atu. <sup>14</sup> Caiaphas sei natu, mo lo vereea isana tamlohi tatavera nona Jew mara, “I pa mele řuhu vara

tamlohi matea purongo i mate mata tamlohi tari.”

*Peter Mo Vunvuni Iesu*  
(Mt 26.69-70; Mk 14.66-68; Lk 22.55-57)

<sup>15</sup> Simon Peter peresi na tamlohi usuri tinapua non Iesu matea, la usurira la lavi Iesu mo vano isan Annas. Tamlohi non Iesu atu enia mo levosahi mamahuni p̄ris aulu atu, ale mo usuri Iesu mo sivo na lolo rope iman p̄ris aulu atu. <sup>16</sup> Pani Peter mo lo toho na jingoima mariviti na mataruan rope atu. Pani pa tamlohi usuri non Iesu atu mo mele malue, ale mo vano mo retireti peresi hařarihi atu mo lo kilau na matarua rope. Mo tinařihi vara Peter i unu hin rope atu, <sup>17</sup> pani mo usia isana mara, “Avei, engko ko sopo vonara matea sei la lo usuri tamlohi atu?”

Peter mo řaramia mara, “Enau mo vono!”

<sup>18</sup> Slev peresi na police mata Temple la lo turu řalihi na hapu matea la vaia na valaji hapu mata hamariri. Peter sohena mo lo turu peresihira mo lo marijo.

*P̄ris Aulu Peresi Iesu*  
(Mt 26.59-66; Mk 14.55-64; Lk 22.66-71)

<sup>19</sup> Na lolo ima, p̄ris aulu atu mo lo usi Iesu mata nona tamlohi usuri peresi na nona vujangi. <sup>20</sup> Pani Iesu mo řaramia mara, “Enau na lo retireti na jara tavera isana tamlohi na varama. Ale tarea, enau na lo vujangi na lolo ima lotu peresi na Temple sei Jew la lo pulutahi ea. Na sopo vere te hinau hatea vara tamlohi la sopo rongoa. <sup>21</sup> Mata sava ka lo usiau hinia? Ha usi la haratu la lo rongoa, la levosahi na hinau na lo vereea!”

<sup>22</sup> Iesu mo vere reti atu moiso police mata Temple matea mo vojaia, ale mo vereea mara, “Ko řom vara o eři řarami na p̄ris aulu matea sohen haratu?”

<sup>23</sup> Iesu mo řaramia mara, “Vara na vere te hinau mo sopo tataholo o vereea! Pani vara mo vono, mata sava ko vojaiiau?” <sup>24</sup> Ale Annas mo řule Iesu mo vano isan Caiaphas, p̄ris

aulu, pani la sopo lo uli naŕihi na asihai hinia.

*Peter Mo Mele Vunvunia*  
(Mt 26.71-75; Mk 14.69-72; Lk 22.58-62)

<sup>25</sup> Haratu mo lo vano, pani Simon Peter mo pa lo turu mo lo marijo, ale la usia isana lara, “Avei, engko ko sopo nona tamlohi usuri matea?”

Peter mo mele vunvunia mara, “Enau mo vono!”

<sup>26</sup> Slev matea non pŕis aulu tahisan haratu sei Peter mo lo langa na perona, mo usia mara, “Mo sopo engko sei na hiteho na talu olive peresi tamlohi nike?”

<sup>27</sup> Peter mo mele vunvunia, ale vahatea purongo, toa vari matea mo tarere.

*Iesu Mo Turu Na Nahon Pilate*  
(Mt 27.1-2, 11-14; Mk 15.1-5; Lk 23.1-5)

<sup>28</sup> Na řalavuhō jea natu, la lavi Iesu la malue na iman Caiaphas, la vano na ima tavera matea nona tamlohi tavera nona mara Rome. Pani la lo sasaovi na jingoima, matan la rasua vara tea i unu, enia i pa lumiha na nahon God, ale enia i pa sopo eŕi hani na Passover.\*

<sup>29</sup> Pilate mo malue mo usia mara, “Tamlohi nike, mo vai na sava hina sati?”

<sup>30</sup> La řaramia lara, “Ko řom vara kama pa lavi tamlohi akerihi i mai isam vara enia mo sopo vai te hina hehe?”

<sup>31</sup> Pilate mo vereā isara mara, “Ha lavia, ale ha pa aria i usuri na nomim leu.”

Vao tamlohi nona Jew atu la řaramia lara, “Pani nomim leu mo tapuhoro kamam vara kama eŕi tau te tamlohi na mateia.” <sup>32</sup> Ale sohen Iesu mo vereā moiso vara nona mateia i pa sohenā sava, mo lo mai vara i masese. *Jn 3.14; 12.32*

<sup>33</sup> Pilate mo mele unu na lolon patu ima tavera atu, ale mo tovi Iesu mo vano isana, ale mo usia isana mara, “Avei, engko natu, Supe nona Jew?”

<sup>34</sup> Iesu mo řaramia mara, “Retiusia sei mo tai isam hasem teni tea la vereā isam matakū?”

<sup>35</sup> Pilate mo řaramia mara, “Sava? Vara sava, enau Jew matea? Tahisam tataholo peresi na pŕis aulu, enira natu, la laviho ko mai isaku. Ko vai na sava mo sati?”

<sup>36</sup> Iesu mo řaramia mara, “Jara atu na lo tauri na suiha hinia mo sopo non varama nike, vara i sohenā, noku tamlohi la pa valum moiso matan vara la turuhoroau vara a pa sopo eŕi vano na lima tamlohi tatavera nona Jew, pani mo vono, jara atu na lo tauri na suiha hinia mo sopo non varama nike.”

<sup>37</sup> Pilate mo vereā mara, “Varaŕuhu, engko Supe matea?”

Iesu mo vereā isana mara, “Engko ko lo vereā vara enau Supe matea. Enau na vora hin varama nike matan vara a vere na retivarāŕuhu. Ale la haratu non varaŕuhu la levosahi na leoku.”

<sup>38</sup> Pilate mo usia isan Iesu mara, “Retivarāŕuhu enia sava?”

*Iesu Mo Vano Na Mateia*  
(Mt 27.15-31; Mk 15.6-20; Lk 23.13-25)

Hitahun haratu Pilate mo mele malue mo vereā isan la Jew atu mara, “Tamlohi nike, na sopo hite te hināu i ori hinia vara a sile na talai isana. <sup>39</sup> Ale tarea na lo teri na tamlohi matea na nomim pongi Passover. Ale kamim ka opoia vara a teri na Supe nona Jew teni mo vono?”

<sup>40</sup> Ale la řaramia la ulo lara, “Mo vono! Mo sopo enia. Kama opoi Barabbas.” Barabbas enia tamlohi valvalum matea ale enia mo řohu na gavman non Rome.

## 19

### *Pilate Mo Sile Iesu Isara*

<sup>1</sup> Ale Pilate mo lavi Iesu mo retileu vara, la tamlohi vuro atu, la pa rupia na asi maja. <sup>2</sup> Tamlohi vuro la peri na rongorongo na asihai ngaŕngaŕiha la taua na patuna, ale la liho na ruru peravu majhina mo perpel nona tamlohi aulu na pilina. <sup>3</sup> La mai isana la

\* **18:28:** lumiha: hite: Num 9.9 Leu non Moses mo vereā vara haratu mo tope na leu sei i pa saovi te vitu hatea tiroma moiso i pa mele eŕi hani na Passover.

kerehia lara, “Engko Supe nona Jew, avei?” Ale la tutuhi na nahona.

<sup>4</sup> Pilate mo mele malue, mo vereia isana tamlohi tatavera nona Jew mara, “Ka hitea, na lavia mo mai isamim, matan ha pa levosahia vara enau na sopo efi vilei te hinai i ori hinia vara i lavi na talai matana.”

<sup>5</sup> Ale Iesu mo malue peresi na rongoŕongo la vaia na asihai ngaŕngaŕiha na patuna peresi na ruru peravu, majhina mo perpel. Ale Pilate mo vereia isara mara, “Ka hitea, tamlohi atu nahai!”

<sup>6</sup> Moiso na rani moli nona pŕis peresi na police mata Temple la hitea, la ulu lara, “Ha vosaea na talopeilopei! Ha vosaea na talopeilopei!”

Pilate mo vereia mara, “Kamim ha lavia, ha vosaea na talopeilopei kamim hasemim! Enau na sopo vilei te hinai hatea vara mo ori hinia.”

<sup>7</sup> Tamlohi tatavera nona Jew atu la řaramia lara, “Kamam nomam leu matea mo vereia vara i pa mate matan mo lo vereia vara enia Natun God!”

<sup>8</sup> Ale Pilate mara mo rongo reti atu mo mele matahu mo tavera, <sup>9</sup> moiso mo posi vara i mele unu hin nona patu ima tavera atu, ale mo hite Iesu, mo vereia isana mara, “Engko ko tai epu?” Pani Iesu mo sopo řaramia.

<sup>10</sup> Moiso Pilate mo vereia mara, “Ko sopo řaramiau mata sava? Ko sopo levosahia vara ko lo toho na suiha limaku vara o pa materi teni la vosaeo na talopeilopei vara a opoia?” <sup>11</sup> Iesu mo řaramia mara, “Vara God i sopo lo sileho na suiha, engko o sopo efi vai te hinai isaku, ale matan harihi, la haratu la sileau isam, nora hehe mo jeu na nom.”

<sup>12</sup> Hitahun haratu Pilate mo tapulo vaihite vara i teri Iesu, pani vao atu mo mele ulu aulu lara, “Vara o teri tamlohi nike, engko ko sopo tapalan supe hin Rome! Vara tea i vereia vara enia supe enia mo meresahi non supe hin Rome!”

<sup>13</sup> Ale Pilate mara mo rongoa, mo tiroma hin Iesu la vano na jingoima, ale mo sakele na jara tamlohi ari la lo

tovia, ‘Jara Pulutahi la tiua na vatu’ na leon tavitavin Israel lara, ‘Gabbatha’. <sup>14</sup> Nake mo livuha rani moiso na rani mo tiroma na rani Passover. Pilate mo vereia isana vao Jew atu mara, “Ka hitea! Nomim Supe nahai!”

<sup>15</sup> Vao atu la ulu aulu lara, “O vilimateia! O vilimateia! O vosaea na talopeilopei!”

Pilate mo usia isara mara, “Avei, ka opoia vara a vosae nomim Supe na talopeilopei?”

Moli pŕis la řaramia lara, “Mo sopo te nomam Supe, pani Supe nona mara Rome enia nomam Supe!”

<sup>16</sup> Ale Pilate mo tau Iesu na limara vara la pa vosaea na talopeilopei.

*La Vosae Iesu Na Talopeilopei*  
(Mt 27.32-44; Mk 15.21-32; Lk 23.26-43)

La tauri Iesu la tiroma hinia, <sup>17</sup> ale la lavi Iesu mo vano, ale enia mo hasena lavi na talopeilopei, mo malue la vano hin jara atu la tovia vara, ‘Jara Patusui Tamlohi’ na leon tavitavin Israel la tovia Golgotha. <sup>18</sup> Hin jara atu natu la vosaea na talopeilopei peresi na tamlohi tinapua mo rua na tavaluna, Iesu na livuhara.

<sup>19</sup> Pilate sohena mo uli na reti matea mo vosaea aulu hin talopeilopei atu mo vereia mara,

### **Iesu mara Nazareth Supe nona Jew**

<sup>20</sup> Jew matuvana la evia matan jara atu la vosae Iesu hinia, mo lo toho na pahisan taon tavera atu, ale mo ulia na leo tavitavin Israel peresi na leo mara Rome peresi na leo mara Greek. <sup>21</sup> Ale moli nona pŕis la vano isan Pilate lara, “Mata sava ko ulia vara, enia Supe nona Jew? I pa mele řuhu vara o ulia vara, enia mo lo vereia vara enia Supe nona Jew!”

<sup>22</sup> Pani Pilate mo řaramira mara, “Sava na ulia moiso i lo toho sohena!”

<sup>23</sup> Tamlohi vuro la vosae Iesu na talopeilopei moiso, ale la asease na nona ruru isara tupu vati na sope ruru matea isara hatehateahi. Nona ruru tavera enia tavalu ruru matea purongo, mo sopo te sořosořo hinia,

<sup>24</sup> ale matana, la tamlohi vuro atu la vereverea isara lara, “Ra sopo řariřaria. Ra pa roro matana, vara řa pa hitea vara hare i pa lavia nona!” Haratu mo masese matan vara sava Retitapu mo vereea i pa masese mara, ‘La aseasehi na noku ruru, la roro mata noku ruru.’ *Psa 22.18* Ale tamlohi vuro la vai na sava la hatihia moiso.

<sup>25</sup> Tinan Iesu mo lo turu na tavalu nona talopeilopei peresi vetavain tinana, peresi Mary atu naroun Clopas, ale Mary Magdalene. <sup>26</sup> Moiso Iesu mo hite tinana peresi tamlohi usuri atu mo opoia mo tavera, mo vereea isan tinana mara, “Tamlohi nike, nake enia natum.” <sup>27</sup> Ale mo vereea isan tamlohi usuri atu mara, “Enia nake tinam.” Mo tapulo hin rani atu, tamlohi atu mo lavia mo vano na imana.

*Iesu Mo Mate*  
(*Mt 27.45-56; Mk 15.33-41; Lk 23.44-49*)

<sup>28</sup> Hitahun haratu, Iesu mo levosahia vara mo vai vevuhi na nona vavahinau, ale vara na sava hinau Retitapu mo vereea moiso vara i pa masese mo vereea mara, “Na mařohu!” *Psa 22.15*

<sup>29</sup> Potele waen hohona matea mo lo toho atu, ale la řuřuni na susupaheu hin waen hohona atu na ranga hysop matea, ale la tahea mo sahe na jingona. *Psa 69.21* <sup>30</sup> Hitahun haratu Iesu mo inu waen atu mo vereea mara, “Hinai tari mo isoiso!” Mo rautoho moiso mo mate.

### *La Sari Na Roron Iesu*

<sup>31</sup> Ale matan vara i mele rani sahe i pa Sabbath matea peresi na Passover, enia rani aulu matea nona Jew. Jew la sopo opoia vara la tarape atu la lo sevu na talopeilopei hin rani atu, ale la vano la usia isan Pilate vara la kame na palora vara la mate vila, ale la pa eři suira. <sup>32</sup> Ale tamlohi vuro la kame na palon la tamlohi mo rua atu sei la lo vosiera na talopeilopei na tavalun Iesu tiroma. <sup>33</sup> Pani lara la mai isan Iesu, la hitea vara enia mo pete mate moiso, ale la pa sopo kame na palona.

<sup>34</sup> Pani tamlohi vuro matea mo urai Iesu na rorona, ale řae peresi na wai mo malue. <sup>35</sup> Kama levosahia vara hinai atu mo varařuhu matan haratu mo lo hitea mo vereulia vara mo varařuhu, ale nake kamim sohena, ha pa eři rasua. <sup>36</sup> La hinai sei la masese matan vara Retitapu i pa masese sei mo vereea mara, ‘Te sui epena hatea i pa sopo moti.’

*Exo 12.46; Num 9.12; Psa 34.20*

<sup>37</sup> Ale na jara tinapua na Retitapu mara, ‘La pa hitea hin haratu sei la urai na rorona na sari.’ *Zec 12.10; Rev 1.7*

*La Tavuni Iesu*  
(*Mt 27.57-61; Mk 15.42-47; Lk 23.50-56*)

<sup>38</sup> Tamlohi usuri non Iesu matea, Joseph mara Arimathea, mo jarohi na nona rasua hin Iesu matan mo matahu vara tamlohi tatavera nona Jew la pa sile na talai isana, ale mo vano isan Pilate mo usia vara i tinařihi na tarapen Iesu vara i tavunia. Pilate mo tinařihia, ale Joseph mo sui nařihi na talopeilopei.

<sup>39</sup> Pa Nicodemus sei mo lo mai isan Iesu na vutepongi, mo usuri Joseph. Mo lavi na tanga hasori řuhu matea la tovia myrrh peresi na aloes la hoihoira jara matea, puhonina mo jeu 25 kilo. <sup>40</sup> La tupra rua atu la tali řalihi na tarapen Iesu na ruru lulu peresi na hasori sei Jew la lo tavuni na nora mate peresia. <sup>41</sup> Mariviti hin jara atu sei la vosae Iesu na talopeilopei ea, lovuhai matea la lavo na vipahai mata lakolako mo řalihia mo lo toho atu. Ale papa vatu matea la sopo lo tau te tarape tamlohi hinia mo lo toho ea. <sup>42</sup> La tau na tarapen Iesu hin papa vatu atu matan mo lo toho mariviti atu, ale la vaia vilavila matan enia rani atu nona Jew mata tatamahu mata Passover.

## 20

*Iesu Mo Mele Turu*  
(*Mt 28.1-10; Mk 16.1-8; Lk 24.1-12*)

<sup>1</sup> Na nahonaho rani na řalavuhu na rani tiroma mata wik, mo pa lo řořoha, ale Mary Magdalene mo vano hin papa atu. Ale mo hitea vara

la kuresi naʻihi vatu tavera atu na matarua moiso, ale papa atu mo roi. <sup>2</sup> Mara mo hitea sohenā, mo maro mo mai isan Simon Peter peresi tamlohi usuri atu Iesu mo opoia, ale mo vereā isara mara, “La lavi naʻihi Tija na papa moiso! Kama sopo levosahia vara la taua epu!”

<sup>3</sup> Peter peresi tamlohi usuri non Iesu tinapua atu la maro mata papa.

<sup>4</sup> La maro pulupulu, pani tamlohi usuri non Iesu tinapua atu mo maro mo jeu Peter mo kakau na papa tiroma. <sup>5</sup> Mo rautoho mo riorio, ale mo hite te tavalu ruru la lo toho na lolo papa, pani mo sopo unu na lolo papa.

<sup>6</sup> Hin rani atu Simon Peter mara mo kakau mo unu na papa, ale mo hite te tavalu ruru atu. <sup>7</sup> Ale enia mo hite tavalu ruru atu sei la lo tavu na nahon Iesu hinia, la pirura la lo toho hasera. <sup>8</sup> Tamlohi usuri non Iesu atu haratu mo lo kakau tiroma, mo unu na papa, ale mo hitea moiso mo rasua. <sup>9</sup> Hin rani atu, Peter peresi nona tamlohi tinapua atu, la sopo levosahia vara Retitapu mo vereā vara Iesu i pa mele turu na mateia. <sup>10</sup> Ale la tamlohi usuri tupra rua atu la mele hilu la mule.

#### *Mary Magdalene Mo Hite Iesu* (Mk 16.9-11)

<sup>11</sup> Mary Magdalene mo lo turu na jingoiman papa atu mo lo tangi, mo lo tangi ale mo rautoho mara mo riorio sivo hin papa atu, <sup>12</sup> mo hite na angelo mo rua, la ru na ruru lulu la lo sakele na jara la tau na tarapen Iesu ea. Matea mo sakele na jara patuna, ale haruana mo sakele na jara palona. <sup>13</sup> La angelo atu la usi Mary lara, “Haʻrai, ko lo tangi mata sava?”

Mo řaramira mara, “La lavi naʻihi na tarapen noku Tija! Na sopo levosahia vara la taua epu.”

<sup>14</sup> Mary mo vereā sohenā mo isoiso mo posi mo hite Iesu mo lo turu atu, pani enia mo sopo hitevosahia vara enia Iesu. <sup>15</sup> Iesu mo usia mara, “Haʻrai, mata sava ko lo tangi? Ko lo ale hare?”

Mary mo řomi vara enia tamlohi lovuhai, ale mo vereā mara, “Tapala, vara engko ko naʻihi na tarapena, na opoia vara o vereāu hinia, matan vara a eʻi vano a lavia.”

<sup>16</sup> Ale Iesu mo vereā isana mara, “Mary!”

Mary mo posi mo vereā isana mara, “Rabbi!” Ale řaramin ‘rabbi’ enia ‘tija’ na leon tavitavin Israel.

<sup>17</sup> Iesu mo vereā isana mara, “O sopo tikeliau! Na sopo lo sahe isan Tata, pani o pa vereā isana noku tamlohi vara enau na lo sahe isan Tamaku enia noku God, ale enia nomim God, ale Tamamim.”

<sup>18</sup> Mary Magdalene mo mele hilu vano mo vereā isana nona tamlohi usuri vara mo hite Moli. Mo verera na sava Iesu mo vereā isana.

#### *Iesu Mo Pala Isara* (Mt 28.16-20; Mk 16.14-18; Lk 24.36-49)

<sup>19</sup> Nona tamlohi usuri la matahuni na tamlohi tatavera nona Jew, ale na ravravin rani atu la pelatihoro na lolo ima matea. Vahatea purongo Iesu mo pala na livuhara, mo vereā isara mara, “Tamata i toho isamim!” <sup>20</sup> Ale mo vujangira na limana peresi na rorona, ale nona tamlohi usuri la avulahi tavera matan la hite Moli.

<sup>21</sup> Iesu mo mele vereā isara mara, “Tamata i toho isamim, enau na lo řule kamim sohen Tama mo řuleau.” <sup>22</sup> Hitahun haratu Iesu mo soro na maromaronā isara mo vereā mara, “Ha lavi na Tanume Tapu! <sup>23</sup> Vara ha řomi tea na nona hehe, God i pa řomia, pani vara ha sopo řomi tea na nona hehe, God i pa sopo řomia.”

#### *Thomas Mo Hite Iesu*

<sup>24</sup> Hin rani atu Iesu mo pala isana nona tamlohi usuri, matea mo sopo toho peresira, enia Thomas la tovia ‘Havo’.

<sup>25</sup> Ale tatua tamlohi usuri tinapua la vereā isana lara, “Kama hite Moli!” Pani Thomas mara, “A pa rasua vara a hite na matara nila na limana, ale a majohoi na limaku na mataran sari atu mo lo unu na rorona.”

<sup>26</sup> Ale wik matea mo vano moiso, nona tamlohi usuri la lo mele pulutahi, pani nake Thomas mo lo toho peresira. La pelatihoro, pani Iesu mo pala mo turu na livuhara mo vereea mara, “Tamata i toho isamim!” <sup>27</sup> Ale mo vereea isan Thomas mara, “O tau na pisum nike, ale o kilau usuri na limaku. O majohoi na limam na roroku. O isoiso na nom ŋom rua o rasu!”

<sup>28</sup> Thomas mo ŋaramia mara, “Engko noku Moli, engko noku God!”

<sup>29</sup> Iesu mara, “Thomas, engko ko rasua matan ko hiteau purongo teni mo vono? La haratu la sopo hiteau na matara, pani la tau na nora rasua hiniau, enira natu, la pa avulahi tavera.”

### *Puku Nike*

<sup>30</sup> Iesu mo vai na matamata tavera matuvana tinapua na naho nona tamlohi usuri, pani enira mo isoiso la sopo ulira hin puku nike. <sup>31</sup> Pani na uli la haranike matan vara ha pa eŋi tau na nomim rasua hin Iesu vara enia Kŋristo atu, Natun God. Vara ha tau nomim rasua hinia ha pa lavi na mauri varaŋuhu.

## 21

### *Iesu Mo Pala Isara Galilee*

<sup>1</sup> Hitahun haratu, sorasora matan Iesu mo vano sohen harihi: Iesu mo mele pala isana nona tamlohi usuri na pahisa tasi sei la tovia Tiberias teni Galilee. <sup>2</sup> Simon Peter, Thomas la tovia ‘Havo’ enia Nathanael mara Cana atu Galilee la natun Zebedee, ale la vorai atu James enia John la lo toho atu peresi na nona tamlohi usuri mo rua tinapua. <sup>3</sup> Simon Peter mara, “Enau a sivo a tara maji!”

Tatuara lara, “Kama pa usuriho!” La vele na botira la sivo, pani hin vutepongi atu, la sopo tikeli te maji hatea.

<sup>4</sup> Mo mele rani sahe na ŋalavuho jea, Iesu mo lo turu na pahisa tasi, pani nona tamlohi usuri la sopo hitevosahia vara enia hare. <sup>5</sup> Iesu mo ulo mara, “La tapala, ka tikeli te maji teni mo vono?”

La ŋaramia lara, “Mo vono!”

<sup>6</sup> Ale mo vereea isara mara, “Ha tuhu na nomim tara na matua botimim, ale ha pa tikeli te maji!”

La vaia sohena, ale tara mo maŋivi na maji la sopo eŋi mele revea i unu na boti.

<sup>7</sup> Tamlohi usuri atu Iesu mo opoia, mo vereea isan Peter mara, “Eh, Moli sei!” Ale Simon Peter mara mo rongo vara Moli natu, mo mele ru na nona ruru sei mo lo talihia na pangena vara mo lo revereve, moiso mo kue na tasi. <sup>8</sup> La tamlohi usuri tinapua non Iesu atu na lolo boti la pa lo sua reve na tara mo maŋivi na maji mo lo usuri na boti na haŋina. Ale jara atu la lo toho hinia mo mariviti 100 metre asau na jarauta.

<sup>9</sup> Ale la hoso na jarauta, la hite te pereti ea, ale la hite te maji la lo toho na valaje hapu. <sup>10</sup> Iesu mo vereea isana nona tamlohi usuri mara, “Ha lavi te maji sei ka pa taraira nakerihi i sinai.” <sup>11</sup> Simon Peter mo mele vele na boti, ale mo reve hosohi na tara. Evi maji mo tikeli 153, ale maji tatavera nakonako, pani tara atu mo sopo maŋari.

<sup>12</sup> Iesu mo vereea mara, “Ha mai, ha hanhani!” Pani la matahu mo sopo te tamlohi usuri vonara hatea i usia vara enia hare matan la levosahia vara enia Moli. <sup>13</sup> Iesu mo lavi na pereti, ale mo asea isana nona tamlohi usuri, ale mo vaia sohena na maji. <sup>14</sup> Haranike enia hatolun nona pala isana nona tamlohi usuri hitahun rani atu, mo mele turu na nona mateia.

### *Iesu Enia Peter*

<sup>15</sup> Ale Iesu tolu na nona tamlohi lara la hanhani moiso, mo usia mara, “Simon natun John, engko ko opoiau mo jeu la tamlohi nike?”

Simon Peter mo ŋaramia mara, “He'e Moli, engko ko levosahia vara na opoiho.”

Iesu mara, “O vahani na pulaku natu sipsip!”

<sup>16</sup> Iesu mo mele usia vaha rua isan Peter mara, “Simon natun John, ko opoiau?”

Peter mo ŋaramia mara, “He'e Moli, ko levosahia vara na opoiho.”

Iesu mo řaramia mara, “O lo kilau na pulaku sipsip!”

<sup>17</sup> Iesu mo mele usia vaha tolu isan Peter mara, “Simon natun John, ko opoiau?”

Nake, Peter mo rongo mo sati matan Iesu mo usia vaha tolu isana vara mo opoia. Ale mo řaramia mara, “Moli, engko ko levosahi na hinai tari. Ko levosahia vara na opoiho.”

Iesu mo řaramia mara, “O vahani na pulaku sipsip.

<sup>18</sup> Vararūhu na vereho hinia, na pongi ko lo uluvou ko lo ruru hasem, ale ko lo vano na jara ko opoia, pani hin pongi atu vara o vajiaha, o pa sohai na limam, ale tamlohi tinapua la pa lihoho, ale la pa tiroma hiniho o vano na jara engko ko sopo opoia.”

<sup>19</sup> Iesu mo vereia matan vara i vereulia vara Peter i pa mate sohena sava, ale sohena sava nona mate i pa tahe na hijan God aulu. Hitahun haratu Iesu mo mele vereia isan Peter mara, “O usuriau!”

### *Iesu Mo Vujangi Peter*

<sup>20</sup> Peter mo posi mo kilau sivo mo hite tamlohi usuri atu Iesu mo opoia mo lo usurira. Enia pa nona tamlohi usuri atu sei mo lo sakele na tavalun Iesu na hanhani Passover, ale mo lo usia vara, “Tija, hare natu, i pa turuposi hiniho?” <sup>21</sup> Ale Peter mo hite nona tamlohi atu mo lo usurira, mo usi Iesu hinia mara, “Moli, enia i pa sohena sava?”

<sup>22</sup> Iesu mo řaramia mara, “Vara enau a opoia vara enia i mauri i tikeli pongi atu a mele mai, mo sopo te nom hinai hinia, pani engko o usuriau!”

<sup>23</sup> Ale sorasora atu la sorahia vara nona tamlohi usuri atu i pa sopo efi mate, pani Iesu mo sopo vereia vara i pa sopo mate, mo vono. Enia mo vereia purongo isan Peter mara, “Mo sopo te nom hinai hinia vara enau a opoia vara enia i mauri i tikeli pongi atu a mele mai.”

<sup>24</sup> Enau sei nona tamlohi usuri atu, ale enau natu na lo vereuli la hinai sei. Na lo ulira vara ha pa efi levosahia vara enau na lo vereulia ale la vararūhu.

<sup>25</sup> Iesu mo vai na hinai tinapua matuvana, pani vara la uli vevuhira na puku, i pa sopo te masapa na varama matara.



## Acts Vavahinau Non Tanume Tapu Puku Nike

Harihi enia tapala puku peresi na Retiruhu sei Luke mo ulia. Hinira Luke mo uli mamahuni na hinau tari Iesu mo lo vaira mo tikeli rani atu mo sahe na tuka (1.1–2). Na tapulo puku nike mariviti Iesu i pa sahe na tuka, ale mo retileu isana nona tamlohi mara la pa lo sasaovi Jerusalem mata Tanume Tapu (1.8).

Iesu mo sahe na tuka, ale vao kalesia la unu hin mauri atu God mo supe hinia na jara tari na varama hin pongi atu (2.1–35). Jew la lo romfomia lara enira hasera purongo la tamlohi non God, pani puku akerihi mo vujangia vara Tanumen God mo mai mata tamlohi roroha sohera.

Iesu mo pala isan Paul mata virohia vara i mai nona volitusi (9.1–22). Paul mo hahau mata lavi na Retiruhu i vano isana jara tamlohi roroha ale tamlohi matuvana la mai la kalesia matana. Jew la opoia vara la pa vilimateia, pani na isoisona Paul mo lavi na Retiruhu mo kakau Rome (28.16–31).

### Hin Puku Akerihi

1. Retiruhu Mo Ulua Jerusalem (1.1–8.3)
2. Tanumen Tapu Mo Jovi Hinira Judea Peresi Samaria (8.4–12.25)
3. Tiroma Hahau Non Paul (13.1–14.28)
4. Council Tavera Nona Kalesia Jerusalem (15.1–35)
5. Harua Hahau Non Paul (15.36–18.22)
6. Hatolu Hahau Non Paul (18.23–21.16)
7. La Taurilati Paul Jerusalem (21.17–23.22)
8. La Lavi Paul Mo Sivo Caesarea (23.23–26.32)
9. Paul Mo Sahe Rome (27.1–28.31)

### *Retitauhi Mata Tanume Tapu*

<sup>1</sup> Theophilus, na noku puku tiroma na uli na hinau tari Iesu mo tapulo vaira, ale mo lo vujangira <sup>2</sup> mo kakau

hin rani atu God mo lavi narihia, mo sahe aulu na tuka, sei tiromana mo sile na nona retileu hin Tanume Tapu isana nona vahaŕule sei mo viŕonira.

<sup>3</sup> Hitahun na nona rongohaji, mo mele hase vujangia isara vara mo mele mauri na malele tinatinapua matuvana hin la rani atu, mo ngavulu vati atu sei mo lo sorahi mauri atu God mo aulu hinia isara. <sup>4</sup> Tiroma sei mo pa lo toho peresira mo vereea mara, “Ha sopo malue Jerusalem pani ha lo saovi tako mata sava na pete vereea isamim moiso sei vara Tama i pa ŕule na Tanume Tapu, i mai isamim. <sup>5</sup> Matan John tamlohi paptijo mo paptijo na wai, pani i pa sopo tuai ha pa paptijo na Tanume Tapu.”

### *Iesu Mo Mele Sahe Na Tuka*

<sup>6</sup> Hin rani atu vahaŕule la lo toho peresi Iesu, tarea la lo usia isana lara, “Moli, engko o pa turu na nom suiha mata supe aulu hin Israel pangisa?”

<sup>7</sup> Iesu mo vereea isara mara, “Mo sopo tinarihia vara ha levosahi na ranin hinau sei Tama hasena mo taua usuri na masalona. <sup>8</sup> Pani kamim ha pa lavi na suiha hin rani atu vara Tanume Tapu i mai hin kamim, ale kamim ha pa noku tuetueni hin Jerusalem, na jara tari Judea, Samaria, i tikeli na isoiso jara tari na varama.”

<sup>9</sup> Hitahun la hinau atu mo lo vereea, ale lara la pa lo kilaua, palona mo tinarihi na lepa mo lo sahe aulu, ale telangi matea mo lavi narihia mo tihai na nahora, <sup>10</sup> ale la pa lo taŕa la lo taŕengia mo lo sahe na tuka, ale vahatea purongo, tamlohi mo rua la ru la ruru lulu jea la lo turu na pahisara, <sup>11</sup> ale la vereea lara, “Mara Galilee, mata sava ka lo turu nike, ka lo kilau sahe na tuka? Iesu akerihi sei God mo lavi narihia isamim, mo sahe na tuka, i pa mele sinai sohen harihi ka lo hitea mo lo sahe na tuka.”

### *Matthias Mo Lavi Na Jaran Judas*

<sup>12</sup> Hin rani atu hinau atu mo masese vahaŕule la lo toho na Vuti talu Olive mariviti kilometre matea hin Jerusalem, ale la mele hilu la

vano Jerusalem. <sup>13</sup> Ale lara la unu Jerusalem, la vele sahe aulu na jara tinapua matea hin ima atu sei la lo toho ea hin rani atu:

Peter

John

James

Andrew

Philip

Thomas

Bartholomew

Matthew

James natun Alphaeus

Simon sei, enia tamlohi matea mata valum mata jarana, peresi Judas natun James.

<sup>14</sup> Enira mo isoiso la tau na řomira mata usiusera jara matea tolu na hařai tinatinapua hai peresi Mary tinan Iesu tolu na tasin Iesu.

### *La Viřoni Matthias*

<sup>15</sup> Hin rani atu, Peter mo lo turu na livuhan la tamlohi rasua atu, ale vao atu mariviti i ngav sangavulu ngavulu rua (120)

la lo pulutahi hin jara atu, ale mo vereea isara mara, <sup>16</sup> “La vorai, sava Retitapu mo vereea vara i pa masese isan Judas, Tanume Tapu mo vereea tiroma moiso na jingon supe David mara, enia i pa tiroma hin la haratu la pa taurilati Iesu. <sup>17</sup> Matan enia mo viřonia peresiřa, ale enia vonařa matea na nořa vavahinau.

<sup>18</sup> Ale tamlohi akerihi mo voli na lepa matea na voli nona hehe. Mo vele mo sahe na pesapesa, ale mo jovi patuna mo tiroma mo vujahi řařihi na pangena, ale tinenari tari la mařava. <sup>19</sup> Mara Jerusalem tari la rongoa, ale la tau na hijan jara atu vara Akeldama: na leora mo vara, ‘Lepa Mata Rae’.

<sup>20</sup> Matan David mo ulia na nona puku na psalm mara, ‘Ha tinařihia vara jara nona toho i puru, ale i sopo tea i toho hinia’.

*Psa 69.25*  
Ale mo mele vereea mara, ‘Ha viřoni te tamlohi tinapua i lavi na jarana’. *Psa 109.8*

<sup>21</sup> Ale nakerihi, řa pa mele viřoni te tamlohi tinapua hatea vara i lavi na jaran Judas, enia i pa tamlohi matea mo lo toho peresiřa tarea hin rani atu

Moli Iesu mo lo toho peresiřa, <sup>22</sup> mo tapulo hin rani atu sei John tamlohi paptijo mo tapulo paptijo mo mai mo tikeli rani atu Iesu mo mele sahe na tuka – enia i pa vonařa matea sei mo hite na nona sauteterahi.”

<sup>23</sup> La vere na tupra rua, matea enia Joseph la tovia Barsabbas teni Justus, ale haruana enia Matthias. <sup>24</sup> Ale la usiusera lara, “Moli, engko ko levosahi na mapu tamlohi tari. O vujangi kamam hin haratu sei ko viřonia <sup>25</sup> vara enia i pa lavi na jaran Judas peresi na nona vavahinau, matan enia mo vano na nona talai.” <sup>26</sup> Ale la reve na hijara, ale mo jovi isan Matthias, ale Matthias mo mai vahařule matea peresi la haratu mo sangavulu řomana matea.

## 2

### *Tanume Tapu Mo Mai*

<sup>1</sup> Ranin Pentecost mo pala, la lo toho na jara matea enira mo isoiso.

<sup>2</sup> Ale vahatea purongo, la rongoa na hinia matea sohena langi tavera matea mo lo sere, ale mo mařivisi ima atu la lo sakele hinia. <sup>3</sup> Ale hinia hai sohena pepe hapu, la pala isara la sakele aulu na patura hatehateahi.

<sup>4</sup> Ale enira mo isoiso, Tanume Tapu mo sohonira, ale la tapulo retireti na leo tinatinapua sohen Tanumen God mo tinařihira hinia.

<sup>5</sup> Hin rani atu, Jew matuvana na jara tari na varama sei řomira mo řilangi mata nora rasua la lo toho atu Jerusalem. <sup>6</sup> Ale vaore tavera atu, mo vai na vao tamlohi la mai jara matea, ale la hutura matan enira hatehateahi la rongora la lo retireti na leora.

<sup>7</sup> Ale la hutura, la mařurahi tavera lara, “Avei, la tamlohi nika, la sopo mara Galilee nakonako? <sup>8</sup> Ale mata sava natu řa lo rongora la lo retireti na leo jarařa hatehateahi sei řa vora hinira? <sup>9</sup> Enřa mara Pathian, Medes, Elamite ale mara Mesopotamia, Judea, Cappadocia, Pontus, Asia, <sup>10</sup> Phrygia, Pamphylia, Egypt ale jara hai Libya na lolon Cyrene, ale hai la tai Rome. <sup>11</sup> Tatuara Jew, tatuara

enira la tamlohi řořoha sei la lo usuri Moses, ale mara Crete peresi na mara Arabia – řa rongora la lo retireti na leořa. La lo vere na vavahinau řuhu mata suiha non God.” <sup>12</sup> Ale enira mo isoiso, la mařurahi la hutura, la lo verevera hinia lara, “Matamata mata sava nahai?” <sup>13</sup> Pani tatuara la kerehira lara, “Hara sei, la drong na waen meji!”

### *Peter Mo Retivujavujangi*

<sup>14</sup> Ale Peter peresi la tupu san-gavulu řomana matea atu, la turu mai na nahora, ale mo ulo mo vereea isara mara, “Mara Judea, ale mara Jerusalem tari, ha tapurongo! Ha levosahi mamahuni hinia nika! <sup>15</sup> Matan la tamlohi nika la sopo drong sohen ka lo řomřomia, matan mo pa lo řalavaho purongo nahai.

<sup>16</sup> Pani hinia nika přovet Joel mo vereea moiso mara,

<sup>17</sup> ‘God mo vereea mara:

Na pongi hitahu, a pa surei na Tanumeku na tamlohi tari, ale natumim peresi na venatumim la pa retimangovi,

ale uluvoumim lamane la pa hite na hinia sohena mavuho a pa vujangia isara,

ale vajiahamim a pa silera na mavuho;

<sup>18</sup> hin pongi atu sohena,

a pa surei na Tanumeku isana noku slev lamane peresi na slev hařai,

ale la pa retimangovi.

<sup>19</sup> Ale a pa vujangi na matamata mařurahi tavera aulu na masapa,

ale matamata mata řae, hapu peresi na asu hapu atano na varama,

<sup>20</sup> ale alo i pa posi i mai i řořoha, majhi vitu i pa hahara sohena řae,

la pa pala tiroma hin rani atu Moli i pa mele mai,

rani tavera atu i pa řuhuřuhu jea.

<sup>21</sup> Ale rani matea i pa mai vara sava tamlohi la tau na nora rasu na hijan Moli la pa juri.’ ” *Joel* 2.28-32

<sup>22</sup> Ale Peter mo mele vereea mara, “Tavtavuin Israel, ha tapurongo! Iesu mara Nazareth, tamlohi matea God mo taua na nahomim, mo lo vai na vavahinau mata suiha, matamata řuhuřuhu tavera, peresi na matamata mařurahi sei God mo vaira na nahomim hin Iesu, sohen kamim mo isoiso ka levosahi mamahunia – <sup>23</sup> tamlohi atu, ka taua na lima tamlohi sasati, matan vara la pa vosaea na talopeilopei vara i mate, pani haratu mo pa lo usuri na řomřomi tavera non God, ale enia mo levosahia tiroma moiso vara i pa sohena. <sup>24</sup> Pani God mo sauteterahia, mo teria na liman mateia, matan mateia i pa sopo eři tauria na suihana. <sup>25</sup> Matan supe David mo retireti matana mara, ‘Tarea na lo hite Moli na nahoku, matan enia mo lo toho na matu-aku, enau a pa sopo hisu.

<sup>26</sup> Matan haratu mapuku mo avulahi, ale leoku mo uloulo na hasahasona!

Epeku i pa toho na liman řomtoho,

<sup>27</sup> matan engko God o pa sopo tinařihia vara a toho na varama mata mateia, teni vara o tinařihia vara nom tamlohi tapu i řovo na taptap.

<sup>28</sup> Engko ko vujangiau moiso na malele mata mauri; engko o pa vaiu a avulahi tavera na nahom.’ *Psa 16.8-11*

<sup>29</sup> La vorai, na levosahi mamahunia vara a eři vereea isamim, vara pua David mo mate ale la tavunia. Ale tapuna mo lo toho peresiřa mo kakau nake. <sup>30</sup> Matan David enia přovet matea, mo levosahia vara God mo vai na retitauhi matea peresia, vara mahapina matea, i pa sakele na nona jara sakele mata supe, <sup>31</sup> David mo hiteulia tiroma moiso, ale mo vereea mara Křisto i pa sauteterahi, ale vara i pa sopo taua vara i lo toho na varama mata mateia teni vara epena i řovo.

<sup>32</sup> Iesu sei, God mo sauteterahia na mateia, ale kamam mo isoiso kama hitea. <sup>33</sup> Nake, God mo tahea mo sahe

na matuana, vara i tauri na suiha tavera sei mo aulu jea mo jeu na tinapua na tuka, ale usuri na retitauhi non God Tama, mo lavi na Tanume Tapu, ale mo sureia hin kamam, sei ka lo rongoa ale ka lo hitea nakerihi.

<sup>34</sup> Matan David mo sopo lo sahe aulu na tuka, pani enia mo vereea mara, 'Moli, mo vereea isan noku Moli:

O sakele na matuaku,

<sup>35</sup> i tikeli rani atu a vai na nom meresahi, la toho na ruhuruhu palom.' *Psa 110.1\**

<sup>36</sup> Matan haratu, mo řuhu vara tamlohi tari Israel la levosahi mamahunia vara God mo vaia mo mai Moli! Ale mo vaia mo mai Křisto, pa Iesu atu sei ka lo vosaea na talopeilopei!"

<sup>37</sup> Lara la rongoa na nona reti, řomira la jovi vahatea. Ale la vereea isan Peter tolu na vahařule tari atu lara, "La vorai, kama pa vai na sava?"

<sup>38</sup> Ale Peter mo vereea isara mara, "Ha posi! Ale ha paptijo kamim mo isoiso na hijan Iesu Křisto, matan vara God i řomi na nomim hehe! Ale i pa sile purongoi kamim na Tanume Tapu. <sup>39</sup> Matan retitauhi nike, enia nomim peresi na natumim, ale nona tamlohi tari sei la lo toho asau řove, tamlohi mo isoiso sei Moli nořa God i pa tovira vara la mai isana." <sup>40</sup> Ale Peter mo mele vujan-gira vavano, mo vereea řilangi isara mara, "Ha juri kamim hasemim hin pina lejileji nike!"

<sup>41</sup> Ale evin la haratu sei la rasu na nona reti moiso la paptijo hin rani atu, la mai kalesia korong mariviti tari vaha tolu (3000). <sup>42</sup> Ale la hase taura na vujangi nona vahařule, ale la matavuhi mata hanhani tapu peresi na usiusi.

### *Kalesia La Tapulo Matavuhi Jara Matea*

<sup>43</sup> Ale matahu tavera mo sohoni na tamlohi tari matan vahařule la vai na hina mařurahi tavera matuvana peresi na matamata tavera. <sup>44</sup> Ale tarea, tamlohi rasua tari la lo pulutahi jara matea, ale hinu tari enia

nora enira mo isoiso. <sup>45</sup> Ale la lo ařehi na jarara peresi na nora hinahinai, ale la lo asera isan la haratu la vejuveju hin te hinai. <sup>46</sup> Ale na rani hatehateahi, la lo matavuhi na Temple, ale la lo lavi na hanhani tapu na lolo imara, ale na nora hanhani la vaia na avulahi peresi na hansohai. <sup>47</sup> La hasohaso God, ale tamlohi tari la avulahi hinira. Ale na rani hatehateahi tamlohi tinatinapu sei Moli mo jurira, la lo pulutahi peresira.

## 3

### *Tamlohi Hariju Matea*

<sup>1</sup> Peter enia John la lo sahe na Temple na rani mata usiusi na matan alo mo tolu na ravravi. <sup>2</sup> Ale tamlohi hai, la lavi na tamlohi matea mo vora mo hariju moiso. La lavia matan vara la pa mele taua i juruvi sohen tarea na pahisa matarua matea na ropen Temple atu sei la tovia 'Matarua Ruhufuhu' vara i mele usi na mania isan la haratu la lo unu na Temple ea. <sup>3</sup> Mara mo hite Peter peresi John la lo unu na Temple, mo usi na mania isara.

<sup>4</sup> Ale Peter mo kilau tataholo sivo isana, ale John sohena mo vaia ale Peter mara, "O kilau kamam." <sup>5</sup> Ale tamlohi hariju atu mo tařengira matan mo lo řomřomia mara la pa sile te hinu isana. <sup>6</sup> Pani Peter mo vereea mara, "Mo sopo te noku silver teni gold, pani sava enia noku, a pa silea isam na hijan Iesu Křisto mara Nazareth. O turu o hahau!"

<sup>7</sup> Ale Peter mo sohai na matua li mana mo tauria mo sau, ale vahatea purongo, varango palona peresi na jue palona la řilangi. <sup>8</sup> Ale mo kue mo sahe aulu mo turu, ale mo tapulo hahau řalihi na palona, ale mo usurira la unu na lolo rope Temple. Mo lo hahau, mo lo kuekue ale mo lo hasohaso God.

<sup>9</sup> Ale tamlohi mo isoiso la hitea mo lo hahau mo lo hasohaso God, <sup>10</sup> ale la hitevosahia vara enia natu pa tamlohi atu sei mo lo sakele na 'Matarua Ruhufuhu' mata Temple tarea mo lo usi na mania. Ale la mařurahi tavera

\* **2:35:** ruhuruhu palom: Iesu mo lavi na suiha tavera mo aulu jea hinira.

na sava mo masese isana. <sup>11</sup> Mara mo pa lo keho hin Peter enia John, tamlohi tari la maro la mai isara hin jara atu sei la tovia Palapalan Solomon, ale la hutura tavera hinia.

### *Peter Mo Retivujavujangi Na Temple*

<sup>12</sup> Ale Peter mara mo hitera la lo mai mo vereea isara mara, "Tavtavin Israel, mata sava ka hutu kamim hin hinou nika, teni mata sava ka lo varoi kamam sohena, vara kama vai tamlohi akerihi mo mele hahau na nomam suiha teni matan nomam posposi tataholo?" <sup>13</sup> God non Abraham, God non Isaac, God non Jacob, God non noŋa pua, mo tahe nona volitusi sei Iesu, hara sei ka taua na liman noŋa tamlohi aulu, ale ka ŋohu hinia na nahon Pilate hin rani atu mo opoia vara i teria. <sup>14</sup> Pani kamim, ka tipahi haratu sei mo tapu mo tataholo jea, ale ka usi Pilate vara i sile kamim na tamlohi vilimatei na tamlohi matea. <sup>15</sup> Ale ka vilimatei haratu enia pulo mauri, hara sei God mo sauteterahia na mateia. Hinou sei kamam kama hitea na matamam.

<sup>16</sup> Ale tamlohi akerihi ka hitea ale ka levosahia, kama lo vereea vara nona rasua na hijan Iesu natu mo vaia mo ŋilangi. Rasua atu hin Iesu mo vai mamahuni na epena na nahomim mo isoiso.

<sup>17</sup> Ale la vorai, na levosahia vara ka sopo levosahi na sava ka vaira, sohen nomim tamlohi aulu la vaira. <sup>18</sup> Pani sava God mo vereea tiroma moiso na jingo pŋovet tari, sei vara nona Kŋristo i pa lavi na rongohaji sohena sava ale mo maŋivisia. <sup>19</sup> Matan haratu, ha posi, ale ha posi mai isan God matan vara i jarai naŋihi na nomim hehe, <sup>20</sup> matan vara rani ŋuhuŋuhu mata suiha paro la mai isamim la tai na nahon Moli, ale i pa mele ŋule Iesu vara i mele mai isamim sei God mo viŋonia vara i nomim Kŋristo, <sup>21</sup> enia i pa toho na tuka i tikeli rani atu God i mele vai tataholoi na hinou tari sohen mo vereea na reti nona pŋovet tuai moiso. <sup>22</sup> Moses mara, 'Moli God i pa tahe na nomim pŋovet matea na voraimim soheku. Ha pa tapurongo na hinou tari i pa vereea isamim.' *Deut 18.15*

<sup>23</sup> Ale mo mele vereea mara, 'Tamlohi tari sei la ŋohu vara la oloolo hin pŋovet atu God i pa langahi naŋihira na nona tamlohi ale i pa vilimateira.' *Deut 18.18-19*

<sup>24</sup> Ale pŋovet tari sei la sile na nora retireti, mo tapulo isan Samuel peresi la haratu la pa mai hitahuna, enira sohena la pete retivujavujangi hin la rani nika moiso. <sup>25</sup> Kamim, ka natun la pŋovet atu tuai, ale ka natun retitauhi atu God mo vaia peresi na nomim pua, sei mo vereea isan Abraham mara, 'Ale na mahapim, vao tamlohi tari na varama la pa avulahi tavera hinia'. *Gen 22.18; 26.4*

<sup>26</sup> Hin rani atu God mo sauteterahi nona volitusi mo ŋulea mo mai isamim tiroma tavtavin Israel, matan vara i leŋuhu hin kamim i vai kamim ha posi na nomim posposi hehe."

## 4

### *Peter Enia John Na Naho Council Jerusalem*

<sup>1</sup> Ale Peter enia John la pa lo retireti isana tamlohi, pŋis peresi na patu tamlohi nona police mata Temple peresi na Sadducee hai la mai isara. <sup>2</sup> La lolokoru tavera hinira matan la lo vujangi na tamlohi, ale matan la lo retivujavujangia vara God mo sauteterahi Iesu na mateia. <sup>3</sup> Ale la taurilatira, la taura na ima ŋilangi mo tikeli na rani tinapua matan mo pete ravravi moiso. <sup>4</sup> Pani tamlohi matuvana hin la haratu la lo tapurongo isara, la rasua. Ale evin la tamlohi atu mariviti i tari vaha lima (5000). <sup>5</sup> Ale mo mele rani sahe, nora tamlohi aulu peresi na vajiahara peresi na tamlohi vujangi mata leu, la matavuhi jara matea Jerusalem, <sup>6</sup> peresi Annas sei pŋis aulu, ale Caiaphas, John, Alexander ale tamlohi tari sei la tai na vaon pŋis aulu. <sup>7</sup> Ale la vaira la turu na livuhara, ale la tapulo usira lara, "Ka vai hinou atu na sava suiha teni na hijan hare?"

<sup>8</sup> Ale Tanume Tapu mo sohoni Peter mo vereea isara mara, "Tamlohi aulu peresi na vajiaha; <sup>9</sup> vara ka lo usi kamam vara kama vai na hina ŋuhu

isan tamlohi hariju nike sohena sava,  
<sup>10</sup> ale a pa vere a i mera i řuhu isamim  
 tari, ale isana tamlohi tari Israel, vara  
 tamlohi nike mo řuhu na hija peresi  
 na suihan Iesu Křisto mara Nazareth  
 sei ka lo vosaea na talopeilopei, pani  
 God mo sauteterahia na mateia.

<sup>11</sup> Iesu akerihi natu enia,

‘Vatu atu kamim tamlohi voro ima ka  
 tipahia, enia mo mai pulo vatu  
 mata ima.’ *Psa 118.22*

<sup>12</sup> Ale mo sopo mele te malele tina-  
 pua vara tea i eři juri hinia matan mo  
 sopo mele te hija tinapua na varama  
 vara God mo silea vara tamlohi la pa  
 juri hinia.”

<sup>13</sup> Ale lara la hite na turu řilangi  
 non Peter enia John, la mařurahi  
 tavera matan la levosahia vara  
 la tamlohi nike la sopo lavi te  
 lelevosahi isara, ale la vara enira  
 la tamlohi purongo purongo, ale la  
 pa hitevosahia vara enira la lo toho  
 peresi Iesu tiroma. <sup>14</sup> Pani lara la hite  
 tamlohi atu sei mo mele řuhu mo lo  
 turu na pahisara, la sopo eři mele  
 vere te hinau sati vano isara. <sup>15</sup> Ale  
 lara la retileu vara la malue na nora  
 matavuhi, ale la tapulo sorasorahia  
 isara — <sup>16</sup> lara, “Ra pa vai na sava  
 isan la tamlohi nike? Matan la vai  
 na matamata tavera matea na naho  
 tamlohi tari Jerusalem, ale řa sopo  
 eři vunvunia. <sup>17</sup> Pani matan vara řa  
 opoia vara řa horora vara la sopo  
 mele retivujavujangia isana tamlohi,  
 řa pa retiřoařoahaira vara la sopo  
 mele vujangi hin Iesu isan tea.” <sup>18</sup> Ale  
 la tovira la mele mai la turu na  
 nahora, ale la silera na reti řilangi  
 matea vara la sopo mele retireti teni  
 la vujangi na hijan Iesu.

<sup>19</sup> Pani Peter peresi John la  
 řaramira lara, “Vara ka hitea mo  
 tataholo vara kama ololo hin  
 kamim, pani mo sopo hin God, ha  
 to kilausuria; <sup>20</sup> matan kama sopo  
 eři isoiso na nomam retireti na sava  
 hina řuhu kama hitea, ale na sava  
 kama rongoa moiso.”

<sup>21</sup> Matavuhi atu la mele sile na  
 reti řilangi tinapua hai isara, pani  
 la tinařihira la malue matan la sopo

levosahia vara la pa sile na talai is-  
 ara sohena sava matan vara la vaia  
 vao tamlohi atu la pa lolokoru matan  
 la lo hasohaso God matan mata-  
 mata tavera atu. <sup>22</sup> Matan matamata  
 tavera atu mo masese hin tamlohi  
 atu mo hariju mata tauni mo jeu mo  
 ngavulu vati moiso.

### *Kalesia La Usiusi Isan Moli God*

<sup>23</sup> Peter enia John lara la malue  
 isara, la mele vano na vaora mata  
 tamlohi rasua, ale la verera na hinau  
 tari sei la přis aulu atu peresi na  
 vajiahara la vere a isara. <sup>24</sup> Lara la  
 rongo la hinau atu, enira mo isoiso  
 la tahe na leora, la usiusi isan God  
 na řomřomi matea purongo ale lara,  
 “Moli aulu na hinau tari, engko ko  
 vai na tuka peresi na varama, na tasi  
 ale hinau tari sei la lo toho na lolora.  
<sup>25</sup> ko vere a tuai na Tanume Tapu na  
 retireti non nom volitusi supe David  
 nomam pua vara,

‘Mata sava tamlohi řořoha la lo  
 lolokoru patura,  
 ale mata sava tamlohi la lo hati-  
 hia vara la pa vai na hinau ron-  
 gorongo vono?’

<sup>26</sup> Matan supe mata varama la turu  
 jara matea,  
 ale tamlohi aulu la matavuhi  
 jara matea,  
 matan vara la turuleji hin Moli God  
 peresi na nona Křisto.’ *Psa*  
*2.1-2*

<sup>27</sup> Matan Herod enia Pontius Pi-  
 late, peresi na tamlohi řořoha, peresi  
 na tavitavin Israel la matavuhi jara  
 matea hin taon tavera nike, la tu-  
 ruleji hin nom volitusi tapu Iesu,  
 haratu ko viřonia mata juri na tam-  
 lohi. <sup>28</sup> Varařuhu hinau tari la masese  
 usuri na masalom, peresi na nom  
 řomřomi tavera sei ko taua vara i  
 pa sohena tiroma moiso. <sup>29</sup> Ale  
 nake Moli, o tapurongo na nora re-  
 tireti leji, ale o vai na nom volitusi  
 la vere na nom retisohai i sopo te  
 matahu hinira, <sup>30</sup> ale o sohai na suiha  
 mata vai na rojoa i tihai, ale vara  
 matamata tavera peresi na hinau  
 mařurahi la pala na hijan nom voli-  
 tusi tapu Iesu.”

<sup>31</sup> La usiusi mo isoiso, ale jara atu sei la lo matavuhi ea mo hutehi, ale enira mo isoiso Tanume Tapu mo sohonira, ale mo tapulo hin rani atu mo vano, la retivujavujangi na retiso-hai non God, ale mo sopo te matahu hinira.

### *Kalesia La Tuetuenira Hasera*

<sup>32</sup> Vao tamlohi rasua atu ŗomira mo matea purongo, ale mo sopo tea isara i eŗi vereea vara nona hinau enia nona hasena, pani nora hinau tari enira nora mo isoiso. <sup>33</sup> Retivujavujangi non la vahaŗule atu mata sauteterahi non Moli Iesu mo suiha. Ale God mo leŗuhu hinira mo isoiso mo tavera jea <sup>34</sup> matan mo sopo tea isara i vejuveju hin te hinau, matan la haratu sei nora lepa teni imara, la aŗehira ale la lavi na volira, <sup>35</sup> moiso la taura na lima vahaŗule, moiso la asera isan la haratu la vejuveju hin te hinau.

<sup>36</sup> Ale vonara matea enia Joseph, tapala hijana vahaŗule la silea isana enia Barnabas, ŗaramin hija sei enia ‘Tamlohi mata Retituetueni’, enia mara Cyprus matea mo tai na vao Levi na tavitavin Israel. <sup>37</sup> Ale mo aŗehi na nona lepa matea, ale mo lavi na volina mo mai mo silea isana vahaŗule.

## 5

### *Ananias Enia Sapphira*

<sup>1</sup> Tamlohi tinapua matea sohena hijana Ananias peresi narouna Sapphira, la aŗehi na nora hinahinau. <sup>2</sup> Ananias mo taurilati na sope volin la nora hinau atu sei la lo aŗehira, ale narouna mo levosahia. Enia mo lavi na sopena mo silea isana vahaŗule, ale mo vereea mara volina enira mo isoiso natu.

<sup>3</sup> Pani Peter mo vereea mara, ‘Ananias, mata sava ko tinaŗihi Setan mo sohoni na mapum mo vaiho ko halu Tanume Tapu moiso ko taurilati na sope voli lepa vara nom hasem? <sup>4</sup> Ko sopo lo aŗehia enia nom teni mo vono? Ale kora ko aŗehia moiso volina mo lo toho na limam vara o pa silea teni mo vono? Mata sava ko ŗomŗomia vara o vai na hinau matea

sohen harihi? Ko sopo halu kamam, pani ko lo halu God!’

<sup>5</sup> Ananias mara mo rongo la reti atu, mo jovi sivo na lepa mo mate. Ale matahu mo sohoni enira mo isoiso sei la rongo hinau atu. <sup>6</sup> Ale uluvou hai la mai, la tatavua ale la alialia la vano la tavunia.

<sup>7</sup> Ale aoa mo tolu mo vano moiso, narouna mo pete pala mo unu pani mo sopo levosahi te hinau na sava mo masese moiso. <sup>8</sup> Peter mo vereea isana mara, ‘O to vereea hinia, vara volin lepa atu enira mo isoiso nakerihi natu teni mo vono?’

Sapphira mara, ‘He'e, volina natu.’

<sup>9</sup> Ale Peter mo vereea isana mara, ‘Mata sava kamim tupra rua ka hatihia vara ha pa vaihite na Tanumen Moli? O to kilau sahe, la tamlohi atu sei la lo tavuni tuam la lo mele mai, ale nakerihi sohena la pa pete alialiho!’

<sup>10</sup> Vahatea purongo, mo jovi na palon Peter mo mate. Ale la uluvou atu lara la unu na lolo ima la hitea, la alialia la vano la tavunia na pahisan tuana. <sup>11</sup> Matahu tavera mo sohoni na vao kalesia tari peresi na tamlohi tari sei la lo rongo hinau atu sei mo masese.

### *Vahaŗule La Vai Na Rojoa La Tihai*

<sup>12</sup> Matamata tavera matuvana peresi na hinau maŗurahi la pala na liman la vahaŗule atu na naho tamlohi. Ale enira mo isoiso la lo matavuhi jara matea na Palapalan Solomon. <sup>13</sup> Ale la haratu la sopo lo toho na lolo vaora, la matahu tavera vara la pulutahi peresira, pani tamlohi la sile na ololo tavera isara. <sup>14</sup> Ale rani hatehateahi, tamlohi la lo tau na nora rasua hin Moli, vao haŗai peresi na vao tamlohi la lo mai. <sup>15</sup> Ale tamlohi la lo tau na nora tamlohi rojoa na pahisa malele, la taura na vata teni na epa matan vara ŗoŗon Peter purongo i eŗi tikeli na epen te tatuara ale nora rojoa la tihai, vara i hahau i lo vano. <sup>16</sup> Vao tamlohi la lo tai na vanua varihi ŗalihi Jerusalem la lo lavi na nora tamlohi rojoa peresi la haratu tanume sasati mo sohonira la mai isara, ale enira mo isoiso nora rojoa la tihai.

### *La Taurilati Na Vahaʻule*

<sup>17</sup> Ale pʻris aulu peresi la haratu la lo toho peresia enira Sadducee, ale enira la maʻivi na mereimerei, ale mo vaira la lolokoru. <sup>18</sup> La taurilati la vahaʻule atu, la taura na ima ʻrilangi. <sup>19</sup> Pani hin vutepongi atu, angelo non Moli matea mo sinai mo roi na pelatin ima ʻrilangi atu mo tiro-mara la malue, ale mo vereia isara mara, <sup>20</sup> “Ha vano, ale ha turu na lolo rope Temple, ale ha retivujavujangi na tamlohi na retisohai hin mauri nike!” <sup>21</sup> Ale lara la rongoa sohena, la vano la unu na rope Temple mo pa lo ʻrari na rani ale la tapulo vujangi.

Ale pʻris aulu peresi la haratu la lo toho peresia la pala na Temple, la tovi na council tavera nona tavgavuin Israel sei la tovia Sanhedrin matan vara la pa sakele. Ale la ʻrule na tamlohi hai la vano na ima ʻrilangi vara la lavi la vahaʻule atu la mai isara. <sup>22</sup> Pani police mata Temple lara la pala na ima ʻrilangi, la sopo hitera, ale la mele hilu la vano la vereulia isara lara, <sup>23</sup> “Kama hite na ima ʻrilangi mo pa lo loko mo ʻruhu, ale tamlohi kilau na ima ʻrilangi la lo turu na nora pelati, pani kamara kama roira, kama sopo hite tea na lolora.”

<sup>24</sup> Tamlohi tavera nona police mata Temple peresi na moli nona pʻris lara la rongoa sohena, la hutura tavera hinia matan la sopo levosahia vara i pa isoiso epu. <sup>25</sup> Pani tamlohi matea mo mai mo vereulia isara mara, “Eh! La tamlohi atu ka lo taura na ima ʻrilangi enira nahai la lo turu na lolo rope Temple, la lo vujangi na tamlohi!”

<sup>26</sup> Ale tamlohi tavera nona police mata Temple peresi na nona police, la vano la lavi malumira la mai matan la matahu vara tamlohi la pa parura vara la vai na hinau ʻrilangi isara.

<sup>27</sup> La lavira la mai la vaira la turu na nahon nora council tavera, ale pʻris aulu mo usi na retusia isara <sup>28</sup> mara, “Kama retihoro kamim moiso vara ha sopo mele retivujavujangi na hian tamlohi atu. Ka hitea, nake

Jerusalem mo maʻivi na nomim vujangi, ale ka opoia vara ha tau na ʻraen tamlohi nike isamam!”

<sup>29</sup> Pani Peter peresi na vahaʻule la ʻraramia lara, “Kama pa ololo hin God hasena, mo sopo na tamlohi. <sup>30</sup> God non noʻa pua tuai mo sauteterahi Iesu na mateia, mo vaia hitahu hin la rani atu sei ka vilimateia ka vosaea na talopeilopei. <sup>31</sup> God mo tahea aulu na matuana mo vaia mo pulon mauri nike ale Jujuri matan vara i sile na masapa isan Israel vara la posi, ale i ʻromi na nora hehe. <sup>32</sup> Kamam kama hite vevuhi la hinau nike, ale Tanume Tapu sei God mo silea isan la haratu la lo ololo hinia enia sohen mo hitea.”

<sup>33</sup> Lara la rongoa sohena la lolokoru patura, ale la opoia vara la vilimateira. <sup>34</sup> Pani Pharisee matea hijana Gamaliel, enia tamlohi vujangi mata leu matea. Tamlohi la lo sile na ololo isana matan la opoia, mo turu na naho council ale mo vereia vara la tau naʻihira na jingoima tako. <sup>35</sup> Moiso mo vereia isan council atu mara, “La tavgavuin Israel, mo ʻruhu vara ʻra lo kilau i ʻruhu na sava ʻra opoia vara ʻra vaia isan la tamlohi nike. <sup>36</sup> Matan tauni mo visa mo vano moiso nahai, Theudas mo turu mo vereia mara enia tamlohi tavera matea, ale korong tamlohi mo ngavulu sangavulu vati <sup>(400)</sup>

la usuria. Pani hitahuna hai la vilimateia ale nona tamlohi la taskara, ale nona ʻromʻromi atu mo mai hina purongo. <sup>37</sup> Ale hitahun haratu mara Galilee matea hijana Judas, mo turu hin rani atu la lo evi na tamlohi, ale mo vai na tamlohi la lo usuria mata valum. Enia sohena mo mate, ale nona tamlohi usuri tari la taskara.

<sup>38</sup> Ale matan haratu, noku retituetueni isamim enia mo sohen harihi: vara ha toho asau hinira ha tinarihira, matan vara ʻromʻromi sei la lo vujangia teni hinau sei la lo vaia mo tai isana tamlohi purongo i pa mele mai hina purongo, <sup>39</sup> pani vara mo tai isan God, ha sopo eʻi horora, vara i vono ha pa hiteulia vara ka lo valum peresi God.” Ale la tatauri na nona ʻromʻromi, <sup>40</sup> ale



la mele tovi na vahaʻule la mele unu, ale la tamajira, moiso la vereā isara vara la pa sopo mele retireti na hijan Iesu, ale la tinaʻihira. <sup>41</sup> La vahaʻule atu, la malue hin matavuhi tavera atu. La avulahi matan God mo hitea vara mo tataholo vara la lavi na rani ʻilangi mata hijan Iesu. <sup>42</sup> Ale na rani hatehateahi na lolo Temple peresi na imara, la lo vujangi ale la retivujavujangi na Retiʻuhu vara Iesu enia Kʻristo atu tamlohi la lo kilau matana.

## 6

### *Deacon Mo Limaravrua*

<sup>1</sup> Hin rani atu evi tamlohi usuri non Iesu mo lo ulua, ale retireti matea mo malue isana Jew sei la retireti na leo mara Greek. Ale la sopo avulahi na Jew sei la lo retireti na leon tavitavin Israel, matan tarea vara la ase na hanhani nora malepu la sopo lavi tea. <sup>2</sup> Ale la tupu sangavulu ʻromana mo rua atu la tovi matavuhi na tamlohi usuri la mai, ale lara, “Mo sopo tataholo vara kama tinaʻihi na vujangi mata reti non God mata kilau na hamim hināu. <sup>3</sup> Pani ha viʻoni mamahuni te vorai kalesia i limaravrua isamim tamlohi tari sei ka levosahia vara Tanume Tapu peresi na lelevosahi mo maʻivi hinira, ale ʻa pa taura la aulu hin la hināu sei. <sup>4</sup> Pani kamam kama pa tau na ʻomimam tari mata ususi, ale na vavahināu mata Retiʻuhu.”

<sup>5</sup> Tamlohi tari la avulahi hin ʻomʻomi atu, ale la viʻoni Stephen, tamlohi matea sei mo jea na nona rasua ale Tanume Tapu mo maʻivisia, la viʻoni Philip, Prochorus, Nicanor, Timon, Parmenas peresi Nicolaus mara Antioch matea enia tamlohi ʻoʻoʻoha matea pani mo usuri na nora rasua, moiso mo posi mo mai tamlohi kalesia matea. <sup>6</sup> La vao atu la vaira la turu na naho vahaʻule, ale la vahaʻule atu la tau na limara hinira, ale la ususi matara.

<sup>7</sup> Reti non God mo lo vano, ale evi tamlohi usuri Jerusalem mo lo sahe aulu jea. Ale vao tavera matea mata pʻis la lavi pa rasua atu ale la ololo hinia.

<sup>8</sup> Stephen, tamlohi matea sei mo maʻivi na hina ʻuhuhuhu peresi na suiha God mo silea isana, mo vai na matamata tavera na naho tamlohi. <sup>9</sup> Pani tamlohi hai Jew na vao matea la tovia ‘Ima Lotu Nona Tamlohi Materi’. Hai la mara Cyrene, mara Alexandria, tatuara la tai Cilia peresi Asia, la turu la vasi peresi Stephen. <sup>10</sup> Pani la sopo eʻi retihoro na lelevosahi sei Tanume Tapu mo silea isana vara mo retireti.

<sup>11</sup> Ale la haluhalu na tamlohi hai vara la vere te hināu halu hin Stephen lara, “Kama rongoa mo retisati hin Moʻses enia God.” <sup>12</sup> La halu na tamlohi, peresi na vajiahara tolu na tamlohi vujangi mata leu, moiso la mai isan Stephen, la tauria ale la vaia mo turu na naho council. <sup>13</sup> Pa la tuetueni halu atu lara, “Tarea tamlohi nike mo lo retisati hin jara tapu nike peresi na leu. <sup>14</sup> Matan kama rongoa mo vereā mara Iesu mara Nazareth i pa komo jara nike, ale mo posi na posposi sei Moses mo lo silea mo sinai mo kakauʻa nake.” <sup>15</sup> Tamlohi tari hin matavuhi atu sei la lo sakele atu, la hite na nahon Stephen mo posi sohena naho angelo matea.

## 7

### *Stephen Mo Sile Na Nona Reti*

<sup>1</sup> Ale pʻis aulu mo vereā isan Stephen mara, “La hināu atu la varaʻuhu?”

<sup>2</sup> Ale Stephen mara, “La vorai peresi na vajiaha, ha tapurongo na noku reti. God mata mera tavera mo pala isan noʻa pua Abraham hin rani atu mo lo toho Mesopotamia, moiso mo pa vano mo toho Haran, <sup>3</sup> ale mo vereā isana mara, ‘O malue na jaram peresi na tahisam, ale o vano na jara matea enāu a pa vujangia isam.’ *Gen 12.1*

<sup>4</sup> Ale mo malue na jara mara Chaldea, mo vano mo lo toho Haran. Hitahu, tamana mo mate, ale God mo tinaʻihia atu mo taua hin jara nike nake ʻa lo toho hinia. <sup>5</sup> Pani mo sopo sile te tavaluna hatelete isana sohena koruna, pani mo retitauhi isana vara

i pa silea isana sohena nona peresi na taniana sei la pa usuria, hina purongo vara mo sopo te natuna.

<sup>6</sup> Pani God mo mele retireti isana sohen harihi mara, 'Mahapim la pa vinano na jara tamlohi tinapua, ale tamlohi hin jara atu la pa vaira la slev, la pa vailejlejira mata tauni i ngavulu sangavulu vati. <sup>7</sup> Pani a pa sile na talai isan la haratu la lo slev nora, *Gen 15.13-14* moiso hitahu la pa malue hin jara atu la mai la lotuau nike.'

*Exo 3.12* <sup>8</sup> Ale mo sile Abraham na retitauhi mata taiřalihi, ale Abraham mo mai taman Isaac, ale mo taiřalihia na halimaravtolu rani nona vora, ale Isaac mo mai taman Jacob, ale Jacob enia taman la pua atu tupu sangavulu řomana mo rua.

<sup>9</sup> Ale la pua atu, la mereimerei hin Joseph, la ařhia mo sivo Egypt; pani God mo lo toho peresia <sup>10</sup> matan vara i pa juria na nona rani řilangi tari, ale i tuenia na lelevosahi na nahon Pharaoh, supe non Egypt matan vara Pharaoh i avulahi hinia ale mo tahea vara i aulu Egypt peresi na hinu tari nona.

<sup>11</sup> Hin rani atu marua taverna matea mo vili na jara tari Egypt peresi Canaan na rani řilangi. Ale nořa pua la sopo eři hite te hanhani. <sup>12</sup> Pani na rani Jacob mo rongoa vara hanhani mo lo toho Egypt, mo řule na nořa pua la sivo, harihi enia nora tiroma hahau hin jara atu. <sup>13</sup> Ale na nora harua hahau la sivo atu, Joseph mo hase vuhesia isana voraina, ale Pharaoh mo pa levosahi na vaon Joseph natu. <sup>14</sup> Moiso Joseph mo řulera la mele sahe, ale la usi Jacob tamana peresi na tamlohi tari na ruhuruhuna sei enira mo isoiso mo ngavulu limaravrua mo lima vara la sinai. <sup>15</sup> Ale Jacob mo sivo Egypt mo pa mate atu, enia peresi na nořa pua, <sup>16</sup> ale la lavi na suira la sahe la taura Shechem na papa sei Abraham mo volia isan natun Hamor atu Shechem.

<sup>17</sup> Pani rani mata retitauhi non God sei mo silea isan Abraham mo mai mariviti, taniaan Abraham la marivi jea Egypt, <sup>18</sup> mo tikeli rani atu supe

tinapua matea mo tauri na suiha Egypt, ale enia mo sopo opoia vara i levosahi na mahapin Joseph. <sup>19</sup> Mo haluhalu na tahisařa, ale mo vere na nořa pua vara la tau na natura la toho hasera na jara taverna matea matan vara la pa mate ea.

<sup>20</sup> Hin rani atu Moses mo vora, God mo avulahi hinia. Ale tamana la jariohia na ima mata vitu mo tolu, <sup>21</sup> ale hin rani atu la lavia mo pala na jara taverna venatun Pharaoh mo tapaia mo korohia sohena natuna. <sup>22</sup> Ale la vujangia na lelevosahi tari nona mara Egypt, ale enia mo mai tamlohi řuhu matea mata retireti peresi na nona vavahinau.

<sup>23</sup> Na rani taunina mo ngavulu vati, řomina mo mai vara i vano i hite na tasina, mahapin Israel. <sup>24</sup> Moses mara mo hite na mara Egypt matea mo lo vailejleji na tahisana matea, mo tueni tahisana atu mo vilimatei pa mara Egypt atu. <sup>25</sup> Moses mo lo řomřomia vara tahisana la pa hitevosahia vara God mo řulea mo mai isara vara i jurira, pani la sopo hitevosahi na sava mo lo vaia.

<sup>26</sup> Ale mo mele rani sahe mo mele pala, ale mo hite na tamlohi tavitavin Israel mo rua la lo vasvasi, ale mo vaihitea vara i tau na tamata isara mara, 'La tapala, kamim vorai matea purongo, mata sava ka lo vailejleji kamim?'

<sup>27</sup> Pani tamlohi atu sei mo lo vailejleji na tahisana purongo, mo sohai nařihi Moses, ale mo vere mara, 'Hare mo vaiho ko aulu vara o eři ari kamam? <sup>28</sup> Ko opoia vara o mele viliau sohen ko vili mara Egypt atu nanovi teni?'

*Exo 2.14* <sup>29</sup> Tamlohi atu mara mo vere sohena, Moses mo rovo mo vano mo vinano na jara mara Midia, ale hin jara atu mo mai tama matea natuna lamane mo rua.

<sup>30</sup> Ale mele tauni mo ngavulu vati tinapua angelo matea mo pala isana na jara hasetoho na vutin Sinai na pepe hapu na pulo pahai matea mo lo hani. <sup>31</sup> Moses mara mo hitea mo mařurahi hinia, ale mara mo mai mariviti vara i hite mamahunia, leon Moli God mo malue hinia mara,

32 'Enau God non nom pua, God non Abraham, God non Isaac peresi Jacob'. *Exo 3.6*  
Ale Moses mo savaravara mo matahu vara i mele kilau vano.

33 Ale Moli God mo vereia isana mara, 'O lavi na'ihia na nom sabat matan jara sei ko lo turu hinia enia mo tapu. *Exo 3.5* 34 Enau na hite na rani rilingi nona noku tamlohi sei la lo toho Egypt, ale na rongo na nora tangi, ale na sinai vara a lavi na'ihira. Ale o mai, a pa ruleho o sivo Egypt.'

*Exo 3.7-10* 35 Moses akerihi natu sei la lo rohu hinia lara, 'Hare mo vaiho ko aulu vara o e'ri ari kamam? Tamlohi akerihi natu God mo rulea sohena tamlohi aulu matea, ale tamlohi juri na tamlohi matea na liman angelo atu sei mo lo pala isana hin pulo pahai atu mo lo hani.

36 Tamlohi akerihi natu mo tiromara la malue, mo vai na hinau ma'urahi peresi na matamata tavera na lolon Egypt, na Tasi Hahara, ale jara tano koru mata tauni mo ngavulu vati.

37 Moses akerihi natu sei mo vereia isana tavitavin Israel mara, 'God i pa turuhi na nomim p'ovet matea isana voraimim soheku'. *Deut 18.15*

38 Tamlohi akerihi natu, mo lo toho na lolon vao atu na jara hasetoho peresi angelo atu sei mo lo retireti isana, peresi na no'ra pua na vutin Sinai. Ale enia mo lavi na reti sei mo sile na mauri vara i silea isa'ra.

39 Pani no'ra pua la rohu vara la ooloo hinia, la tau na'ihia, ale na mapura la opoia jea vara la mele sivo Egypt, 40 la vereia isan Aaron lara, 'O vai te no'ra god matan la pa tiroma hini'ra. Pa Moses atu sei mo lo tiroma hini'ra ra malue Egypt, ra sopo levosahia vara mo sopo mele pala mata sava.'

*Exo 32.1* 41 Ale hin rani atu la vai na hinau matea mo tovongi na natu buluk matea, ale la sile na malamalai isana, ale la lo avulahi na nora vavahinau sei. 42 Pani matana, God mo vaha'ri isara ale mo tina'ihira vara la lotu na hinahinau tinatinapu na masapa, mo sohen la ulia moiso na puku nona p'ovet lara, 'Vara'uhu, kamim Israel

ka lo sile na malamalai isaku na jara tano koru hin la tauni atu mo ngavulu vati?

43 Mo vono, romimim tavera mo lo toho na nomim god na tent non Moloch, peresi Rephan god nona vitusarasara, peresi na tamasin te hinau ka vaira mata ha pa lotura.

Ale matana, a pa rule kamim ha vano ha toho asau na tavalun Babylon na ruhuruhura.'

*Amos 5.25-27*

44 Ale no'ra pua la lo toho peresi na Tabernacle na jara hasetoho, la vaia mo tataholo na sava God mo vereia isan Moses mo usuri na sava mo hitea. 45 Hitahuna no'ra pua, la pete lavia hin la rani atu la lo usuri Joshua sei mo lo tiromara na vuro isana tamlohi la sopo levosahi God. Ale God mo tipahira na nahon no'ra pua mo kakau na rani non supe David, 46 enia God mo avulahi hinia, ale David mo usi God vara i voro te iman God non Jacob hatea. 47 Pani Solomon natu, mo pa voro ima atu. 48 Pani God Aulu Jea mo sopo toho na ima tamlohi la vaira, sohena p'ovet mo ulia vara Moli mo vereia mara,

49 'Moli mo vereia: Tuka enia noku jara sakele mata suiha, ale varama enia jara paloku. Sava ima natu o pa e'ri voroa vara i pa imaku, teni sava jara enia noku jara mapu?

50 Ka romi vara limaku mo sopo vai vevuhi la hinau nike?' *Isa 66.1-2*

51 Ka tamlohi patu rilingi, mapumim la ro'roha, ale ka peropero na vara'uhu. Ka lo rohu na Tanume Tapu tarea sohen nomim pua la lo vaia tiroma. 52 Sava p'ovet natu nomim pua la sopo tipahia? Ale la vilimatei la haratu sei la lo vereuli na mai non haratu mo tataholo jea sei nake ka turuleji hinia moiso, ale ka vilimateia. 53 Kamim akerihi natu, ka sopo ooloo na leu non God sei mo silea isamim na lima angelo."

<sup>54</sup> La tamlohi atu sei la lo tapurongo isan Stephen lara la rongo la hinau atu, la lolokoru patura, la hatihati na huŕura matana. <sup>55</sup> Pani Tanume Tapu mo sohoni Stephen, ale mo taŕa sahe aulu na tuka, ale mo hite na hasohason God, ale mo hite Iesu mo lo turu na matuan God. <sup>56</sup> Ale mo vereea mara, “Ka hitea, na hite tuka mo roi, ale na hite Natun Tamlohi mo lo turu na matuan God.”

<sup>57</sup> Pani la ulu na leo tavera matea ale la jongi na perora ale vahatea la kue la tauria. <sup>58</sup> Moiso, la lavi naŕihia la vano na jingoiman taon tavera atu, la pulahia atano vara la pa parumateia. Ale la tamlohi atu sei la lo rongo na nona reti, la lanaŕihi na nora ruru tavera matan vara la eŕi paruparu, ale la taura na palo uluvou matea hijana Saul.

<sup>59</sup> Ale na rani la lo parua, Stephen enia mo lo ususi mara, “Moli Iesu, o lavi na tanumeku.” <sup>60</sup> Ale mo jovi sivo na pauna mo ulu mara, “Moli, o sopo taurilatira matan hehe akerihi.” Mo vere hinau atu moiso, natu mo mate.

## 8

<sup>1</sup> Ale Saul mo majinga na mateia non Stephen.

### *La Tipahi Na Kalesia*

Ale mo tapulo hin rani atu tamlohi la tipahi na vao kalesia Jerusalem la levuti jalajalaira la vano na jara tari Judea peresi Samaria, pani vahaŕule purongo la pa lo toho atu. <sup>2</sup> Tamlohi hai sei ŕomira mo ŕilangi mata lotu God tarea la tavuni Stephen, ale la vai na tangi tavera matana. <sup>3</sup> Pani Saul, mo opoia vara i vaikomokomo na kalesia tari, mo lo unu jongi na tamlohi rasua na ima hatehateahi, mo reve tahitahi na tamlohi peresi na haŕai ale mo taura na ima ŕilangi.

### *Philip Mo Retivujavujangi Samaria*

<sup>4</sup> Ale la kalesia atu sei la lo levuti jalajalaira, la vano la lo retivujavujangi na Retiŕuhu. <sup>5</sup> Philip mo sivo na taon tavera matan Samaria ale mo lo retivujavujangira hin Kŕisto. <sup>6</sup> Ale vao tamlohi tari atu la lo tapurongo mamahu na sava mo lo verera, ale

matan la hite na matamata tavera mo lo vaira. <sup>7</sup> Matan tanume lumihia sasati la lo malue na tamlohi matuvana sei la lo toho hinira, ale lara la malue la lo ulu ŕilangi, ale la haratu la ŕira teni la papao la ŕuhu. <sup>8</sup> Ale avulahi tavera mo lo toho hin taon tavera atu Samaria.

<sup>9</sup> Tamlohi matea hijana Simon enia mo lo mahumahu na suihan tiapolo ale mo lo vai na hinau maŕurahi tavera hin jara atu mo tuai moiso, mo lo vereea vara enia tamlohi tavera matea. <sup>10</sup> Tamlohi tari la lo tapurongo hinia, mo tapulo na tamlohi purongo mo tikeli la haratu la aulu lara, “Tamlohi akerihi enia mo lavi suiha atu non God sei la lo vereea vara mo tavera jea.” <sup>11</sup> Ale tamlohi la lo tapurongo mamahu isana matan la lo maŕurahi na nona mahumahu tuai moiso mo mai. <sup>12</sup> Pani lara la rasu Philip matan mo lo retivujavujangi na Retiŕuhu matan mauri atu God mo aulu hinia, tamlohi peresi na haŕai la tapulo lavi na paptijo na hijan Iesu Kŕisto. <sup>13</sup> Simon sohena mo rasua, ale hitahu na nona paptijo mo usuri Philip. Ale mara mo hite na matamata peresi na hinau maŕurahi tavera mo lo vaira, mo hutua.

<sup>14</sup> Ale la vahaŕule atu Jerusalem lara la rongoa vara mara Samaria la lo lavi na reti non God, la ŕule Peter enia John <sup>15</sup> la sivo isara la ususi nora matan vara la pa eŕi lavi na Tanume Tapu, <sup>16</sup> matan enia mo sopo lo jovi isan te vonara hatea, pani enira la lavi na paptijo na hijan Moli Iesu purongo. <sup>17</sup> Ale Peter enia John la tau na limara hinira, ale la lavi na Tanume Tapu.

<sup>18</sup> Simon mara mo hitea vara Tanumen God mo lo mai na tamlohi vara la vahaŕule atu la tau na limara hinira purongo, mo usia vara i eŕi silera hin te mania <sup>19</sup> mara, “Ha sileau hin suiha sei matan vara sava tamlohi na tau na limaku hinia enia sohena i pa lavi na Tanume Tapu.”

<sup>20</sup> Pani Peter mo vereea isana mara, “Mo ŕuhu vara nom mania i tihai peresiho matan ko ŕomi vara o eŕi voli na otori non God na mania.

21 Engko o sopo eři lavi te tavalun hinau nike matan mapum mo sopo tataholo na nahon God. 22 Matan haratu, o posi na nom řomřomi hehe, ale o usiusi isan God matana, matan vara i avulahi, i pa řomiho matan nom řomřomi sei. 23 Matan na hitea ko mařivi na mereimerei ale hehe mo taurilatihō.”

24 Ale Simon mo řaramia mara, “O usiusi matakū isan Moli matan vara sava sei ko vereā moiso tea i sopo masese isaku.”

25 Ale hitahun la vereuli mamahuni la reti atu non Moli, Peter enia John la mele hilu sahe Jerusalem, ale la retivujavujangi na Retiřuhu isana vanua mara Samaria matuvana na malelera la lo sahe.

### *Tamlohi Aulu Mara Ethiopia Matea*

26 Ale angelo matea mo vereā isan Philip mara, “O turu o vano o sivo na malele sei mo tai Jerusalem mo lo vano Gaza.” Jara atu enia jara hase-tohō matea. 27 Ale mo turu mo vano. Hin jara atu mo hite na mara Ethiopia matea mo povota, enia tamlohi aulu matea matan Candace, vesupe nona mara Ethiopia. Enia natu mo lo kilau na nona tavgav tari. Mo mai Jerusalem mata lotu, 28 ale mo lo mele mule, mo lo sakele na nona kati, hos la lo revea mo lo evi na reti non přovet Isaiah.

29 Ale Tanumen God mo vereā isan Philip mara, “O vano o hahau na pahisa nona kati.”

30 Ale Philip mo maro mo vano isana, ale mo rongoa mo lo evi na reti non přovet Isaiah, ale mo usia isana mara, “Ko levosahi na sava ko lo evia?”

31 Ale mo řaramia mara, “A pa levosahia sohena sava vara tea i sopo vujangiau hinia?” Ale mo usi Philip vara i vele i sahe i sakele peresia.

32 Jara rihirihi atu mo lo evia na Retitapu enia harihi,

‘La tiroma hinia sohena sipsip matea mo vano matan vara la vilimateia, ale sohena natu sipsip matea sei mo lo tapanono purongo vara

tamlohi tai na vulu mo lo tai na vuluna,

ale mo sopo vere te hinau hatea.

33 Na rani la vailejleja

mo sopo tea i turu vara i tuenia.

Mo sopo te tania na vara i eři lavi na koruna.

Matan la lavi nařihi na maurina na varama.’ *Isa 53.7-8*

34 Ale pa tamlohi atu sei la votaia mo usi Philip mara, “Isaiah enia mo lo retireti hin enia hasena teni mo lo vere te tamlohi tinapua?” 35 Ale Philip mo vereuli na Retiřuhu hin Iesu isana mo tapulo hin jara rihirihi atu na Retitapu.

36 Ale lara la lo vano la mai na pahisa wai matea, ale pa tamlohi atu sei la votaia mara, “O to kilau vano, wai sevano! Mo sopo lo tataholo vara a lavi na paptijo?”

37-38 Ale mo vereā mara nona kati i turu, ale enira rua la sevuti la sivo na wai, ale Philip mo paptijo hinia.

39 Ale mara mo malue na wai, Tanumen Moli mo lavi nařihi Philip na nahona. Pa tamlohi atu mo sopo mele hitea pani na malelena mo lo vano mo avulahi tavera. 40 Ale Philip mo pa hutua purongo mo lo turu hin taon atu Azotus, ale mo retivujavujangi na Retiřuhu atu peresi na taon tari sei na malelena vavano mo kakau Caesarea.

## 9

### *Iesu Mo Horo Saul, Mo Viřonia Nona*

(Acts 22.6-16; 26.12-18)

1 Hin rani atu Jerusalem, Saul mo lo vereā řilangi vara i pa vilimatei na tamlohi usuri non Moli, ale matana mo vano isan přis aulu. 2 Ale mo usia vara i uli te leta vara i lavira la sahe isana ima lotu nona Jew Damascus, mata usia vara la turu peresia vara la taurilati la haratu la lo usuri na malelen Křisto, hina purongo vara tamlohi teni hařai. Ale vara i lihora i lavira la mele sahe Jerusalem.

3 Saul mo lo sahe Damascus, mo pa lo mai mariviti, mera tavera matea mo tai na tuka mo eři tuntunia. 4 Mo jovi sivo na lepa, ale mo rongō na leo

matea mo vereia mara, “Saul! Saul! Mata sava ko lo tipahiau?”

<sup>5</sup> Ale Saul mo usia mara, “Tamlohi tavera, engko hare?”

Ale leo atu mo řaramia mara, “Enau sei Iesu! Haratu sei ko lo tipahia. <sup>6</sup>Pani nakerihi o turu, o vano o unu na lolon taon tavera atu ko lo mai matana, ale tamlohi matea i pa vereho na sava o pa vaia.”

<sup>7</sup> La tamlohi atu sei la lo hahau peresi Saul la turu tapanono vahatea matan la rongu leo atu, pani la sopo hite na tamlohina. <sup>8</sup> Ale Saul mo mele turu, matana mo lo roi pani mo sopo eři hite te hinau. Nona tamlohi la tauri na limana la tiroma hinia la sahe Damascus. <sup>9</sup> Ale Saul mo matavuso mata rani mo tolu. Mo řohu na hanhani peresi na wai hin la rani atu.

<sup>10</sup> Tamlohi usuri matea hijana Ananias mo lo toho atu Damascus. Moli mo pala isana na hinau matea sohena mavuho mara, “Ananias!”

Ananias mo řaramia mara, “Enau sei Moli!”

<sup>11</sup> Moli mo vereia isana mara, “O turu o vano hin malele atu la tovia ‘Tataholo’ ale atu na iman Judas o usi na mara Tarsus matea hijana Saul, ale nakerihi mo lo usiusi, <sup>12</sup> ale hinau matea sohena mavuho enia mo hite na tamlohi matea hijana Ananias mo mai mo tau na limana hinia matan vara i eři mele kilau.”

<sup>13</sup> Pani Ananias mo řaramia mara, “Moli, tamlohi matuvana la vereau na sava hinau sasati tamlohi atu mo lo vaia isana nom tapuhi Jerusalem.

<sup>14</sup> Ale nahai nike mo lo lavi na suiha isana pŕis aulu Jerusalem vara i taurilati la haratu la lo rasuho vara engko Moli!”

<sup>15</sup> Pani Moli mo vereia isana mara, “O vano matan enau na viřonia mata vavahinau matea vara enia i pa lavi na hijaku i vano isana tamlohi řořoha, ale isana supe, ale isana Jew.

<sup>16</sup> Matan enau a pa vujangia vara i pa lavi na rongohaji mata hijaku.”

<sup>17</sup> Ale Ananias mo malue mo vano mo unu hin ima atu. Mo tau na limana hinia, ale mara, “Voraiku Saul, Moli Iesu sei mo lo pala isam hin malele sei ko lo mai hinia, mo řuleau

na mai isam matan vara o eři mele kilau, ale Tanume Tapu i mařivisiho.”

<sup>18</sup> Vahatea purongo hinau hai sohena langalanga maji la jovi na matan Saul, ale mo mele kilau, moiso mo turu ale la paptijo hinia; <sup>19</sup> ale mara mo hanhani, mo mele suiha. Saul mo lo toho peresi na tamlohi usuri non Moli makomona atu Damascus.

### *Saul Mo Mele Sahe Jerusalem*

<sup>20</sup> Ale vila řuhu purongo, Saul mo tapulo retivujavujangi Iesu na ima lotu nona Jew mara, “Varařuhu Iesu enia Natun God.”

<sup>21</sup> Ale tamlohi tari sei la rongoa la mařurahi tavera hinia lara, “Avei, mo sopo tamlohi nike natu sei mo lo vailejleji la haratu Jerusalem sei la lo vereia vara Iesu enia Moli? Ale nona mai nike nake mo sopo matan vara i mele vaia sohena, matan vara i liho kamam ale i lavi kamam kama vano isana moli nona pŕis Jerusalem?”

<sup>22</sup> Pani suihan Saul mata retivujavujangi mo mai mo mele řilangi jea, ale mo ari posposi na Jew sei la lo toho Damascus matan mo lo vujangi mamahunia vara Iesu enia Kŕisto atu la lo kilau matana. <sup>23</sup> Mo sopo tuai, tamlohi tavera nona Jew atu Damascus la hatihia vara la pa vilimateia, <sup>24</sup> pani Saul mo levosahi nora řomřomi luhu atu. La lo kilau na mataruan taon tavera atu na rani na vutepongi matan vara la pa eři vilimateia. <sup>25</sup> Pani na vutepongi matea, nona tamlohi usuri la tuhua na tanga matea na mařole matea na roro ropen taon atu.

<sup>26</sup> Ale hin rani atu, Saul mo pala Jerusalem mo vaihitea vara i pulutahi peresi na tamlohi usuri non Moli ea. Ale enira mo isoiso la matahunia matan la sopo rasua vara enia tamlohi usuri matea. <sup>27</sup> Pani Barnabas mo vano mo lavia mo mai isana vahařule, ale mo vereulia isara sohena sava Saul mo hite Moli na malele, ale mo vereuli na sava Moli mo vereia isana, ale sohena sava mo lo retivujavujangi řilangi na hijan Iesu Damascus. <sup>28</sup> Ale tamlohi usuri la pa avulahi hinia natu vara i lo toho peresira, ale nona retivujavujangi Jerusalem

na hijan Moli mo řilangi jea. <sup>29</sup> Ale mo sorasora peresi na mara Jew atu sei la retireti na leo mara Greek, ale mo vasi peresira, pani la lo tiasia vara la vilimateia. <sup>30</sup> Ale vorai kalesia atu lara la levosahia, la lavia mo sivo Caesarea, ale la řule nařihia mo sahe Tarsus.

<sup>31</sup> Matan haratu, kalesia na jara tari Judea, Galilee peresi Samaria la toho na tamata, la ulua la řilangi ale evira mo tavera. Ale na maurira la sile na ooloo isan Moli ale la lo toho na nanauhi non Tanume Tapu, ale la ulua mo tavera jea.

### *Peter Enia Dorcas*

<sup>32</sup> Ale, Peter mo lo hahau řalihi ale na malelena mo sivo isana tapuhi non Moli Lydda. <sup>33</sup> Hin jara atu mo tapai na tamlohi papao matea hijana Aeneas sei mo lo juruvi na vatana mata tauni mo limaravtolu moiso. <sup>34</sup> Ale Peter mo vereia isana mara, "Aeneas, Iesu Křisto mo vai mamahuniho; o turu o vai na vatam." Ale vahatea purongo mo turu. <sup>35</sup> Ale tamlohi tari Lydda peresi Sharon la hitea, ale la posi mai isan Moli.

<sup>36</sup> Hin rani atu tamlohi usuri hařai matea mo lo toho Joppa, hijana na leo Jew enia Tabitha, ale na leo mara Greek enia Dorcas. Tarea mo lo vai na vavahinau řuhu ale mo lo tueni na tilavono. <sup>37</sup> Hin la rani atu mo rojo ale mo mate. Ale lara la hoje na tarapena moiso la taua mo juruvi na jara tinapua matea aulu hin ima atu. <sup>38</sup> Pani matan Lydda mo lo toho mariviti Joppa, tamlohi usuri atu lara la rongoa vara Peter mo lo toho atu, la řule na tamlohi mo rua la vano isana vara la usia řilangi vara, "Kama opoia mo tavera jea vara o mai nakerihi purongo."

<sup>39</sup> Ale Peter mo turu mo usurira la vano. Ale mara mo pala, la lavia mo sahe aulu isan Dorcas. Malepu tari la lo turu na pahisana la lo tangi, ale la lo vujangi na ruru peravu peresi te ruru tinatinapua Dorcas mo vaira na rani mo pa lo mauri. <sup>40</sup> Pani Peter mo řulera enira mo isoiso vara la malue, ale mo papaohi mo usiusi, ale mo posi vano isan tarape atu

maru, "Tabitha, o turu." Ale mo roi na matana, ale mara mo hite Peter, mo sakele tataholo. <sup>41</sup> Ale mo sohahi na limana vano isana ale mo sau. Moiso mo tovi na tapuhi peresi la hařai malepu atu vara la mai ale mo vujangia isara vara mo mele mauri.

<sup>42</sup> Ale sorasorahina mo řalihi na jara tari Joppa, ale tamlohi matuvana la tau na nora rasua hin Moli. <sup>43</sup> Ale Peter mo lo toho atu Joppa mata rani matuvana peresi na tamlohi matea hijana Simon mo lo vavahinau na huri maji.

## 10

### *Cornelius Mo Vahařule Matan Peter*

<sup>1</sup> Atu Caesarea tamlohi matea, hijana Cornelius, enia captain mata tamlohi vuro mo lo kilau na vao tamlohi vuro mara Rome matea evira mo ngavulu sangavulu mo limarave (600), <sup>2</sup> enia tamlohi matea řomina mo řilangi mata lotu God, ale mo lo sile na ooloo isana tolu na vao imana, ale nona silesilea mo řuhu jea isana tamlohi, ale mo lo usiusi tarea isan God. <sup>3</sup> Matan alo mariviti i tolu na ravravi matea, mo hite na hinau matea sohena mavuho matea, ale mo hite na angelo non God matea mo mai mo vereia isana mara, "Cornelius!"

<sup>4</sup> Ale mo kilaua na matahu tavera ale mara, "Eh, sava tamlohi tavera?"

Ale mo vereia isana mara, "Nom usiusi peresi na nom silesilea la sopo sahe aulu purongo na nahon God. <sup>5</sup> Ale nakerihi, o řule te tamlohi la sivo Joppa la lavi Simon tapala hijana Peter. <sup>6</sup> Enia mo lo toho peresi na tamlohi matea hijana Simon sei mo lo vavahinau na huri maji, ale imana mo lo toho na pahisa tasi."

<sup>7</sup> Angelo atu mara mo lo retireti isana moiso mo malue, ale Cornelius mo tovi na nona volitusi mo rua peresi na tamlohi vuro matea sei mo rasua mo tavera jea ale mo řulera isan la haratu la lo volitusi isana, <sup>8</sup> mo vere na sava mo masese isana isara, ale mo řulera la sivo Joppa.

### *Sava God Mo Vujangia Isan Peter*

<sup>9</sup> Mo mele rani sahe la pa lo mai mariviti hin taon tavera atu, Peter mo sahe aulu na pusa ima na livuha rani mata usi. <sup>10</sup> Ale mo marohati, mo opoia vara i hani te hinau, pani la pa lo tatamahunia, hinau matea sohena mavuho mo taurilati na řomina, <sup>11</sup> ale mo hite tuka la roi ale hinau matea sohena tavalu ruru tavera jea matea mo lo sinai atano, la tuhua mo lo sinai atano na varama hin la pingona atu mo vati. <sup>12</sup> Mo hite na maji tinatinapua matuvana, maji haraho peresi na maji avuavu la lo toho na lolona. <sup>13</sup> Ale leo matea mo malue mo vereea isana mara, "O turu Peter; o vilimatei tea o hania!"

<sup>14</sup> Pani Peter mara, "A sopo eři vaia sohena Moli; matan na sopo lo hani te hinau lumiha hatea sei leu mo horoa!"

<sup>15</sup> Ale leo atu mo mele mai isana haruana mara, "Sava God mo vaia mo vokevoke, o sopo vereea vara mo lumiha!" <sup>16</sup> Ale hinau sei mo masese sohena vaha tolu moiso, ale vahatea purongo mo mele sahe aulu na tuka.

<sup>17</sup> Ale řomin Peter mara mo pa lo toho na řaramin hinau atu mo hitea, vahatea purongo, pa la tamlohi atu sei Cornelius mo lo řulera la kakau na iman Simon la turu na get.

<sup>18</sup> Ale la ulo la usia lara Simon matea tapala hijana Peter mo lo toho atu teni mo vono. <sup>19</sup> Peter mo pa lo řomřomi hinau atu mo lo hitea, ale Tanume Tapu mo vereea isana mara, "Nakerihi, tamlohi tupu tolu la lo aleho. <sup>20</sup> O turu, o sivo atano, řomim i sopo kaka hinira, ale o usurira matan enau sei na řulera."

<sup>21</sup> Ale Peter mo sevuti sivo isara ale mo vereea mara, "Enau natu haratu ko lo alea. Ka mai mata sava?"

<sup>22</sup> Ale la vereea lara, "Cornelius, enia captain mata tamlohi vuro matea, mo lo kilau na vao tamlohi vuro mara Rome matea, ale enia tamlohi tataholo matea sei mo lo sile na oloolo tavera isan God. Ale Jew la lo vereea vara enia tamlohi řuhu matea; an-gelo tapu matea mo vereea isana mara i vahařule matam matan vara o mai na imana ale i pa rongo na sava o pa vereea isana." <sup>23</sup> Ale Peter mo usira

vara la pa toho atu peresia hin rani atu.

Mo mele rani sahe mo turu mo usurira, ale tatua vorai sei mara Joppa la vano peresia.

<sup>24</sup> Mo mele rani sahe la unu Caesarea. Cornelius mo lo kilau matana moiso, ale mo tovi matavuhi na tahisana peresi na tavitavuina peresi na tapalana řuhuřuhu la lo saovia.

<sup>25</sup> Peter mara mo unu, Cornelius mo tapaia, mo jovi sivo na palona ale mo lotua. <sup>26</sup> Pani Peter mo sauva sahe aulu mara, "O turu, enau tamlohi matea sohem purongo!" <sup>27</sup> Mara mo lo retireti peresia mo unu mo hite na vao tavera la lo takonahi saovia.

<sup>28</sup> Ale mo vereea isara mara, "Kamim hasemim ka levosahia vara mo sopo tataholo vara Jew matea i pulutahi teni i rohi te tamlohi mara jara tinapua, pani God mo vujangia isaku vara a sopo tovi na tamlohi tinapua sohena tamlohi lumiha matea na nahon God. <sup>29</sup> Ale kara ka vahařule matak, na mai tataholo vahatea. Ale nake, na opoia vara a usia vara mata sava ka vahařule matak?"

<sup>30</sup> Ale Cornelius mara, "Rani mo vati mo vano moiso, korong matan alo mo tolu natu na ravravi, na lo usi na imaku, ale vahatea purongo, tamlohi matea mo turu na nahoku mo ru na ruru la memera

<sup>31</sup> ale mo vereea mara, 'Cornelius, God mo sopo řomaliho na nom usi peresi na nom silesilea. <sup>32</sup> Ale matan haratu o řule tea la sivo Joppa la usi na tamlohi matea hijana Simon tapala hijana Peter. Enia mo lo toho na iman Simon, tamlohi vavahinau na huri maji matea na pahisa tasi.'

<sup>33</sup> Ale na vahařule matam vahatea, ale engko ko řomřuhu ko mai. Ale matana nakerihi, kamam mo isoiso kama lo toho na nahon God vara kama rongo vevuhi na sava mo retileu hinia isam vara o vereea isamam."

### *Iman Cornelius La Rongo Na Retiřuhu*

<sup>34</sup> Ale Peter mo tapulo retireti mara, "Varařuhu, nake natu na pa levosahia vara God mo sopo



tametame tea, <sup>35</sup> pani sava tamlohi na sava jara sei mo lo sile na ololo isana, ale mo vai na hinau tataholo, enia mo avulahi hinia. <sup>36</sup> Ale ka levosahi retisohai atu sei mo lo silea isana tavitavuin Israel, mo retivujavujangi na Retiŕuhu mata tamata hin Iesu Kŕisto enia Moli nona tamlohi tari. <sup>37</sup> Kamim ka levosahi vevuhi na sava mo masese Judea, mo tapulo Galilee hitahun paptijo atu John mo lo retivujavujangia <sup>38</sup> hin Iesu mara Nazareth sei God mo viŕonia na Tanume Tapu ale peresi na suiha. Enia mo hahau řalihi mo lo vai na hina řuhu, mo vai na rojoa la tihai hin la haratu tiapolo mo lo vailejlejira matan God mo lo toho peresia.

<sup>39</sup> Kamam kama hite vevuhi la hinau sei na matamam mo vaira Judea peresi Jerusalem. La vili-mateia na talopeilopei matea, <sup>40</sup> pani God mo sauteterahia na hatolu rani, ale mo tinaŕihia vara i pala, <sup>41</sup> mo sopo isana tamlohi tari, pani isamam sei God mo pete viŕoni kamam moiso vara kama pa hitea. Hitahun haratu mo lo turu na mateia, kamam natu, kama hanhani ale kama inu peresia. <sup>42</sup> Mo retileu isamam vara kama retivujavujangi na tamlohi ale vara kama retiŕoarioahaira vara enia natu haratu God mo viŕonia vara i pa ari la haratu la mate peresi la haratu la lo mauri. <sup>43</sup> Pŕoŕet tari la vereulia vara sava tamlohi sei mo tau na nona rasua hinia, God i pa řomi na nona hehe na hijana.

#### *Tanume Tapu Mo Jovi Isara*

<sup>44</sup> Peter mo pa lo vere la hinau atu, Tanume Tapu mo jovi isan la haratu enira mo isoiso sei la lo tapurongo na nona reti. <sup>45</sup> Tamlohi řoŕoha sei la lo usuri Peter, la maŕurahi tavera matan God mo surei na Tanume Tapu isana tamlohi řoŕoha sohera. <sup>46</sup> Matan la rongora la lo retireti na leo tinatinapua la lo tahe na hijan God, moiso Peter mo verea mara, <sup>47</sup> "Hare natu i eŕi horo na wai vara la tamlohi nike la sopo paptijo hinia? Matan enira sohena la lavi na Tanume Tapu soheŕa moiso."

<sup>48</sup> Ale mo retileu isara vara la pa paptijo na hijan Iesu Kŕisto. Hitahun haratu, la usia vara i lo toho peresira makomona tako.

## 11

### *Kalesia Jerusalem La Rongo Na Sorasorahin Cornelius*

<sup>1</sup> Ale, vahaŕule peresi la vorai atu la lo toho řalihi Judea la rongoa vara tamlohi řoŕoha la lavi na reti non God. <sup>2</sup> Ale Peter mara mo sahe Jerusalem, Jew kalesia hai la verele-jeleja lara, <sup>3</sup> "Avei, ko vano isana tamlohi řoŕoha, ale ko hanhani peresira."

<sup>4</sup> Pani Peter mo tapulo vereuli na sava mo masese mo tapulo na tapulona mara, <sup>5</sup> "Na lo toho na taon tavera matan Joppa na lo usiusi, ale hinau matea sohena mavuho matea mo pala isaku, ale na hite na hinau matea sohena tavalu ruru tavera jea matea mo lo sinai atano mo tai na tuka ale la tuhua hin la pingona atu mo vati mo sinai tataholo isaku. <sup>6</sup> Nara na kilau mamahunia, na hite na maji palo vati hai, maji jala hai, maji haraho hai peresi na maji avuavu tinatinapua hai sei la tapu mata hanira. <sup>7</sup> Ale na rongo na leo matea mo malue mo vereia isaku mara, 'O turu Peter; o vilimatei tea, ale o hanira!'

<sup>8</sup> Pani na vereia nara, 'A sopo eŕi vaia sohena Moli; matan na sopo lo hani te hinau lumiha hatea sei leu mo horoa.'

<sup>9</sup> Pani pa leo atu na tuka mo mele řaramiau haruana mara, 'Sava na vaia mo vokevoke, o sopo eŕi vereia vara mo lumiha.'

<sup>10</sup> Hinau atu mo masese sohena vaha tolu moiso, la hinau tari atu la pa mele sahe na tuka. <sup>11</sup> Vahatea atu, tamlohi mo tolu la pala hin ima atu na lo toho ea, la řulera Caesarea matakū. <sup>12</sup> Ale Tanumen God mo vereia isaku mara a usurira, ale na sopo mele řomŕomia vara enira la tamlohi tinapua. La tamlohi tupu limarave nike natu, la usuriau kama sahe, ale kama unu na iman tamlohi matea Caesarea. <sup>13</sup> Ale mo vereulia sohena sava mo hite angelo atu mo turu na lolo imana, ale mo vereia

isana mara, 'O řule tea la sivo Joppa, ale la lavi Simon sei tapala hijana Peter; <sup>14</sup> ale i pa vereuli na retisohai matea sei o pa juri hinia, engko peresi na vao imam.'

<sup>15</sup> Nara na tapulo retireti, Tanume Tapu mo jovi hinira sohen mo vaia isařa tiroma. <sup>16</sup> Ale na mele řomřomi na reti non Moli sei mara, 'John mo paptijo peresi na wai, pani God i pa paptijo hin kamim na Tanume Tapu.'

<sup>17</sup> Vara God mo silera na otori sohen mo silea isařa hin rani atu řa rasu Moli Iesu Křisto, enau sava tamlohi vara a eři horoa?"

<sup>18</sup> Lara la rongo la hinau atu la sopo mele retireti, pani la hasohaso God lara, "Varařuhu, God mo tinařhia vara tamlohi řořoha la eři posi, ale la lavi na mauri soheřa."

### *Vao Kalesia Matan Antioch Matan Syria*

<sup>19</sup> Ale hin rani atu, la haratu sei la lo tipahira Jerusalem usuri na mate non Stephen, la sahe asau la kakau na jara sohen Phoenicia, Cyprus peresi Antioch. La sopo vere retisohai sei isan te tinapua pani isana Jew sei la lo retireti na leon Israel purongo. <sup>20</sup> Pani tatuara enira mara Cyprus enia Cyrene sohena, ale lara la pala Antioch la vereea isana tamlohi řořoha sei leora enia mara Greek, la lo retivujavujangi Moli Iesu. <sup>21</sup> Suihan Moli mo lo toho hinira, ale vao tavera sei la tamlohi řořoha la rasua, ale la posi mai isan Moli.

<sup>22</sup> Sorasora atu mara mo pala na vao kalesia Jerusalem, ale la řule Barnabas mo sahe Antioch. <sup>23</sup> Mara mo pala mo hiteuli na vavahinau řuhuřuhu non God isara, ale mo avulahi mo retituetuenira vara la lo toho řilangi varařuhu isan Moli, <sup>24</sup> matan Barnabas enia tamlohi řuhu matea, Tanume Tapu mo mařivi hinia, ale nona rasua mo řilangi, ale matana, tamlohi matuvana la mele mai isan Moli.

<sup>25</sup> Matana, Barnabas mo vano Tar-sus vara i ale Saul, <sup>26</sup> ale mara mo tapaia, mo lavia mo sinai Antioch. Barnabas peresi Saul la lo pulutahi peresi vao kalesia atu, ale la vujangi

na tamlohi matuvana ea mata tauni matea. Antioch natu, enia tiroma jara sei tamlohi rasua la lavi hija sei — kalesia ea.

<sup>27</sup> Ale hin la rani atu přovet hai la tai Jerusalem la sahe Antioch. <sup>28</sup> Vonara matea hijana Agabus mo turu, ale mo retimangovi na suihan Tanumen God mara marua tavera matea i pa jovi na varama, ale hinau atu mo masese hin rani atu Claudius mo lo supe nona mara Rome. <sup>29</sup> Ale matana, tamlohi usuri Antioch la hatihia vara la pa sile te tuetueni isana voraira peresi na vevoraira sei la lo toho Judea, la pa silea sohena vara la eři silea. <sup>30</sup> Ale la vaia sohena, la sile na nora tuetueni isan Barnabas enia Saul vara la pa silea isan la haratu la lo kilau na kalesia Jerusalem.

## 12

### *La Vilimatei James*

<sup>1</sup> Hin la rani atu, supe Herod Agrippa mo taurilati na kalesia hai vara i pa vaikomokomora. <sup>2</sup> Mo retileu vara la vilimatei James, tasin John na sita vuro. <sup>3</sup> Ale mara mo hitea vara Jew la avulahi hinia mo mele taurilati Peter sohena, harihi mo masese na rani Passover. <sup>4</sup> Mara mo tauria mo taua na ima řilangi, mo taua na lima vao tamlohi vuro mo vati sei tupu vati na vao matea. Herod mo lo řomřomia vara i pa lavi Peter i malue vara i aria na naho tamlohi hitahu na Passover. <sup>5</sup> Ale Peter mo lo toho atu na ima řilangi, pani vao kalesia Jerusalem la lo ususi řilangi isan God matana.

### *Angelo Matea Mo Tiroma Hin Peter*

<sup>6</sup> Ale hin vutepongi atu sei vara i rani sahe supe Herod i pa vaia i turu na aria, Peter mo lo juruvi na livuha tamlohi vuro mo rua, la liho na limana na jen, ale hai la lo turu na pelatin ima řilangi atu. <sup>7</sup> Vahatea purongo, angelo matea non Moli mo pala na pahisan Peter na lolon jara atu mo lo toho hinia na ima řilangi, ale mera matea mo merasahi jara atu. Mo hoti Peter na rorona, ale

mo řohaia mara, “O turu vila.” Ale jen la jovi nařihi na limana. <sup>8</sup> Ale angelo atu mo vereea isana mara, “O ruru ale o ru na nom sabat!” Ale mo vaia sohena. Ale mo mele vereea isana mara, “O tavuhoroho na nom ruru tavera, ale o usuriau.”

<sup>9</sup> Ale Peter mo malue mo usuria. Mo sopo levosahia vara hinau atu angelo atu mo lo vaia enia hina varařuhu, pani mo lo řomřomia vara mo lo hite na hinau matea sohena mavuho matea. <sup>10</sup> Ale lara la jeu na tiroma vao tamlohi vuro peresi na harua vao tamlohi vuro sei la lo kilau na ima řilangi, la sahe tataholo na pelati aen sei mata unu hin taon tavera atu. Pelati atu mo hasena roi matara, ale la malue la lo usuri na malele tavera matea, ale vahatea purongo, angelo atu mo tinařihia.

<sup>11</sup> Ale řomin Peter mara mo mele mai mo hasena vereea mara, “Nakerihi na levosahi mamahunia vara Moli mo řule na nona angelo vara i juriau na liman Herod peresi na hinau tari sei Jew la opoia vara i pa masese isaku.”

<sup>12</sup> Mara mo levosahia, mo vano na iman Mary tinan John sei tapala hijana Mark. Ale tamlohi matuvana la lo pulutahi ea la lo usiusi. <sup>13</sup> Ale mara mo řiřingi na pelatin rope ima atu, hařarihi volitusi matea hijana Rhoda mo mai vara i roi. <sup>14</sup> Mara mo rongovosahi na leon Peter, na nona avulahi mo sopo roi na pelati pani mo maro mo mele unu na ima mo vereulia isara vara Peter mo lo turu na pelati.

<sup>15</sup> La vereea isana lara, “Ko to, ko putu teni?” Pani mo vereea mo řilangi mara mo varařuhu, ale enira la lo vereea vara, “Enia nona angelo!”

<sup>16</sup> Pani Peter mo lo řiřingi ale enira lara la roi, la hitea ale la mařurahi tavera. <sup>17</sup> Pani mo vai na matamata na limana vara la toho malum, ale mo vereulia sohena sava Moli God mo nařihia hin ima řilangi atu. Ale mo vereea mara, “Ha vere la hinau nike isan James peresi na voraiřa.” Moiso mo malue mo vano na jara tinapua matea.

<sup>18</sup> Na nahonaho rani tamlohi vuro tari na ima řilangi atu la matahu tavera na sava mo masese isan Peter. <sup>19</sup> Supe Herod mo pala isara atu, ale mo alea pani mo sopo hitea, ale mo usi na retiusia hai isan la tamlohi vuro atu sei la lo kilaua moiso mo retileu vara nona tamlohi vuro tina-pua la lavira la vano la vilimateira. Moiso Herod mo sivo mo hahau roto Judea mo vano Caesarea vara i lo toho atu.

### *Herod Agrippa Mo Mate*

<sup>20</sup> Supe Herod Agrippa mo lolokoru tavera na mara Tyre peresi Sidon, ale la mai isana na řomřomi matea, ale na rani Blastus patu volitusi non Herod mara mo majinga na řomira moiso, la usia vara la eři sari tamata peresi Herod matan hara hinau mo lo tai na jaran Supe. <sup>21</sup> Ale hin rani atu sei Herod mo taua moiso, mo ru na nona ruru peravu mata supe, mo sakele na jara sakele mata supe, ale mo sile na nona retireti isara. <sup>22</sup> Tamlohi la lo ulo lara, “Aaah! Leo god matea nahai, mo sopo leo tamlohi!”

<sup>23</sup> Vahatea purongo, angelo matea non Moli mo vilijovia matan mo sopo sile na hasohaso isan God, ale hulesi la hania mo mate.

<sup>24</sup> Pani reti non God mo ulua mo vano mo vai na tamlohi matuvana tinapua la rasua.

<sup>25</sup> Barnabas enia Saul lara la vai vevuhi na sava la lo vano matana Jerusalem, la mele hilu matan Antioch la lavi John sei, tapala hijana Mark.

## 13

### *Tanume Tapu Mo Rule Barnabas Enia Saul*

<sup>1</sup> Harihi enia hija pŗovet hai peresi na tamlohi vujangi Antioch: Barnabas, Simon la tovia ‘tamlohi viriha’, ale Lucius mara Cyrene, Manaen enia vorain Herod Antipas matea, vaona la korohia, ale Saul. <sup>2</sup> Na rani matea la tapuhoro na hanhani ale la pa lo lotu Moli, Tanume Tapu mo vereea mara, “Ha tauhasehi Barnabas enia Saul mata noku voko atu na tovira matana.” <sup>3</sup> Hitahu na

nora tapuhoro na hanhani peresi na usiusi, la tau na limara hinira ale la řulera la vano na malelera.

### *Tiroma Hahau Non Saul*

<sup>4</sup> Ale Barnabas enia Saul, Tanume Tapu mo řulera la sivo Seleucia na pahisa tasi, ale la vele na boti hin jara atu, la sivo na Ureuren Cyprus. <sup>5</sup> Lara la hoso Salamis, la retivujavujangi na reti non God na ima lotu nona Jew. Ale John Mark mo lo usurira sohena nora tuetueni.

<sup>6</sup> Lara la hahau roto ureure atu la kakau Paphos, la tataholo na tamlohi matea mo lo mahumahu na suihan tiapolo, enia Jew přovet haluhalu matea hijana Bar-Jesus, <sup>7</sup> enia mo lo toho peresi na tamlohi aulu matan Cyprus sei supe non Rome mo taua atu, hijana Sergius Paulus, enia tamlohi lelevosahi matea. Tamlohi aulu atu mo vahařule matan Barnabas enia Saul matan mo opoia vara i rongo na reti non God. <sup>8</sup> Pani Elymas tamlohi mahumahu atu mo retihorora matan mo sopo opoia vara tamlohi aulu atu i rongo te reti na rasua non Saul enia Barnabas hin Iesu.

<sup>9</sup> Pani Saul sei tapala hijana Paul, Tanume Tapu mo mařivisia ale Paul mo kilau tataholo isana, <sup>10</sup> ale mara, “Engko natun Tiapolo, ko mařivi na halu peresi posposi tope na leu, meresahi nona hinau tari sei la řuhu, o pa isoiso na nom vailejleji na malele varařuhu non Moli pangisa? <sup>11</sup> Ale nakerihi natu, liman Moli mo meresahi isam, ale o pa vuso, o pa sopo eři hite na mera alo matan te rani makomona.” Vahatea purongo, matana mo nini ale řořoha mo sohonia, ale mo aleale tamlohi vara tea i tauri na limana i tiroma hinia. <sup>12</sup> Tamlohi aulu atu mara mo hite hinau atu mo masese mo rasua, matan mo mařurahi tavera na vujangi matan Moli.

### *Paul Enia Barnabas La Sahe Antioch*

<sup>13</sup> Moiso, Paul peresi na tapalana la mele malue Paphos na boti matea la sahe matan Pamphylia. La hoso na taon matan Perga. John Mark

mo tinařihira atu natu, ale mo mele hilu mo sivo Jerusalem. <sup>14</sup> La mele malue Perga la sahe la pala Antioch matan Pisidia, ale na rani Sabbath la vano la unu na ima lotu nona Jew la sakele. <sup>15</sup> Hitahun na evievi mata Leu non Moses peresi na reti nona přovet, patu tamlohi mata ima lotu mo sohai na retisohai isara mara, “La vorai, vara te nomim retisohai mata tueni na tamlohi, ha sinai ha silea.”

<sup>16</sup> Ale Paul mo turu mo tahe na limana vara la tapurongo ale mara, “La tavgavin Israel peresi kamim ka tamlohi řořoha sei ka lo sile na ololo isan God, ha tapurongo:

<sup>17</sup> God nona tavgavin Israel, mo viřoni na nořa pua, ale mo vaira la ulua řilangi hin rani atu la lo toho Egypt. Ale mo jurira na suihana la malue na mauri slev. <sup>18</sup> God mo lavi na rani řilangi isara na jara hasetoho mata tauni ngavulu vati (40). <sup>19</sup> Ale hitahun haratu, mo vaikomokomo na mara jara tinatinapua mo limaravrua Canaan, ale mo sile na nona tamlohi hin jara atu sohena koruna. <sup>20</sup> La hinau atu mariviti vara i lavi na tauni mo ngavulu sangavulu vati mo ngavulu lima (450). Hitahuna, mo silera na tamlohi ari mo tikeli na rani non přovet Samuel. <sup>21</sup> Moiso, tamlohi la tangi matan vara te nora supe, ale God mo silera hin Saul natun Kish, tavgavin Benjamin matea, ale enia mo aulu mata tauni mo ngavulu vati. <sup>22</sup> Pani God mo nařihia sohena supe, ale mo tau David na jarana. God mo retireti matan David mara, ‘Na hite David natun Jesse vara řomina mo usuri na řomiku matan enia i pa vai na hinau tari na masaloku.’

### *1 Sam 13.14*

<sup>23</sup> Ale mahapin David, Iesu natu, enia haratu sei God mo sohaia usuri na nona retitauhi hinia sohena Jujuri non Israel! <sup>24</sup> Hin la rani atu la tiroma na nona pala, John tamlohi paptijo mo lo retivujavujangi na tavgavin Israel vara la vahaři na nora hehe, ale la posi mai isan God la paptijo. <sup>25</sup> Ale vavahinai non John mariviti vara i lo isoiso, mo vereva vaha visa mara, ‘Ka řomi vara enau hare? Enau mo sopo

tamlohi atu, pani ha lo levosahia vara haratu mo lo mai hitahu hiniau, enau na sopo tataholo vara a uli na asi eve palona.'

<sup>26</sup> La vorai, kamim sei natun Abraham peresi kamim tari sei ka tamlohi řořoha sei ka lo sile na ololo isan God non Israel, retisohai matan juri akerihi, mo mai isařa mo isoiso. <sup>27</sup> Tamlohin Jerusalem peresi na nora tamlohi aulu la mařivisi na retimangovi hin haratu la sile na talai isan Iesu vara i mate. La sopo hitevosahia vara enia haratu sei přovet la lo uli uli matana, hina purongo vara la lo rongo na retireti nona přovet tarea na Sabbath. <sup>28</sup> La sopo eři tapai te malele vara i ori hinia, ale hina purongo hin haratu, la usi Pilate vara i vilimateia.

<sup>29</sup> Ale lara la mařivisi vevuhi na retimangovi mata nona mateia, la juria na talopeilopei, la taua na papa matea. <sup>30</sup> Pani God mo sauteterahia na mateia! <sup>31</sup> Ale mo pala vaha visa isan la haratu sei enira tolu la tai Galilee la sahe Jerusalem, enira natu la vere la hinau sei la hitera isana tavgavuın Israel.

<sup>32</sup> Ale kama lo retivujavujangi kamim hin Retiřuhu atu matan retitauhi sei God mo vai isana nořa pua, <sup>33</sup> vara retitauhi atu God mo mařivisia isařa – natura hin haratu mo tahe Iesu sohen David mo ulia na harua psalm mara,

'Engko Natuku,

nahapani na vujangia

vara enau Tamam.'

*Psa 2.7*

<sup>34</sup> Enia hina varařuhu matea sei God mo tahe Iesu na mateia matan vara i pa sopo řovo, hinau atu mo vereia na Retitapu sei mara,

'A pa sileho na leřuhu tapu peresi na retitauhi sei na vaia isan David.'

*Isa 55.3*

<sup>35</sup> Matana, mo mele vereia na psalm tinapua matea mara,

'O pa sopo tinařihia vara nom Tamlohi Tapu i hite na řovo.'

*Psa 16.10*

<sup>36</sup> Matan David, hitahun haratu mo vai na masalon God na nona rani, mo mate ale la tavunia peresi na

tahisana, epena mo řovo. <sup>37</sup> Pani haratu sei God mo lo tahea na mateia, epena i pa sopo hite na řovo.

<sup>38</sup> Matan haratu, la vorai ha levosahia vara hinia, kama lo retivujavujangia vara God i pa řomi na hehe, <sup>39</sup> ale vara sava tamlohi la tau na nora rasua hinia, la pa tataholo na nahon God, hinau sei Leu non Moses i sopo eři vaia hin te rani. <sup>40</sup> Ha lo kilau! Ha sopo tinařihia vara retireti nona přovet la lo vere kamim, matan la vereia lara,

<sup>41</sup> 'Ha hitea la tamlohi kerekerehi, ha mařurahi tavera hinia ale ha tihai!

Matan na lo vai na vavahinau matea na nomim rani,

vavahinau atu ha sopo eři rasua,

hina purongo vara tea la vereulia isamim.'

*Hab*

*1.5*

<sup>42</sup> Paul enia Barnabas lara la lo malue na nora ima lotu, tamlohi la usia mo řilangi isara vara la mele vere la hinau atu na tavalu wik na Sabbath. <sup>43</sup> Jew matuvana peresi la haratu sei la posi la lavi na rasua nona Jew la lo lotu na ima lotu la usuri Paul enia Barnabas, ale la tuprua atu la vereia isara vara la turu řilangi usuri na řomřuhu non God.

*Paul Mo Vano Isana Tamlohi Rořoha*

<sup>44</sup> Sabbath atu mo usuria, mariviti tamlohi tari hin taon tavera atu la sinai vara la rongora la retivujavujangi na reti non Moli. <sup>45</sup> Pani Jew lara la hite vao atu, mereimerei mo mařivisira, ale la tapulo vereleji na sava Paul mo lo vereia isara, la lo retisatihia.

<sup>46</sup> Paul enia Barnabas la řomřilangi la řaramira lara, "God mo taua vara kama pa sile na Retiřuhu isana tavgavuın Israel tiroma, pani matan ka řohu hinia, ale matan ka hitea vara ka sopo tataholo vara ha lavi na mauri tui, kama pa silea isana tamlohi řořoha. <sup>47</sup> Matan Moli mo retileu hinia isamam hin haratu mo vereia mara,

'Enau na vai kamim sohena malarani isana tamlohi řořoha,

vara ha lavi na reti mata juri i vano na isoiso varama.’ ” *Isa 49.6*

<sup>48</sup> La haratu sei la tamlohi řořoha lara la rongoa, la avulahi hinia ale la hasohaso na reti non Moli, ale la haratu sei God mo viřonira mata mauri tui la rasua. <sup>49</sup> Ale reti non Moli mo lo unu na jara tari hin jara tavera atu.

<sup>50</sup> Pani tamlohi tavera nona Jew la reve takonahi na hařai aulu sei la lo sile na oloolo isan God peresi na tamlohi aulu matan taon tavera atu, ale la vai na vao matea la meresahi hin Paul enia Barnabas ale la tipahi nařihira hin jara tavera atu. <sup>51</sup> Pani la sařsařhi nařihi na tangotango palora matara ale la vano na taon tavera matan Iconium. <sup>52</sup> Ale tamlohi rasua atu la mařivi na avulahi peresi na Tanume Tapu.

## 14

### *Paul Enia Barnabas La Rohi Iconium*

<sup>1</sup> Na rani Paul enia Barnabas la lo toho Iconium, la unu na ima lotu nona Jew, ale la retivujavujangi peresi na suiha mo vaia vao tavera jea matea isana Jew peresi la haratu la tamlohi řořoha la rasua. <sup>2</sup> Pani Jew sei la sopo rasua, la ari posposi la haratu la tamlohi řořoha, ale la komo na řomira la meresahi isan Paul enia Barnabas.

<sup>3</sup> Mo vaia la toho mo peravu atu, ale la retivujavujangi mo sopo te matahu hinira, ale la vereuli na řomřuhu non Moli. Ale Moli mo vujangia vara nona retisohai sei mo varařuhu matan mo sile na suiha isana nona vahařule vara la eři vai na matamata tavera peresi na hinau mařurahi.

<sup>4</sup> Pani tamlohi hin taon tavera atu la patumasa, hai la turu peresi la Jew atu, ale hai la turu peresi la vahařule atu.

<sup>5</sup> Vao matea mata Jew peresi la haratu la tamlohi řořoha peresi na nora tamlohi tatavera la hatihia vara la pa vailejlejira, ale la pa parura, <sup>6</sup> pani Paul enia Barnabas lara la levosahia, la rovo la vano na jara tavera Lycaonia, ale isan la taon tavera atu Lystra enia Derbe peresi na jara

řalihi ea, <sup>7</sup> ale la retivujavujangi na Retiřuhu ea.

### *Paul Enia Barnabas La Rohi Lystra Enia Derbe*

<sup>8</sup> La pa lo toho atu Lystra la mai tataholo na tamlohi papao matea, mo vora palona la sati ale mo sopo lo hahau na maurina. <sup>9</sup> Tamlohi atu mo lo tapurongo mo řuhu na retivujavujangi non Paul, ale Paul mo hitea ale mo hitevosahia vara enia mo rasua vara enia i eři řuhu. <sup>10</sup> Ale Paul mo vereia isana na leo tavera matea mara, “O turu!” ale tamlohi atu mo turu tataholo mo tapulo hahau.

<sup>11</sup> Ale vao atu lara la hite hinau atu Paul mo vaia, la ulo na leon Lycaonia lara, “La tamlohi nike enira god sei la tai na tuka la pala na epe tamlohi!”

<sup>12</sup> La tapulo tovi Barnabas vara Zeus sei god nona mara Greek, ale Paul enia god sei Hermes matan enia mo lo sile na retireti. <sup>13</sup> Temple non Zeus mo lo toho na jingoima ropen taon tavera atu. Ale nona pŕis peresi na vao la lavi na buluk peresi na řongořongo la vaira na vira pahai, ale la lavira la vano na mataruan taon tavera atu, ale la tatamahu vara la pa vai na malamalai isan la vahařule atu.

<sup>14</sup> Pani Barnabas enia Paul lara la rongovosahi na sava la lo vereia, la řari na nora ruru ale la maro la vano na livuhan vao atu la lo ulo lara, <sup>15</sup> “La tapala, ka lo vai la hinau sei mata sava? Kamam tamlohi sohemim purongo. Kama mai matan vara kama sile na Retiřuhu isamim matan vara ha pa vahaři na hinau la sopo řuhu, ale ha posi mai isan God sei mo mauri mo vai na tuka, varama, tasi peresi na hinau tari sei la lo toho hinira. <sup>16</sup> Tuai mo tinařihia vara la haratu la sopo levosahi God na jara tari la eři usuri na masalora, <sup>17</sup> pani mo vujangia vara enia mo lo mauri na hina řuhu mo lo vaira sohena usa mo jovi na masapa ale hanhani la řuhu, ale ka masu na hanhani ka avulahi matana.”

<sup>18</sup> Pani hina purongo hin haratu, Paul enia Barnabas mariviti la sopo

eři horo la vao atu vara la sopo vai na malamalai isara.

<sup>19</sup> Pani Jew hai la tai Antioch peresi Iconium, la mai la posi na řomin la vao atu la meresahi hinira, ale la paru Paul ale la reve tahitahia mo malue hin taon tavera atu matan la řomi vara mo mate. <sup>20</sup> Pani tamlohi rasua lara la lo turu řalihia, Paul mo mele turu ale mo mele unu hin taon tavera atu. Ale na rani tinapua matana, Paul enia Barnabas la malue la vano matan Derbe.

### *Paul Enia Barnabas La Sivo Antioch Matan Syria*

<sup>21</sup> Paul enia Barnabas lara la retivujavujangi na taon tavera matan Derbe la vai na tamlohi usuri matuvana. La mele hilu la sivo Lystra, Iconium ale la mele sahe Antioch matan Pisidia, <sup>22</sup> ale hin la jara atu la tueni na rasua nona tamlohi usuri. La retituetuenira vara la turu řilangi na nora rasua, ale la vere mamahunia isara lara, “Ra pa unu hin mauri atu God mo aulu hinia na malele rani řilangi matuvana.” <sup>23</sup> Paul enia Barnabas la viřoni na patu tamlohi mata kilau na vao kalesia tari, ale na ususi peresi na tapuhoro hanhani la taura na liman Moli sei la lo tau na nora rasua hinia. <sup>24</sup> Moiso la mele sivo roto Pisidia vavano la tikeli Pamphylia. <sup>25</sup> Hin jara atu la mele retivujavujangi Perga moiso la sivo Attalia.

<sup>26</sup> La malue hin jara atu la vele na boti la vano Antioch matan Syria, jara atu sei la lo tapulo na nora hahau ea, jara sei la taura na liman řomřuhu non God ea matan voko sei la isoiso hinia natu. <sup>27</sup> Lara la pala, la tovi matavuhi na vao kalesia na jara matea, ale la vereuli vevuhi na sava God mo vaia isara ale sohena sava mo roi na malele mata rasua isan la haratu la tamlohi řořoha. <sup>28</sup> Ale la lo toho peresi na tamlohi usuri Antioch mo peravu makomona.

## 15

### *Council Tavera Nona Kalesia Jerusalem*

<sup>1</sup> Pani tamlohi hai la tai Judea la sinai la tapulo vujangi na kalesia

vara, “Vara ha sopo taiřalihi sohen leu non Moses mo vere, ha pa sopo eři juri!” <sup>2</sup> Paul enia Barnabas lara la rongoa la sopo avulahi, la vauriuri tavera peresira matana. Ale vao kalesia atu la viřoni Paul enia Barnabas peresi na nora tamlohi hai, vara la sivo Judea matan la sahe Jerusalem vara la sorahia peresi na vahařule tolu na tamlohi tatavera nona vao kalesia Jerusalem. <sup>3</sup> Vao kalesia Antioch la řulera la sivo, ale lara la lo sivo la rohi Phoenicia peresi Samaria, ale la sorahia sohena sava la haratu la tamlohi řořoha la posi, ale vorai kalesia hin la jara atu la avulahi tavera matana.

<sup>4</sup> Ale hin rani atu la kakau Jerusalem, kalesia tari, vahařule peresi na vajiahara, la lavi Paul enia Barnabas na avulahi. Ale la vere vevuhi na sava God mo vaia na nora vavahinai. <sup>5</sup> Pani tamlohi rasua hai sei la tai na vao Pharisee, la turu lara, “Ha vujangi la haratu la tamlohi řořoha vara la pa taiřalihi, ale la pa usuri na leu non Moses.”

<sup>6</sup> Vahařule peresi na vajiahara la pulutahi vara la sorahi hinai sei. <sup>7</sup> Retireti matuvana la vano moiso, Peter mo turu ale mara, “La vorai, ka levosahia vara tiroma God mo viřoniau vara a vano a retivujavujangi isan la haratu la tamlohi řořoha, matan vara la eři rongoa na retisohai mata Retiřuhu, ale la rasua. <sup>8</sup> God sei mo levosahi na mapu tamlohi, mo vujangia vara enia mo avulahi hinira, matan enia mo sile na Tanume Tapu isara sohen mo lo silea isařa nika. <sup>9</sup> Na nahon God, enřa řa sopo tinapua hinira, matan mo vai na mapura la vokevoke na rasua sohena. <sup>10</sup> Ale vara mo sohena, mata sava ka lo vaihite God, matan ka opoia vara ha tau na tetehi puhoni isana tamlohi usuri sei la tamlohi řořoha? Hinai sei, enřa teni nořa pua la sopo eři solotia! <sup>11</sup> Pani řa rasua vara God i pa juriřa na řomřuhu non Moli Iesu sohera.”

<sup>12</sup> Ale řomřomi atu mo moti, ale tamlohi tari la tapurongo isan Barnabas enia Paul, la sorahi na matamata tavera peresi na hinai

mañurahi sei God mo lo vaira na naho tamlohi la tamlohi řořoha.

<sup>13</sup> La retireti mo isoiso, James mo turu mo vereea mara, “La vorai, ha tapurongo isaku. <sup>14</sup> Ka rongoa Simon Peter mo vereea moiso sohena sava God mo řulea isana tamlohi řořoha vara i lavi nařihi na nona tamlohi isara. <sup>15</sup> Ale reti nona přovet la majinga hin hinou sei sohen la ulia na Retiulia lara,

<sup>16</sup> ‘Hitahun hinou sei a pa mele pala, ale a pa mele voro na jaran supe David sei mo jovi.

A pa mele voroa hin la sope-sopena sei la lo toho, ale a pa mele turuhia,

<sup>17</sup> matan vara tamlohi tinatinapua na varama la pa hite Moli ea, la haratu sei la tamlohi řořoha sei, na tovira moiso vara la pa noku. Harihi enia sava Moli mo vereea.’

*Amos 9.11-12*

<sup>18</sup> Haratu sei mo lo vereuli la hinou nike tuai moiso.

<sup>19</sup> Matan haratu, noku kilakilau řa sopo mele sile te rani řilangi tinapua isana tamlohi řořoha sei la lo posi la mai isan God, <sup>20</sup> pani mo řuhu vara řa uli te leta hatea mata i vereea isara vara i horora vara la sopo hani na mit sei la silea isana tamasi moiso, ale vara la toho asau na mauri maji, ale vara la sopo hani te maji sei la punia, ale la sopo inu na řae.\* <sup>21</sup> Matan la leu nike non Moses la retivujavujangira na ima lotu nona Jew na taon tavera tari na Sabbath mata tauni mo visa moiso.”

### *Leta La Ulia Isana Tamlohi Rořoha*

<sup>22</sup> Ale vahařule peresi na vajiahara peresi na vao kalesia Jerusalem, la viřoni na tamlohi hai, ale la řulera la sahe Antioch matan Syria peresi Paul enia Barnabas, vara la vereuli na řaramin řomřomi atu la lo hahau matana. La tamlohi atu la viřoni na patu tamlohi nona vao kalesia mo rua, Judas sei tapala hijana Barsabas peresi Silas. <sup>23</sup> Harihi enia leta atu la lo lavia peresira:

“Retioloolo isamim la vorai kalesia Antioch, Syria peresi Cilicia sei ka tamlohi řořoha, mo tai isana vorai kalesia nike Jerusalem, peresi na vahařule peresi na vajiaha sei la aulu na vao kalesia nike.

<sup>24</sup> Kama levosahia vara tamlohi hai la tai nike la vano isamim ale la vai na řomimim la kaka na nora vujangi, pani kama sopo řulera hin te hinou sohena. <sup>25</sup> Ale matana, kama hitea vara mo tataholo vara kama řule la vahařule sei Judas enia Silas peresi la vorai řuhuřuhu sei Paul enia Barnabas isamim usuri na řomřomi kamam tari nike kama hati-hia. <sup>26</sup> Paul enia Barnabas sei mariviti la mate matan Moli Iesu Křisto. <sup>27</sup> Ale matana, kama lo řule Judas enia Silas vara la pa vereuli na sava kama ulia hin leta nike na nahomim.

<sup>28</sup> Matan kama majinga peresi na Tanume Tapu vara i pa mele řuhu vara kama sopo mele tau te retileu řilangi isamim, pani la retileu nike mo visalete purongo:

<sup>29</sup> Vara ha sopo hanhani na mit sei la silea isana tamasi moiso, ale vara ha sopo hani te maji sei la punia, ale ha sopo inu na řae, ale vara ha toho asau na mauri maji. Vara ha sopo vai la hinou atu, i pa řuhu jea isamim. Enia natu, enřa vuho.”

<sup>30</sup> Ale la vahařule tupu vati atu la malue, vahatea la sahe Antioch. La tovi matavuhi na kalesia tari la mai jara matea atu, ale la evi leta atu isara. <sup>31</sup> Ale avulahi tavera mo jovi isana kalesia tari hin rani atu, lara la rongu retisohai řuhu atu.

<sup>32</sup> Ale Judas enia Silas enira tupra rua la přovet, ale la retireti mo peravu isana kalesia vara la tueni na nora rasua vara i ulua i mele řilangi. <sup>33</sup> La lo toho atu mata makomo rani moiso, la řulera la mele sivo Jerusalem peresi na leřuhu nona kalesia isan la haratu sei la lo řulera. <sup>34-35</sup> Pani Paul enia Barnabas la lo toho Antioch, la lo vujangi, ale la retivujavujangi na reti non Moli peresi na tamlohi tinapua hai.

\* **15:20:** maji sei la punia: mo sopo tataholo vara řa hani na maji la punia matan řaena mo pa lo mařivi na visihona.



### *Paul Enia Barnabas*

<sup>36</sup> Rani hai la vano moiso, ale Paul mo vereā isan Barnabas mara, “Ra mele sahe řa rohi na vorai hin la taon tavera tari sei řa lo retivujavujangi na reti non Moli ea, ale řa hitea vara la lo sohena sava.” <sup>37</sup> Barnabas mo avulahi ale mo opoia vara i lavi John Mark. <sup>38</sup> Pani Paul mo řohu řilangi, matan John Mark mo rovo hinira tiroma Pamphylia ale mo sopo tuenira na nora vavahināu. <sup>39</sup> La sopo eři mai na řomřomi matelete mo vaia Barnabas mo lavi John Mark peresia ale la vele na boti la sahe Cyprus, <sup>40</sup> pani Paul mo viřoni Silas ale la malue peresi na leřuhu nona vorai kalesia lamane peresi na hařai. <sup>41</sup> Mo sahe roto Syria peresi Cilicia mo tueni na vao kalesia tari ea vara la turu řilangi na nora rasua.

## 16

### *Timothy Mo Usuri Paul*

<sup>1</sup> Paul mo mele sahe mo mai Derbe, ale mo sahe Lystra. Hin jara atu mo tapai na uluvou matea enia tamlohi usuri matea, hijana Timothy, enia natun hařai Jew matea enia kalesia, pani tamana enia mara Greek matea. <sup>2</sup> Vorai kalesia Lystra peresi Iconium la vereā vara enia tamlohi řuhu matea. <sup>3</sup> Paul mo opoia vara Timothy i usuria na nora hahau, ale mo lavia mo taiřalihia matan la Jew atu la lo toho hin jara atu la levosahia vara tamana enia mara Greek matea. <sup>4</sup> Lara la lo vano na taon tavera hařehateahi, la lo vereuli na sava sei vařařule peresi na vajiāha sei lo aulu na kalesia Jerusalem, la hatihia vara tamlohi řořoha la pa ololo hinira. <sup>5</sup> Matana, vao kalesia tari la mele ulua řilangi na nora rasua, ale evira mo lo sahe aulu na rani hatehateahi.

### *Tamlohin Macedonia Matea Mo Tovi Paul*

<sup>6</sup> Ale la sahe la hahau roto na jara tavera matan Phrygia peresi Galatia, matan Tanume Tapu mo horora vara la sopo sivo Asia mata la vere na retisohai non Moli ea. <sup>7</sup> Lara la mai Mysia, la vaihitea vara la sahe na jara

matan Bithynia, pani Tanumen Iesu mo horora, <sup>8</sup> ale la mele hahau sivo roto Mysia moiso la sivo Troas.

<sup>9</sup> Hin vutepongi atu hināu matea sohena mavuho matea mo pala isan Paul. Mo hite na mara Macedonia matea mo lo turu atu mo lo usia řilangi mara, “O mai Macedonia, o tueni kamam!” <sup>10</sup> Paul mara mo hite mavuho atu moiso, kama turu vahatea, ale kama aleale malelemam vara kama vano Macedonia, kama levosahia vara God mo tovi kamam vara kama vano kama retivujavujangi na Retiřuhu isara.

### *Lydia Mo Rasu Na Retiřuhu*

<sup>11</sup> Ale kama vele na boti Troas kama sahe tataholo Samothrace, ale mo mele rani sahe kama hosu Neapolis, <sup>12</sup> moiso kama malue atu kama lo sahe Philippi, enia taon tavera matan Macedonia, jara mara Rome matea. Kama toho atu mata makomo rani.

<sup>13</sup> Ale na Sabbath kama malue na mataruan taon tavera atu, kama vano makomona na pahisa wai matea. Kama řomi vara enia jara matea tamlohi la lo pulutahi mata ususi ea, ale kama sakele hin jara atu ale kama lo sorasora peresi la hařai atu sei la lo pulutahi atu. <sup>14</sup> Vonara matea, hijana Lydia enia mara Thyatira sei, enia taon tavera matea, enia mo lo vai na mania na ruru řuhu sei perpel, ale matan enia mo lo lotu God, mo lo tapurongo isamam. Ale God mo roi na mapuna vara i rasu na sava Paul mo lo vereā. <sup>15</sup> Ale mo lavi na paptijo peresi na vao imana, ale hitahuna, mo usia řilangi isamam mara, “Vara na nomim kilakilau ka hitea vara enāu na lo turu řilangi hin Moli, ha mai na imaku ale ha lo toho ea.” Ale mo vereā mo řilangi vavano kama majinga isana.

### *Paul Enia Silas Na Ima Rilangi*

<sup>16</sup> Kamara kama lo vano na jara mata ususi, kama tapai na hařarihi slev matea sei tanume sasati mata vere na hināu i pa masese mo lo toho hinia. Ale nona tamlohi tavera la lo lavi na mania tavera matana. <sup>17</sup> Mo lo usuri kamam peresi Paul, mo lo

ulo aulu mara, “La tamlohi nike enira la volitusi non God sei mo Aulu Jea, enira la lo retivujavujangi kamim na malele mata juri.”

<sup>18</sup> Ale mo lo vai hinau atu sohena mata rani matuvana moiso, ale Paul mo malokona, ale mo posi vano isana mo vere a isan tanume sasati atu mara, “Na retileu isam na hijan Iesu Křisto vara o malue hinia.” Ale vahatea purongo mo tinařihia.

<sup>19</sup> Pani nona tamlohi taverna lara la hitea vara malele mata nora mania mo pelati, la taurilati Paul enia Silas la reve tahitahira la sivo na jara maket, la vaira la turu na naho tamlohi aulu hin taon atu. <sup>20</sup> Lara la lavira la mai la turu na naho tamlohi aria atu, la vere a lara, “La mara Jew nike, la lo vai na řom tamlohi hin taon taverna nike la sopo sakele, <sup>21</sup> ale la lo vujangi na tamlohi na posposi hai mo sopo tataholo vara enřa mara Rome řa lavira teni vara řa vaira!”

<sup>22</sup> Vao atu la tapulo turuleji hinira, ale la tamlohi aria atu la řari nařihi na ruru non Paul enia Silas, ale la retileu vara la hamajira na maja. <sup>23</sup> Hitahun haratu la hamaji komokomora, la pulahira na lolo ima řilangi, ale la retileu vara tamlohi ima řilangi i lo kilaura vara la sopo mele malue. <sup>24</sup> Mara mo lavi retileu atu sohena, mo pulahira sivo na jara matea na lolona vahatea. Ale mo sohoni na palora na koko tapea mo pilatira.

<sup>25</sup> Na livuha vutepongi, Paul enia Silas la pa lo ususi ale la lo lalavete isan God, ale tamlohi tinapua na lolo ima řilangi, la lo tapurongo hinira. <sup>26</sup> Vahatea purongo, mihi taverna matea mo hisu, mo hisuhi ima řilangi atu mo tikeli pulona vahatea, ale vahatea purongo pelati tari la roi, ale jen tari la jovi nařihi hinira enira mo isoiso. <sup>27</sup> Tamlohi kilau na ima řilangi mara mo turu mo hitea vara pelati tari la roi, mo reve nařihi na nona sita mo tatamahu vara i pa vilia enia hasena, matan mo řomi vara la haratu la lo toho na lolo ima řilangi la rovo moiso. <sup>28</sup> Pani Paul mo ulo aulu

isana mara, “O sopo vaia! Matan kamam mo isoiso nahai kama lo toho!”

<sup>29</sup> Tamlohi atu mo ulo mata lamu ale mo maro matan lolon ima řilangi atu vahatea, ale mo jovi na palon Paul enia Silas na nona matahu. <sup>30</sup> Moiso mo lavira la malue ale mo usia isara mara, “La tamlohi taverna, a pa vai na sava vara a eři juri hinia?”

<sup>31</sup> La řaramia lara, “O tau na nom rasua hin Moli Iesu, ale o pa juri, engko peresi na vao imam.” <sup>32</sup> Ale la vere na reti non Moli isana peresi la haratu sei la lo toho peresira na lolo ima. <sup>33</sup> Ale hin vutepongi atu purongo mo lavira la vano mo hoje na matara maja isara, ale enia peresi na vao tari na imana la paptijo vahatea. <sup>34</sup> Ale pa tamlohi atu mo lo kilau na ima řilangi mo lavira la sahe na imana, ale mo tau na hanhani na nahora ale mo avulahi taverna peresi na vao imana, matan enira la tau na nora rasua hin God.

<sup>35</sup> Pani na nahonaho rani, la tamlohi aria atu la řule na nora police vara la vere a isan tamlohi atu mata kilau na ima řilangi lara, “O tinařihira!”

<sup>36</sup> Pa tamlohi atu mata kilau na ima řilangi, mo vere retireti atu isan Paul mara, “Tamlohi aria, la vahařule vara a tinařihi kamim. Ale matana, ha malue ha vano na tamata.”

<sup>37</sup> Pani Paul mo vere a isana police atu mara, “La tamlohi atu la hamaji kamam na naho tamlohi, la sopo usuri na posposi tataholo mata ari na tamlohi, hina purongo vara kama mara Rome, ale la pulahi kamam na ima řilangi. Ale nake, la opoia vara la tinařihi kamam tamlohi la sopo levosahia? Mo sopo te malele sohena. Ha vano ha verera hinia vara enira la pa mai nike, ale la nařihi kamam.”

<sup>38</sup> La police atu la vere a retireti atu isan la tamlohi aria atu. Ale la tamlohi aria atu lara la rongoa vara Paul enia Silas enira mara Rome, la matahu taverna matana. <sup>39</sup> Ale la mai la řomtuhutuhu isara. Ale la lavi nařihira la usira řilangi vara la malue hin taon taverna atu. <sup>40</sup> Lara la malue na ima řilangi, la vano la unu na iman Lydia, ale lara la hite

na vorai kalesia atu la retituetuenira moiso la malue.

## 17

### *Paul Enia Silas La Kakau Thessalonica*

<sup>1</sup> Lara la hahau roto Amphipolis enia Apollonia moiso, la mai Thessalonica sei ima lotu nona Jew matea mo lo toho ea. <sup>2</sup> Ale usuri na posin Paul, mo lo matavuhi peresira mata Sabbath mo tolu, ale mo lo vereuli na Retitapu isana tamlohi ea. <sup>3</sup> Mo lo vereuli mamahuni na Retitapu na nona vujangi sohena sava Křisto i pa lavi na rongohaji, ale i pa mele turu na mateia, ale mo vereea mara, "Iesu akerihi natu sei na lo retivujavujangia isamim, enia Křisto atu." <sup>4</sup> Tatua Jew atu la rasua peresi na vao tavera mara Greek la lo lotu God peresi na hařai aulu matuvana, la avulahi vara la tapala peresi Paul enia Silas.

<sup>5</sup> Pani tamlohi aulu nona Jew la mereimerei hinira, ale la lavi na tamlohi sasati hai hin vao tavera atu na jara maket, ale la vaira la mai vao meresahi matea, ale taon tavera atu mo tapulo roroa na leora. <sup>6</sup> Ale lara la sopo eři hite Paul enia Silas, la reve tahitahi Jason peresi na vorai kalesia hai, la vaira la turu na naho tamlohi aulu matan taon tavera atu, la ulo lara, "La tamlohi nike sei la lo posileji na varama, enira nahai la pala nike sohen la pete vaia na jara tinapua moiso, <sup>7</sup> ale Jason mo avulahi hinira mo taura na imana! Enira mo isoiso la lo turuleji na retileu non supe nona mara Rome matan la lo vere na supe tinapua matea hijana Iesu!"

<sup>8</sup> Ale tamlohi peresi na tamlohi aulu matan taon tavera atu lara la rongo la hinau sei, řomira la sopo sakele. <sup>9</sup> La tamlohi aulu atu matan taon tavera atu lara la lavi na mania mata volituhu non Jason peresi la vorai kalesia tinapua atu moiso, la tinařihira.

### *Paul Enia Silas La Kakau Berea*

<sup>10</sup> Hin vutepongi atu purongo, kalesia la řule Paul enia Silas la malue la vano Berea, ale lara la pala atu, la vano la unu na ima lotu nona Jew.

<sup>11</sup> Ale Jew matan Berea enira tamlohi ale lelevosahi, la jeu la haratu Thessalonica, matan la lo opoia jea vara la tapurongo hin retisohai atu na rani hatehateahi, ale la lo kilau usuri mamahuni na Retitapu matan vara la hitea vara mo sohena teni mo vono. <sup>12</sup> Ale matana, vao tavera isara la rasua peresi na mara Greek aulu hai lamane peresi na hařai. <sup>13</sup> Pani Jew matan Thessalonica lara la rongoa vara Paul mo lo retivujavujangi na retisohai mata reti non God Berea, la mai ea sohena, ale la vai na vao matea matan vara la vai na řomi tamlohi la sati. <sup>14</sup> Ale vahatea purongo la vorai kalesia atu la řule Paul mo sivo na tasi, pani Silas enia Timothy la lo toho atu Berea. <sup>15</sup> La haratu la lo tiroma hin Paul la lavia mo sivo la tikeli Athens, ale Paul mo vereea isara mara la vere Silas enia Timothy la sinai isana vila, ale la vorai kalesia atu la malue la sahe matara.

### *Paul Mo Retivujavujangi Athens*

<sup>16</sup> Ale na rani Paul mo lo saovira Athens, řomina mo jovi tavera matan mo hite taon tavera atu mo mařivi na tamasi. <sup>17</sup> Ale mo lo vano na ima lotu nona Jew vara i retivujavujangi isara peresi na tamlohi řořoha sei la lo lotu God ea, ale na rani hatehateahi mo lo vujangi na vao tamlohi sei la lo toho na jara maket.

<sup>18</sup> Ale Paul mo mele sorasora peresi na tamlohi hai la lo usuri na vujangi non Epicurus peresi hai non Zeno sei la tovira Stoic,\* ale hai la lo usia lara, "Tamlohi rongorongo vono nike mo lo vere na sava nahai?" Tatuara lara, "Vara o tapurongo usuria, o pa hitea sohena vara mo lo vujangi na rasua paro matea." La pa vereea sohena matan Paul mo lo retivujavujangi na Retiřuhu matan Iesu peresi na nona sauteterahi. <sup>19</sup> Ale la lavi Paul la vano

\* **17:18:** Epicurus/Zeno: Epicurus enia Zeno la vujangi na nora kilakilau mata mauri isana tamlohi. Ale hai la usurira, la haratu la lo usurira la lo vereea vara enira la tamlohi lelevosahi. Hija tamlohi usuri non Epicurus enia Epicurean, ale hija tamlohi usuri non Zeno enia Stoic.

na council nora sei hijana Areopagus,† lara, “O eñi vereuli kamam hin vujangi paro akerihi sei ko lo retivujavujangia? <sup>20</sup> Matan ko lo vere na hinau paro hai nahai na peromam, ale kama opoia vara kama levosahi na řaramira.” <sup>21</sup> Mara Athens peresi na tamlohi mara jara tinatinapua sei la lo toho atu, tarea la lo opoia vara la lo sorahi na řomřomi paro sei la pa pala purongo.

<sup>22</sup> Ale Paul mo turu na naho vao matan Areopagus atu ale mara:

“Mara Athens, na hitea vara kamim ka řilangi na sava ka lo rasua, <sup>23</sup> matan nara na lo hahau řalihi, ale na hite na nomim hinahinau mata lotu, ale na mele hite na uliuli matea mo lo toho na votavota vara,

**Isana god matea  
kama sopo levosahia**

Matan haratu a pa retivujavujangi kamim hin God atu sei ka lo lotua pani ka sopo levosahia.

<sup>24</sup> God atu sei mo vai na varama peresi na hinau tari hinia enia Moli matan na tuka peresi na varama, ale mo sopo toho na ima lotu sei tamlohi la lo vaira na limara, <sup>25</sup> teni tamlohi la sopo volitusi isana na limara sohena vara enia mo opoi te hinau isara, pani enia natu mo sile na mauri peresi na maromaro peresi na hinau tari isana tamlohi tari. <sup>26</sup> Ale na tamlohi matea mo vai na tamlohi mara jara tinatinapu tari vara la toho na jara tari na varama, mo tau na nora rani ale mo tau na jara sei vara la pa toho ea, <sup>27</sup> matan vara la pa ale God, ale la pa tarongo ale vara la tapaia, pani enia mo sopo toho asau hiniřa hatehateahi. <sup>28</sup> Matan hinia, enřa řa lo mauri, řa lo vavahinai ale řa lo toho, sohena nomim tamlohi lelevosahi hai la vereea moiso lara, ‘Matan enřa sohena enřa taniana.’

<sup>29</sup> Ale matan enřa sei řa natun God, řa pa sopo řomřomia vara God enia hinau matea la vaia na gold teni silver teni vatu, teni te niniu tamlohi la vai mamahunia usuri na řomira. <sup>30</sup> Matan haratu, hina purongo vara

God mo lo kilau purongoi la haratu la lo toho na mauri řořoha, pani nake, mo lo retileu vara tamlohi tari na jara tari vara la pa vahaři na nora hehe, <sup>31</sup> matan enia mo tau na rani matea moiso vara i pa ari na varama usuri na nona posposi tataholo jea na lima tamlohi matea enia mo viřonia, ale mo vujangia mo memera isana tamlohi tari hin haratu mo sauteterahia na mateia.”

<sup>32</sup> Ale lara la rongo na retireti matan sauteterahi atu, hai la tapulo vaivaia. Pani hai lara, “Kama pa mele tapurongo isam matan la hinau akerihi hin te rani.” <sup>33</sup> Ale Paul mo malue na naho tamlohin Areopagus atu. <sup>34</sup> Pani tamlohi hai la usuria ale la rasu na sava mo lo verera. Vonara matea hijana Dionysius, enia tamlohi matea hin council tavera atu Areopagus, ale hařai matea hijan Damaris, ale mele tamlohi tinapua hai perezira.

## 18

### *Paul Mo Tapai Priscilla Enia Aquila*

<sup>1</sup> Hitahun haratu, Paul mo malue Athens mo sivo Corinth. <sup>2</sup> Ale mo tapala peresi na Jew matea hijana Aquila mara Pontus matea sei mo pa tai Italy purongo peresi narouna Priscilla, matan Claudius, supe matan Rome, mo retileu vara Jew tari la malue Rome, <sup>3</sup> ale matan Paul, enia nona voko mo sohera la lo vai na tent, ale mo lo toho peresira mo lo voko peresira.

<sup>4</sup> Ale na Sabbath hatehateahi, Paul mo lo retivujavujangi isana Jew peresi na mara Greek na nora ima lotu ale mo lo vaihitea vara la levosahia vara Iesu enia hare.

<sup>5</sup> Silas enia Timothy lara la tai Macedonia la pala, Paul mo tau vevuhi na nona rani mata retivujavujangi na reti non God, ale mo lo vereulia isana Jew tarea vara Iesu enia Křisto atu la lo kilau matana. <sup>6</sup> Pani Jew lara la řohu hinia, ale la verelejleja. Paul mo vai na

† 17:19: Areopagus: Council akerihi enia mo lo kilau usuri na vujangi tari la lo unu Athens peresi na tamlohira.

tovongi matea mo vujangi na nona řohu hinira hin haratu mo sařsařhi nařihi na tangotango na nona ruru ale mara, “Raemim i pa toho na patumim, mo sopo te noku hinau hinia! Mo tapulo nake, a pa vano isana tamlohi řořoha!”

<sup>7</sup> Moiso, Paul mo malue hin nora ima lotu atu mo vano mo unu na ima matea mo lo toho na pahisan ima lotu atu, enia iman Titius Justus, tamlohi řořoha matea pani enia mo lo lotu God. <sup>8</sup> Pani Crispus, tamlohi aulu mata ima lotu atu, enia peresi na vao imana sohena la rasu Moli. Mara Corinth tinapua hai sei la rongo hinau atu, la rasua, ale la lavi na paptijo sohera.

<sup>9</sup> Ale Moli mo vujangi Paul na hinau matea sohena mavuho matea hin vutepongi atu, mo vereea isana mara, “O sopo matahu, o retireti, o sopo puni na jingom, <sup>10</sup> matan enau na lo toho peresiho, ale tea i sopo eři tikeli na epem vara i komoho, matan noku tamlohi hin taon tavera nike la mařivi.” <sup>11</sup> Matan haratu, Paul mo lo toho atu mata tauni matea vitu mo limarave, mo lo vujangi na reti non God isara.

#### *Paul Mo Turu Na Nahon Gallio*

<sup>12</sup> Ale hin rani atu Gallio mo lo aulu hin Achaia, Jew la pulutahi jara matea la vai na vao tavera matea, ale la turuleji hin Paul, la taurilatia la vaia mo turu na naho jara aria vara la aria <sup>13</sup> lara, “Tamlohi akerihi mo lo vereea isana tamlohi vara la lotu God na malele matea mo sopo usuri na posposi sei leu non Moses mo lo vereea.”

<sup>14</sup> Paul mo tatamahu vara i pa retireti pani Gallio mo vereea isan la Jew atu mara, “Vara hinau akerihi enia mata tope na leu matea, teni matan te vařen sasati, i pa tataholo vara a tapurongo isamim Jew matana, <sup>15</sup> pani matan enia mata nomim retireti peresi na hija tamlohi peresi na nomim leu, kamim purongo ha vai tataholoia. A pa sopo ari na hinau sohena.”

<sup>16</sup> Ale mo vai na nona tamlohi la sohai nařihira na nona jara aria. <sup>17</sup> Ale

vao atu la taurilati Sosthenes, tamlohi aulu mata ima lotu nona Jew, ale la tapulo tamajia na naho jara aria atu purongo, pani Gallio mo sopo kilaura hinia.

#### *Paul Mo Mele Vano Antioch Matan Syria*

<sup>18</sup> Paul mo mele toho Corinth mata rani matuyana moiso natu mo vere enřa vuho isana vorai peresi na vevorai kalesia atu. Ale mo vele na boti matea peresi Priscilla enia Aquila matan vara la vano Syria. Paul mo hiri nařihi na vuluna hin rani atu la pa lo toho Cenchreae mata vujangia vara mo vai vevuhi na nona retitauhi. <sup>19</sup> Na rani la pala Ephesus, Paul mo tinařihi Priscilla enia Aquila la pa lo toho atu. Ale enia mo sahe mo unu na ima lotu nona Jew, ale mo retivujavujangi isara. <sup>20</sup> Mara Ephesus lara la usia vara i toho peravu isara, mo vereea isara mara mo vono, <sup>21</sup> pani mo vere enřa vuho isara ale mara, “Vara na masalon God, a pa mele mai isamim.” Moiso la mele vele hin boti atu, la malue Ephesus. <sup>22</sup> Ale lara la hoso Caesarea, Paul mo sahe Jerusalem vara i sile na retioloolo isana vao kalesia ea tiroma, moiso mo pa sahe Antioch matan Syria.

<sup>23</sup> Mo lo toho atu mata makomo rani, moiso mo mele malue mo sahe mo řalihi na jara matan Galatia enia Phrygia vara i vai na tamlohi usuri hin la jara atu la mele řilangi.

#### *Apollos Mo Tapulo Na Nona Vavahinai*

<sup>24</sup> Hin pongi atu Jew matea hijana Apollos mara Alexandria mo pala Ephesus. Ale enia tamlohi sorasora řuhu matea mo levosahi mamahuni na Retitapu. <sup>25</sup> Mo lavi na nona levosahi matan Moli moiso, ale maurina mo lo vujangi na nona avulahi na nona retireti peresi na vujangi tataholo řuhu na hinahina varařuhu hin Moli, pani nona levosahi mo tikeli na paptijo non John purongo. <sup>26</sup> Mo tapulo na nona retireti na lolo ima lotu nona Jew mo sopo te matahu hinia. Pani Priscilla enia Aquila lara la rongoa, la tovi řořohia vano

hasena, ale la vere tataholoi na malelen God isana.

<sup>27</sup> Hitahu, Apollos mara mo opoia vara i sivo Achaia, vorai kalesia peresi na vevorai kalesia la retituetuenia vara i vaia. Ale la uli na leta matea isana vorai kalesia Achaia vara la lavia. Mara mo pala isan la haratu la rasua atu, mo tuenira mo tavera usuri na řomřuhu non Moli, <sup>28</sup> matan mo vilijovjovi vevuhi na řomřomi nona Jew na naho tamlohi. Ale mo vujangira usuri na Retitapu vara Křisto atu enia Iesu.

## 19

### *Hatolu Hahau Mata Vavahinau Non Paul*

<sup>1</sup> Ale hin rani atu Apollos mo lo toho Corinth, Paul mo hahau roto na uratan Asia mo pala Ephesus. Ale hin jara atu mo tapai na tamlohi usuri hai, <sup>2</sup> ale mo vereea isara mara, “Kamim ka lavi na Tanume Tapu hin rani atu ka tapulo rasua, teni mo vono?”

La řaramia lara, “Mo vono, kama sopo lo rongoa vara te Tanume Tapu mo lo toho.”

<sup>3</sup> Ale Paul mo vereea mara, “Vara sohena, kamim ka paptijo na sava?”

Lara, “Paptijo atu John mo lo vaia.” <sup>4</sup> Paul mara, “Paptijo atu John mo lo vaia, enia paptijo mata vahaři na hehe, ale mo lo vereea isana tamlohi vara la pa tau na nora rasua hin haratu mo lo mai hitahu hinia, enia mo lo vere Iesu sei.”

<sup>5</sup> Lara la rongo hinahu atu, la paptijo na hijan Moli Iesu, <sup>6</sup> ale Paul mara mo tau na limana hinira, Tanume Tapu mo mai hinira ale la tapulo retireti na leo tinatinapua, ale la lo retiman-govi. <sup>7</sup> Korong, enira tupu sangavulu řomana mo rua.

### *Vavahinau Non Paul Ephesus*

<sup>8</sup> Ale Paul mo unu na ima lotu nona Jew, ale mo retivujavujangi mo sopo te matahu isana mata vitu mo tolu. Mo vere mamahunia vara mauri atu God mo aulu hinia mo sohena sava, ale mo vaira la hitevosahi na nona vujangi matan mauri atu. <sup>9</sup> Pani tatuara la lo turu řilangi na řomira

hasera, ale la řohu vara la rasu. La verelejeleji rasua atu na naho tamlohi. Ale Paul mo malue mo lavi la tamlohi usuri atu peresia. Na rani hatehateahi la lo pulutahi na ima matavuhi matan Tyrannus, ale mo lo retivujavujangira ea. <sup>10</sup> Paul mo vaia sohena mata tauni mo rua matan haratu tamlohi tari sei la lo toho Asia, Jew peresi na tamlohi řořoha, la rongo na reti non Moli.

### *La Natun Sceva Atu Mo Limaravrua*

<sup>11</sup> God mo lo vai na matamata tavera tinatinapua na liman Paul. <sup>12</sup> Ale matana, hina purongo vara te ruru kamoti teni ruru mata voko purongo la tia na huřin Paul, ale vara la lavira la vano isana tamlohi rojoa, mo vai na nora rojoa la tihai, ale tanume sasati la malue hinira.

<sup>13</sup> Ale pani Jew hai sohena, la lo titiu nařihi na tanume sasati na taon la lo vano hinira, pani la vaihitea vara la vaia na hijan Moli Iesu isan la haratu sei tanume sasati la lo toho hinira, ale la vereea sohen harihi lara, “Na lo retileu řilangi isam na hijan Iesu sei Paul mo lo retivujavujangia vara o malue!” <sup>14</sup> Vorai mo limaravrua la natun Jew matea hijana Sceva, enia mo lo hase vereea vara enia pñis aulu matea, enira natu la lo vai la hinahu nika. <sup>15</sup> Pani lara la vaia, tanume sasati matea mo řaramira mara, “Na levosahi Iesu, ale na levosahi Paul makomona, pani kamim sava tamlohi hin kamim?” <sup>16</sup> Pa tamlohi atu sei tanume sasati mo lo toho hinia mo kue matara mo hamajira vavano la levosahi, ale la hitea sohena la sopo eři mele vai te hinahu, la turu la maro la rovo malamala, pani la loso na řaera la vano.

<sup>17</sup> Jew tari peresi na tamlohi řořoha tari Ephesus la rongo sorasora ak-erih, ale mo vaira la matahu enira mo isoiso. Ale hijan Moli Iesu mo lavi na hasohaso tavera matana. <sup>18</sup> Matuvana hin la haratu sei la rasu Iesu, la sinai la turu nahonaho, la taviti na řava hehe la vaira. <sup>19</sup> Vao tavera sei la lo mahumahu, la lavi na nora puku mata mahumahu la takonahira jara matea, ale la sulira

na naho tamlohi tari. Lara la evi na volin la puku atu hatehateahi, evira mo isoiso mo tataholo na volvoli mata voko mata rani mo tari vaha ngavulu lima (50,000).

<sup>20</sup> Matan haratu, retisohai hin Moli mo ulua, ale suihana mo posi na mauri tamlohi matuvana.

### *Tamlohi Lotulotu Vono La Mai Jara Matea*

<sup>21</sup> Hitahun la hinau atu, Paul mo tau na řomina vara i sivo Jerusalem, ale vara i hahau roto Macedonia enia Achai. Mo vereea mara, "Vara na sivo atu moiso, na opoia vara a vano a hite Rome." <sup>22</sup> Mo řule na nona tamlohi tuetueni mo rua, Timothy enia Erastus la vano Macedonia, pani enia mo mele toho atu Asia mata makomo rani.

<sup>23</sup> Hin la rani atu patumasa tavera matea Ephesus mo pala mata rasua hin Iesu. <sup>24</sup> Mo tapulo na tamlohi matea hijana Demetrius, enia tamlohi matea mo lo vai na tamasi varihii mata nora Temple sei la tovia Artemis na silver. Ale enia peresi la haratu la lo vaira, la lo vai na mania tavera matana. <sup>25</sup> Mo tovi matavuhi la tamlohi atu peresi la haratu la lo vavahinau na hinau mariviti i sohera, ale mara, "La tapala, ka levosahia vara nořa mauri tavitavi mo lo mai na nořa vavahinau. <sup>26</sup> Ale ka hitea ale ka rongoa vara Paul akerihii natu, mo lo vai na tamlohi vao tavera la lo rasua, ale nake la lo vaharai hin nořa god Artemis, matan mo lo vereea isara mara god sei tamlohi la lo vaira na limara purongo, la sopo god varařuhu, ale mo sopo vujangia nike Ephesus purongo, pani na jara tari Asia sei mo lo vano ea. <sup>27</sup> Ipa sopo sati purongo na nořa vavahinau mata tavitav, pani matan tamlohi la pa řomřomi purongo na temple non god harai aulu sei Artemis, enia peresi na tamlohi na jara tari Asia peresi na varama sei la lo lotua, la pa rongo i sati matan hijana mo jovi."

<sup>28</sup> Lara la rongoa la lolokoru patura, ale la tapulo ngara lara, "Artemis nona mara Ephesus enia mo aulu jea!" <sup>29</sup> Taon tavera atu mo

mařivi na uloulo, ale vao tavera atu la maro la vano na nora jara tavera mata matavuhi, la lo reve tahitahi Gaius enia Aristarchus, tamlohi mo rua mara Macedonia sei la lo usuri Paul na nona hahau. <sup>30</sup> Pani Paul mara mo opoia vara i unu hin jara matavuhi tavera atu, tamlohi usuri la horoa. <sup>31</sup> Mo sopo enira purongo pani tapalan Paul hai sohena, enira tamlohi aulu matan jara atu Asia, ale la sohahi na retisohahi matea isana la usia řilangi vara i sopo unu hin jara matavuhi atu.

<sup>32</sup> Hin matavuhi atu, tamlohi hai la lo ngara mata hinau matea, hai la ngara na hinau tinapua matan matavuhi atu mo vaore hajavua, ale matuvana la sopo levosahia vara la lo matavuhi mata sava. <sup>33</sup> Tatuara hin vao atu la řomřomia vara enia matan Alexander, matan Jew hai la sohaia mo sahe na nahon matavuhi atu. Ale Alexander mo lo tahe na limana matan mo opoia vara i vere mamahunia na nahon vao atu, vara hinau nike Jew la sopo vaia. <sup>34</sup> Pani vao atu lara la hitea vara enia Jew matea, la mele tapulo uloulo, ale la taurilati uloulo atu mata aoa mo rua lara, "Artemis nona mara Ephesus enia mo aulu jea!"

<sup>35</sup> Ale hitahun haratu, tamlohi tavera matan taon atu mara mo vaira la toho malum mo vereea mara, "Mara Ephesus, sava tamlohi natu mo sopo levosahia vara taon matan Ephesus mo lo kilau mamahuni na temple non Artemis aulu peresi na vatuna sei mo jovi na tuka? <sup>36</sup> Matan la hinau atu tea i sopo eři halu hinira, mo řuhu jea vara ha toho malum ha sopo rongorongono vono! <sup>37</sup> Matan ka lavi la tamlohi nike la sinai nike, la sopo tamlohi mata vavanaho na temple teni la lo retisatihi nořa god harai. <sup>38</sup> Ale, vara Demetrius peresi la haratu la lo vai voko akerihii, la rongo mo sati matan tea, ima aria mo lo roi, ale tamlohi aria la lo toho purongo, mo řuhu vara la usuri na malele leu ea. <sup>39</sup> Pani vara ka mele opoi te hinau aulu hinia, ha pa vai tataholoia na nořa matavuhi tavera

hitahu. <sup>40</sup> Matan vara i vono, tamlohi tavera matan Rome, la pa sile na talai isan matavuhi tavera nike matan mo vaore hajavua, ale mo sopo te retireti řuhu tea i eři vereea matan matavuhi nike.” <sup>41</sup> Mara mo vere la hinau atu mo isoiso, mo řulera la mule.

## 20

### *Paul Mo Mele Vano Macedonia Peresi Greece*

<sup>1</sup> Matavuhi tavera atu mara mo isoiso, Paul mo tovi na tamlohi usuri la mai jara matea. Ale mo retituetuenira moiso mo vere enřa vuho isara ale mo malue mo vano Macedonia. <sup>2</sup> Na nona hahau mo lo vano mo retituetueni na kalesia na taon hatehateahi na malelena vavano mo pala Greece. <sup>3</sup> Mo lo toho vitu mo tolu atu, ale Paul mo tatamahu vara i vele na boti matea i sivo Syria, pani matan mo rongoa vara Jew la hatihi moiso vara la pa vai te hinau isana, mo posi na řomina ale mo mele sahe mo hahau roto Macedonia.

<sup>4</sup> Tamlohi hai la lo usuri Paul sohen: Sopater mara Berea natun Pyrrhus; Aristarchus enia Secundus mara Thessalonica, Gaius mara Derbe; Timothy, Tychicus enia Trophimus matan Asia. <sup>5</sup> La tamlohi nike la vano Troas tiroma vara la lo saovi kamam ea. <sup>6</sup> Rani mata Passover la vano moiso, kama vele na boti matea Philippi, ale kama maro na tasi mata rani mo lima moiso, ale kama pa hoso isara Troas. Kama lo toho atu mata rani mo limaravrua.

### *Paul Mo Mele Vano Troas*

<sup>7</sup> Na Sunday, kamara kama pulutahi jara matea mata hanhani non Moli, Paul mo tapulo vujangi na tamlohi, pani matan mo tau na řomina moiso vara i mele rani sahe i pa malue, mo vujangira vavano mo livuha vutepongi. <sup>8</sup> Kama lo sakele na jara matea mo aulu makomona na lolon ima atu kama lo toho hinia, ale lamu matuvana la lo hani hin jara atu, <sup>9</sup> ale uluvou matea hijana Eutychus mo lo sakele na windoa matea, ale mo lo tapulo juruvi řomaliho, matan Paul mo retireti

mo peravu. Ale mara mo juruvi řomaliho hin jara atu sei mo aulu sohena ima mo tolu, mo jovi sivo na lepa mo mate. <sup>10</sup> Pani Paul mo sivo isana mo rautoho, ale mo tapea na limana ale mara, “Ha sopo matahu, mo lo mauri.” <sup>11</sup> Moiso Paul mo mele vele sahe aulu hin jara atu, ale mara mo tope na pereti ale la hania moiso, mo mele tapulo retireti peresira vavano mo rani, moiso mo malue isara. <sup>12</sup> Ale la lavi uluvou atu mo mule, ale la avulahi tavera matan mo lo řuhu purongo.

### *Patu Tamlohi Kalesia Matan Ephesus*

<sup>13</sup> Kama vano tiroma na boti ale kama malue kama sivo Assos, matan vara kama pa tapai Paul ea, matan enia mo vereea mara i pa hahau purongo i sivo atu, ale kama pa lingia atu. <sup>14</sup> Kamara kama tapai Paul Assos, mo vele na boti kama sivo Mitylene. <sup>15</sup> Kama malue atu ale mo mele rani sahe kama tikeli Chios, mo mele rani sahe kama pala Samos, ale mo mele rani sahe, kama tikeli Miletus.

<sup>16</sup> Matan Paul mo opoia vara i jeu Ephesus matan vara i sopo mele toho matan te rani atu Asia matan mo lo vaivila vara i sivo Jerusalem tiroma moiso i pa rani mata Pentecost. <sup>17</sup> Kama hoso Miletus ale Paul mo sohai na retisohai matea isana patu tamlohi mata vao kalesia Ephesus vara la sinai la tapaia atu.

<sup>18</sup> Lara la pala mo vere isara mara, “Kamim ka levosahi na mauriku hin rani atu na lo toho peresi kamim mo tapulo hin rani atu na tau na paloku Asia. <sup>19</sup> Na volitusi non Moli na posposi řomatano peresi na tangi ale peresi na rani řilangi sei la mai isaku na sava Jew la hatihia matak. <sup>20</sup> Pani ka levosahi mamahunia vara hin la rani atu na sopo turu juha na noku retivujavujangi isamim matan te hinau sei vara i eři tueni kamim hinia. Ale na sopo turu juha hin te hinau na noku vujangi isamim na naho vao tamlohi teni na lolo ima hatehateahi, <sup>21</sup> ale na lo retivuhesi isana Jew peresi na tamlohi řořoha



mata vahaʻi na hehe la mai isan God na rasua hin noʻa Moli Iesu.

<sup>22</sup> Ale nakerihi, Tanume Tapu mo lo sohaiau vara a sivo Jerusalem, ale na sopo levosahi na sava i pa masese isaku atu, <sup>23</sup> pani Tanume Tapu mo pete retiʻoaʻoahaiua hinia moiso na taon tari sei na lo vano ea vara ima ʻilangi peresi na noku tipahi la lo saoviau ea. <sup>24</sup> Pani mauriku i pa sopo ʻuhu matan te hinia isaku vara a sopo vai vevuhi na sava Moli Iesu mo taua na limaku, enia vavahinau sei mata vereuli na Retiʻuhu mata ʻomʻromi non God.

<sup>25</sup> Ale nakerihi na lo vere tataholoia kamim hinia vara i pa sopo te vonamim hatea sei na lo hahau ʻalihi na lo retivujavujangi mauri atu God mo aulu hinia isana, i pa mele hiteau. <sup>26</sup> Matan haratu, na lo vere vara mo sopo te noku hinia hinia na ʻaemim. <sup>27</sup> Matan na sopo turu juha vara a sopo vereuli kamim na ʻomʻromi tavera tari non God.

<sup>28</sup> Ha hase kilau mamahuni kamim peresi na vao kalesia sei Tanume Tapu mo vai kamim ka aulu hinira, vara ha tiroma na vao kalesia non God sei mo volira na ʻaena. <sup>29</sup> Na levosahia, vara a malue isamim, tamlohi sasati sohena viriu jala la pa mai isamim, la pa komo na vao kalesia, ale la sopo eʻi ʻomʻromira. <sup>30</sup> Mo sopo haratu purongo pani na lolomim tataholo te tamlohi la pa turu la vujangileji na retivaraʻuhu matan vara la pa lavi te nora tamlohi usuri isamim. <sup>31</sup> Matan haratu, ha pa sopo peka, ha lo ʻomʻromia vara, mata tauni mo tolu, tarea na lo retiʻoaʻoahai kamim hatehateahi peresi na wai matakū.

<sup>32</sup> Ale nakerihi, na lo tau kamim na liman God matan vara ha pa sile na retisohai mata nona ʻomʻruhu. Retisohai nika i eʻi tueni kamim vara ha ʻilangi, ale i sile kamim na koruna peresi la haratu sei God mo tapuhira.

<sup>33</sup> Ka levosahi mamahunia vara na sopo usi tea hin te silver, gold teni ruru. <sup>34</sup> Kamim ka levosahi mamahunia vara enau peresi la haratu sei la toho peresia, kama lo hanhani na masumasuku purongo. <sup>35</sup> Na noku

toivongi na lo vujangi kamim hinia vara, vara ha lo vavahinau ha pa tueni la haratu la sopo ʻilangi, ale ha ʻomʻromi na reti non Moli Iesu sei enia hasena mo verevara mara, 'Avulahi tavera i pa vano isan haratu sei mo lo silea mo jeu haratu mo lavia.' "

<sup>36</sup> Mara mo vere la hinia atu moiso, mo papaohi sivo atano peresira ale mo usi. <sup>37</sup> Enira mo isoiso la tapulo tangi aulu, la raho Paul ale la pungosia, <sup>38</sup> ʻomira mo pa sati jea matan mo verevara mara la pa sopo eʻi mele hitea, moiso la usuria la sivo vara la taua na boti.

## 21

### *Paul Mo Sivo Jerusalem*

<sup>1</sup> Kamara kama tinaʻihira, kama malue vano na tasi, ale kama sivo tataholo na ureuren Cos, ale mo mele rani sahe kama pala Rhodes, ale kama malue atu kama hososa Patara. <sup>2</sup> Hin jara atu kama tapai na boti matea, mo tatamahu vara i sivo Phoenicia, kama vele hinia ale kama malue vano na tasi. <sup>3</sup> Kama kilau vano na ureuren Cyprus mo lo sale vara i tihai na maraumam, ale kama lo sivo Syria, ale kama hososa Tyre matan boti atu i pa tinaʻihi na nona lavlavi atu. <sup>4</sup> Ale kama ale na tamlohi usuri hin jara atu ale kama hitera, kama lo toho peresira mata rani mo limaravrua. La lo ʻareva isan Paul lara Tanume Tapu mo verevara isara vara i sopo tau na palona Jerusalem. <sup>5</sup> Mo turu tetelehi na rani vara kama pa malue na boti, enira mo isoiso peresi na naroura, na natura, la usuri kamam kama malue hin taon tavera atu, ale kamara kama papaohi na oneone kama usi moiso, <sup>6</sup> kama vere enʻa vuho isara hatehateahi moiso kama vele hin pa boti, ale enira la mele mule.

<sup>7</sup> Kama mele tapulo na nomam hahau atu Tyre kama sivo kama hososa Ptolemais, ale kamara kama tulahi na vorai kalesia peresi na vevorai kalesia atu moiso, kama lo toho peresira mata rani matea. <sup>8</sup> Mo mele rani sahe, kama malue kama sivo kama hososa Caesarea, ale kama unu na

iman Philip. Enia evangelist matea, enia deacon matea hin la haratu mo limaravrua, ale kama lo toho peresia. <sup>9</sup> Venatuna mo vati la sopo lo lahi, ale la lo retimangovi.

<sup>10</sup> Kama lo toho atu mata rani mo visa moiso, p̄rovet matea hijana Agabus mo tai Judea mo sinai. <sup>11</sup> Mo mai isamam, mo lavi na otin Paul, mo liho na limana peresi na palona hinia ale mara, “Tanume Tapu mo verea mara, ‘Hin malele akerihi natu, Jew matan Jerusalem la pa liho tamlohi atu sei otina nakerihi, ale la pa taua na lima tamlohi řořoha.’ ” <sup>12</sup> Kamam peresi la haratu la lo toho atu, kama rongō hināu atu sohena, kama vereā řilangi isan Paul vara i sopo sahe Jerusalem.

<sup>13</sup> Moiso Paul mo vereā mara, “Ka lo vai na sava nahai? Matan nomim tangi mo lo vaiāu na lo rongō mo sati! Matan enāu na tatamāhu moiso vara la pa lihoāu, ale vara a mate Jerusalem mata hijan Moli Iesu.”

<sup>14</sup> Ale matan kama sopo eři horoa, kama sopo mele vere te hināu pani kamara, “Ra pa usuri na masolon Moli purongō.”

### *Paul Mo Kakau Jerusalem*

<sup>15</sup> Hitahun la rani atu, kama tatamāhu, ale kama sahe Jerusalem. <sup>16</sup> Tamlohi usuri mara Caesarea hai la usuri kamam, ale la lavi kamam la tau kamam na iman Mnason mara Cyprus, enia mo mai tamlohi usuri tuai moiso. <sup>17</sup> Hin rani atu kama pala Jerusalem, vorai peresi na vevorai kalesia la lavi kamam na avulahi tavera.

<sup>18</sup> Mo mele rani sahe, Paul mo usuri kamam kama vano vara kama hite James peresi na vajiāa aulu na vao kalesia atu sei la lo toho atu. <sup>19</sup> Ale Paul mara mo sile na retioloōlo isara moiso, mo tapulo vereuli mamahuni na hināu tari God mo vaiā isana tamlohi řořoha na nona vavahināu. <sup>20</sup> Lara la rongō la hasohaso God moiso, la vereā isana lara, “Ko levosahia vorai vara Jew mo tari vaha visa moiso la tau na nora rasu hin Iesu pani la pa lo turu řilangi na leu non Moses. <sup>21</sup> Ale la rongō moiso

vara ko lo vereā isana Jew tari sei la lo toho na jara tamlohi řořoha vara la sopo mele usuri na leu non Moses, ale ko vereā isara vara la sopo taiřalihi na natura teni vara la sopo usuri na posiřa matan tuai. <sup>22</sup> Vara mo sohena, řa pa eři vai na sava? La pa levosahia vara ko pala nike moiso.

<sup>23</sup> Ale matana, o pa vai na sava kama pa vereā isam nakerihi: nomam tamlohi tupu vati nahai, la vai na retitauhi isan God moiso matan vara la pa hiri pilopilo, <sup>24</sup> o lavira o vano peresira, o hase onehiho usuri na leu non Moses peresira, ale o voli na nora silesilea matan vara enira la eři hiri pilopilo. Moiso tamlohi tari la pa levosahia natu vara sava la lo rongō matam enira hina purongō matan engko ko lo hahau usuri na leu.

<sup>25</sup> Pani isana tamlohi řořoha sei la rasua, kama pete sohai na leta moiso peresi na nomam řomřomi vara la sopo hani na mit sei la silea isana tamasi moiso, ale la sopo inu na řae, ale vara la sopo hani te maji sei la punia, ale vara la toho asau na mauri maji.”

### *La Taurilati Paul*

<sup>26</sup> Moiso mo mele rani sahe, Paul mo lavi la tamlohi atu, ale enia mo hase vaiā mo vokevoke peresira, moiso mo vano na Temple mo vereuli na isoiso rani mata nora retitauhi mata vokevoke isana p̄ris vara la pa sile na malamalai matara hatehateahi.

<sup>27</sup> La rani mo limaravrua atu mariviti vara la isoiso, Jew hai matan Asia la hite Paul na lolo rope Temple. La halu na vao matea matan vara la pa taurilati Paul. <sup>28</sup> La lo uloulo lara, “Tavtavuin Israel! Ha tueni kamam! Tamlohi nike natu mo lo vujangi na tamlohi tari na jara tari vara la řohu na nořa tamlohi, nořa leu ale jara tapu nike! Aulu hin haratu, mo lavi na tamlohi řořoha hai la unu na lolo rope Temple, ale mo vai jara tapu nike mo lumiha!” <sup>29</sup> Matan hin rani atu purongō la hite Trophimus, mara Ephesus matea, mo lo toho peresi

Paul Jerusalem, ale la lo řomřomia vara mo lavia mo unu na lolo rope Temple.

<sup>30</sup> Ale tamlohi tari hin taon tavera atu la sopo mele sakele malum, ale tamlohi la maro jara matea, la tauri Paul ale la reve tahitahia mo malue na lolo Temple, ale vahatea purongo mataruana la pelati. <sup>31</sup> Ale la pa lo vaihitea vara la vilimateia. Pani retisohai matea mo tikeli na commander nona tamlohi vuro non Rome vara tamlohi tari la lo vai na vaore rongorongo vono Jerusalem. <sup>32</sup> Vahatea purongo commander atu mo lavi na tamlohi vuro peresi na captain la maro la sivo hin vao atu. Ale vao atu lara la hite commander atu mo mai peresi la tamlohi vuro atu, la sopo mele tamaji Paul.

<sup>33</sup> Moiso pa commander atu mo sinai mo taurilatia, ale mo retileu vara la lihoa na jen mo rua, moiso mo usia vara enia hare ale vara mo vai na sava mo sati. <sup>34</sup> Pani hai hin vao atu la lo ulo na hinau matea, hai la lo ulo na hinau tinapua, ale pa commander atu mara mo levosahia vara i pa sopo eři lavuti na retivarařuhu matan vaore atu, mo retileu vara la lavi Paul i unu na patu ima mata vuro Jerusalem. <sup>35</sup> Ale lara la mai na jara sevsevuti hin patu ima mata vuro atu, tamlohi vuro la tauri Paul aulu na pilira matan vao atu la lo vaihitea mo řilangi jea vara la vilimateia, <sup>36</sup> matan vao tamlohi atu la lo usuria la lo ngara lara, "Ha vilimateia!"

### *Paul Mo Retireti Isan Vao Tavera Atu*

<sup>37</sup> Ale lara la pa lo lavi Paul mo lo unu hin patu ima mata vuro atu, Paul mo vere a isan commander atu mara, "A eři vere na hinau matea isam?"

Commander atu mo hutua, mo řaramia mara, "Avei, engko ko levosahi na leo mara Greek? <sup>38</sup> Engko mo sopo pa mara Egypt atu sei mo lo tiroma na vao mata valum naturihi, ale sei mo tiroma na tamlohi mata vili na tamlohi mo tari vaha vati (4000) la vano na jara tano koru?"

<sup>39</sup> Paul mo řaramia mara, "Mo vono! Enau Jew matea mara Tarsus

hin Cilicia, enau matan taon aulu atu! O eři tinařihia vara a retireti isan la tamlohi nike?"

<sup>40</sup> Commander atu mara mo tinařihia, Paul mo turu hin jara sevsevuti atu, ale mo tahe na limana isan vao atu, ale lara la toho malum, mo retireti isara na leon tavgavuın Israel.

## 22

### *Paul Mo Tapulo Retireti*

<sup>1</sup> Ale Paul mara, "La vorai peresi na vajiaha, ha tapurongo na sava a pa vere a mata noku vavahinau."

<sup>2</sup> Lara la rongoa vara mo lo retireti isara na leon tavgavuın Israel, la mele toho malum jea, ale mo vere a mara, <sup>3</sup> "Enau Jew matea, na vora Tarsus hin Cilicia, pani na ulua hin taon tavera nike, na lavi na noku lelevosahi isan Gamaliel usuri na posposi tataholo mata leu nona nořa pua, ale na lo řilangi hin God sohen kamim nahapani. <sup>4</sup> Na lo tipahi na tamlohi hin rasua sei, hai la mate na noku vavahinau, na liho na lamane peresi na hařai na taura na ima řilangi, <sup>5</sup> sohen přis aulu peresi na tamlohi tari mata council la eři vere a mataku. Na lavi na leta isara matan vara a lavia i vano isana voraiřa Jew, Damascus. Ale na pa lo vano na maleleku matan vara a taurilatira ale a tiroma hinira la mai Jerusalem vara la lavi na talai nike, <sup>6</sup> ale na pa lo vano mariviti Damascus, korong alo mo posi moiso, ale vahatea purongo, memera tavera matea mo sasari řalihiau. <sup>7</sup> Ale na jovi sivo na lepa na rongo na leo matea mo vere a isaku mara, 'Saul, Saul, mata sava ko lo tipahiau?"

<sup>8</sup> Ale na řaramia nara, "Tamlohi tavera, engko hare?"

Ale mo vere a isaku mara, 'Enau Iesu pa mara Nazareth atu sei ko lo tipahia!' <sup>9</sup> La haratu la lo toho pearsiau la hite memera atu, pani la sopo rongovosahi na leon haratu mo lo retireti isaku.

<sup>10</sup> Ale na usia nara, 'A pa vai na sava Moli?"

Ale Moli mo vere a isaku mara, 'O turu o vano Damascus, hin jara atu

la pa vereho na hinau tari sei na viʻonihō vara o pa vaira.’ <sup>11</sup> Ale matan na sopo mele eʻi kilau matan memera tavera atu, la haratu la lo toho peresiau la tiroma hiniau na vano Damascus.

<sup>12</sup> Tamlohi matea hijana Ananias, mo lo lotu God tarea usuri na leu, ale Jew Damascus la vereā vara enia tamlohi ʻruhu matea, <sup>13</sup> mo mai isaku, mo turu na pahisaku ale mo vereā isaku mara, ‘Vorai Saul, o mele kilau!’ Ale vahatea purongo na kilau sahe na hitea.

<sup>14</sup> Moiso mo vereā mara, ‘God nona noʻa pua mo viʻonihō moiso, vara o pa levosahi na masalona vara o pa hite haratu mo Tataholo Jea, ale vara o pa eʻi rongo na retileu matea na jingona, <sup>15</sup> matan engko, o pa nona tuetueni isana tamlohi tari na sava ko hitea ale sava ko rongoa. <sup>16</sup> Ale nakerihi, ko lo saovi na sava? O turu, o lavi na paptijo, ale God i pa hoje naʻihi na nom hehe, o tau na nom rasua na hijan Moli.’

<sup>17</sup> Na rani na mele mai Jerusalem, ale na lo usiusi na lolo Temple, na hite na hinau matea sohena mavuho matea, <sup>18</sup> ale na hite Moli mo lo vereā isaku mara, ‘O vila, o malue Jerusalem vila matan la pa sopo eʻi lavi na nom vereulia matakū.’

<sup>19</sup> Na vereā isana nara, ‘Pani Moli, enira hasera la eʻi vereā vara enau natu, na lo tau la haratu la rasuho na ima ʻilangi, ale na lo hamajira na ima lotu nona Jew tari. <sup>20</sup> Ale na rani nom tuetueni Stephen mo mate, na lo turu atu na majinga hinia, ale na lo kilau mamahuni na ruru non la haratu la lo vilia.’

<sup>21</sup> Ale mo vereā isaku mara, ‘O malue Jerusalem, matan a pa ʻruleho o vano asau ʻrove isana tamlohi ʻroʻoha!’ ”

### *La Ari Paul Na Lolo Patu Ima Mata Vuro*

<sup>22</sup> Vao atu la lo tapurongo hinia mo tikeli reti sei Paul mo vereā mara, ‘La haratu la tamlohi ʻroʻoha.’ Ale la ngaruhia lara, “Ha vilimateia! Mo sopo tataholo vara i lo mauri!” <sup>23</sup> La ngara ngara, ale la lo lanahi na nora

ruru peravu, ale la lo pulahi na tangotango aulu na masapa, <sup>24</sup> ale pa commander atu mo retileu vara la lavia i unu hin patu ima mata vuro atu. Mo vere na nona tamlohi vara la pa rupia na asi maja mata lavi na ʻarami nona retiusia, matan mo opoia vara i levosahia vara vao atu mo lo ngarahia mata sava.

### *Paul Enia Mara Rome Matea*

<sup>25</sup> Lara la ʻirahi Paul na jara mata tamaji na tamlohi moiso, Paul mo vereā isana captain mata tamlohi vuro matea mo lo turu na pahisana mara, “Mo tataholo vara ha rupi na mara Rome matea na asi maja matea, pani ka sopo lo aria?”

<sup>26</sup> Pa captain atu mara mo rongoa sohena, mo vano isan nona commander, ale mo vereā isana mara, “Ko levosahi na sava ko lo tatamahu vara o vaia? Matan tamlohi nike enia mara Rome matea!”

<sup>27</sup> Pa commander atu mo mai mo usia isan Paul mara, “O to vereā isaku, varaʻruhu vara engko mara Rome matea?”

Ale Paul mo ʻaramia mara, “He'e.”

<sup>28</sup> Ale commander atu mo ʻaramia mara, “Enau na jalahi na mania tavera matan vara a eʻi mai mara Rome matea.”

Paul mara, “Pani enau, na vora mara Rome matea.”

<sup>29</sup> Ale la haratu sei la lo tatamahu vara la pa rupia na asi maja, la turu juha hinia vahatea. Pa patu tamlohi vuro aulu atu mo matahu matan mo levosahia vara Paul enia mara Rome tataholo matea, ale enia natu mo vereā vara la lihoa.

<sup>30</sup> Mo mele rani sahe, ale matan pa patu tamlohi vuro aulu atu mo opoia vara i levosahia i ʻruhu vara Jew la lo tuvai Paul mata sava, mo uli naʻihia ale mo retileu vara moli nona pʻisi peresi na tamlohi tari mata council matan Jerusalem la mai jara matea. Ale mo lavi Paul ale mo vaia mo turu na nahora.

## 23

### *Paul Mo Turu Na Naho Council Jerusalem*

<sup>1</sup> Ale Paul mo kilau tataholo isana tamlohi hin council atu, ale mara, “La vorai, na mauriku na nahon God mo tikeli nake, ŀomiku mo sopo kaka hin te hinau.”

<sup>2</sup> Ananias pŀis aulu mara mo rongoa, mo verea mara la haratu la lo turu na pahisana la vojahia na jingona. <sup>3</sup> Ale Paul mo verea isana mara, “God i pa vojahiho, ko tapnetano! Ko sakele atu vara o ariau usuri na leu, moiso ko lo tope na leu na nom riteileu vara la vojahiau.”

<sup>4</sup> La haratu la lo turu mariviti la verea lara, “Ko ŀom vara mo tataholo vara o reti isan pŀis aulu non God sohen haratu?”

<sup>5</sup> Ale Paul mara, “La vorai, na sopo lo levosahia vara enia pŀis aulu. Matan na levosahia vara Retiulia mo verea vara, ‘Ha sopo veresati na nomim tamlohi aulu.’” *Exo 22.28*

<sup>6</sup> Moiso, Paul mo hitea vara sopen vao atu enia Sadducee, ale sopera enira Pharisee, ale mo ulo aulu isana tamlohin council atu mara, “La vorai, enau Pharisee matea, enau natu Pharisee. Na lo turu na aria matan na lo ŀomtoho na sauteterahi!”

<sup>7</sup> Mara mo verea sohena, vasvas matea mo malue isana Pharisee peresi na Sadducee ale vao atu la patumasa. <sup>8</sup> Matan Sadducee la verea vara mo sopo te sauteterahi, teni te angelo teni te tanume, pani Pharisee la rasu la hinau sei. <sup>9</sup> Ale vao atu la vaore tavera, tamlohi vujangi mata leu na vao Pharisee la turu ale la verea mo ŀilangi lara, “Kama sopo hite te hinau i sati isan tamlohi nike. I pa sohena sava vara te tanume ŀuhu teni te angelo mo lo retireti isana?”

<sup>10</sup> Ale commander atu mara mo hitea, mo matahu vara la pa ŀariŀari Paul, ale mo riteileu vara nona tamlohi vuro la sivo la lavi naŀihia na nora suiha, ale la mele lavia i vano i unu na patu ima mata vuro.

<sup>11</sup> Hin vutepongi atu Moli mo turu mariviti isan Paul ale mo verea mara, “O sopo matahu! Matan sohena nakerihi ko lo vereuliau nike Jerusalem, o pa vereuliau sohena Rome.”

### *La Hatihia Vara La Pa Vilimatei Paul*

<sup>12</sup> Mo mele rani sahe, vao Jew matea la mai jara matea, la lihora na retitauhi matea vara la pa sopo tikeli te hanhani teni te wai vavano, la vilimatei Paul. <sup>13</sup> Vao atu sei la vai retitauhi atu mo jeu mo ngavulu vati (40).

<sup>14</sup> La vano isana pŀis aulu peresi na vajiahara, ale lara, “Kama liho kamam na retitauhi matea vara kama pa sopo mele tikeli te hanhani teni te wai vavano kama vilimatei Paul. <sup>15</sup> Ale nakerihi kamim peresi na tamlohi council ha vahaŀule matana isan patu tamlohi vuro aulu atu, vara i lavia i sinai isamim. Ale ha vaia sohena vara ha pa mele kilau usuri mamahuni na nona aria. Ale kama pa tatamahu vara kama vilia na malele, ale i pa sopo eŀi kakau nike.”

<sup>16</sup> Pani natun vetasin Paul mara mo rongoa vara la pa luhu hinia, mo mai mo unu hin patu ima mata vuro atu mo vereulia isan Paul <sup>17</sup> Ale Paul mo tovi na captain matea hin la captian atu mara, “O lavi uluvou nike i sahe isan nom commander, ale uluvou nike i pa vere na hinau matea isana.”

<sup>18</sup> Ale captain atu, mo lavia mo sahe isan nona commander ale mara, “Paul mo toviau mo usiau vara a lavi uluvou nike i mai isam, matan enia mo lavi na retisohai matea vara i pa silea isam.”

<sup>19</sup> Pa commander atu mo tauri na limana, ale mo lavia la sivo enira hasera, ale mo usia mara, “Sava natu ko opoia vara o verea isaku?”

<sup>20</sup> Mo ŀaramia mara, “Jew la majinga moiso vara pavuho, la pa usiho vara o lavi Paul i sivo na council, vara la pa mele kilau usuri mamahuni na nona aria. <sup>21</sup> Pani o sopo tinaŀihia vara la haluhaluho matana! Matan tamlohi mo jeu mo ngavulu vati (40) la pa luhu la lo saovia. La lihora na retitauhi matea moiso vara la pa sopo tikeli te hanhani teni te wai vavano la vilimateia. Ale nakerihi la tatamahu moiso, la lo saovi na nom majinga purongo natu.”

<sup>22</sup> Moiso, commander atu mo ŀule uluvou atu mo mele malue, ale mo

verea isana mara, “O sopo mele vere tea hin hinau akerihi ko vereea isaku.”

### *La Lavi Paul Mo Sivo Caesarea*

<sup>23</sup> Moiso, pa commander atu mo tovi na nona captain mo rua, ale mo vereea isara mara, “Ha tatamahuni te tamlohi vuro i ngavulu sangavulu rua (200) vara la sivo Caesarea nohorihia na matan alo i limaravati na vutepongi, peresi te hos i ngavulu limaravrua (70) peresi na tamlohira, ale peresi te tamlohi vuro mata sari i ngavulu sangavulu rua (200). <sup>24</sup> Ha tatamahuni te hos non Paul vara i pa vele hinia, ale ha lavi mamahunia i sivo isan Felix tamlohi aulu matan Palestine.”

<sup>25</sup> Moiso mo uli leta nike isan Felix mara,

<sup>26</sup> “Leta nike enau Claudius Lysias na lo uli na noku retioloolo mo vano isam Felix tamlohi aulu řuhuru. <sup>27</sup> Tamlohi akerihi, Jew hai la taurilatia ale la tatamahu vara la pa vilia ale na sinai peresi na noku tamlohi vuro ale kama nařihia, ale matan na levosahia vara enia mara Rome matea na lo matahia. <sup>28</sup> Na lavia mo sivo na nora council matan na opoia vara a levosahi mamahunia vara la lo aria mata sava. <sup>29</sup> Na hiteulia vara la lo tuvaia matan te hinau usuri na leu mata nora rasua, pani mo sopo matan te hinau vara i pa toho na ima řilangi teni i mate matana. <sup>30</sup> Pani nara na levosahia vara la lo vai na malele matea vara la pa vilimateia, na řulea mo mai nike isam vahatea. Ale na vereea isan la haratu la lo aria vara la pa lavi na nora retiaria sei la lo aria hinia la vereea isam.”

<sup>31</sup> Ale la tamlohi vuro atu la vaia usuri na nona retileu. La lavi Paul mo sivo Antipatris hin vutepongi atu. <sup>32</sup> Mo mele rani sahe, la tinařihia vara tamlohi vuro na hos purongo la sivo peresia. Ale enira la mele hilu la sahe na nora patu ima mata vuro Jerusalem. <sup>33</sup> La tamlohi vuro na hos atu lara la pala Caesarea, la lavi Paul peresi pa leta atu la silea isan tamlohi aulu atu Felix. <sup>34</sup> Tamlohi aulu atu mara mo evi leta atu moiso, mo usi Paul vara mo tai na sava jara, ale mara mo levosahia vara mo tai

Cilicia, <sup>35</sup> mo vereea mara, “A pa sileho na masapa vara o retireti hin rani atu vara nom meresahi la pala nike.” Moiso, mo retileu vara la pa pelati horo Paul na jara matea na lolo ima tavera, iman Herod Agrippa.

## 24

### *Paul Mo Turu Na Nahon Felix*

<sup>1</sup> Ale rani mo lima la vano moiso, Ananias pa přis aulu atu mo sinai peresi na vajiaha hai peresi na tamlohi retireti na leu matea hijana Tertullus, ale matan vara la sile na nora retiaria matan Paul isan tamlohi aulu atu Felix. <sup>2</sup> Ale lara la tovi Paul mo sinai moiso, Tertullus mo tapulo aria mara:

“Tamlohi aulu Felix, kama lo toho na tamata mo peravu jea na ruhuruhum, ale hina paro řuhu hai la malue na jaramam usuri na nom kilakilau. <sup>3</sup> Kama lo vere la hinau nike na jara tari, ale na malele tari na nomam vere meje. <sup>4</sup> Pani matan vara a sopo mele taurilatihio i peravu, na lo usia isam vara o tapurongo isamam makomona purongo usuri na nom řomřuhu. <sup>5</sup> Matan kama tapaia vara tamlohi nike enia tamlohi lejileji matea, enia tamlohi matea mo lo vai na tamlohi la lo matavuhi mata vai na hina sati na jara tari Jew la lo toho ea na varama, ale enia patu tamlohi nona vao haluhalu matea la lo tovia lara vao mara Nazareth. <sup>6</sup> Mo sopo haratu purongo, pani kama tauria hin rani atu mo lo vaihitea vara i vai na Temple i lumiha. <sup>7-8</sup> O pa eři tapai na retivararuhu mata nomam aria isana hasena vara o usia.”

### *Paul Mo Raramira*

<sup>9</sup> Ale, la Jew atu sei la lo tapurongo usuria, la tapulo verelejeleja, ale lara hinau tari sei Tertullus mo lo verera la vararuhu.

<sup>10</sup> Pa tamlohi aulu mara mo tahe na limana vara Paul i eři retireti, Paul mo řaramia mara: “Matan na levosahia vara engko ko lo toho sohena tamlohi aria matea matan jara nike tuai moiso mo mai, mo vaiau na sopo matahu vara a vere na noku retireti. <sup>11</sup> Ale vara ko opoia, o pa

eři levosahia vara rani mo sopo lo jeu sangavulu řomana mo rua na sahe Jerusalem mata lotu. <sup>12</sup> La sopo tapaiau vara a lo vasvas peresi tea teni vara a lo tovi matavuhi na tamlohi matan vara la vai te hina sasati na lolo rope Temple, teni hin te ima lotu hatea teni na malele matan taon tavera atu Jerusalem. <sup>13</sup> Ale la tamlohi nike, la sopo eři pisuhiau hin te hinau hatea hin la hinau nike la lo ariau vara na vaira.

<sup>14</sup> Pani na taviti vara na lo lotu God non nomam pua usuri na malele rasua hara sei la lo vereea vara enia rasua haluhalu matea. Ale na lo rasu na hinau tari sei Moses peresi na přovet la ulia na Leu. <sup>15</sup> Enau na lo tau na noku řomtoho isan God sohen la tamlohi nike vara i pa sauteterahi na tamlohi tari, la haratu la tataholo peresi la haratu la sopo tataholo. <sup>16</sup> Matan hinau atu natu, mo lo vaiiau na lo vaihitea tarea vara řomiku i pa sopo kaka hin te hinau isan God teni isana tamlohi.

<sup>17</sup> Tauni mo visa la vano moiso na sopo mele toho Jerusalem, ale na mele sinai ea peresi na otori nona noku tamlohi vara a silea isan la haratu la tilavono, ale vara a sile na noku silesilea mata malamalai, <sup>18</sup> sei na lo vaira hin rani atu la tapaiau na lolo rope Temple. Na pete vokevoke moiso usuri na nomam posposi, ale mo sopo te vao teni tea i lo vai na valum. <sup>19</sup> Pani Jew hai matan Asia, i pa řuhu jea vara la lo toho akerihi na nahom nakerihi matan vara la tuvaiau hin te retiaria matan te hinau sati vara la eři vereea matakū. <sup>20</sup> O to usi la tamlohi nike vara sava hina sati natu, la hitea hiniau hin rani atu na lo turu na nahon council atu, <sup>21</sup> pani hinau matea purongo na ulo na vereea na nahora nara, na lo turu nike na aria nahapani matan na rasu na sauteterahi nona mateia.”

<sup>22</sup> Moiso Felix, matan enia mo levosahi mamahuni na malele nora rasua mo řuhu, mo vereea mara nora masapa mata sile na nora retireti mo isoiso, ale mo vereea isara mara, “Sava rani vara patu tamlohi vuro aulu atu Lysias i sinai nike, a pa sile na noku

řomřomi mata nomim aria.” <sup>23</sup> Ale mo retileu vara captain atu, i lo kilau mamahuni Paul na ima tavera atu purongo. Ale vara i sopo horoa na masalona, ale vara i sopo horo na tapalan Paul vara la opoia vara la mai la tuenia.

### *Felix Mo Tapurongo Isan Paul*

<sup>24</sup> Rani mo visa la vano moiso, Felix enia narouna Drusilla sei enia Jew matea, la pala. Ale mo vahařule matan Paul vara la tapurongo hinia vara i verera hin rasua atu hin Iesu Křisto. <sup>25</sup> Ale Felix mara mo rongo Paul mo lo sorahi na mauri tataholo, ale mata hase taurilatiho peresi na rani ari tavera sei mo lo mai, enia mo matahu tavera, ale mara, “O vano tako, ale vara te masapaku a pa mele vahařule matam.” <sup>26</sup> Mo lo tapurongo hinia, pani mo lo řomtau vara Paul i pa silea hin te mania na haři tamlohi, ale matan haratu, mo vahařule matana vaha visa vara i mai i sorasora peresia.

<sup>27</sup> Tauni mo rua la vano sohen haratu moiso, natu Porcius Festus mo pete lavi na jaran Felix, pani matan Felix mo opoia vara i vai na Jew la avulahi, mo tau Paul na ima řilangi.

## 25

### *Paul Mo Turu Na Nahon Festus*

<sup>1</sup> Festus mo pala Caesarea ale rani mo tolu tinapua la vano moiso, ale mo sahe Jerusalem. <sup>2</sup> Ale moli nona přis peresi na tamlohi aulu nona Jew la lavi na nora retiaria hin Paul la vano isana. <sup>3</sup> La usia isana vara i vai na sava la opoia matan Paul, la usi Festus mo řilangi vara i vahařule vara i mai Jerusalem matan la hatihia moiso vara la pa luhu na malele vara la vilimateia. <sup>4</sup> Moiso Festus mo řaramira mara la lo taurilatia Caesarea, ale enia i pa mele sivo atu i sopo tuai. <sup>5</sup> Mo vereea mara, “Ale, mo řuhu vara nomim tamlohi tatavera la sivo atu peresia, ale vara tamlohi akerihi mo vai te hinau mo sati, la pa eři sile na nora retiaria.”

<sup>6</sup> Ale Festus mo mele toho Jerusalem mariviti rani i sangavulu, moiso mo pa sivo Caesarea. Ale

mo mele rani sahe mo sakele na jara sakele mata aria, ale mo retileu vara la lavi Paul i mai isana. <sup>7</sup> Paul mara mo pala, la Jew atu sei la lo tai Jerusalem la lo sinai, la turu řalihia la lo tuvaia na hinau sasati hai sei la sopo eři vujangira vara la varařuhu. <sup>8</sup> Paul mo sile na nona retireti mata horora mara, “Na sopo vai te hinau i sati mata i vaiau a meresahi na leu nona Jew, teni na Temple, teni isana supe matan Rome.”

<sup>9</sup> Pani Festus mo opoia vara i vai na Jew la avulahi, mo usia mara, “O pa avulahi vara o sahe Jerusalem vara o turu na aria na nahoku matan la hinau nike?”

<sup>10</sup> Paul mo řaramia mara, “Nakerihi na lo turu na jara tataholo moiso mata aria na naho jara sakele mata ari non supe matan Rome. Na sopo vai te hinau i sati isana Jew sohen engko ko levosahi mamahunia. <sup>11</sup> Vara na vai te hinau mo tataholo vara a mate matana, na sopo řohu na mate. Pani vara na lo vokevoke purongo, engko teni te hatea i sopo eři tauau na liman la tamlohi nike sei la opoia vara la vilimateiau. Na opoia vara a turu na nahon supe matan Rome!”

<sup>12</sup> Festus mo sorasora peresi na nona tamlohi tuetueni sei vara la sile te řomřomi hatea isana, moiso mo řaramia mara, “Ko opoia vara o turu na nahon supe matan Rome, ale isan supe matan Rome o pa vano.”

#### *Festus Mo Sorahi Paul Peresi Harua Supe Agrippa*

<sup>13</sup> Rani mo visa la vano moiso, harua supe Agrippa mo pala Caesarea peresi vetasina Bernice, matan vara la sile na nora oloolo isan Festus. <sup>14</sup> Hin la rani atu la lo toho peresia, Festus mo vereuli na sorasora matan Paul isan supe atu matan vara i sile te retireti matana mara:

“Felix mo tau na tamlohi matea mo lo toho na ima řilangi. <sup>15</sup> Na rani na lo toho Jerusalem, moli nona přis peresi na vajiaha nona Jew la vereau hinia, la usiau vara a sile na talai isana. <sup>16</sup> Na vereia isara nara, mo sopo usuri na posposi nona mara Rome vara a sile te tamlohi na talai

vara mo sopo lo lavi te masapa vara i turu nahonaho peresira, ale i řarami na retireti non la haratu la lo tuvaia.

<sup>17</sup> Ale hitahuna, la mele usuriau la sinai nike, na sopo mele toho i peravu, pani mara mo mele rani sahe na sakele vara a aria. Ale na tovia vara i mai na nahoku. <sup>18</sup> Pani la haratu la lo tuvaia lara la turu, la sopo tuvai Paul hin te hinau sasati sohen na lo řomřomia. <sup>19</sup> Mo vono, la sopo turu jara matea na nora řomřomi matan te hinau mata nora rasua, ale mata tamlohi matea hijana Iesu sei mo mate, hara sei Paul mo lo vereia vara mo mele mauri. <sup>20</sup> Matan na sopo levosahia vara a pa vileiuli la hinau nike sohen sava, na usia isana vara mo avulahi vara i sahe Jerusalem ale i pa turu na aria ea. <sup>21</sup> Pani Paul mo opoia vara i lo toho tako na ima řilangi, i lo saovi na řomřomi non nořa tamlohi tavera supe matan Rome. Matan haratu, na retileu vara la lo kilaua i tikeli rani atu a eři řulea i vano isan supe matan Rome.”

<sup>22</sup> Moiso Agrippa mo vereia isan Festus mara, “Enau na opoia vara a tapurongo hin tamlohi atu.”

Mo řaramia mara, “Pavuho o pa tapurongo isana.”

#### *Paul Mo Turu Na Nahon Supe Agrippa*

<sup>23</sup> Ale mo mele rani sahe, supe Agrippa peresi Bernice la mai na nora pohapoha, ale la unu na jara tavera atu mata matavuhi peresi na nora patu tamlohi aulu mata vuro, peresi na tamlohi aulu matan taon tavera atu. Moiso Festus mara mo retileu, la lavi Paul mo unu. <sup>24</sup> Ale Festus mara, “Supe Agrippa peresi kamim mo isoiso sei ka lo toho peresi kamam nakerihi, ka hite tamlohi nike natu sei tamlohi aulu nona Jew tari la lo usiau mo řilangi Jerusalem peresi nike Caesarea, vara a taua na mateia. <sup>25</sup> Pani na noku kilakilau na hitea vara mo sopo vai te hinau vara i lavi na mateia matana. Ale mara mo opoia vara i turu na nahon nořa tamlohi tavera, supe matan Rome, na majinga vara a pa řulea i sahe isana.



26 Pani na sopo levosahia vara a pa uli na sava isan noku supe matana. Matan haratu, na revea mo sinai na nahomim tari, pani na nahom supe Agrippa, matan vara na isoison retireti akerihi, korong a pa efi lavi te retireti vara a ulia. 27 Matan na hitea vara mo sopo tataholo isaku vara a rŭle te tamlohi hatea sei mo lo toho na ima rilangi vara la sopo vere mamahuni na nora tuvai matana.”

## 26

### *Paul Mo Sile Na Nona Retireti*

1 Ale supe Agrippa mo vere a isan Paul mara, “O efi turu natu, o retireti.”

Ale Paul mo turu mo tahe na li mana ale mo tapulo retireti mara, 2 “Enau na avulahi jea supe Agrippa matan engko natu o pa tapurongo na noku retireti matan la hinai nike tamlohi tatavera nona Jew la lo tuvaiau hinira. 3 Matan na levosahia vara engko ko levosahi mamahuni na posposi nona Jew peresi na retiusia sei tamlohi la lo sorahira tarea. Ale matan haratu, na lo usia isam vara o romperavu mata tapurongo isaku.

4 Jew tari la levosahi mamahuni na mauriku, mo tapulo na lo uluvou peresi na tahisaku tataholo ale na rani na lo toho Jerusalem. 5 Vara la majinga la efi vere a enau Pharisee matea, vao matea sei la rilangi jea mata noŕa rasua. 6 Ale nakerihi na lo turu na aria, na lo romtoho matan retitauhi atu God mo vaia isana noŕa pua vara i masese. 7 Supe Agrippa, noku tamlohi tavera, retitauhi atu natu mo vai la tavitavi tupu sangavulu romana mo rua atu la lo volitusi isan God tarea matana. Matan romtoho atu natu, la Jew nike la lo tuvaiau matana. 8 Mata sava natu, mo rilangi vara tea i rasua vara God mo lo sauteterahi na tamlohi mate?

9 Vararuhu, tiroma enau haseku na levosahi mamahunia vara mo tataholo vara a komo na tamlohi usuri non Iesu mara Nazareth. 10 Ale hinai atu natu, na vaia Jerusalem. Na sopo tau na tapuhi na ima rilangi na suiha na lavia isana moli nona pris

purongo, pani na majinga vara la pa vilimateira. 11 Vaha visa na rupira na asi maja matea na ima lotu nona Jew, ale na vaihitea vara la retisati hin Kŕisto. Matan na lo lolokoru sasati hinira, na vano vara a tipahira na taon tavera na jara tinapua sohena.

12 Na lo vai hinai atu natu hin rani atu na lo sahe Damascus, moli nona pris la sileau na suiha vara a efi vaia, 13 moiso na pa lo toho na maleleku korong alo mo posi noku tamlohi tavera, na hite na memera tavera matea mo tai na tuka, mo mera mo jeu na alo, mo sasari rilahiau peresi la haratu la lo hahau peresia. 14 Kamara kama jovi sivo na lepa moiso, na rongo na leo matea mo retireti isaku na leomam tavitaviin Israel mara, ‘Saul, Saul, mata sava ko lo tipahia? Ko lo hasem hotiho!’

15 Ale nara, ‘Engko hare tamlohi tavera?’

Ale Moli mo vere a isaku mara, ‘Enau sei Iesu haratu ko lo tipahiau. 16 Pani o turu! Matan na pala isam vara a viŕoniho vara engko volitusi matea. Ale o pa vereuli na hinai ko hitera ale hin te hinai a pa mele vujangira isam. 17 A pa juriho isana tavitaviin peresi la tamlohi roŕoha sei na lo rŭleho vano isara, 18 matan vara o pa roi na matara vara la pa vahari na roŕoha la mai na malarani, ale vara la malue na suihan Setan la mai isan God matan vara i efi romi na nora hehe, ale la pa lavi na rŭngara peresi la haratu sei God mo tapuhira mata nora rasua hinai.’

19 Matan haratu supe Agrippa, enau na ololo hin hinai atu Moli na tuka mo vujangia isaku, 20 ale matana, na vereulia isana mara Damascus tiroma, moiso isan la haratu la lo toho Jerusalem ale na jara tari Judea, ale isana tamlohi roŕoha matan vara la pa vahari na nora hehe la mai isan God, ale la vujangia vara vararuhu la posi moiso na nora vavahinai rŭhu la lo vaira. 21 Matan hinai atu natu, Jew la tauriau na lolo rope Temple, ale la lo vaihitea vara la vilimateiau. 22 Pani, na lo lavi na tuetueni isan God tarea

mo tikeli nahapani, ale na lo turu na lo vereulia isan la haratu la tamlohi purongo, peresi la haratu la aulu, na sopo vere te hinau tinapua, pani haratu purongo sei p̄ovet peresi Moses la lo vereea vara i pa masese; <sup>23</sup> vara K̄risto i pa lavi na nona rani řilangi, ale i pa tiroma hin la haratu la turu na mateia sohena malarani matea isana Jew peresi na tamlohi řořoha.”

<sup>24</sup> Vahatea purongo, Festus mo ulo mara, “Paul, nom lelevosahi tavera mo vaiho ko putu!”

<sup>25</sup> Pani Paul mo řaramia mara, “Noku tamlohi tavera Festus, na sopo putu, pani na lo vere na varařuhu na hinau na levosahi mamahunira. <sup>26</sup> Matan supe Agrippa mo levosahi la hinau nike, ale na lo vere la hinau nike isana matan a sopo eři rasua vara enia mo sopo levosahi la hinau nike, matan la hinau nike la sopo masese hin te tavalu jara rihirihi hatea. <sup>27</sup> Supe Agrippa, engko ko rasu na p̄ovet teni mo vono? Na levosahia vara ko rasura.”

<sup>28</sup> Agrippa mo vereea isan Paul mara, “Ko řom vara o eři vaiiau na mai kalesia matea vila sohen harihi?”

<sup>29</sup> Paul mo řaramia mara, “Vara i vila teni mo vono, pani na lo ususi isan God vara engko peresi la tamlohi sei ka lo tapurongo isaku nakerihi, vara ha pa mai soheku – pani i sopo peresi na jen.”

<sup>30</sup> Moiso, pa supe atu mo turu ale Festus, Bernice peresi la haratu la lo sakele peresira la usuria, <sup>31</sup> ale lara la lo malue, la lo vereverea isara lara, “Tamlohi nike mo sopo vai te hinau vara i tataholo mata i mate matana, teni vara i vano na ima řilangi matana.”

<sup>32</sup> Agrippa mo vereea isan Festus mara, “Tamlohi akerihi i eři malue purongo vara i sopo lo usia vara i turu na nahon supe matan Rome.”

## 27

### *Paul Mo Malue Vara I Sahe Rome*

<sup>1</sup> Lara la hatihia vara kama pa malue matan vara kama sahe Italy,

la tau Paul peresi na tatua tamlohi tinapua na ima řilangi na lima captain mata tamlohi vuro matea hijana Julius. Enia mo lo kilau na vao tamlohi vuro matea, ale vao tamlohi vuro atu la lavi na hijan nora supe matea matan Rome tuai sei Augustus. <sup>2</sup> Kama vele na boti matea mo malue Adramyttium sei mo tatamahu vara i pa maro usuri na vusalean Asia, ale kama malue. Aristarchus mara Macedonia matea mo tai Thessalonica mo usuri kamam.

<sup>3</sup> Mo mele rani sahe kama hoso Sidon, ale Julius mo kilau mamahuni Paul na posposi řuhu, ale mo tinařihia vara i eři sahe i hite na tapalana matan vara la eři tuenia na nona vejuveju. <sup>4</sup> Kama mele malue atu kama sivo na tasi, ale kama maro na maumau ureuren Cyprus matan kama lo songai na langin hapuara hařua. <sup>5</sup> Kama maro roto na tasi tavera moiso, kama sahe usuri vusalean Cilicia ale Pamphylia. Ale kama hoso Myra hin Lycia. <sup>6</sup> Hin jara atu captain mata tamlohi vuro atu mo tapai na boti tinapua matea matan Alexandria mo lo sahe Italy, ale mo tau kamam hinia.

<sup>7</sup> Kama maro malum na tasi mata rani matuvana, mo řilangi pani kama mai mariviti Cnidus, pani langin hapuara hařua atu mo horo kamam, kama pa sopo eři mele vano. Ale kama posi sivo kama maro usuri na maumau ureuren Crete kama jeu na jingon Salmone. <sup>8</sup> Kama maro usuri na vusaleana, kama lavi na rani řilangi. Ale kama mai na jara matea la tovia Fair Havens, enia mo lo toho mariviti na taon matan Lasea.

### *Kama Ori Na Langi Tavera*

<sup>9</sup> Matan rani řuhu mo visa la vano purongo moiso, nomam hahau nakerihi mo pa mele sati jea matan taro hamariri tavera peresi na langi sati matan October mo pala moiso, ale rani mata tapuhoro na hanhani nona Jew mo isoiso tuai moiso. Ale Paul mo vereea isara mara,

<sup>10</sup> “La tamlohi tavera, na hitevosahia vara nořa hahau i pa isoiso na rani

sati vara řa malue akerihi nakerihi. Ale mo sopo hinahinau na lolo boti purongo la pa tihai, pani mauriřa sohena.” <sup>11</sup> Pani pa captain atu, mo tapurongo na retireti non captain nona boti atu peresi na tamlohin boti atu, ale mo sopo tapurongo na sava Paul mo lo vereaa. <sup>12</sup> Matan jara atu enia mo sopo řuhu vara tea i eři toho atu na taro hamariri teni na taro langi, vaora la hatihia vara la malue atu. La lo řomtaua vara la eři tikeli Phoenix, mo naho sivo Malahařua enia jara matea matan Crete ale jara řuhu mata luhu na langi, ale la pa toho atu na taro hamariri.

### *Langi Tavera Mo Vilira Na Tasi*

<sup>13</sup> Langin tahuna matea mara mo tapulo ivi malum, la lo řomřomia vara la pa eři tikeli Phoenix. Ale kama reve nařihia na matalalavo, kama hapahapani usuri na vusalean Crete. <sup>14</sup> Pani mo sopo tuai, langi sati tavera matan Tokalau mo jovi mo malue hin ureure atu mo vili kamam. <sup>15</sup> Boti atu mara mo kali hinia, i sopo eři mele songaia, kama tavuti kama tinařihia mo sere kamam.

<sup>16</sup> Kama sivo kama tikeli na mau-mau ureuren Cauda. Mo řilangi pani kama taurilati boti rihirihi atu sei boti tavera atu mo lo revea. <sup>17</sup> Tamlohi voko mata boti lara la sau nařihia moiso, la talihi na tali na pangen boti tavera atu ale la liholatia. Ale matan la matahu vara langi i pa pulahi kamam kama hoso na rataratan Syrtis, la tuhu na timlen boti atu matan vara i taurilatira, ale la pa sivo malum purongo.

<sup>18</sup> Mo mele rani sahe, matan langi atu mo tapulo řari boti atu, tamlohi voko la tapulo pulahi na lavilavi sivo na lolo tasi. <sup>19</sup> Mara mo mele rani sahe la tapulo pulahi na hinahinaun boti atu peresi te hinau sei la hitera la lo toho toho purongo. <sup>20</sup> Ale matan kama sopo mele hite na alo teni te vitusarasara mata rani matuvana moiso, ale langi atu mo sopo moti, kama sopo mele řomtoho vara kama pa juri hinia.

<sup>21</sup> Matan vao tavera la řohu na hanhahi, Paul mo turu sahe na livuhara, ale mara:

“La tamlohi, vara ha pa lo tapurongo isaku, vara řa sopo lo malue Crete, řa pa sopo eři lavi na rani řilangi sohen harihi, teni vara řa pulahi tihai te hinau na tasi. <sup>22</sup> Pani nakerihi, na lo vere kamim hinia vara ha sopo matahu, matan tea i pa sopo eři mate, pani boti akerihi purongo i pa tihai. <sup>23</sup> Matan na vutepongi na hite na angelo matea non God sei enau nona volitusi, mo turu na pahisaku <sup>24</sup> ale mo vereaa isaku mara, ‘Paul, o sopo matahu! O pa turu na nahon supe matan Rome, ale God mo tinařihia vara tamlohi tari sei la lo toho peresiho la pa mauri.’

<sup>25</sup> Matan haratu, ha řomřilangi la tamlohi, matan enau na tau na noku rasua hin God vara i pa sohen haratu mo vereaa isaku. <sup>26</sup> Pani na levosahia vara boti akerihi i pa takosa hin te ureure hatea.”

### *Boti Mo Mai Mariviti Na Jarauta*

<sup>27</sup> Na sangavulu řomana mo vati vutepongi matan langi atu, langi atu mara mo lo pulahi kamam, kama lo sivo roto na tasin Adria. Tamlohi voko hin boti atu la levosahia vara kama lo mai mariviti na jarauta. <sup>28</sup> Matana, la tuhu na asihai ale la hiteulia vara puahana mo tikeli na metre mo ngavulu vati (40). Ale la mele sahe makomona la mele tuhu pa asihai atu, ale la mele hiteulia vara nakerihi natu puahana mo tikeli na metre mo ngavulu tolu moiso (30).

<sup>29</sup> Ale matan la matahu vara kama pa kali hin te paranga, la tuhu na matalalavo mo vati na pulo boti, ale la opoia vara i rani vila. <sup>30</sup> Moiso tamlohi voko la vaihitea vara la rovo hin boti atu, la tuhu pa boti rihirihi atu, ale lara la lo vaia, o hitea sohena vara la pa tuhu na matalalavo na patun boti tavera atu. <sup>31</sup> Pani Paul mo vereaa isan nora captain mata tamlohi vuro atu peresi la tamlohi vuro atu mara, “Vara la tamlohi akerihi la malue hin boti akerihi, ha pa sopo eři

juri!” <sup>32</sup> Moiso la tamlohi vuro atu la tai roto na asin pa boti rihirihia atu, la tinañihia mo sale.

<sup>33</sup> Mo pa lo nahonaho rani, Paul mo vereā ñilangi isara vara la hani te hināu mara, “Nahapani enia harāu wik natu sei ka sopo hani te hināu matan ka sopo levosahia vara ha pa mauri teni mo vono. <sup>34</sup> Matan haratu, na lo vereā ñilangi vara ha hani te hināu matan enia i pa tueni kamim vara ha pa sopo mate. Matan te vulun te vonamim hatea i pa sopo eñi tihai na patuna.” <sup>35</sup> Mara mo vere hināu atu mo isoiso, Paul mo lavi na pereti ale mo vere meje isan God na nahora mo isoiso matana, mo topea ale mo tapulo hania. <sup>36</sup> Matan haratu, enira mo isoiso ñomira mo mele ñilangi ale la hanhani. <sup>37</sup> Evimam hin boti atu mo tikeli ngavulu sangavulu rua mo ngavulu limaravrua mo limarave (276).

<sup>38</sup> Lara la hanhani la masu, la pulahi na tanga wit mo sivo na lolo tasi matan vara i vai na boti i salesale.

### *Boti Mo Kali Na Paranga*

<sup>39</sup> Rani mara mo pala, la sopo hitevosahi jara atu, pani la hite na jara luhu matea peresi na oneone, ale la hatihia vara la eñi vaia vara boti atu i hoso hinia. <sup>40</sup> Ale la tai roto na asi mata matalalavo sei la lo toho na lolo tasi, ale la uli nañihia asihai atu sei mo lo tauri la stian boti atu jara matea, moiso la tahe na hapanin patu boti atu mo sahe na langi, la haloa mo sahe na oneone. <sup>41</sup> Pani la tia na jara matea tasi mo lo maro leji hinia, ale patun boti atu mo kali na ratarata mo ñilangi i sopo eñi mele hisu, pani loloputu la lo tapulo kauti na pulo boti moiso.

<sup>42</sup> La tamlohi vuro atu la hatihia vara la pa vilimatei la tamlohi atu mata ima ñilangi matan vara tea i sopo olo i rovo. <sup>43</sup> Pani pa captain mata tamlohi vuro atu matan mo opoia vara i juri na maurin Paul, mo horora vara la sopo vai na sava la hatihia moiso. Mo retileu mara la haratu la eñi olo la kue nañihia tiroma ale la olo sahe na jarauta, <sup>44</sup> ale

sopera la pa lo hitahu, tea la pa keho hin te tavalu tapea teni te hināu i eñi sale hin boti atu. Hin malele akerihia natu, tamlohi tari hin boti atu la jelu la sahe na jarauta hinia.

## 28

### *La Hoso Na Ureuren Malta*

<sup>1</sup> Kama hoso na jarauta mo ñuhu moiso, kama pa levosahia vara kama lo toho na Ureuren Malta. <sup>2</sup> Tamlohin jara atu la ñuhuñuhu isamam hajarua, matan mo lo usa ale hamariri tavera. Ale la avulahi vara la lavi kamam, matan la polo na hapu tavera matea matan vara kama pa marijo hinia.

<sup>3</sup> Paul mara mo rako na oti rangaranga hapu matea, ale mo lo taua na hapu, mata sasati matea mo malue matan hapu atu ale mo katoho na limana. <sup>4</sup> Tamlohin jara atu lara la hite maji atu mo lo keho na liman Paul, la lo vereverea isara lara, “Mo sopo te retiusia vara tamlohi akerihia enia tamlohi vili tamlohi matea teni mo vono, hina purongo vara mo juri na tasi, pani noña god hañai sei Justice, mo sopo tinañihia vara i mauri.” <sup>5</sup> Pani Paul mo pulapulahi nañihia maji atu mo sivo na lolo hapu, ale mo sopo rongō i sati. <sup>6</sup> Pani la tamlohi atu la lo kilau vara epena la pa sosohi teni i pa jovi i mate vahatea. Ale la lo saovi mo peravu moiso ale lara la sopo hite te hināu i vaia, la posi na ñomira lara enia god matea.

<sup>7</sup> Ale ñalihia hin jara atu lepa enia non patu tamlohi matan Malta, hijana Publius; ale enia mo avulahi hin kamam, mo lavi kamam mo lo kilau mamahuni kamam mata rani mo tolu. <sup>8</sup> Taman Publius mo rojo mo lo juruvi na vatana. Mo lo rongohaji na seserei peresi na jimajima. Paul mo unu mo sivo mo hitea, ale mo usiusi isana, moiso mo tau na limana hinia ale mo vai na nona rojoa la tihai. <sup>9</sup> Hināu atu mara mo masese mo isoiso, tamlohi matuvana hin ureure atu sei la rojo, enira sohena la mai isan Paul ale la mele ñuhu. <sup>10</sup> Matan haratu, la sile kamam na hināu matuvana, ale kama lo tatamahu vara

kama pa mele malue, la sile na hinau tari kama pa vejuveju hinira na boti.

### *Paul Mo Kakau Rome*

<sup>11</sup> Vitu mo tolu la vano moiso, kama pa mele malue sivo na tasi na boti tinapua matea matan Alexandria sei mo lo luhu hin ureure atu. Ale na patuna la tai na patu god mo rua sei la tovira 'Havo Matan Tuka'. <sup>12</sup> Kama maro kama hosu Syracuse na ureuren Sicily, ale kama lo toho atu mata rani mo tolu. <sup>13</sup> Kama malue atu kama hapahapani kama vano na jara tinatinapua, ale kama sahe kama hosu Rhegium, ale mo mele rani sahe, langin tahuna mo sere, ale na harua rani kama hosu Puteoli. <sup>14</sup> Hin jara atu kama hite na vorai kalesia hai, ale la usi kamam vara kama pa toho peresira, ale kama lo toho atu mata rani mo limaravrua. Kama usuri na malele atu kama hahau kama sahe kama pala Rome.

<sup>15</sup> Vorai kalesia řalihi hin jara atu lara la rongoa vara kama lo sahe Rome, la tai Rome la sinai vara la hite kamam. La jara atu la hahau matara la asau řove sohen na taon sei Forum matan Appius peresi Ima Mo Tolu atu mata tamlohi hahau. Paul mara mo hitera, mo vere meje isan God ale mo mele řilarilangi.

<sup>16</sup> Kamara kama unu Rome, la tinařihia vara Paul i eři toho enia hasena peresi na tamlohi vuro matea mo lo kilaua.

### *Paul Mo Retivujavujangi Isana Jew Rome*

<sup>17</sup> Rani mo tolu la vano moiso, Paul mo tovi na tamlohi tavera nona Jew hin jara atu la mai jara matea. Lara la sakele matavuhi moiso, mo vereea isara mara:

"La vorai, hina purongo vara na sopo vai te hinau i sati isana nořa tamlohi teni na posposi nona nořa pua, la taurilatiau Jerusalem ale la tauau sohena tamlohi sasati matea na lima mara Rome. <sup>18</sup> Tamlohi tavera atu lara la kilau usuri na sava la tuvaiau hinira, la opoia vara la tinařihiau matan la sopo lavuti te hinau vara a pa mate matana. <sup>19</sup> Pani Jew lara la sopo avulahi hinia, mo

vaiau na mele usia vara a pa turu na nahon supe matan Rome, mo sopo matan vara a pa tuvai na tahisaku hin te retireti. <sup>20</sup> Matan hinau atu natu, mo vaiau na opoia vara a hite kamim ale a retireti isamim. Matan enau na lo toho hin jen nike matan na lo tau na noku rasua hin řomtoho atu nona tavitavin Israel matan Tamlohi Jujuri."

<sup>21</sup> La řaramia lara, "Kama sopo lo lavi te leta Judea matam, teni te vorai atu mo sopo lo sinai nike vara i vere te hina sasati matam. <sup>22</sup> Pani kama opoia vara kama rongu na řomim hin rasua nike sei tamlohi na jara tari la lo verelejleja."

<sup>23</sup> La tau na rani matea vara la pa matavuhi peresia. Ale la mai na jara mo lo toho ea, enira vao tavera, mo tapulo na ralavuhu mo tikeli na ravravi mo lo vere mamahunia, ale mo vereuli mauri atu God mo aulu hinia, ale mo vaihitea vara la tau na nora rasua hin Iesu hin na leu non Moses peresi na přovet. <sup>24</sup> Tatuara la rasu na sava mo lo vereea, pani hai la řohu vara la rasua. <sup>25</sup> Ale la tapulo malmalue, matan řomira mo sopo matea. Hitahuna, Paul mo sile na isoiso reti isara mara, "Tanume Tapu mo vereea mo tataholo mata nomim pua na sava sei přovet Isaiah mo vereea mara:

<sup>26</sup> 'O vano isan la tamlohi nike,  
ale o vereea vara,  
Ha pa rongoa vavano,  
pani ha sopo eři rongovosahia,  
ale ha pa lo kilaua vavano,  
pani ha sopo eři hitevosahia.  
<sup>27</sup> Matan mapun la tamlohi nike  
la mate,  
ale perora la sopo rongu,  
ale la pelati na matara moiso,  
matan vara la pa sopo kilau,  
ale perora la pa sopo rongu,  
ale mapura la pa sopo rongovosahi,  
vara i vono la pa posi  
ale a pa vai mamahunira.' *Isa*  
*6.9-10*

<sup>28</sup> Matan haratu, ha lo levosahi mamahunia vara vavahinau sei God mo vaia mata juri na tamlohi, enia

mo sohaia mo vano isana tamlohi  
řořoha: ale enira la tapurongo  
hinia!”

<sup>29-30</sup> Paul mo lo toho atu mata tauni  
mo rua na ima matea mo pakaia, ale  
mo avulahi na tamlohi tari sei la lo  
mai isana. <sup>31</sup> Mo lo retivujavujangi  
mauri atu God mo aulu hinia, ale mo  
lo vujangi hin Moli Iesu Křisto mo  
sopo te matahu hinia, ale mo sopo tea  
i horoa.

**Romans**  
**Leta**  
**Paul Mo Ulia**  
**Isana Mara**  
**Rome**  
**Puku Nike**

Paul mo uli leta nika isana mara Rome. Rome enia taon tavera na varama hin pongi atu. Mo levosahi na kalesia ea (15.22–16.21). Mo vere isara mara Iesu mo vironia vara enia i pa nona volitusi isara (1.1) mo lavi na retisohai matea ‘— matan enia sui-han God mata juri na tamlohi tari sei la rasua, tiroma isana Jew moiso i pa isana tamlohi řořoha.’ (1.16). Paul mo vere mara tamlohi tari la hehe (3.23). Pani mo vai na malele mata vai na tamlohi la tataholo na nahona:

‘Matan tamlohi tari la vai na hehe, la lo toho asau na hina řuhufuhu sei non God hasena, ale God mo avulahi vara i vai na tamlohi la tataholo na nahona na nona řomřuhu purongo, mo vaia na malele mata volituhu hin Křisto Iesu, enia sei, God mo taua na nahořa, řaena mo volituhu na talai lolokoru non God mata hehe, ale rasua enia malele sei tamlohi la eři lavi na vuan vavahinau sei. God mo vujangia vara posina mo tataholo matan enia mo sopo sile na talai mata hehe tari isana tamlohi sei la vaira tuai.’ (3.23–25).

Paul mo vujangia vara rasua nika mo sohen rasua atu non Abraham tuai (4.13). Ale nake vara tamlohi la mai kalesia, la pa mauri usuri na suiha Tanumen God (8.1–27). God mo sile na suiha hai isana nona tamlohi mata hahau usuri na masalona (12.1–13).

**Hin Leta Nike**

1. Paul Mo Vujangi Na Retiřuhu (1.1–17)
2. Tamlohi Tari La Ori Na Hehe (1.18–3.20)
3. God Mo Vai Na Tamlohi La Tataholo Na Nahona (3.21–4.25)
4. Mauri Paro Nona Tamlohi (5.1–8.39)
5. Vujangi Mata Tavtavuin Israel (9.1–11.36)
6. Mauri Paro Nona Kalesia (12.1–15.13)

7. Vavahinau Non Paul, Isoiso Retireti (15.14–16.27)

*Paul Mo Sile Na Nona Retioloolo*

<sup>1</sup> Enau Paul, volitusi non Křisto Iesu matea, enia mo toviau vara a vahařule, mo tapuhiau vara a retivu-javujangi na Retiřuhu non God. <sup>2</sup> Mo retitauhi hin Retiřuhu sei tuai moiso na reti nona řovet na Retitapu mo tapu, <sup>3</sup> mo lo vereuli Natuna, enia mahapin Supe David usuri na malele tamlohi, <sup>4</sup> ale God mo vujangia vara enia Natun God na suiha Tanume Tapu na nona mele turu na mateia, Iesu Křisto nořa Moli, <sup>5</sup> ale hinia, kama lo lavi na řomřuhu peresi na hija řuhu mata vahařule matan vara kama eři tiroma na tamlohi vara la ooloolo usuri na mauri rasua, matan vara hijana i pa aulu na tamlohi řořoha, <sup>6</sup> kamim sohena, God mo tovi kamim vara ha mai tamlohi non Iesu Křisto.

<sup>7</sup> Isan la haratu tari la lo toho Rome sei God mo opoira, ale mo tovira vara la mai nona tapuhi:

Romřuhu peresi na tamata non God Tamařa peresi Moli Iesu Křisto la mai isamim.

*Retiřuhu Non God*

<sup>8</sup> Tiroma, na opoia vara a vere meje isan noku God matamim hin Iesu Křisto, matan tamlohi na jara tari na varama la lo sorahi na nomim rasua. <sup>9</sup> Matan God sei na lo volitusi isana na mauriku usuri na Retiřuhu matan Natuna, enia noku tuetueni sei mo levosahia vara na lo vere kamim tarea <sup>10</sup> na noku usiisi, tarea na lo usia vara te masapa na masalon God vara a eři mai isamim. <sup>11</sup> Matan tuai moiso, řomiku tavera na opoia vara a hite kamim, vara Tanume Tapu i eři sile kamim hin te otori na limaku matan vara i eři řilangi na maurimim hinia, <sup>12</sup> na lo řaramia vara, enřa řa eři řomřomi řilangi mata nořa rasua, nomim peresi na noku.

<sup>13</sup> La vorai peresi na vevorai, na opoia vara ha levosahia vara na opoia vaha visa moiso vara a mai, pani mo tikeli nake, mo sopo lo te masapa, matan vara a eři hite na vua nomim rasua sohen na hitea

moiso isana tamlohi řořoha tinatina-pua. <sup>14</sup> God mo tauau moiso vara a pa tueni la haratu la lo retireti na leo mara Greek peresi la haratu la tamlohi řořoha, ale isan la haratu la lelevosahi peresi la haratu la rongorongo vono. <sup>15</sup> Matana, enau na opoia mo tavera jea vara a retivujavujangi na Retiřuhu isamim sei ka lo toho Rome.

<sup>16</sup> Matan enau na sopo mahanuhanu na Retiřuhu, matan enia suihan God mata juri na tamlohi tari sei la rasua, tiroma isana Jew moiso i pa isana tamlohi řořoha. <sup>17</sup> Matan hin Retiřuhu sei, malelen God mo vaia vara tamlohi la mai la tataholo na nahona, mo malue na jara tavera, enia mata rasua purongo, matan la ulia moiso vara, 'Haratu mo tataholo na nahon God la pa mauri usuri na malele rasua purongo'. *Hab 2.4*

#### *Lolokoru Non God Mata Hehe*

<sup>18</sup> Matan God mo lo vujangi na nona talai lolokoru mata hehe na tuka mo sinai na varama mata posposi varama tari peresi na posposi hehe tari nona tamlohi, ale matan nora posposi hehe sei mata turuhoro na retivarařuhu vara i malue na jara tavera. <sup>19</sup> Matan sava hinau tamlohi la eři levosahia hin God mo memera isara, matan God mo vujangia isara moiso. <sup>20</sup> Matan řuhuřuhun God sei nona hasena la lo luhu sohen harihi; nona suiha matan tui tui peresi mauri atu sei enia non God hasena. Ale la hinau sei tamlohi la eři hitevosahira matan la memera purongo hin la hinau atu God mo vaira na tapulo rani sei mo vai na varama. Ale matan haratu, tamlohi la sopo eři vereea vara God mo sopo toho.

<sup>21</sup> Matan hina purongo vara la levosahi God moiso, pani la sopo hashasoa vara enia God teni la sopo vere meje isana, ale řomira la mai la putu, ale mapura la rongorongo vono la mai la řořoha, <sup>22</sup> la vereea lara la lelevosahi, pani la mai la rongorongo vono, <sup>23</sup> la sopo lotu na řuhuřuhun God sei i sopo eři tihai, pani la lo lotu na hinau sohena tamasi sei la

vaira sohena tamlohi peresi na maji avuavu, peresi na maji palo vati, peresi na maji haraho sohena mata teni malupa, enira mo isoiso la pa tihai!

<sup>24</sup> Ale matana, God mo silera la vano na masalo mapura, ale la usuri na posposi lumiha, la vai na hina mahanuhanu na epera hasera, <sup>25</sup> matan la jeni na retivarařuhu hin God mata halu, ale la lo lotu ale la volitusi nona hinau God mo vaira, pani mo sopo isan God sei mo vaira, enia hasena mo tataholo vara tamlohi la hashasoa na rani tui tui tarea! Amen.

<sup>26</sup> Matan harihi, God mo silera la vano na nora opoia mata posposi mahanuhanu, matan nora hařai la jeni na posposi tataholo nona hařai matan la lo hase lavilavira. <sup>27</sup> Ale lamane sohena la tinařihi na posposi tataholo peresi na hařai, matan posposi mata opoi na lamane mo jeu na masalora tinatinapua, lamane la vai na hina mahanuhanu peresi na lamane, ale la hani na vua pulara vetali mata nora lejileji.

<sup>28</sup> Ale matan la řohu vara la řomřomi God, ale God mo silera na řomřomi nona maji matan vara la vai na hinau mo sopo tataholo vara tamlohi la eři vaira. <sup>29</sup> La mařivi na posposi tari la sopo tataholo, la lo vaivaileu, la lo řomusuri, la sasati, la mařivi na mereimerei, la lo vilimatei na tamlohi, la lo hitesatihi, la lo halu, la lo vaisatihi na tinapua, la lo sorasora tamlohi, <sup>30</sup> la lo retireřen, la řohu hin God, la lo vatařa, la lo mangisi, la lo retihapahapa, la lo řomřomi, ale la aleale malele paro mata la vai na hina sasati hinia, la sopo ololo hin tamara teni tinara, <sup>31</sup> řomira mo vono, la lo tope na nora retitauhi, mo sopo te nora opoia, la sopo řomopoi te tinapua. <sup>32</sup> Hina purongo vara la levosahia mo řuhu moiso vara God mo pete tau na retileu moiso vara tea mo topea i pa mate matana, enira la sopo vaira purongo, pani la retituetueni la haratu la lo vaira.



### *God I Pa Ari Na Nom Hehe*

<sup>1</sup> Ale nake, mo sopo te hinau hatea vara o eři halu hinia tapala, kamim mo isoiso sei ka lo ari na tinapua. Matan vara ko lo ari na tinapua, ko lo hasem ariho matan engko ko lo vai la hinau atu na lo vereea moiso vara tamlohi la lo vaira. <sup>2</sup> Ra levosahia vara talai non God mo lo jovi isan la haratu la lo vai la hinau sei, ale enia mo tataholo. <sup>3</sup> Tapala, engko sei ko lo ari la haratu la lo vai la hinau sei, ko řom vara o pa eři jelu na talai non God, pani i pa sohena sava matan engko sohena ko lo vaira? <sup>4</sup> Ko lo řomřomi purongo na nona řomřuhu peresi na nona řompurongo peresi na nona řomperavu tavera isam, pani ko sopo levosahia vara nona řomperavu mo lo sileho na masapa vara o posi na nom hehe.

<sup>5</sup> Pani matan mapum mo řilangi, ale ko řohu vara o posi, ko lo hasem takonahi na nom talai matan rani aria atu sei God i pa vujangi na nona talai lolokoru mata hehe usuri na nona posposi tataholo hinia. <sup>6</sup> God i pa ari na tamlohi i tataholo na nora vavahinau: <sup>7</sup> God i pa sile na mauri tui isan la haratu la lo řomperavu vara la vai na vavahinau řuhu, ale la lo ale na hasohaso peresi na oloolo tavera peresi mauri atu sei i pa sopo eři tihai hin te rani; <sup>8</sup> pani isan la haratu la lo vai na masalora purongo, ale la sopo oloolo na retivararuhu, pani la lo oloolo na posposi mo sopo tataholo na nahon God, enira la pa lavi na talai lolokoru non God mata hehe peresi na nona lolokoru sasati. <sup>9</sup> Ale tamlohi tari sei la lo vai na vavahinau hehe la pa lavi na rani řilangi peresi na rani sasati, isana Jew tiroma moiso i pa isana tamlohi řořoha, <sup>10</sup> pani God i pa sile na hasohaso, oloolo peresi na tamata isana tamlohi tari sei la lo vai na vavahinau řuhu, isana Jew tiroma moiso i pa isana tamlohi řořoha, <sup>11</sup> matan God mo sopo tametame tea.

<sup>12</sup> God i pa sile na talai isana tamlohi la sopo Jew vara la hehe, hina purongo vara la sopo lo lavi na nona

leu. Ale i pa sile na talai isana Jew vara la hehe matan nona leu mo lo pisuhi na nora hehe. <sup>13</sup> Matan mo sopo la haratu sei la lo rongo na leu purongo mo vaira la tataholo na nahon God, pani la haratu sei la lo vai na sava leu mo vereea, enira natu la tataholo na nahon God. <sup>14</sup> Matan vara la tamlohi řořoha sei la sopo lavi na leu, pani la lo vai na sava leu mo vereea, mo vujangia vara leu mo lo toho hinira moiso, hina purongo vara la sopo lo lavi na leu. <sup>15</sup> La lo vujangia vara sava hinau leu non God mo vereea, mo lo toho na mapura moiso, matan řomira sohena mo vereulia isara vara la lo vai na hina řuhu teni te hina hehe, <sup>16</sup> hin rani atu usuri noku Retiřuhu sei mo lo vereea vara God mo ari na hina luhu nona tamlohi hin Křisto Iesu.

### *Leu Non God Mo Reti Isana Jew*

<sup>17</sup> Pani vara ko lo vereea vara engko Jew matea, ale ko lo turu na leu, ale ko lo hapahapa vara ko levosahi God, <sup>18</sup> ale vara ko levosahi na masalona, ale ko lo avulahi na sava hinau la řuhuřuhu jea matan ko lo lavi na lelevosahi na leu, <sup>19</sup> ale vara ko levosahi mamahunia vara engko tamlohi tiroma na matavuso matea, ale lamu matea isan la haratu na řořoha, <sup>20</sup> ale vara engko tamlohi matea mata vujangi la haratu la sopo rongvosahi, ale tamlohi vujangi na natuvarihi matan ko lavi vevuhi na lelevosahi peresi na retivararuhu na leu, <sup>21</sup> ale vara ko lo vujangira sohena, mata sava ko sopo hasem vujangiho? Ko lo retivujavujangi vara tamlohi la pa sopo vavanaho, pani engko, ko lo vavanaho teni mo vono? <sup>22</sup> Engko sei ko lo vereea vara mo sopo tataholo vara tamlohi la vaivaileu peresi na tinapua mo lahi moiso, ko lo vaivaileu peresi na tinapua mo lahi moiso teni mo vono? Ko lo vereea vara ko sopo lotulotu vono, pani ko lo vanaho na hinau na lolo temple nona tamasi teni mo vono? <sup>23</sup> Engko sei ko lo hapahapa na leu, ko lo topea, ale ko lo komo na hijan God matana. <sup>24</sup> Matan sohen la ulia vara, ‘Tamlohi

řořoha matuvana na varama la lo veresatihi na hijan God matamim’.

*Isa 52.5*

<sup>25</sup> Matan posposi taiřalihi mo řuhu purongo vara ko ooloo na leu, pani vara ko lo tope na leu, nom taiřalihi enia hina purongo. <sup>26</sup> Ale matana, vara tamlohi matea mo sopo taiřalihi, pani mo lo tauri na vujangi mata leu, ko hitea vara God i pa hitea vara posina mo tataholo hin la haratu la taiřalihi teni mo vono? <sup>27</sup> Ale matana, tamlohi atu mo sopo taiřalihi, ale mo lo tauri na leu, enia i pa vereea vara talai i pa jovi isam sei ko taiřalihi sei ko lavi na leu, matan engko natu ko lo tope leu atu.

<sup>28</sup> Matan engko mo sopo Jew matea tataholo vara tamam enia tinam enira Jew teni matan engko ko lavi na taiřalihi na epem. <sup>29</sup> Mo vono. Jew tataholo matea enia haratu mapuna mo tataholo na nahon God. Ale taiřalihi varařuhu enia mo sopo taiřalihi na epe, pani sava Tanume Tapu mo vaia na mapum. Tamlohi sohena, mo lo ale hasohaso atu God mo lo silea, mo sopo hasohaso sei tamlohi la lo silea.

### 3

#### *Retitauhi Non God La Varařuhu*

<sup>1</sup> Vara mo sohen haratu, sava mo řuhu natu vara engko Jew matea? Teni sava natu mo řuhu na taiřalihi? <sup>2</sup> Varařuhu, God mo leřuhu na Jew na malele matuvana, tiromara enia God mo sile na nona vereulia isara. <sup>3</sup> Varařuhu, tatuara la tope na nora retitauhi, pani nora posposi mata tope na retitauhi i pa vai na retitauhi non God i vano hina purongo teni i vono? <sup>4</sup> I vono! Tamlohi tari enira tamlohi halu, pani God mo lo varařuhu, sohen la ulia vara, ‘Nom reti la vujangia vara engko ko tataholo, ale engko o pa jeu na nora retituvai na court’.

*Psa 51.4*

<sup>5</sup> Pani vara hai la lo vereea lara nora hehe mo sile God na masapa vara i pa vujangi na nona posposi tataholo, řa pa řarami řomřomi atu sohena sava? Vara mo sopo tataholo

vara God i sile na nona talai lolokoru mata hehe isara teni mo vono? Na lo retireti usuri na řomřomi tamlohi nahai. <sup>6</sup> I vono! Vara sohena, God i pa eři ari na varama sohena sava? <sup>7</sup> Pani tea la pa vereea vara, ‘Vara noku halu mo lo vujangia vara reti non God mo varařuhu sohena sava, ale mo lo lavi na hasohaso matana, mata sava natu, na lo lavi na talai sohena tamlohi hehe matea?’ <sup>8</sup> Ale mata sava řa sopo eři vereea vara, ‘Mo řuhu vara řa vai na hina sasati matan vara hina řuhu i eři mai matana.’ Matan tea la lo retireřen hin kamam lara kama lo vujangia sohena. Pani hara talai sei God i pa silea isara matana i pa tataholo.

#### *Tamlohi Tari La Hehe*

<sup>9</sup> Nake i pa sohena sava? Kamam Jew kama řuhu kama jeu na tinapua teni mo vono? I vono, matan řa pete vujangia moiso vara tamlohi tari, Jew teni tamlohi řořoha, la lo toho na ruhuruhi suiha hehe, <sup>10</sup> mo sohen la ulia vara, ‘Mo sopo tea i tataholo, mo vono, mo sopo te hatelete.

<sup>11</sup> mo sopo tea i lelevosahi; mo sopo tea i lo ale God.

<sup>12</sup> Tamlohi tari la vahaři hinia, enira mo isoiso la sopo mele řuhu matan te hinau; mo sopo tea i vai te hina řuhu, mo vono, mo sopo te hatelete.’

*Psa 14.1-3; 53.1-3*

<sup>13</sup> ‘Nora retireti mo řanga sohena pona taptap roi matea; la vai na memera la halu.’ *Psa 5.9* ‘Nora reti mo sohena poison mata mata sasati mo lo toho na jingora.’ *Psa 140.3*

<sup>14</sup> ‘Jingora mo mařivi na lesati peresi na lolokoru.’ *Psa 10.7*

<sup>15</sup> ‘La tamlohi akerihi la tatamahu moiso mata vili na tamlohi;

<sup>16</sup> Sava jara la vano hinia, la vaikomokomoa, ale rongohaji mo vora,

<sup>17</sup> ale malele mata tamata enira la sopo levosahi te hinau hinia.’ *Psa 59.7-8*

<sup>18</sup> ‘Mo sopo te matahu matan God na nora vavahinau.’ *Psa 36.1*

<sup>19</sup> Ale nake řa levosahia vara sava hinau leu mo vereea, mo vereea isan la haratu la lo toho na leu matan mo vai na tamlohi tari la tapanono, ale mo vujangia vara tamlohi tari na varama la pa toho na ruhuru talai non God. <sup>20</sup> Matana, mo sopo te tamlohi vara i eři tataholo na nahon God matan enia mo lo usuri na leu. Matan leu mo sile na lelevosahi mata hehe.

#### *Křisto Mo Lavi Na Nořa Talai*

<sup>21</sup> Pani nake, malele tamlohi mata la mai la tataholo na nahon God mo lo toho na jara tavera, pani leu mo sopo toho na lolona, o pa hitea vara Leu non Moses peresi na retireti nona přovet la lo vereulia <sup>22</sup> sohena sava God mo lo vujangi na nona posposi tataholo na malele rasua. Tamlohi tari la tau nora rasua hin Iesu Křisto la mai la tataholo na nahon God matan God mo sopo ase na tamlohi, <sup>23</sup> matan tamlohi tari la lo vai na hehe, la toho asau na hina řuhuru sei non God hasena, <sup>24</sup> ale God mo avulahi vara i vai na tamlohi la tataholo na nahona na nona řomřuhu purongo, mo vaia na malele mata volituhu hin Křisto Iesu, <sup>25</sup> enia sei, God mo taua na nahořa, řaena mo volituhu na talai lolokoru non God mata hehe, ale rasua enia malele sei tamlohi la eři lavi na vuan vavahinau sei. God mo vujangia vara posina mo tataholo matan enia mo sopo sile na talai mata hehe tari isana tamlohi sei la vaira tuai. <sup>26</sup> Nake mo vaia matan vara i vujangia vara nona aria mo tataholo, ale mo tataholo vara enia i vai na tamlohi la tau na nora rasu hin Iesu, ale la mai la tataholo na nahona.

<sup>27</sup> Ale, hare natu i eři retihapahapa i vereea vara mo tataholo mata nona vavahinau? I pa sopo tea! Mo mai mata sava leu? Matan řa lo ololo na leu? Mo vono, pani matan řa usuri na leu mata rasua. <sup>28</sup> Matan kama lo vereea vara tamlohi la mai la tataholo na nahon God mata rasua, mo sopo matan la lo ololo na leu.

<sup>29</sup> Pani God enia God nona Jew purongo teni mo vono? Enia God nona tamlohi řořoha teni mo vono? Enjora, enia God nona tamlohi řořoha, <sup>30</sup> matan God enia mo matelete. Enia i pa vai la haratu

la taiřalihi peresi la haratu la sopo taiřalihi la tataholo na nahona mata rasua. <sup>31</sup> Ale, vara mo sohena, rasua mo vai na suihan leu atu mo isoiso teni mo vono? Mo vono, matan kama lo vereea vara leu mo tataholo.

## 4

### *Rasua Non Abraham*

<sup>1</sup> Ale vara mo sohena, řa pa vere na sava matan hinau sei piřa Abraham mo vileia tuai? <sup>2</sup> Matan, vara Abraham mo tataholo na nahon God mata nona vavahinau, enia i pa hapahapa matana. Pani i sopo eři hapahapa na nahon God. <sup>3</sup> Retitapu mo vere na sava matana? 'Abraham mo rasu God, ale God mo vereea vara enia mo tataholo na nahona matana'. *Gen 15.6*

<sup>4</sup> Ale isana tamlohi voko matea, volina mo sopo hina silesilea matea, pani enia voli nona voko. <sup>5</sup> Pani isan haratu mo sopo vai te voko, pani mo tau na nona rasu hin God sei mo eři vai na tamlohi varama la mai la tataholo na nahona, ale God mo vereea vara rasua non tamlohi atu mo vaia mo mai mo tataholo na nahona.

<sup>6</sup> Mo sohen supe David mo vereea matan avulahi tavera non haratu sei God mo hitea vara mo tataholo na nahona, mo sopo matan te hinau enia mo vaia:

<sup>7</sup> 'Avulahi tavera isan la haratu God mo řomi na nora vaivaileu, ale mo tatavuhi na nora hehe;

<sup>8</sup> avulahi tavera isan tamlohi sei Moli i pa sopo evi na nona hehe hin te rani.' *Psa 32.1-2*

<sup>9</sup> Avulahi tavera nike enia non la haratu la taiřalihi purongo? Mo vono, avulahi sei enia non la haratu la sopo taiřalihi peresi la haratu la taiřalihi, matan kama lo vereea vara, 'God mo vereea vara Abraham mo tataholo na nahona mata nona rasua purongo'. *Gen 15.6*

<sup>10</sup> God mo pa vaia sohena isan Abraham sohena sava? Mo vaia tiroma teni hitahu moiso mo pa taiřalihi? Mo sopo hitahu, pani tiroma na nona taiřalihi.

<sup>11</sup> Mo lavi na taiřalihi sohena mata-mata matea mata vujangia vara enia mo tataholo mata nona rasua hin

rani atu mo sopo lo taiřalihi. Enia matan vara God i vaia i tama tamlohi tari sei la rasua, pani la sopo taiřalihi, matan vara God i pa vaira la tataholo na nahona sohen Abraham, <sup>12</sup> ale mo vai Abraham mo taman la haratu la taiřalihi, mo sopo mata taiřalihi purongo, pani matan la lo hahau usuri na malele rasua non tamařa Abraham hin rani atu mo sopo lo taiřalihi.

<sup>13</sup> Matan retitauhi sei God mo silea isan Abraham peresi na taniāna mo vereā vara varama i pa nora, mo sopo mai mata leu, pani mata rasua sei mo vai na tamlohi la tataholo na nahon God. <sup>14</sup> Matan, vara la haratu la lo usuri na leu la lavi na vuan retitauhi sei, rasua enia mo sopo te suihana, ale retitauhi atu mo vano hina purongo. <sup>15</sup> Matan leu mo lavi na talai lolokoru non God mata hehe mo mai isana tamlohi, pani vara i sopo lo te leu, i pa sopo te hehe.

<sup>16</sup> Mo pa sohena matan mo turu na rasua purongo, matan vara sava retitauhi mo vereā, mo mai mata řomřuhu, mo turu řilangi mata taniāna tari, mo sopo isan haratu mo lo usuri na leu purongo pani isan haratu mo rasua sohen Abraham mo lo rasua, enia tamařa enřa mo isoiso, <sup>17</sup> sohena la ulia vara, 'Enau na viřoniho vara engko o pa tama tamlohi jara matuvana'. *Gen*

*17.5* Ale God mo hitea vara Abraham mo rasua vara enia i eři sile na mauri isana mate, ale mo retireti purongo ale hināu sei la sopo lo toho la pala. <sup>18</sup> Abraham mo lo řomtoho, hina purongo vara mo sopo levosahia vara i pa sohena sohena sava, pani mo lo řomtoho vara i pa tama mara jara matuvana usuri na sava God mo vereā isana mara, 'Ale taniān la pa matuvana sohena vitusarasara'. *Gen*  
*15.5*

<sup>19</sup> Nona rasua mo sopo jovi, hina purongo vara epena mo vajiāha mariviti i pa mate purongo matan taunina mo lo lavilavi na tauni mo ngavulu sangavulu (*100*), ale hina purongo vara Sarah mo aroaro.

<sup>20</sup> Mo sopo řomkaka na retitauhi non God, pani mo ulua řilangi na nona rasua, ale mo lo sile na oloolo isan God, <sup>21</sup> mo levosahi mamahunia vara God i eři vai na sava mo retitauhi hinia. <sup>22</sup> Ale matan nona rasua atu, 'God mo vereā vara enia mo tataholo na nahona.'

<sup>23</sup> Pani reti sei akerihi, 'God mo vereā vara enia mo tataholo...' la sopo ulia matan Abraham hasena, <sup>24</sup> pani matan nořa rasua sohena. God i pa vereā sohena isan la haratu la lo tau nora rasua hin God sei mo sauteterahi Iesu nořa Moli na mateia. <sup>25</sup> Enia, God mo silea mata nořa hehe, ale mo sauteterahia matan vara i vaiřa řa tataholo na nahona.

## 5

### *Rasua Mo Sile Na Avulahi*

<sup>1</sup> Ale matan nake řa tataholo moiso na nahon God na rasua, řa toho na tamata peresi God hin nořa Moli Iesu Křisto. <sup>2</sup> Hinia, řa eři unu na řomřuhu sei řa lo turu hinia mata rasua, ale řa lo avulahi tavera matan řa lo řomtoho vara řa pa toho peresi God na hasohasona. <sup>3</sup> Aulu hin haratu, řa avulahi na nořa rani řilangi, matan řa levosahia vara nořa rani řilangi, vuana enia posposi mata turu řilangi, <sup>4</sup> ale posposi mata turu řilangi, vuana enia jelu na hināu vaihite, ale posposi mata jelu na hināu vaihite, vuana enia řomtoho, <sup>5</sup> ale nořa řomtoho sei i pa sopo eři vano řomřomi purongo matan Tanume Tapu sei God mo silea isařa mo surei na opoia non God na mapuřa.

<sup>6</sup> Matan na rani mo sopo lo te nořa suiha, na ranina tataholo, Křisto mo mate matařa tamlohi sei řa lo usuri na posposi varama. <sup>7</sup> I pa řilangi vara o eři vilei tea vara i mate mata tamlohi tataholo matea, pani korong, tea i pa eři řomřilangi vara i mate matan te tamlohi řuhu hatea; <sup>8</sup> pani God mo vujangia vara nona opoia matařa mo sohena sava matan, hin rani atu řa pa lo tamlohi hehe, Křisto mo mate matařa. <sup>9</sup> Matan řa mai řa tataholo na nahon God mata řaen Iesu moiso, ale nake, mo sopo te retiusia hatea vara Iesu i eři juriřa

na talai lolokoru non God mata hehe. <sup>10</sup> Matan, vara God mo sari tamata peresiā na mateia non Natuna na rani řa pa lo nona meresahi, nake matan řa turu na tamata peresia moiso, mo sopo te retusia hatea vara řa pa eři juri na maurina teni i vono. <sup>11</sup> Aulu hin haratu, řa avulahi tavera hin God hin nořa Moli Iesu Křisto, ale hinia, nake řa lavi na nona sari tamata, řa mai řa tapalana.

#### *Mateia Mo Mai Matan Adam*

<sup>12</sup> Ale matana, sohena hehe mo mai na varama na tamlohi matea purongo, ale mateia mo mai mata hehe, ale sohena, mateia mo tikeli na tamlohi tari matan enira mo isoiso la vai na hehe, <sup>13</sup> matan hehe mo lo toho na varama moiso God mo pa sile na leu, ale mo sopo te hehe vara i sopo te leu hatea i pisuhia. <sup>14</sup> Hina purongo matana, mateia mo lo aulu na tamlohi mo tapulo hin Adam mo tikeli Moses, hina purongo vara la sopo vai na hehe sohena hehe non Adam, mateia mo lo aulu hinira. Ale Adam enia tovongi matea hin harasei mo lo mai hitahu.

#### *Mauri Tui Mo Mai Matan Iesu*

<sup>15</sup> Pani hehe non Adam mo sopo sohen řomřuhu sei God mo sile purongoia, matan hehe nona tamlohi matea purongo, mateia mo vano isana tamlohi matuvana, pani hin na tamlohi tinapua matea, Iesu Křisto, God mo sile purongoi na otori řuhu mata řomřuhu mo masurere isana tamlohi matuvana. <sup>16</sup> Ale otori řuhu sei God mo sile purongoia, mo sopo sohena vua hehe non tamlohi atu, matan vua aria matan hehe atu enia matea purongo, mo lavi na talai mo mai, pani otori řuhu sei God mo sile purongoia, mo mai hitahun na hehe matuvana, mo roi na malele vara God i eři vereā vara tamlohi la mai tataholo na nahona. <sup>17</sup> Varařuhu, mateia mo aulu na tamlohi tari matan hehe atu matea non tamlohi atu matea purongo, pani la haratu la lo lavi řomřuhu sei mo mařivi savulevule peresi na otori sei God mo sile purongoia mata i vai na tamlohi la tataholo na nahona, enira natu,

maurira la pa aulu na mauri nake ale hitahu hin tamlohi atu matea, enia Iesu Křisto.

<sup>18</sup> Ale matana, sohena hehe nona tamlohi matea purongo mo vai na talai mo mai isana tamlohi tari, ale vavahināu tataholo matea purongo, mo vai na malele vara God i vereā vara tamlohi la tataholo na nahona, ale matan vara i eři sile na mauri isana tamlohi tari. <sup>19</sup> Ale sohena lejileji nona tamlohi matea purongo mo vai na tamlohi matuvana la hehe, ale mo sohena ooloo nona tamlohi matea purongo mo vai na tamlohi matuvana la tataholo na nahon God. <sup>20</sup> Ale nakerihi natu, leu mo mai vara i vai na hehe i memera i řuhu, pani vara hehe mo mai mo mele tavera, řomřuhu natu, mo mai mo mele mařivi savulevule jea, <sup>21</sup> matan vara sohena mateia mo vujangi na suiha nona hehe, řomřuhu i pa eři vujangi na nona suiha hin malele sei God mo vai na tamlohi la tataholo na nahona hinia, ale vuana, enia mauri tui hin Iesu Křisto nořa Moli.

## 6

#### *Suihan Hehe Mo Moti*

<sup>1</sup> Ale nake řa pa vere na sava vara mo sohena? Mo tataholo vara řa lo vai na hehe i lo vano matan vara řomřuhu i pa lo mařivi savulevule matana, teni mo vono? <sup>2</sup> Mo vono! I pa sohena sava natu vara enřa sei řa mate na hehe moiso, řa lo toho hinia? <sup>3</sup> Teni ka sopo levosahia vara enřa sei řa lavi na paptijo hin Křisto Iesu, řa paptijo hin na nona mateia? <sup>4</sup> God mo tavuniřa peresi Iesu na nona mateia na rani řa paptijo hinia, matan vara enřa sohena, řa eři hahau na mauri paro sohen Křisto sei mo turu na mateia na mauri paro na suihan God Tama.

<sup>5</sup> Matan, vara enřa řa sořotahi peresia na nořa mate sohen na nona mate, řa levosahia vara řa pa sořotahi peresia na sauteterahi sohen na nona sauteterahi. <sup>6</sup> Ra levosahia vara nořa mauri tuai mo mate peresia na talopeilopei matan vara i tope na suihan hehe na mauriřa, matan vara řa pa sopo mele

slev isan hehe. <sup>7</sup> Matan haratu mo mate moiso, mo pete materi moiso na hehe. <sup>8</sup> Ale vara řa mate peresi Křisto, řa rasua vara řa pa mauri peresia. <sup>9</sup> Ra levosahia vara God mo sauteterahi Křisto na mateia moiso, ale i pa sopo eři mele mate; mate mo sopo te suihana vara i eři aulu hinia. <sup>10</sup> Matan mateia atu mo mate hinia, mo mate vara i jeu na hehe, vahatea mata rani tari, pani mauri atu mo mauri hinia nake, mo mauri matan God. <sup>11</sup> Ale kamim sohenā ha levosahia vara kamim sohenā ka mate isan hehe, ale ka mauri matan God hin Křisto Iesu.

<sup>12</sup> Matan haratu, ha sopo tinařihia vara hehe i aulu na epemim nike na varama, vara i vai kamim ha oloolo na masalora. <sup>13</sup> Ha sopo tinařihia vara te epemim la mai volitusi na hehe mata posposi mo sopo tataholo na nahon God, pani ha sile kamim isan God sohen la haratu sei God mo vaira la malue na mateia la mauri, ale ha sile na epemim isan God sohenā volitusi mata posposi tataholo na nahon God. <sup>14</sup> Matan hehe i sopo eři te suihana vara i aulu hin kamim, matan kamim ka sopo toho na ruhuruhu leu, pani ka lo toho na ruhuruhu řomřuhu.

### *Ra Eři Oloolo Hin God*

<sup>15</sup> I pa sohenā sava natu? Matan řomřuhu non God mo vaira řa materi moiso, mo tataholo vara řa hahau na hehe matan nake řa sopo toho na ruhuruhu leu teni mo vono? Mo vono! <sup>16</sup> Ka levosahia vara, vara ka sile kamim isan tea sohenā slev matea, ha pa oloolo hinia ale ka slev isan haratu sei ka lo oloolo hinia. Vara ka slev na hehe, vuana enia mateia, vara ka slev mata oloolo hin God, vuana enia posposi tataholo na nahona. <sup>17</sup> Pani řa vere meje isan God matamim sei tuai ka lo slev non hehe, pani nake ka mai ka oloolo na mapumim na vujangi tataholo sei la silea isamim moiso, <sup>18</sup> ale nake, ka materi na hehe, ale ka mai slev non posposi atu mo tataholo na nahon God.

<sup>19</sup> Na lo vere na tovongi na slev sohenā matan vara i tueni na nomim lelevosahi. Matan sohen tiroma ka lo sile na epemim sohenā slev mata hina lumiha teni vaivaileu sei vuana mo mele vaivaileu jea, ale nake ha sile na epemim sohenā slev isan posposi sei mo tataholo na nahon God sei vuana mo lo vai kamim vara ha tapu na maurimim.

<sup>20</sup> Na rani ka pa lo slev non hehe, ka sopo řomřomi na posposi sei mo tataholo na nahon God. <sup>21</sup> Pani vuana enia sava? Vuana mo sopo řuhu matan nake ka lo mahanuhanu matan la hināu sei ka lo vaira tiroma, matan isoison la hināu sei, enia mate. <sup>22</sup> Pani matan nake ka materi moiso na hehe, ale ka mai slev non God, vua ka lavia matana mo vai kamim vara ha pa tapu na maurimim, ale isoisonā, enia mauri tui. <sup>23</sup> Matan voli hehe enia mateia, pani otori non God sei mo lo sile purongoia, enia mauri tui hin Křisto Iesu nořa Moli.

## 7

### *Leu Mo Sopo Mele Aulu Hiniřa*

<sup>1</sup> Teni, ka levosahia la vorai peresi na vevorai vara, vara leu mo lo suiha purongo vara tamlohi mo lo mauri? Na lo retireti isan la haratu la levosahi na leu. <sup>2</sup> Mo sohenā hařai lahi matea, leu mo lo tauria vara tuana mo lo mauri, pani vara tuana mo mate, hařai atu mo materi na leu mata lahi. <sup>3</sup> Ale vara tuana mo lo mauri, pani mo mele juruvi peresi na tamlohi tinapua, la pa vereā vara enia hařai vaivaileu matea. Pani vara tuana mo mate, hařai atu i pa materi na leu, vara i vano isana tamlohi tinapua matea, enia mo sopo hařai vaivaileu.

<sup>4</sup> Mo sohenā natu, la voraiku peresi na vevoraiku, kamim sohenā, ka mate na leu peresi Křisto matan vara ha pa mai tamlohi non tinapua, haratu non Křisto sei God mo sauteterahia na mateia matan vara řa eři vua řuhu isan God. <sup>5</sup> Matan tiroma řa lo usuri na masalo varama, leu mo lo řohai na masalořa sei mo lo vua hehe, ale vuana enia mateia. <sup>6</sup> Pani nake řa materi na leu, matan

řa mate peresi Křisto moiso, ale řa sopo mele toho na ruhuruhu suiha leu, matan vara řa eři volitusi isan God, mo sopo na malele mata ololo na retileu la ulia tuai, pani na malele paro, hin mauri atu Tanumena mo lo silea.

### *Leu Non God Mo Vujangi Na Hehe*

<sup>7</sup> Ra pa vereea sohena sava natu? Ra pa vereea vara leu enia hehe teni mo vono? Mo vono! Pani vara leu i sopo lo mai a pa sopo eři levosahi na hehe. A pa sopo eři levosahia vara řomusuri enia sava, vara leu mo sopo vereea vara, 'O sopo řomusuri'. *Exo 20.17; Deut 5.21*

<sup>8</sup> Pani hehe mo lavi na masapa hin retileu atu, mo vaiau na vua na řomusuri tinatinapua matuvana. Vara leu i sopo lo toho, hehe i pa sopo mauri. <sup>9</sup> Tiroma na lo toho hin mauri atu na sopo levosahi na leu hinia, pani na rani leu mo pala mo pisuhi na hehe ale mo mera purongo vara hehe mo lo mauri hiniau, <sup>10</sup> ale mo tauau na ruhuruhu talai mata mate. Matan na vileia vara retileu atu sei mo lo retitauhi na mauri mo sopo silea, pani mo sile na mateia isaku. <sup>11</sup> Matan hehe mo lavi na masapa matea na retileu, hehe mo halhaluau, ale retileu atu mo viliau, <sup>12</sup> hina purongo vara řa levosahia vara leu tari la tapu, ale retileu enia mo tapu mo tataholo ale mo řuhu.

<sup>13</sup> Ale ka hitea vara mo tataholo vara leu sei mo řuhu mo sile na mateia isaku? Mo vono! Hehe mo tauau na malele mata mate usuri na sava retileu sei mo řuhu mo vujangiau, matan vara hehe i pa pala hehe varařuhu, ale hin retileu sei, hehe mo pala mo sasati jea.

### *Suiha Hehe Na Mauriřa*

<sup>14</sup> Matan řa levosahia vara leu enia mata i vujangi mauri atu God mo opoia, pani enau na lo toho hin mauri atu nona tamlohi sei mo lo toho na ruhuruhu suihan hehe. <sup>15</sup> Na sopo levosahia mata sava na lo vai na hinau na lo vaia. Matan na sopo vai na sava na opoia, pani na lo vai pa hinau sei na lo řohu vara a vaia. <sup>16</sup> Na levosahi mamahunia vara sava

hinau na lo vaia mo sopo tataholo, enia mo vujangia vara na lo majinga vara leu enia mo řuhu. <sup>17</sup> Pani nake, mo sopo enau sei na lo vaia, pani hehe sei mo lo toho isaku.

<sup>18</sup> Matan na levosahia vara mo sopo te hinau řuhu na loloku, na lo vere na masalo varama na loloku. Matan na opoia vara a vai na hinau mo tataholo, pani na sopo eři vaia. <sup>19</sup> Matan na sopo vai na sava hinau řuhu na opoia, pani tarea na lo vai na hina sasati sei na sopo opoia. <sup>20</sup> Ale, pani vara enau na lo vai na hinau na sopo opoia, enia mo sopo enau sei na lo vaia, pani hehe na loloku.

<sup>21</sup> Ale na mauri na hitea vara na opoia vara a vai na hina tataholo, sasati mo lo kilau řořoiau. <sup>22</sup> Matan na loloku, enau na avulahi mo tavera jea na leu non God, <sup>23</sup> pani na hite na leu tinapua matea mo lo voko na epeku, mo lo valum peresi na leu mata řomiku, mo opoia vara a lo toho na ruhuruhu suiha leu mata hehe na epeku.

<sup>24</sup> Enau tamlohi sasati matea! Hare i pa eři juriau na epeku sei mo tauau na ruhuruhun talai matan mateia nike? <sup>25</sup> Pani řa vere meje isan God hin Iesu Křisto nořa Moli matan malele mo roi! Ale nake, enau na lo volitusi isan leu non God na řomiku, pani na loloku, na lo volitusi isana leu mata hehe.

## 8

### *Mauri Atu Tanumen God Mo Lo Silea*

<sup>1</sup> Ale matan sava God mo vaia hin Křisto Iesu, nake natu, mo sopo te talai non la haratu sei la lo toho hin Křisto Iesu. <sup>2</sup> Matan suiha non Tanume mata mauri hin Křisto Iesu mo teriho na suiha mata hehe peresi na mateia. <sup>3</sup> Matan leu mo sopo te suihana vara i eři posi na masalo varama na loloku, pani God mo vaia hin Natuna sei mo řulea mo mai vara i tamlohi, matan vara i mai sohena malamalai mata hehe, pani mo sopo te hehe hinia, ale hinia, God mo komo na suihan hehe sei mo lo aulu hiniřa, <sup>4</sup> matan vara sava hinau tataholo sei

leu mo lo vereā la pa toho na mauriā sei ŀa sopo mele hahau usuri na masalo varama, pani ŀa lo hahau usuri na Tanume Tapu.

<sup>5</sup> Matan la haratu la lo usuri na masalo varama, la lo tau na ŀomira na hināu mata masalon mauri atu, pani la haratu la lo usuri na Tanume Tapu na maurira, la lo tau na ŀomira na hināu non Tanume Tapu. <sup>6</sup> Matan vua ŀomŀomi mata masalo varama, enia mateia, pani vua ŀomŀomi mata Tanume Tapu enia mata mauri peresi na tamata. <sup>7</sup> Matan ŀomŀomi atu mo lo usuri na masalo varama, enia meresahi isan God, matan enia mo sopo ooloo na leu non God, matan i pa sopo eŀi ooloo hinia. <sup>8</sup> La haratu la lo usuri na masalo varama, la pa sopo eŀi vai na sava God mo avulahi hinia.

<sup>9</sup> Pani kamim sei, ka sopo toho na ruhuruhi suiĀan masalo varama, maĀan ka lo toho na ruhuruhi suiĀan Tanume Tapu, varaŀuhu vara Tanumen God mo lo toho isamim. Vara tea mo sopo lavi na Tanumen Kŀisto, enia mo sopo nona. <sup>10</sup> Pani vara Kŀisto mo lo toho hin kamim, hina purongo vara epemim la pa mate mata hehe, Tanumena mo sile kamim na mauri matan mo vai kamim ka tataholo na nahona. <sup>11</sup> Vara Tanumen haratu sei mo lo sauteterahi Iesu na mateia mo lo toho hin kamim, haratu mo sauteterahi Kŀisto Iesu na mateia i pa sile na mauri na epemim na Tanumena sei mo lo toho hin kamim.

<sup>12</sup> Matan haratu, la vorai peresi na vevorai enŀa tamlohi ave, pani mo sopo isana masalo varama, ŀa sopo usuri na masalon mauri atu. <sup>13</sup> Matan, vara ha lo usuri na masalo varama, ha pa mate, pani vara hin Tanume Tapu ka lo tau naŀihi na vavahinau sasati nona epemim, ha pa mauri. <sup>14</sup> Matan tamlohi tari sei Tanume Tapu mo lo tiroma hinira, enira natun God.

<sup>15</sup> Matan ka sopo lavi na Tanumena vara ha lo sohena slev sei la lo juha-juha mata matahu, pani ka lavi na

Tanumena vara i korohi kamim sohena natuna, ale hinia, ŀa lo ulo vara, 'Tata, Tamaku!' <sup>16</sup> Tanume Tapu hasena mo lo vujangi mamahuni na mapuŀa hinia mara enŀa ŀa natun God, <sup>17</sup> ale vara enŀa ŀa natuna, enŀa ŀa pa lavi na hināu God mo silea isan Natuna Kŀisto, vara ŀa lavi na rani ŀilangi peresia matan vara ŀa pa eŀi lavi na hija aulu peresia.

### *Mauri Pongi Hitahu*

<sup>18</sup> Matan enāu na levosahia vara rani ŀilangi mata mauri nake, enira hina purongo na hina hasohaso ŀuhuŀuhu sei God i pa vujangia isaŀa. <sup>19</sup> Matan hināu tari God mo vaira la lo sasaovi vara la hite rani atu natun God la pa pala hinia. <sup>20</sup> Matan God mo tau na lesati isana hināu tari na varama tuai tuai jea, mo sopo matan la opoia vara la sohena, pani matan God mo taura sohena, ale la lo kilāu matan rani atu, <sup>21</sup> hināu tari na varama peresi na natun God la pa lavi materi sei mo ŀuhuŀuhu jea. La pa malue hin mauri atu mata mate peresi na mauri mata ŀovo. <sup>22</sup> Matan ŀa levosahia vara hināu tari God mo vaira, la lo ngutu na rongohaji mata vasusu mo tikeli nake. <sup>23</sup> Ale mo sopo hināu God mo vaira purongo, pani enŀa sohena sei ŀa lavi na tiroma asitauni isan Tanume Tapu, ŀa lo ngutu na loloŀa, ŀa lo saovi matan rani atu sei ŀa pa mai sohena natuna tataholo, ale ŀa lavi na epeŀa paro. <sup>24</sup> Matan hin ŀomtoho sei, God mo juriŀa. Vara ŀa lo hite na sava ŀa lo ŀomtoho hinia, mo sopo ŀomtoho varaŀuhu natu. Matan hare mo lo ŀomtoho na hināu mo eŀi hitea? <sup>25</sup> Pani vara ŀa lo ŀomtoho na hināu ŀa sopo hitea, ŀa pa lo kilāu matana na noŀa ŀomperavu.

<sup>26</sup> Mo sohena natu, Tanume Tapu mo lo tueniŀa na noŀa vejuveju, matan ŀa sopo levosahia vara ŀa pa usiusi mata sava hināu sohen God mo opoia, pani Tanume Tapu hasena mo lo usiusi noŀa na malele matea mo sopo te reti vara i eŀi vere na ŀaramina. <sup>27</sup> Pani haratu sei mo levosahi na mapu tari, mo levosahi na sava mo lo toho na ŀomin



Tanume Tapu, matan Tanume Tapu mo lo usiuseri nona tapuhi usuri na masalon God. <sup>28</sup> Ale řa levosahia vara la haratu la opoi God, hinau tari la voko jara matea mata řuhu non la haratu God mo tovira usuri na nona řomřomi tavera. <sup>29</sup> Matan la haratu mo viřonira tiroma, mo pete tapuhira moiso vara la pa mai sohen Natuna, matan vara enia i pa vora tiroma na vorai matuvana. <sup>30</sup> Ale la haratu mo pete tapuhira moiso, mo tovira, ale la haratu mo tovira, mo vaira la tataholo na nahona, ale la haratu mo vaira la tataholo na nahona, mo tahera aulu na hasohasona.

### *Opoia Non God*

<sup>31</sup> Ra pa vereahia sohenahia sava natu? Vara God enia nořa, hare i pa eři komořa? <sup>32</sup> Vara God mo sopo horo Natuna tataholo, pani mo silea matařa enřa mo isoiso, sohenahia sava natu, God sei mo sile Křisto isařa i pa sopo eři sile na hinau tari isařa?

<sup>33</sup> Hare i eři pisuhi na viřoni non God matan te hinau? God natu, mo vaira la tataholo na nahona. <sup>34</sup> Hare natu i pa vereahia vara i pa eři sile na talai isařa? Křisto Iesu enia haratu mo mate, aulu hin haratu, enia mo turu na mateia, ale mo lo toho na suiha na matuan God, ale enia natu mo lo usiuseri nořa. <sup>35</sup> Hare i pa aseřa na opoia non Křisto? Rani řilangi, teni rani sasati, teni tipahi, teni mařua, teni malamala, teni hinau mo eři komo na mauri, teni vuro? <sup>36</sup> Varařuhu la uli la hinau sei moiso na Retiulia vara, 'Matam, mateia mo lo toho na nahomam tarea, ale la hite kamam sohen natu sipsip sei la pa vilimateira'. *Psa 44.22*

<sup>37</sup> Mo vono, hina purongo hin la hinau tari sei matan řa eři jeura hin Křisto sei mo opoia. <sup>38</sup> Matan na levosahi mamahunia vara řa mate teni řa lo mauri, teni angelo, teni tamlohi aulu, teni hinau nake la lo toho, teni hinau la pa mai, teni haratu la

řilangi, <sup>39</sup> teni te hinau aulu na masapa teni na puaha atano na lolo tasi teni varama, teni te hinau tinapua na varama, i pa sopo eři aseřa na opoia non God hin Křisto Iesu nořa Moli.

## 9

### *Tapuhi Non God Hin Israel*

<sup>1</sup> Na lo vereahia na retivarařuhu na hijan Křisto, na sopo halu; řomiku mo levosahia vara Tanume Tapu mo levosahia <sup>2</sup> vara řomiku mo jovi tavera, ale mapuku mo tangi, <sup>3</sup> vara te malele vara voraiku sei tahisaku Israel, la eři juri hinia, a pa hase tai nařihiau hin Křisto, a mai hina lesati mata malelera. <sup>4</sup> Enira la tavgavin Israel, ale enira korohi non God, mo vujangi na nona matamata tavera isara la řuhuřuhu jea, peresi na nona retitauhi isara tuai, la lavi na nona leu, la lavi na posposi mata lotua, ale nona retitauhi mata jurira. <sup>5</sup> Ale pira tuai enira tamlohi aulu non God, ale Křisto vara řa usuri na malele tamlohi, enia mo tai isara, enia God sei mo aulu na hinau tari, ale i pa lavi na hasohaso tarea tui tui, amen.

<sup>6</sup> Pani mo sopo sohenahia vara God mo řomaliho na nona retitauhi isan tavgavin Israel, matan mo sopo tamlohi tari sei la tai isan Israel la tavgavin Israel, <sup>7</sup> ale mo sopo vara enira mo isoiso natun Abraham vara enira tania, pani matan la ulia vara, 'Tanium la pa lavi na hijam hin Isaac'. *Gen 21.12*

<sup>8</sup> Enia mo řaramia vara na nahon God mo sopo tania tari la tai isan Abraham la natun God, pani natuna tari na nona retitauhi, enira mahapin Abraham. <sup>9</sup> Matan retitauhi mo vereahia sohen harihi mara, 'Sohen harakerihi tavul tauni a pa mele mai, ale Sarah i pa vasusui na lamane matea'. *Gen 18.10, 14*

<sup>10</sup> Mo sopo haratu purongo, pani Rebecca sohenahia mara mo vasusui na havo isan tamlohi matea purongo piřa Isaac, <sup>11</sup> pani tiroma la pa vora, teni tiroma la pa vai te hinau mo řuhu teni mo sati, matan vara

\* **8:34:** sile na talai: tamlohi teni Tiapolo la pa vaihitea pani God mo sile na talai isan Křisto matařa.

řomřomi non God mata viřoni na nona tamlohi i pa turu, <sup>12</sup> mo sopo mata nora vavahinau, pani matan God mo tovia, mo vereia isan Rebecca mara, 'Vora tiroma i pa volitusi isan vora hitahu'.

*Gen 25.23* <sup>13</sup> Sohen la ulia vara God mo vereia mara, 'Na opoi Jacob, pani na řohu hin Esau'.

*Mal 1.2-3* <sup>14</sup> Vara sohen, řa pa vere na sava? God mo tametame tea teni mo vono? Mo vono! <sup>15</sup> Matan God mo vereia isan Moses mara,

'A pa řomřuhu hin haratu sei na řomřuhu hinia, a pa řomopoi hin haratu sei na řomopoi.'

*Exo 33.19* <sup>16</sup> Matan haratu, mo sopo turu na masalon te tamlohi teni te nona vavahinau, pani mo turu hin God sei mo lo řomopoi.

<sup>17</sup> Matan na Retitapu God mo vereia isan Pharaoh mara, 'Na taheho sahe aulu matan hinau akerihi natu, vara a pa eři vuhesi na suihaku hiniho, ale matan vara tamlohi la pa hasohaso na hijaku na jara tari na varama'.

*Exo 9.16* <sup>18</sup> Ale matan haratu mo vujangia vara God mo lo řomopoi na sava tamlohi enia mo opoia, ale enia mo lo pelati na mapun hare enia mo opoia.

<sup>19</sup> Korong tea i pa vereia isaku vara, "Avei, vara God mo vai na masalona sohen, mata sava natu mo pa lo hite na hehe? Matan hare natu, i pa eři horo na masalona?"

<sup>20</sup> Pani engko sava tamlohi natu, vara o pa eři reti isan God sohen? 'Mo tataholo vara hinau sei God mo vaia, i eři vereia isan God sei mo vaia vara, "Mata sava ko vaiau sohen har-ihii"?' *Isa 29.16; 45.9*

<sup>21</sup> Teni vara tamlohi sei mo lo vai na jilivi na lepa, ko hitea vara mo sopo tataholo vara i vai na jilivi i rua na vořoli lepa matea vara matea mata jara lakolako, ale matea mata jara utauta?

<sup>22</sup> Ko hitea mo tataholo vara God mo opoia vara i lo řomperavu tako hin la haratu mo viřonira mata komo moiso, matan vara i eři vujangi na nona talai lolokoru mata hehe peresi na suihana isana tamlohi, <sup>23</sup> matan

vara i eři vujangia vara řuhuřuhuna mo řuhuřuhu jea sohen sava isan la haratu sei i pa řomopoi, enira sei mo viřonira moiso mata lavi na řuhuřuhuna, <sup>24</sup> enřa sohen, enia mo toviřa, pani mo sopo toviřa isana Jew purongo, pani isana tamlohi řořoha sohen.

<sup>25</sup> Sohen God mo vereia na Retiulia non Hosea mara,

'La haratu sei la sopo noku tamlohi, nake a pa toviřa "noku tamlohi" ale a pa opoi hařai sei mo sopo tea i opoia.'

*Hos 2.23*

<sup>26</sup> Ale, 'Tiroma mo vereia isara mara,

"Ka sopo noku tamlohi", pani nake i pa vereia vara, "Kamim ka natun God sei mo mauri".'

*Hos 1.10* <sup>27</sup> Ale Isaiah mo lo ulu aulu matan Israel mara,

'Hina purongo vara evi natun Israel la sohen oneone vavarihi na tasi,

tupu visalete purongo la pa juri.

<sup>28</sup> Matan Moli i pa sile vevuhi na nona talai i vila, řomina i pa sopo rua hinia.'

*Isa 10.22-23* <sup>29</sup> Ale sohen Isaiah mo vereia tiroma moiso mara,

'Vara Moli Suiha Tavera Jea na tuka i sopo lo tinařihia vara te mahapimam la mauri, korong kama pa tihai sohen Sodom peresi Gomorrah moiso.'

*Isa 1.9*

### *Israel La Sopo Rasu God*

<sup>30</sup> Ra pa vereia sohen sava natu? Ra pa eři vereia vara haratu la tamlohi řořoha la mai la tataholo na nahon God pani mo sopo matan la lo tutunguia pani matan la rasu God,

<sup>31</sup> pani Israel sei la lo tutungui na leu vara i pa vaira la tataholo na nahon God, pani la sopo eři vai vevuhi leu atu.

<sup>32</sup> La sopo eři vaia mata sava? Matan la sopo tutunguia na malele rasua, pani la hitea vara la pa vaia na nora vavahinau. La tialahalaha hin vatu atu mata tialahalaha, <sup>33</sup> sohen la ulia vara,

‘Ka hitea? Na lo tau na vatu matea hin Zion mata tialahalaha,\* ale na tau na vatu matea matan i pa vaira la jovi, pani haratu mo tau na nona rasua hinia, i pa sopo tea i efi vaia i mahanuhanu.’ *Isa 8.14; 28.16*

## 10

### *God Mo Juri Na Tamlohi Mata Rasua*

<sup>1</sup> La voraiku peresi na vevoraiku, noku usi isan God peresi na opoia na mapuku mata tavitauiku Israel, enia vara la pa juri. <sup>2</sup> Na lo vereulia matara, vara la lo romjea hin God, pani la sopo usuria na malele mata lelevosahi. <sup>3</sup> Matan, la sopo rongvosahi na malele sei God mo taua vara tamlohi la pa mai la tataholo na nahona hinia, ale la lo ale na malelera purongo sei vara la pa tataholo na nahon God hinia, la rohu vara la usuri malele atu God mo lo vai na tamlohi la mai la tataholo na nahona hinia. <sup>4</sup> Matan hin Křisto mo vai vevuhi na leu, matan hinia, tamlohi tari sei la rasua la mai la tataholo na nahon God.

### *Israel La Jalio Na Malele*

<sup>5</sup> Matan Moses mo ulia mara te tamlohi mo opoia vara i mai i tataholo na nahona na malele mata leu, enia i pa usuri vevuhi na nona retileu na maurina. *Lev 18.5*

<sup>6</sup> Pani vujangi atu mo vujangia vara tamlohi la mai la tataholo na nahon God na rasua mo verea mara, ‘O sopo verea na mapum vara, “Hare natu i pa sahe na tuka?”’ *Deut 30.12* vara i tapai Křisto, ale i lavia i sinai vara i vujangiho. <sup>7</sup> Ale vujangi atu mo verea mara, ‘Hare natu i pa sivo hin koko tavera jea atu sei mo sivo atano jea na lolo varama mata mateia?’ *Deut 30.13* vara i lavi Křisto i mele mauri na mate. <sup>8</sup> Malele mata juri mo mai mata rasua hin Křisto, enia natu, Retiruhu sei kama lo retivujavujangia, mo mariviti isam purongo, pani mo lo vere na sava? ‘Retisohai sei mo

mariviti, mo lo toho na huřurivim, ale mo lo toho na mapum’.

*Deut 30.14*

<sup>9</sup> Matan, vara o taviti na jingom vara Iesu enia Moli, ale o rasua na mapum vara God mo sauteterahia na mateia, o pa juri. <sup>10</sup> Matan rasua na mapum purongo, enia natu, mo vaiho ko tataholo na nahon God, ale ko pa juri matan ko taviti na jingom.

<sup>11</sup> Matan Retitapu mo verea mara, ‘Tamlohi tari sei la tau na nora rasua hinia, i pa sopo tea i vaira la mahanuhanu.’ *Isa 28.16*

<sup>12</sup> Ale nake God mo sopo mele verea vara Jew teni mara Greek matan enia Moli matelete nora Moli enira mo isoiso, enia mo sile na nona řuhuruhuna isana tamlohi tari sei la lo kilau isana. <sup>13</sup> Matan Retiulia mo vara, ‘Tamlohi tari sei la tovi na hijan Moli God la pa juri.’ *Joel 2.32*

<sup>14</sup> Sohena sava natu, la haratu la sopo lo rasua la pa efi tovia? Ale sohena sava natu, la pa tau na nora rasua hinia matan la sopo lo levosahia? Ale la pa rongoa sohena sava vara tea i sopo retivujavujangi isara? <sup>15</sup> Ale sohena sava natu la pa retivujavujangi isara vara tea mo sopo řulera? Mo sohen la ulia vara, ‘Rani řuhu mata avulahi matan la haratu la lo retivujavujangi na Retiruhu la pala!’

*Isa 52.7; Nah 1.15*

<sup>16</sup> Pani mo sopo tamlohi tari la rasu na Retiruhu, sohen Isaiah mo verea mara,

‘Moli, hare mo rasu na sava mo rongoa isamam?’ *Isa 53.1*

<sup>17</sup> Ale haratu mo vujangia vara rasua mo vora na sava la rongoa, ale sava la rongoa mo mai na retivujavujangi na reti non Křisto.

<sup>18</sup> Pani na lo usia vara korong, Jew la sopo lo rongoa? Mo vono, la rongoa, matan Retiulia mo verea vara,

‘Leora mo vano na jara tari na varama, nora reti la vano na jara mo isoiso na varama.’ *Psa 19.4*

\* **9:33:** Zion: Zion enia Jerusalem.

<sup>19</sup> Pani na mele usia vara, korong Israel mo sopo levosahia? Matan na rani non Moses, God mo vereea mara, 'A pa vai kamim ha mereimerei na mara jara tinatinapua, a pa vai kamim ha lolokoru na tamlohi řořoha mara jara tinatinapua.' *Deut 32.21*

<sup>20</sup> Ale hitahu Isaiah mo řomřilangi vara i vereea vara, 'La haratu la sopo aleau la hiteau. Na hase vuhesiau isan la haratu la sopo usia isaku.' *Isa 65.1*

<sup>21</sup> Pani isan Israel God mo vereea mara, 'Tarea na roi na limaku matara, pani tarea la sopo oloolo hiniau, ale la lo lejiau.' *Isa 65.2*

## 11

### *God Mo Tipahi Israel Teni?*

<sup>1</sup> Ale na lo usia nara, korong God mo tipahi na nona tamlohi teni mo vono? Mo vono! Matan enau sohena matea na vora Israel, mahapin Abraham, tavitavin Benjamin.

<sup>2</sup> Mo vono, God mo sopo tipahi na nona tamlohi sei mo levosahira tiroma moiso. Ka lo řomřomi na sava Retitapu mo vereea matan Elijah sohena sava mo usia řilangi isan God mata posposi nona tavitavin Israel sei mara, <sup>3</sup> Moli, la vilimatei na nom přovet, la viliroiroi na nom votavota, enau haseku na pa lo toho, ale la lo aleau vara la vilimateiau'.

*1 Kings 19.10, 14*

<sup>4</sup> Pani God hasena mo řaramia isana sohena sava? Enia mara, 'Enau na tapuhi nařihi na tamlohi mo tari vaha limaravrua (7000) moiso sei la sopo popovitoho isan Baal'. *1 Kings 19.18*

<sup>5</sup> Mo sohena nake, tupu visaletu purongo God mo viřonira na nona řomřuhu. <sup>6</sup> Ale vara mo usuri na nona řomřuhu, mo sopo matan te vavahinau, vara i vono, řomřuhu atu i pa sopo řomřuhu.

<sup>7</sup> I pa sohena sava natu? Israel la jovi na sava la lo alea, la alea vara la mai la tataholo na nahon God. Tatura God sei mo tapuhira la lavia, pani

mo pelati na řomin la haratu mo sopo tapuhira,

<sup>8</sup> mo usuri na sava la ulia vara, 'God mo vai na řomira la mate mo tikeli nake, mo pelati na matara, ale la sopo hitevosahi, mo pelati na perora, ale la sopo rongovosahi.'

*Deut 29.4; Isa 29.10*

<sup>9</sup> Ale David mo vereea mara, 'God o vai na hinau la opoira sohena vuna teni tara matea, la sohena hinau mata tialahalaha isara,

hinau mata sile na talai isara. <sup>10</sup> O vai na matara la řořoha matan vara la sopo hitevosahi, ale o vai na hařira la hoho na hina puhoni la lo lavira.'

*Psa 69.22-23*

### *Matan Israel Romřuhu Non God Mo Mai*

<sup>11</sup> Na lo usia vara korong, enira la tialahalaha matan vara la pa jovi vevuhi? Mo vono! Pani matan na nora jovi, God mo juri na tamlohi řořoha, mo vaia matan vara i vai Israel i mereimerei. <sup>12</sup> Ale vara vua nora hehe matan la tipahi nora Jujuri mo vai na nona tavitav mo mai isana tamlohi tari, ale vara vua nora jovi enia tavitav nona tamlohi řořoha, řa sopo levosahia vara i pa mele řuhu jea sohena sava hin rani atu vara la mele pulutahi vevuhi isan God!

<sup>13</sup> Na lo vere la hinau tari nike matamim ka tamlohi řořoha, God mo viřoniau vara a vahařule isana tamlohi řořoha, na tahe na noku vavahinau isamim na nahora, <sup>14</sup> vara a hite te malele hatea vara a vai na Jew la opoi na sava kamim ka tamlohi řořoha ka lo lavia, ale hin malele atu a pa eři juri te tatuara. <sup>15</sup> Matan, vara vua nora tipahi enia God mo sari tamata mata tamlohi tari, i pa mele řuhu jea na varama sohena sava vara la mele hilu, korong i pa sohen la haratu la mele turu na mateia. <sup>16</sup> Vara sope silesilea atu mata flaua sei la lo silea isan God tiroma mo tapu, sope flaua tari la pa

tapu, ale vara wari vipahai atu la pa tapu, rangarangana sohena la tapu.

### *Israel Enia Pulo Olive Atu God Mo Layoa*

<sup>17</sup> Pani vara God mo tai naŕihi na tatua rangarangan pulo olive atu, ale God mo soŕotahi kamim olive urata, ka vano na livuhara, ale ka ulua na hanhani ŕuhu na pulon olive atu, <sup>18</sup> ha sopo hapahapa mata rangarangana. Pani vara ha hapahapa, ha lo ŕomŕomia vara kamim ka sopo tueni na warina, pani warina mo lo tueni kamim.

<sup>19</sup> Ale vara ka lo vereva vara, ‘La rangaranga atu God mo tai naŕihira vara i vai na masapa maku.’

<sup>20</sup> Varaŕuhu, mo vaia, pani ha lo ŕomŕomia, la rangarangana atu enira Jew, God mo tai naŕihira matan la sopo rasua, ale kamim ka lo toho atu matan ka rasua. Ha sopo ŕomaulu hin kamim, pani ha matahuni na sava i eŕi masese isamim. <sup>21</sup> Vara God i sopo ŕomi na rangarangana tataholo matan la tipahi nora Jujuri, i pa sopo ŕomi kamim.

<sup>22</sup> Ha hitevosahia, vara posin God mo sohena sava, mo ŕomŕuhu ale mo ŕilangi jea. Mo ŕilangi jea isan la haratu la tipahi na nora Jujuri, pani mo ŕomŕuhu isamim, ale i pa ŕomŕuhu isamim vara ka lo tau na nomim rasu hinia, pani vara ka sopo mele tau na nomim rasua hinia, kamim sohena i pa tai naŕihi kamim.

<sup>23</sup> Ale vara Jew la posi mai la tau na nora rasua hinia, God i pa mele soŕotahira vano na pulon olive atu, matan God i eŕi mele soŕotahira.

<sup>24</sup> Matan, vara mo avulahi vara i lavi kamim olive urata purongo, ale i soŕotahi kamim ha vano na pulo pulana olive ŕuhu, enia hina maŕurahi matea, i pa mele malum isan God vara i mele tau na rangarangana tataholo i mele soŕotahia na jarana tataholo na pulon olive atu.

### *Jujuri I Pa Tai Jerusalem*

<sup>25</sup> Matana, la voraiku peresi na vevoraiku, na opoia vara ha levosahi

hina luhu nike matan vara ha sopo ŕomaulu, God mo vai na mapun tatua tavitavin Israel la ŕilangi i pa tikeli rani atu evi tamlohi ŕoŕoha la unu vevuhi. <sup>26</sup> Ale vaon Israel tari la pa juri hin malele atu, sohen la ulia moiso vara,

‘Tamlohi Jujuri matea i pa tai Zion,\* ale i pa posi na tavitavin Israel na nona posposi varama.

<sup>27</sup> Ale harihi enia noku retitauhi peresira, hin rani atu na lavi naŕihi na nora hehe.’ *Isa 59.20-21*

<sup>28</sup> Jew matuvana nake la mere-sahi na Retiŕuhu matamim, pani enira la pa lo toho viŕoni non God mata nona retitauhi isan Abraham, Isaac peresi Jacob. <sup>29</sup> Matan silesilea peresi na tovi non God la sopo eŕi jovi. <sup>30</sup> Sohen tuai ka sopo ooloo hin God, pani nake ka lavi na nona ŕomopoia matan la sopo ooloo, <sup>31</sup> enira nake sohena, la sopo ooloo matan vara God i pa ŕomopoi kamim, pani enira sohena, la pa eŕi lavi na nona ŕomopoia. <sup>32</sup> Matan mo sohen God mo pelatihoro na tamlohi tari na nora hehe matan la sopo ooloo, matan vara nona ŕomopoia i eŕi toho isara isoiso.

### *Paul Mo Hasohaso God*

<sup>33</sup> Hare natu i eŕi vereva vara nona lelevosahi peresi na sava mo levosahia la ŕuhuŕuhu sohena sava! Mo sopo tea i eŕi levosahi na sava mo hatihia moiso, ale mo sopo tea i eŕi hitevosahia vara sava mo lo vaira mo vaira sohena sava.

<sup>34</sup> Matan hare i eŕi levosahia vara God mo lo ŕomŕomi na sava? Hare mo tataholo vara i eŕi pisuhi na malele isana? *Isa 40.13*

<sup>35</sup> Teni hare natu, mo sile te hina silesilea isana matan vara i pa mele spaia? *Job 41.11*

<sup>36</sup> Matan God enia pulo hinau tari matan enia mo vaira, mo vaira la lo toho vara la pa sile na hasohaso isana. Mo tataholo vara tamlohi tari la sile na ooloo isana tarea mata rani tui tui. Amen.

\* **11:26:** Zion: Zion enia Jerusalem.

## 12

### *Mauri Paro Peresi Křisto*

<sup>1</sup> Matan la hinau sei God mo vaira moiso la vorai peresi na vevorai, na lo usia řilangi vara ha sile na epemim isan God sohena hina malamalai matea mo mauri mo tapu isana, haratu God i pa avulahi hinia. Harihi enia nomim lotu tataholo vara ha lo vaia isana. <sup>2</sup> Ha sopo hahau usuri na posposi non varama nike, pani ha tinařihia vara God i posi kamim matan vara ha eři levosahi na malele paro mata řomřomi, ale hin malele sei ha pa eři levosahia vara masalon God mo opoia vara ha pa vai na sava mo řuhu, ale mo tataholo, ale sava natu, mo vaia mo avulahi.

<sup>3</sup> Matan usuri na řomřuhu sei God mo silea isaku na lo vereia vara ha sopo hase řomaulu hin kamim i jeu na sava mo tataholo vara ha řomřomia, pani ha hase řomvosahi kamim i usuri na silesilea mata rasu atu God mo lo silea isamim. <sup>4</sup> Sohen epeřa sopesopena mo mařivi, ale nora vavahinaiu la tinatinapua, <sup>5</sup> ale mo sohena na epen Křisto. Enřa mo isoiso řa sopesope epena, pani epena enia matelete, ale enřa hatehateahi nořa vavahinaiu la tinatinapua vara řa vaia. Ale matan enřa mo isoiso řa matea na epe hin Křisto, enřa řa nořa hatehateahi.

<sup>6</sup> Romřuhu non God mo silea isařa mo vaiřa řa eři vai na hinaiu hai, ale vara nom enia mata o retimangovi, o vereuli na sava ko rasua vara God mo lo vereia isam, <sup>7</sup> vara nom enia mata o tueni na tinapua, o tueni mamahunira, vara nom enia mata o vujangi, o vujangi i řuhu, <sup>8</sup> vara nom enia mata o retituetueni, o vaia, vara nom enia mata o silesile, o silea na avulahi, vara nom enia mata o tiroma na tamlohi, o vai mamahunia, vara nom enia mata o řomopoi hin te tinapua, o vaia na avulahi.

### *Posposi Tataholo Nona Mauri Kalesia*

<sup>9</sup> O sopo halu na nom opoia mata tinapua, pani o opoira varařuhu, ha řohu na sava mo hina sasati, ha turu na hinaiu mo řuhu. <sup>10</sup> Ha opoiopoi

kamim na opoia varařuhu, ha lo kilau mata masapa vara ha sile na oloolo isana tinapua tiroma. <sup>11</sup> Ha sopo malokovari, pani ha vařileřile na vavahinaiu non Moli.

<sup>12</sup> Ha avulahi matan hinaiu sei ka lo řomtoho hinia vara God i pa vaia isamim, ha řomperavu na rani řilangi, ha lo ususi tarea. <sup>13</sup> Vara te tapuhi non God mo vejuveju hin te hinaiu, ha tuenira na nomim hinahinaiu, ale ha avulahi vara ha lavi na tamlohi na imamim.

<sup>14</sup> Ha usi God vara i vaia i řuhu isan la haratu la lo tipahi kamim, ha leřuhu hinira, ha sopo lesati hinira. <sup>15</sup> Ha avulahi peresi la haratu la avulahi, ha tangi peresi la haratu la rongo mo sati. <sup>16</sup> Ha řomřomi na tinapua i tataholo hin kamim, ha sopo haruharu matan vara tamlohi aulu la pa tametame kamim, pani ha avulahi vara ha lo toho peresi na tamlohi purongo, ale ha sopo řomaulu hin te rani.

<sup>17</sup> Ha sopo kelekele. Ha hahau na malele matea sei tamlohi tari la hitevosahia vara mo řuhu. <sup>18</sup> Vara ha eři vaia, ha mauri usuri na malele mata tamata peresi na tamlohi tari.

<sup>19</sup> La tapala řuhuřuhu, ha sopo kelekele hin te rani, pani ha sile na masapa isan God vara i eři sile na nona talai lolokoru mata hehe matan la ulia na Retiulia vara,

‘Enau a pa kelea,  
enau a pa volira,  
enau Moli na lo vereia.’ *Deut*  
*32.35*

<sup>20</sup> Ha vaia sohen harihi:  
‘Vara nom meresahi mo marohati,  
o vahania,  
vara mo mařohu,  
o sile te wai isana,  
ale matana, i pa mahanuhanu  
mata sava mo vaia isam.’

*Prov 25.21-22*

<sup>21</sup> Ha sopo tinařihi na hehe vara i jeu kamim, pani ha jeu na hehe na vavahinaiu řuhu.

## 13

*Ha Oloolo Hin La Haratu La Lo Tauri Na Suiha*

<sup>1</sup> Tamlohi rasua tari ha oloolo hin la haratu la lo tauri na suiha, matan mo sopo tea vara i lo toho na suiha vara God mo sopo tinañihira, ale la haratu la lo turu, la turu matan God mo turuhira. <sup>2</sup> Matana, sava tamlohi mo leji la haratu God mo taura la tauri na suiha, la lo leji na sava God atu mo vaia, ale la pa lavi na nona talai. <sup>3</sup> Matan tamlohi aulu na jara, la sopo matan vara tamlohi la pa matahunira vara la lo vai na posposi tataholo, pani tamlohi sei la lo vai na sasati la pa matahunira. Vara o vai na hinau tataholo, la pa řuhu isam. <sup>4</sup> God mo tau la haratu la lo aulu matan vara la tueniho. Pani vara ko lo vai na hehe, o pa matahu, matan God mo taua na limara vara la pa sileho na nom talai. <sup>5</sup> Matana, mo tataholo vara o oloolo, mo sopo mata talai purongo, pani matan vara řomim i tataholo na nahon God.

<sup>6</sup> Matan hinau sei, mo tataholo vara ha voli na nomim takis. Mania atu i pa tueni la haratu la lo tauri na suiha vara la vai voko atu God mo taua na limara. <sup>7</sup> Ha sile na sava ka ave hinia isara, ale ha voli na takis tinatinapua isan la haratu la lo toho vara ha pa volia isara, ha sile na oloolo isan la haratu mo tataholo vara la lavi na oloolo.

#### *Opoia Mo Mařivisi Na Leu*

<sup>8</sup> Ha sopo ave isan tea, pani ave atu enia vara ha pa volia tarea enia vara ha opoiopoi kamim, matan haratu mo opoi na tinapua mo lo mařivisi na leu non God. <sup>9</sup> Na leu non God, retileu matuvana la lo toho sohen harihi: o sopo vaivaileu peresi na tinapua mo ľahi moiso, o sopo vili-matei na tamlohi, o sopo vavanaho, o sopo řomusuri, peresi te mele retileu tinapua la pisuhi na retileu matelete purongo sei mara, 'O opoi na tinapua sohen ko lo hasem opoiho!' *Lev 19.18*

<sup>10</sup> Opoia mo sopo vai te hina sati isana tinapua, ale matana, opoia enia mo mařivisi na leu.

<sup>11</sup> Varařuhu ha levosahia vara nake mo sopo rani mata juruvi řomalihō, matan rani mata juri mo vejuveju, mo mele mariviti mo jeu rani atu řa

pa tau na nořa rasua hinia tiroma sei.

<sup>12</sup> Pongi mariviti vara i isoiso, rani juri mariviti vara i pala, ale řa sopo toho na řořoha, řa pulahi na nořa posposi sasati, ale řa ru na posposi tataholo sei mo tai isan God. <sup>13</sup> Ra hahau na posposi tataholo sohen řa lo hahau na malarani, mo sopo hin na matavuhi mata lavilavi na tinapua, peresi na putu mata wai, teni posposi viriu, teni řomřomi na hina ľumiha, teni vasvas teni mereimerei. <sup>14</sup> Pani ha ru Moli Iesu Křisto na maurimim, ha sopo sile na masapa vara ha vahani na maurimim na masalo varama.

## 14

### *Haratu La Sopo Rilangi Na Nora Rasua*

<sup>1</sup> Ha lavi la haratu řomira la lo kaka vara sava natu mo tataholo na posposi rasua, ale ha sopo arera na hinau la rasua. <sup>2</sup> Tamlohi hai la řomřomia vara mo tataholo vara la hani na hinau tari, pani hai řomira la sopo řilangi sohera, la lo hani na pere pahai purongo. <sup>3</sup> Haratu mo hani na hinau tari i pa sopo hiteřesi haratu mo tapuhoro te hanhani, ale haratu mo tapuhoro te hanhani, i pa sopo ari haratu mo lo hani na hinau tari, matan God mo lavia nona moiso. <sup>4</sup> Engko hare vara o eři ari na volitusi nona tinapua? Nona tamlohi tavera purongo i pa vereea vara enia mo tataholo teni mo vono, ale i pa turu matan Moli i pa eři vaia i turu na rani aria.

<sup>5</sup> Tamlohi hai la řomřomia vara na nahon God rani matea mo mele tapu mo jeu na tinapua mata lotu God, pani tamlohi hai la hitea vara rani tari la sohesohera purongo. Mo tataholo vara tamlohi hatehateahi la hatihia vara sava mo tataholo na řomira. <sup>6</sup> Haratu mo sile na oloolo isana rani matea, mo vaia matan vara i sile na oloolo isan Moli. Haratu mo lo hani na hinau tari, mo sile na oloolo isan Moli na nona vere meje matana, ale haratu mo tapuhoro na hanhani, mo tapuhoroa matan vara i sile na oloolo isan Moli, ale mo vere meje isan God. <sup>7</sup> Matan mo sopo tea

vara i mauri nona hasena, ale mo sopo tea vara i mate nona hasena. <sup>8</sup> Vara řa mauri, řa mauri non Moli, vara řa mate, řa mate řa sahe isan Moli, matan haratu, vara řa mauri teni řa mate, enřa non Moli. <sup>9</sup> Matan harakerihi natu Křisto mo mate ale mo mele mauri, matan vara i eři Moli non la haratu la mate peresi la haratu la mauri.

<sup>10</sup> Engko, mata sava ko ari na voraim, teni vara ko hiteřesia? Matan enřa tari řa pa turu na nahon God mata aria, <sup>11</sup> matan la ulia vara, 'Moli mo vereea mara:

Matan enau na lo mauri,  
tamlohi tari la pa popovitoho  
isaku,  
ale meme tari la pa taviti isan  
God.'

*Isa 45.23*

<sup>12</sup> Matan haratu mo mera purongo vara enřa tari řa pa turu na nahon God vara řa řarami na nona aria mata nořa vavahinau. <sup>13</sup> Matan hinau atu, řa sopo mele sile na talai isařa hatehateahi, pani i pa mele řuhu vara řa hatihia vara řa sopo mele vai te hinau vara i vai na voraiřa tinapua i tialahalaha teni i ori hinia.

<sup>14</sup> Usuri na řomřomi non Moli Iesu, na lo levosahia mo řuhu vara mo sopo te hanhani mo lumiha vara řa sopo eři hania, pani enia mo lumiha isan haratu mo řomřomia vara mo lumiha. <sup>15</sup> Vara voraim řomina mo lo sati na sava ko lo hania, ko sopo mele hahau na opoia. O sopo komo haratu Křisto mo mate matana, mata ham hinau purongo. <sup>16</sup> Ale matana, o sopo sile na masapa isan tea vara i jovi na hehe mata sava ko levosahia vara la pa retisasati hiniho matana, hina purongo vara ko levosahia vara mo tataholo.

<sup>17</sup> Matan sava ko lo hania teni ko lo inua, la sopo aulu hin mauri atu God mo aulu hinia, pani posposi tataholo, tamata peresi avulahi atu la tai isan Tanume Tapu la aulu na mauri.

<sup>18</sup> Hare sei, mo volitusi isan Křisto hin malele sei, God i pa avulahi hinia, ale tamlohi sohena la pa avulahi hinia.

<sup>19</sup> Matan haratu, mo řuhu vara řa tutungui na sava i pa vai na tamata,

ale na sava i pa tueni na tamlohi la ulua na nora rasua.

<sup>20</sup> O sopo komo na vavahinau non God mata hanhani purongo, varařuhu hinau tari la vokevoke, pani mo sopo tataholo vara o hani te hinau vara i pa vai na tinapua i jovi matana. <sup>21</sup> I pa mele řuhu vara o sopo hani te mit teni o inu te wai řilangi vara i pa vai na voraim i jovi na nona rasua. <sup>22</sup> Nom rasua enia nom hasem peresi God. Haratu mo vai na hinau matan mo levosahia vara mo tataholo vara i vaia, i pa avulahi matan mo levosahia vara i pa sopo lavi na talai matana. <sup>23</sup> Pani haratu mo sopo levosahi mamahunia vara sava mo lo hania mo tataholo na nahon God teni mo vono, enia i pa lavi na talai vara i hania matan mo sopo hania usuri na nona rasua, ale sava mo sopo vora na rasua enia hehe.

## 15

### *Ha Vai Na Tovongi Ruhu*

<sup>1</sup> Enřa sei nořa rasua mo řilangi, mo tataholo vara řa tueni la haratu řomira mo sopo řilangi, mo sopo tataholo vara řa hase kilauřa purongo.

<sup>2</sup> Mo tataholo vara enřa hatehateahi řa vaia i řuhu isana tavgaviřa, řa tuenira la ulua na nora rasua, <sup>3</sup> matan Křisto mo vai na tovongi matea isařa mo sopo hase kilauřa purongo, pani sohen la ulia vara Křisto mo vereea isan God mara,

'Na rani tamlohi la veresatiho, enau na rongo mo sati matana.' *Psa 69.9*

<sup>4</sup> Matan sava la ulia tuai la ulia matan vara i pa vujangiřa, la lo sileřa na řomtoho, la tahe na řomiřa na nořa saovi na řomperavu mata Retitapu non God.

<sup>5</sup> Ale nake na lo usiisi vara God mata řomperavu peresi na tuetueni, i tinařihia vara ha řomřomi na tinapua i tataholo hin kamim sohen Křisto Iesu mo lo vaia, <sup>6</sup> matan vara kamim mo isoiso na leo matea, ha pa sile na hasohaso tavera isan God Taman nořa Moli Iesu Křisto.



<sup>7</sup> Matana, ha avulahi hin kamim hatehateahi sohen Křisto mo avulahi hin kamim matan vara God i lavi na hasohaso matana. <sup>8</sup> Ka levosahia vara Křisto mo sinai sohena volitusi isana Jew, vara i vujangia vara God mo sopo tope na nona reti mo reti-tauhi hinia isana tama Jew tuai, <sup>9</sup> ale matan vara tamlohi řořoha la pa hasohaso God mata nona řomopoia sohen la ulia vara,

‘A pa hasohasoho isana tamlohi mara jara tinatinapua, a pa lalavete a tahe na hijam i aulu.’

*Psa 18.49*

<sup>10</sup> Mo mele vereaa na jara tinapua vara,

‘Kamim tamlohi řořoha!

Ha avulahi peresi na nona tamlohi,

tavtavuin Israel.’ *Deut 32.43*

<sup>11</sup> Ale mo mele vereaa vara,

‘Kamim tamlohi sei ka tamlohi řořoha,

ha hasohaso Moli,

ale tamlohi tari

ha tahe na hijana i aulu.’ *Psa*

*117.1*

<sup>12</sup> Ale mele vahatea, Isaiah mara,

‘Mahapin Jesse matea i pa turu,

enia sei i pa aulu

na tamlohi řořoha,

ale enira la pa lo řomtoho isana.’

*Isa 11.10*

<sup>13</sup> Ale nake na lo usiisi vara God sei mo lo sile na řomtoho, i mařivisi kamim na avulahi peresi na tamata na nomim rasua, matan vara na sui-han Tanume Tapu nomim řomtoho i pa mařivi savulevule.

### *Paul Mo Verera Na Nona Vavahinai*

<sup>14</sup> Ale la voraiiku peresi na vevo-raiku, na hase levosahia mo řuhu vara ka lo vai na posposi řuhu isana tinapua, matan ka pete levosahi na sava God mo opoia moiso, ale ha pa eři vere tataholoia isamim hasemim. <sup>15</sup> Pani hin te hinai, na lo uliuli řilangi isamim vara ha mele řomřomira, na vaia matan řomřuhu non God enia mo viřoniau,

<sup>16</sup> matan vara a volitusi non Křisto Iesu isana tamlohi řořoha, vara a lavi na Retiřuhu non God isara sohena

vavahinai nona přiis matea matan vara haratu la tamlohi řořoha la eři tau na nora rasua hin Křisto, la mai sohena malamalai řuhu matea God mo avulahi hinia, ale matan vara i pa vaira la vokevoke na sui-han Tanume Tapu. <sup>17</sup> Hin Křisto Iesu enai a eři hapahapa na noku vavahinai na vaia non God, <sup>18</sup> matan a pa sopo vere te hinai, pani sava Křisto mo vaia hinia matan vara haratu la tamlohi řořoha la ololo na Retiřuhu na noku retireti peresi na noku vavahinai, <sup>19</sup> ale hinia la ololo mata suiha mata matamata peresi na hina mařurahi tavera na sui-han Tanumen God, matan vara i tapulo Jerusalem i řalihi i tikeli Illyricum, enai na mařivisi vevuhi na vavahinai mata Retiřuhu non Křisto; <sup>20</sup> ale na tau na řomiku vara a retivujavujangi na Retiřuhu, pani mo sopo na jara sei la pete rongo na hijan Křisto ea moiso, mo sopo řuhu vara a voro na jara nona tamlohi tinapua enia mo pete tapulo voro na vao kalesia tiroma ea moiso, <sup>21</sup> pani mo lo usuri na sava la ulia vara,

‘La haratu mo sopo tea la sorahia isara hin te rani, la pa hitevosahia,

ale la haratu la sopo lo rongo

na sorasarahina hin te rani,

la pa rongovosahia.’ *Isa 52.15*

<sup>22</sup> Vavahinai atu natu, mo horoau vaha visa moiso vara a mai isamim.

### *Paul Mara I Pa Sivo Jerusalem*

<sup>23</sup> Pani nake, matan mo sopo te mele masapa vara a vavahinai hin la jara atu na lo vano hinira moiso, ale matan tuai moiso na opoia vara a pa mai isamim, <sup>24</sup> na lo řomtoho vara na malele vara a sivo Spain a pa rohi kamim, na opoia vara a pa toho peresi kamim mata makomo rani, ale na rani vara a malue, ha pa tueniau na maleleku.

<sup>25</sup> Pani nake, na lo sivo Jerusalem, na lavi na silesilea mata mania vara i pa tueni na tapuhi non God atu.

<sup>26</sup> Matan tamlohin Macedonia peresi Achaia la avulahi vara la sile te silesilea matan vara i pa tueni na tapuhi

tilavono Jerusalem. <sup>27</sup> Enira la avulahi vara la tuenira, ale mo tataholo vara la vaia isara, matan haratu tamlohi řořoha sei la lavi na hina řuhuřuhun Tanumen God mo silea, i pa tataholo vara la ase na nora silesilea mata mania isara Jerusalem. <sup>28</sup> Hin rani atu vara a tau pa mania atu isan la haratu Jerusalem, moiso vara na maleleku vara a sivo Spain a pa rohi kamim. <sup>29</sup> Na levosahia vara a mai isamim, a pa mai na leřuhu non Křisto sei i pa řuhu jea matamim.

<sup>30</sup> La voraiku peresi na vevoraiku, na lo usia řilangi isamim na hijan Moli Iesu Křisto, ale na opoia non Tanumen God, ha turu peresiau na nomim usiusi isan God matakū, <sup>31</sup> ha usiusi vara i juriau na liman la haratu Judea sei la sopo rasua, ale vara noku vavahināu Jerusalem i pa tataholo na naho tapuhi non God ea, <sup>32</sup> matan vara na masalon God, a pa mai isamim na avulahi, ale řa pa rongo i řuhu jara matea matan a pa toho peresi kamim.

<sup>33</sup> God mata tamata i pa toho isamim mo isoiso, amen.

## 16

### *Retioloolo Non Paul*

<sup>1</sup> Ale na tau vevoraifā nike na nahomim, Deacon Phoebe volitusi mata vao kalesia mata vanuan Cenchreae, <sup>2</sup> na opoia vara ha avulahi vara ha lavia hin Moli usuri posposi sei mo tataholo isana tapuhi non God, ale ha tuenia na nona opoia tari, matan enia hařai tuetueni řuhu matea mo tueni na tamlohi matuvana, ale mo lo tueniau sohera.

<sup>3</sup> Ha sile na retioloolo isan Priscilla enia Aquila, tapalaku na vavahināu non Křisto Iesu, <sup>4</sup> enira mariviti la mate matan la lo tueniau, mo sopo enau haseku na lo vere meje isara, pani vao kalesia tari non la haratu la tamlohi řořoha la vere meje isara. <sup>5</sup> Ha sile na retioloolo isan la haratu la lo matavuhi na imara, ha sile na retioloolo isan Epaenetus tamlohi řuhu matea sei tamlohi la řomřuhu hinia, enia mo tamlohi tiroma matan Asia sei mo posi mo mai isan Křisto

mata noku vavahināu. <sup>6</sup> Ha sile na retioloolo isan Mary, enia sei mo voko řilangi matamim. <sup>7</sup> Ha sile na retioloolo isan Andronicus peresi narouna Junias tadvavuin Israel, na rani na lo toho na ima řilangi enira la lo toho peresiau. Vahařule non Iesu la levosahi mamahunira, enira la mai isan Křisto tiroma hinia. <sup>8</sup> Ha sile na retioloolo isan Ampliatius, tamlohi řuhu matea na opoia hin Moli. <sup>9</sup> Ha sile na retioloolo isan Urbanus, tapalařa na vavahināu non Křisto, peresi Stachys na opoia.

<sup>10</sup> Ha sile na retioloolo isan Apelles, mo turu řilangi na rani řilangi moiso, ale Křisto mo avulahi hinia. Ha sile na retioloolo na iman Aristobulus. <sup>11</sup> Ha sile na retioloolo isan tadvavuiku na vaon Herodion, ha sile na retioloolo isan la haratu non Moli na iman Narcissus. <sup>12</sup> Ha sile na retioloolo isan la hařai atu la lo vavahināu non Moli, Tryphaena peresi Tryphosa. Ha sile na retioloolo isan hařai řuhu sei Persis, enia mo vavahināu mo řilangi non Moli. <sup>13</sup> Ha sile na retioloolo isan Rufus, viřoni non Moli, peresi tinana sei, enia mo kilauau sohena natuna matea.

<sup>14</sup> Ha sile na retioloolo isan Asyn-critus, Phlegon, Hermes, Patrobas, Hermas, peresi la vorai atu la lo toho peresira. <sup>15</sup> Ha sile na retioloolo isan Philologus, Julia, Nereus peresi vetasina Olympas, peresi na tapuhi tari sei non God la lo toho peresira. <sup>16</sup> Ha tapatapai kamim na pungosi mata ooloo, vao kalesia tari non Křisto la sile na nora retioloolo isamim.

### *Isoiso Reti Non Paul*

<sup>17</sup> La voraiku peresi na vevoraiku, na lo usia řilangi isamim vara ha lo kilau matan la haratu la pulo patumasa, ale haratu la lo posileji na vujangi tataholo ka lavi moiso, ale ha vahaři hinira, <sup>18</sup> matan tamlohi sohen haratu la sopo volitusi non nořa Moli Křisto, pani mata pangera purongo, ale na nora haruharu peresi na nora retimemeji la lo halu na řomin haratu la sopo lelevosahi. <sup>19</sup> Matan tamlohi tari la levosahi na nomim ooloo, ale mo vaiau na

avulahi hin kamim, pani na opoia vara ha lelevosahi na sava mo řuhu, ale vara ha sopo tia na hina sasati.

<sup>20</sup> Ale i pa sopo tuai God mata tamata i pa putputi Setan na ruhuruhu palomim. Ale řomřuhu non Moli Iesu Křisto i pa toho isamim.

<sup>21</sup> Timothy, tapalaku na vavahinau, mo sile na retioloolo isamim; enia peresi Lucius enia Jason, peresi Sospater, enira tavitavuiku Israel.

<sup>22</sup> Enau Tertius, na uli leta nike usuri na sava Paul mo vereva isaku, enau sohena, na lo sile na noku retioloolo isamim hin Moli.

<sup>23</sup> Enau Paul na lo toho na iman Gaius, mo lo sile na nona retioloolo isamim, enia sei tamlohi tavera sei mo lo tueni na vao kalesia tari nike, ale Erastus, treasurer mata taon tavera nike peresi voraira Quartus, la sile na nora retioloolo isamim.

<sup>24-25</sup> Ra hasohaso God, enia i eři vai kamim ha řilangi i usuri na noku Retiřuhu peresi na retivujavujangi hin Iesu Křisto, i usuri na vujangi mata hina luhu sei God mo jarohia tuai tuai jea, <sup>26</sup> pani nake mo pala, ale na Retiulia sohena přovet la ulia tuai la vujangia mo mera isana mara jara tinatinapua tari, mo usuri na retileu non God sei mo lo toho rani tui tui, matan vara i vai na tamlohi la ololo usuri na malele rasua, <sup>27</sup> isan God enia hasena mo lelevosahi, i pa lavi na hasohaso mata rani tui tui hin Iesu Křisto. Amen.

# 1 Corinthians

## Tiroma Leta

### Paul Mo Uliā Isana Mara

## Corinth

### Leta Nike

Leta akerihi mo usuri leta na tinapua matea Paul mo ulia isana mara Corinth moiso (5.9), hin leta nika Paul mo řarami na nora retiusia sei la sohaia isana moiso (7.1). Corinth enia taon tavera jea matea na pahisa tasi Greece. Vao kalesia Corinth la patumasa, la lo aseasera (1.10–4.21). Mo řarami na retiusia mata lahi (7.1–40), mata hanhani sei la silea isana tamasi (8.1–13), mata posposi tataholo mata lotu (10.1–14.40), peresi na sauteterahi non Iesu peresi na nona tamlohi usuri (15.1–58). Paul mo vere isara mara opoia mo aulu jea, mo jeu na rasua peresi na řomtoho matan enia i pa toho jejeu (13.13).

#### Hin Leta Nike

1. Tiroma Retireti Non Paul (1.1–9)
2. Paul Mo Vereia Mara La Turu Jara Matea (1.10–4.21)
3. Mauri Na Vao Kalesia (5.1–7.40)
4. Posposi Tataholo Mata Vao Kalesia (8.1–11.1)
5. Posposi Tataholo Mata Lotu God (11.2–14.40)
6. Křisto Mo Aulu Na Mateia (15.1–58)
7. Silesilea Nona Kalesia Jerusalem (16.1–4)
8. Paul Mo Hahau Corinth Mata Sava (16.5–12)
9. Retioloolo Non Paul (16.13–24)

#### Retioloolo Non Paul Isana Kalesia

<sup>1</sup> Enau Paul, na vahařule non Křisto Iesu usuri na masalon God, peresi voraiřa Sosthenes, <sup>2</sup> kama sohai leta nika isana vao kalesia non God Corinth, isana tapuhi hin Křisto Iesu, God mo tovi kamim tapuhi peresi la haratu na jara tari sei la lo lotu Moli Iesu Křisto, nora Moli, ale enia nořa Moli,

<sup>3</sup> řomřuhu peresi na tamata la tai isan God Tamařa, peresi Moli Iesu Křisto, la vano isamim.

*Paul Mo Vere Meje Isan God*

<sup>4</sup> Na lo vere meje isan God tarea matamim matan řomřuhu sei God mo silea isamim hin Křisto Iesu, <sup>5</sup> matan enia mo vai kamim ka ulua mo řuhu hinia na retireti tari peresi na lelevosahi tari, <sup>6</sup> harihi mo vujan-gia vara sava na vereia isamim matan Křisto mo varařuhu na maurimim, <sup>7</sup> matan vara ka sopo vejuveju hin te otori sei Tanumen God mo lo silea, ale ka lo kilau matan rani atu nořa Moli Iesu Křisto i pa mele pala hinia, <sup>8</sup> enia i pa vai na nomim rasua i řilangi i kakau na isoisona, i pa sopo tea i eři tuvai kamim hin te hinau hin rani atu non nořa Moli Iesu Křisto. <sup>9</sup> God enia i sopo eři tope na nona retitauhi, God mo tovi kamim vara ha tapala peresi Natuna, Iesu Křisto, nořa Moli.

#### Patumasa Na Lolo Vao Kalesia

<sup>10</sup> Na lo usia řilangi isamim la vorai-ku peresi na vevoraiku, na hijan nořa Moli Iesu Křisto, vara kamim mo isoiso nomim reti i matea, ale i sopo te patumasa isamim, pani ha matea na řomřomi matea, ale ha matea na nomim ari. <sup>11</sup> Matan la vorai-ku peresi na vevoraiku, na rongo na reti matea mo tai na vaon Chloe vara, kamim ka lo vasvas isamim. <sup>12</sup> Na lo vereia matan vonamim hai la lo vereia lara, “Enau na usuri Paul!” tea la vara “Enau na usuri Apollos!” tea la vara “Enau na usuri Peter!” moiso tea la vara “Enau na usuri Křisto!” <sup>13</sup> Ha eři topetope Křisto? Paul mo mate na talopeilopei matamim? Teni ka lavi na paptijo na hijan Paul? <sup>14</sup> Enau na lo vere meje isan God matan enau na sopo paptijo hin te vonamim hatea, pani Crispus peresi Gaius purongo, <sup>15</sup> matan vara i pa sopo te vonamim hatea i eři vereia vara enia mo lavi na paptijo na hijaku. <sup>16</sup> Varařuhu, na paptijo na vao iman Stephanas, pani korong na sopo mele paptijo hin te tinapua. <sup>17</sup> Matan Křisto mo sopo řuleau vara a paptijo, pani vara a retivujavujangi na Retiřuhu ale mo sopo hin te reti mo řilangi mata levosahia, vara i vono talopeilopei non Křisto i pa sopo te řaramina.

### *Lelevosahi Non God*

<sup>18</sup> Matan reti mata talopeilopei enia hina rongorongo vono isan la haratu la lo vano na komokomo, pani isaʻa sei ʻa juri hinia, enia suihan God. <sup>19</sup> Matan Isaiah mo ulia vara, ‘Enau a pa komo na lelevosahi nona tamlohi lelevosahi, ale a pa vai na ʻromʻromi nona tamlohi lelevosahi i mai hina purongo.’ *Isa 29.14*

<sup>20</sup> Nene tamlohi lelevosahi? Nene tamlohi vujangi mata leu non God? Nene tamlohi mo eʻi retireti na varama nake? Ra eʻi vereva vara God mo vai na lelevosahi nona tamlohi mata varama la mai hina rongorongo vono purongo. <sup>21</sup> Matan usuri na lelevosahi non God, God mo taua vara tamlohi na varama, la sopo eʻi lavutia na nora lelevosahi purongo. God mo avulahi vara i juri la haratu la rasu na hina rongorongo vono sei kama lo retivujavujangi hinia, <sup>22</sup> matan Jew la lo usia ʻrilangi vara God i vai te matamata vara la hitea ale la pa rasua, ale tamlohi ʻroʻroha la opoi vara la ale na lelevosahi vara la rasua, <sup>23</sup> pani kamam kama lo retivujavujangi na mateia non Kʻristo na talopeilopei, enia hina tialahalaha matea isana Jew, ale enia hina rongorongo vono isana tamlohi ʻroʻroha sohena mara Greek. <sup>24</sup> Pani isaʻa sei God mo toviʻa, hina purongo vara enʻa Jew teni tamlohi ʻroʻroha, enʻa ʻa eʻi hitevosahi na suihan God peresi na nona lelevosahi ʻruhu hin Kʻristo. <sup>25</sup> Matan hina rongorongo vono non God enia mo jeu na lelevosahi nona tamlohi, ale hinau non God sei tamlohi la vereva vara mo sopo te suiha hinia, enia mo jeu na suiha nona tamlohi.

<sup>26</sup> Ale la voraiuku peresi na vevoraiku, ha to ʻromʻromia vara hin rani atu God mo tovi kamim, mo sopo te matuvana isamim ka tamlohi lelevosahi na naho tamlohi, mo sopo te matuvana ka tauri na suiha, mo sopo te matuvana ka vora tamlohi aulu. <sup>27</sup> Pani God mo viʻoni na hinau la rongorongo vono na varama matan vara i vai na tamlohi

lelevosahi la mahanuhanu; ale God mo viʻoni na hinau sei mo sopo te suiha hinira na varama vara i vai na tamlohi suiha la mahanuhanu. <sup>28</sup> God mo viʻoni na hinau la atano na varama, tamlohi la hiteʻesira, hinau mo sopo te hinau hinira, mo vaira matan vara i vai la hinau sei tamlohi la lo vereva vara la hina aulu, la mai hina purongo, <sup>29</sup> matan vara tea i pa sopo eʻi retihapahapa na nahon God.

<sup>30</sup> Enia pulo maurimim hin Kʻristo Iesu. God mo vai Kʻristo enia noʻa hina lelevosahi, enia natu, mo vaiʻa ʻa tataholo na nahon God, ale enia malele mata vaiʻa ʻa tapu, enia mo hase silea vara i volituhuʻa. <sup>31</sup> Ale matan haratu sohen la ulia vara, ‘Mo ʻruhu vara haratu mo lo retihapahapa, i pa hapahapa hin Moli.’ *Jer 9.24*

## 2

### *Talopeilopei Non Kʻristo*

<sup>1</sup> La voraiuku peresi na vevoraiku, hin rani atu na mai isamim, na sopo mai vara a retivujavujangi na hina luhu mata juri non God na retitavera teni na retilelevosahi. <sup>2</sup> Matan enau na tau na ʻromiku vara a pa sopo vujangi te hinau tinapua pani Iesu Kʻristo purongo, ale hin na nona mateia na talopeilopei. <sup>3</sup> Ale hin rani atu na lo toho peresi kamim mo sopo te suiaku, na matahu, ale na savaravara tavera matan na sopo levosahia vara sava i pa masese isaku, <sup>4</sup> ale noku retireti peresi na noku retivujavujangi la sopo retihaluhalu mata lelevosahi, pani na limaku Tanumen God mo vujangia isamim na matamata peresi na suiha, <sup>5</sup> matan vara nomim rasua i pa sopo turu na lelevosahi nona tamlohi, pani na suihan God purongo.

### *Lelevosahi Mo Tai Isan God*

<sup>6</sup> Pani isan la haratu la jea, kama lo retireti na hina lelevosahi, pani mo sopo na hina lelevosahi mata varama nake, teni hina lelevosahi nona tamlohi aulu mata varama nake, enira la haratu sei la lo vano na nora komokomo. <sup>7</sup> Pani kama lo vereva

na levosahi non God matea sei mo lo luhu, enia God mo taua matafa tuai moiso varama mo sopo lo toho, matan mauri ruhu ruhu atu na tuka. <sup>8</sup> Mo sopo te tamlohi aulu na varama nake i levosahia matan, vara la pa lo levosahia la pa sopo vili matei Moli mata ruhu ruhu hin talopeilopei atu. <sup>9</sup> Pani sohen la ulia mo vereea vara,

‘Sava te mata mo sopo lo hitea, teni te pero i rongoa, teni tea i romromia, sava God mo tau mamahunia moiso, matan la haratu mo lo opoira.’ *Isa 64.4*

<sup>10</sup> La hinau nika, God mo vujangia isafa hin Tanumena. Matan Tanumena mo levosahi na hinau tari peresi na lolo romromi non God. <sup>11</sup> Matan hare mo levosahi na romromi non tamlohi tinapua matea pani tanumen tamlohi atu purongo sei mo lo toho na lolona? Ale mo sohen purongo, mo sopo tea i eri levosahi na romromi non God pani Tanumen God purongo. <sup>12</sup> Ale nake, enfa ra sopo lavi na tanume mo tai na varama, pani ra lavi Tanume atu mo tai isan God matan vara ra pa eri levosahi na hinau God mo sile purongoia isafa. <sup>13</sup> Ale kama vujangi la hinau sei mo sopo usuri na levosahi nona tamlohi, pani na retireti Tanumena mo vujangia isamam, kama lo soŋotahi na romromi non Tanumena peresi na retivara ruhu non Tanumena, ale kama vereulira isan la haratu Tanumena mo lo toho isara. <sup>14</sup> Tamlohi purongo i sopo eri lavi na hinahinai non Tanumen God, matan enira hina rongorongono vono isana, ale enia i sopo eri levosahira matan Tanumen God purongo i eri vujangira isana. <sup>15</sup> Tamlohi atu Tanumen God mo lo toho isana, i eri ari mamahuni na hinau tari, pani tinapua i pa sopo eri mele ari tamlohi atu. <sup>16</sup> Matan reti non God mo vereea vara,

‘Hare mo levosahi na romin Moli? Hare i pa eri pisuhi na malele isana?’ *Isa 40.13*  
Pani enfa ra lavi na romin Křisto.

### 3

#### *Volitusi Non Křisto*

<sup>1</sup> Pani, la vorai peresi na vevorai, hin rani atu enau na lo toho peresi kamim, na sopo retireti isamim sohena tamlohi rasua la jea. Mo vono. Na lo retireti isamim sohena natuvarihii matan ka pa lo usuri na posi tamlohi varama, ka pa lo pipi na maurin Křisto. <sup>2</sup> Na vahani kamim na wai susu, mo sopo na hanhani rilangi, ale mo tikeli nake, ka sopo lo tatamahu matana, <sup>3</sup> matan ka pa lo toho na suiha masalomim. Matan ka mereimerei hin kamim hatehateahi, ale ka lo vasvas hin kamim hatehateahi. Matan posposi sei mo vujangia vara kamim ka pa lo toho na suiha masalomim. Ka lo hahau sohena tamlohi varama. <sup>4</sup> Matan vonamim matea mara, ‘Enau na usuri Paul!’ moiso tinapua mo vereea mara, ‘Enau na usuri Apollos!’ mo vujangia vara ka lo hahau sohena tamlohi purongo.

<sup>5</sup> Apollos enia mo ruhu mata sava? Paul mo ruhu mata sava? Kamam volitusi, ale hin kamam kamim ka mai na rasua, sohena Moli mo taua moiso vara hare i pa vai na sava. <sup>6</sup> Enau na lavo, Apollos mo tau na wai, pani God natu, mo vaia mo ulua. <sup>7</sup> Haratu mo lo lavo teni haratu mo lo tau na wai, mo sopo te hinai ruhu hinia, pani God purongo sei mo lo vaia mo ulua. <sup>8</sup> Haratu mo lo lavo, ale haratu mo lo tau na wai, enira la matea, ale la pa lavi na volira i tataholo na sava la lo vaira hatehateahi. <sup>9</sup> Matan kamam kama tapala na vavahinai non God. Kamim lovuhai non God, ale ka iman God.

<sup>10</sup> Enau tamlohi tavera mata voro ima usuri na romruhu non God, ale na tau na pulo ima, ale tamlohi tinapua matea mo lo voro aulu hinia. Mo ruhu vara tamlohi hatehateahi i kilau mamahunia vara sohena sava i pa voro na ima hinia. <sup>11</sup> Matan mo sopo tea i eri tau te pulona tinapua hin haratu mo lo toho moiso. Enia sei, Iesu Křisto. <sup>12</sup> Vara tea i voro hin pulona atu na gold teni silver, teni vatu angiangi ruhu, teni mo lo voro hin te vipahai teni rato teni ere,

<sup>13</sup> voko nona tamlohi hatehateahi, i pa mera purongo matan rani aria i pa vaia i mera, matan suiha hapu i pa vaihite na voko nona tamlohi hatehateahi vara mo sohena sava. <sup>14</sup> Vara te voko atu sei tea mo voro aulu hin pulo ima atu mo jeu na hapu, enia i pa lavi na nona otori matana. <sup>15</sup> Vara hapu mo hani vevuhi na voko non tea, nona otori i pa tihai, ale tamlohi atu i pa juri, pani i pa sohena tamlohi matea la juri na'ihia na hapu mo lo turu lekoleko purongo.

<sup>16</sup> Ka sopo levosahia vara kamim ka temple non God, ale Tanumen God mo lo toho na lolomim? <sup>17</sup> Vara tea i komo na temple non God, God i pa komoa, matan temple non God enia mo tapu, ale kamim natu, ka temple atu.\*

<sup>18</sup> Tea i sopo e'ri hase halua hasena. Vara te vonamim mo lo romromia vara enia tamlohi lelevosahi matea hin varama nike nake, i pa mele ruhu jea isana vara i mai tamlohi rongorongono vono, matan vara i pa mai tamlohi lelevosahi vara'ruhu. <sup>19</sup> Matan lelevosahi matan varama nike, enia rongorongono vono isan God matan la ulia mo vereva vara,

'Enia mo vunai na tamlohi lelevosahi na nora posposi mata lelevosahi.'

*Job 5.13*

<sup>20</sup> Ale mo mele vereva vara,

'Moli mo levosahia vara romromi nona tamlohi lelevosahi la sopo ruhu matan te hinau hatea.'

*Psa 94.11*

<sup>21</sup> Matan mo sohena, i pa sopo tea i e'ri hapahapa hin te hinau nona tamlohi. Matan hinau tari enira mata tueni kamim, <sup>22</sup> vara Paul, teni Apollos, teni Peter, teni varama, teni mauri, teni mateia, teni hinau nake, teni hinau la pa mai, enira mo isoiso nomim, <sup>23</sup> ale kamim non Kristo, ale Kristo enia non God.

\* **3:17:** temple: Paul mo lo vere temple nike, ale faramina enia matavuhi nona kalesia hin jara atu, mo sopo vereva na epe tamlohi matea. \* **4:9:** hitahu jea na tamlohi enia mo lo farami rani atu tamlohi vuro la lavi la tamlohi atu mata vilimateira la taura na isoiso vao atu sei la tiroma hinira na naho tamlohi tari na rani la mele pala na jarara tataholo.

## 4

### *Vavahinau Nona Vaha'rule Non God*

<sup>1</sup> Kamim mo tataholo vara ha kilau kamam sohena volitusi non Kristo, volitusi sei mata tauri na hina tata-langhi non God. <sup>2</sup> Ale aulu hinia, mo tataholo vara la haratu la lo tauri na hinau sohena, la pa turu rilangi na sava la lo vaia. <sup>3</sup> Pani enia hina rihir-ihir purongo isaku vara te vonamim teni te court nona tamlohi hatea i ariau. Vara'ruhu, matan enau haseku na sopo ariau. <sup>4</sup> Na sopo romromi te hinau vara na vaia mo sati, pani mo sopo haratu natu vara mo vaiau na tataholo na nahon Moli, matan Moli hasena i pa ariau. <sup>5</sup> Matan hinau sei, ha sopo sile te talai i tiroma hin rani atu mata aria, i tiroma na mele mai non Moli sei i pa lavi na hina luhu na ro'roha nake la mai na malarani, ale i pa vujangia vara tamlohi la lo vai na nora vavahinau mata sava. Ale hin rani atu, God i pa sile na nona reti ruhu isara hatehateahi.

<sup>6</sup> La voraiku, na lo vereva enau Apollos sohen tovongi matea isamim mo usuri na noku vujangi nike. Ale vara ha turu na sava la ulia na Reti-tapu moiso, ha pa sopo e'ri retihapahapa hin te tamlohi hatea matan mo pa aulu na vavahinau non tinapua. <sup>7</sup> Sava mo vai kamim ka romromia vara ka ruhu ka jeu na tinapua? Sava enia nomim sei God mo sopo silea isamim? Ale vara hinau tari nomim mo tai isan God, mata sava ka lo retihapahapa sohena vara ka sopo lavi te hinau isana?

<sup>8</sup> Ka pete lavi vevuhi na hinau tari ka opoira moiso. Ka pete tavgav moiso. Ka jeu kamam matan ka pete supe moiso, ale i pa ruhu vara ka pete tauri suiha atu moiso matan kama pa tauri na suiha peresi kamim. <sup>9</sup> Matan na hitea sohena vara God mo tau kamam vaha'rule sohen tovongi matea, mo tau kamam hitahu jea na tamlohi,\* sohena tamlohi la lo vano

na nora mateia, kama mai sohena hinau matea varama peresi na an-gelo peresi na tamlohi la pa varoia.

<sup>10</sup> Kamam kama tamlohi rongorongo vono matan Křisto, pani kamim ka tamlohi lelevosahi hin Křisto. Kamam kama tamlohi malum, pani kamim ka tamlohi řilangi. Kamim, tamlohi la sile na ololo isamim, pani kamam, la hitelehilehi kamam. <sup>11</sup> Mo mai nake, kama pa lo marohati, ale kama pa lo mařohu, nomam ruru la sopo řuhu, tamlohi la vailehilehi kamam, ale mo sopo te imamam. <sup>12</sup> Ale kama kalvono, kama voko na limamam, vara la veresatihi kamam, kama leřuhu hinira, ale vara la tipahi kamam, kama turu řilangi tarea, <sup>13</sup> vara la vereřesiřesi kamam, kama reti řuhu isara. Kama mai sohena, ale kama pa lo toho sohena utauta na varama, sohena tapahuri.

<sup>14</sup> Na sopo uli la hinau nike, matan vara a vai kamim ha mahenuhanu, pani vara a retiřoařoahai kamim sohena natuku řuhuřuhu. <sup>15</sup> Matan hina purongo vara nomim tamlohi vujangi mo matuvana hin Křisto, tamamim mata rasua la tupu visalete purongo. Matan enau na mai tamamim hin Křisto Iesu na Retiřuhu. <sup>16</sup> Ale matana, na lo usia řilangi isamim vara ha usuri na noku tovongi.

<sup>17</sup> Matan hinau sei natu, na pa řule Timothy natuku řuhuřuhu isamim, ale enia mo řomturu řilangi tarea hin Moli, i pa mai vara i mele vere kamim na noku posposi hin Křisto, i pa vujangi kamim sohen enau na lo vujangi na vao kalesia tari na jara tari.

<sup>18</sup> Tatuamim nake la lo mangisi tavera jea matan la lo řomřomia vara a pa sopo mele mai isamim. <sup>19</sup> Pani vara masalon Moli, a pa mele mai isamim vila, ale a pa vileiulia vara la tamlohi mangisi nike la lo vaore purongo teni vara nora suiha mo tai isan God. <sup>20</sup> Matan mauri atu God mo aulu hinia mo sopo turu na retireti

nona tamlohi purongo, pani na sui-han God. <sup>21</sup> Ka opoi na sava? A pa mai isamim peresi na hamim maja, teni a pa mai isamim peresi na opoia na posposi řomatano?

## 5

### *Tau Nařihi Haratu Mo Hehe*

<sup>1</sup> Sorasora mo lo vano vara posposi maji mo lo toho isamim, ale posposi maji sei mo sopo te tamlohi řořoha i eři majinga hinia vara tea i eři vaia sohena, matan tamlohi matea mo lo lavi na naroun tamana, <sup>2</sup> ale kamim ka řomaulu pani řomimim mo sopo sati mata sava? Ha tau nařihi tamlohi atu mo lo vai posposi atu na livuhamim.

<sup>3</sup> Matan hina purongo vara na sopo toho peresi kamim nake, noku řomřomi mo lo toho isamim, na pete sile na talai moiso isan haratu sei mo vai posposi atu. <sup>4</sup> Vara ha matavuhi na hijan Moli Iesu, ale noku řomřomi i pa lo toho peresi kamim na suihan nořa Moli Iesu, <sup>5</sup> ha pa sile tamlohi nike na liman Setan matan vara i komo na epena, matan vara maurina i pa juri na rani aria non Moli.

<sup>6</sup> Nomim hapahapa mo sopo tata-holo. Ka sopo levosahia vara ha tau na makomo isi na flaua, i pa vai na flaua i sosohi vevuhi? <sup>7</sup> Ha tau nařihi na flaua tuai isi mo lo toho hinia, matan vara ha pa mai flaua paro, matan kamim ka flaua paro varařuhu. Matan la sile Křisto nořa natu sipsip mata Passover, Křisto, enia malamalai atu mo mate matařa. <sup>8</sup> Mo řuhu vara řa matavuhi mata hanhani Passover, mo sopo peresi na flaua tuai isi mo lo toho hinia, isi atu enia posposi vaisatihi na tinapua, ale enia hina sasati, pani řa pa hani pereti atu mo sopo te isi hinia, pereti atu enia mauri vokevoke peresi na retivarařuhu.

### *Hehe Na Lolo Vao Kalesia*

<sup>9</sup> Na uliuli isamim moiso na noku leta vara ha pa sopo tapala peresi na tamlohi la lo vai na posposi maji, <sup>10</sup> na sopo řarami la haratu non varama la sopo tatuařa sei la lo vai na posposi



maji, teni la haratu řomřomi hařivi mo lo vilira, teni la haratu la lo vavanaho, teni la haratu la lo lotulotu vono. Matan, vara na lo vereea sohena, ha pa malue hin varama nike vara ha eři toho asau hinira. <sup>11</sup> Pani nakerihi na lo uliuli isamim vara ha sopo pulutahi peresi tea sei mo vereea vara mo vorai rasua vara mo jovi na posposi maji, teni na řomřomi hařivi, teni mo lotulotu vono, teni mo lo hiteřesifesi na tinapua, teni mo lo putu na wai řilangi tarea, teni mo tamlohi halu, ale ha pa sopo sakele vara ha hanhani matavuhi peresi tea vara mo sohena.

<sup>12</sup> Matan mo sopo noku hinau vara a ari na tamlohi la sopo rasua. Pani enia nomim hinau mata ari la haratu na lolo vao kalesia. <sup>13</sup> God i pa ari la haratu la sopo tamlohi rasua ale mo vereea mara,

‘Ha tipahi nařihi na tamlohi hehe sasati na livuhamim!’ *Deut 17.7; 19.19*

## 6

### *Nomim Vauriuri*

<sup>1</sup> Vara te vonamim mo vauriuri peresi na vonamim matea, mo pa hitea sohena sava vara i vano isana tamlohi ari na jingoima, ale mo sopo taua na lima tapuhi non God? <sup>2</sup> Teni ka sopo levosahia vara tapuhi non God la pa ari na varama? Ale vara ha pa ari na varama, mo toma, ka sopo navu vara ha ari na nomim vauriuri vavarihi? <sup>3</sup> Ka sopo levosahia vara enřa řa pa ari na angelo? Matan haratu, mata sava ka sopo eři tau na tamata na vauriuri vavarihi nike na varama? <sup>4</sup> Vara te hinau isamim mo sohena, mata sava natu, ka lo vano isana tamlohi varama, haratu sei mo sopo te nora hinau vara la eři reti matana na lolo vao kalesia? <sup>5</sup> Na lo vere hinau nike, vara a vai kamim ha mahanuhanu. Varařuhu, mo sopo tea na lolo vaomim kalesia vara mo sopo lo jea na lelevosahi vara i eři tau na tamata na vauriuri nona vorai kalesia? <sup>6</sup> Pani kamim, ka hitea vara mo tataholo purongo vara te voraimim i tau na voraina kalesia

tinapua matea na aria nona tamlohi varama!

<sup>7</sup> Ka lo vauriuri peresi kamim hasemim na naho tamlohi aria mata varama, enia mo vujangia mo memera moiso vara ka lo toho asau hin mauri atu God mo opoia. I pa mele řuhu vara ha tinařihi purongoia, i pa mele řuhu vara ha tinařihira la jeu kamim. <sup>8</sup> Pani kamim purongo kamim hasemim, ka lo vai na hehe isamim, ale ka lo haluhalu na voraimim kalesia!

### *Ha Toho Asau Na Posposi Lumiha*

<sup>9</sup> Ka sopo levosahia vara la haratu la lo vai na hehe la pa sopo eři lavi mauri atu God mo aulu hinia? Ha mera hinia, la haratu la lo vai na posposi viriu, teni la haratu la lotulotu vono, teni la haratu la lo vaivaileu peresi na tinapua, teni tamlohi la juruvi peresi na tamlohi teni hařai la juruvi peresi na hařai purongo, <sup>10</sup> teni tamlohi vavanaho, teni la haratu la lo řomusuri na hinau non te tinapua, teni la haratu la opoi jea na wai řilangi tarea, teni la haratu la lo veresatihi na tinapua, teni la haratu la lo uri na tamlohi mata vavanaho na nora hinau, enira mo isoiso atu la pa sopo lavi mauri atu God mo aulu hinia. <sup>11</sup> Ale tuai tatuamim ka sohena, pani nake God mo hoje nařihi na nomim hehe moiso, ale mo tapuhi kamim, mo vai kamim ka tataholo na nahon God na hijan Moli Iesu Křisto peresi na Tanumen nořa God.

### *Hahau Mo Tataholo*

<sup>12</sup> Hai la lo vereea lara, “Matan enau kalesia matea, mo tataholo purongo vara a usuri na masaloku tari.” Pani a eři vereea vara hinau tari la pa sopo eři tueni kamim, pani hina purongo vara, “Enau kalesia matea, mo tataholo purongo vara a usuri na masaloku tari.” A pa sopo tinařihia vara a toho na ruhuruhun te hinau hatea. <sup>13</sup> Ale hai la lo vereea vara, “Hanhani mo lo toho mata pangeřa, ale pangeřa mo lo toho mata hanhani!” Mo varařuhu pani ko hitea, God i pa komora enira mo rua. Epeřa mo sopo toho mata posposi viriu, mo

vono! Epefa la lo toho mata non Moli, ale Moli mo aulu na epefa. <sup>14</sup> Ale God mo sauteterahi Moli na mateia, ale i pa sauteterahi na epefa sohena na suihana. <sup>15</sup> Ka sopo levosahia vara epemim enira vonara matea na epen Křisto? Mo tataholo vara a lavi te vonara hatea na epen Křisto, ale a vaia i sořotahi isana hařai malele matea? I vonovono řuhu! <sup>16</sup> Teni ka sopo levosahia vara haratu mo sořotahi peresi na hařai malele matea mo mai epe matelete peresia? Matan sohen la ulia mo vereea vara, 'Enira rua, la pa mai epe matelete'.

#### *Gen 2.24*

<sup>17</sup> Pani haratu sei mo sořotahi isan Moli, enia mo mai matelete peresi na Tanumena.

<sup>18</sup> Ha rovo asau na posposi viriu. Hina sasati tinapua tari tamlohi la lo vaira mo sopo komo na epena, pani haratu mo lo vai na posposi viriu mo lo hase hehe na epena. <sup>19</sup> Teni ka sopo levosahia vara epemim enia temple non Tanume Tapu sei mo lo toho na lolomim sei God mo silea isamim? Ka sopo nomim hasemim, <sup>20</sup> matan sava God mo volituhu kamim hinia vara i juri kamim mo tavera jea. Ale na epemim tari ha vaira na posposi řuhu vara la tahe na hijan God i aulu.

## 7

### *Vujangi Mata Lahi*

<sup>1</sup> Ale nakerihi, usuri na sava ka usia na nomim leta, ka usia vara, "Mo tataholo vara tamlohi la sopo juruvi peresi na hařai teni mo vono?" Ale noku řarami nahai, <sup>2</sup> mo řuhu, pani matan posposi viriu mo mařivi hajavua, i pa mele řuhu jea vara tamlohi matea i lahi, ale i lo toho peresi narouna purongo, ale hařai matea i toho peresi tuana purongo. <sup>3</sup> Mo sopo tataholo vara tamlohi lahi matea i horo narouna vara mo opoia vara i juruvi peresia, matan mo tataholo vara i usia, ale narouna sohena i pa sopo horo tuana. <sup>4</sup> Hařai lahi matea i sopo eři vai na sava tarea enia hasena mo opoia, matan

tuana mo aulu na epena, ale tuana sohena i sopo eři vai na sava tarea enia hasena mo opoia, matan narouna mo aulu na epena. <sup>5</sup> Ha sopo horohoro kamim, pani matan te hinia purongo sohen harihi: vara engko peresi naroum ka majinga hinia matan vara ha hase tau kamim mata ususi matan te makomo rani purongo. Pani vara mo isoiso, ha mele juruvi jara matea matan vara Setan i sopo eři vaihite kamim vara ha vano isana tinapua matan ka sopo eři hase taurilati kamim.

<sup>6</sup> Sava na lo vereea matana mo tataholo, pani enia mo sopo retileu matea. <sup>7</sup> Enau na opoia vara tamlohi tari la soheku, pani tatua tamlohi God mo vaira la tataholo vara la lahi, ale tatuara God mo vaira la tataholo matan la sopo lahi.

<sup>8</sup> Ale isan la haratu la sopo lahi teni la hařai malepu, na vereea vara mo mele řuhu jea vara la sopo lahi soheku. <sup>9</sup> Pani vara la sopo eři hase taurilatira, mo řuhu vara la lahi. Matan enia mo mele řuhu jea vara la lahi mo jeua vara la sopo eři taurilati na masalo epera.

<sup>10</sup> Ale isan la haratu la lahi mo sopo enau na lo vereea pani Moli mo lo vereea vara, hařai lahi i pa sopo rovo hin tuana, <sup>11</sup> pani vara i vaia, i pa sopo eři mele lahi, pani vara mo řohu hin řomřomi atu, mo sopo te mele malele tinapua, i pa vai na tamata peresi tuana i mele mai isana, ale tamlohi lahi sohena i sopo řohu hin narouna.

<sup>12</sup> Isana tamlohi tinapua enau na lo vereea mo sopo Moli mo vereea vara te vorai kalesia hatea sei narouna mo sopo kalesia, pani řomina mo řilangi vara i toho peresi tuana, i pa sopo řohu hinia. <sup>13</sup> Vara te hařai kalesia hatea tuana mo sopo kalesia matea, pani vara řomina mo řilangi vara i lo toho peresi narouna, narouna i pa sopo řohu hinia. <sup>14</sup> Matan God mo tapuhi na tamlohi mo sopo rasu matan narouna enia hařai kalesia matea, ale God mo tapuhi na hařai

mo sopo rasu matan tuana enia tamlohi kalesia matea. Vara i vono, natumim la pa lumiha na nahon God, pani matan mo sohen haratu, enira la tapu na nahona. <sup>15</sup> Pani vara vonara matea sei na lahi mo sopo kalesia, ale mo rovo, ha tinañihia vara i sohena. Hin posposi sei vorai kalesia atu i sopo eñi tia hin lahi atu, matan God mo tovi kamim vara ha toho na tamata. <sup>16</sup> Hañai lahi, ko pa levosahia sohena sava vara o eñi juri tuam? Tamlohi lahi, ko pa levosahia sohena sava vara o eñi juri naroum?

<sup>17</sup> Mo řuhu vara tamlohi kalesia hatehateahi la toho hin mauri atu sohen Moli mo silea isara, hara sei God mo tovara matana, harihi enia noku retileu isana vao kalesia tari. <sup>18</sup> Vara tea mo taiřalihi tiroma moiso hin rani atu God mo pa tovia, i pa sopo vaihitea vara i vaitihai na hapila nona taiřalihi! Vara tea mo sopo taiřalihi hin rani atu God mo tovia, i pa sopo ale na taiřalihi! <sup>19</sup> Matan mo sopo te hinau hinia vara ko taiřalihi teni ko sopo taiřalihi, hina aulu enia vara ha ololo na retileu non God.

<sup>20</sup> Mo řuhu vara tamlohi hatehateahi la lo toho hin mauri atu God mo tovara hinia. <sup>21</sup> Vara te vonamim mo lo slev hin pongi atu God mo tovia, i pa sopo řomřomi te hinau vara i pa lo toho sohena slev teni mo vono. Pani vara nona tamlohi taverna mo opoia vara i teria, mo řuhu vara i vano. <sup>22</sup> Matan hara sei Moli mo tovia na rani mo pa lo toho sohena slev matea, enia mo materi hin Moli, ale sohen haratu, haratu sei mo materi hin rani atu Moli mo tovia, enia mo slev non Křisto. <sup>23</sup> Volimim atu God mo volia mata juri kamim mo taverna jea, ha sopo mai slev nona tamlohi. <sup>24</sup> Ale la voraiku peresi na vevoraiku, na sava mauri vara God mo tovi kamim hatehateahi hinia, mo řuhu vara ha lo toho atu, ale God i pa toho peresiho.

<sup>25</sup> Ale isana kalesia sei la sopo lo lahi, na sopo lavi te retileu isan Moli matara, pani na sile na noku kilakilau sohena tamlohi matea sei Moli mo řomopoia, hinau sei ha eñi rasua.

<sup>26</sup> Ale na řomiku na sava mauri mo lo

toho nake, mo řuhu vara haratu mo lo toho na sava mauri, i lo toho hinia.

<sup>27</sup> Vara ko lahi moiso, o sopo rovo hin naroum. Vara ko sopo lo lahi, mo mele řuhu jea vara o sopo aleale naroum. <sup>28</sup> Pani vara ko lahi, ko sopo vai na hehe, ale vara te hañai matea la tapuhoroa moiso mo lahi, mo sopo vai na hehe. Pani la haratu la lahi la pa lavi na rani řilangi matana, na vereea matan na opoia vara a horo kamim na rani řilangi mata lahi.

<sup>29</sup> La voraiku peresi na vevoraiku, řarami noku reti mo sohen harihi: rani sei God mo taua matan varama nike mo vejuveju sati moiso. Ale matana, mo tapulo nake, la haratu sei naroura, la pa toho sohena mo sopo te naroura, <sup>30</sup> ale la haratu sei la lo tangtangi la pa vaia sohena la sopo tangtangi, ale la haratu sei la lo avulahi, la pa vaia sohena la sopo avulahi, ale la haratu sei la lo volvoli, la pa sopo taurilati na sava la volia, <sup>31</sup> ale la haratu la lo vai na voko hin varama nike, la pa sopo tia hin varama nike, matan varama nike mo lo vano vara i tihai. <sup>32</sup> Na opoia vara řomimim la sopo tiatia na hina tinatinapua matuvana, matan haratu mo sopo lo lahi i pa eñi tau na řomina na vavahinau non Moli vara i pa vai Moli i avulahi hinia. <sup>33</sup> Pani tamlohi atu mo lahi moiso, mo lo tau na řomina na hinahinau mata varama matan vara i pa vai narouna i avulahi hinia, <sup>34</sup> ale řomina mo lo masanga, ale hañai mo sopo lo lahi, teni hañai la tauhoroa moiso vara i pa lahi, enira la tau na řomira na vavahinau non Moli vara la pa hahau na mauri vokevoke na epera peresi na řomira. Pani hañai atu mo lahi moiso mo lo tau na řomina na hinahinau mata varama mata i vai tuana i avulahi hinia.

<sup>35</sup> Na lo retireti sohena vara a tueni kamim, mo sopo matan vara a horo kamim hin te hinau, pani vara hinau tari isamim la pa maro tataholo, moiso vara i vai na řomimim i řilangi isan Moli matan vara i sopo masanga. <sup>36</sup> Vara tea isamim mo lo hase tapuhoroa vara i sopo lahi isan tapalana, ale nake mo

řomřomia vara mo sopo řomřomi řuhu natu, ale vara řomina mo řilangi vara i lahi, ha tinařihia vara i vaia sohena, ha tinařihira vara la lahi, enia mo sopo vai na hehe.

<sup>37</sup> Pani haratu sei řomina mo řilangi vara i hase tapuhoroa na lahi, mo sopo matan te hinou tinapua, pani matan mo hase eři taurilatia, ale vara řomina mo turu řilangi hinia, mo lo řuhu purongo vara i sopo lahi.

<sup>38</sup> Ale matana, haratu mo lahi isan tapalana, enia mo vai na hina řuhu matea, ale isan haratu mo lo hase tapuhoroa na lahi, mo vai na hinou mo mele řuhu jea.

<sup>39</sup> Hařai lahi matea mo lo toho na ruhuruhun tuana i tikeli rani atu tuana mo mate. Pani vara mo mate, enia mo materi vara i eři mele lahi vara mo opoia, pani isana tamlohi kalesia matea purongo. <sup>40</sup> Pani na noku kilakilau, hařai malepu atu i pa mele avulahi jea vara i lo toho hasena purongo. Ale na levosahia vara enau na lo usuri na řomin Tanumen God matana.

## 8

### *Hanhani La Silea Isana Tamasi*

<sup>1</sup> Ale nakerihi na opoia vara a mele retireti makomona na hinou matea na nomim leta sei mata hanhane sei tamlohi la silera isana tamasi moiso. Enřa mo isoiso řa levosahia vara; Enřa řa lavi na lelevosahi. Pani 'lelevosahi' sei la lo vereva mo lo vai na tamlohi la řomaulu, pani opoia mo lo vai na tamlohi la ulua na posposi řuhu. <sup>2</sup> Vara tea, řomina mo řomřomia vara mo levosahi te hinou, tamlohi atu mo sopo lo levosahi te hinou na sava vara i pa levosahia.

<sup>3</sup> Pani vara tea mo opoi God, God mo levosahi tamlohi atu.

<sup>4</sup> Matan haratu, na řomřomi mata hani na hanhane sei la silea isana tamasi, řa levosahia vara tamasi la sopo mauri, ale řa levosahia vara mo sopo te God tinapua, pani matelete purongo. <sup>5</sup> Matan hina purongo vara hinou hai na tuka teni na varama la tovira god la lo toho, varařuhu god matuvana peresi na moli matuvana la lo toho, <sup>6</sup> pani isařa, God mo

matelete enia Tamařa, hinou tari la tai isana, enia mo isoiso nona, ale Moli matelete enia Iesu Křisto, ale hinia, hinou tari la pala, ale hinia, enřa řa lo mauri.

<sup>7</sup> Pani, mo sopo tamlohi tari la lavi lelevosahi nika. Pani matan tamlohi kalesia hai tiroma la lo pulutahi peresi na tamasi moiso vara la hani na hanhane la silea isana tamasi moiso, la pa řomřomia vara la lo vai na hehe, ale la pa rongoa vara la lumiřa matana. <sup>8</sup> Pani hanhane i sopo eři vaiřa řa tataholo na nahon God. Ra sopo eři vejuveju hin te hinou vara řa sopo hania, ale vara řa hania i pa sopo eři tueniřa. <sup>9</sup> Pani ha lo kilau i řuhu vara nomim materi sohen harihi i sopo vai te voraimim kalesia hatea i jovi matan řomina mo sopo lo řilangi hinia.

<sup>10</sup> Matan, vara tea řomina mo sopo lo řilangi mo hiteho ko lo hanhane na lolo temple nona tamasi matea, ale ko sopo levosahia vara nomim materi sei i pa vai tamlohi atu mo sopo lo řilangi vara i hani hanhane atu la silea isana tamasi moiso i pa jovi? <sup>11</sup> Ale matan nom lelevosahi sei, voraim kalesia sei řomina mo sopo lo řilangi, i pa jovi nařihi na nona rasua, vorai sei Křisto mo mate matana. <sup>12</sup> Ale matana, ko lo vai na hehe isan Křisto vara ko lo řuleřule te vorai kalesia tinapua hin te hinou la rasua vara mo sopo tataholo. <sup>13</sup> Matan haratu vara te hanhane na lo hania mo vai te vorai ku kalesia mo jovi, a pa sopo eři mele hani mit atu vara i vai vorai ku kalesia atu i jovi matana.

## 9

### *Mauri Nona Vahařule Tataholo Matea*

<sup>1</sup> Enau mo sopo tamlohi materi matea? Teni enau mo sopo vahařule matea? Enau mo sopo haratu sei mo hite Iesu nořa Moli na mataku? Kamim mo sopo noku vuvahinou hin Moli? <sup>2</sup> Vara isana tinapua enau mo sopo vahařule matea, pani isamim, enau vahařule matea, matan kamim ka mai kalesia mata

noku vua vavahinau, ale mo vujan-  
gia vara enau tamlohi vahaʻule non  
Moli.

<sup>3</sup> Hināu sei enia noku řarami isan  
la haratu la lo aleau mata noku  
vavahinau. <sup>4</sup> Ka řomi vara mo sopo  
tataholo vara ha vahani kamam? <sup>5</sup> Ka  
řomi vara mo sopo tataholo vara  
kama lavi na naroumam sei la kale-  
sia la usuri kamam, sohen la va-  
haʻule tinapua sei la lo vaia, ale so-  
hen tasin Moli peresi Peter la lo vaia?

<sup>6</sup> Teni, enia matan enau Barnabas  
purongo vara mo sopo tataholo vara  
kama isoiso na nomam voko mata  
mania? <sup>7</sup> Sava tamlohi vuro mo lo  
hasena volia? Sava tamlohi isa mo  
lavo na isa matea, ale mo sopo hani  
te vuana? Teni hare mo lo korohi te  
nani pani mo sopo inu te wai susuna?

<sup>8</sup> Ka řomi vara na lo vere la  
hināu nike usuri na noku řomřomi  
purongo? Ka řomi vara leu mo sopo  
verea sohena? <sup>9</sup> Matan la ulia na  
Leu non Moses moiso, vara 'O sopo  
pesihoro na jingo buluk vara mo lo  
varasi nařihi na piri wit'. *Deut 25.4*  
Ka řomi vara God mo lo řomřomi na  
buluk purongo? <sup>10</sup> Ka řomi vara mo  
sopo vere reti sei matařa? La ulia  
matařa, matan haratu mo lo řule na  
lepa mo lo řule na nona řomtau, ale  
haratu mo lo pete na piri wit mo lo  
petera na nona řomtau vara i pa lavi  
na řungana hin la piri wit atu?

<sup>11</sup> Vara kamam vahaʻule kama  
lo lavo na piri řuhu mata mauri  
isamim, ka řomi vara mo sopo  
tataholo vara kama lavi te hināu  
mata i tueni na maurimam nake  
isamim? <sup>12</sup> Vara tinapua la opoia  
vara la lavi na ololo isamim, ka  
řomi vara kamam mo sopo tataholo  
vara kama lavia i jeu na vahaʻule  
tinapua? Hina purongo, kama sopo  
ngurunguru hin kamim vara ha sile  
na ololo isamam, pani kama hitea  
vara i pa mele řuhu jea vara kama  
sopo mele tau te hināu i vai kamim  
ha tialahalaha hinia, ale ha řohu na  
Retiřuhu non Křisto matana.

<sup>13</sup> Kamim ka sopo levosahia vara la  
přis atu la lo kilau na Temple nona  
Jew, la lo lavi na hara hināu na han-  
hani mata silesilea nona tamlohi?

Ale ka sopo levosahia vara přis sei  
la lo volitusi na votavota mata mala-  
malai atu la lo asease na silesilea  
mata malamalai? <sup>14</sup> Hin malele aker-  
ihi natu, Moli mo retileu hinia vara la  
haratu la lo vereuli na Retiřuhu non  
Křisto la pa lavi na hara hināu mata  
nora vavahinau na Retiřuhu.

<sup>15</sup> Mo tataholo vara a usi kamim  
vara ha tueniau, pani na sopo usia.  
Na sopo uliuli isamim nake vara a  
usia isamim. Mo vono. I pa mele  
řuhu isaku vara a mate i jeua vara  
a usi kamim mata nomim tuetueni!  
<sup>16</sup> Vara a lo retivujavujangi na Re-  
tiřuhu, mo sopo sile te masapa isaku  
vara a pa mangisi matana. Matan  
God mo taua na limaku vara a pa  
vaia. Rani sati i pa mai isaku vara a  
sopo retivujavujangi na Retiřuhu.

<sup>17</sup> Vara na lo vaia usuri na masa-  
loku a pa lavi na noku otori matana,  
pani God mo viřoniau, ale mo sileau  
hin voko tapu nike, ale enau, a sopo  
eři vai te hināu tinapua. <sup>18</sup> Sava  
natu enia noku otori? Enia masapa  
vara a retivujavujangi purongoi na  
Retiřuhu, ale na sopo usi na sava  
sei mo tataholo mata tamlohi retivu-  
javujangi na Retiřuhu matea i eři  
lavia.

<sup>19</sup> Matan hina purongo vara enau  
tamlohi materi, na sopo toho na  
ruhuruhun tea, pani na hase vaiau  
vara a volitusi isana tamlohi tari vara  
a pa eři lavi te vaora isara la mai isan  
Křisto.

<sup>20</sup> Isana Jew, na mai sohena Jew  
matea matan vara a lavi na Jew la  
mai isan Křisto. Isan la haratu la lo  
toho na ruhuruhu leu, na mai isara  
sohena tamlohi matea sei mo lo toho  
na ruhuruhu leu, pani na sopo toho  
na ruhuruhu leu matan vara a lavi la  
haratu la lo toho na ruhuruhu leu la  
mai isana. <sup>21</sup> Isan la haratu la sopo  
toho na ruhuruhun te leu, na mai  
sohena tamlohi matea mo sopo toho  
na ruhuruhun te leu, mo sopo vara  
na sopo toho na ruhuruhu leu non  
God, pani na lo toho na ruhuruhu leu  
non Křisto, matan vara a eři lavi la  
haratu la sopo toho na ruhuruhun te  
leu la mai isan Křisto.

<sup>22</sup> Isan la haratu la sopo lo řomřilangi na retivararūhu, na mai sohera, matan vara a lavi la haratu la sopo lo řomřilangi la mai. Isana tamlohi tari tinatinapua na mai sohera na malelera tari matan vara a eři juri tea. <sup>23</sup> Na lo vai la hinau tari sei mata Retiřuhu purongo, matan vara hinira enau peresira a pa eři lavi na hina řuhuřuhu sei Retiřuhu mo retitauhi hinira.

<sup>24</sup> Korong ka levosahia vara na rani maromaro matea, tamlohi maromaro tari la maro, pani tamlohi matelete purongo i pa mai tiroma. Ale matana, ha maro matan vara ha eři mai tiroma. <sup>25</sup> Tamlohi maromaro hatehateahi tari, la tau na řomira vara la hase taurilatira na hinahināu matuvana. La lo vaia matan vara la eři lavi na řongořongo rau vipahai purongo sei i pa řovo. Pani enřa, řa lo vaia matan vara řa pa lavi na hināu i pa sopo eři řovo. <sup>26</sup> Matan hināu sei, enāu na sopo maromaro purongo; na sopo tutuhi sohen tamlohi matea mo lo tutuhi purongoi na masapa. <sup>27</sup> Pani na lo taurilati na epeku, ale na aulu hinia matan vara i vono, hitahu na noku retivujavujangi isana tinapua, enāu haseku purongo na mele tau narīhiau na noku vujangi.

## 10

### *Rongorongo Vono Nona Tavgavin Israel Tuai*

<sup>1</sup> La voraiiku peresi na vevoraiku, na opoia vara ha levosahia vara tamařa la lo toho na ruhuruhun telangi atu, ale enira mo isoiso la hahau roto na tasi hin masapa atu God mo vaia, <sup>2</sup> ale enira mo isoiso la mai tamlohi usuri non Moses ale la paptijo hinia hin telangi atu ale hin tasi atu, <sup>3</sup> enira mo isoiso la hani hanhāni atu God mo silea, <sup>4</sup> enira mo isoiso la inu hin wai atu God mo silea. Matan la inu hin vatu mauri atu sei mo lo usurira, ale vatu atu enia Křisto. <sup>5</sup> Pani God mo sopo avu-lahi na sope vaora tavera, matan God mo vilimateira, ale mo pla hau na tarapera na jara hasetoho atu.

<sup>6</sup> La hināu sei la mase se sohena tovongi matea isařa, matan vara řa pa sopo opoi na hina sasati sohera.

<sup>7</sup> Ha pa sopo lotulotu vono sohena tatuara la lo vaia tuai, sohen la ulia moiso vara, 'Tamlohi la sakele vara la hanhāni, la inu, ale hitahu, la turu la velu'. *Exo 32.6* <sup>8</sup> Ra pa sopo usuri na posposi maji sohena tatuara sei la lo vaia tuai, rani matelete purongo vao sei la mate, evira mo tikeli tari vaha ngavulu rua mo tolu (*23,000*). <sup>9</sup> Ra sopo vaihite Moli sohen la tatuara atu la lo vaihitea tuai sei ale mata la hati matemateira, <sup>10</sup> teni řa sopo reti vavarihi sohen la tatuara atu la lo vaia tuai, ale angelo mata mateia mo vilimateira. <sup>11</sup> La hināu sei la mai isara tuai sohena tovongi matea isařa, ale la ulira mata retiřoařohai isařa nake, enřa sei řa lo toho na pongi hitahu.

<sup>12</sup> Matan haratu, sava tamlohi mo lo řomřomia vara enia mo lo turu řilangi, i lo kilau mamahunia vara i sopo jovi sohera. <sup>13</sup> Mo sopo te vaihite hatea vara ko jovi hinia mo tinapua hin la haratu la lo tikeli na tamlohi tari. God mo lo turu řilangi tarea, ale i pa sopo tinarīhia vara te hināu hatea i vaihite kamim i jeu na vaihite sei ha eři horora, pani hin vaihite atu God i pa sile te malele mata rovo hinia matan vara ha pa eři jelu hinia.

### *Leřuhu Non Moli Na Hanhāni Tapu*

<sup>14</sup> Matan hināu sei, la voraiiku řuhuřuhu, ha rovo na lotulotu vono. <sup>15</sup> Noku reti mo lo vano isana tamlohi la tamlohi tapurongo, ha ari na sava na lo vereā isamim. <sup>16</sup> Paniken mata leřuhu non God sei řa lo vere meje isana matana, enia matan vara enřa mo isoiso řa eři lavi na leřuhu na řaen Křisto hinia. Ale pereti atu řa lo topea, enia matan vara enřa mo isoiso řa eři lavi na leřuhu na epen Křisto hinia. <sup>17</sup> Matan pereti atu enia pereti matelete purongo, enřa sei řa vao matuvana, řa mai epe matelete, matan enřa mo isoiso řa hani na pereti matelete purongo. <sup>18</sup> Ha to řomřomi na tavgavin Israel. Ka

hitea vara la haratu sei la lo hani na malamalai, la sopo mai matelete matana?

<sup>19</sup> Ka řomi vara na lo vere na sava? Na sopo vereā vara tamasi teni te hanhani sei la silea isara enira hināu purongo. <sup>20</sup> Mo vono! Na lo vereā vara malamalai atu tamlohi řořoha la lo silea, la lo silea isana tanume sasati, mo sopo isan God. Na sopo opoia vara kamim ha matavuhi peresi na tanume sasati. <sup>21</sup> Ha sopo eři inu na paniken non Moli, ale ha inu na paniken nona tanume sasati! <sup>22</sup> Mo toma? Mo tataholo vara řa vaivai Moli i lolokoru? Ka řomi vara enřa řa řilangi řa jeu Moli?

### *Materi Nona Kalesia*

<sup>23</sup> Tamlohi hai la lo vereā lara, “A eři vai na hināu tari na opoia!” Mo řuhu pani hināu tari la pa sopo řuhu hiniho ale hailara, “A eři vai na hināu tari na opoia!” Mo řuhu pani hināu tari la pa sopo tueniho vara o ulua. <sup>24</sup> I pa sopo tea i řomřomi na sava mo řuhu isana purongo. Ha řomřomi na tinapua, ale sava i pa řuhu isara.

<sup>25</sup> Ha hani na mit la ařehira na jara maket, i sopo te retiusia vara la silea isana tamasi moiso teni mo vono matan vara řomimim i sopo řomkaka hinia. <sup>26</sup> Matan Retitapu mo vereā vara, ‘Varama enia non Moli, ale hināu tari la lo toho hinia enira nona’.

*Psa 24.1*

<sup>27</sup> Ale vara te tamlohi řořoha mo tovi kamim vara ha hanhani peresia, ale ka avulahi vara ha vano, ha hani na sava hināu la taua na nahomim, i sopo te retiusia hinira vara la tataholo vara ha eři hanira teni mo vono. <sup>28</sup> Pani vara tea mo vereā isamim vara, “Hināu sei la silea sohen malamalai moiso!” vara mo sohenā, ha sopo hania matan enia mo vere kamim hinia, ale matan vara i sopo komo te řomina. <sup>29</sup> Pani na sopo vere na řomimim, pani řomin tamlohi atu. Matan mata sava natu, noku materi i pa isoiso mata řomřomi non te tinapua? <sup>30</sup> Vara na lavia peresi na vere meje isan God, mata sava natu,

tea la eři tuvaiau matan hināu sei na vere meje matana moiso?

<sup>31</sup> Ale matana, sava ka hania teni ka inua teni ka vaira, ha vaira matan vara hasohaso i pa vano isan God matana. <sup>32</sup> Ha sopo vai te hināu mata vaivai na Jew, teni na tamlohi řořoha teni isana vao kalesia non God, <sup>33</sup> sohen enāu sei na vaihitea vara a vai na tamlohi tari la avulahi na hināu tari sei na lo vaira. Na sopo vaia mata i pa řuhu isaku, pani na lo alea vara a vaia i tueni na tamlohi matuvana matan la pa eři juri.

## 11

### *Vujangi Mata Tamlohi Peresi Na Hařai*

<sup>1</sup> Ha usuri na noku tovongi sohen enāu na lo usuri na tovongi non Křisto.

<sup>2</sup> Ale nakerihi, na lo hasohaso kamim matan ka lo řomřomiau na hināu tari, matana ka lo tauri mamahuni na mauri kalesia, sohen enāu na lo vujangi kamim hinia.

<sup>3</sup> Pani na opoia vara ha pa levosahia vara patu hařai lahi matea enia tuana, patu lamane tari enia Křisto, ale patun Křisto enia God. <sup>4</sup> Lamane tari sei la ropoi na patura, ale vara la lo usiusi teni la lo retimangovi, enira la lo vai mahanuhanu na patura sei, enia Křisto. <sup>5</sup> Pani hařai lahi tari sei, vara la sopo ropoi na patura ale la lo usiusi teni la lo retimangovi, enira la lo vai mahanuhanu na patura sei tuara, mo sohenā vara la hiripilopiloia.\* <sup>6</sup> Vara hařai lahi matea mo řohu vara i ropoi na patuna, mo řuhu vara i tai na vuluna i vejuveju. Pani matan enia hina mahanuhanu matea vara te hařai lahi i tai na vuluna teni la hiripilopilo na patuna, mo řuhu vara i ropoi na patuna. <sup>7</sup> Matan mo sopo tataholo vara lamane matea i ropoi na patuna, matan enia niniun God, enia mo lo vujangi na řuhuřuhu God, pani hařai enira la vujangi na řuhuřuhu nona tamlohi. <sup>8</sup> Matan God mo sopo vai na lamane na hařai, pani mo vai

\* **11:5:** La lo hiripilopilo i na hařai sohenā tuai matan la tope na nora retitauhi mata lahi.

na haʻrai na lamane. <sup>9</sup> Ale mo sohena purongo, God mo sopo vai na lamane mata haʻrai, pani haʻrai mata lamane. <sup>10</sup> Matan haratu natu, mo ʻruhu vara haʻrai la ropoi na patura sohena matamata matea mo vujangia vara la lo toho na ruhuru suiha tinapua, matan angelo la lo kilau matana.

<sup>11</sup> Pani na vao kalesia non Moli, haʻrai mo sopo matan i toho hasena, teni tamlohi i toho hasena, <sup>12</sup> matan God mo vai na haʻrai na lamane, ale nake lamane mo vora isan haʻrai, ale hinu tari la tai isan God.

<sup>13</sup> Kamim hasemim ka hitea vara mo tataholo vara haʻrai matea i ususi isan God, ale i sopo ropoi na patuna? <sup>14</sup> Mauri mo sopo vujangi kamim moiso i mera vara lamane matea vuluna mo peravu, enia hina mahanuhanu isana? <sup>15</sup> Pani vara vulu haʻrai mo peravu, enia hina ʻruhuʻrurun haʻrai atu teni mo vono? Matan God mo sile na vuluna mata ropoi na patuna. <sup>16</sup> Vara tea ʻromina mo sopo opoi hinu sei, pani mo sohen haratu natu isamam peresi na lolo vao kalesia non God.

### *Posposi Tataholo Mata Hanhani Tapu*

<sup>17</sup> Pani sava a pa vere nakerihi, na sopo hasohaso kamim matara, matan ka lo pulutahi jara matea, enia mo sopo matan ha pa vai te hinu i mele ʻruhu, pani ka vaia mo mele sati jea sivo. <sup>18</sup> Matan tiroma hinu na rongoa, enia vara ka lo pulutahi mata lotu ale patumasa mo lo toho isamim. Ale na rongoa vara mo varaʻruhu, <sup>19</sup> matan ʻra levosahia vara patumasa la pa vora isamim, matan vara i memera vara hare nakonako isamim la jea na mauri rasua.

<sup>20</sup> Matan ka lo pulutahi jara matea, mo sopo hanhani tapu sei ka lo hania. <sup>21</sup> Matan, na nomim hanhani, tamlohi hatehateahi la hasera hani na hara hinu. Matea mo marohati, ale tinapua mo drong! <sup>22</sup> Mo toma? Mo sopo te imamim vara ha eʻri hanhani teni ha inu hinira? Teni ka lo hitelehilehi na vao kalesia non God, matan ka vai la haratu mo sopo

te nora hinu la mahanuhanu? Na sopo levosahia vara a pa vere na sava isamim! Ka ʻromi vara a pa hasohaso kamim matana? Mo vono!

*Isoiso Hanhani*  
(Mt 26.26-29; Mk 14.22-25; Lk 22.14-20)

<sup>23</sup> Matan sava na silea isamim na lavia isan Moli. Hin vutepongi atu sei Judas mo turuposi hania, Moli Iesu mo lavi na pereti, <sup>24</sup> ale mo vere meje matana moiso mo topea mo vere mara, “Harihi enia epeku sei na silea matamim. Ha vai harihi ʻromʻromi na sava na vaia matamim.” <sup>25</sup> Mo mele vaia sohena purongo na isoison hanhani atu, enia mo lavi paniken atu, mo vere mara, “Harihi enia reti-tauhi paro na ʻraeku. Vara ha inua, ha vai harihi ʻromʻromi na sava na vaia matamim.” <sup>26</sup> Matan sava rani ka lo hani pereti atu, ale ka inu hin paniken atu, ka lo vujangi na mateia non Moli, ale ha lo vaia sohena i tikeli na rani i mele mai hania.

<sup>27</sup> Sava tamlohi vara mo hani pereti atu teni mo inu hin paniken atu non Moli na malele matea mo sopo tataholo, enia mo lo vai na hehe matan mo lo kilau purongoi na epen Moli peresi na ʻraena. <sup>28</sup> Tamlohi hatehateahi hasera la pa kilau usurira matan te hehe na maurira la pa vahaʻri hania, moiso la pa eʻri hani pereti atu, ale la inu hin paniken atu. <sup>29</sup> Matan, vara tea mo hani teni mo inu, pani mo sopo ʻromʻromi na kalesia tinapua, enia mo hase hani teni mo inu na nona talai.† <sup>30</sup> Hinu sei natu, mo vai kamim matuvana mo sopo te suihamim, ale ka rojo, ale hai la mate.

<sup>31</sup> Pani vara ʻra haseʻra kilau usuri mamahuniʻra, God i pa sopo ariʻra matana. <sup>32</sup> Pani vara Moli i ariʻra, mo vaia matan vara i vai tataholoiʻra matan vara ʻra pa sopo lavi na talai peresi na tamlohi tinapua na varama na pongi hitahu. <sup>33</sup> Matana, la voraiku peresi na vevoraiku, vara ha pulutahi mata hanhani tapu, ha saovi kamim hatehateahi. <sup>34</sup> Vara tea mo marohati, i pa hanhani na ima

† 11:29: Mt 5.23-26



purongo, matan vara ka pulutahi, i sopo mata lavi na talai. Ale mata hinau tinatinapua a pa vere na malelera tataholo isamim vara a mai.

## 12

### *Silesilea Non Tanume Tapu*

<sup>1</sup> Ale nakerihi, la vorai peresi na vevorai, enau na opoia vara ha mera na hinau sei Tanumen God mo lo silera. <sup>2</sup> Ka levosahia vara hin pongi atu ka lo toho na řořoha, suihan Tiapolo mo lo tikauleji kamim usuri na malele mo tiroman kamim ka vano isana tamasi mengo. <sup>3</sup> Matan haratu, na opoi vara ha levosahia vara mo sopo te tamlohi mo lo reti na suihan Tanumen God, i eři vereahin te rani vara, "Na lesati hin Křisto!" Moiso i sopo tea i eři vereahin, i vara "Iesu enia Moli!" vara Tanume Tapu mo sopo toho isana.

<sup>4</sup> Ale, otori tinatinapua matuvana la lo toho, pani pulora matelete purongo, enia Tanume Tapu. <sup>5</sup> Ale vavahinai mata tuetueni tinatinapua matuvana, pani Moli matelete purongo; <sup>6</sup> ale malele mata vavahinai tinatinapua mo matuvana, pani God matelete purongo sei mo lo voko hinira hatehateahi. <sup>7</sup> Tanume Tapu mo vuhesi na suihana isara hatehateahi mata tueni na tinapua.

<sup>8</sup> Isana tamlohi matea, Tanume Tapu mo silea na retireti mata lelevosahi, ale isana tinapua mo sile na retireti mata levosahi matan te hinai. <sup>9</sup> Isana tinapua pa Tanume Tapu atu mo sile na rasua, ale isana tinapua mo sile na otori mata na vai rojoa i tihai, <sup>10</sup> isana tinapua suiha mata vai na hinai mařurahi, isana tinapua retimangovi, isana tinapua eřia mata eři hitevosahi na sava tanume enia pulo retireti matea, isana tinapua i eři retireti na leo tinatinapua, isana tinapua i eři rongovosahi na leo tinatinapua.

<sup>11</sup> Enia pa Tanume Tapu atu sei enia hasena mo lo aseasehi la otori sei. Enia hasena mo hatihia vara sava tamlohi i pa lavi na sava otori.

<sup>12</sup> Matan epe tamlohi matea enia matelete, ale tavgavaluna matuvana, ale tavgavaluna matuvana pani la vai na epe matelete, mo sohen harihi peresi Křisto. <sup>13</sup> Matan hin Tanume Tapu matelete purongo, enia mo isoiso řa paptijo na epe matelete, vara tamlohi řořoha teni Jew, slev teni tamlohi materi, mo vaiřa enia mo isoiso vara řa inu isana Tanume Tapu matelete purongo.

<sup>14</sup> Matan epe tamlohi, tavaluna mo sopo matelete purongo, pani matuvana. <sup>15</sup> Vara palona i vereahin vara, "Enau na sopo tavalu epe matea matan enau na sopo limana!" řomřomi sohen haratu mo sopo vaia vara enia mo sopo tavalu epe matea. <sup>16</sup> Vara perona i vereahin vara, "Enau na sopo tavalu epe matea, matan enau na sopo matana!" řomřomi sohen haratu mo sopo vaia vara enia mo sopo tavalu epe matea. <sup>17</sup> Vara tavalu epe tari enira matana matea i pa rongo te hinai na savana? Vara tavalu epe tari enira perona matea, i pa ngusahi te hinai na savana?

<sup>18</sup> Pani mo sohen haratu natu, God mo tau mamahuni na tavalu epe tari na jarara usuri na masalona. <sup>19</sup> Vara enira mo isoiso tavaluna matelete purongo, epena i pa toho epu? <sup>20</sup> Pani mo sohen haratu natu, tavgavaluna matuvana, pani epe matelete. <sup>21</sup> Matam i sopo eři vereahin isana limam vara, "Ko sopo řuhu matan te hinai!" teni vara patum i vereahin isana palom vara, "Ko sopo řuhu matan te hinai."

<sup>22</sup> Varařuhu, la tavalu epe atu sei ka lo hitera vara la sopo řilangi teni la sopo řuhu, pani nora vavahinai la aulu jea mata tueni na epe, <sup>23</sup> ale la tavalu epe atu ka lo řompurongo hinira, enira pa la haratu sei ka lo ru mamahunira matan vara tea i pa sopo eři hitera, <sup>24</sup> pani tatua tavalu epe řa sopo řomřomia vara řa rurura sohera. Pani God mo vai na epe na malele matea vara řa sile na ololo isana tavalu epe sei řa hitera vara la sopo eři lavi te ololo. <sup>25</sup> Mo vaia

matan vara la sopo patumasa na epe, pani vara tavitavalu epe tari atu la kilau mamahuni na tatuara tinatinapua. <sup>26</sup> Vara te tavalu epe hatea mo rongohaji, enira mo isoiso la rongohaji. Vara tavalu epe matea mo lavi na oloolo, enira isoiso la avulahi matana.

<sup>27</sup> Ale kamim epen Křisto, ale kamim hatehateahi ka tavitavaluna.

<sup>28</sup> Ale God mo viřoni na tamlohi mata vavahinau na lolo vao kalesia sohen harihi:

tiromara enia vahařule,  
haruana enia řrovet,  
hatoluna enia tamlohi vujangi  
mata reti non God,  
moiso la haratu la lo vai na hinau  
mařurahi tavera,  
moiso la haratu la lo vai na rojoa la  
tihai,  
moiso tamlohi tueni,  
moiso tamlohi tiroma na vavahinau,  
moiso mata retireti na leo tinatinapua.

<sup>29</sup> Enira mo isoiso la vahařule teni mo vono? Enira mo isoiso la řrovet teni mo vono? Enira mo isoiso la tamlohi vujangi teni mo vono? Enira mo isoiso la eři vai na hina mařurahi tavera teni mo vono? <sup>30</sup> Enira mo isoiso la eři vai na rojoa i tihai teni mo vono? Enira mo isoiso la eři retireti na leo tinatinapua teni mo vono? Enira mo isoiso la eři vereuli na řarami leo tinatinapua teni mo vono? Mo vono!

### *Opoia Mo Aulu Na Hinahinau Tari*

<sup>31</sup> Pani ha tau na řromimim mata otori la mele aulu hinira. Ale enau a pa mele vujangi kamim na malele tinapua matea mo řuhuřuhu jea.

## 13

### *Opoia Mo Aulu Jea*

<sup>1</sup> Vara a eři reti na leo nona tamlohi tinatinapua, teni na leo nona angelo na tuka, pani vara mo sopo te opoia isaku, enau na lo vaore purongo sohen a belo sei mo lo tangi teni mo lo kolekole roro purongo. <sup>2</sup> Vara a lavi na suiha mata retimangovi, ale a levosahi na hina luhu tari peresi na lelevosahi tari, ale vara noku rasua mo řilangi vara a eři juhati te

vutivuti, pani vara mo sopo te opoia isaku, enau hina purongo matea.

<sup>3</sup> Vara a lo sile na noku hinau tari isana tinapua, teni vara a sile na epeku vara la sulimateia, pani vara i sopo te opoia isaku, enau na sopo řuhu hin te hinau.

### *Opoia*

<sup>4</sup> Opoia na mauriřa mo sohen harihi: Opoia enia řromperavu, ale enia řromřuhu.

Opoia mo sopo mereimerei,  
teni mo sopo retihapahapa.

<sup>5</sup> Opoia enia mo sopo vai na hina mahuhanu na naho tamlohi.

Opoia enia mo sopo opoi na masalona purongo.

Opoia enia mo sopo lolokoru vila.

Opoia enia mo sopo evi na hehe nona tinapua isana.

<sup>6</sup> Opoia enia mo sopo avulahi na posposi hehe,

pani mo avulahi na retivarařuhu.

<sup>7</sup> Opoia enia mo tatamahu mata hina řilangi tari.

Opoia enia mo lo kilau mata hina řuhu purongo.

Opoia enia řromřilangi mata hina řuhu la pa mai.

Opoia enia turu řilangi tarea.

<sup>8</sup> Opoia, i pa sopo te isoisona hin te rani pani retimangovi la pa tihai, leo tinatinapua la pa isoiso, ale lelevosahi la pa tihai.

<sup>9</sup> Matan enřa řa levosahi makomona purongo, ale řa lo retimangovi makomona purongo, <sup>10</sup> pani vara haratu sei mo sopo vejuveju hin te suiha hatea i pala, řa pa sopo mele opoi la hinau sei řa lo vejuveju hinira nake, matan la pa tihai.

<sup>11</sup> Hin pongi atu na lo natirihi, na retireti sohen a natirihi. Na lo řromřomi sohen a natirihi, noku kilakilau mo sohen a natirihi. Hin pongi atu na mai tamlohi, na tau nařihi na posposi nona natuvarihi. <sup>12</sup> Matan nake nořa kilakilau mo pa lo vusovusoha, pani na pongi hitahu nořa kilakilau i pa mera i řuhu. Nake na lo levosahi na makomona purongo, pani hitahu a pa levosahi vevuhia

tataholo sohena God mo pete levosahi vevuhiau moiso.

<sup>13</sup> La hinau akerihi mo tolu natu, la pa lo toho jejeu:

rasua, řomtoho, peresi na opoia, pani hinau aulu hinira, enia opoia.

## 14

### *Otori Sei Tanume Tapu Mo Lo Silera*

<sup>1</sup> Ha tau na opoia hina tiroma na maurimim, ale ha tau na řomimim i řilangi mata lavi la otori řuhuruhi sei Tanume Tapu i eři silea isamim, ale hinau atu mo řuhu jea hinira, enia matan vara ha eři vere na retimangovi sohena God mo mangovi kamim hinia. <sup>2</sup> Matan haratu mo lo retireti na leo tinapua matea Tanume Tapu mo silea, mo sopo retireti isana tamlohi, pani isan God, matan mo sopo tea i rongovosahia, matan enia mo lo vere na hina luhu hin Tanume Tapu. <sup>3</sup> Pani haratu mo lo retimangovi sohen God mo mangovia hinia, enia mo lo tueni na tamlohi vara la eři ulua hin Moli, ale mo lo retituetuenira, ale mo lo retinanauhira. <sup>4</sup> Haratu mo lo retireti hin te leo matea Tanume Tapu mo silea isana, enia mo lo tuenia hasena vara i ulua, pani haratu mo lo retimangovi sohen God mo mangovia hinia, enia mo lo tueni na vao kalesia vara la ulua.

<sup>5</sup> Ale, a pa avulahi vara kamim mo isoiso ha eři retireti hin la leo tinatinapua atu sei Tanume Tapu mo lo silea, pani i pa mele řuhu jea vara ha eři retimangovi sohena God mo mangovi kamim hinia. Retimangovi enia mo mele aulu jea na retireti na leo tinapua matea sei Tanume Tapu mo lo silera, i pa mele řuhu jea vara tea i eři posi leo atu matan vara vao kalesia la eři levosahi na řaramina, ale la pa eři ulua matana.

<sup>6</sup> Ale la voraiiku peresi na vevo-raiku, vara a mai isamim, ale a retireti isamim hin te leo tinapua hatea sei Tanume Tapu mo lo silera, i pa tueni kamim sohena sava? Pani vara a lavi te reti hin te hinau God mo

vuhesia isaku, teni te hina lelevosahi, teni te retimangovi matea God mo mangovia isaku, teni te vujangi matea, ale haratu io, i pa tueni kamim. <sup>7</sup> Mo sohena pue tangtangi teni te potikevu matea, mo sopo te mauri hinira, enira sohena, vara tea mo sopo soro tataholoi te vete hinira, hare i pa rongovosahi vete atu mo lo soro hinia? <sup>8</sup> Ale vara tea mo tiv na trumpet, ale roroana mo sopo tataholo, hare i pa tatamahunia hasena mata vuro? <sup>9</sup> Ale mo sohena isamim, vara mememim mo lo retireti na leo matea tea i sopo eři rongovosahia, tea i pa eři levosahi na sava ka lo vereahia sohena sava? Matan ka lo vaore purongo.

<sup>10</sup> Varařuhu, leo tinatinapua la lo toho na varama, ale mo sopo tea vara mo sopo te řaramina. <sup>11</sup> Pani vara na sopo levosahi na řaramin te reti hatea a pa sohena vinano isan haratu mo lo vereahia, ale haratu mo lo retireti enia i pa sohena vinano isaku. <sup>12</sup> Ale matan ka lo opoia jea vara ha lavi te otori isan Tanume Tapu, mo řuhu vara ha usi God matan la haratu sei la eři tueni na vao kalesia tari vara la ulua.

<sup>13</sup> Matan haratu, haratu mo lo retireti na leo tinapua matea Tanume Tapu mo silea isana, mo tataholo vara i ususi vara i eři lavi na suiha mata i vereuli na řaramin la retireti atu. <sup>14</sup> Matan vara na lo ususi na leo tinapua matea Tanume Tapu mo silea isaku, mapuku mo lo ususi usuri na suihan otori atu, pani řomiku mo sopo rongovosahi na sava na lo vereahia.

<sup>15</sup> Vara mo sohen haratu a pa vai na sava? A pa ususi usuri na suihan otori atu na mapuku, ale a pa ususi usuri na sava mo lo toho na řomiku sohena; a pa lalavete usuri na suihan otori atu na mapuku, ale a pa lalavete usuri na reti enau na levosahi na řaramira. <sup>16</sup> Matan vara ko lo haso haso God usuri na suihan otori atu na mapum, sohena sava natu, te tamlohi mo sopo tahisam i eři vere 'amen' vara mo sopo rongovosahi na sava ko lo vereahia na nom vere meje isan God?

<sup>17</sup> Matan korong, nom vere meje mo tataholo purongo, pani i pa sopo efi tueni pa tamlohi atu vara i ulua.

<sup>18</sup> Na vere meje isan God matan enau na lo retireti hin leo atu Tanume Tapu mo silea isaku mo tavera, mo jeu kamim mo isoiso.

<sup>19</sup> Pani na naho vao kalesia, i pa mele řuhu jea vara a vere te reti i lima isara vara la efi rongovosahira matan vara i efi tuenira, mo jeua vara a vere na reti mo tari vaha sangavulu (10,000) na leo tinapua matea la sopo rongovosahia.

<sup>20</sup> La voraiku peresi na vevoraiku, řomřomi nona natuvarihi i sopo toho isamim. Ha pipi mata vai na hehe, pani ha tamlohi na nomim řomřomi.

<sup>21</sup> La ulia na Leu lara,

Moli mo vereea vara:

‘A pa retireti isan noku tamlohi na leo tinatinapua, ale na jingo vinano. Pani isoisona, la pa sopo tapurongo isaku.’

*Isa 28.11-12*

<sup>22</sup> Ale matan reti atu, retireti na leo tinatinapua, enira matamata matea mo sopo nona tamlohi rasua, pani nona tamlohi la sopo rasu. Ale retimangovi sei God mo mangovira enia matamata matea mo sopo nona tamlohi la sopo rasua, pani nona tamlohi la rasua. <sup>23</sup> Ale vara tamlohi kalesia tari la lo pulutahi jara matea, ale la lo retireti na leo tinatinapua Tanume Tapu mo silea isara, ale vara te vinano teni te tamlohi la sopo rasu la unu atu, řa levosahia vara la pa vereea vara kamim ka putu. <sup>24</sup> Pani vara kamim mo isoiso ka lo retimangovi, ale vara te vinano teni te tamlohi mo sopo rasu mo unu atu, i pa levosahia vara enia tamlohi hehe matea matan God i pa pisuhi na hehe na maurina, ale i pa rongovosahia na mapuna vara mo pete tia moiso mata talai non God. <sup>25</sup> Hina luhu na mapuna la mavuhesi, ale i pa jovi popovitoho, ale i pa lotu God i pa vereea vara, “Varařuhu purongo! God mo lo toho na livuhamim.”

*Posposi Tataholo Mata Lotu*

<sup>26</sup> La voraiku peresi na vevoraiku, i pa sohena sava natu? Vara ha pulutahi jara matea, te hatea i pa lavi te vete, te tinapua i vujangi, te tinapua i vereuli te hinau paro God mo vujangia isana, te tinapua i pa retireti na leo tinapua matea Tanume Tapu mo silea isana, ale te tinapua i pa posposi reti atu matan vara vao kalesia la efi levosahia. Hinau tari ka lo vaira, ha pa vaira matan vara tamlohi la pa ulua matara. <sup>27</sup> Vara tea la efi retireti na leo tinapua matea Tanume Tapu mo silea isana, ha sopo tinařihia vara i jeu i rua teni i tolu la retireti, ale te hatea i retireti moiso, ale te tinapua i pa pete retireti, ale te hatea i pa vere na řarami nora retireti. <sup>28</sup> Pani vara mo sopo tea vara i efi posi na nora retireti, la pa sakele malum purongo, ale la retireti isara hasera peresi God.

<sup>29</sup> Ha tinařihia vara te přovet i rua teni i tolu la retireti, ale tatua přovet la pa tapurongo usuri na sava la lo vereea. <sup>30</sup> Vara God i vuhesi te hinau isan te tinapua mo lo sakele atu, haratu mo lo reti tiroma i pa sopo reve na nona retireti i peravu, pani i sile na masapa isana vara i efi retireti. <sup>31</sup> Matan kamim mo isoiso ha efi sile te reti God mo mangovia isamim, matea i retireti moiso ale matea, matan vara kamim mo isoiso ha efi lavi te lelevosahi atu, ale ha ulua na nomim rasua. <sup>32</sup> Ha levosahia vara la haratu la lo vere na retimangovi God mo silea isara, enira la efi hase taurilatira, la sasaovi mata masapa vara la efi retireti hinia, <sup>33</sup> matan God enia mo sopo God mata kojokojohi, mo vono, enia God mata tamata, ale posposi tataholo akerihi sei la lo vaia na vao kalesia mata tapuhi tari non God.

<sup>34</sup> Hařai la pa toho malum na lolo ima lotu, matan mo tapu isara vara la efi retireti ea, ale la pa tapurongo sohena leu mo vereea. <sup>35</sup> Vara la opoia vara la levosahi mamahuni te hinau, la pa usi na tuara hinia na imara, matan mo sopo tataholo vara te hařai i retireti na naho vao kalesia.

<sup>36</sup> Ka řomi vara lelevosahi mata reti non God mo tapulo isamim,

ale ka řomi vara mo isoiso isamim purongo? <sup>37</sup>Vara tea mo lo řomřomia vara enia přovet matea, teni enia mo tapu, enia i pa řomřomi mamahuni na sava na lo ulia isamim vara enira retileu non Moli. <sup>38</sup>Vara tea mo lo kilau purongoi hinau nike, tamlohi atu mo sopo řuhu matan te hinau.

<sup>39</sup>Ale matan hinau tari atu la voraiku peresi na vevoraiku, ha opoia jea vara ha eři vere na retimangovi God mo silea isamim. Ale ha sopo horo na retireti na leo tinapua sei Tanume Tapu mo silera. <sup>40</sup>Pani ha vai na hinau tari usuri na posposi tataholo na malelera tataholo.

## 15

### *Vujangi Mata Sauteterahi Non Křisto*

<sup>1</sup>Ale la voraiku peresi na vevoraiku, na opoia vara ha mele řomřomi pa Retiřuhu sei na lo retivujavujangi kamim hinia sei ka lavia moiso, ale mo tikeli nake, ka pa lo turu řilangi hinia. <sup>2</sup>Ale ka lo juri hinia nake, vara ha lo taurilati řilangi reti atu sei na retivujavujangia isamim, vara i vono, korong nomim rasua enia hina purongo.

<sup>3</sup>Matan na pete sile kamim hin vujangi aulu atu hin la haratu Moli mo lo silera isaku moiso, enia vara Křisto mo mate mata nořa hehe, so-hena Retitapu mo vere, <sup>4</sup>ale usuri na noku vujangi, enia la tavunia, ale na hatolu rani God mo sauteterahia so-hena Retitapu mo vere. <sup>5</sup>Ale hin rani atu enia mo pala isan Peter, moiso isan la nona tamlohi usuri atu tupu sangavulu řomana mo rua. <sup>6</sup>Moiso, mo mele pala isana vao vorai kalesia matea na rani matea, evira mo jeu mo ngav sangavulu lima, (500) vao tavera hinira la pa lo mauri mo tikeli nake, pani tatuara la mate moiso. <sup>7</sup>Ale moiso mo pala isan James, moiso mo pa isana vahařule tari. <sup>8</sup>Hitahu mo pala isaku, mo so-hena vara na sopo vora na noku rani vora tataholo. <sup>9</sup>Matan na nona vao vahařule enau na atano jea, ale mo sopo tataholo vara la toviau vara a

vahařule matea, matan na lo levuti na vao kalesia non God.

<sup>10</sup>Pani řomřuhu non God mo vaiau na mai sava tamlohi nake, ale nona řomřuhu isaku mo sopo vano hina purongo. Mo vono, matan enau na voko řilangi mo jeu na vahařule tari, pani mo sopo enau haseku na lo voko, pani řomřuhu non God sei mo lo toho hiniau. <sup>11</sup>Mo sopo te hinau hinia vara hare natu mo retivujavujangia isamim vara enau teni enira, hina aulu hinia enia mataņ ka rasu na sava kama retivujavujangia isamim.

### *Mele Turu Na Mateia*

<sup>12</sup>Ale ha to vere isaku, mata sava natu, tatuamim la lo vere vara i pa sopo te sauteterahi na mateia? Na lo usia so-hena matan kama lo retivujavujangia vara Křisto mo turu na mateia. <sup>13</sup>Matan, vara i sopo te sauteterahi na mateia, mo vere vara Křisto mo sopo mele turu na mateia. <sup>14</sup>Ale vara Křisto mo sopo turu na mateia, nomam retivujavujangi enira la vano hina purongo, ale nomim rasua mo vano hina purongo. <sup>15</sup>Ale vara so-hena, kamam nona vahařule kama lo retihalu hin God matan kama lo vere vara God mo sauteterahi Křisto na mateia, pani vara reti atu mo varařuhu, mo vere vara God i pa sopo sauteterahi na tamlohi. <sup>16</sup>Matan, vara la haratu la mate la sopo mele turu na mateia, Křisto so-hena mo sopo turu na mateia. <sup>17</sup>Ale vara Křisto mo sopo mele turu na mateia, nomim rasua enia hina purongo, ale kamim ka pa lo toho na nomim hehe. <sup>18</sup>Ale la haratu la mate hin Křisto la tihai jejeu. <sup>19</sup>Vara nořa řomtoho hin Křisto enia mataņ mauri nike nake purongo, tamlohi tinapua la pa řomřomia vara enřa řa rongorongo vono.

<sup>20</sup>Pani mo vono! Enia hina varařuhu matea vara Křisto mo turu na mateia, enia vua tiroma hin la haratu la mate moiso.

<sup>21</sup>Matan sohen mateia mo mai na tamlohi matea, ale mele turu na mateia mo mai na tamlohi matea. <sup>22</sup>Matan hin Adam, tamlohi tari la

mate, ale tamlohi tari hin Křisto la pa mele mauri. <sup>23</sup> Pani usuri na malele tataholo mata sauteterahi, Křisto mo tiroma, moiso la haratu nona na nona mele mai.

<sup>24</sup> Moiso pongi hitahu i pa pala hin rani atu vara Křisto i komo na suiha meresahi tari sei la aulu teni la lo tauri na suiha peresi na řilangi, moiso i pa sile na nona suiha mata aulu na hinau tari isan God Tama. <sup>25</sup> Matan enia i pa tauri na suiha i tikeli rani atu vara mo tau vevuhi na nona meresahi tari na ruhuruhi palona. <sup>26</sup> Isoiso meresahi vara i pa komoa, enia mateia. <sup>27</sup> Matan Retitapu mo vereva vara, 'God mo tau vevuhi na hinau tari vara la pa toho na ruhuruhi palona'.

*Psa 8.6* Reti atu mo vereva vara, 'hinau tari vara la pa toho na ruhuruhi palona' mo memera purongo vara God Tama i pa sopo toho na ruhuruhi. <sup>28</sup> Hin rani atu hinau tari la mai na ruhuruhi Natuna, ale Natun God sohena i pa hase taua i toho na ruhuruhi God Tama sei mo tau na hinau tari na ruhuruhi, ale God i pa aulu na hinau tari na jara tari.

<sup>29</sup> Vara tamlohi la pa sopo turu na mateia, sava natu mo lo toho na řomin la haratu la lo lavi na paptijo matan la haratu la mate moiso? Vara tamlohi la pa sopo turu na mateia, mata sava natu tamlohi la lo lavi na paptijo matara?

<sup>30</sup> Sava natu mo řuhu na nomam vavahinau nike, matan mo lo tau na mateia na nahomam tarea? <sup>31</sup> Matan na lo vere tataholoia isamim la voraiuku peresi na vevoraiku, noku hapahapa hin Křisto enia kamim sei, matan rani mo visa moiso, mariviti a lo mate matamim. <sup>32</sup> Sava hina řuhu i pa malue na noku valum peresi maji jala sei, la tamlohi atu Ephesus, vara i pa sopo te sauteterahi na mateia? Vara mo sopo te sauteterahi, mo řuhu vara řa vaia usuri retireti nike vara, 'Ra vai na hanhani tavera,

ale řa inu, matan pavuho řa pa mate.'

*Isa 22.13*

<sup>33</sup> Ha sopo tinařihia vara tea i halu kamim hin haratu la lo vereva lara, "Posposi nona tamlohi sasati i eři

posi na posposi tataholo nona tamlohi řuhu."

<sup>34</sup> Ha rovo na nomim posposi sasaruhi, ale ha isoiso na hehe, matan tatuamim la sopo levosahi te hinau hin God. Na vereva matan vara a vai kamim ha mahanuhanu.

### *Epe Tuai Peresi Na Epe Paro*

<sup>35</sup> Pani tea i pa usia vara, 'Tamlohi mate la pa mele turu sohena sava? Ale epera la pa sohena sava?'

<sup>36</sup> Kamim tamlohi rongorongo vono! Sava ka lavoia i pa sopo eři mauri vara i sopo mate tiroma. <sup>37</sup> Ale sava ka lavoia, mo sopo enia natu mo mele tuvu, matan enia piri matea purongo, hina purongo vara piri wit teni te piri vipahai tinapua. <sup>38</sup> Ale God mo silea na epena usuri na masalona, ale mo sile na piri hatehateahi na epe tinatinapua. <sup>39</sup> Matan epe tari la sopo sohesohera, pani epe tamlohi enira la sohesohera, epe maji palo vati la tinatinapua, epe maji avuavu mo mele tinapua, ale epe maji tasi mo tinapua.

<sup>40</sup> Epe hinau na tuka la tinapua na epe hinau na varama, pani memera epe na tuka la tinapua, ale memera epe na varama la tinapua. <sup>41</sup> Memera alo enia hinau matea, memera vitu enia mo tinapua, memera vitusarasara la mele tinapua, matan memera vitusarasara matea matea la tinatinapua.

<sup>42</sup> Ale mo sohena natu na sauteterahi nona mateia. Sava la tavunia enia i pa řovo, sava mo mele turu enia i sopo eři řovo. <sup>43</sup> Sava la tavunia enia hina purongo, ale sava mo turu enia mo řuhuruhi jea. Sava la tavunia enia mo talekoleko, ale sava mo turu enia mo řilangi. <sup>44</sup> Sava la tavunia enia epe mata varama, ale sava mo turu enia epe matan na tuka. Vara epe matea matan varama nike, i pa epe matea matan na tuka.

<sup>45</sup> Sohen la ulia lara, 'Tamlohi tiroma atu Adam mo mai tamlohi mo lo mauri'. *Gen 2.7* Harua Adam atu mo pa mai hitahu, enia mo sile na mauri mata Tanumen God. <sup>46</sup> Sava mo mai tiroma, mo sopo haratu

matan na tuka, pani haratu mata varama, haratu matan na tuka mo pa usuria hitahu. <sup>47</sup> Tamlohi tiroma, enia mo tai na varama, mo malue na lepa, pani harua tamlohi enia mo tai na tuka. <sup>48</sup> Tamlohi tari na varama la lavi na epe varama sohen Adam, pani epeŕa matan na tuka i pa sohen epen Kŕisto. <sup>49</sup> Nake ŕa sohen Adam, tamlohi mata varama, ale hitahu ŕa pa sohen Kŕisto sei mo tai na tuka.

<sup>50</sup> La voraiuku peresi na vevoraiku, na vereia isamim, vara epe peresi na ŕae matan varama nike la pa sopo eŕi unu hin mauri atu na tuka, teni haratu i pa ŕovo i pa sopo eŕi unu hin mauri atu i sopo eŕi ŕovo.

<sup>51</sup> Ha tapurongo, a pa vere kamim na hina luhu matea. Enŕa mo isoiso ŕa pa sopo mate, pani enŕa mo isoiso ŕa pa posi, <sup>52</sup> vahatea purongo na isoiso roroa trumpet non God. Matan roroan trumpet atu i pa roroa, ale la haratu la mate la pa turu la sopo eŕi mele ŕovo. Enŕa mo isoiso ŕa pa posi. <sup>53</sup> Matan epe mata ŕovo nike, i pa ru epe atu i sopo eŕi ŕovo, ale epe mata mate nike, i pa ru na epe i sopo eŕi mate.

<sup>54</sup> Hin rani atu vara hinau mata ŕovo mo ru na hinau i sopo eŕi ŕovo, ale epe mata mate i ru na epe i sopo eŕi mate, ha pa levosahia vara sava la ulia tuai moiso i pa masese natu vara, ‘Suiha mata mauri mo ŕolomi na mateia.’ *Isa 25.8*

<sup>55</sup> ‘Eh mateia! Suiham enia epu? Eh mateia! Suiham mata sile na rongohaji enia epu?’ *Hos 13.14*

<sup>56</sup> Suiha mata sile na rongohaji non mateia enia hehe, ale suiha mata hehe enia leu non God. <sup>57</sup> Pani ŕa vere meje isan God sei mo lo sileŕa na suiha matan vara ŕa jeu na noŕa meresahi tari hin noŕa Moli Iesu Kŕisto.

<sup>58</sup> Matan hinau sei, la voraiuku kalesia ŕuhuŕuhu, ha turu ŕilangi, ale ha sopo hisuhisu, tarea ha vai na vavahinau non Moli matan ka levosahia vara hin Moli nomim vavahinau i sopo eŕi vano hina purongo.

## 16

### *Silesilea Mata Kalesia Jerusalem*

<sup>1</sup> Ale usuri na hinau na nomim leta mata silesilea mata mania nona tapuhi, sava na vereia isana mara Galatia, kamim sohen, ha pa vaia sohera. <sup>2</sup> Na tiroma rani na wik hatehateahi, kamim hatehateahi ha pa tauhasehi te mania na volimim, ale ha tau mamahunia, sohen ka hitea mo tataholo isamim, matan vara hin pongi atu vara a mai isamim, ka pete tatamahunia moiso vara a lavia. <sup>3</sup> Ale hin rani atu vara a pala, a pa ŕule la haratu ka viŕonira moiso peresi na leta vara i vereulia vara enira la tai epu peresi na nomim silesilea i sivo Jerusalem. <sup>4</sup> Vara ka hitea vara mo tataholo vara a sivo peresira, mo lo ŕuhu purongo, la pa usuriau.

### *Romromi Mata Rorohi Corinth*

<sup>5</sup> A pa rohi kamim vara a hahau roto Macedonia, matan na lo ŕomŕomia vara a pa hahau roto Macedonia. <sup>6</sup> Korong a pa toho isamim makomona, vara i vono, a pa toho isamim na pongi hamariri, matan vara ha eŕi tueniau na maleleku na sava jara vara a vano ea. <sup>7</sup> Matan na sopo opoia vara a hite kamim mata makomo rani purongo. Na lo ŕomtoho vara a pa toho peresi kamim i peravu makomona vara Moli mo avulahi. <sup>8</sup> Pani a pa toho Ephesus i tikeli na pongin Pentecost, <sup>9</sup> matan masapa mata vavahinau matea mo roi isaku vara a eŕi vai te vavahinau non Moli nike, ale noku meresahi enira matuvana.

<sup>10</sup> Vara Timothy i mai isamim, ha kilau mamahunia, enia mo lo vai na vavahinau non Moli soheku. <sup>11</sup> Ha sopo tinaŕihia vara tea i hitelehihia. Ha ŕulea na malelena peresi na nomim leŕuhu vara i mai isaku. Na lo kilau vara a pa hitea peresi na tatua vorai kalesia tinapua i sopo tuai.

<sup>12</sup> Ale voraiŕa atu Apollos, na lo usia ŕilangi isana vara i rohi kamim tolu na voraiŕa kalesia tinapua nike. Pani mo sopo opoia vara i mai nake, i pa mai hitahu vara i hite te masapana.

<sup>13</sup> Ha lo kilau, ha lo turu řilangi na rasua, ha řomřilangi, ha řilarřilangi.

<sup>14</sup> Na hinau tari ka lo vaira, ha vaira na opoia.

<sup>15</sup> Ka levosahi Stephanas peresi na vao imana enira la mai kalesia tiroma nike Greece, ale la sile na maurira matan vara la vavahinau la tueni na kalesia tinapua. Na lo usia řilangi isamim la voraiku peresi na vevoraiku, <sup>16</sup> vara ha sile na ololo isara peresi la haratu sei mapura la lo toho na nora vavahinau sohera. <sup>17</sup> Na lo avulahi tavera na mai non tahisamim Stephanas, Fortunatus peresi Achaicas, matan enira la lavi na jaramim nike peresiau.

<sup>18</sup> Matan la vai na řomiku mo mele řuhu sohen la lo vaia na maurimim. Ha sile na ololo isana tamlohi sohen harihi.

#### *Isoiso Retioloolo Non Paul*

<sup>19</sup> Vao kalesia nike Asia, la sohai na nora retioloolo isamim. Aquila enia Priscilla peresi na vao kalesia na imara la sohai na retioloolo řuhuřuhu isamim hin Moli. <sup>20</sup> La vorai kalesia tari nike, la sohai na nora retioloolo isamim. Ha tapatapai kamim hatehateahi na posposi tataholo nona tapuhi non God.

<sup>21</sup> Enau Paul na uli la retioloolo nike na limaku. <sup>22</sup> Vara tea mo sopo te opoia non Moli isana, lesati i pa toho isana. Nořa Moli, o mai. <sup>23</sup> Romřuhu non Moli Iesu i pa toho isamim. <sup>24</sup> Noku opoia i pa toho isamim mo isoiso, hin Křisto Iesu. Amen.



## 2 Corinthians

### Harua Leta

### Paul Mo Ulia Isana Mara

### Corinth

### Leta Nike

Paul mo řarami na retiusia nona kalesia Corinth, vara Paul i pa pala sohen mo vereia isara moiso teni mo vono. Mo sopo opoia vara i rohira matan mo levosahia vara i pa arira mata nora hehe (1.23). Paul mo opoia vara i sile na masapa isara vara i eři hitea vara la pa hahau usuri na mauri rasua sohena sava (2.5-11).

Paul mo vereia isara mara posin God mo řuhu isan la haratu la vejeju, ale mo lo kilau vara la pa tueni na kalesia la tilavono Jerusalem peresi Judea (8.1-9.15).

Paul mo vereia mara enia volitusi mata retitauhi paro non God (3.1-17). Mo lo turu řilangi mata lavi na tamlohi la mai isan God, hina purongo vara mo lo lavi na rani řilangi matana. (4.1-6.13; 10.1-12.10).

'La hinau tari nike la tai isan God sei mo sara tamata peresi na tamlohi na varama hin Křisto, ale enia natu mo sile kamam na vavahinau mata tau na tamata.

Matan řa eři vereia vara hin Křisto, God mo sari tamata non varama vara i mele tapala peresia. Mo sopo mele evi na hehe nona tamlohi, ale mo sile kamam na retisohai mata sari tamata.' (5.18-19)

#### Hin Leta Nike

1. Paul mo vere meje isan God (1.1-11)
2. Vavahinau nona vahařule non God (1.12-2.17)
3. Opoia non Křisto mo haloa (3.1-7.16)
4. Otori nona tilavono (8.1-9.15)
5. Vahařule varařuhu (10.1-13.10)
6. Isoiso Retioloolo (13.11-13)

#### Retioloolo Non Paul

<sup>1</sup> Enau Paul na uli leta nike peresi voraiřa Timothy, enau vahařule non Křisto Iesu matea usuri na masalon God. Kama lo uliuli mo vano isana vao kalesia non God Corinth peresi

na tapuhi sei la lo toho řalihi na jara tavera matan Achaia. <sup>2</sup> Romřuhu peresi na tamata la mai isamim la tai isan God Tamařa peresi Moli Iesu Křisto.

#### God Mo Tahe Na Romi Nona Tamlohi

<sup>3</sup> Hasohaso tavera i vano isan God sei Taman nořa Moli Iesu Křisto, enia God mo lo řomopoi na tamlohi, ale God mata tahe la haratu řomira la jovi. <sup>4</sup> Enia mo lo tahe na řomimam na nomam rani řilangi tari matan vara kama eři tahe na řomin tinapua na nora rani řilangi hin nanauhi sei God mo silea isamam. <sup>5</sup> Ale sohena kamam kama lo lavi na rani řilangi matuvana matan Křisto, ale hin Křisto sohena nomam nanauhi mo mařivi savulevule. <sup>6</sup> Pani vara kama lo lavi na mauri řilangi, ka levosahia vara kama lavira mata i tahe na řomimim ale mata maurimim la juri; ale vara God mo tahe na řomimam, enia matan vara kama eři tahe na řomimim na nomim rani řilangi. Ale matana, ha eři řom peravu ha turu řilangi na rani řilangi sei sohen kama lo lavira. <sup>7</sup> Kama levosahi mamahunia vara ka lavi na rani řilangi peresi kamam, God i pa tahe na řomimim sohen mo lo vaia isamam.

<sup>8</sup> Matan, la vorai peresi na vevorai, kama opoia vara ha levosahi mamahuni na rani řilangi sei kama lavira na jara tavera matan Asia. La lo puhoni kamam la jeu na suihamam tari, ale kama řom vara kama pa mate. <sup>9</sup> Varařuhu, kama řom vara talai mata mateia mo jovi isamam moiso hin la rani řilangi atu, ale matana, kama sopo mele rasu na suihamam pani kama tau na nomam rasua hin God sei mo sauteterahi la haratu la mate. <sup>10</sup> God mo sau nařihi kamam na liman mateia, ale i pa juri kamam, ale kama tau na nomam řomtoho isana vara i pa mele juri kamam. <sup>11</sup> Kamim sohena, ha pa tueni kamam na nomim usiusi matamam, ale vuana, tamlohi matuvana la pa vere meje isan God matamam matan enia mo juri kamam na usiusi nona tamlohi matuvana.

*Paul Mo Posi Na Romina*

<sup>12</sup> Kama lo retihapahapa sohena matan kama efi vere tataholoia vara romimam la sopo pisuhi kamam hin te nomam vavahinau mo sati kama lo vaira na naho tamlohi tari teni isamim. Kamam kama lo turu na romfuhu non God, mo sopo na lelevosahi nona tamlohi, kama romatano kama lo hahau sohena natirihi na naho tamlohi, ale kama lo vaia nike isamim mo jeu na jara tinatinapua. <sup>13</sup> Matan kama lo uli na sava mo lo toho na romimam hin leta nike matan vara ha efi levosahi mamahunia, ale na lo romtau vara ha pa levosahi mamahuni kamam, <sup>14</sup> hina purongo vara nake ka sopo lo levosahi mamahuni kamam. Hin rani atu vara nofa Moli Iesu i mele pala, kamim ha pa hapahapa matamam sohen nake kamam kama lo hapahapa matamim.

<sup>15</sup> Ale matan na levosahi hinau atu, na lo vere isamim tiroma vara a pa rohi kamim mata a sile na lefuhu vaha rua isamim vara a toho peresi kamim. <sup>16</sup> Hin rani atu na romi vara a pa toho peresi kamim na maleleku na lo vano Macedonia, ale vara a lo mele mule ha pa tueniau na maleleku vara a sivo Judea.

<sup>17</sup> Korong ka romromia vara na posi na romiku vara a pa rohi kamim matan na sopo mele pala isamim sohen na vere moiso. Korong kara na lo halu sohena tamlohi varama sei lara "io" pani farami nora retireti tataholo enia "mo vono". <sup>18</sup> Sohen God mo lo varafuhu tarea, nomam retisohai isamim mo sopo "io" ale hitahu "mo vono". <sup>19</sup> Matan Natun God, Iesu Křisto, haratu sei enau, Silas peresi Timothy, kama lo retivujavujangia isamim enia mo sopo "io" ale hitahu "mo vono", pani hin Iesu enia "io" tarea. <sup>20</sup> Matan retitauhi tari non God hin Iesu enira mo isoiso "io", ale matan haratu natu řa lo vere "amen" na rani řa lo hasohaso God hin Křisto. <sup>21</sup> Pani God natu mo vai kamam kama řilangi peresi kamim na rasua hin Křisto, ale enia natu mo viřoniřa mata nona vavahinau, <sup>22</sup> ale enia mo tapuhiřa, ale mo tau na Tanumena na mapuřa mo sohena

vara mo tau na sope voliřa tiroma na hinau tari la pa mai hitahu.

<sup>23</sup> Ale na nahon God, na sopo halu, na sopo mele mai isamim Corinth matan na sopo opoia vara a vere komokomo kamim. <sup>24</sup> Na sopo opoia vara kama aulu na nomim rasua, pani vara kama tapala peresi kamim na vavahinau matan vara nomim avulahi i pa mařivi na nomim turu řilangi na nomim rasua.

## 2

<sup>1</sup> Ale mo vaia na tau na romiku vara a pa sopo rohi kamim ale ha mele rongo i sati matana. <sup>2</sup> Matan, vara a vai kamim ha rongo i sati, hare natu i pa vaiu a avulahi pani la haratu sei na lo vaira la rongo mo sati? <sup>3</sup> Ale na uli hinau akerihi isamim matan vara a mai, a pa sopo rongo i sati hin la haratu sei mo tataholo vara la vai na noku avulahi i tavera jea. Ka sopo levosahia vara noku avulahi mo lo turu na nomim avulahi? <sup>4</sup> Na rongo mo sati hajavua hin rani atu na uli leta atu isamim, romiku mo jovi tavera ale na tangi matana. Na sopo opoia vara a vai kamim ha rom sasati, pani na opoia vara ha levosahia sohena sava na lo opoi kamim.

*God Mo Romi Na Tamlohi Hehe*

<sup>5</sup> Vara tamlohi atu mo vaiu na rongo mo sati, mo sopo vaiu haseku vara a rongo i sati, pani na malele tinapua mo vai kamim mo isoiso ka rongo mo sati. <sup>6</sup> Enia mo lavi na rani řilangi tavera mata talai atu sei ka lo silea isana moiso hin rani atu kamim mo isoiso ka pulutahi jara matea mata aria. <sup>7</sup> Ale nake mo tataholo vara ha romia, ale ha mele tahe na romina, vara i vono, romina i pa sati jea ale i jovi nařihi na nona rasua vevuhi. <sup>8</sup> Ale nakerihi, i pa řuhu jea vara ha vujangia vara ka pa lo opoia.

<sup>9</sup> Hin rani atu na lo uliuli sohena isamim matan vara a pa hitea vara ha pa ooloo hiniau i tikeli epu. <sup>10</sup> Vara ha romi tamlohi akerihi hin te hinau, enau sohena a pa romia vara te hinau mata romia mo lo toho mo tikeli nake, ale na vaia na suihan Křisto

matamim, <sup>11</sup> matan vara Setan i pa sopo jeuŕa, matan enŕa řa levosahi mamahuni na malelen Setan.

#### *Volitusi Mata Retitauhi Paro*

<sup>12</sup> Hin rani atu nara na pala Troas vara a retivujavujangi na Retiřuhu hin Křisto, hina purongo vara Moli mo sileau na masapa tavera matea, <sup>13</sup> řomiku mo sopo sakele matan na sopo lo hite voraiķu Titus ea matan vara i vereau vara kamim ka lo toho sohena sava. Ale matana, na enŕa vuho isara Troas ale na malue na vano Macedonia.

#### *Vavahinai Nona Vahařule*

<sup>14</sup> Pani řa vere meje tavera isan God sei hin Křisto, mo lo tiromařa řa lo jeu na nořa meresahi tarea. Ale na sava jara řa lo vano hinira, enia mo vaiřa řa lo vere na tinapua hin Moli, ale řa lo sohai na Retiřuhu sohena hasori ponaha řuhu matea. <sup>15</sup> Matan enŕa řa hasori ponaha řuhu non Křisto isan God isan la haratu sei God mo lo jurira, ale isan la haratu sei la pa tihai – <sup>16</sup> enŕa hasori ponaha ranga matea mata i sile na mate isara, pani isan vao atu la rasua enŕa hasori ponaha řuhu matea mata i sile na mauri. Ale hare natu mo tataholo mata i vai la vavahinai nike? <sup>17</sup> Matan kamam kama sopo sohen la vao tamlohi vujangi tinapua sei la lo vere na reti non God na nora halu mata lavi na mania. Mo vono, kamam kama lo retivujavujangi na retisohai non God mo sopo te halu hinia na nahon God, ale peresi na suihin Křisto usuri na posposi tataholo nona vahařule non God.

### 3

<sup>1</sup> Ka řomi vara kama lo mele tapulo tahe kamam hasemam teni mo vono? Korong ka lo řomřomia vara kama pa lavi te leta isamim teni i mai isamim vara i vereau vara kamam sava tamlohi, sohena tamlohi tinapua la lo lavira matan tamlohi la sopo levosahira? <sup>2</sup> Kamim ka nomam leta sei God mo ulia na mapumam, tamlohi tari la levosahia ale la eři evia, <sup>3</sup> mo vujangia vara kamim ka leta matea non Křisto sei kamam kama lo lavia

mo mai isana, tea mo sopo ulia na pepa na limara pani Tanumen God sei mo mauri mo ulia, mo sopo sohena leu mo ulia na tavalu vatu, pani na mapu tamlohi.

<sup>4</sup> Kama levosahi mamahuni la hinai nike nomam rasua hin God hin Křisto mo tavera. <sup>5</sup> Enia mo sopo vara kama řomřomia vara kama eři vai te hinai kamam hasemam, pani nomam eři eři mo tai isan God, <sup>6</sup> sei mo vaiřa řa tataholo mata eři vai na vavahinai non retitauhi paro mata mauri sei mo sopo usuri na leu la ulia na pepa, pani na Tanumena, matan leu mo sile na mateia, pani Tanumena mo sile na mauri.

#### *Ruhuřuhu Retitauhi Paro*

<sup>7</sup> Pani, vara vavahinai atu tuai mata leu la ulia na tavalu vatu mo sile na mateia, hina purongo mo pala peresi na mera tavera ale mo vaia tavitavin Israel atu la sopo eři kilau tataholo na nahon Moses mata meran God mo mera na nahona pani mera atu mo lo majara, <sup>8</sup> řa levosahi mamahunia vara mera vavahinai non Tanumena i pa mele řuhu jea! <sup>9</sup> Matan, vara mera řuhuřuhu mo lo toho hin retitauhi tuai atu mata leu sei mo sile na talai, řa levosahia vara retitauhi paro sei mo lo vai na tamlohi la tataholo na nahon God mo mele řuhu jea. <sup>10</sup> Varařuhu, sava retitauhi tuai mata leu mo vereau vara mo mera mo řuhu tiroma, nake mo sopo mele mera i řuhu matan retitauhi paro mo pete lavi na jarana moiso, ale mo mera mo řuhuřuhu jea. <sup>11</sup> Matan, vara sava mo lo majara tiroma mo mai peresi na mera řuhuřuhu, meran retitauhi paro i pa toho jejeu i pa mele řuhuřuhu jea.

<sup>12</sup> Ale matan retitauhi paro nike mo vai na řomiřa mo řilangi, mo sopo te matahu na nomam vavahinai, <sup>13</sup> ale mo sopo sohen Moses sei tuai mo lo ropoi na nahona na tavalu ruru matea matan vara tavitavin Israel la sopo eři varoi mera atu mo lo majara na nahona.

*Exo 34.30-35*

<sup>14</sup> Pani řomira mo pelati, ale mo kakau nake, tavalu ruru atu mo pa lo toho vara la rongu tea mo evi

retitauhi tuai atu. Tea i sopo eři lavi nařihia hasena matan hin Křisto hasena tavalu ruru atu i eři malue. <sup>15</sup> Pani řomira mo pa lo pelati mo kakau nake vara la tapurongo na sava Moses mo ulia tuai, tavalu ruru atu mo pa lo ropoi na řomira.

<sup>16</sup> Pani vara tea mo posi mo mai isan Moli, Moli mo lanařihi tavalu ruru atu. <sup>17</sup> Ale Moli enia Tanumen God, ale na sava jara Tanumen Moli mo lo toho hinia, tamlohi la pa materi. <sup>18</sup> Ale enřa mo isoiso nahořa mo lo toho na jara tavera, ale la mera na meran Moli, ale mo lo posiřa řa mai sohena na merana makomakomona na suihan Moli sei enia Tanumen God.

#### 4

##### *Hina Ruhuru Na Lolořa*

<sup>1</sup> Matan haratu, matan kama lavi vavahinau nike usuri na řomopoia non God, řomimam la sopo eři jovi. <sup>2</sup> Pani kama řohu na hina luhu mata mahanuhanu, ale kama sopo vaihitea vara kama halu tea teni kama sopo posileji na reti non God. Pani kama lo retivujavujangi na retivaruru na jara tavera matan vara tamlohi la pa hitevosahia vara kama lo varuru na nahon God. <sup>3</sup> Pani hina purongo vara God mo tavuhoro na nořa Retiruru, mo tavuhoro purongo isan la haratu sei la pa tihai sei, <sup>4</sup> Setan, god matan varama nike, mo vusohi na řomin la haratu sei la sopo rasu, ale la pa sopo eři hitevosahi na meran Retiruru sei non Křisto — enia niniun God tataholo.

<sup>5</sup> Kama sopo retivujavujangi hin kamam hasemam, pani hin Iesu Křisto sei enia Moli, ale kama vereva vara kamam nomim slev mata sava Iesu mo vaia matamam. <sup>6</sup> Matan God sei mo vereva mara, 'Malarani i mera na řořoha.' *Gen 1.3* enia haratu sei mo lo mera na mapuřa matan vara i sileřa na mera mata lelevosahi řuhuru non God řa hitea na maurin Iesu Křisto.

##### *Hasohaso Tavera Mo Lo Mai*

<sup>7</sup> Pani kama lo lavi la hina řuhuru nike na jilivi lepa purongo,

matan vara suiha tavera sei tamlohi la eři hitea mo lo malue hin kamam mo sopo nomam pani non God hasena.

<sup>8</sup> Kama lo lavi na rani řilangi na malele tari, pani la sopo lomolomo kamam. Kama sopo levosahia vara kama pa vai na sava, pani kama sopo hilu atu, <sup>9</sup> la tipahi kamam, pani God mo sopo rovo hin kamam, la vili sati kamam, pani kama mele turu. <sup>10</sup> Kama lo lavi na rani řilangi tarea na epemam hin mauri nike, ale la lo lavi na řungara mata mateia non Iesu matan vara tamlohi la pa eři hite na maurin Iesu na epemam.

<sup>11</sup> Varuru kama lo toho tarea na mataru mateia matan kama lo volitusi isan Iesu matan vara maurin Iesu i pa mera na jara tavera na epemam sei mata mate. <sup>12</sup> Matana, kama lo nahoi na mateia, pani vuana enia nomim mauri tui tui.

<sup>13</sup> Pani kama pa lo retivujavujangi matan nomam rasua mo tataholo na sava la ulia na psalm mara, 'Na rasua, ale matana, na pa retireti.'

##### *Psa 116.10*

Ale kamam sohena, kama rasua, ale matana, kama pa retireti.

<sup>14</sup> Kama pa vaia sohena matan kama levosahia vara God sei mo sauteterahi Iesu, i pa lavi kamam peresi kamim řa turu na nahona. <sup>15</sup> Hina řilangi kama lo lavira na maurimam nake enira mata la tueni kamim. Ale sohen řomuru non God mo lo lavi na tamlohi matuvana la lo mai isan Křisto, tamlohi la pa mele hasohaso God i tavera jea.

<sup>16</sup> Enia matan haratu natu mo vaia kama sopo hilu taleu. Hina purongo vara suiha epemam mo lo majara, pani maurimam la lo ulua na rani hatehateahi. <sup>17</sup> Hina purongo vara řa hite na nořa rani řilangi matan nake sohena hina tavera, pani enira la varihi purongo matan enira mata makomo rani purongo. Ra levosahia vara nořa rani řilangi nake la pa sileřa na hasohaso tavera sei i pa toho jejeu hin mauri atu mo lo mai. <sup>18</sup> Ale řa sopo řomřomi na nořa rani řilangi matan nake, mo vono, pani řa

lo kilau toho mata hinau řa sopo eři hitera. Matan sava sei řa eři hitera, enira la pa toho mata makomo rani purongo, pani sava řa sopo eři hitera la pa toho jejeu.

## 5

### *Epe Paro Matan Tui Tui*

<sup>1</sup> Matan řa levosahia vara epeřa nike na varama řa lo toho hinia mo řovo – vara řa mate řa pa malue hinia – řa levosahia vara jarařa matea mo lo toho na tuka na epe matea matan tui tui sei tamlohi la sopo voroa na limara, pani God hasena mo vaia matařa. <sup>2</sup> Ra lo malokoloko hin epeřa nike nake, ale řa lo kilau toho matan rani atu sei God i pa ru na epe matan tuka hiniřa sohena ruru paro. <sup>3</sup> Matan řa pa sopo toho sohena tanume mo sopo te epera, pani řa pa ru na epe paro matan tuka. <sup>4</sup> Epeřa nike nake la lo mate, la vaiřa řa rongohaji ale la puhoniřa, pani mo sopo matan vara řa opoia vara řa mate ale řa sopo lavi te epe hatea. Ra opoia vara řa unu na epeřa paro matan vara mauri tui atu i řolomi epeřa tuai nike. <sup>5</sup> God hasena mo tatamahuniřa matan la hinau akerihi, ale mo sileřa na Tanumena sohena sope voliřa tiroma na hinau tari i pa silera hitahu.

<sup>6</sup> Ale matana, tarea řa lo řomřilangi, hina purongo vara řa levosahia vara řa lo toho nike na varama na epeřa nakerihi, řa sopo lo toho peresi Moli, <sup>7</sup> matan nake, řa lo mauri na rasua, mo sopo na sava řa lo hitera. <sup>8</sup> Varařuhu řa řomřilangi, ale řa levosahia vara i pa mele řuhu vara řa eři malue hin la epe nike matan vara řa pa toho na jarařa na tuka peresi Moli. <sup>9</sup> Hina purongo vara řa lo mauri hin epe nike teni vara řa mate řa malue hinia, řa lo tau na řomiřa hinia mata i lo vai Moli i avulahi tarea. <sup>10</sup> Matana enřa tari řa pa turu na nahon Křisto na nona jara sakele mata aria vara i ariřa. Ra pa lavi na sava mo tataholo isana usuri na sava řa vaia mo řuhu teni mo sati hin epeřa nike na varama.

### *Vahařule Non Retitauhi Paro*

<sup>11</sup> Matan kama levosahi matahu tavera akerihi mata aria non Křisto, enia mo vai kamam kama voko řilangi vara kama reve na tinapua isana. God mo levosahia vara kama lo varařuhu, ale na lo řomtoho vara kamim sohena ka levosahia. <sup>12</sup> Kamam kama sopo mele vaihitea vara kama hase tahe kamam, mo vono. Kama lo vere kamim hin la hinau nike matan vara ha eři hapahapa hin kamam, ale matan vara ha eři řarami la tamlohi vujangi haluhalu atu sei la lo reti mangisi na nora vavahinau purongo, pani la sopo vere varařuhu vara enira la sava tamlohi. <sup>13</sup> Matan vara tea la hitea vara kama rongorongono vono, enia matan vara kama pa sile na hasohaso isan God hinira. Ale vara kama lo vai na hinau tataholo, enia matan vara i tueni kamim. <sup>14</sup> Matan opoia non Křisto mo lo halo kamam, matan kama levosahi mamahunia vara Křisto mo mate mata tamlohi tari: ale matan hinia tamlohi tari la mate. <sup>15</sup> Ale enia mo mate mata tamlohi tari matan vara la haratu la lo mauri la pa sopo mauri nora hasera, pani la pa mauri non haratu sei mo mate matara, ale God mo sauteterahia na mateia.

<sup>16</sup> Matan haratu nake, kama sopo mele kilau na tamlohi usuri na řom tamlohi. Tuai na lo řomřomia sohena hin Křisto vara enia tamlohi matea purongo. Pani nake noku kilakilau mo sopo mele sohena. <sup>17</sup> Mo řaramia vara la haratu la mai kalesia hin Křisto la mai tamlohi paro. La sopo mele sohen tuai, matan mauri tuai mo tihai, ale mauri paro mo tapulo moiso.

<sup>18</sup> La hinau tari nike la tai isan God sei mo sari tamata peresi na tamlohi na varama hin Křisto, ale enia natu mo sile kamam na vavahinau mata tau na tamata. <sup>19</sup> Matan řa eři vere vara hin Křisto, God mo sari tamata non varama vara i mele tapala perezia. Mo sopo mele evi na hehe nona tamlohi, ale mo sile kamam na retisohai mata sari tamata. <sup>20</sup> Matan haratu, kamam kama vahařule non Křisto, ale hin kamam, God mo lo usi kamim řilangi sohen Křisto hasena

mo lo usia vara ha sari tamata peresi God! <sup>21</sup> Matan God mo vai Křisto sei mo sopo hehe hin te rani, mo mai nořa malamalai mata hehe, matan vara hinia, řa pa eři mai řa tataholo na nahon God.

## 6

<sup>1</sup> Ale matan enřa řa tapala na vavahinau non Moli, kama lo usi kamim mo řilangi vara ha sopo řomřomi purongo na retisohai řuhuřuhu mata řomřuhu non God.

<sup>2</sup> Matan God mo vereea mara, 'Na ranina tataholo na rongoho, Na rani mata juri na tueniho.' *Isa*

*49.8*

Varařuhu, God mo lo tatamahu mata i tueni kamim nakerihi. Nakerihi enia rani mata juri.

### *Rani Rilangi Non Paul*

<sup>3</sup> Kama sopo sile na masapa vara tea i pa řohu hin Moli na sava kama lo vaia, matan vara tea i sopo eři hite te hina sati na nomam vavahinau.

<sup>4</sup> Matan hinau tari kamam vahařule kama lo vaira, kama vaihitea vara tamlohi la hitea vara varařuhu kamam vahařule varařuhu non God. Kama lo řomperavu tarea na rongohaji peresi na rani řilangi peresi na rani sasati tinatinapua, <sup>5</sup> ale na rani tamlohi la tamaji kamam, teni vara la pulahi kamam na lolo ima řilangi, teni vara vao tamlohi la meresahi hin kamam, teni vara kama voko mate, ale kama kilau rani vaha visa, ale kama marohati. <sup>6</sup> Kama lo hahau na posposi vokevoke, kama lo vujangi na nomam lelevosahi hin Křisto, ale na nomam řomperavu, na nomam řomřuhu, na nomam opoia varařuhu, ale na suihan Tanume Tapu. <sup>7</sup> Kama lo turu řilangi na retivujavujangi mata retivarařuhu. Suihan God mo lo voko hin kamam. Nomam posposi tataholo mo sohena sita vuro matea mata i taijovjovi na hehe na matua limamam, ale tingting matea mata i turuhoro na meresahi na marau limamam. <sup>8</sup> Kama lo volitusi isan God, hina purongo vara tamlohi la sile na ololo isamam teni vara la řohu hin kamam, hina purongo vara la vereřesřesi kamam

teni la hasohaso kamam. Kama lo varařuhu, pani hai la vereea lara kama tamlohi halu! <sup>9</sup> Tamlohi la levosahi mamahuni kamam, pani la vai kamam sohena la sopo levosahi kamam. Kama lo toho na matarua mateia, pani ka hitea kama pa lo mauri nahai! La hamaji komokomo kamam pani kama sopo mate, <sup>10</sup> ale řomimam la sati, pani kama avulahi, kama sohena tilavono, pani kama vai na mauri tamlohi matuvana la mele řuhu jea, ale sohena mo sopo te nomam hinahinau, pani hinau tari enira nomam.

<sup>11</sup> La tapala řuhuřuhu matan Corinth, kama lo retireti tataholo peresi kamim, kama avulahi tarea mata kama tueni kamim. <sup>12</sup> Mo sopo te hinau i turuhoro na nomam opoia isamim, pani matan kamim purongo ka horo na nomim opoia isamam. <sup>13</sup> Ale řa levosahia vara na lo retireti isamim na opoia sohena natuku tataholo, ale kamim sohena, ha avulahi vara řa mele tapala.

### *Temple Non God Mo Mauri*

<sup>14</sup> Ha sopo turu jara matea na vavahinau non la haratu la sopo usuri na mauri rasua, matan i pa sohena sava vara tea i vai na posposi tataholo i eři tapala peresi la haratu la lo tope na leu? Teni sohena sava natu malarani i eři tapala peresi na řořoha? <sup>15</sup> Křisto enia Tiapolo la eři turu jara matea hin te hinau teni mo vono? Ka levosahia vara la haratu la rasu God la lo lotua, pani la haratu la sopo rasua la lo lotulotu vono. <sup>16</sup> Ale sohena sava natu hinau mata lotulotu vono i eři turu jara matea na lolo Temple non God? Matan enřa řa temple non God sei mo lo mauri, mo sohen God mo retitauhi hinira moiso mara,

'A pa toho hinira

ale a pa lo hahau na livuhara.

Enau a pa nora God,

ale enira la pa noku tamlohi.'

*Lev 26.12; Ezek 37.27*

<sup>17</sup> 'Matana, ha malue hinira

ale ha turu hasemim hinira,

Moli mo vereea.

Ha sopo tikeli na nora hina lumiha,  
ale a pa avulahi hin kamim.'

*Isa 52.11; Ezek 20.34*

18 'A pa Tamamim,  
ale kamim ha pa natuku,  
peresi na venatuku,  
Moli God Suiha mo vereā.' *2 Sam 7.14*

## 7

1 La tapala řuhuru, matan řa lavi la retitauhi nike, řa tau nařihi na posposi tari sei la eři vai na epeřa peresi na mauriřa la lumiha, matan vara řa eři lavi mauri atu mo tapu matan řa lo lotu God na nořa matahu.

*Paul Mo Avulahi*

2 Ha avulahi vara řa mele tapala! Kama sopo vai te hinau i sati isan tea, kama sopo tikauleji tea, kama sopo haluhalu tea. 3 Na sopo vere harihi matan vara i vai na řomimim i sati, matan na pete vereā isamim moiso vara kamim ka lo toho na mapumam, ale vara řa mate jara matea, řa pa mauri jara matea. 4 Enau na rasu kamim, ale noku hapahapa matamim mo tavera jea. Ka tahe na řomiku, ale ka vaiā na avulahi hina purongo na nomam rani řilangi nake.

5 Na rani kama kakau Macedonia, kama sopo mapu matan řalihi hin kamam rani řilangi la lo mai na jara tari, ale na lolomam, matahu mo lo malue matana. 6 Pani God atu sei mo lo tahe na řomin la řaratu řomira la jovi mo tahe na řomimam na rani Titus mo pala. 7 Kama sopo avulahi purongo na nona pala pani na retisohai řuhuru sei ka silea isana. Noku avulahi mo tavera na nona pala matan mo vereāu hiniā soheņa sava ka lo kilau toho matan rani atu vara a pa mele rohi kamim hiniā, ale soheņa sava řomimim mo sati, ale soheņa sava řomimim mo sati mařa hehe atu, ale vara nomim opoia hiniāu mo soheņa sava.

8 Romiku mo sopo mele sati matan leta atu na sohaia, hina purongo vara řomiku mo sati mařa makomo rani, matan na levosahia vara ka rongo mo sati matana mata makomo

rani. 9 Nake na lo avulahi matan na sohaia, mo sopo matan mo vai kamim ka rongo mo sati, pani matan nomim řomi sati mo vai kamim ka posi na nomim hehe. Romi sati atu natu God mo lo opoi na nona tamlohi vara la lavia, ale na isoisona, kama sopo komo kamim hin te hinau matana. 10 Matan God i eři vai na řomi sati mata hehe na mauriřa i tueniřa, mata i vaiřa řa posi na nořa hehe, ale vuana enia řa pa juri. Ale mauriřa i sopo eři sati na řomi sati sohen harihi. Pani řomi sati sei mo sopo te posi matana mata hehe, enia pa haratu sei vuana enia mateia.

11 Ka hite na sava řomi sati řuhuru nike mo vaiā na maurimim? Mo vujangia vara ka tatamahu varařuhu mata oloolo soheņa sava, ale mata vai na hijamim la vokevoke, ale vara lolokoru matan hehe akerihi sei mo vai na matamim mo lo roi matana, ale soheņa ka lo kilau toho mata ha mele hiteāu, ale soheņa ka řomjea vara ha sile na talai isan tamlohi atu mo lo hehe. *1Co 5.1-2*

Ka lo vujangia vara ka vaihitea vara ha vai na hinau tari ka eři vaira mata vai na hinau la tataholo. 12 Ale matana, hina purongo vara na uliuli isamim, pani mo sopo matan haratu mo lo vai na hehe, teni isan haratu sei hehe atu mo vai na řomina mo sati, pani matan vara a vujangi kamim soheņa sava ka lo tatamahu mata usuri na nomam reti na nahon God. 13 Ale kama avulahi tavera matana, mo sopo matan haratu purongo, pani matan kama avulahi tavera matan kama hite na avulahi non Titus mata nomim posposi řuhu sei ka lavia hiniā, ale soheņa sava ka vai na řomina mo sakele matan hinau akერიhi. 14 Enau na vereā isana soheņa sava na hapahapa hin kamim, ale kamim ka sopo vai na řomiku i jovi. Tarea na lo reti varařuhu isamim, ale nakerihi na levosahia vara noku reti hapahapa isan Titus matamim mo varařuhu. 15 Ale nake mo lo opoi kamim mo tavera jea vara mo lo řomřomi na nomim oloolo, ale soheņa sava ka lavia na oloolo tavera. 16 Nake na avulahi tavera

matan noku rasua mo řilangi hin kamim.

## 8

### *Ra Pa Hansohai Tarea*

<sup>1</sup> Ale nakerihi na opoia vara a vereā isamim la vorai peresi na vevorai, na sava God na nona řomřuhu mo vaia na nona vao kalesia tari Macedonia. <sup>2</sup> Hina purongo vara nora rani řilangi peresi na rani sasati mo matuvana, nora avulahi řuhuřuhu peresi na mauri tilavono mo vaira la avulahi jea mata tueni na tinapua na nora hansohai. <sup>3</sup> Matan a eři vereā vara la sopo sile purongoi na sava la eři silea pani mo jeu haratu, matan la silea na nora řomavulahi purongo. <sup>4</sup> La usia vaha visa moiso vara la eři sořotahi peresi na tinapua mata la sile te tuetueni mata i tueni na kalesia tilavono Jerusalem ale na jara tavera matan Judea. <sup>5</sup> Ale aulu hin haratu, la vai na hināu mo jeu na nomam řomtau, matan la hase silera isan Moli tiroma, moiso la tatamahu mata vai na sava kama vereā usuri na masalon God.

<sup>6</sup> Ale kamim vao kalesia sei Corinth, ka levosahia vara kama mele usi Titus sei mo lo vereā isamim tiroma moiso vara i pa mele vano isamim, ale i usi kamim vara ha vai mařivisi na nomim silesilea. <sup>7</sup> Ale matan usuri na posimim ka lo vaia mo řuhuřuhu jea na hināu tari – nomim rasua mo tavera jea, nomim tamlohi hai la eři retireti mo řuhu, ka lelevosahi, řomimim mo řilangi mata ha vai na hināu, ale nomim opoia hin kamam mo tavera jea – pani nake na opoia vara ha mařivisi na nomim vavahināu mata sile na silesilea sohen ka lo vaia na hināu tinatinapua mo řuhu. <sup>8</sup> Na sopo vereā vara ha pa sile na silesilea nike sohena retileu matea, pani na lo vaihite na nomim opoia. Matan na opoia vara a hitea vara i pa sohena opoia nona vao kalesia tinapua Macedonia teni mo vono.

<sup>9</sup> Matan kamim ka levosahi na řomřuhu non nořa Moli Iesu Křisto, vara hina purongo vara enia mo tavgav sohen God mo tavgav, enia

mo mai tamlohi tilavono matamim, matan vara na nona tilavono kamim ha pa tavgav na mauri.

<sup>10</sup> Ale mo řuhu vara ha vai vevuhi na silesilea sei ka tapulona na tauni sei mo vano moiso, matan kamim natu ka vereā řomřomi sei, ale kamim natu ka tapulo mata ha vaia. <sup>11</sup> Mo tataholo mata ha vai vevuhia sohen ka řomjea hinia na tapulona. Ha sile na sava ha eři silea. <sup>12</sup> Vara ka avulahi jea mata ha sile na silesilea, mo sopo te hināu hinia vara ha eři sile i visa. God mo opoia vara ha sile na sava ha eři silea, mo sopo usi na hināu mo sopo te nomim. <sup>13</sup> Na sopo vereā vara ha pa silea hajavua matan vara i vai kamim ha vejuveju. Na lo vereā matan na sopo opoia vara tea i eři vereā vara kama lo tametame te tatua vao kalesia purongo. <sup>14</sup> Nake nomim tavgav mo mařivi, ale ha eři tuenira Judea na nora vejuveju. Ale hin te rani vara ka vejuveju, enira sohena la pa eři tueni kamim. Hin malele akerihi natu vao kalesia tari la pa sopo eři vejuveju hin te hināu hinia. <sup>15</sup> Mo sohen la ulia tuai na Retitapu vara, ‘Haratu mo takonahi na mana mo mařivi, nona mo sopo mařivi hajavua, ale haratu mo takonahi makomona, nona mo sopo makomona hajavua’. *Exo 16.18*

### *Titus Tolu Na Tapalana*

<sup>16</sup> Pani na lo vere meje isan God sei mo tau na řomřomi matea hin Titus sohen mo taua hināu mata kama kilāu kamim. <sup>17</sup> Kama usia vara i mele rohi kamim, ale mo avulahi matana, aulu hin haratu, enia mo lo tatamahu moiso vara i mele vano i hite kamim. <sup>18</sup> Kama pa řule na vorai tinapua matea vara i usuri Titus. Vao kalesia tari la majinga vara vorai sei enia tamlohi řuhu matea mata retivujavujangi na Retiřuhu. <sup>19</sup> Aulu hin haratu vao kalesia nike Macedonia la viřoni vorai sei vara i pa usuri kamam na rani kama sivo Jerusalem mata sile silesilea nike isana kalesia tilavono ea – enia vavahināu matea i pa sile na hasohaso isan Moli, ale mo vujangia vara kama tatamahu mata tuetueni. <sup>20</sup> Kama pa hahau jara



matea matan vara i pa sopo sile te masapa vara tea la řomřomia vara kama lo roro hin silesilea avulahi nike. <sup>21</sup> Ale matana, kama lo vaihitea tarea vara kama vai na hina tataholo na nahon God peresi na naho tamlohi.

<sup>22</sup> Ale kama lo mele řule na vorai kalesia tinapua matea peresira Corinth, enia mo jeu na nomam hina vaihite moiso, ale mo mera purongo vara mo avulahi na hinau matuvana, pani nake mo mele jeu tiroma matan mo rasu kamim mo tavera jea. <sup>23</sup> Vara te retiusia matan Titus, ha vereia isara vara enia tapalaku mata i vai na vavahinau non Moli matamim. Ale la vorai tinapua sei la lo usuria enira vahařule řuhu nona vao kalesia nike, ale nora tovongi mo vai na tamlohi la hasohaso Křisto matara. <sup>24</sup> Ale matana, ha turu peresira matan vara vao kalesia la pa eři hitevosahi na nomim opoia, ale vara i vujangia vara nomam reti hapahapa matamim mo varařuhu.

## 9

### *Silesilea Nona Kalesia Jerusalem*

<sup>1</sup> Na levosahia vara mo sopo te hinau hinia vara a sopo uliuli matan silesilea nike nona tapuhi Jerusalem, <sup>2</sup> matan na levosahia vara ka lo tatamahu mata ha tuenira moiso. Ale na reti hapahapa moiso isan tapalařa nike Macedonia vara kamim kalesia Corinth ka tatamahu hin tauni sei mo vano moiso vara ha sohai na silesilea matea, ale nomim avulahi mo vai na vao kalesia tinapua řomira mo řilangi mata la tapulo na tuetueni. <sup>3</sup> Pani na lo řule la vorai kalesia nike vara la hitea vara varařuhu ka tatamahu sohen na vereia isara vara ha pa tatamahuni na mania moiso. Na sopo opoia vara la pa hitea vara noku reti hapahapa nike hin kamim i vano hina purongo. <sup>4</sup> Matan, vara te mara Macedonia i mai peresiau ale vara i hitea vara ka sopo tatamahu, kama pa mahanuhanu ale kamim sohen, matan kama vereia moiso vara kama lo rasu kamim. <sup>5</sup> Matan na sopo opoia vara a mahanuhanu, na řomřomia vara a usi la vorai kalesia

nike vara la mai isamim tiroma mata la tatamahuni na nomim silesilea tavera sei ka lo retitauhi hinia moiso. Ale mo sopo hinau matea mata ngurunguru matana, pani enia silesilea matea usuri na nomim řomavulahi.

### *Ha Hansohai Matan God Mo Hansohai Tiroma*

<sup>6</sup> Ha lo levosahia vara tamlohi isa matea vara mo lavo na piri mo visalete, i pa vua makomona purongo. Pani haratu mo lavo na piri matuvana, i pa lavi na vuana matuvana. <sup>7</sup> Kamim hatehateahi ha pa silesile usuri na řomimim hasemim, mo sopo matan ka sopo řomavulahi teni matan tea mo ngurunguru hin kamim, pani matan God mo opoi haratu sei mo sile na nona silesilea na avulahi. <sup>8</sup> Ale God i eři sile kamim na hinau tari ka opoira, matan vara ha sopo eři vejuveju hin te hinau ka opoia, ale matana, ha eři mele tueni na tinapua na sopena. <sup>9</sup> Mo sohena Retitapu mo vereia vara, 'Haratu la tataholo na nahon God, la lo hansohai tarea isana tilavono.

Ale God i pa sopo řomaliho na nora vavahinau řuhu sei hin te rani.' *Psa 112.9*

<sup>10</sup> Matan God enia haratu sei mo lo sile na piri wit isana tamlohi isa, moiso mo vai na pereti mata hanhani hinia. Hin malele akerihi natu God i pa sile na masapa matuvana isamim mata ha vai na vavahinau řuhu, ale enia i pa vai na nomim hansohai i vua tavera isamim.

<sup>11</sup> Enjora, ha pa mařivi savulevule matan vara ha eři hansohai i jeu tiroma. Ale na rani vara kama lavi na nomim silesilea i vano isan la haratu la vejuveju, la pa ulo na vere meje isan God matana. <sup>12</sup> Hinau mo rua vahatea la pa masese matan silesilea atu, i pa mařivisi na vejuveju nona tapuhi Jerusalem, ale la pa hasohaso God na nora vere meje matana. <sup>13</sup> Kamim ha pa tahe na hijan God na nomim silesilea na avulahi. Matan nomim hansohai isara i pa vujangia vara kamim ka lo ooloo na Retiřuhu non Křisto, ale la kalesia atu la pa hasohaso God matamim. <sup>14</sup> Ale la

pa usiusi matamim na opoia tavera mata řomřuhu řuhuřuhu non God sei mo lo malue hin kamim.

<sup>15</sup> Ha vere meje isan God matan Natuna — matan nona otori řuhuřuhu sei mo sopo te reti i eři vere a vara mo řuhu sohena sava.

## 10

### *Suiha Nona Vahařule Varařuhu Non God*

<sup>1</sup> Enau Paul haseku, na lo usia řilangi isamim vara ha tapurongo isaku. Na lo vaia usuri na řommalum peresi na posposi malum non Křisto, enau sei tamlohi hai Corinth la lo vere a vara enau na malum vara na lo toho isamim pani vara na malue na lo řilangi isamim na noku leta!

<sup>2</sup> Na lo řomtau vara i pa sopo sohena, pani korong vara na mai a pa řilangi isan la haratu sei la řom vara kama lo vavahinau usuri na posposi tamlohi purongo. <sup>3</sup> Hina purongo kamam kama tamlohi varama, pani kama sopo vai na vuro usuri na řomřomi nona tamlohi, <sup>4</sup> matan nomam hinahinau mata vai na vuro mo sopo matan varama nika, pani God mo vai na retivarařuhu mo suiha mata vilijovjovi na řomřomi řilangi non Tiapolo sei la lo taurilati na tamlohi. Ale la suiha mata la vilijovjovi na řomřomi <sup>5</sup> peresi na řomaulu tari sei la lo turuhoro na tamlohi na lelevosahi hin God. Ale kama taurilati na řomřomi tari na retivarařuhu, ale kama vaira la ololo hin Křisto. <sup>6</sup> Ale kama lo tatamahu mata kama sile na talai isana tamlohi lejileji tari sei atu, ale kama pa vaia hin rani atu vara kamim mo isoiso ka lo ololo hin Křisto moiso.

<sup>7</sup> Kamim ka lo kilau na huri tamlohi purongo. Kamim ka hitevosahia moiso vara kamam kama tamlohi non Křisto, sohen la haratu sei la lo reti hapahapa lara enira non Křisto. <sup>8</sup> Korong, ha pa hitea vara na lo pohapoha na suiha sei Moli mo silea isamam. Pani suiha nika enia matan vara i turuhi kamim, mo sopo matan vara i vilijovjovi kamim. Ale a pa sopo tinařihia vara tea i vaiau a mahanuhanu, vara i vai na

noku vavahinau isamim i mai hina purongo.

<sup>9</sup> Na sopo opoia vara tea i řomřomia vara na lo řilangi na noku leta purongo ale i vai na tamlohi la matahuniau matana, <sup>10</sup> matan hai la lo vere a lara, “Paul enia hare? Nona leta la řilangi pani enia mo sopo te suihana, ale mo sopo tamlohi matea mata retireti i řuhu.” <sup>11</sup> La haratu la lo retireti sohen harihi, la levosahia moiso vara kamam kama lo řilangi na nahomim sohen kama lo řilangi na nomam leta.

<sup>12</sup> Matan kamam kama sopo řomřomia vara kama pa vere a vara kama tamlohi řuhu i tikeli la tamlohi sei la lo vere a vara enira io. Pani ka hitea, enira la lo hase kilau usurira na tatuara purongo vara hare natu mo řuhu sohena sava. Hinau akerihi enia rongorongono vono purongo!

<sup>13</sup> Pani kama pa sopo reti hapahapa hin te hinau sei mo sopo nomam. Mata kama tau na řomimam mata vai na vavahinau sei God mo taua na limamam purongo, ale mo taua vara kama pa vavahinau na jaramim mara Corinth. <sup>14</sup> Matan mo tataholo purongo vara kama lo vere a vara kama aulu hin kamim na mauri rasua, matan kamam natu, kama tiroma tamlohi sei mata lavi na Retiřuhu non Křisto isamim. <sup>15</sup> Ale kama sopo lavi na hasohaso mata vavahinau nona tinapua, mo vono, kama lo řomtau vara nomim rasua i pa ulua, ale vara nomam vavahinau isamam i pa ulua i mele tavera jea, <sup>16</sup> matan vara kama pa retivujavujangi na jara tinapua sei tele vano na jaramim. Ale kama pa sopo reti hapahapa hin te vavahinau tamlohi tinapua la vaira hin la jara tinapua atu. <sup>17</sup> Pani Retitapu mo vere a vara,

‘Vara tea mo opoia vara i reti hapahapa,

i pa reti hapahapa na sava Moli mo vaia purongo.’ *Jer 9.24*

<sup>18</sup> Matan hina aulu mo sopo haratu sei mo hase vere a hasena, pani haratu Moli mo vere a vara mo vaia mo řuhu.

# 11

## *Vahaʻule Haluhalu*

<sup>1</sup> Na opoia vara ha ʻromperavu mata makomo rani peresiau, ale a pa retireti sohena tamlohi rongorongo vono matea mo lo retireti, pani na levosahia vara varaʻuhu ka lo ʻromperavu isaku. <sup>2</sup> Enau na mereimerei matamim na mereimerei non God. Matan na retitauhi vara kamim ha pa sohena haʻrai lahi vokevoke matea tuana matelete, enia Kʻristo. <sup>3</sup> Pani na lo matahu vara sohen tuai mata sasati atu Tiapolo mo halu Eve na nona haluhalu, ale vara tinapua sohena i posi na ʻromimim ale i tiroma hin kamim ha malue na malele mata lotu Kʻristo na mapumim tari sei mo varaʻuhu. <sup>4</sup> Matan vara te tamlohi vujangi tinapua mo mai ale mo retivujavujangi na vujangi tinapua matea hin Iesu hin haratu kama lo vujangi kamim hinia moiso, teni hin te tanume tinapua hin Tanume Tapu atu ka lo lavia moiso, teni te Retiʻuhu tinapua hin haratu ka lo rasua, ale mo mera purongo vara kamim ka hitea mo ʻruhu purongo. <sup>5</sup> Matan na sopo ʻromʻromia vara enau na vejuveju hin la haratu Corinth sei la lo vereva vara la vahaʻule aulu jea, enira la jeuau. <sup>6</sup> Hina purongo vara na sopo levosahi na malele mata retireti sohera, pani enau a eʻri vereva vara na sopo vejuveju na lelevosahi. Varaʻuhu kamim ka levosahia vara kama lo vujangi na lelevosahi mo mera isamim moiso na malele tinatinapua matuvana.

<sup>7</sup> Ka ʻrom vara na vai te hehe hin haratu na hase tauau atano matan vara a tahe kamim na oloolo matan na lo retivujavujangi na Retiʻuhu non God isamim, ale na sopo usi te hinou hatea matana? <sup>8</sup> Korong ka ʻrom vara na lo vanaho na vao kalesia tinapua matan na avulahi mata a lavi na nora mania matan vara a eʻri mai a lo volitusi purongo isamim. <sup>9</sup> Ale na rani na lo toho peresi kamim, na noku vejuveju na sopo usi te tuetuenu isan te vonamim hatelete, matan la vorai kalesia atu sei la tai Macedonia,

la lavi na tuetuenu tinapua matea mo maʻivisi vevuhi na noku vejuveju. Noku retihapahapa sei enia matan na hase taurilatiau vara a pa sopo tau te tetehi puhoni hatea isamim hin te malele, ale a pa sopo eʻri vaia hin te rani. <sup>10</sup> Sohen retivaraʻuhu non Kʻristo mo lo toho hinia, a pa sopo eʻri isoiso na noku retihapahapa matan hinou atu na jara tari matan Achaia. <sup>11</sup> A pa reti hapahapa mata sava? Matan na sopo opoi kamim teni mo vono? God mo levosahia vara na opoia kamim.

<sup>12</sup> Ale sava na lo retihapahapa hinia, a pa lo retihapahapa hinia, matan vara a lanaʻihi na masapa tari mata retihapahapa isan la haratu sei la lo vereva lara enira la sohemam na nomam vavahinau tari. <sup>13</sup> Matan, la tamlohi nika enira la vahaʻule haluhalu, la tamlohi haluhalu, ale la lo vaia sohena vara enira la vahaʻule non Kʻristo na nora halu. <sup>14</sup> Pani enau na sopo maʻurahi hinira matan Setan i eʻri hase vaia i mai sohena angelo mata malarani. <sup>15</sup> Matan haratu, mo sopo hinou maʻurahi matea vara volitusi non Setan la lo hase vaira sohen la volitusi tataholo non God, pani na isoisona, nora talai i pa tataholo i ʻruhu na nora vavahinau.

## *Paul Mo Sopo Avulahi Hinira*

<sup>16</sup> A mele vereva vara ha sopo ʻromʻromia vara enau na rongorongo vono matan na lo retireti sohen harihi, pani hina purongo vara na lo vaia, ha lo tapurongo tako matan a pa mele retihapahapa makomona. <sup>17</sup> Ra levosahia vara Moli mo sopo avulahi na retihapahapa sohen harihi, pani na lo vaia sohena vara enau na tamlohi rongorongo vono matea. <sup>18</sup> Matan tamlohi tinatinapua la lo retihapahapa usuri na vavahinau nona tamlohi, enau sohena a pa vaia. <sup>19</sup> Ka ʻrom vara nomim lelevosahi sei mo tavera jea, i pa tataholo vara ha tapurongo isana tamlohi rongorongo vono teni mo vono! <sup>20</sup> Avei, nomim lelevosahi mo sohena sava matan mo sopo te hinou hinia vara te vonara mo vai kamim ka slev, teni vara ka levosahia vara mo lo haluhalu

kamim mata nomim tavgav, teni vara la lo hani na masumasumim, teni vara la lo řomaulu hinira hasera, teni vara la lo varasi na patumim. <sup>21</sup> Na hitea mo sati matan kamam kama sopo eři vaia sohera!

### *Paul Mo Lo Retihapahapa*

Pani vara tea mo řomřilangi vara i retihapahapa na nona rongorongono, enau sohena a eři vaia. <sup>22</sup> La tamlohi halu nika, la lo retihapahapa lara enira hasera la Hebrew, pani enau na Hebrew. Enira, la řom vara enira hasera la tavgavuın Israel, pani enau sohera. Enira, la řom vara enira hasera la mahapin Abraham, pani enau sohera. <sup>23</sup> Na levosahia vara na lo retireti sohen na tamlohi rongorongono vono matea, pani na levosahia vara ka lo řomřomia vara enira la lo volitusi non Křisto, pani enau na jeura, noku vavahinau mo jeura, la tauriau na vano na ima řilangi vaha visa, la rupi lejilejiau na asi maja vaha visa, mariviti vara a mate vaha visa. <sup>24</sup> Vaha lima moiso, Jew la rupiau mo vaha ngavulu tolu mo limaravati (39). *Deut 25.1-3*

<sup>25</sup> Vaha tolu, la hamajiau na vipahai. Na rani matea la paruaa vara a mate. Na pute na lanis vaha tolu. Na rani matea, na lo sale na pahai matea na tasi masapa mata rani matea ale pongi matea. <sup>26</sup> Na hahau řalihi mata jara la asau řove vaha visa, ale na lavi na rani sasati na wai tavei, rani sasati mata tamlohi sei la lo vili na tamlohi mata mania, ale rani sasati isana Jew, rani sasati isana tamlohi řořoha, rani sasati na lolo taon tavera, rani sasati na rani na lo toho na jara hasetoho, rani sasati na tasi, rani sasati isana vorai kalesia haluhalu. <sup>27</sup> Na lo mauri peresi na noku malokoloko, noku rongohaji, ale na sopo eři juruvi vaha visa moiso mata marohati peresi na mařohu, ale vaha visa moiso mo sopo te haku hinau. Vaha visa moiso na lo toho na jara hamariri sati pani mo sopo te noku ruru hamariri.

<sup>28</sup> Ale aulu hin la hinau sei, na rani hatehateahi, řomiku mo lo puhoni matan na sopo levosahia vara vao

kalesia tari la lo toho sohena sava. <sup>29</sup> Hare natu vara mo rongoa vara mo sopo te suihana, vara enau sohena na sopo rongoa, enjora. Hare natu vara i malue na malele rasua matan tea mo tikaulejia pani enau a pa sopo lolokoru matana, enjora.

<sup>30</sup> Vara a eři retihapahapa hin te hinau, a pa retihapahapa na hinau sei na sopo eři vaia haseku. <sup>31</sup> God, Taman Moli Iesu, enia i pa lavi na hasohaso mata rani tui tui. Enia mo levosahia vara enau na sopo halu, <sup>32</sup> ale hin rani atu na lo toho Damascus, tamlohi aulu na ruhuruhun Supe Aretas, mo sile na retileu matea isana tamlohi la lo kilau na matarua tavera matan taon tavera atu vara la pa taurilatiau, <sup>33</sup> pani kalesia hai atu la tuhuau na windowa na sivo atano na tanga tavera matea na ropen taon atu, matan vara a eři malue a rovo!

## 12

### *Paul Mo Hite Na Tuka Na Mamavuho Matea*

<sup>1</sup> Na levosahia vara noku reti hapahapa nika mo rongorongono vono, pani a pa mele vere te makomona hin te hinau sei Moli mo vujangia isaku mo sohena mamavuho matea. <sup>2</sup> God mo sauau na sahe aulu na hatolu tuka na rani matea tauni mo sangavulu řomana mo vati la vano moiso, na sopo levosahia vara na lo toho na epeku teni mo vono, pani God mo levosahia. <sup>3</sup> Ale na levosahia vara enau vara na epeku teni mo vono na sopo levosahia pani God mo levosahia, <sup>4</sup> na sahe aulu na toho Paradise na tuka, ale na rongono te hinau la tapu jea vara tea i eři mele verera isan tea na varama. <sup>5</sup> Matan la hinau atu natu God mo vujangira isaku a eři retihapahapa. A pa sopo eři retihapahapa hin na sava na vaia, pani hin haratu purongo sei na sopo eři vaia haseku. <sup>6</sup> Matan, vara a opoia vara a retihapahapa, a pa sopo tamlohi rongorongono vono matea matan na lo retivararuhu. Pani a pa sopo vaia matan na sopo opoia vara tea i řomaulu hiniau i jeu na hinau mo eři hitea hiniau moiso teni na sava

mo rongora isaku, <sup>7</sup> hina purongo vara God mo vujangiau na hinau řuhuřuhu jea. Matan haratu, God mo tinařihia vara a lavi na rani řilangi na lima angelo matea non Setan, ale mo vailejleji na epeku matan vara a pa sopo retihapahapa hin la hinau sei God mo vujangiau hinira.

<sup>8</sup> Na usi Moli vaha tolu vara i larařihia isaku. <sup>9</sup> Pani mo vereā isaku mara, "Noku řomřuhu enia mo tataholo matam. Mata suihaku mo lo voko na hinau ko sopo eři hasem vaia."

Ale matana, nake na avulahi purongo vara a reti hapahapa na hinau na sopo eři vaira haseku vara suihan Křisto i sopo lo toho hiniau. <sup>10</sup> Matan haratu, enau na avulahi vara na sopo eři vai te hinau haseku, ale matan haratu a eři lavi na retisasati nona tinapua peresi na rani řilangi, teni vara tamlohi la tipahiau, peresi na hina puhoni na lo lavia matan Křisto. Matan hin rani atu natu na sopo eři vai te hinau haseku, suihan Křisto mo lo tueniau.

### *Paul Mo Romřomi Na Kalesia Corinth*

<sup>11</sup> Kamim ka vaiāu na vaia sohena tamlohi rongorongono vono matea, matan na lo retihapahapa sohen harihi. I pa tataholo vara ha vereā tataholo isara vara enau tamlohi matea tamlohi la eři rasua. Matan enau na sopo vejuveju hin te hinau hatelete sohen la 'vahařule aulu jea' sevano, hina purongo vara enau hina purongo matea. <sup>12</sup> Varařuhu na vai na matamata tataholo nona vahařule varařuhu. Na noku řomperavu na vai na matamata tavera peresi na hinau mařurahi peresi na vavahinau mata suiha na nahomim. <sup>13</sup> Ale, hināu matea purongo sei na sopo vaia na lo vaia isana vao kalesia tinapua, enia vara na sopo usi te tuetueni isamim. Ha řomiau matan na sopo usia!

<sup>14</sup> Ka hitea, na tatamahu moiso vara a mele rohi kamim na hatolu noku hahau. Ale na sopo opoia vara a mai tetehi puhoni matea isamim. Na sopo opoia vara a lavi

te nomim hināu, na opoi kamim purongo! Matan natuvarihi varihi la sopo sile na mania isana tamara peresi na tinara mata hara hināu, pani tamara peresi na tinara la vaia mata natura. <sup>15</sup> Ale a pa avulahi jea vara a hase jalahi na mauriku peresi na noku hināu tari mata maurimim. Ka řom vara mo tataholo vara hina purongo vara noku opoia mo tavera matamim, kamim ha pa opoia makomona purongo?

<sup>16</sup> Vara mo sohen haratu, na sopo lo tau te tetehi puhoni isamim. Pani hai la pa lo vereā vara enau na mai luhu isamim vara a tikauleji kamim na noku haluhalu. <sup>17</sup> Pani vara mo sohena, a pa halu kamim sohena sava? Mo toma, na vaia hin te vonan la tamlohi atu sei na lo řulera la vano isamim? <sup>18</sup> Na rani na usi Titus vara i rohi kamim ale na mele řule na vorai tinapua matea vara i usuria, korong Titus mo haluhalu kamim? Mo vono! Matan kamam rua kama hahau na posposi matelete purongo. Korong ka hitea vara kamam rua kama sopo vaia sohena teni mo vono?

<sup>19</sup> Korong ka lo řomřomia vara tarea kama lo vere la hināu nike enira, matan vara kama hase vereā vara kama tataholo mata vaira, pani mo vono. Kamam volitusi non Křisto, ale kama lo vere la hināu nike isamim na nahon God, ale na hināu tari kama lo vaira, enira matan vara la tueni kamim ha ulua. <sup>20</sup> Matan na levosahia vara a mai isamim, a pa sopo avulahi na sava a pa hitea isamim, ale ha pa sopo opoi na sava a pa vereā matana. Na levosahia vara a pa vileia vara kamim ka lo vasvas, ka lo mereimerei, ka lo lolokoru patumim, ka lo hanmarua, ka lo vereleleji na tinapua, ka lo sorasora tamlohi, ka lo mangisi ale mo sopo te ololo isamim. <sup>21</sup> Enjora, na levosahia vara a mai isamim God i pa vaiāu a mahanuhanu mata nomim posposi natuvarihi, ale řomiku i pa sati matan matuvana isamim sei la hehe tiroma moiso, la sopo lo vahaři na nora posposi lumiha, teni na nora posposi maji peresi na nora marohati

mata posposi sohen haratu.

## 13

### *Isoiso Retituetueni Non Paul*

<sup>1</sup> Harihi enia noku hatolu mai vara a rohi kamim. Ale sohena Retitapu mo vereā vara, 'Ha pa turu na retireti non te tupra rua teni te tupu tolu matan te hināu tea mo vaia mo sati'. *Deut 19.15*

<sup>2</sup> Na pete retiōāroahai la haratu la lo hehe na harua noku rohi sei moiso. Ale nakerihi, na lo mele retiōāroahaira peresi na tamlohi tari, sohen na pete vaia tiroma moiso, vara hin harakerihi, a pa sopo ōm tea vara i sopo lavi na talai mata nona hehe, <sup>3</sup> matan ka lo opoia vara ha levosahia vara varaŕuhu, Kŕisto mo lo retireti hināu. Kŕisto mo sopo kilāu purongoi na sava ka lo vaira, pani hin kamam, enia suiha tavera jea matea na livuhamim. <sup>4</sup> Hina purongo vara mo mate na talopeilopei sohena mo sopo te suihana, pani nake mo lo mauri mata suiha God. Ale, kamam sohena mo sopo te suihamam, pani kama pa toho peresi kamim na suiha God. Suiha atu sei kama lo vavahinau hinia matamim.

<sup>5</sup> Ha hase vaihite kamim hasemim vara varaŕuhu nomim rasua mo varaŕuhu. Ha hase kilāu usuri kamim hasemim! Vara ha sopo eŕi hitevosahia vara Iesu Kŕisto mo lo mauri hin kamim, mo ŕaramia vara ka jovi na nomim vaihite. <sup>6</sup> Ale na lo ōmtau vara kamim ka hitevosahia vara kamam kama jeu vaihite nike moiso.

<sup>7</sup> Ale kama lo usiusi isan God vara ha pa sopo vai te hināu sasati. Mo sopo matan vara tamlohi la pa hitea vara kama jeu vaihite atu moiso, pani matan vara ha pa vai na hināu tataholo, hina purongo vara ka lo ōmŕomia vara kama sopo lo jeu vaihite atu. <sup>8</sup> Matan kama sopo eŕi vai te hināu vara i turuleji na retivarāŕuhu, pani kama pa lo turu ŕilangi mata retivarāŕuhu tarea. <sup>9</sup> Matan enia hina purongo vara mo sopo mele te suihamam, pani kama pa avulahi vara kamim ka ŕilangi varaŕuhu. Nomam

usiusi enia vara ha jea i ŕuhu na mauri rasua.

<sup>10</sup> Matan haratu, na lo uli la hināu nike Macedonia isamim vara ha lo vai tatalohoi na maurimim, matan vara na rani vara a pala, a pa sopo vai na posposi ŕilangi hajavua na noku suiha sei Moli mo sileau hinia mata vai na kalesia la ulua, pani mo sopo mata vilijovjovira.

### *Isoiso Retireti*

<sup>11</sup> Ale isoiso hināu la vorai peresi na vevorai, enia vara ha avulahi, ha mele vai mamahuni na maurimim la tataholo, ha ōmŕilangi, ha turu jara matea na ōmimim hatehateahi, ha toho na tamata, ale God mata opoia peresi na tamata i pa toho peresi kamim.

<sup>12</sup> Ha tapatapapai kamim na posposi mo tataholo mata kalesia. Tapuhi tari nike la sile na nora retioloole isamim.

<sup>13</sup> Romŕuhu non Moli Iesu Kŕisto peresi na opoia non God peresi na tapala ŕuhu nona Tanume Tapu i pa toho peresi kamim mo isoiso. Amen.

## Galatians

### Leta

### Paul Mo Ulia Isana Mara

### Galatia

### Leta Nike

Na rani tiroma leta nika mo vano isana kalesia hin jara atu Galatia, Paul mo lo vereia mo memera isara moiso vara enia mo silera hin Retiruhu tataholo atu sei Iesu mo lo silea isana tiroma. Retiruhu sei hasena, enia hina varaŕuhu (1.1–10). Haranika enia hina aulu matan te tamlohi la lo vereia vara reti non Paul mo halu na Retiruhu non God matan enia tamlohi halu.

Paul enia vahaŕule varaŕuhu non Iesu. Iesu mo ŕulea isana tamlohi la sopo levosahi God. Patu tamlohi na vao kalesia matan Jerusalem la lo avulahi hin Paul peresi na nona Retiruhu (1.18–2.10). Paul mo reti isan Peter na rani matea Antioch, matan mo vaileji na vujangi non Retiruhu, matan mo lo tametame na tavitavin Israel la lo toho peresia (2.1–18).

Paul mo vujangia vara rasua hin Kŕisto, enia hasena malele tataholo vara tamlohi la lavi na mauri mo materi hinia. Enia malele sei God mo silea isan Abraham tuai (3.1–4.31).

'Matan hin leu atu na lo usuria, na mate matan leu atu, matan vara a pa mauri hin God, enau na mate peresi Kŕisto na nona talopeilopei. Nake mo sopo enau sei na lo mauri, pani Kŕisto enia mo lo mauri hinia.' (2.19–20)

#### Hin Puku Nike

1. Vahaŕule Varaŕuhu, Retiruhu Varaŕuhu (1.1–10)
2. God mo viŕoni Paul vara i nona vahaŕule (1.11–24)
3. Paul mo mele tahe na Retiruhu (2.1–21)
4. Rasua enia malele varaŕuhu mata tamlohi la juri (3.1–4.31)
5. Tanumen God mo reveŕa na opoia (5.1–6.10)
6. Isoiso retireti (6.11–18)

#### Retireti Tiroma Non Paul Isara

<sup>1</sup> Leta nika, enau Paul na ulia, enau vahaŕule matea, pani mo sopo na ŕomŕomi tamlohi teni tea la viŕoniu

vara a vahaŕule, mo vono. Iesu Kŕisto hasena peresi God Tama la toviau, God sei mo lo sauteterahi Iesu na mateia.

<sup>2</sup> Ale la vorai nika peresiau, kama sohai na nomam retioloalo isamim kamim vao kalesia na jara tari Galatia. <sup>3</sup> Na lo usiasi vara God Tamaŕa enia Moli Iesu Kŕisto vara la sile na nora ŕomŕuhu peresi na nora tamata isamim. <sup>4</sup> Iesu mo hase silea vara i mate mata noŕa hehe vara i juriŕa ŕa materi na suiŕan sasati na varama nake, usuri na masalon noŕa God Tamaŕa, <sup>5</sup> hasohaso tavera enia nona, mata rani tui tui tarea. Amen.

#### Retiruhu Enia Matelete

<sup>6</sup> Na maŕurahi jea, matan vila ŕuhu purongo, ka rovo isan haratu mo tovi kamim na nona ŕomŕuhu non Kŕisto, ale ka lo posi vano na retiruhu tinapua, <sup>7</sup> mo sopo mele te retiruhu tinapua, pani na levosahia vara tamlohi hai la vai na ŕomimim la lo kaka. La opoia vara la vai na retiruhu non Kŕisto i mele tinapua.

<sup>8</sup> Pani vara kamam teni te anĝelo na tuka i lo retivujavujangi na retiruhu matea mo sopo tataholo hin haratu kama lo retivujavujangi kamim hinia moiso, talai tavera non God i pa toho isana. <sup>9</sup> Sohena kama pete vereia tiroma moiso, ale na mele vereia vara, tea mo lo retivujavujangi na retiruhu tinapua isamim, ale mo sopo na retiruhu sei ka lavia tiroma moiso, talai tavera non God i pa toho isana.

<sup>10</sup> Ka ŕom vara na lo reti sohena matan vara tamlohi, teni God la avulahi hiniau matana? Teni ka hitea vara na lo vaihitea vara a vai na tamlohi la avulahi hiniau? Vara a lo vaihitea vara a vai na tamlohi la avulahi hiniau, i pa vujangia vara enau na sopo slev varaŕuhu matea non Kŕisto.

#### Vujangi Non Paul Mo Tai Isan Kŕisto

<sup>11</sup> La vorai peresi na vevorai, na opoia vara ha levosahia vara Retiruhu atu na lo retivujavujangi hinia, enia mo sopo tai isana tamlohi. <sup>12</sup> Matan na sopo lavia isan te tamlohi teni tea mo sopo vujangiau hinia,

pani na lavia matan Iesu Křisto mo vujangia isaku.

<sup>13</sup> Matan ka rongoa moiso, vara mauriku mo sohena sava tiroma, na lo usuri na posposi rasua nona Jew. Ale sohena sava hin pongi atu na lo tipahi řilangi na vao kalesia non God, ale na vaihitea vara a komora. <sup>14</sup> Hin pongi atu, na lo sahe aulu jea na posposi rasua nona Jew, mo jeu na tamlohi tinapua la tautauniku na tahisamam, matan na lo turu řilangi na posposi nona tamamam.

<sup>15</sup> Pani na rani na sopo lo vora, God mo tapuhiau moiso, ale mo toviau na nona řomřuhu, <sup>16</sup> ale enia mo avulahi vara i vujangi Natuna isaku, matan vara a pa retivujavujangi Iesu isana tamlohi řořoha. Ale na sopo vano vahatea vara a usi rongorongoa isan tea, <sup>17</sup> teni vara a sahe Jerusalem isan la haratu la vahařule tiroma hiniau, pani na vano Arabia, moiso na mele mai Damascus.

<sup>18</sup> Ale tauni mo tolu la vano moiso na sahe Jerusalem vara a hite Peter, ale na lo toho isana mata rani mo sangavulu řomana mo lima (15).

<sup>19</sup> Hin rani atu, na sopo hite te vahařule tinapua, pani James purongo, tasin nořa Moli. <sup>20</sup> La hiniau sei na lo ulia isamim na nahon God na sopo halu hinira.

<sup>21</sup> Moiso na vano na lolon la jara tavera sei mo rua, Syria enia Cilia. <sup>22</sup> Hin rani atu, vao kalesia hin Křisto la lo toho na vao kalesia tari Judea, la sopo lo levosahiau i řuhu. <sup>23</sup> Pani la lo rongoi purongoi na sora-sora la lo vereea lara, "Tamlohi nike natu, tiroma mo lo tipahiřa, pani nake mo lo retivujavujangi pa rasua sei, tiroma mo vaihitea vara i komoa." <sup>24</sup> Matan hiniau atu, la lo sile na hasohaso tavera isan God matakū.

## 2

### *Vahařule Jerusalem La Avulahi Hin Paul*

<sup>1</sup> Moiso, tauni mo sangavulu řomana mo vati mo vano moiso, enau Barnabas peresi Titus, kama sahe Jerusalem. <sup>2</sup> Na sahe matan God

mo vujangia isaku vara a sahe. Enau tolu na tamlohi tatavera mata rasua kama hasemam sorasora matavuhi atu matan na opoia vara la levosahi mamahuni na sava na lo retivujavujangi hinia isana tamlohi řořoha, matan vara a levosahi tataholoia vara la majinga hinia vara i vono, noku vavahināu i pa vano hina purongo.

<sup>3</sup> Pani hina purongo vara la levosahia vara Titus enia mara Greek matea, la sopo ngurunguru hinia vara i taiřalihi, <sup>4</sup> mo sopo matan vara řomřomi atu i pa malue, pani matan hin matavuhi atu, matea mo lavi na vorai hai la sopo vorai varařuhu na nořa rasua, la mai sohena tanume luhu, matan vara la eři levosahia vara nomam materi hin Křisto Iesu mo sohena sava, matan vara la eři tau kamam sohena nora slev na ruhuruhun nora posposi rasua, <sup>5</sup> pani kama sopo usuri na řomira, hina purongo vara enia mata makomo rani purongo, matan vara hina varařuhu mata Retiřuhu i pa toho jejeu matamim.

<sup>6</sup> Ale patu tamlohi mata vao kalesia atu, la sopo vere te hināu aulu na sava na lo retivujavujangi hinia. Ale na vere tataholoia vara na sopo řomřomi na nora hija tavera sohena patu tamlohi, matan God mo sopo tametame tea. <sup>7</sup> Pani la hitevosahia vara God mo tauau vara a pa retivujavujangi na Retiřuhu, isan la haratu la sopo Jew, sohena mo tau Peter vara i pa retivujavujangi na Retiřuhu isana Jew. <sup>8</sup> Matan haratu mo lo voko hin Peter mata nona vavahināu sohena vahařule isana Jew, enia haratu sei mo lo voko hiniau na nona vavahināu mata tamlohi řořoha. <sup>9</sup> Ale hin rani atu James, Peter, John, enira la lo kilaura sohena viřa mata vao kalesia, enira la hitevosahia vara God mo tau na vavahināu řuhu na limaku usuri na nona řomřuhu. La tulahi enau Barnabas vara kama voko matea peresira, ale lara kama pa vano isana tamlohi řořoha, ale enira, isana Jew. <sup>10</sup> Hināu matea purongo la usia lara kama



pa lo řomřomi na tamlohi tilavono, hinau atu natu na lo opoia mo tavera jea vara a vaia.

### *Paul Mo Vujangi Peter*

<sup>11</sup> Pani na rani Peter mo mai Antioch, na reti isana na naho vao. Na reti řilangi isana mata sava mo lo vaia, matan sava mo lo vaia mo sopo tataholo. <sup>12</sup> Matan, tiroma moiso tamlohi hai Jerusalem, la pa pala la tai isan James, enia mo lo hanhani tolu na voraiřa la tamlohi řořoha, pani na rani la pala, Peter mo turujuha hinira mo toho asau, matan mo matahuni la haratu la lo reti na taiřalihi. <sup>13</sup> Ale tamlohi rasua Jew tari tinapua atu, la usuri na posposi tapnetano non Peter, ale Barnabas sohenana, la tikaulejia mo usurira na nora tapnetano.

<sup>14</sup> Pani nara na hitea vara la sopo usuri tataholoi na retivarařuhu mata Retiřuhu, na vereana isan Peter na nahora enira mo isoiso nara, "Vara engko ko vora Jew matea, ale ko sopo mele usuri na posposi nona Jew, ale nake ko lo toho sohenana tamlohi řořoha, mata sava natu, ko lo vaihitea vara o vai la tamlohi řořoha nika vara la oloolo na posposi nona Jew sei, engko ko tinařihira moiso?" <sup>15</sup> Enřa řa vora řa Jew, řa sopo tai isana 'tamlohi hehe' sei la tamlohi řořoha, <sup>16</sup> pani enřa řa levosahia vara tamlohi mo sopo tataholo na nahon God matan vara mo lo oloolo na Leu non Moses, pani matan nona rasua hin Iesu Křisto purongo. Ale enřa sohenana, řa rasu Křisto Iesu matan vara řa pa tataholo na nahon God matan nořa rasua, mo sopo matan řa lo vai na Leu. Matan tea i sopo eři tataholo na nahon God vara mo lo vai na leu.

<sup>17</sup> Pani i pa sohenana sava, vara řa lo aleale malele vara řa tataholo na nahon God mata rasua hin Křisto, ale řa vileiulia vara enřa řa pa lo tamlohi hehe? Korong Křisto mo vaiřa řa mai sohenana 'tamlohi hehe'? Mo vono! <sup>18</sup> Matan, vara a mele turuhi na sava na vilijovjovia moiso, i pa vujangiau vara enau tamlohi tope leu matea. <sup>19</sup> Matan hin leu atu na lo usuria, na mate matan leu atu, matan vara a pa mauri hin God, enau na mate peresi

Křisto na nona talopeilopei. <sup>20</sup> Nake mo sopo enau sei na lo mauri, pani Křisto enia mo lo mauri hiniau. Ale nake na mauriku na lo toho hinia na epeku, na lo mauri usuri na rasua hin Natun God sei mo opoiau, ale mo hasena silea matakau. <sup>21</sup> Enau na sopo vonavonana la haratu sei, la lo vai na řomřuhu non God sohenana hinau purongo matea. Matan vara řa eři juri vara řa oloolo na leu, mo řaramia vara mateia non Křisto, enia mo sopo te hinau hinia!

## 3

### *La Jalio Na Malele Mata Rasua*

<sup>1</sup> Kamim mara Galatia, ka rongorongovono! Sava tamlohi natu, mo mahuhi kamim? Na levosahia vara na vujangi mamahuni na řarami mateia non Iesu Křisto na nona talopeilopei, mo memera isamim moiso. <sup>2</sup> Na opoia vara a usi na retiusia matea isamim tiroma. Ka lavi na Tanumen God matan ka vai na vavahinau mata leu, teni matan ka rongo na Retiřuhu, ale ka rasua? <sup>3</sup> Varařuhu, ka rongorongovono sohenana haratu natu? Ka tapulo na mauri rasua na Tanumen God, pani nake ka řomřomia vara ha pa tataholo na nahon God na nomim vavahinau? <sup>4</sup> Ka lavi na rani řilangi tavera moiso mata retiřuhu, mo sopo matan vara i pa vano hina purongo teni ka lo řomřomi purongo hinia?

<sup>5</sup> Ale, haratu sei mo lo sile kamim na Tanumena, mo vai na hinau mařurahi matuvana na nahomim matan ka lo vai na vavahinau mata leu, teni matan ka lo rasu na retiřuhu sei ka rongoa?

<sup>6</sup> Hin malele nika Abraham sohenana mo 'rasu God, ale God mo vereana vara enia mo tataholo na nahona'. *Gen 15.6* <sup>7</sup> Ha levosahi mamahunia vara la haratu la rasu God, enira natun Abraham tataholo. <sup>8</sup> Ale Retiulia mo retitauhi hinia tuai mara, God i pa vai na tamlohi řořoha la tataholo na nahona mata rasua. Retitapu sei mo retivujavujangi na Retiřuhu tuai isan Abraham mara, 'Hiniho a pa leřuhu na mara jara tinatinapua tari'. *Gen 12.3; 18.18; 22.18* <sup>9</sup> Ale mo sohenana

natu, la haratu la rasu Křisto, la lavi na leřuhu peresi Abraham, tamlohi rasua sei tuai.

<sup>10</sup> Matan tamlohi tari sei la lo turu řilangi na nora vavahinau mata leu, la lo toho na ruhuruhu lesati moiso, matan Retiulia mara, 'Lesati i pa toho isana tamlohi tari sei la sopo usuri vevuhi na hinau tari na lolo Puku mata Leu la ulia'. *Deut 27.26*

<sup>11</sup> Nake mo memera purongo, vara tea i sopo eři mai tataholo na nahon God, matan vara mo lo oloolo na Leu, matan 'Tamlohi sei la tataholo na nahon God, la pa mauri na rasua'. *Hab 2.4*

<sup>12</sup> Pani malele leu mo sopo sohena malele mata rasua, matan Retiulia mo vereea mara, 'Vara tea mo opoia vara i tapai na mauri matan mo lo usuri na leu, i pa oloolo vevuhi na leu tari na maurina'. *Lev 18.5*

<sup>13</sup> Křisto mo volituhuřa hin lesati atu leu mo lo silea, ale enia mo mai lesati matařa, sohena Retiulia mo vereea mara, 'Lesati mo lo toho na tamlohi tari sei la taua mo sevu aulu na vipahai mata talai'. *Deut 21.23*

<sup>14</sup> Matan vara hin Křisto Iesu leřuhu God mo retitauhi hinia isan Abraham, i pa pala isana tamlohi řořoha, matan vara řa eři lavi na Tanume Tapu sei God mo retitauhi hinia na rasua.

#### *Retitauhi Mo Lo Toho Tiroma Na Leu*

<sup>15</sup> La vorai peresi na vevorai, a pa vai na tovongi matea na posposi tamlohi. Vara te tamlohi la retitauhi hin te hinau moiso, mo sopo tea i eři topea teni i mele tau te hinau aulu hinia. <sup>16</sup> Ale la retitauhi atu God mo vereea, mo vereea isan Abraham peresi na mahapina. Mo sopo vereea vara, 'peresi te mahapina tinapua' sei mo lo řarami na vao matuvana, mo vono, mo lo řarami matea purongo mo vereea mara 'peresi na mahapim' enia Křisto. *Gen 12.7*

<sup>17</sup> Rarami noku reti sei mo sohen harihi: Leu sei, mo pa pala tauni mo ngavulu sangavulu vati mo sangavulu tolu (430) mo usuri la retitauhi sei, i sopo eři tope la retitauhi sei God mo vaia tiroma moiso isan Abraham vara la mai hina

purongo. <sup>18</sup> Matan, vara řa eři lavi na vua retitauhi non God mata řa lo usuri na leu, ale vua retitauhi mo sopo mele mai mata retitauhi, pani God mo silea isan Abraham na malele retitauhi matea.

<sup>19</sup> Vara sohena, God mo sile na Leu mata sava? God mo pa tau na leu mata hehe, vara i toho i tikeli rani atu mahapin Abraham sei God mo retitauhi hinia i pala. Ale God mo sile na leu isana angelo vara la pa silea isan Moses, enia haratu mo lo turu na livuhan God peresi na tamlohi. <sup>20</sup> Ale řa levosahia vara tamlohi matea i pa turu na livuha tamlohi mo rua sei la opoia vara la vai na retitauhi matea, pani nike, God hasena mo vai na retitauhi isan Abraham.

#### *Vavahinau Mata Leu*

<sup>21</sup> Vara sohena leu mo horo na retitauhi non God? Mo vono, matan vara te leu hatea la silea vara i eři sile na mauri, ale tamlohi la pa eři mai tataholo na nahon God matan vara la lo oloolo hin leu atu. <sup>22</sup> Pani Retitapu mo vereulia vara, enřa mo isoiso, řa lo toho na ruhuruhu suiha hehe, matan vara vua retitauhi mata rasua hin Iesu Křisto, i pa mai isan la haratu la rasua.

<sup>23</sup> Ale rasua mo pa mai isařa sei, leu mo lo taurilatıřa moiso, mo tapoviřa mo tikeli rani atu God mo vujangi na malele mata rasua. <sup>24</sup> Ale matana, leu atu mo lo kilauřa mo sinai mo tikeli rani atu Křisto mo mai, matan vara řa eři mai tataholo na nahon God na rasua. <sup>25</sup> Pani nake, matan rasua mo mai moiso, řa sopo mele toho na ruhuruhun tea, <sup>26</sup> matan hin Křisto Iesu, kamim mo isoiso ka natun God mata rasua. <sup>27</sup> Matan kamim matuvana ka paptijo hin Křisto, ka ru Křisto na maurimim. <sup>28</sup> Matan haratu, mo sopo te Jew teni te tamlohi řořoha, teni slev, teni te tamlohi purongo teni te lamane teni te hařai, matan kamim mo isoiso ka matea hin Křisto Iesu. <sup>29</sup> Ale vara kamim non Křisto, kamim ka mahapin Abraham, la haratu sei la pa lavi na vua retitauhi.

## 4

### *Enra Ra Natun God*

<sup>1</sup> Rarami noku reti enia vara natun tamlohi matea enia i pa lavi na korun tamana, enia mo sopo tinapua na slev matea, hina purongo vara hinau tari enia nona. <sup>2</sup> Pani natirihia atu, i pa lo toho na ruhuruhi lima tamlohi matea mata i pa kilaua peresi na volitusi non tamana i tikeli rani atu tamana mo taua moiso.

<sup>3</sup> Mo sohen haratu isaia, na rani ra pa lo natuvarihia, noia romromi mo lo toho na ruhuruhi liman vui varama nika.

<sup>4</sup> Pani rani tataholo mo pala, God mo rule Natuna, mo vora isana haiai matea, mo vora na ruhuruhi leu, <sup>5</sup> vara i volituhu la haratu la lo toho na ruhuruhi leu, matan vara God i pa korohira ra mai natuna tataholo. <sup>6</sup> Ale matan ka natun God, enia mo rule na Tanumen Natuna mo mai na lolo mapura, mo vaia ra efi tovi God sohena, "Tata, Tamaku". <sup>7</sup> Matan haratu, ko sopo mele slev, pani ko natun God, ale vara natun God, o pa lavi na vua retitauhi non God.

### *Paul Mo Romi Na Mara Galatia*

<sup>8</sup> Tuai ka sopo lo levosahi God, ka lo toho na ruhuruhi lima vui varama sei tamlohi hai la vereia vara enira god, pani enira la sopo god. <sup>9</sup> Pani nake, matan ka levosahi God, pani vara a reti tataholo, God mo levosahi kamim tiroma, ale mata sava ka opoia vara ha mele slev nona vui varama sei, la sopo efi vai te hinau, ale la sopo ruhu hin te hinau hatelete? <sup>10</sup> Ka lo ololo hin te rani tapu, teni te vitu tapu, teni te taro, teni te tauni mata sava?

<sup>11</sup> Enau na lo romromia vara korong vara i vono, na lo kalvono purongo matamim. <sup>12</sup> La vorai peresi na vevorai, na usia isamim vara ha materi soheku, matan na sohemim kamim mo sopo Jew, ka materi na leu. Hin rani atu na lo toho peresi kamim, ka sopo vai te hinau i sati isaku. <sup>13</sup> Ka levosahia vara hin rani atu, na pa tapulo retivujavujangi na retiruhu isamim, na rojo makomona.

<sup>14</sup> Hina purongo vara epeku mo sati

sohena vaihite matea isamim, pani kamim ka sopo hitelehilehiau teni tipahiau. Ka kilauau sohena enau angelo non God matea teni sohen Kristo Iesu. <sup>15</sup> Pani nake nomim avulahi mo haipu? Na levosahi mamahunia vara hin rani atu, vara ha efi vaia, korong ka julai narihi na matamim moiso vara ha silera isaku vara i tueniau na noku rojoa. <sup>16</sup> Korong na mai sohena nomim meresahi matan na lo vere na retivara ruhu isamim?

<sup>17</sup> La tamlohi vujangi haluhalu atu sei la lo vaihitea vara ha usurira, mo sopo matan vara la pa tueni kamim. La vaihitea vara ha ruhu hiniau matan vara ha tapurongo isara purongo. <sup>18</sup> Tarea mo ruhu vara ha turu rilangi mata vai na vavahinau ruhu, mo mele ruhu jea na rani na sopo toho peresi kamim. <sup>19</sup> La natuku ruhu ruhu, enau na sohena haiai matea mo rongohaji vara i mele lavilavi, ale i pa lo sohena isaku i tikeli rani atu, maurin Kristo i jea isamim. <sup>20</sup> Vara a pa lo toho peresi kamim nakerihia, a pa retireti malum peresi kamim, matan na sopo levosahia vara a pa mele vai na sava isamim.

### *Hagar Enia Sarah*

<sup>21</sup> Ha to vereia isaku kamim sei ka opoia vara ha lo toho na ruhuruhi leu, ka levosahi na sava leu mo lo vereia? <sup>22</sup> Matan la ulia na Retiulia, vara Abraham natuna lamane mo rua, matea isana haiai slev matea, moiso matea isana haiai materi matea, narouna. <sup>23</sup> Pani natun haiai slev atu, mo vora na masalo tamlohi purongo, ale natun narouna, mo vora usuri na retitauhi non God.

<sup>24</sup> Ale la haiai atu mo rua la tovongi la retitauhi atu mo rua sei God mo vaira. Haiai sei Hagar, mo sohena retitauhi sei God mo vaia na vutivutin Sinai, hin jara atu natu, tamlohi la tapulo mai slev mata leu ea. <sup>25</sup> Ale Hagar enia vutivutin Sinai atu Arabia; enia mo sohen Jerusalem sei matan nona tamlohi la lo toho na ruhuruhi leu, la sohena slev mo kakau nake.

<sup>26</sup> Pani Sarah, haʻrai materi atu mo sohen Jerusalem aulu na tuka, enia tinaʻra. <sup>27</sup> Ale Isaiah mo ulia na Retiulia mo vereea mara, 'Haʻrai aroaro, o avulahi, o avulahi tavera, o ulu aulu, hina purongo ko sopo vasusui te natum, matan nake, haratu mo aroaro mo vasusui mo jeua na haʻrai lahi tinapua.' *Isa 54.1*

<sup>28</sup> Ale nake la vorai peresi na vevorai, kamim ka sohen Isaac, ka natuvarihi mata retitauhi. <sup>29</sup> Pani nake, mo pa lo sohen rani atu, haratu sei mo vora usuri na masalo tamlohi, mo lo tipahi haratu sei mo vora usuri na Tanumen God.

<sup>30</sup> Pani Retitapu mo vere na sava? Mo vereea mara, 'O tipahi naʻrihi na haʻrai slev enia natuna, matan natuna i sopo lavi na korum, matan korum enia non natun haʻrai materi purongo.' *Gen 21.10* <sup>31</sup> Ale la vorai, mo sohen natu, enʻra ʻra sopo natun haʻrai slev atu, pani enʻra natun haʻrai materi atu.

## 5

### *Ka Materi Na Leu*

<sup>1</sup> Kʻristo mo teriʻra vara ʻra materi jejeu. Ale ha turu ʻrilangi hinia, ha sopo tinaʻrihia vara ha mele mai slev nona leu.

<sup>2</sup> Ka hitea, enau Paul na vereea isamim, vara ha lavi na taiʻralihi matan vara ka ʻromʻromia vara i pa vai kamim ha tataholo na nahon God, vavahinau non Kʻristo i sopo eʻri tueni kamim. <sup>3</sup> A mele vereulia isamim tari sei ka lavi na taiʻralihi vara kamim ha pa ololo vevuhi na leu tari matana.

<sup>4</sup> Kamim sei ka lo opoia vara ha ololo na leu, matan vara i vai kamim ha tataholo na nahon God, ka lo hase langahi naʻrihi kamim isan Kʻristo, ale ka jovi naʻrihi na ʻromʻruhu non God.

<sup>5</sup> Matan enʻra sei Tanume Tapu mo lo mauri isaʻra mata rasua, ʻra lo kilau toho mata retitauhi sei vara God i pa vaiʻra ʻra tataholo na nahona. <sup>6</sup> Matan hin Kʻristo Iesu, taiʻralihi teni tea vara mo sopo taiʻralihi, enia hina purongo. Pani hina aulu mata rasua, enia vara opoia i vujangi na vavahinau tari.

<sup>7</sup> Tiroma ka lo vano mo ʻruhu moiso. Hare mo posi na ʻromimim, mo vai kamim ka sopo mele usuri na reti-varaʻruhu? <sup>8</sup> God sei mo tovi kamim, mo sopo posi na ʻromimim sohen. <sup>9</sup> Ha levosahi retireti sei la vereea lara, 'Wai vahona makomona purongo, i pa eʻri vai na mit tari la hohona'. *1Co 5.6* <sup>10</sup> Hin Moli, na levosahi mo ʻruhu vara, ʻromiʻra i pa matea na hinau tari, ale vara ha levosahia vara sava tamlohi natu mo lo tikauleji kamim, i pa lavi na talai non God.

<sup>11</sup> La vorai peresi na vevorai, vara a pa lo retivujavujangi vara ha pa taiʻralihi sohen hai la vereea vara na lo vaia, mata sava natu Jew la lo tipahiau? Matan la lo ʻrohu hiniau, mo vujangia vara na lo retivujavujangi na talopeilopei non Kʻristo. <sup>12</sup> Na opoia vara la haratu sei la lo vai na ʻromimim la lo kaka, la lo opoi jea vara ha taiʻralihi, mo ʻruhu vara la hase votaira.

<sup>13</sup> La vorai peresi na vevorai, God mo tovi kamim moiso vara ha materi, pani ha lo kilaua, ha sopo usuri na masalo varama, pani na nomim opoia, ha lo kilau mata masapa vara ha tueni na tamlohi rasua tinapua. <sup>14</sup> Matan leu tari ʻra eʻri verera vara la vere na leu matea purongo, 'O opoi na tinapua sohen ko lo hasem opoiho.' *Lev 19.18*

<sup>15</sup> Pani vara ka lo hatihati kamim hasemim, ale ka lo ʻrolomi kamim hasemim, ha lo kilau matan posposi sei i pa eʻri vaikomokomo kamim hasemim.

### *Masalo Tamlohi Mo Rohu Hin Tanume Tapu*

<sup>16</sup> Pani na vereea vara ha hahau usuri na Tanume Tapu matan vara ha sopo mele usuri na masalo varama. <sup>17</sup> Matan masalo varama mo ʻrohu hin la hinau atu Tanume Tapu mo opoia. Ale Tanume Tapu sohen, mo ʻrohu hin la hinau atu, masalo varama mo opoia, matan enira la meresahi isara hatehateahi, ale matana, mo vaia mo ʻrilangi vara ha vai na sava ka opoia. <sup>18</sup> Pani vara Tanume Tapu mo

lo tiroma hin kamim, kamim ka sopo toho na ruhuru leu.

<sup>19</sup> Vavahināu mata masalo varama la memera purongo sohen harihi: mauri maji, řomřomi hina lumiha, posposi mo lumiha jea, <sup>20</sup> lotulotu vono, majaputu, valum lolokoru, vasvas, mereimerei, lolokoru patum, řomřomi hasem na hināu tari, patumasa, řomřomia vara vaom hasena purongo la tataholo, <sup>21</sup> řomusuri, putu na wai řilangi, la matavuhi mata lavilavi na tināpua, ale mele hināu tinatināpua sohera. Na lo mele retiřoāřoahai kamim sohen na retiřoāřoahai kamim tiroma moiso, vara haratu mo lo vai la hināu sei, enia i pa sopo unu hin mauri atu God mo aulu hinia.

<sup>22</sup> Pani, vua Tanume Tapu mo sohen harihi: opoia, avulahi jea, tamata, řomperavu, řomřuhu, posposi mo řuhu, o vai na sava ko retitauhi hinia, <sup>23</sup> posposi malum, o hase taurilatihu i řuhu. Mo sopo te leu mata i pisuhi na posposi sohera.

<sup>24</sup> Ale la haratu la tamlohi rasu non Křisto Iesu, la vosae na masalo varama peresi na nona opoia sasati, peresi na nona řomřomi lumiha na talopeilopei. <sup>25</sup> Vara řa lavi na Tanume Tapu, řa pa hahau usuri na Tanume Tapu. <sup>26</sup> Ra sopo pohapoha, teni řa lo vaivairā teni řa lo mereimerei hiniřa.

## 6

### *Tueniřa Tarea*

<sup>1</sup> La vorai peresi na vevorai, vara tea mo jovi hin te hehe, kamim sei ka lo usuri Tanume Tapu, na posposi malum, ha tuenia vara i mele turu. Ha hase kilau mamahuni kamim, vara tea i sopo jovi hin hehe atu tamlohi atu mo vaia. <sup>2</sup> Ha tuetueni kamim tarea na nomim rani řilangi, ale vara ha lo vaia sohenā, ka lo vai mařivisi na leu non Křisto. <sup>3</sup> Matan vara te vonamim mo řomřomia vara enia te hināu hinia, pani mo sopo te hināu hinia, mo lo hasena halua.

<sup>4</sup> Pani mo řuhu vara o hasem vaihite na nom vavahināu, ale vara mo řuhu, o pa eři mangisi matana, pani

mo sopo mata vavahināu nona tināpua. <sup>5</sup> Matan enřa hatehateahi řa pa hase lavi na nořa tetehi.

<sup>6</sup> Mo řuhu vara haratu la lo lavi na vujangi mata reti non God, la voli la haratu la lo vujangira.

<sup>7</sup> Ha sopo tinařihia vara tea i halu kamim. Ha sopo řomřomia vara God mo lo kilau purongoi na sava ka lo vaia, sava ka lo lavoa, ha pa hani na vuana. <sup>8</sup> Matan haratu mo lavo na masalo varama, hin masalo varama atu i pa lavi na vua mata komokomo. Pani haratu sei mo lavo isan Tanume Tapu, i pa lavi na vua mauri tui. <sup>9</sup> Ale mo řuhu vara řa sopo maloko mata vai na posposi řuhu, matan na pongina tataholo vara řa sopo maloko, řa pa lavi na vuana. <sup>10</sup> Ale, nake matan masapařa, mo řuhu vara řa vai na hina řuhu isana tamlohi tari, ale i pa mele řuhu jea vara řa vaia isan la haratu la rasua.

### *Isoiso Reti*

<sup>11</sup> Ha hitevosahia vara na lo uliuli hin leta nike na leta hatehateahi tatavera isamim. <sup>12</sup> La haratu la lo vaihitea vara la vai kamim ha taiřalihi, la lo vaia mata hināu matelete purongo, la matahu vara tea la pa tipahira matan vujangi sei vara talopeilopei non Křisto hasena, i eři juri na tamlohi. <sup>13</sup> Ale la haratu sei la lo vere na taiřalihi, la sopo oloolo tataholo na leu tari. Pani la opoia purongo vara ha taiřalihi matan la pa eři retipohapoha matana, ale la pa vereā vara kamim nora tamlohi.

<sup>14</sup> Pani enāu, mo sopo te hināu vara a eři mangisi matana, pani talopeilopei non nořa Moli Iesu Křisto purongo. Nona talopeilopei mo vai na masalo varama la mate hināu, ale mo vaiau na sopo mele řomřomi na masalo varama. <sup>15</sup> Mo sopo te hināu hinia vara te tamlohi mo taiřalihi teni i vono. Pani hina aulu enia vara mauri paro sei mo posi na mauri tamlohi. <sup>16</sup> Na lo usiusi vara řomopoia non God peresi na nona tamata, la toho isan la haratu la lo usuri mauri nike. Enira natu, Israel varařuhu non God.

<sup>17</sup> Ale mo tapulo nake mo vano, na sopo opoia vara te tamlohi i vai na rani řilangi isaku, matan na lavi na matara maja na epeku mo vujangia vara enau tamlohi non Iesu.

<sup>18</sup> La vorai peresi na vevorai, noku usiusi vara řomřuhu non nořa Moli Iesu Křisto i toho isamim tarea. Amen.

## Ephesians

### Leta Paul Mo Ulia Isana Mara Ephesus Leta Nike

'Ra hasohaso God sei enia Taman Moli Iesu Křisto, matan enia mo leřuhu hiniřa na leřuhu tari matan tuka sei la tai isan Tanumena matan Křisto.' (1.3). Paul mo tapulo uli na hina aulu hin nona retisohai sei, vara Křisto mo mate na talopeilopei mo vaiřa řa materi řa mai natun God (1.7-8). Ale nake mo lo sakele aulu na tuka na matuan God, mo aulu na hinau tari nake i pa aulu tui tui (1.20-21).

Křisto mo vilijojovi vořa tavera sei mo lo turu na livuhařa sei mo lo vaiřa řa lo meresahi (2.14) mo vaiřa řa mai matea na Tanume Tapu (2.22) usuri na masalon God (3.11).

Moli matalete, Tanume Tapu matalete, God matalete mo aulu na hinau tari (4.4-5). Mo vereā mara kalesia la pa hahau na tamata usuri na Tanumen God (4.3).

Ephesus mo lo toho mariviti na pahisa tasi Asia Minor (nake la tovia Turkey). Hin rani atu enia havati taon tavera hin jara atu na ruhuruhun Rome. Enia jaran Artemis, god hařai atu tamlohi řořoha la lo lotua ea (Acts 19).

Paul mo vujangia vara na natun God la pa hahau hin mauri paro nike sohena sava (4.17-5.20). Tamlohi usuri non Moli la lo toho na opoia non God, ale la pa usuri na masalona (5.1). La malue na řořoha, la pa hahau na malarani, ale maurira la pa meresahi na tinapua (5.8-9).

Paul mo vujangia vara tamlohi, hařai lahi peresi na natura, ale slev peresi na nora tamlohi tavera la pa hahau sohena na maurira hin Křisto (5.21-6.9).

Paul mo levosahi mamahuni na řomopoia non God:

'Pani God, na nona řomopoia tavera jea, mo opoiřa mo tavera jea, mo sořotahiřa peresi Křisto ale mo sileřa na mauri paro, hina

purongo vara enřa řa pa lo toho na mate mata nořa lejileji - God mo juri kamim usuri na nona řomřuhu - Matan kamim ka lo juri usuri na nona řomřuhu na rasua, kamim hasemim ka sopo vaia, enia otori non God isařa.' (2.4-5, 8)

#### Hin Leta Nike

1. Retioloolo (1.1-2)
2. Otori non Křisto hin Tanume Tapu (1.3-3.21)
3. Mauri paro hin Křisto (4.1-6.20)
4. Isoiso Retioloolo (6.21-24)

#### *Retioloolo Non Paul Isana Mara Ephesus*

<sup>1</sup> Enau Paul, enau vahařule matea non Křisto Iesu usuri na masalon God. Na lo uli leta nike isana tapuhi Ephesus, la haratu la lo turu řilangi hin Křisto Iesu.

<sup>2</sup> Na lo ususi vara God Tamařa peresi nořa Moli Iesu Křisto la sohā na nora řomřuhu peresi na tamata isamim.

#### *God Mo Leřuhu Hiniřa Hin Křisto*

<sup>3</sup> Ra hasohaso God sei enia Taman Moli Iesu Křisto, matan enia mo leřuhu hiniřa na leřuhu tari matan tuka sei la tai isan Tanumena matan Křisto. <sup>4</sup> Matan God na nona opoia mo viřoniřa hin Křisto tiroma moiso mo pa vai na varama, vara řa pa tapu ale řa vokevoke na nahona. <sup>5</sup> God mo taua tiroma moiso vara i pa laviřa sohena nona korohi řa mai natuna tataholo hin Iesu Křisto, usuri na nona řomavulahi peresi na masalona.

<sup>6</sup> Matan haratu, řa hasohaso God matan nona řomřuhu tavera sei mo sureia hiniřa, matan enřa non Natuna sei mo opoia mo tavera jea.

<sup>7</sup> Křisto mo volituhuřa na řaena, ale God mo řomiřa mata nořa hehe usuri na řuhuřuhu mata nona řomřuhu, <sup>8</sup> ale mo surei tavuniřa na nona řomřuhu usuri na nona lelevosahi.

<sup>9</sup> God mo vaia hin haratu mo vuhesia na jara tavera. Mo vuhesi na nona hina luhu mata masalona usuri na nona řomavulahi sei mo taua hin Křisto, <sup>10</sup> ale řomřomi tavera atu non God sei mo taua moiso i pa masese na ranina tataholo sei vara Křisto i pa aulu na hinau tari na tuka peresi na varama. <sup>11</sup> Ale God mo vai na

hināu tari la masese usuri na masalona, mo taua tiroma moiso vara i pa viřoniřa nona vara řa pa vao matea hin Křisto. <sup>12</sup> Matan vara kamam Jew sei kama lo tau na nomam řomtoho tiroma hin Křisto, God i pa lavi na hasohaso tavera matana. <sup>13</sup> Ale kamim sohena, ka sořotahi peresi na vaon Křisto hin rani atu ka rongo na reti mata varařuhu sei Retiřuhu mata nomim juri. Kamim ka tau na nomim rasua hin Křisto ale ka lo sořotahi peresia, ale matan ka sořotahi peresi Křisto, God mo sile kamim na Tanume Tapu sei mo retitauhi hinia tiroma moiso isana nona tamlohi. God mo vujangia vara ka nona matan mo sile kamim na Tanumena Tapu. <sup>14</sup> Tanume Tapu sei mo sohena retitauhi matea sei mo vujangia vara God i pa sileřa na hina řuhuřuhu sei mo retitauhi hinira moiso, vavano i tikeli rani atu God i mařivisi na nona vavahināu mata volituhu na nona tamlohi tari, ale matan haratu, řa pa hasohaso nořa God.

#### *Usiusi Mata Lelevosahi Varařuhu*

<sup>15</sup> Matan hināu akerihi natu, mo tapulo hin rani atu nara na rongo na nomim rasua hin Moli Iesu peresi na nomim opoia isana tapuhi tari, <sup>16</sup> na sopo lo isoiso na noku vere meje isan God matamim na rani na lo usiusi vara na řomřomi kamim. <sup>17</sup> Na lo usiusi vara God non nořa Moli Iesu Křisto sei memerana řuhuřuhu mo tavera jea, vara Tanumena i sile kamim na nona lelevosahi peresi na hitevosahi matan vara ha eři ulua na nomim levosahi hin God, <sup>18</sup> matan enia mo vai na mapumim mo mařivi na memera, matan vara ha eři hitevosahi na řomtoho řuhuřuhu sei mo tovi kamim matana, ale matan vara ha eři hitevosahia vara nona leřuhu řuhuřuhu sei la řuhuřuhu jea la sohena sava isana nona tamlohi.

<sup>19</sup> Ale na lo usiusi vara ha pa tapulo hitevosahi na tavera suišana řuhuřuhu sei enia nořa, enřa sei řa rasua. Suiha nike enia pa suiha tavera jea atu <sup>20</sup> sei mo sauteterahi Křisto na mateia ale mo sakelehia na jara oloolo tavera na matuan God na

tuka aulu hinia, <sup>21</sup> God mo tahea mo aulu jea mo jeu la haratu la aulu, teni la haratu la lo tauri na suiha, teni la haratu la lo řilangi, teni la haratu la lo tiroma hin tea, teni na hija tari sei la lo toho, mo sopo hin pongi akerihi purongo pani hin pongi atu mo lo mai sohena. <sup>22</sup> Ale God mo tau na hināu tari na ruhuruhu palon Křisto, ale mo vai Křisto sei mo aulu na hināu tari vara i patu nona kalesia tari, <sup>23</sup> ale nona vao kalesia tari enira epena, ale maurin Křisto natu mo lo mařivisi na hināu tari.

## 2

### *Mauri Paro Hin Křisto*

<sup>1</sup> Tiroma ka mate mata nomim lejileji peresi na hehe sei <sup>2</sup> ka lo toho hinira usuri na malelen varama nike nake, usuri na masalon Setan, enia supe rihirihi řilangi atu sei mo aulu na masapa, natu mo lo voko na mapun la haratu sei la řohu vara la oloolo hin God. <sup>3</sup> Enřa řa sohera tiroma, řa lo hahau usuri na masalořa, ale řa loloso na masalořa sei mata epeřa peresi na řomiřa, ale řa vora řa natu talai lolokoru non God mata hehe sohena tamlohi tari tinapua.

<sup>4</sup> Pani God, na nona řomopoia tavera jea, mo opoia mo tavera jea, <sup>5</sup> mo sořotahiřa peresi Křisto ale mo sileřa na mauri paro, hina purongo vara enřa řa pa lo toho na mate mata nořa lejileji – God mo juri kamim usuri na nona řomřuhu. <sup>6</sup> Matan God mo sauteterahiřa na mateia peresi Křisto, ale mo sakelehiřa peresia na tuka matan enřa řa matea peresi Křisto Iesu, <sup>7</sup> mo vaia matan vara hin la pongi sei la pa mai, i pa vujangia vara nona řomřuhu mo tavera jea sohena sava isařa usuri na nona řomřuhu tari hiniřa hin Křisto Iesu.

<sup>8</sup> Matan kamim ka lo juri usuri na nona řomřuhu na rasua, kamim hasemim ka sopo vaia, God sei mo sile purongoi otori nike isařa; <sup>9</sup> mo sopo juri kamim mata nomim vavahināu, mo vono matan vara tea i sopo eři mangisi matana. <sup>10</sup> Matan enřa vavahināu non God, mo vaiřa řa



mai hina paro matea hin Křisto Iesu matan vara řa pa vai na vavahinau řuhu sei God mo tatamahunira tiroma moiso matan vara řa pa hahau hinira.

### *Enřa Ra Matea Hin Křisto*

<sup>11</sup> Matan haratu, na opoia vara kamim sei ka vora tamlohi řořoha, ha to řomřomia sohena sava ka lo toho tiroma, ale Jew la lo vereva vara kamim ka sopo tatuara matan ka sopo taiřalihi sohera, hinau sei tamlohi la lo vaia na epera purongo pani mo sopo tueni na mapura, <sup>12</sup> ale ha sopo řomalihio vara hin la rani atu ka lo toho pani mo sopo te nomim Křisto, ka lo toho ka sopo tatua vao tavitavin Israel, ale ka vinano na nora retitauhi mata leřuhu non God, ale mo sopo te nomim řomtoho, ka lo toho na varama pani ka sopo levosahi God. <sup>13</sup> Pani nake hin Křisto Iesu, kamim sei tiroma ka lo toho asau řove isan God, God mo lavi kamim ka mai mariviti isana na řaen Křisto Iesu. <sup>14</sup> Matan Křisto natu, mo tau na tamata isamam Jew peresi kamim tamlohi řořoha, mo vaiřa řa mai vao matea. Nona mateia mo vilijojovi vořa tavera mata hitesatihi na tinapua sei mo lo turu na livuhařa, ale mo lo vaiřa řa lo meresahi, <sup>15</sup> na nona mateia mo vai na leu tari nona Jew la isoiso. Mo vaia matan vara i vai na vao tamlohi paro matea i malue hin la haratu mo rua mata nona sari tamata, <sup>16</sup> ale Křisto mo vaira la epe matea, mo sořotahira jara matea isan God na nona mateia, ale hinia, mo vilimatei na nořa hitesatisatihiřa. <sup>17</sup> Ale mo mai ale mo retivujavujangi na tamata isamim sei tiroma ka lo toho asau řove hin God, ale tamata isan la haratu la lo toho mariviti, <sup>18</sup> matan vara hin Křisto enřa tolu řa pa eři mai isan God Tama na Tanumena sei mo matelete purongo.

### *Ra Mai Iman God Paro*

<sup>19</sup> Ale nake ka sopo mele vinano teni tamlohi mata jara tinapua. Pani ka tamlohi hin jara atu tolu na nona tapuhi, ka tamlohi lolo iman God.

<sup>20</sup> Enřa řa imana, řa lo turu na pulon ima sei God mo vaia na nona vahařule peresi na přovet matan nake, ale Křisto Iesu natu enia pulo vatu matan ima atu. <sup>21</sup> Hinia, ima tari la lo sořotahi mamahu mo řuhu, la ulua la mai temple tapu matea hin Moli sei <sup>22</sup> kamim sohena, God mo lo voro kamim ka mai jara matea vara ha mai jara toho matea non Tanumen God.

## 3

### *Romřomi Luhu Non God*

<sup>1</sup> Matan řomřuhu non God sei natu, enau Paul na lo toho na ima řilangi matan noku vavahinau non Křisto Iesu matamim la tamlohi řořoha. <sup>2</sup> Na levosahia vara ka levosahi moiso sohena sava God mo sileau hin vavahinau řuhu nike mata vereuli na sava hinau řuhu mo vaia mata juri kamim. <sup>3</sup> Sohena na ulia makomona tiroma moiso hin leta nike vara God hasena mo vuhesi na nona řomřomi luhu isaku moiso. <sup>4</sup> Vara ha lo evia, ha pa eři hitevosahi na sava na levosahia moiso hin hina luhu atu hin Křisto. <sup>5</sup> Hina luhu nike, God mo sopo vuhesi isan te pina tamlohi na varama tuai sohena Tanumena mo vuhesia nake isana nona vahařule tapu peresi na přovet.

<sup>6</sup> Hina luhu atu enia harihi: enia vara tamlohi řořoha tolu na Jew tari enira la pa lavi na hina řuhuřuhu sei God i pa silea isana natuna. Enira tupra rua la pa juri matan la rasu na Retiřuhu, ale la sopesope tavalu epe matea purongo, ale enira tupra rua la pa lavi na vua retitauhi hin Křisto Iesu. <sup>7</sup> Enau na mai volitusi matea non Retiřuhu nike usuri na otori řuhuřuhu mata řomřuhu non God sei mo silea isaku usuri na nona vavahinau na suihana.

<sup>8</sup> Hina purongo vara enau na atano jea na tapuhi non God, enia mo řomřuhu isaku vara a pa retivujavujangi na řuhuřuhun Křisto isana tamlohi řořoha na sava tea i sopo eři levosahi te hinau matana, <sup>9</sup> ale vara a vai na tamlohi tari la memera na řomřomi luhu non God sei mo vai na hinau tari sei mo jarohia tuai moiso.

<sup>10</sup> Āromāromi tavera non God enia mata vujangi na nona lelevosahi na malele tinatinapua tari na lima nona tamlohi isana vui varama sei la lo aulu peresi la haratu la lo tauri na suiha na masapa peresi na tuka.

<sup>11</sup> Haratu natu mo usuri na nona āromāromi sei mo taua matan tuai tiroma moiso vara Křisto Iesu noā Moli i pa vai mařivisia.

<sup>12</sup> Matan hin Křisto řa eři turu řilangi, ale enia mo vaiřa řa eři řomřilangi na noā rasua řa sopo matahu vara řa mai na nahon God.

<sup>13</sup> Matan haratu, na lo usi kamim vara mapumim la sopo jovi mata noku rani řilangi matamim, ha lavia sohena hina řuhu matea isamim.

### *Usiusi Non Paul*

<sup>14</sup> Matan hinai nika, na lo papaohi atano na nahon God Tama, <sup>15</sup> enia haratu sei mo tau na hija vao tari na tuka peresi na varama. <sup>16</sup> Na lo usiusi vara God na nona leřuhu řuhuřuhu matuvana, i tinařihia vara i vai na lolomim la suiha hin suiha atu Tanume Tapu mo lo silea. <sup>17</sup> Na lo usiusi vara Křisto i pa toho na lolo mapumim na nomim rasua, na lo usiusi vara na nomim wariha i řilangi na opoia řuhuřuhu non God, <sup>18</sup> na lo usiusi vara ha pa eři hitevosahia peresi na tapuhi tari vara nona opoia mo tavera sohena sava, mo peravu sohena sava, mo aulu sohena sava, ale mo puaha sohena sava, <sup>19</sup> ale matana, na lo usiusi vara řa eři levosahi na opoia non Křisto sei mo jeu na lelevosahi, matan vara ha pa mařivi savulevule na mauri peresi na suiha tari sei la lo tai isan God.

<sup>20</sup> Na lo usiusi isan God sei suihana tavera jea mo lo voko hiniřa sei i eři vai na hinai la jeu na sava řa lo usia teni řa lo řomřomia, <sup>21</sup> vara i lavi hasohaso tavera na vao kalesia tari, ale hin Křisto Iesu na rani tari, tui tui, amen.

## 4

### *Enřa Epe Matea Hin Křisto*

<sup>1</sup> Matan haratu, enai prisoner matea non Moli, na lo usia řilangi

vara ha hahau na malele mo tata-holo na nahon God usuri mauri atu mo tovi kamim matana. <sup>2</sup> Ha řomatano, ha řuhu isana tinapua, ha řomperavu isamim hatehateahi, na opoia ha řomřomi purongo na hinai sei tinapua la jovi hinira. <sup>3</sup> Tanume Tapu mo sořotahi kamim moiso, ale ha hahau na tamata matan vara ha pa matea.

<sup>4</sup> Enřa mo isoiso řa epe matea, ale enřa mo isoiso řa lavi na Tanume Tapu matelete purongo, ale enřa mo isoiso God mo toviřa matan mauri řuhuřuhu atu na rani mo lo mai. <sup>5</sup> Moli enia matelete purongo, rasua matea, paptijo matea, <sup>6</sup> ale God matelete purongo, enia Tamařa sei enia mo aulu hiniřa mo isoiso, ale mo lo toho hiniřa mo isoiso, ale mo lo vavahinai hiniřa mo isoiso.

<sup>7</sup> Pani Křisto mo sileřa hatehateahi na vavahinai řuhu usuri na masalona řuhuřuhu. <sup>8</sup> Matan Retitapu mo vereia tuai moiso vara,

‘Rani atu mo sahe aulu na tuka, mo tiroma na vao matea mo terira, ale mo sile na otori isana nona tamlohi.’ *Psa 68:18*

<sup>9</sup> Reti sei ‘mo sahe aulu’ mo lo řarami na sava? Mo řaramia vara enia mo sivo na lolo varama tiroma. <sup>10</sup> Haratu sei mo lo sivo atano na lolo varama enia haratu sei mo sahe aulu vara i aulu na hinai tari na tuka.

<sup>11</sup> Enia haratu sei mo sile na tamlohi hai isana vao kalesia sohena vaharule, hai sohena pōvet, hai la evangelist, hai la tavui kalesia, ale hai la tamlohi vujangi. <sup>12</sup> Nora vavahinai enia matan vara la pa eři vujangi mamahuni na tapuhi, matan vara la eři vai na vavahinai non God, ale enia vara la vai na epen Křisto sei enřa kalesia tari, la ulua i řilangi, <sup>13</sup> yavano i tikeli na rani enřa mo isoiso řa matea na rasua peresi na lelevosahi hin Natun God. Ale řa mai tamlohi jea na řomřomi, ale řa ulua řa sohen Křisto vevuhi.

<sup>14</sup> Moiso řa pa sopo mele sohena natuvarihi sei tarea řomira la sopo levosahi mamahuni na sava la lo rasua. Ale la řomkaka matan tea mo vere te hinai tinapua isara teni te

reti nona tamlohi vujangi haluhalu sei mo vai halu atu la rongoa sohena retivararūhu matea isara. <sup>15</sup> Ra pa sopo sohera pani řa lo taurilati na retivararūhu na opoia, ale na hinau tari řa pa ulua hin Křisto sei enia patu epena. <sup>16</sup> Epena tari la lo ulua na limana purongo, la lo sořotahi mo řuhu matan manmanina tari la lo taurilatira jara matea. Vara kale-sia hatehateahi la vai na řungara vavahinau, pa epena mo ulua na opoia.

### *Mauri Paro Hin Křisto*

<sup>17</sup> Ale na lo vereā řilangi isamim na hijan Moli vara ha sopo mele hahau sohena tamlohi řořoha sei nora řomřomi mo rongorongono vono. <sup>18</sup> Nora řomřomi řořoha, mo lo toho asau řove na maurin God matan mapura mo řilangi ale mo horora vara la sopo eři lelevosahi. <sup>19</sup> Matan la sopo eři mele mahanuhanu hin te nora hehe, la pute na nora mauri maji, ale la lo řomřomjea vara la vai na posposi lumiha sasati tari.

<sup>20</sup> Pani hin rani atu ka tau na nomim rasua hin Křisto, la sopo vujangia vara ha mauri sohena, <sup>21</sup> na levosahia mo řuhu vara ka pete rongoa te hinau matana moiso, ale ka sořotahi peresi Iesu usuri na retivararūhu sei la vujangia isamim moiso. <sup>22</sup> La vujangia isamim tiroma moiso vara ha tau nařihi na nomim mauri tuai mata hehe sei la posposi lumiha sasati sei mata halu la vaia mo lo ranga jea, <sup>23</sup> ale ha tinařihiā vara Tanumen God i posi na řomimim peresi na nomim kilakilau la paro. <sup>24</sup> La vujangia isamim vara ha ru na mauri paro sei God mo vaia usuri na masalona, mo tataholo, mo tapu ale mo vararūhu.

<sup>25</sup> Matan haratu, ha isoiso na halu sohen přovet matea mo vereā mara, 'kamim hatehateahi ha retireti tataholo isana tahisamim' *Zec 8.16* matan enřa řa nořa hatehateahi. <sup>26</sup> 'Vara ka lolokoru, ha sopo hehe!' *Psa 4.4* Ha sopo tinařihiā vara pulo nomim lolokoru i aulu hin kamim i peravu,

<sup>27</sup> vara i vono, ha pa sile na masapa isan Tiapolo vara i aulu hin kamim.

<sup>28</sup> Vara engko tamlohi vavanaho matea, o isoiso na vavanaho. O tapulo hani na masumasum, ale o hansohai isan la haratu la vejuveju. <sup>29</sup> Ha sopo tinařihiā vara te reti sasati hatea i malue na jingomim, pani ha pa lo vere na reti řuhu purongo matan vara la eři tueni la haratu la lo rongora.

<sup>30</sup> Ale ha sopo vai na Tanume Tapu non God i rongoa i sati na sava ka lo vaia, matan enia natu mo tapuhi kamim moiso matan rani atu God i pa juri kamim hinia.

<sup>31</sup> Ha pulahi nařihi na nomim posposi hohona, lolokoru sati, lolokoru, ngaruhi na tinapua, retifeřesi na tinapua, ale ha pulahi nařihi na posposi sasati tari la sopo toho na maurimim.

<sup>32</sup> Pani ha vai na posposi řuhu isamim hatehateahi, ha řomopoi, ha řomi kamim hatehateahi sohen God hin Křisto mo řomi kamim.

## 5

### *Ha Hahau Na Malarani*

<sup>1</sup> Matan haratu, ha usuri na tovongi non God na hinau tari ka lo vaira sohena natuna tataholo sei mo opoira mo tavera jea, <sup>2</sup> ale ha toho na opoia sohen Křisto mo opoira sei mo sile na maurina matařa sohena malamalai matea asuna mo ponaha mo řuhu isan God.

<sup>3</sup> Ha sopo tinařihiā vara te mauri maji teni te řomřomi lumiha, teni te hanmarua i toho isamim. Matan la hinau nika la sopo eři toho isana tapuhi non God. <sup>4</sup> Ha sopo vere na hina lumiha teni retireti rongorongono vono, teni sorahi sati na hařai teni tamlohi — la hinau tari sei enia la sopo tataholo isamim. Pani na jarara, ha vere meje isan God. <sup>5</sup> Matan ha levosahi mamahunia vara haratu mo lo vai na mauri maji, teni řomina mo lumiha, teni mo hanmarua matan tamlohi hanmarua matea enia tamlohi lotulotu vono matea, i pa sopo eři unu hin mauri atu Křisto enia God la supe hinia. <sup>6</sup> Ha sopo tinařihiā

vara tea i halu kamim i vereea vara sava na lo vereea akerihi la retireti purongo, matan talai lolokoru non God mata hehe i pa jovi isana tamlohi lejileji tari. <sup>7</sup> Ha sopo vai la hinau sei la lo vaira, <sup>8</sup> matan na pongi matea kamim ka lo toho na řořoha, pani nake kamim ka lo toho na malarani matan Moli. Ha hahau sohena natu malarani, <sup>9</sup> matan vua malarani enia mo vai na hina řuhuřuhu tari sei la tataholo ale la varařuhu la pala.

<sup>10</sup> Ha vaihitea vara ha levosahi na sava God mo avulahi hinia. <sup>11</sup> Ha sopo sořotahi peresi tea mata vai na hina sasati mata řořoha, pani na jarara ha vai na tamlohi la levosahia vara la hinau atu la sati. <sup>12</sup> Matan enia hina mahanuhanu matea vara ha lo eři sorahi na hinau tamlohi lejileji la lo vai luhu hinira. <sup>13</sup> Pani hinau tari, malarani mo merasahira la mera mo řuhu vara la sasati sohena sava. <sup>14</sup> Matan hinau tari sei la pala na jara tavera malarani mo vaira la memera, ale Retitapu mo vereea vara,

‘O turu o kilau na nom řommate!

O turu na mateia,  
ale Křisto i pa merasahiho,  
ale ha pa lelevosahi.’

*Isa 26.19; 51.17; 52.1; 60.1*

### *Ha Mauri Na Suihan Tanume Tapu*

<sup>15</sup> Matan haratu, ha lo kilau mamahunia vara ka lo hahau sohena sava, i sopo sohena tamlohi rongorongono vono pani sohena tamlohi lelevosahi. <sup>16</sup> Ha sopo toho purongo pani ha vai na hina řuhu matan la rani nike hehe mo mařivi hinira. <sup>17</sup> Matan haratu ha sopo rongorongono vono, pani ha tamlohi lelevosahi mata levosahi na masalon Moli. <sup>18</sup> Ale ha sopo drong na wai řilangi sei i pa komo na maurimim, pani ha tinařihi na Tanumen God i mařivisi kamim, <sup>19</sup> ale ha lalavete na psalm, na hymn peresi na vete Tanume Tapu mo silera, ale ha sohai na vete sei la lo toho na mapumim la sahe isan God. <sup>20</sup> Tarea ha vere meje isan God Tama matamim hatehateahi na hijan nořa Moli, Iesu Křisto.

### *Reti Mata Lahi Nona Kalesia*

<sup>21</sup> A mele vereea vara ha oloolo hin kamim hatehateahi matan ka lo lotu Křisto na oloolo. <sup>22</sup> Kamim hařai lahi, ha oloolo na tuamim sohena ka lo oloolo hin Moli. <sup>23</sup> Matan tamlohi lahi matea enia patun narouna, mo sohen Křisto enia patu epena sei vao kalesia tari, enia hasena mo sile na maurina vara i jurira. <sup>24</sup> Sohena vao kalesia tari la lo oloolo hin Křisto, ale kamim hařai lahi sohena ha pa oloolo na tuamim na hinau tari.

### *Tamlohi Lahi La Sohen Křisto*

<sup>25</sup> Tamlohi lahi ha opoi na naroumim sohen Křisto mo opoi na nona vao kalesia ale mo hase sile na maurina matana, <sup>26</sup> matan vara i tapuhia ale Tanumena mo vaia mo vokevoke na paptijo peresi na nona reti. <sup>27</sup> Mo vaia matan vara i tatamahuni na vao kalesia vara i nona hasena sei mo řuhuřuhu jea, mo sopo te hina lumihia hinia, teni te hehe teni te hina sasati tinapua hatea, pani mo tapu mo sopo te hinau vara tea i eři tuvaia hinia. <sup>28</sup> Mo sohena purongo, tamlohi lahi la pa opoi na naroura sohen la lo opoi na epera hasera. Matan tamlohi lahi sei mo lo opoi narouna, mo lo hasena opoia. <sup>29</sup> Matan tea mo sopo hasena řohu na epena, pani mo vahania na nona reti ale mo kilau mamahunia, sohen Křisto mo lo vaia isana vao kalesia. <sup>30</sup> Ale enřa řa sopesope epena. <sup>31</sup> Sohena Retitapu mo vereea vara, ‘Matan hinau atu, tamlohi matea i pa tinařihi tamana enia tinana, ale i sořotahi isan narouna, ale enira tupra rua la mai matea’. *Gen 2.24*

<sup>32</sup> Hinau nike enia vujangi puhoni matea, matan enia mo lo vujangia sohena sava Křisto mo lo sořotahi isana vao kalesia, ale la matea. <sup>33</sup> Matana, a mele vereea vara tamlohi hatehateahi i pa opoi narouna sohen mo lo hase opoia, ale narouna i pa sile na oloolo isan tuana.

## 6

### *Reti Mata Natuvarihi Peresi Na Tamara*

<sup>1</sup> Natuvarihi tari, ha oloolo na tamamim peresi na tinamim, matan

enia mo tataholo. <sup>2</sup> ‘Ha ooloo hin tamamim peresi na tinamim’ – matan harihi enia tiroma leu sei retitauhi matea mo lo toho hinia, <sup>3</sup> ale sopena mo lo vereea mara vara ha ooloo hinira – ‘maurim i pa peravu, ale i pa mařivi na leřuhu’. *Deut 5.16*

<sup>4</sup> Tama, ha sopo vaivai na natumim vara la lolokoru, pani ha vaira la ulua na ooloo peresi na vujangi hin Moli.

#### *Reti Mata Slev Peresi Na Nora Tamlohi Tavera*

<sup>5</sup> Kamim slev, hin mauri nike ha tatamahu tarea vara ha ooloo na nomim tamlohi tavera, ha lo ooloo hinira na mapumim tari mo sopo te halu hinia, sohen ka lo vaia isan Křisto. <sup>6</sup> Ha sopo sohen la haratu sei la lo voko matan tamlohi la lo kilaura – sohen la haratu la opoia vara tamlohi la pa avulahi hinira purongo – pani ha sohen slev non Křisto sei la lo vai na masalon God na mapura, <sup>7</sup> ale ha avulahi hinia ha vaia sohen ka lo volitusi isan Moli mo sopo isana tamlohi. <sup>8</sup> Kamim ha lo levosahia vara Moli i pa sile na voliřa hatehateahi usuri na hina řuhu řa lo vaira, hina purongo vara enřa řa materi teni řa lo slev.

<sup>9</sup> Ale usuri posposi nike, kamim tamlohi tavera ha pa vaia isana nomim slev sohen, ha isoiso na nomim reti řilangi isara matan ha lo levosahia vara kamim rua nomim tamlohi tavera matea purongo na tuka, ale enia mo sopo tametame tea.

#### *Ruru Mata Vuro Non God*

<sup>10</sup> Isoiso noku reti nahai: ha řilařilangi hin Moli na řilangi nona suihana. <sup>11</sup> Ha ru na ruru mata vuro tari non God matan vara ha eři turu řilangi mata turuhoro na vavahinau non Tiapolo sei la lo mai la lo haluhalu na tamlohi na malele matuvana. <sup>12</sup> Matan nořa vuro mo sopo peresi na tamlohi sei řa eři hitera, pani peresi na angelo sasati sei la aulu, peresi la haratu la řilangi, peresi la haratu sei la aulu na řořoha hin varama nike, peresi na suiha vui sasati na masapa.

<sup>13</sup> Matan haratu, ha ru na ruru vuro tari non God matan vara ha eři

turu na jaramim hin rani sasati nike, ale ha vai na hinau tari ha eři vaira, ale ha turu řilangi. <sup>14</sup> Ha turu řilangi ha sopo juha, ha otioti na oti mata retivarařuhu, ale ha ru na řumamim na ruru vuro mata posposi tataholo non God. <sup>15</sup> Ale sohen nomim sabat mata palomim, ha ru na Retiřuhu sei mo lo sile na tamata matan vara ha pa tatamahu tarea mata ha hahau peresia. <sup>16</sup> Ha tauri řilangi na nomim rasua sohen tingting matea sei i eři tinghoro na evine hani non Tiapolo. <sup>17</sup> Ha ru na hati vuro mata juri sei mo lo matahi na maurimim, ale ha taurilati na sita vuro non Tanume Tapu sei enia reti non God. <sup>18</sup> Ha usiusi ale ha usi God vara i tueni kamim tarea. Tarea ha usiusi usuri na Tanumen God, ale matana, tarea ha lo kilau i řuhu, ale ha tau na řomimim mata usiusi mata tapuhi tari non God.

<sup>19</sup> Ha usiusi matakua matan vara God i pa sileau na retisohai sei mo opoia vara a vereea, ale vara a sopo matahu mata vere mamahuni na hina luhu mata Retiřuhu i memera i řuhu vara enia mata tamlohi tari. <sup>20</sup> Enau na lo toho na jen nakerihi matan na lo retivujavujangi retisohai nike sohen God mo řuleau matana.

#### *Isoiso Reti Non Paul*

<sup>21</sup> Tychicus, vorai řuhuřuhu sei mo lo turu řilangi mata volitusi na vavahinau non Moli, enia i pa vere kamim na hinau tari vara ha levosahira, matan ha pa levosahia vara na lo toho sohen sava. <sup>22</sup> Na lo řulea mai isamim matan haratu natu, vara ha pa eři levosahia vara kamam kama lo toho sohen sava nike, ale vara i eři retituetueni na mapumim.

<sup>23</sup> Noku usiusi vara tamata, opoia peresi na rasua la tai isan God Tama peresi Moli Iesu Křisto, la pa toho isamim la vorai peresi na vevorai. <sup>24</sup> Na lo usiusi vara řomřuhu non God i pa toho isan la haratu sei la opoi nořa Moli Iesu Křisto na opoia sei mo sopo te isoisona.

**Leta  
Paul Mo Ulia Isana Mara  
Philippi  
Leta Nike**

Paul mo uli leta nike na ima řilangi (1.7) vara i vere meje isana kalesia Philippi mata nora otori peresi nora usiusi matana (1.5; 4.10-19). Mo lo kilau toho vara i pa materi matan vara i eři mele retivujavujangi na Retiřuhu (3.17-19). Pani mo levosahia vara korong la pa vilimateia hin ima řilangi atu (1.21; 2.17; 3.10).

Philippi mo lo toho auta Greece hin jara atu la tovia Macedonia. Paul mo tapulo na vao kalesia atu Philippi usuri na nona retivujavujangi ea (Acts 16). Ale mo retiřoaroahaira vara la pa lavi na rani řilangi sohen Paul mo lo lavia moiso. Pani mo vere isara mara vara i sohena, leřuhu non God i pa toho isara matana (1.28-30).

Paul mo vere isara mara la pa lo kilau matan la tamlohi atu la lo posi na vujangi tataholo non Křisto (3.2-11). Paul mo avulahi tavera, hina purongo mo lo toho na ima řilangi matan Křisto. Paul mo vere isara mara la pa hahau jara matea (2.2; 4.2-3) ale vara la pa usuri na řomřomi non Křisto Iesu sohen harihi:

‘Romimim i pa sohena řomin Křisto Iesu,  
hina purongo vara tiroma enia  
God tataholo,  
enia mo sopo řomřomia vara i tau-  
rilati řomřomi atu vara enia  
God,  
pani mo hasena taua sivo atano  
mo mai sohena volitusi matea tata-  
holo,  
ale mo vora mo mai mo sohena  
tamlohi purongo,  
ale mo hasena taua sivo atano,  
ale mo oloolo mo kakau na nona  
mateia,  
mateia atu enia mateia sasati  
mata talai na talopeilopei  
matea.’ (2.6-8)

**Hin Leta Nike**

1. Retioloolo (1.1-11)
2. Maurin Paul (1.12-30)

3. Maurin Iesu (2.1-18)
4. Retisohai Hin Te Tapalan Paul (2.19-30)
5. God Mo Laviřa (3.1-4.9)
6. Paul Mo Vere Meje Isara (4.10-20)
7. Isoiso Reti (4.21-23)

<sup>1</sup> Enau Paul peresi Timothy, kama kama slev non Křisto Iesu, kama uli leta nike isana tamlohi viřoni non God hin Křisto Iesu la lo toho Philippi, peresi la haratu la lo tiroma na tamlohi peresi la haratu la lo deacon ea. <sup>2</sup> Romřuhu peresi na tamata non God Tamařa peresi Moli Iesu Křisto i pa toho isamim.

*Usiusi Non Paul*

<sup>3</sup> Vara na lo řomřomi kamim, tarea na lo vere meje isan God matamim. <sup>4</sup> Ale na rani na lo usiusi matamim sohena, na lo usiusi na noku řomavulahi, <sup>5</sup> matan kamim ka tapala na vavahinau mata Retiřuhu, mo tapulo na tiroma rani mo tikeli nake, <sup>6</sup> Na levosahia mo řuhu vara haratu mo lo tapulo na vavahinau řuhu na maurimim, i pa lo vaia i tikeli rani atu Iesu i mele mai, ale i pa mai na isoisona.

<sup>7</sup> Mo tataholo vara a řomřomia sohena matamim matan noku opoia matamim mo tavera jea, hina purongo vara na lo toho nike na ima řilangi teni vara a lo matahi na Retiřuhu sei ka lavia, teni vara a lo vujangia vara enia mo retivararřuhu, ale mata řomřuhu non God, enřa mo isoiso řa tapala matana. <sup>8</sup> God mo levosahia vara na lo opoi kamim, mo tataholo na opoia non Křisto Iesu isamim. <sup>9</sup> ale harihi enia noku usiusi: vara nomim opoia i pa lo ulua i tavera tarea, na lo usiusi vara ha ulua na nomim levosahi řuhu tari peresi na rongovosahi na hinau mo vararřuhu, <sup>10</sup> matan vara ha pa eři rongovosahi na sava natu, mo tataholo vara ha vaia, ale matan haratu, ha pa eři toho vokevoke i pa sopo tea i tuvai kamim i tikeli rani atu Křisto i mele mai, <sup>11</sup> ale ha pa mařivi na vua mata mauri tataholo sei mo tai isan Iesu Křisto, i

pa vai na tamlohi la tahe na hijana, ale la pa sile na hasohaso isan God.

### *Retivujavujangi Hin Křisto*

<sup>12</sup> Ale la vorai peresi na vevorai, na opoia vara ha pa levosahia vara sava rani řilangi mo mai isaku nike, mo mai matan vara tamlohi matuvana la eři rasu na Retiřuhu. <sup>13</sup> Ale matan haratu, tamlohi vuro tari non Supen Rome sei la lo kilauau nike, peresi na tamlohi tari la levosahia vara enau na lo toho na ima řilangi matan Křisto. <sup>14</sup> Matan na lo toho na ima řilangi nike, Moli mo vai na řomřomi nona vorai kalesia nike la řomřilangi vara la pa vereuli na Reti non God la sopo matahu matana.

<sup>15</sup> Varařuhu tamlohi hai la lo retivujavujangi hin Křisto na nora mereimerei, na nora řomaulu, pani hai la lo vaia na posposi tataholo. <sup>16</sup> La haratu hitahu, la lo vaia na nora opoia matan la levosahia vara enau na lo toho na ima řilangi matan na lo matahi na Retiřuhu. <sup>17</sup> La haratu tiroma la lo retivujavujangi hin Křisto na řomaulu, řomira la sopo tataholo, la lo řomtau vara la pa mele vai na noku rongohaji i mele tavera nike na ima řilangi matana. <sup>18</sup> Pani mo sopo te hinau hinia. Hinau aulu hinia, enia vara tamlohi la retivujavujangi Křisto, hina purongo vara la lo vaia na nora tapnetano teni la varařuhu. Matan haratu na avulahi, ale a pa lo avulahi, <sup>19</sup> matan na levosahia vara nomim usiusi peresi na tuetueni sei Tanumen Iesu Křisto mo silea, sava mo masese isaku, isoisona God i pa juriau.

### *Paul Mo Mauri Matan Iesu*

<sup>20</sup> Na levosahia mo řuhu, ale na lo řomtoho vara a pa sopo vai te hinau vara i eři vaiiau a mahanuhanu matana, pani na noku řomřilangi nake sohena tarea, a pa lo sile na ooloo isan Křisto na hinau tari na lo vaira, vara a mauri teni a mate. <sup>21</sup> Matan isaku, mauri enia matan Křisto, ale mate, i pa mele řuhu. <sup>22</sup> Vara a lo mauri hin epe nike, enia masapa vara noku vavahinau řuhu

la pa vuaha. Pani na sopo levosahia vara sahara mo mele řuhu, <sup>23</sup> řomiku mo opoira enira rua. Na opoia vara a malue a toho peresi Křisto matan haratu mo řuhu jea, <sup>24</sup> pani i pa mele řuhu jea isamim vara a lo mauri.

<sup>25</sup> Matan na levosahia mo řuhu vara a lo mauri, a eři tueni kamim mo isoiso, ale ha pa ulua na avulahi na nomim rasua, <sup>26</sup> matan vara ha pa hasohaso Křisto Iesu mata mo tinařihia vara a mele toho peresi kamim.

### *Ra Pa Tamlohin Tuka*

<sup>27</sup> Hinau aulu enia harihi: vara ha hahau na malele mo tataholo na Retiřuhu non Křisto, matan vara a mai a hite kamim teni vara a rongo te sora-sorahimim, a pa levosahia vara ka lo turu řilangi jara matea sohena tamlohi matelete, mata matahi na sava Retiřuhu mo vujangia, <sup>28</sup> ale ha sopo matahuni la haratu sei la nomim meresahi, matan nomim rasua enia i pa matamata mera matea isara mata vujangira vara maurira la pa sopo juri, pani kamim ha pa juri, harihi God i pa vaia. <sup>29</sup> Matan God mo taua vara ha pa sopo rasu Křisto purongo, pani vara ha pa lavi na rani řilangi matan Křisto, <sup>30</sup> matan na levosahia vara ka lo lavi na rani řilangi sohen ka hitea isaku hin rani atu na lo toho peresi kamim, ale nakerihi sohena na lo lavia na ima řilangi.

## 2

### *Tarea Ra Pa Usuri Na Posin Křisto*

<sup>1</sup> Matan ka lo sořotahi hin Křisto, vara te nomim retituetueni, teni ka nanau matan nona opoia mo lo toho isamim, teni ka tapala peresi na Tanumena, teni te opoia na mapumim teni te řomopoia, <sup>2</sup> ha mařivisi na noku avulahi sohen harihi: řomimim i matea, ha opoiopoi kamim, mapumim peresi na řomimim i matea na sava ha pa vaia, <sup>3</sup> ha sopo vai te hinau matan ka opoia vara ha pa jeu na tinapua, teni ha vai na hinau na řomaulu, pani na posposi řomatano, ha řomřomi na tinapua i jeu kamim. <sup>4</sup> Kamim hatehateahi, ha sopo řomřomi kamim

hasemim purongo, pani na hinau i pa řuhu isana tinapua. <sup>5</sup> Romimim i pa sohena řomin Křisto Iesu, <sup>6</sup> hina purongo vara tiroma enia God tataholo, enia mo sopo řomřomia vara i taurilati řomřomi atu vara enia God, <sup>7</sup> pani mo hasena taua sivo atano mo mai sohena volitusi matea tataholo, ale mo vora mo mai mo sohena tamlohi purongo, <sup>8</sup> ale mo hasena taua sivo atano, ale mo ooloo mo kakau na nona mateia, mateia atu enia mateia sasati mata talai na talopeilopei matea. <sup>9</sup> Matan haratu, God mo tahea hin jara atu mata lavi na ooloo tavera jea, mo silea hin hija atu mo aulu jea mo jeu na hija tari, <sup>10</sup> matan vara na hijan Iesu, tamlohi tari la pa papaohi, la haratu la lo toho na tuka, na varama peresi na jaran la haratu la mate na lolo varama, <sup>11</sup> ale meme tari la pa taviti vara Iesu Křisto enia Moli, hasohaso tari i pa sahe isan God Tamařa matana.

#### *Kamim Ka Malarani Na Varama*

<sup>12</sup> Matana, la tapalaku řuhuřuhu hin rani atu na lo toho peresi kamim ka lo ooloo tarea, ale nake, matan na sopo toho peresi kamim, i pa mele řuhu vara ha lo kilau mamahu vara ha vai na vavahinau nona tamlohi sei God mo jurira na posposi matahu peresi na savaravara, <sup>13</sup> matan God hasena sei mo lo vavahinau hin kamim, mo vai kamim vara ha avulahi vara ha vavahinau i usuri na sava mo opoia.

<sup>14</sup> Na vavahinau tari ka lo vaira, ha sopo ngutungutu teni ha vasvas, <sup>15</sup> matan vara i pa sopo te hinau vara tamlohi tinapua la eři tuvai kamim hinia. Ha toho na mauri vokevoke, i sohena natun God na livuhan pina haluhalu sei mo hehe, ale kamim ka lo mera sohena majou na varama. <sup>16</sup> Ha taurilati reti atu mo sile na mauri, matan vara a pa eři retihapahapa hin pongi atu non Křisto, vara noku vavahinau isamim la sopo vano hina purongo, <sup>17</sup> pani hina purongo vara mauriku i sohena wai malamalai matea, ale i vano peresi na nomim rasua isan God, enau na avulahi vara a silea vara enřa tolu řa pa

avulahi jara matea. <sup>18</sup> Ale mo řuhu vara ha avulahi matana sohena, ale ha avulahi peresiau.

#### *Paul I Pa Rule Timothy Isara*

<sup>19</sup> Na lo řomtoho vara a pa řule Timothy i vano isamim i pa sopo tuai, vara Moli Iesu i tinařihia, matan vara enau sohena a pa rongo i řuhu vara a rongo te sorasorahimim. <sup>20</sup> Matan mo sopo tea nike, řomina i tavera matamim sohen Timothy, matan enia mo opoia vara ha lo toho i řuhu. <sup>21</sup> Matan tamlohi tinapua mo isoiso la lo ale na masalora purongo, mo sopo masalon Iesu Křisto. <sup>22</sup> Pani kamim ka levosahi mamahuni na posposi řuhu non Timothy moiso, matan enia mo lo tueniau sohen natuku matea tataholo na vavahinau mata Retiřuhu. <sup>23</sup> Matana, na lo řomtoho vara a pa řulea nohorihia, pani a pa hitea vara i pa sohena sava isaku tako. <sup>24</sup> Ale hin Moli, na levosahia mo řuhu vara i sopo tuai enau sohena a pa mai.

#### *Paul Mo Rule Epaphroditus*

<sup>25</sup> Pani na lo řomřomia vara a pa mele řule Epaphroditus vano isamim. Enia voraiku, tapalaku na vavahinau, ale tapala tamlohi vuro matea mata rasua, ale nomim vahařule, haratu ka lo řulea isaku vara i tueniau nike. <sup>26</sup> Matan enia mo opoia vara i mele hite kamim, ale mo rongo mo sati matan ka rongoa vara enia mo rojo, <sup>27</sup> vara řuhu enia mo rojo, mariviti vara i mate, pani God mo řomopoia, mo sopo isana hasena, pani enau sohena, mo sopo opoia vara i vaiau a rongo i sati aulu na noku rongo sati. <sup>28</sup> Matan haratu, na avulahi vara a mele řulea vano isamim, matan vara ha pa avulahi vara ha mele hitea, ale enau řomiku i sopo mele kaka hajavua hinia. <sup>29</sup> Ale, ha mele lavia mai isamim na hijan Moli na avulahi tavera. Ale mo tataholo vara ha sile na ooloo isana tamlohi sohena, <sup>30</sup> matan mariviti i mate mata vavahinau non Křisto, matan mo hařehi na maurina vara i vai vevuhi na nomim vavahinau sei ka sopo eři vaia isaku.



### 3

#### *Vara A Levosahi Křisto Peresi Na Suihana*

<sup>1</sup> Mele hina tinapua la vorai peresi na vevorai, ha avulahi tavera matan Moli. Mo sopo te hinau hinia vara a mele uli la hinau sei na pete vereea isamim tiroma moiso matan la pa turuhoro kamim.

<sup>2</sup> Ha lo kilau la viriu sei, la tamlohi sasati atu la lo tai komokomo na epe tamlohi na taiřalihi.\* <sup>3</sup> Matan enřa natu, taiřalihi varařuhu, řa lo lotu na suihan Tanumen God, ale řa lo retihasohaso Křisto Iesu na sava mo vaia matařa, ale řa sopo mele tau na rasua na nořa vavahinai, <sup>4</sup> hina purongo vara enau a eři tau na noku rasua na noku vavahinai sohera. Vara tea mo řomřomia vara i eři tau na nona rasua na nona vavahinai, enau na jeua, <sup>5</sup> enau na taiřalihi na rani mo limaravtolu na noku pongi vora, enau na tavgavuvin Israel, tavgavuvin Benjamin, enau Jew tataholo, usuri na Leu, enau Pharisee matea. <sup>6</sup> Ale na řilarilangi na noku rasua, na tipahi na vao kalesia non Iesu. Ale usuri na leu tataholo řuhu, tea i sopo eři tuvaiau hin te hinai matana, <sup>7</sup> pani na noku kilakilau mata hinai vara la pa tueniau tiroma, nake matan hin Křisto, na hitera sohen hina purongo. <sup>8</sup> Aulu hin haratu, na levosahia vara hinai tari enira hina purongo na rani na lo kilau usurira peresi na hinai mo mele řuhu jea, enia vara a levosahi Křisto Iesu noku Moli, ale matan Křisto, na sopo mele tau na noku rasua na noku vavahinai tari, na hitera sohena utauta matan vara a lavi Křisto, <sup>9</sup> ale vara a pa toho isana, mo sopo matan na vai te hinai mo tataholo matan na lo usuri na Leu, pani vara a mai a tataholo na nahona mata noku rasua hin Křisto, hinai sei, God hasena mo vereea vara enau na tataholo mata noku rasua hinia, <sup>10</sup> matan vara a levosahi Křisto peresi na suiha nona sauteterahi, ale na opoia vara a sořotahi peresia na nona rani řilangi, ale a sohena na

nona mateia, <sup>11</sup> ale, matan la hinai tari sei vara enau sohena, a pa lavi na sauteterahi na mateia.

<sup>12</sup> Na sopo vereea vara na pete lavi la hinai tari atu moiso, teni vara God mo vaiiau na tataholo vevuhi moiso, pani na lo tutunguia vara a lavi la haratu sei Křisto Iesu mo viřoniau matara. <sup>13</sup> La vorai peresi na vevorai, na sopo vereea vara na lavira noku moiso, pani hina aulu matea na lo tau na řomiku vara a vaia enia harihi: na sopo mele tauri na hinaun tuai, pani na lo kilau na hinai mo lo mai, <sup>14</sup> ale na lo tutunguia vara a kakau na isoisona, matan vara a lavi otori atu na tuka God mo toviau matana hin Křisto Iesu.

<sup>15</sup> Mo řuhu vara enřa sei řa jea na malele rasua, řa lo řomřomi sohena. Pani vara kilakilau non tea mo sopo sohena, God i pa vujangia vara sava na lo vereea mo tataholo isamim. <sup>16</sup> Hina aulu hin la hinai sei řa lavira moiso enia vara řa usuri na sava řa pete levosahia moiso vara la tataholo.

#### *Tunguhi Na Palon Paul*

<sup>17</sup> La vorai peresi na vevorai, ha pulutahi ha tutungui na paloku, ale ha kilau mamahuni la haratu la lo hahau usuri tovongi sei kama lo sile kamim hinia. <sup>18</sup> Matan sohen na pete vereea isamim moiso, ale nake na lo mele vereea isamim na řomsati, vara tamlohi matuvana la lo hahau sohena meresahi na sava Křisto mo vaia na nona talopeilopei. <sup>19</sup> Isoisona enia la pa hase komora, nora god enia masalora, la retihapahapa na nora vavahinai mata mahanuhanu, la lo tau na řomira na hinai mata varama purongo. <sup>20</sup> Pani enřa tamlohin tuka, ale řa lo kilau matan nořa Jujuri i pa tai ea, enia Moli Iesu Křisto, <sup>21</sup> enia i pa posi na epeřa la mai la tataholo na epena sei mo řuhuřuhu jea, i pa vaia hin suiha atu sei mo lo vai na hinai tari la toho na ruhuruhana.

### 4

<sup>1</sup> Matan haratu, la vorai peresi na vevorai, na lo opoi kamim, ale na

\* **3:2:** viriu: Paul mo lo vere vara Jew enira viriu, enira haratu sei la řilangi vara la taiřalihi na tamlohi.

opoia vara a mele hite kamim, matan ka vaiau na avulahi, kamim sohena noku otori, ha turu řilangi hin Moli, la tapalaku řuhuřuhu.

### *Romin Paul*

<sup>2</sup> Na usia řilangi vara Euodia enia Syntyche la avulahi hinira rua hin Moli. <sup>3</sup> Io, ale na lo usiho tapalaku řuhuřuhu, o tueni la hařai atu, enira la lo voko jara matea peresiau hin rani atu na lo vavahinau atu mata Retiřuhu peresi Clement peresi la tatua tapalaku atu mata vavahinau, la haratu sei hijara la lo toho na Puku mata Mauri.

<sup>4</sup> Ha avulahi hin Moli tarea, a mele vere, ha avulahi jea! <sup>5</sup> Ha vujangi na nomim posposi řuhu isana tamlohi tari. Moli mo lo mai mariviti.

<sup>6</sup> Ha sopo řomkaka hin te hinau hatea, pani na hinau tari na nomim usiisi isan God matan te hinau, ha vere meje isana, ale ha vere na nomim opoia. <sup>7</sup> Ale vara ha lo vaia sohena, tamata non God atu tamlohi la sopo levosahia, i pa matahi na mapumim peresi na řomimim hin Křisto Iesu. <sup>8</sup> Isoiso hinau la vorai peresi na vevorai, sava mo varařuhu, sava la tataholo mata sile na ooloo hinira, sava mo tataholo, sava mo vokevoke, sava mo řuhu, sava mo tataholo vara řa opoia, vara te posposi řuhu teni te hinau mata hasohasoa, ha tau na řomimim hinira. <sup>9</sup> Ale sava hinau, ka levosahia, ka lavia, ka rongoa, ale ka hitea hiniau, ha hahau hinira, ale God mata tamata i pa toho peresi kamim.

### *Paul Mo Vere Meje*

<sup>10</sup> Na avulahi tavera hin Moli matan nake ka lo mele řomřomiau. Na levosahia vara ka řomřomiau, pani mo sopo te masapa vara ha eři vujangia. <sup>11</sup> Na sopo vere haranike matan te noku opoia, matan na levosahi na malele vara a avulahi na sava mo masese na mauriku. <sup>12</sup> Na levosahi na mauri tilavono, na levosahi na mauri tavgav, na levosahi na hina luhu mata avulahi na hinau tari la mai na mauriku, vara a masu teni a marohati, vara tanga mo lo masurere, teni te rani na vejuveju.

<sup>13</sup> A eři vai na hinau tari matan Křisto mo lo tueniau. <sup>14</sup> Pani ka meje tavera isamim matan ka lo tueniau na noku rani řilangi.

<sup>15</sup> Kamim mara Philippi ka levosahia vara na pongi tiroma ka rongo na Retiřuhu, ale na rani na malue Macedonia, mo sopo te vao kalesia tinapua vara i tueniau na silesilea, pani kamim hasemim purongo. <sup>16</sup> Matan na rani na lo toho Thessalonica, ka sohai na hinau vaha visa vara i tueniau. <sup>17</sup> Na sopo vere matan na lo kilau mata silesilea, pani na opoia vara ha mele lavi na vua řuhuřuhu mata nomim posposi řuhu.

<sup>18</sup> Pani na lavi la otori sei ka sohaira mo mai isaku peresi Epaphroditus, ale hinau tari sei la mařivi savulevule la jeu na noku opoia. Hinau sei ka vaia isaku mo sohena malamalai matea ponana mo řuhu, mo tataholo na nahon God, ale mo avulahi hinia. <sup>19</sup> Ale noku God, i pa sile kamim na hinau tari ka opoia i usuri na nona tavgav řuhuřuhu hin Křisto Iesu. <sup>20</sup> Isan God Tamařa, hasohaso i sahe isana mata rani tui tui, amen. <sup>21</sup> Ha sile na retioloolo i vano isana tapuhi tari non God hin Křisto Iesu. La vorai kalesia nike, la lo toho peresiau, la sohai na nora retioloolo isamim. <sup>22</sup> Tapuhi tari nike, la sohai na nora retioloolo isamim, la haratu la lo vavahinau na lolo iman supe matan Rome sohena la opoia mo tavera vara ha levosahi na nora retioloolo isamim. <sup>23</sup> Romřuhu non nořa Moli Iesu Křisto i pa lo toho na maurimim.

## Colossians

### Leta

### Paul Mo Ulia Isana Mara

### Colossae

### Leta Nike

Colossae enia taon tavera mo aulu na jara matan Asia Minor, mo lo toho Opae na vanuan Ephesus ale la asa asau. Paul mo sopo lo vano ea hin te rani, pani mo avulahi matan mo levosahia vara rasua nona kalesia ea hin Křisto mo lo mauri (1.3-7; 2.6-7). Epaphras mo vujangi na Retiřuhu isara tiroma, enia mara Colossae, pani enia mo pa lo toho na ima řilangi peresi Paul hin rani atu Paul mo uli leta nike. (1.14;4.3, 10, 18).

Tamlohi řořoha la mařivi hin jara atu (1.27), ale hai la lo lavi na řomřomi tinapua la sopo varařuhu (2.16-23). La jalio na retivarařuhu, la lo řomřomia lara tamlohi i pa mai i tataholo na nahon God vara i horo na masalo epena. La lo hasohaso na angelo peresi na suiha tinapua na tuka, pani Paul mo opoia vara la levosahi mamahunia vara Křisto mo aulu jea na suiha tari na jara tari, mo lo toho na tuka peresi God Tamana (3.1). Moiso matan vara la pa haso Iesu Křisto purongo.

#### Hite Leta Nike

1. Reti Tiroma (1.1-2)
2. Usiusi Mata Vere Meje (1.3-8)
3. Křisto Peresi Na Nona Vavahinau (1.9-2.19)
4. Mauri Paro Hin Křisto (2.20-4.6)
5. Isoiso Retireti (4.7-18)

<sup>1</sup> Enau Paul, enau vahařule matea non Křisto Iesu na masalon God, peresi Timothy, enia voraiřa, <sup>2</sup> enau na lo uli leta nike isana tapuhi non God la vorai kalesia sei la řomturu řilangi hin Křisto atu Colossae, řomřuhu isamim peresi na tamata mo tai isan God Tamařa.

#### *Usiusi Non Paul*

<sup>3</sup> Tarea kama lo vere meje isan God, Taman nořa Moli Iesu Křisto na rani kama lo usiusi matamim, <sup>4</sup> mo tapulo na rani kama rongoa na sorasora mata nomim rasua hin Křisto Iesu peresi

na nomim opoia isana tapuhi non God, <sup>5</sup> ka lo vaia sohena matan ka řomtoho na hinau God mo taua na tuka matamim, hara sei ka rongoa moiso na retivarařuhu na Retiřuhu, <sup>6</sup> Retiřuhu sei mo mai isamim, enia mo vano řalihi na varama, mo lo vua mo posi na tamlohi, ale mo talulu, sohen mo vaia isamim mo tapulo hin rani atu ka rongoa, ale ka levosahi mamahuni na řomřuhu non God, <sup>7</sup> sohen ka hitevosahia moiso isan Epaphras, voraiřa volitusi tinapua sei na nona vujangi na Retiřuhu isamim, enia mo lo řomturu řilangi na vavahinau non Křisto matamim, <sup>8</sup> ale mo vere isamam sohena sava opoia non Tanumen God mo lo toho isamim.

<sup>9</sup> Ale matana, mo tapulo hin rani atu kama rongoa, kama lo usiusi tarea matamim, kama lo usia vara,

Tanumen God i sile kamim, na lelevosahi peresi na levosahi tari, matan vara ha pa levosahi mamahuni na masalon God, <sup>10</sup> matan vara ha pa hahau na mauri řuhu, sohena God mo avulahi hinia, ale ha vua na nomim vavahinau řuhu tari, moiso matana, ha pa levosahi God i mele řuhu jea.

<sup>11</sup> Kama lo usiusi vara ha pa řilangi na suiha tari na nona suiha tavera řuhuřuhu jea matan vara ha pa turu řilangi na nomim řomperavu peresi na nomim rani řilangi, ale na posposi mo avulahi řuhu, <sup>12</sup> ha vere meje isan Tama matan enia mo vai kamim ka tataholo vara ha lavi hinau atu God mo taua moiso mata nona tapuhi, haratu la mauri hin malarani atu retivarařuhu mo lo silea, <sup>13</sup> God enia mo juriřa na suihan řořoha, ale mo laviřa řa mai hin mauri atu non Natuna sei God mo aulu hinia,

#### *Křisto Enia God Tataholo*

<sup>14</sup> Ale hinia, God mo volituhuřa, mo řomi na nořa hina sasati.

<sup>15</sup> Natun God enia niniun God, haratu řa sopo eři hitea, enia mo vora tiroma non God, ale mo aulu na vavahinau tari non God, <sup>16</sup> matan Křisto mo vai na hinau tari la pala, hinau tari na tuka peresi na varama,

la haratu řa eři hitera peresi la haratu řa sopo eři hitera, suihan supe aulu teni suihan moli, teni tamlohi aulu, teni la haratu la lo tauri na suiha, hin Natuna, hin au tari la pala na nona suiha matan vara la ololo hinia, <sup>17</sup> ale enia mo tiroma na hin au tari, ale hinia, hin au tari la lo toho la sořotahi mo řuhu.

<sup>18</sup> Enia patu epena, epena enia vao kalesia tari, enia mo tiroma, enia mo tiroma hin la haratu la pa turu na mateia, matan vara enia i pa tiroma i aulu na hin au tari, <sup>19</sup> matan God mo avulahi vara enia i lo toho vevuhi hin Natuna, <sup>20</sup> ale hinia, God mo sari tamata na hin au tari na tuka peresi na varama na řaena na nona talopeilopei matan vara la pa toho na ruhuruhuna. <sup>21</sup> Ale tiroma moiso kamim ka vinano isan God, ale ka nona meresahi mata řomimim la vai kamim ka vai na vavahinau sasati, <sup>22</sup> ale nake natu, mo sari tamata na epena na nona mateia, ale mo vai kamim ka tapu ka vokevoke, ale tea i sopo eři tuvai kamim na nahon God, <sup>23</sup> vara tarea ha lo tauri řilangi na nomim rasua, vara ha sopo tinarihi na nomim řomtoho na retitauhi mata Retiřuhu sei ka rongoa moiso, hara sei la lo retivujavujangia isana tamlohi tari na varama, hara sei enau na mai na volitusi matana.

### *Vavahinau Non Paul*

<sup>24</sup> Nake na lo avulahi matan vara na epeku a lavi na rani řilangi matamim, na lo mařivisi na sava mo vejuveju na rongohaji non Křisto na noku vavahinau na lo vaia mata epena, epena enia vao kalesia tari, <sup>25</sup> hara sei God mo tauau vara a mai nona volitusi matana, mo viřoniau matamim vara a vereuli vevuhi na Reti non God isamim, <sup>26</sup> ale řomřomi luhu atu God mo jarohia tuai tuai isana mahapi tamlohi, pani nake mo vujangia isana nona tapuhi, <sup>27</sup> isana tapuhi natu, God mo hatihia vara i vujangi na nona řomřomi luhu mata nona řomřuhu i malue na jara tavera matan vara tamlohi řořoha la pa levosahia vara mo řuhuruhu jea sohena sava, řomřomi luhu sei

enia harihi: Křisto mo lo toho hin kamim, enia pulo řomtoho atu mo vereva vara ha pa lavi na ololo tavera jea peresia, <sup>28</sup> na lelevosahi atu Tanumena mo lo silea, kama lo retivujavujangi hin Křisto, ale kama lo retiřoařoahai isana tamlohi tari, ale kama lo vujangi na tamlohi tari, matan kama opoia vara kama pa sile na tamlohi tari isan God la jea hin Křisto. <sup>29</sup> Matan harihi, enau na lo vavahinau řilangi na malele tari a eři vaia, pani na lo vaia na suihan Křisto mo lo vavahinau řilangi hinia.

## 2

### *Hasohason Křisto*

<sup>1</sup> Na opoia vara ha levosahi na noku kalvono tavera vara a matahi na řomimim peresi la haratu la lo toho Laodicea, moiso la haratu la sopo lo hite na nahoku hin te rani, <sup>2</sup> matan vara a eři retituetueni na mapura vara la mai na vao matea na nora opoia, matan vara la pa mařivi na levosahi řuhu sei mo tai na levosahi mata hina luhu non God sei, enia natu, Křisto, <sup>3</sup> ale God mo jarohi na nona tavitav mata lelevosahi peresi na levosahi tari hin Křisto hasena.

<sup>4</sup> Na lo vere reti sei isamim matan vara tea i sopo halu kamim na nora retimemeji. <sup>5</sup> Hina purongo vara na sopo toho peresi kamim, pani řomiku mo lo toho isamim, ale na avulahi matan na hitea vara ka lo hase kilau kamim, ale ka lo turu řilangi na nomim rasua hin Křisto.

### *Křisto Mo Vairā Ra Materi*

<sup>6</sup> Matan haratu, sohen ka lavi Křisto Iesu sohena nomim Moli, ha hahau sohena nona tamlohi la lo hahau, <sup>7</sup> ha tau na warimim hinia, ha ulua hinia vara ha pa toho jejeu na nomim rasua usuri vujangi sei ka lo lavia moiso, ale tarea ha tatamahu mata vere meje isan God matana. <sup>8</sup> Ha lo kilau, mo sopo řuhu vara tea i tikauleji kamim na nora řomřomi purongo teni na nora retireti halu usuri na posposi tamlohi peresi na posposi mata tau na rasua na vui varama, pani la sopo usuri

na vujangi hin Křisto, <sup>9</sup> matan hin Křisto, God mo lo toho vevuhi na epen tamlohi purongo, <sup>10</sup> ale mo vai kamim ka mařivi hinia, enia haratu mo patun la haratu la aulu tari peresi la haratu la lo tauri na suiha. <sup>11</sup> Ale hin Křisto, kamim ka taiřalihi, pani mo sopo taiřalihi atu na epemim, pani haratu Tanumena mo vaia sei mo tai nařihi na nomim hehe na maurimim, <sup>12</sup> hinau atu mo masese hin rani atu ka paptijo hin Křisto, mo sohen God mo tavuni kamim peresia, ale ka mele turu na mauri paro peresia matan ka rasu na suiha tavera non God, haratu mo lo sauteterahi Křisto na mateia. <sup>13</sup> Tiroma ka lo mate mata nomim hehe matan mo sopo lo tai nařihi na masalo varama na maurimim, moiso nake God mo vai kamim ka mauri peresi Křisto matan enia mo řomi na nořa hehe tari, <sup>14</sup> Ale mo sohen nořa hehe la lo toho na pepa matea la lo tuvaiřa mo usuri na leu non Moses, pani God mo jarai nařihira mo lavi pepa atu mo vosaea na talopeilopei, <sup>15</sup> varařuhu, Křisto mo lavi nařihi na suiha isan la haratu la lo aulu tari peresi la haratu la lo tauri na suiha na varama, ale mo vaira la mahanuhanu na naho tamlohi hin rani atu na nona talopeilopei.

<sup>16</sup> Matan hinau sei ha sopo majinga vara tea i ari kamim mata hanhani teni na sava ka lo inua, teni matan te rani tavera, teni matan te rani tavera mata vitu paro teni te rani tapu hatea, <sup>17</sup> matan la hinau sei enira řořo hinau purongo mata hinau i pa pala, pani hinau atu mo mai moiso, enia Křisto. <sup>18</sup> Ha sopo majinga vara tea mo opoia vara i tau nařihi kamim na nomim rasua, matan enia mo lo vereaa vara ka sopo hase tauhoro kamim hin te hinau, ale vara ka sopo lotu na angelo mo lo vereaa vara mo hitera na nona mavuho, matan enia mo lo mangisi mata nona řomřomi varama purongo, <sup>19</sup> ale mo sopo sořotahi hin Křisto, enia natu, patu epena tari, pani enřa manmanina řilangi peresi na sořosořo epena, řa ulua řa sořotahi hinia matan řa

lavi na ulua mo tai hin suiha atu God mo lo silea.

### *Mauri Paro Hin Křisto*

<sup>20</sup> Ale matan hin Křisto ka mate moiso, ale mo vai kamim ka materi na suiha vui sasati mata varama, ale mata sava ka pa lo řomřomi sohena tamlohi varama, ale ka lo ololo na leu sohen harihi: <sup>21</sup> “Ha sopo eři tauri hinau sei! Ha sopo eři hani hinau sei! Ha sopo tikeli hinau sei!” <sup>22</sup> La retileu sei enira vujangi nona tamlohi purongo, ale i pa sopo tuai la hinau sei la pa tihai. <sup>23</sup> Varařuhu, tamlohi la pa hitea vara la retileu sei enira la hina lelevosahi na malele rasua tataholo, na posposi řomatano, peresi na hase tauhoro, pani la hinau sei la pa sopo eři tueni tea vara i horo na nona řomřomi hehe teni masalona.

## 3

### *Ha Kilau Matan Tuka*

<sup>1</sup> Matan God mo pete sau kamim na mauri paro peresi Křisto moiso, ha tau na řomimim hin mauri atu na tuka, hin jara atu Křisto mo lo sakele na jara suiha tavera atu na matuan God,

*Psa 110.1.*

<sup>2</sup> ha tau na řomimim na hinau matan tuka, pani i sopo na hinau mata varama, <sup>3</sup> matan kamim ka mate moiso, ale maurimim la lo jarohi peresi Křisto hin God. <sup>4</sup> Maurimim la lo toho hin Křisto, ale hin rani atu i pa mai, kamim sohena, ha pa pala peresia na nona hasohaso tavera.

<sup>5</sup> Ale matan haratu, ha vilimatei na hina hehe mata varama na lolomim sohen harihi: mauri maji, posposi lumiha, řomusuri hařai, masalo sasati, ale posposi hanmarua sei enia pulo hinau mata lotulotu vono, <sup>6</sup> matan talai lolokoru non God mata hehe mo lo mai isan la haratu la lo vai la hinau atu. <sup>7</sup> Kamim sohena, ka lo vaira na maurimim tuai hin rani atu ka pa lo toho na mauri varama.

<sup>8</sup> Pani nake, ha tau nařihi la hinau sei na vereaa moiso, ale la hinau sohen harihi: lolokoru, lolokoru patumim, vaisatihi na tinapua, retisasati hin God, teni vara jingomim la

retisasati teni varikali. <sup>9</sup> Ha sopo haluhalu kamim matan ka pete tau narihi mauri tuai atu moiso peresi na nona posposi hehe na maurimim, <sup>10</sup> ale ka pete lavi na mauri paro moiso sei tarea mo lo mele ulua na levosahi, ale mo lo mele posi mai tataholo na niniun haratu mo vai mauri paro sei. *Gen 1.26.*

<sup>11</sup> Nake, mo sopo te hinau vara tamlohi řořoha, teni Jew, teni haratu mo taiřalihi, teni haratu mo sopo taiřalihi, teni tamlohi řořoha, teni tamlohi sasati mara Scythia,\* teni slev, teni tamlohi teri, pani Křisto enia patu hinau tari, ale enia mo lo mauri hinira mo isoiso.

### *Posposi Tamlohi Rasu*

<sup>12</sup> Ale matan kamim ka haratu sei God mo opoira, God mo viřonira, God mo tapuhira, ha ruru na řomopoa, řomřuhu na tamlohi tinapua, řomatano, řommalum, řomperavu, <sup>13</sup> Ale vara te vorai tinapua mo vai te hinau mo hehe isamim, ha řomperavu isana, ale vara tea mo vai te retireti matan te vonamim, ha řomia, matan Moli mo řomi kamim moiso, kamim ha pa hase řomi kamim. <sup>14</sup> Ale aulu hin la hinau nike, ha ruru na opoia matan enia mo lo sořotahi na hinau tari, ale ha pa eři turu jara matea. <sup>15</sup> Ale ha tutungui na tamata non Křisto i aulu na mapumim, matan God mo vai kamim ka vao epe matea, ale mo tovi kamim vara ha toho na tamata, ale vara tarea ha lo vere meje. <sup>16</sup> Ha lavi vevuhi na reti non Křisto na lolo mapumim, matan vara tarea ha eři tau na řomimim hinira. Ale ha vujangira isamim hasemim, ale ha vaitataholoi kamim hatehateahi na malele lelevosahi tari, ale na lolo mapumim ha avulahi vara ha lalavete na vete mata psalm, ale vete la sile na hasohaso isan God peresi na vete Tanumena mo silera na řomimim. <sup>17</sup> Ale vara sava ka lo vaia teni ka lo vere, ha sopo řomalihō vara kamim ka tamlohi non Moli

Iesu, ale tarea ha vere meje isan God Tama hinia.

### *Retireti Mata Posposi Oloolo*

<sup>18</sup> Hařai lahi, ha oloolo na tuamim matan enia mo tataholo na nahon Moli, <sup>19</sup> tamlohi lahi, ha opoi na naroumim, ale ha sopo vai na hinau řilangi isara. <sup>20</sup> Natuvarihi, ha oloolo na tamamim peresi na tinamim na hinau tari, matan haratu enia God mo avulahi hinia. <sup>21</sup> Tama, ha sopo plele na natumim, vara i vono, la pa maloko vara la tapurongo isamim.

<sup>22</sup> Kamim slev, tarea ha lo oloolo na nomim tamlohi tavera nike na varama, ha sopo vaia mata tamlohi purongo, teni ha vaia mata řom tamlohi tinapua i avulahi hin kamim, pani, ha vaia varařuhu na mapumim matan ka lo sile na oloolo tavera isan Moli. <sup>23</sup> Sava vavahinau ka lo vaia, ha vaia na mapumim sohena vara non God, mo sopo nona tamlohi, <sup>24</sup> matan ka levosahia vara Moli i pa sile na korumim sohena nomim otori. Ka lo volitusi isan Moli Křisto, <sup>25</sup> matan ka levosahia vara haratu mo lo vai na hina sasati i pa lavi na voli hina sasati mo vaia, matan God mo sopo tametame tea.

*Deut 10.17; Eph 6.9*

## **4**

<sup>1</sup> Kamim la tamlohi tavera, ha kilau mamahuni na nomim slev na posposi řuhu, matan kamim sohena, ka levosahia vara nomim tamlohi tavera sei, Moli na tuka, mo lo kilau kamim.

### *Usiusi Matan Paul*

<sup>2</sup> Ha turu řilangi na nomim usiusi, ha řomřomi mamahuni na sava ka lo usiusi matana, ale ha vere meje na mapumim i vano isana, <sup>3</sup> ha usiusi matamam sohena, ha usiusi vara God i sile te masapa matan vara kama pa vereuli na nona retisohai sei mo lo vujangi na nona řomřomi luhu hin Křisto, haratu natu, na lo toho na ima řilangi matana, <sup>4</sup> ha usiusi matakū vara a pa vereulia i pa memera i řuhu na malele God mo

\* **3:11:** teni tamlohi řořoha, teni tamlohi sasati mara Scythia: Tamlohi řořoha la tamlohi sei la sopo levosahi na leon mara Greek, ale mara Scythia la lavi na hija mata vilimatei na tamlohi.

opoia. <sup>5</sup> Ale mo řuhu vara ha sopo toho purongo na nahon tamlohi atu la sopo rasua, pani ha lo usuri na posposi tataholo non Moli. <sup>6</sup> Mo řuhu vara tarea na nomim retireti, ha reti-holoholo, ha řomřomi na sava reti ka vereaa, ale ha pa tatamahu vara ha pa řarami mamahuni na tamlohi hatehateahi sohena sava.

*Retioloolo Isan Tapalan Paul*

<sup>7</sup> Tychicus voraiřa atu enřa řa opoia, enia tapalaku volitusi matea non Moli, tarea mo lo řomturu řilangi na vavahinau non Moli, enia i pa sorahi na sava na lo vaia isamim, <sup>8</sup> ale na lo řule Tychicus isamim matan haratu, vara ha pa levosahia vara kama lo toho sohena sava, ale vara i eři retituetueni na mapumim, <sup>9</sup> moiso Onesimus mo lo usuri Tychicus, enia voraiřa matea, řa opoia mo řomturu řilangi, enia vonamim matea, ale la pa sorahi na sava hinau kama lo vaira nike.

<sup>10</sup> Aristarchus, enia mo lo toho peresiau na ima řilangi nike, mo sile na nona retioloolo isamim, moiso Mark atu vorain Barnabas, korong ka lavi te reti moiso vara i pala isamim, ale ha pa lavia, <sup>11</sup> peresi na tamlohi matea hijan Iesu la lo tovia Jastas. La harihi tupu visaletu purongo na Jew tari la lo vavahinau matan mauri atu God mo aulu hinia peresiau nike, ale na avulahi tavera mata enira la lo tueniau. <sup>12</sup> Epaphras, enia vonamim matea, enia volitusi non Křisto Iesu, mo sile na retioloolo isamim, mo lo usiusi řilangi tarea matamim na nona usiusi matan vara ha pa mai ha pa jea, ale ha levosahi mamahuni na masalon God. <sup>13</sup> Enau a eři vereaa isamim vara enia mo lo vavahinau řilangi matamim peresi la haratu Laodicea peresi la haratu Hierapolis. <sup>14</sup> Doctor Luke voraiřa sei řa opoia, peresi Demas, enira la sile na nora retioloolo isamim. <sup>15</sup> Ha sile na noku retioloolo isana vorai kalesia atu Laodicea, ale isan hařai atu Nympha peresi na vao kalesia la lo matavuhi na imana. <sup>16</sup> Ale vara ka evi leta nike isamim mo

isoiso, ha mele evia isana vao kalesia la lo matavuhi Laodicea. Ale mo řuhu vara ha evi leta atu na pete sohaia tiroma moiso isan la haratu Laodicea. <sup>17</sup> Ale ha vereaa isan Archippus vara, “O vaihitea vara o vai mařivisi na vavahinau non Moli sei mo lo silea isam.” <sup>18</sup> Enau Paul na lo uli la retioloolo nike na limaku haseku.

Ha sopo řomaliho vara enau na lo toho na ima řilangi, ale řomřuhu non God i pa toho isamim.

# 1 Thessalonians

## Tiroma Leta

### Paul Mo Ulia Isana Mara

## Thessalonica

### Leta Nike

Paul mo tapulo na vao kalesia Thessalonica (2.13–14), ale mo sopo kilau matan te mania, pani mo lo hani na masumasuna (2.9). Tiroma, la kalesia atu la lo lotulotu vono (1.9), pani nake la turu řilangi hin Moli, ale mata nora ooloo, Retiřuhu mo vano řalihi hin jara atu (1.8).

Tamlohi hai atu, la turuleji hin Paul, ale mo rovo mo vano Athens, pani mo řule Timothy mo vano vara i rohira Thessalonica (3.1–5). Timothy mara mo mele hilu, mo vereea isan Paul mara la lo turu řilangi ale vara la lo hahau na opoia (3.6–10).

Kalesia hai Thessalonica la sopo voko, la lo toho purongo matan la lo řomřomia vara i pa sopo tuai Moli i pa mele pala na varama (4.11–12). Hai la lo řomkaka matan te vonara la mate moiso pani Křisto mo sopo lo pala, la pa mele turu teni mo vono? (4.13–15), Paul mo retinanauhira, mo vereea mara la lo hahau usuri na masalon God tarea (5.1–11).

Mo řuhu vara tarea řa lo řomřomi na sava Paul mo vereea akerihi:

‘Ha avulahi tarea, ha lo tatamahu mata usiusi tarea, ha vere meje mata hinau tari, matan harihi enia masalon God hin Křisto Iesu matamim.’ (5.16–18)

#### Hin Leta Nike

1. Retioloolo (1.1–3)
2. Tovongi mata rasua nona Kalesia Thessalonica (1.4–3.13)
3. Mauri atu God mo avulahi hinia (4.1–12)
4. Vara Moli i mele pala (4.13–5.11)
5. Isoiso Retioloolo (5.12–28)

<sup>1</sup> Enau Paul na uli leta nike isamim vao kalesia sei Thessalonica, na hijan God Tama peresi Moli Iesu Křisto, Silas peresi Timothy la lo toho pere-siau nike.

Romřuhu peresi na tamata i pa toho isamim.

#### Nora Rasua

<sup>2</sup> Kama lo vere meje isan God tarea matamim mo isoiso na nomam usiusi, <sup>3</sup> kama lo vere kamim isan nořa God Tamařa, mata nomim voko sei ka lo vaira mata nomim rasua, ale mata nomim vavahinau sei ka lo vaira mata nomim opoia, peresi na nomim turu řilangi tarea sei ka lo vaia matan ka lo řomtoho matan nořa Moli Iesu Křisto.

<sup>4</sup> La voraiku peresi na vevoraiku řuhuřuhu, God mo opoi kamim, ale kama levosahia mo řuhu vara God mo viřoni kamim, <sup>5</sup> matan nomam Retiřuhu mo mai isamim, mo sopo mai na retireti purongo, pani mo mai peresi na suiha matan Tanume Tapu mo tueni kamim matan vara ha pa levosahia i řuhu vara Retiřuhu enia mo varařuhu. Kamim ka levosahia mo řuhu vara posimam hin rani atu kama lo toho isamim mo sohena sava matamim, <sup>6</sup> ale ka lo tovongi kamam peresi Moli matan kamim ka lavi na Retiřuhu, hina purongo vara ka lavi na rongohaji sasati matana, pani ka avulahi na avulahi non Tanume Tapu, <sup>7</sup> matan ka mai sohena tovongi matea isana tamlohi rasua tari Macedonia peresi Achaia. <sup>8</sup> Mata reti non Moli sei mo lo malue isamim mo roroa Macedonia peresi Achaia, ale nomim rasua hin God mo roroa na jara tari, ale mo vaia kama sopo eři mele vere te hinau mata nomim rasua isara. <sup>9</sup> Matan enira hasera la lo mele vereea vara ka lavi kamam na posposi řuhu sohena sava na nomam hahau. La vereea sohena sava ka vahaři na tamasi, ale ka posi ka vano isan Moli matan vara ha volitusi isan God varařuhu sei mo lo mauri, <sup>10</sup> ale ka lo saovi matan Natuna sei i pa tai na tuka, God mo sauteterahia na mateia, Iesu, enia mo juriřa na talai lolokoru non God mata hehe sei mo lo mai.

## 2

<sup>1</sup> Kamim ka levosahia mo řuhu la voraiku peresi na vevoraiku řuhuřuhu, vara nomam mai isamim mo sopo vano hina purongo. <sup>2</sup> Pani hina purongo vara kama lavi na rongohaji moiso na nora vailejleji



hin kamam Philippi, sohen ka levosahia, pani kama lo turu řilangi hin nořa God vara kama lo vereuli na Retiřuhu non God isamim na livuha rani řilangi. <sup>3</sup> Matan nomam ngurunguru matamim, mo sopo malue na hinau mo sopo tataholo teni na hina lumiha, teni vara kama vaihitea vara kama halu, <sup>4</sup> pani matan kama lo retireti sohena vahařule sei God mo majinga hin kamam vara kama lavi na Retiřuhu. Kama sopo vaia matan vara tamlohi la pa avulahi hin kamam, pani vara God i avulahi, enia natu, haratu mo lo ariřa vara řa lo vai te vavahinau mata sava. <sup>5</sup> Matan kama sopo mai isamim mata haruharu sohen ka levosahia, teni vara kama tapala peresi kamim mata mania, haratu God mo levosahia, <sup>6</sup> ale kama sopo ale na hasohaso nona tamlohi, mo sopo isamim teni isan te tinapua, <sup>7</sup> hina purongo vara mo tataholo vara kama usi te hinau isamim matan kamam kama vahařule non Křisto. Pani kama mai isamim na posposi malum sohena hařai vasusu matea mo lo susui na natuna, ale mo lo kilaura. <sup>8</sup> Ale matan kama opoi kamim mo tavera, mo vai kamam kama avulahi vara kama sile kamim na Retiřuhu non God, ale maurimam sohena, kama silera isamim, matan ka mai ka vorai řuhuřuhu isamim.

<sup>9</sup> Matan ka levosahia la vorai peresi na vevoraiku řuhuřuhu, vara na rani kama lo retivujavujangi isamim, kama voko řilangi na rani peresi na vutepongi mata mania matan vara kama sopo tau te tetehi isan te vonamim. <sup>10</sup> Kamim ka levosahia, ale God mo levosahia vara nomam posposi mo tapu isamim sei ka rasua, ale mo tataholo sohena sava, ale mo sopo te hinau i sati vara tea i pa eři pisuhi kamam hinia. <sup>11</sup> Matan ka levosahia vara mo sohena sava isana tata matea peresi natuna, <sup>12</sup> kama lo ngurunguru hin kamim, ale kama lo retituetueni kamim, ale kama lo vereu řilangi vara ha hahau na mauri sei God i pa avulahi hin kamim hinia, enia natu, mo tovi kamim vara ha mai hin nona

mauri atu enia mo supe hinia peresi na hasohasona.

<sup>13</sup> Ale kama lo vere meje isan God tarea matan hin rani atu ka lavi na reti non God isamim, ka sopo lavia sohena retireti nona tamlohi purongo, pani reti non God varařuhu, ale mo lo vai na nona vavahinau hin kamim sei ka rasua.

<sup>14</sup> Matan kamim ka vorai kalesia řuhuřuhu, ka tovongi na vao kalesia tinatinapu hin Křisto Iesu non God hin Judea, matan ka lavi na rani řilangi isana tahisamim mo sohena tamlohi rasua Judea la lo lavia isana Jew.

<sup>15</sup> Enira la haratu sei la vilimatei Moli Iesu peresi na přovet, la levuti nařihi kamam, ale God mo sopo avulahi hinira, ale enira la lo turuleji na tamlohi tari, <sup>16</sup> matan la turuhoro kamam vara kama sopo retireti isana tamlohi řořoha matan vara la pa juri. Hin posposi akerihi tarea la lo takonahi na nora hehe mo sahe vara i mařivi, pani talai lolokoru non God mata hehe i pa jovi vevuhi isara.

### *Romřomi Non Paul*

<sup>17</sup> Pani la vorai peresi na vevoraiku řuhuřuhu, mo tapulo hin rani atu la lavi nařihi kamam isamim mata makomo rani – ka sopo mele hite na nahomam, pani mapumam la lo toho isamim. Ale matan kama opoia mo tavera vara kama eři mele mai isamim, kama vaihitea mo řilangi matan vara kama mele mai. <sup>18</sup> Matan kamam kama opoia vara kama mele mai isamim, varařuhu enau, Paul na opoia vaha visa, pani Setan mo lo turuhoro kamam. <sup>19</sup> Matan sava natu, enia nomam řomtoho teni avulahi teni řongořongo nona supe kama pa avulahi tavera hinia na nahon Moli Iesu hin rani atu vara i pala? Enia kamim. <sup>20</sup> Varařuhu, kamim ka nomam hasohaso peresi na nomam avulahi.

## **3**

<sup>1</sup> Matan haratu, kama sopo eři mele taurilatia i peravu, ale kama hatihia vara kamam hasemam, kama pa lo toho Athens, <sup>2</sup> Ale hitahu kama

řule Timothy voraimam enia mo tapala na vavahinau non God mata sohai na Retiřuhu non Křisto, vara i vai kamim ha řilangi i retituetueni kamim na nomim rasua, <sup>3</sup> matan vara i pa sopo tea i řomkaka na rani mata vaihite. Ka levosahi mamahunia vara God mo viřoni na rani mata vaihite vara la pa vaihiteřa. <sup>4</sup> Ka levosahia, na rani kama lo toho peresi kamim, kama lo vereia isamim moiso vara řa pa lavi na nora tipahi, ale ka levosahia vara la pala.

<sup>5</sup> Matan haratu, na sopo eři mele taurilatiau i peravu, ale na lo řulea vara i pa to hitea vara nomim rasua mo lo sohena sava. Na matahu vara korong hin te malele Tiapolo mo halu kamim moiso, ale nomam kalvono korong la vano hina purongo. <sup>6</sup> Pani Timothy mo pa pala isamam nakerihi, mo tai isamim, ale mo lavi na retiřuhu mo vereia mara, nomim rasua peresi na nomim opoia la lo řilangi. Mo vere kamam hinia vara tarea ka lo řomřomi na nořa rani řuhu, ale vara kamim ka opoia jea vara ha mele hite kamam, sohen kamam kama opoia vara kama mele hite kamim. <sup>7</sup> Matan haratu la voraiku peresi na vevoraiku řuhuřuhu, hina purongo vara kama lo lavi na rani řilangi tavera peresi na rongohaji, nomim rasua mo vai kamam kama avulahi. <sup>8</sup> Ale nake, mauri mo mele řuhu isamam matan kama levosahia vara kamim ka lo turu řilangi hin Moli.

<sup>9</sup> Kama pa vere meje isan God i tataholo sohena sava matamim, matan ka vai kamam kama avulahi na nahon nořa God matamim. <sup>10</sup> Tarea kama lo usiisi řilangi vara kama pa eři mele hite kamim, ale kama sile kamim na sava ka vejuveju hinia na nomim rasua. <sup>11</sup> Nake nomam usiisi vara nořa God Tamařa hasena, peresi nořa Moli Iesu i vai na malele tataholo vara kama mai isamim. <sup>12</sup> Kama lo usiisi vara Moli i vai na nomim opoia i ulua, ale i mařivi savulevule matamim hatehateahi peresi na tamlohi tari tinapua, sohen nomam opoia mo vaia matamim. <sup>13</sup> God i

pa vai na mapumim la řilangi matan vara tea i pa sopo eři tuvai kamim hin te hinia, ale ha tapu na nahon nořa God enia Tamařa hin rani atu nořa Moli Iesu i pa mai peresi na nona tamlohi tapu.

## 4

### *Posposi Atu God Mo Opoia*

<sup>1</sup> La voraiku peresi na vevoraiku řuhuřuhu, mele hinia matea, hin rani atu kama lo toho peresi kamim, kama vujangi kamim vara ha pa hahau sohena sava na maurimim vara ha vai God i avulahi, ale ka lo usuria sohena. Ale nake na hijan Moli Iesu, kama vere kamim vara ha lo ulua i tavera hinia. <sup>2</sup> Matan ka levosahi vujangi atu kama lo taua na limamim moiso na suiha non Moli Iesu. <sup>3</sup> Matan masalon God mo sohen harihi, vara maurimim la vokevoke, ale ha toho asau na mauri maji, <sup>4</sup> ale vara kamim hatehateahi ha levosahi na malele mata hase kilau mamahuni na epemim na malele tapu vara tamlohi la pa hasohaso kamim matana, <sup>5</sup> mo sopo na masalo epemim sohena tamlohi řořoha la lo vaia.

<sup>6</sup> Ha sopo vai te hehe sei isan te voraimim kalesia hatea, teni ha halua hin malele akerihi, matan God i pa sile na talai isana tamlohi sohena, vara la lo vai na hina sati sohen harihi, sohen kama pete sile na nomam retireti řilangi isamim matara moiso. <sup>7</sup> Matan God mo sopo toviřa mata mauri mo lumiha, pani vara řa hahau na mauri vokevoke řuhu. <sup>8</sup> Matan haratu, vara tea mo řohu hin la vujangi nike, mo sopo řohu na tamlohi, pani mo lo řohu hin God sei mo lo sileřa na nona Tanume Tapu.

<sup>9</sup> Nake, na posposi vorai la opoiopaira, kama sopo opoia vara kama mele uli te hinia isamim matana, matan kamim God mo vujangi kamim moiso vara ha opoiopoi kamim. <sup>10</sup> Ale varařuhu, kamim ka opoi na vorai kalesia tari řalihi Macedonia. Ale la voraiku peresi na vevoraiku řuhuřuhu, sava ka lo vaia mo řuhu, pani ha mele ulua i tavera

hinia. <sup>11</sup> Ha tau na řomimim vara ha usuri na mauri malum, ha sopo sohai na ngalsumim na hinau non tinapua, ha hani na masmasumim hasemim sohena kama vereaa isamim, <sup>12</sup> matan vara la haratu la sopo rasua la pa hitevosahia na nomim hahau, ale la hasohaso kamim matana, matan vara ha pa sopo řomtoho na tinapua.

#### *Rani Sei Moli I Pa Mele Mai Hinia*

<sup>13</sup> La voraiku peresi na vevoraiku řuhuřuhu, kama sopo opoia vara ha sopo levosahia vara i pa sohena sava isan la haratu la mate moiso teni vara ha tangi sohen la haratu sei mo sopo te nora řomtoho. <sup>14</sup> Ra rasua vara Iesu mo mate, ale mo mele turu, ale řa rasua vara God i pa vai la haratu la mate moiso hin Iesu, la pa mai peresi Iesu.

<sup>15</sup> Sohen Moli mo hase vereaa, kama vereaa isamim vara enřa sei řa pa lo mauri, vara řa pa toho i tikeli rani atu Moli i mele mai, řa pa sopo tiroma hin la haratu la mate moiso, <sup>16</sup> matan Moli hasena, i pa tai na tuka i sinai i ulo na retileu, peresi na leo supe nona angelo matea, ale peresi na ro-roa trumpet non God, ale la haratu la mate hin Křisto la pa turu tiroma. <sup>17</sup> Ale hitahun haratu, enřa sei řa pa lo mauri, ale řa pa lo toho, řa pa sahe peresira aulu na telangi vara řa pulutahi peresi Moli na masapa, ale řa pa toho peresi Moli tui tui. <sup>18</sup> Matana, ha retituetueni kamim hatehateahi hin la reti nike.

## 5

#### *Isoiso Rani*

<sup>1</sup> Ale nake, la voraiku peresi na vevoraiku řuhuřuhu, kama sopo opoia vara kama uliuli isamim matan la rani sei, <sup>2</sup> matan ka levosahia mo řuhu moiso vara rani atu vara Moli i pa mele mai hinia i pa sohena tamlohi vavanaho matea mo mai na vutepongi. <sup>3</sup> Vara tamlohi la lo vereaa lara, ‘Tamata mo lo toho, ale řa tatamahu!’ Vahatea purongo, komokomo i pa jovi isara, sohena haři varihaji isana haři mata lavilavi. La pa sopo eři rovo.

<sup>4</sup> Pani kamim la voraiku peresi na vevoraiku řuhuřuhu, ka sopo toho na řořoha matan vara rani atu i vai kamim ha pa hutu kamim sohena ka hutu kamim na tamlohi vavanaho matea. <sup>5</sup> Kamim mo isoiso ka natun malarani, ale nomim hahau enia mata rani. Enřa řa sopo mata vutepongi teni mata řořoha. <sup>6</sup> ale matana, řa sopo sohena tatuara sei la lo juruvi, pani řa tatamahu, ale řa hase taurilatira. <sup>7</sup> Matan la haratu la lo juruvi, la juruvi na vutepongi, ale la haratu la lo putu na wai řilangi, la putu hinia na vutepongi. <sup>8</sup> Pani matan enřa řa tamlohi mata malarani řa hase taurilatira tarea, řa ru na rasua peresi na opoia sohena ruru mata tingting matea, ale nomim řomtoho mata juri i pa sohena hat matea mata vuro. <sup>9</sup> Matan God mo sopo viřoniřa vara i pa sile na nona talai lolokoru mata hehe isařa, pani matan vara řa lavi na juri hin nořa Moli Iesu Křisto. <sup>10</sup> Enia mo mate matařa matan vara hina purongo vara řa lo kilau teni řa juruvi, řa pa toho peresia. <sup>11</sup> Matan haratu, ha retituetueni, ale ha tueni kamim hatehateahi sohen ka lo vaia nake.

#### *Isoiso Retireti*

<sup>12</sup> Nake kama lo usi kamim la voraiku peresi na vevoraiku řuhuřuhu vara ha sile na oloolo isan la haratu la lo voko řilangi isamim, haratu la aulu hin kamim hin Moli, ale la lo retiřoařoahai kamim. <sup>13</sup> Matan sava la lo vaia ha silera na oloolo tavera na opoia mata nora voko. Ale ha sopo vasvas peresi na tinapua. <sup>14</sup> Ale kama lo usia řilangi isamim la voraiku peresi na vevoraiku řuhuřuhu vara ha retiřoařoahai la haratu la maloko, ha retituetueni la haratu la matahu, ha tueni la haratu la sopo suiha, ha řomperavu isan tamlohi tari. <sup>15</sup> Ha lo kilau matan tea i sopo kele na hehe peresi na hehe, pani tarea ha vaihite vara ha vai na posposi řuhu isamim hatehateahi, ale isana tamlohi la sopo rasua.

<sup>16</sup> Ha avulahi tarea, <sup>17</sup> ha lo tatamahu mata usiusera, <sup>18</sup> ha

vere meje mata hinau tari, matan harihi enia masalon God hin Křisto Iesu matamim.

<sup>19</sup> Ha sopo vuni na hapu Tanumen God, <sup>20</sup> ha sopo hitelehilehi na sava tamlohi rasua tinapua mo vereva vara Tanumen God mo vujangia isana. <sup>21</sup> Pani ha tapurongo hinia, ale ha vaihite na sava mo vereva vara la varařuhu teni, ale ha taurilati na sava mo řuhu. <sup>22</sup> Ha toho asau na hinau tari la sasati.

*Usiusi Non Paul*

<sup>23</sup> Nake God mata tamata, enia hasena i pa vai kamim ha tapu vevuhi, God i pa vai mamahuni na tanumemim, na maurimim peresi na epemim matan vara la pa toho vokevoke, ale tea i sopo eři tuvai kamim hin te hinau na mele mai nona nořa Moli Iesu Křisto. <sup>24</sup> Haratu sei mo tovi kamim enia i pa sopo eři tope na nona retitauhi, varařuhu enia i pa vaia.

<sup>25</sup> La voraiku peresi na vevoraiku řuhuřuhu, ha usiusi matamam.

<sup>26</sup> Ha sile na retioloolo mata opoia isana vorai peresi na vevorai řuhuřuhu tari.

<sup>27</sup> Na lo retileu isamim na nahon Moli vara ha evi leta nike isana vorai kalesia mo isoiso.

<sup>28</sup> Romřuhu non nořa Moli Iesu Křisto i pa lo toho isamim.

## 2 Thessalonians

### Harua Leta

### Paul Mo Ulia Isana Mara

### Thessalonica

#### Leta Nike

Hin leta nike Paul mo lo vere meje isan God matan nora rasua mo lo ulua (1.3), hina purongo vara la lo lavi na rani řilangi, pani Paul mo vere mara God mo lo vaihite na nora rasua (1.4-5).

Kalesia hai Thessalonica la lo řomřomia lara Paul mo sohai na leta isara moiso mara Moli mo mele pala moiso (2.2). Pani mo vono, Paul mo retiřoaroahaira vara la sopo tinařihia vara tea i halura sohena matan Iesu i pa sopo pala matan te hinau la pa masese tako (2.3-12).

Paul sohena mo lo retiřoaroahaira matan vara la sopo toho purongo (3.6-10), ale vara la lo kilau vara tea i řohu vara i oloolo na nona reti hin leta nike.

Paul mo vere mara God i pa sile na talai tavera isan la haratu sei la řohu vara la rasu na nona reti hin pongi atu mo lo mai:

‘Ale matana, God i pa sohai na hina haluhalu isara, matan vara la pa rasu la hinau haluhalu atu. Matan vara enira mo isoiso la pa lavi na talai matan la sopo rasu na reti-varařuhu, matan la lo avulahi na hehe la lo vaira.’ (3.11-12)

#### Hin Leta Nike

1. Retioloolo (1.1-2)
2. Moli i pa ari na varama (1.3-12)
3. Moli mo sopo mele pala (2.1-12)
4. Turu řilangi tarea (2.13-17)
5. Ha usiusi, ha voko (3.1-15)
6. Isoiso usiusi (3.16-18)

#### *Tiroma Reti*

<sup>1</sup> Enau Paul na uli leta nike isamim vao kalesia Thessalonica hin God Tamařa peresi Moli Iesu Křisto, Silas peresi Timothy la lo toho peresiau nike.

<sup>2</sup> Romřuhu peresi na tamata mo tai isan God Tama peresi Moli Iesu Křisto i pa toho isamim.

*Paul Mo Vere Meje*

<sup>3</sup> La vorai peresi na vevorai, tarea mo tataholo vara kama vere meje isan God matamim, ale mo tataholo matan nomim rasua mo lo ulua mo tavera, ale nomim opoia isamim hatehateahi mo lo tavera jea. <sup>4</sup> Mo vai kamam kama lo retiřapahapa matamim isana vao kalesia tinapua sei la rasu God mata nomim turu řilangi peresi na nomim rasua na rani tipahi tari peresi na rani řilangi ka lo lavira. <sup>5</sup> Harihi mo vujangi na aria tataholo non God, matan vara i vai kamim ha tataholo mata ha lavi mauri atu God mo aulu hinia, sei ka lo lavi na rani řilangi matana. <sup>6</sup> Matan mo tataholo vara God i sile na rani řilangi isan la haratu sei la lo sile na rani řilangi isamim, <sup>7</sup> ale God i pa sile na mapu isamim sei ka lo lavi na rani řilangi sohemam hin rani atu Moli Iesu i pala na tuka. Enia i pa mai peresi na nona angelo suiha jea, <sup>8</sup> na pepe hapu tavera jea vara i lavi na talai tavera i silea isan la haratu la sopo levosahi God peresi la haratu sei la lo řohu vara la oloolo na Retiřuhu non nořa Moli Iesu. <sup>9</sup> Nora talai i pa vaikomokomora i sopo te isoisona, la pa toho mata rani tui tui hasera asau na nahon God peresi na mera suihana tavera jea, *Isa 2.10* <sup>10</sup> hin rani atu vara Iesu i mele mai vara i lavi na hasohaso isana nona tapuhi sei la tau na nora rasua hinia, la pa mařurahi tavera matana, matan ka lo rasu na nomam retisohai isamim.

<sup>11</sup> Matan haratu kama lo usiusi tarea vara nořa God i pa vai kamim ha tataholo mata lavi mauri atu mo tovi kamim matana, ale matan vara i tueni kamim na suihana mata vai vevuhi na nomim hinau řuhu tari peresi na vavahinau ka lo vaira mata rasua, <sup>12</sup> matan vara hijan nořa Moli Iesu i pa lavi na hasohaso hin kamim, ale kamim hinia, i usuri na řomřuhu non nořa God peresi Moli Iesu Křisto.

## 2

### *Tamlohi Enia Meresahi Nona Leu*

<sup>1</sup> Ale nake, mata mele mai non nořa Moli Iesu Křisto peresi na nořa pulu-tahi isana, la vorai peresi na vevorai,

kama lo usi kamim <sup>2</sup> vara ha sopo hisuhisu na řomimim teni ha matahu matan ka rongo te reti non te tanume, teni te sorasora, teni te leta la vereea vara mo tai isamam, mo lo vereea vara rani non Moli mo mai moiso. <sup>3</sup> Ha sopo tinařihira vara tea i halu kamim hin te malele, matan rani atu i pa sopo eři mai, i tiroma hin rani tavera atu tamlohi la pa vahaři hin God hinia, ale rani pala nona tamlohi vaivaileu atu i pa usuria. Tamlohi atu, God i pa vaikomokomoa. <sup>4</sup> Enia i pa hase tahea aulu, ale i pa turuleji isana hinau tari sei tamlohi la tovira vara God teni te hinau mata lotu. Enia i pa sakele na lolo Temple, ale i vereea vara enia God. *Dan 11.36; Ezek 28.2*

<sup>5</sup> Ka řomaliho vara na vere kamim hin la hinau atu hin rani atu na pa lo toho peresi kamim? <sup>6</sup> Ale nake natu, ka levosahi na sava mo lo turuhoroa matan i pa sopo eři malue na jara tavera i tikeli rani atu God mo viřonia matana. <sup>7</sup> Matan, suiha luhu atu mata vaivaileu mo pete voko moiso, pani i pa lo luhu i tikeli rani atu God i pa lavi nařihi haratu sei mo lo turuhoroa nake.\* <sup>8</sup> Ale nake natu, haratu sei mo lo vaivaileu i pa pala, ale Moli Iesu i pa vilimateia na maromaronana purongo, ale i pa vaikomokomoa na sasarami tavera hin rani atu vara i mele mai. *Isa 11.4* <sup>9</sup> Rani non tamlohi vaivaileu atu i pa pala na vavahinau non Setan, i pa pala na suiha tavera peresi na matamata halu tavera peresi na hina mařurahi, <sup>10</sup> ale enia i pa vai na hina halu sasati tari matan vara i eři halu la haratu la lo vano na nora komokomo matan la řohu vara la rasu na retivarařuhu sei i eři jurira. <sup>11</sup> Matana, God i pa sohai na hina haluhalu isara, matan vara la pa rasu la hinau haluhalu atu. <sup>12</sup> Matan vara enira mo isoiso la pa lavi na talai matan la sopo rasu na retivarařuhu, pani matan la lo avulahi na hehe la lo vaira.

### *Kamim Ha Turu Rilangi Tarea*

\* **2:7:** God i lavi nařihi: Tamlohi vujangi la sopo levosahia vara Paul mo lo vereea hare mo lavi nařihi teni hare mo lo turuhoroa, řomřomi enia vara Paul mo lo vereea God mo turuhoroa hin te malele.

<sup>13</sup> Pani mo tataholo vara tarea kama lo vere meje isan God matamim vorai peresi na vevorai sei Moli mo opoi kamim, matan God mo viřoni kamim vara kamim ha pa juri tiroma hin malele sei Tanume Tapu mo lo vaira řa tapu hinia, ale matan ka lo rasu na retivarařuhu. <sup>14</sup> God mo tovi kamim hin na nomam Retiřuhu matan vara ha pa lavi na hasohason nořa Moli Iesu Křisto.

<sup>15</sup> Ale matana, la vorai peresi na vevorai, ha turu řilangi, ale ha tau-rilati vujangi sei kama lo vujangi kamim hinia moiso, na retireti teni hin te nomam leta. <sup>16</sup> Ale nořa Moli Iesu Křisto hasena, God Tamařa sei mo opoiřa, ale na nona řomřuhu mo sileřa na nanau matan tui tui peresi na řomtoho řuhu, <sup>17</sup> i pa nanau na mapumim, ale i turuhi řilangi kamim na vavahinau tari peresi na retireti řuhu.

## 3

### *Paul Mo Usia Vara La Lo Usiusi Matana*

<sup>1</sup> Ale isoiso hinau la vorai peresi na vevorai, ha usiusi matamam, vara reti non Moli i pa vano i vila na jara tari, ale vara tamlohi la pa hasohasoa sohen ka lo hasohasoa, <sup>2</sup> ale matan vara God i pa juriřa isana tamlohi lejileji la sasati, matan mo sopo tamlohi tari la rasua. <sup>3</sup> Pani Moli i pa sopo tope na nona retitauhi, enia i pa turuhi kamim, ale i pa lo matahi kamim matan tamlohi sasati atu Tiapolo. <sup>4</sup> Ale nomam řomřomi mo řilangi hin Moli matamim vara ka lo vai na sava kama retileu hinira isamim moiso, ale vara ha pa lo vaira. <sup>5</sup> Kama usia vara Moli i vujangi kamim vara nona opoia isamim vara mo sohen sava, ale ha turu řilangi hin Křisto.

### *Retiřoaoahai Mata Maloko*

<sup>6</sup> La vorai peresi na vevorai, na hian Moli Iesu Křisto na retileu isamim vara ha toho asau isan te vorai tina-pua sei mo tamlohi maloko, mo sopo hani na masmasuna usuri na posposi

sei kama lo vereā isamim moiso.

<sup>7</sup> Matan kamim ka levosahia vara ha pa usuri na nomam tovongi řuhu, matan kama sopo toho purongo hin rani atu kama lo toho peresi kamim.

<sup>8</sup> Ale kama sopo hani te pereti sei vara kama sopo volia, ale kama lo voko mo řilangi tarea, matan vara kama sopo tau te tetehi isan te vonamim hatea.

<sup>9</sup> Mo sopo matan mo sopo tataholo vara kama usia isamim, pani matan kama opoia vara kama pa sile kamim na tovongi řuhu matea mata usuria.

<sup>10</sup> Matan hin rani atu kama lo toho peresi kamim, kama sile retileu ak-erihi, mara vara tea mo sopo avulahi vara i vai na voko, ha sopo vahania.

<sup>11</sup> Matan kama lo rongoa vara tamlohi hai isamim la lo toho purongo, la sopo hahau i tataholo, pani la lo sanga hau. <sup>12</sup> Ale nake, kama lo retileu, ale kama lo retituetueni na tamlohi sohen harihi hin Moli Iesu Křisto vara la pa vai na nora voko na posposi malum matan vara la pa hani na masmasura purongo. <sup>13</sup> Pani isamim la vorai peresi na vevorai, ha pa sopo malokoloko mata vai na hina řuhu. <sup>14</sup> Vara tea mo řohu vara i ooloo na sava kama lo vereā hin leta nike, ha lavi na hijana, ale ha sopo mele pulutahi peresia matan vara i pa vaia i mahanuhanu. <sup>15</sup> Ale, pani, ha sopo kilaua vara enia mere-sahi matea, pani ha retiřoařoahaia sohena vorai vonamim matea.

### *Isoiso Reti*

<sup>16</sup> Nake, kama lo usiusi vara Moli mata tamata hasena, i pa sile na tamata tarea isamim na malele tari. Moli i pa toho peresi kamim mo isoiso. <sup>17</sup> Enau Paul, na lo uli retioloolo nike na limaku haseku. Na vaia sohena matamata varařuhu vara ha pa hitevosahia vara enau na lo uli na noku leta sohena.

<sup>18</sup> Romřuhu non Moli Iesu Křisto i lo toho isamim mo isoiso.

**Tiroma Leta  
Paul Mo Ulia Isan  
Timothy  
Leta Nike**

Timothy mo lo usuri Paul na nona voko (Rom 16.21; 1Co 16.10; Php 2.19) mata nora rasua hin Iesu. Paul mo hitea sohena natuna matea (1.2). Timothy mo mai patu tamlohi na nona rani peresi Paul, enia tapalan Paul. Paul mo sohai leta sei isan Timothy, pani vujangi hinia mo tueni na mauri vao kalesia non God. Mo vujangi na malele tataholo vara řa viřoni na patu tamlohi hinia, deacon la vai na vavahinau non God (3.1-7; 8-13; 5.17-20).

Reti non Paul akerihi řa eři rasua tarea:

'Reti nike, o eři rasua ale mo tataholo vara o lavi vevuhia, vara, 'Křisto Iesu mo mai na varama vara i juri na tamlohi hehe.' Enau na sasati jea hinira. Pani God mo řomopoiu matan hinia sei, matan enau na sasati jea hinira, ale Iesu Křisto mo tauau vara a mai tovongi matea vara i vujangi na nona řomperavu isan la haratu la pa rasua mata mauri tui.' (1.15-16)

**Hin Leta Nike**

1. Retioloolo (1.1-2)
2. Retivujangi mata mauri kalesia (1.3-3.13)
3. Hina aulu na nořa lotu (3.14-4.5)
4. Paul mo retituetueni Timothy (4.6-6.21)

*Reti Tiroma*

<sup>1</sup> Enau Paul, vahařule matea non Křisto Iesu God mo viřoniau na nona suiha, Křisto Iesu nořa Jujuri enia nořa řomtoto. <sup>2</sup> Timothy, natuku hin nořa mauri rasua, na lo usiusi matam vara God Tamařa enia Křisto Iesu nořa Moli, la sileho na řomřuhu, na řomopoiu peresi na tamata.

*Retiřoařoahai Mata Vujangi Haluhalu*

<sup>3</sup> Sohen na vereia řilangi isam hin rani atu na tauho Ephesus vara a vano Macedonia, na vereia vara o pa toho vara o sile na reti isan la

tamlohi atu vara la sopo vujangi te vujangi tinapua, <sup>4</sup> teni vara la sopo usuri te sorasora halu teni te sorasora vono mata sava pina tuai la tataholo hinira, vuana enia řomřomi vono purongo, la hinia sei la sopo tueni te tamlohi na mauri mata rasua hin God. <sup>5</sup> Pani nořa řomřomi tavera hinia, enia opoia, opoia mo tai isana mapu vokevoke peresi na rongvosahi na hinia tataholo, peresi na rasua varařuhu. <sup>6</sup> Tamlohi hai, la jalio, la posi la usuri na sorasora vono, <sup>7</sup> la opoia vara la mai tamlohi vujangi mata leu, pani la sopo levosahi na sava la lo vereia teni na hinia sei la vereia vara la levosahira mo řuhu vara la tataholo teni mo vono.

<sup>8</sup> Ale řa levosahia vara Leu mo řuhu, pani vara tea mo lavia na posposi tataholo purongo, <sup>9</sup> ha levosahi harihi: God mo sopo sile na leu mata tamlohi tataholo, pani isan la haratu la lo vaivaileu, la haratu la sopo oloolo hin te tamlohi hatea, la haratu la lo usuri na posposi varama, la haratu la lo hehe, la haratu la sopo sile na oloolo isan te hinia mata oloolo, la haratu la lo vilimatei na tamara teni tinara, la haratu la lo vilimatei na tamlohi tinapua, <sup>10</sup> ale la haratu la lo vai na posposi lumiha, tamlohi la vaivaileu peresi na tamlohi, hařai la vaivaileu peresi na hařai, la haratu la lo tauri vanaho na tamlohi mata la hařehira, ale la haratu la lo retihalu tarea, la haratu la lo taviti halu na lolo court, ale na posposi lejileji tari sei la lo turuleji na vujangi řuhu sei, <sup>11</sup> mo lo usuri na Retiřuhu řuhuřuhu non God sei enia avulahi tavera, ale Retiřuhu sei mo taua isaku.

<sup>12</sup> Na vere meje isan Křisto Iesu nořa Moli, mo sile na řilařilangi isaku, matan mo hitea sohena vara a eři vai na masalona, ale mo viřoniau vara a volitusi isana, <sup>13</sup> hina purongo vara tiroma na lo verelejeji Křisto, na lo unuhi na nona tamlohi vara a komora, ale na kerekerera, pani God mo řomopoiu mata na sopo lo levosahi na sava na lo vaia matan na sopo rasua, <sup>14</sup> Ale řomřuhu non nořa



Moli mo maŕivi savulevule matakū na rasua peresi na opoia hin Kŕisto Iesu. <sup>15</sup> Reti nike, o eŕi rasua mo tataholo vara o lavi vevuhia vara: Kŕisto Iesu mo mai na varama vara i juri na tamlohi hehe. Enau na sasati jea hinira. <sup>16</sup> Pani God mo ŕomopoiau matan hinau sei, matan enau na sasati jea hinira, ale Iesu Kŕisto mo tauau vara a mai tovongi matea vara i vujangi na nona ŕomperavu isan la haratu la pa rasua mata mauri tui. <sup>17</sup> Nake, isan Supe mata tauni tari, i sopo eŕi tihai, tea i sopo eŕi hitea, enia God matelete, ŕa pa silea na ololo tavera peresi na hasohaso na rani tui tui tarea. Amen.

### *Vavahinau Non Timothy*

<sup>18</sup> Timothy natuku, reti nike na lo vereea isam, mo lo usuri na retiman-govi sei la vereea matam moiso, la pa tueniho vara o eŕi vai na vuro ŕuhu, <sup>19</sup> tarea o tauri ŕilangi na nom rasua peresi na nom rongovosahi na hinau mo tataholo, ale tamlohi hai la tau naŕihira, la komo na nora rasua sohena boti mo vujahi kosahia na paranga. <sup>20</sup> Tatuara sei, Hymenaeus enia Alexander, enau na taura la vano na liman Setan vara i pa vujan-gira vara la pa sopo mele turuleji hin God na nora vujangi haluhalu.

## 2

### *Vujangi Mata Lotu*

<sup>1</sup> Tiroma, na lo vereea ŕilangi vara tamlohi na nora usiusi mata tamlohi tari, la usi God mata tuetueni, la usiusi mata tinapua, ale vara la vere meje isan God. <sup>2</sup> Mata supe peresi la haratu sei la lo tauri na suiha, matan vara ŕa pa eŕi mauri na mauri mo tamata, ale mo malum vara ŕa eŕi usuri na mauri tataholo, ale ŕa sile na ololo isan God. <sup>3</sup> Usiusi sohena, mo ŕuhu na nahon God, noŕa Jujuri, ale mo avulahi hinia, <sup>4</sup> matan God mo opoia vara i juri na tamlohi tari, ale vara la pa levosahi na retivaraŕuhu.

<sup>5</sup> Matan God enia matelete purongo, ale tamlohi tuetueni

matelete purongo sei enia mo malele tamlohi la mai isan God, tamlohi atu enia Kŕisto Iesu, <sup>6</sup> mo hase silea sohena volituhu mata tamlohi tari, reti sei enia vereulia sei God mo silea na rani tataholo.

<sup>7</sup> Matana, God mo viŕoniau vara a mai vahaŕule matea, ale vara a mai tamlohi retivujavujangi matea, na lo vere na varaŕuhu na sopo halu, God mo ŕuleau vara a vujangi na tamlohi ŕoŕoha na malele rasua peresi na retivaraŕuhu.

### *Posposi Mata Haŕai*

<sup>8</sup> Moiso, na opoia vara tamlohi na jara tari la usiusi, ale la tahe na limara tapu isan God, i pa sopo te lolokoru teni vasvas hinira. <sup>9</sup> Sohena, na opoia vara tarea haŕai la ruru na ruru na ŕomŕomi ŕuhu i tataholo na naho tamlohi. Mo ŕuhu vara la sopo peri na vulura na malele tinatinapua peresi na hinau mata gold teni huŕutavila teni ruru volina mo sahe aulu jea, <sup>10</sup> pani hin haratu purongo, mo tataholo mata haŕai sei mo lo vereea vara enia mo lo usuri posposi atu God mo opoia, peresi na vavahinau ŕuhu. <sup>11</sup> Haŕai la pa toho malum la tapurongo, ale la tatamahu vara la ololo matan vara la eŕi lelevosahi. <sup>12</sup> Tarea, enau na sopo majinga vara haŕai la vujangi teni la mai patu tamlohi la tiroma la aulu na tamlohi. Mo vono, enira la pa toho malum purongo, <sup>13</sup> matan God mo vai Adam tiroma moiso mo pa vai Eve.

*Gen 2.7, 21-22*

<sup>14</sup> Ale Tiapolo mo sopo halu Adam, mo halu na haŕai, ale mo tope na retileu non God. *Gen 3.1-6*

<sup>15</sup> Pani God i pa juri na haŕai na tapetape, vara la lo turu ŕilangi na rasua, opoia, la hahau na mauri vokevoke peresi na posposi hasera taurilatira.

## 3

### *Patu Tamlohi Na Vao Kalesia*

<sup>1</sup> Reti nike o eŕi rasua, vara tea mo tau na ŕomina vara i pa patu tamlohi rasua matea mata tamlohi

\* **3:1:** patu tamlohi rasua: ŕaramin reti sei, patu tamlohi enia tamlohi atu mo lo kilau na tamlohi rasua na jara matea.

rasua, mo opoi na vavahinau űuhu matea.\* <sup>2</sup> Ale matana, o kilau vara mo sopo te hinau na maurina, mo lahi na haűai matelete, mo hase taurilatia, enia tamlohi űoműomi, o hitea vara tamlohi la lo sile na ololo isana moiso, enia mo avulahi vara i lavi na tamlohi tinapua na imana, ale enia mo levosahi na posposi mata vujangi mo űuhu, <sup>3</sup> Ale, enia mo sopo tamlohi inu hajavua, mo sopo tamlohi valum, pani űomina mo malum, mo sopo tamlohi vasvas, ale mo sopo tamlohi űomjea na mania, <sup>4</sup> ale mo lo kilau mamahuni na lolo imana, ale natuna la sile na ololo isana, ale la ololo hinia. <sup>5</sup> Matan vara tea mo sopo eűi kilau mamahuni na imana, i pa kilau mamahuni na vao kalesia non God sohena sava? <sup>6</sup> Enia i pa sopo tamlohi matea mo pa mai purongō na mauri kalesia, matan patuna i pa sosohi na mangisi tavera, ale i jovi sivo na talai non Tiapolo. <sup>7</sup> Moiso aulu hin haratu, tamlohi na jingoima la vereea vara maurina mo tataholo, ale matan i sopo eűi jovi hin te vuna non Tiapolo, ale i mahanuhanu matana.

#### *Malele Viűoni Na Deacon*

<sup>8</sup> Deacon sohena, o hitea vara tamlohi la lo sile na ololo isara moiso, ale enira la sopo meme masanga, la sopo tamlohi inu hajavua, la sopo űomtutuni na mania. <sup>9</sup> Ale la tauri űilangi na hinau luhu mata rasua na posposi sei tarea űomira la tataholo na nahon God. <sup>10</sup> Ale o vaihitera tiroma vara ko sopo hite te hinau na maurira, ale o pa majinga hinira vara la volitusi sohena deacon.

#### *Haűai Deacon*

<sup>11</sup> Haűai sohena, vara la deacon, o hitea vara tamlohi la lo sile na ololo isara moiso, la sopo sorasora tamlohi, la lo hase taurilatira, tarea la lo usuri na masalon God na hinau tari la lo vaira.†

<sup>12</sup> Deacon la lahi na haűai matelete, la lo kilau mamahuni na natura peresi na imara.‡ <sup>13</sup> Matan la haratu la lo volitusi űuhu sohena deacon la

pa lavi na hija űuhu nora, ale la pa lavi na űoműilangi na nora rasua hin Kűristo Iesu.

#### *Posposi Tataholo Na Vao Kalesia*

<sup>14</sup> La hinau sei na lo ulia isam, na lo űomtoho vara a pa vano isam vila, <sup>15</sup> pani vara te hinau mo tauriau, leta nike i pa tueniho vara o levosahi na posposi mo tataholo na vaon God. Vaona enia vao kalesia non God mauri, vao kalesia enia peri, ale enia lapiti retivararu. <sup>16</sup> Hina tavera matea kama taviti hinia, pulo noűa rasua enia hina luhu matea: Kűristo, mo pala mo mai tamlohi,

Tanume Tapu mo vujangia vara enia natu Kűristo,  
angelo la hitea,  
ale tamlohi la vereulia na mara jara tinatinapua tari,  
moiso tamlohi na varama la rasua,  
ale God mo lavia mo sahe aulu na hasohaso na tuka.'

## 4

#### *Vujangi Nona Tanume Sasati*

<sup>1</sup> Pani, Tanumen God mo vere mamahunia vara na pongi hitahu tamlohi hai la pa vahari na malele rasua matan la pa tapurongo isana tanume haluhalu peresi na vujangi non tanume sasati, <sup>2</sup> ale retihaluhalu sei la pa tai isana tamlohi tapnetano, űomira la sulimateira, ale la sopo mele levosahia vara sava mo tataholo, <sup>3</sup> ale enira la tapuhoro na lahi, moiso la horo na tatua hanhani sei God mo vaira matan vara la haratu la rasua la levosahi na retivararu la pa lavira na vere meje, <sup>4</sup> matan hinau tari God mo vaira la űuhu, ale mo sopo te hinau vara tamlohi la űohu hinia vara la lavia la vere meje matana moiso, <sup>5</sup> matan reti non God peresi na usi mo lo vai na hanhani la űuhu na nahon God.

#### *Paul Mo Retituetueni Timothy*

<sup>6</sup> Vara o vujangi la hinau sei isana vorai peresi na vevorai, o pa volitusi űuhu non Kűristo Iesu, matan ko hase

† **3:11:** haűai: hai la vereea vara haűai mo opoia vara i mai deacon, teni narou deacon. ‡ **3:12:** haűai matea: mo sopo tipahi na narouna hin te rani.

vahaniho na Retiruhu peresi na vujangi ruhu sei ko lo usuria. <sup>7</sup> Pani o toho asau na sorasora vono la rongorongo vono, ale o hase vujangiho na posposi sei God mo opoia, <sup>8</sup> matan řa levosahia vara, vara ko vai na epem mo řilangi, haratu mo ruhu makomona purongo, pani vara tarea o lo usuri na posposi God mo opoia, i pa ruhu jea na maurim tari, mo ruhu mata maurin nake peresi na mauri atu i pa mai hitahu. <sup>9</sup> Reti nike o eři rasua, ale mo tataholo vara tamlohi la pa usuri vevuhia. <sup>10</sup> Matan harihi, řa lo tau na řomiřa mo řilangi na vavahinau matana, řa řomtoho hin God sei mo mauri, enia Jujuri nona tamlohi tari, pani isan la haratu la rasua enia mo Jujuri varařuhu.\*

<sup>11</sup> O retileu, ale vujangi na hinau nike. <sup>12</sup> O sopo tinařihia vara tamlohi la hitesatihia matan ko uluvou purongo, pani tarea o vai na tovongi ruhu isana tamlohi rasua na nom retireti, na nom vavahinau, na nom opoia, na nom rasua peresi na nom posposi vokevoke. <sup>13</sup> Ale i pa tikeli na rani a mai isam, o lo tau na řomim vara tarea o lo evievi na Retitapu na naho tamlohi rasua, o lo vere mamahunira na malele řari mata mauri rasua, ale o lo vujangi na retivarařuhu. <sup>14</sup> O sopo řompurongo hin nom silesilea atu God mo silea isam na retimangovi atu hin rani atu la patu tamlohi rasua na vao kalesia la usiisi la tau na limara na patum.† <sup>15</sup> Tarea o lo hahau usuri la vujangi atu, o tau vevuhi na řomim hinira matan vara tamlohi la pa hitea vara ko lo ulua na mauri rasua. <sup>16</sup> O hase kilauho, o kilau mamahuni sava ko lo vujangia. O turu řilangi hin la hinau sei matan vara o vaia o pa eři juriho peresi la haratu la lo tapurongo isam.

## 5

### *Vavahinau Nona Patu Tamlohi Rasua*

\* **4:10:** reti sei: God enia Jujuri nona tamlohi tari mata enia hasena i pa eři juri na tamlohi, pani i pa sopo tamlohi tari la pa mauri matan la pa sopo rasua, pani isan la haratu la rasu God nora Jujuri, enira la pa mauri. † **4:14:** patu tamlohi rasua: la posia mo tinapua sohen harihi: patu tamlohi, elda teni bishop. O hite: 5.17, 19

<sup>1</sup> O sopo hapuhi na tamlohi taunina mo jeu na taunim, pani o usia i řilangi isana sohen ko lo vaia isan tamam, ale o retireti isan la haratu taunira mo sopo lo jeu na taunim sohen tasim. <sup>2</sup> Isana hařai taunira la jeu na taunim, o retireti isara sohen ko lo retireti i ruhu isan tinam, ale o retireti i ruhu isana hařai taunira la sopo jeu na taunim sohen vetasim, ale o sopo sile na masapa isam hasem mata o řomlumiha hinira.

### *Ha Lo Kilau Na Hařai Malepu*

<sup>3</sup> O sile na oloolo isana hařai malepu la haratu la hařai malepu varařuhu, harasei mo sopo te tinapua vara la pa lo kilaura. <sup>4</sup> Pani vara te hařai malepu te natura teni nona vajiaha mo lo toho, mo ruhu vara enira la vujangi na nora rasu na vavahinau mata la kilaua sohen hařai atu mo lo tapna kilaura tiroma, matan God mo avulahi hin posposi sei. <sup>5</sup> Hařai malepu varařuhu mo sohen harihi, mo lo toho hasena, ale enia matea mo tau na řomina isan God tarea, ale posina enia mata usiisi mata tuetueni na rani teni na vutepongi, <sup>6</sup> pani vara te hařai malepu mo lo řomřomia enia hasena, mo lo mauri, pani mo mate moiso. <sup>7</sup> O retileu hin la hinau nike isara matan i pa sopo te masapa vara tamlohi la pa pisuhira. <sup>8</sup> Pani vara tea mo sopo kilau na tahisana, ale aulu hin haratu, mo sopo kilau la haratu na lolo imana, mo vahaři na posposi rasua, posina sei mo sati mo jeu la haratu la sopo rasu God.

<sup>9</sup> O tau na hija hařai matea na pepa sei mo vere vara sava hařai malepu natu, vao kalesia i pa tuenira, hijan haratu purongo mo lahi vahatelete, ale taunina mo jeu mo ngavulu limarave. <sup>10</sup> Hařai atu tamlohi la lo vere tarea vara enia hařai matea mo lo vai na vavahinau ruhu, ale vara te natuna, mo kilau mamahunira la mai la tavera, ale tarea mo avulahi vara

i lo lavi na vinano la mai na imana, ale posina mo lo sile na oloolo isana tapuhi tinatinapua non God, mo avulahi vara i hoje na palora, ale mo tau na řomina vara i vai na vavahinau řuhu tari.\* <sup>11</sup> O sopo uli na hija hařai malepu la sopo vajiaha matan masalora mata lahi mo jeu na řomira vara la usuri Křisto, ale la pa rovo hinia matana. <sup>12</sup> Matana, talai i pa mai isara matan la tope na nora retitauhi isan Křisto vara la pa sopo mele lahi. <sup>13</sup> Mo sopo haratu purongo, pani la hařai maloko vari purongo, la lo hahau řalihi na jara la vavano na ima tinatinapua matan vara la aleale retireti. Enira la sopo vai na posposi mata maloko vari purongo, la lo sora-sora tamlohi, ale la lo tau na ngalsura hin te hinau mo sopo te nora hinau hinia, ale la lo vereea te hinau la sopo tataholo vara la verera. <sup>14</sup> Ale na lo vereea vara i pa mele řuhu jea vara hařai malepu la sopo vajiaha la mele lahi, la mele vasusu moiso, la kilau mamahuni na imara, ale la sopo sile na masapa isan nořa meresahi teni te masapa vara tea i retireřen hiniřa matara. <sup>15</sup> Matan hai la vano la posi moiso, la usuri Setan. <sup>16</sup> Pani vara te hařai rasua te hařai malepu la lo toho na vaona, i pa lo kilau mamahunira vara la sopo tau na tetehi isana vao kalesia atu, matan vao kalesia la pa lo kilau la haratu la hařai malepu varařuhu.

#### *Volin Patu Tamlohi Rasu*

<sup>17</sup> Na tavaluna, patu tamlohi rasua la řuhu mata tiroma na vao kalesia, mo tataholo vara ha volira i vaha rua, sohen la haratu la lo voko řilangi na nora retivujavujangi peresi na vujangi. <sup>18</sup> Matan, Retitapu mo vereea vara, 'Na rani buluk mo lo savahi na patu wit, ha sopo lasi na jingona vara i sopo eři hani te wit makomo atu'. *Deut 25.4* Ale mo mele vereea vara 'Mo tataholo vara tamlohi voko i lavi na volina'. *Lk 10.7* <sup>19</sup> Ale, o sopo tapurongo tiroma

isan tea vara mo tuvai na patu tamlohi rasua matea, pani vara tamlohi mo rua teni mo tolu, la levosahia mo řuhu vara tuvai atu mo tataholo, ale nake o eři tapurongo hinira. <sup>20</sup> Vara te patu tamlohi rasua hatea mo lo usuri na nona hehe, o hapuhia na naho tamlohi rasua tari matan vara enira mo isoiso la pa matahu matana. <sup>21</sup> Na nahon God peresi na nahon Křisto Iesu peresi na angelo God mo viřonira, na lo sile na retileu isam vara o taurilati la retileu tari sei na lo vereea isam vara o sopo opoi na tatuara purongo, ale o sopo vai te hinau na posposi tametame! <sup>22</sup> Ale o sopo vilavila vara o tau na limam hin te tamlohi matan vara o tahea vara i vai na vavahinau non Moli, o pa levosahi mamahuni na posina tako, vara i vono engko o pa hase komořo na nona hehe. O lo toho na mauri vokevoke. <sup>23</sup> Ale o sopo inu na wai purongo, pani o lo inu na waen makomona matan pangem peresi na nom rojoa sei la lo toho isam. <sup>24</sup> Hehe nona tamlohi hai la malue na jara tavera la tiromara na rani mata aria, pani te hehe nona tamlohi tinapua, la pa pala hitahu. <sup>25</sup> Mo sohen haratu isana vavahinau řuhu nona tamlohi, la memera purongo, pani vara la sopo pala tako, pani la pa pala hitahu.

## 6

#### *Vavahinau Nona Slev*

<sup>1</sup> Haratu la rasua, pani la lo slev, mo tataholo vara la sile na oloolo isana nora tamlohi tatavera tarea matan vara tea i sopo eři retisatihi na hijan God teni na vujangi řuhu. <sup>2</sup> Vara slev te nora tamlohi tatavera la vorai rasua, la pa sile na oloolo isara, matan enira la vorai rasua sohera, mo řuhu vara la vai na vavahinau řuhu isara, i jeu na tamlohi tatavera tinapua matan, enira la vorai rasua, ale God mo opoira.

#### *Reti Haluhalu Peresi Na Tavtav Varařuhu*

\* **5:10:** Leon Greek mo vereea sohen harihi: vara mo hoje na palo tamlohi viřoni. Mo vereea matan tuai la lo tau nora Sabbath na jingoima, ale posposi tataholo enia vara engko teni nom volitusi i pa hoje na palora.

Timothy o vujangi la hinau sei isana tamlohi, o vereā řilangi vara la pa ooloo hinira. <sup>3</sup> Vara tea mo lo vujangi te vujangi tinapua, ale mo sopo majinga na reti tataholo non nořa Moli Iesu Křisto, peresi na vujangi sei mo lo usuri na mauri God mo opoia, <sup>4</sup> tamlohi sohena, mo mangisi jea, mo sopo levosahi te hinau hatea. Mo opoia hajavua vara i lo sorasora hin te hinau tamlohi la sopo levosahia vara mo varařuhu teni mo vono, ale mo lo retireti na hinau matuvana mata vasi purongo. Posposi atu mo lo vaia mo vai na tamlohi la lo mereimerei, la patumasa, la retireřen, la řomřomi sati hinira, <sup>5</sup> ale tarea la vasvas peresi haratu řomira la lejileji, mo sopo te retivararahu hinira, ale la řomřomia vara posposi mata mauri rasua mo sile na masapa isara vara la tavgav, <sup>6</sup> varařuhu, posposi mata mauri rasua i pa vai na maurim i tavgav, pani isan la haratu purongo sei tarea la sopo řomusuri te hinau tinatinapua, <sup>7</sup> matan řa vora lekoleko na varama, ale vara řa mate, řa pa malue lekoleko. <sup>8</sup> Pani vara te hařa hanhani teni te nořa ruru, řa pa avulahi matara, <sup>9</sup> pani la haratu la opoia vara la tavgav, la pa jovi na hina vaihite, ale masalora mo lihora na hinau rongorongono vono peresi na hinau mata komora purongo, ale hinau sei mo putehi na tamlohi na komokomo tavera. <sup>10</sup> Matan, opoia mata mania enia pulo hinau mata hina sasati tari. Matan masalo sohena, mo reve nařihi na tamlohi hai na malele rasua moiso, ale la hase sarihira hin te rongosati matuvana.

#### *Isoiso Reti Non Paul Isan Timothy*

<sup>11</sup> Pani isam, tamlohi non God, o rovo hin la hinau sei. O tutungui na malele mata mauri tataholo, o tutungui na posposi atu God mo opoia, rasua, opoia, řomperavu peresi na řommalum. <sup>12</sup> O vai na valum řuhu mata rasua, o taurilati mauri tui atu God mo toviho hinia, peresi taviti řuhu atu ko vaia na naho tamlohi matuvana. <sup>13</sup> Na lo vereā na nahon God sei mo lo sile na mauri isana

hinau tari la mauri, peresi nahon Křisto Iesu sei mo vere na taviti řuhu mata retivararahu na nahon Pontius Pilate, ale na lo vereā vara <sup>14</sup> engko o pa taurilati retileu nike, o sopo malue nařihi hinia i tikeli rani atu Iesu Křisto nořa Moli i mele pala:

<sup>15</sup> na nona rani tataholo,  
 enia haratu mo avulahi mo tavera jea,  
 ale enia hasena mo aulu na hinau tari,  
 enia Supe nona supe,  
 enia Moli nona moli.  
<sup>16</sup> Enia hasena, mo lo toho jejeu,  
 mo lo toho hin memera tavera atu tamlohi la sopo eři mai mariviti hinia,  
 mo sopo lo tea i hitea,  
 teni tea i eři hitea.  
 Isana, řa pa sile na ooloo,  
 ale enia i pa lo tauri na suiha tui tui tarea. Amen.

#### *Haratu La Tavgav*

<sup>17</sup> Isan la haratu la tavgav nake na varama, o vereā isara vara la sopo tau na řomira i sahe aulu teni vara la řomtoho na nora tavgav, matan řa sopo levosahia vara la pa toho i tikeli pangisa. Pani o vereā isara vara la lo řomtoho hin God hasena, matan enia mo lo sile na hinau tari isařa matan vara řa avulahi hinira. <sup>18</sup> O vereā isara vara la lo vai na hinau la řuhu, o vereā isara vara la tavgav na nora vavahinau řuhu, la pa hansohai, ale na nora řomavulahi la tatamahu vara la asease na nora hinau. <sup>19</sup> Hin malele sei, la lo takonahi na tavgav tavera matara hasera, sohena pulo řuhu matea matan mauri atu mo lo mai, ale o vereā isara matan vara la eři taurilati mauri atu, enia mauri varařuhu.

#### *Isoiso Reti Non Paul*

<sup>20</sup> Timothy o matahi la hinau sei God mo lo silea isam moiso. O sopo usuri na sorasora vono teni te řomřomi sei la vereā vara enia 'hina lelevosahi' <sup>21</sup> matan tamlohi hai la lo turu hinia la lo vano malue na malele rasua moiso.

Noku ususi vara řomřuhu non God i pa toho isamim isoiso.

**Harua Leta  
Paul Mo Ulia Isan  
Timothy  
Leta Nike**

Harua leta nika isan Timothy, mo lo reti sohena vara enia taman Timothy, mo lo řomřomia na nona usi (1.2-3) matan mo opoia vara Timothy i mai tamlohi vuro řuhu matea non Křisto ale i tatamahu mata lavi na rani řilangi (2.1, 3).

Paul mo vereea mara tamlohi rasua hai la jovi na hehe, ale matana, Tiapolo mo lo taurilatira na nona vuna, ale mo retiřoařoahai Timothy vara i rovo na vaihite sei uluvou la lotia hinira (2.20-26; 3.1-9). Mo vereea vara i retivujavujangi na retisohai non God, hina purongo vara tamlohi la opoia teni mo vono (4.2). I pa lo kilau mata tamlohi vujangi haluhalu.

Paul mo levosahia vara i pa sopo tuai i pa mate, mo levosahia vara i pa lavi otori mata mauri sei God i pa silea mata nona turu řilangi (4.6-8), ale mo mele vereea vara Timothy i levosahi retivararuhu akerihi:

Harihi enia retivararuhu:  
Vara řa mate peresia,  
řa pa mauri peresia;  
vara řa turu řilangi,  
řa pa tauri na suiha peresia;  
vara řa vunvunia,  
i pa vunvuniřa,  
vara hina purongo vara řa sopo řomturu řilangi,  
enia mo lo řomturu řilangi,  
matan enia i sopo eři posi na řomina. (2.11-13)

**Hin Leta Nike**

1. Retioloolo (1.1-2)
2. Ha sopo mahanuhanu hin Moli (1.3-18)
3. Mauri tamlohi vuro řuhu (2.1-26)
4. Posi tamlohi na pongi hitahu (3.1-9)
5. Ha turu řilangi tarea (3.10-4.8)
6. Retituetueni peresi na isoiso retioloolo (4.9-22)

*Reti Tiroma*

<sup>1</sup> Enau Paul, vahařule non Křisto Iesu usuri na masalon God mo usuri na retitauhi mata mauri sei mo lo toho hin Křisto Iesu.

<sup>2</sup> Na lo uliuli isam Timothy natuku řuhuřuhu; God Tama peresi Křisto Iesu nořa Moli la sile na nora řomřuhu, řomopoia peresi na tamata isam tarea.

*Paul Mo Vere Meje Isan God*

<sup>3</sup> Timothy, na vere meje isan God matam. Enia God sei na lo volitusi isana sohen piku tuai la lo vaia, na vaia, ale řomiku mo sopo tuvaiau hin te hinau, ale tarea na lo řomřomiho na noku usi vara na rani teni na vutepongi. <sup>4</sup> Na opoia mo tavera vara a mele hiteho, matan na lo řomřomi rani atu ko lo tangisiau, ale a pa avulahi tavera hin rani atu vara řa mele tapatapaiřa. <sup>5</sup> Na levosahi na nom rasua varařuhu, mo lo usuri na rasua non nom pua Lois peresi non nom nana Eunice. <sup>6</sup> Matan haratu, na lo mele vereho hin pa silesilea atu God mo lo silea isam hin rani atu na tau na limaku hiniho\* na lo vereea vara o iriiria vara i lo pepe, <sup>7</sup> matan tanume atu God mo sileřa hinia mo sopo mata matahu, pani mata suiha, opoia peresi na posposi mata hase taurilatiho. <sup>8</sup> Ale matana, o sopo mahanuhanu na vereulia non nořa Moli, teni hiniau, matan na lo toho na ima řilangi, pani o pa tatamahu vara o lavi na rani řilangi mata Retiřuhu hin suiha atu God mo silea.

<sup>9</sup> Enia mo juriřa moiso, mo viřoniřa vara řa hahau na mauri tapu tarea. Mo sopo mata nořa vavahinau, pani mata masalona peresi na nona řomřuhu mo silea isařa hin Křisto Iesu tiroma moiso, varama mo pa tapulo, <sup>10</sup> pani nake masalon God atu, mo mera na maurin nořa Jujuri, Křisto Iesu, enia mo komo na suihan mateia, ale mo vuhesi mauri atu i pa sopo eři tihai hin te rani, sohena Retiřuhu mo vereea, <sup>11</sup> God mo viřoniau matan vara a mai tamlohi retivujavujangi matea, a vahařule,

\* **1:6:** hin rani atu na tau na limaku hiniho: Patu tamlohi mata vao kalesia, la tau na limara hin la haratu la pa lavi te vavahinau non Moli matea. Hite 1 Tim 4.14.

ale a tamlohi vujangi matan Retiřuhu atu.

<sup>12</sup> Matana, na lo lavi na rani řilangi nike na ima řilangi. Pani enau na sopo mahanuhanu matana, matan na levosahi haratu na lo rasua, ale na levosahi mamahunia vara enia i pa eři tau mamahuni na sava mo retitauhi vara a pa lavia, i tikeli rani tavera atu a pa lavia. <sup>13</sup> O usuri mamahuni tovongi řuhu atu mata noku vujangi sei ko lo rongora isaku, mo usuri na tovongi mata rasua peresi na opoia hin Křisto Iesu.

<sup>14</sup> Na suihan Tanume Tapu atu mo lo toho hiniřa, o matahi mamahuni retivarařuhu řuhuřuhu atu God mo silea isam.

<sup>15</sup> Timothy ko levosahia moiso vara tamlohi tari nike na province matan Asia la vahafi hiniau, ale Phygelus peresi Hermogenes enira tatuara.

<sup>16</sup> Na lo usi God vara i pa řomopoi na vao iman Onesiphorus, matan tarea mo lo vai na řomiku mo avulahi, ale matan mo sopo matahu vara i mai isaku na ima řilangi, <sup>17</sup> ale hin rani atu mo pala Rome mo lo aleau vavano mo pa tapaiau, <sup>18</sup> na lo usi Moli vara i řomopoi hin rani tavera atu. Ale ko levosahi mamahuni na nona vavahinau tari sei mo lo vaira matakua sei Ephesus.

## 2

### *Tamlohi Vuro Non Iesu Křisto*

<sup>1</sup> Natuku Timothy, řomřuhu sei mo lo toho isan Křisto Iesu, i pa tueniho na nona suiha, <sup>2</sup> ale sava vujangi ko rongoa isaku moiso na naho tamlohi matuvana, o mele silea isana tamlohi sei, la taurilati na nora retitauhi tarea, ale la eři vujangi mamahunia na tinapua hinia, <sup>3</sup> o tatamahu mata lavi na nom rani řilangi sohena tamlohi vuro řuhu matea non Křisto Iesu. <sup>4</sup> Mo sopo te tamlohi vuro i lo usuri na mauri tamlohi purongo matan nona řomřomi enia vara i vai haratu mo viřonia i avulahi. <sup>5</sup> Tamlohi roro matea i pa sopo eři lavi na otori mata roro vara mo sopo usuri na leu mata roro. <sup>6</sup> Mo tataholo vara tamlohi řilarilangi mata voko na isa i lavi na

vua asitauni tiroma. <sup>7</sup> O lo řomřomi na sava na lo vereia, matan Moli i pa sileho na lelevosahi matan la hinau tari atu.

<sup>8</sup> O tau na řomim hin Iesu Křisto, tahisan Supe David tuai, enia mo mele turu na mateia sohen na lo retivujavujangi hinia na noku Retiřuhu, <sup>9</sup> matan na lo retivujavujangi hin Retiřuhu sei, na lo lavi na rani řilangi, la pesiau na jen sohena tamlohi sasati matea. Pani tea i sopo eři taurilati na reti non God!

<sup>10</sup> Ale matana, na lo turu řilangi hin la hinau atu matan vara la haratu God mo viřonira la pa eři juri, ale la lavi mauri atu hin Křisto Iesu peresi na hasohasona tavera sei mo sopo te isoisona. <sup>11</sup> Harihi enia retivarařuhu:

Vara řa mate peresia,

řa pa mauri peresia;

<sup>12</sup> vara řa turu řilangi,

řa pa tauri na suiha peresia;

vara řa vunvunia,

i pa vunvuniřa;

<sup>13</sup> vara hina purongo vara řa sopo řomturu řilangi,

enia mo lo řomturu řilangi,

matan enia i sopo eři posi na řomina.

### *Tamlohi Ruhu Mata Voko*

<sup>14</sup> O mele verera hin la hinau nike, ale o retileu isara na nahon God vara la sopo vauriuri mata retireti, matan posposi sei mo sopo vai te hinau i řuhu, pani i pa komo na rasua non la haratu la lo tapurongo hinira. <sup>15</sup> O lo kilau mamahu vara o lo hahau tataholo na nahon God na posposi mo opoia, sohena tamlohi voko matea mo sopo te hinau vara i pa mahanuhanu matan enia mo vujangi mamahuni na retivarařuhu. <sup>16</sup> Pani o toho asau na retireti vono nona tamlohi varama purongo, matan enia i pa vai la haratu la lo usuria la mele sati jea na posposi varama, <sup>17</sup> ale nora retireti la pa varhasahi sohena řanga sola sohen Hymenaeus peresi Philetus, <sup>18</sup> enira la lo jalio na malele mata retivarařuhu la vujangia lara rani sauteterahi mo pete masese moiso,

retireti sohena mo komo na rasua nona tamlohi hai.

<sup>19</sup> Pani retivaraŕuhu non God mo sohena pulo vatu matea mo lo turu řilangi, ale uliuli hinia mo vereea vara, ‘Moli mo levosahi na nona tamlohi’ ale ‘la haratu la lo vereea lara enira la tamlohi non Moli, la pa vahaŕi na posposi sasati tari’. *Num 16.5*

<sup>20</sup> Na iman tamlohi tavera matea, o pa sopo hite na pesin la vaia na gold teni silver purongo, pani o pa hite te pesin la vaia na pahai teni lepa. Hai la tauhasehira mata hanhani tavera purongo, hai mata hanhani purongo.

<sup>21</sup> Matana, vara tea mo lo toho asau na posposi sasati, i pa sohena pesin la tauhasehia mata vavahinau řuhu purongo, la tapuhia mata vavahinau řuhu non tamlohi tavera matan ima atu, mo lo tatamahu mata vavahinau řuhu tari. <sup>22</sup> Ale matana, o rovo na masalo uluvou, ale o tutungui na posposi tataholo, rasua, opoia peresi na tamata peresi la haratu sei la lo tovi Moli la haratu mapura la vokevoke.

<sup>23</sup> O toho asau na řomřomi sei la rongorongono vono, ale sorasora vono, ko levosahia vara vuan hinau atu enia vasvas purongo. <sup>24</sup> Ale volitusi non Moli i pa sopo tamlohi vasvas, pani posina i pa řuhu na tamlohi tari, i pa eři vujangi, i pa řomperavu, <sup>25</sup> i pa vaitataholoi la haratu la turuposi hinia na řommalum. Korong God i pa silera na masapa teni i vono vara la eři vahaŕi na nora hehe, ale la levosahi na retivaraŕuhu, <sup>26</sup> ale vara řomira la mele mai, la eři rovo na vuna non Tiapolo, matan tiroma enia mo taurilatira matan vara la pa vai na masalona.

### 3

#### *Na Pongi Hitahu*

<sup>1</sup> Pani o lo levosahi harihi: na pongi hitahu, rani řilangi sasati la pa mai. <sup>2</sup> Matan tamlohi la pa hase opoira, la pa opoi na mania, la pa hase taura aulu, la pa hapahapa, la pa retiretileji, la pa sopo ooloo na tamara teni tinara, la pa sopo vere

meje matan te hinau, la pa sopo sile na ooloo isan te hinau mata ooloo, <sup>3</sup> mo sopo te řomopoia hinira, řomira la pa sopo jovi matan te hina řuhu tea mo vaia isara, la pa verelejileji na hija tamlohi tinapua, la pa usuri na masalora purongo, la pa řompurongo na mauri, la pa řohu na hina řuhu, <sup>4</sup> la pa tamlohi turuposi, la rongorongono vono, la řomvono, la řomaulu, la pa opoia vara la rongo i řuhu purongo, pani la pa řohu vara la opoi God, <sup>5</sup> o pa hitera la vaia sohena la lo usuri na posposi God mo opoia, pani la pa sopo levosahi na suiha matan mauri sei God mo lo silea. Ale o sopo tapala peresi na tamlohi sohen haratu, <sup>6</sup> matan vonara hai la lo unu na ima tamlohi vara la haluhalu na haŕai rongorongono vono sei hehe nona haŕai la puhonira, ale masalora sasati tinatinapua la lo revera, <sup>7</sup> tarea la haŕai atu la opoia vara la lavi na lelevosahi, pani la pa sopo eři tikeli na levosahi mata retivaraŕuhu. <sup>8</sup> Mo sohen Jannes enia Jambres sei la turuleji hin Moses tuai, ale la tamlohi nike sohena la turuposi na retivaraŕuhu, ale la lo vaikomokomo na řomira, ale na mauri rasua, God mo tipahira. *Exo 7.11* <sup>9</sup> Pani la pa sopo eři turu i tuai, matan tamlohi la pa hitevosahia vara nora rongorongono vono mo sohen la tamlohi tupra rua atu tuai.

<sup>10</sup> Pani engko, ko lo usuri na noku vujangi, posiku, řomiku mata mauri, noku rasua, noku řomperavu, noku opoia, posiku mata turu řilangi, <sup>11</sup> ale ko levosahia sohena sava tamlohi la pa tipahiau, ale rani řilangi sei tamlohi la lo silea isaku hin la jara sei Antioch, Iconium peresi Lystra, la rani tipahi atu la sati jea, pani noku Moli mo juriau hin la hinau tari atu! <sup>12</sup> Varaŕuhu, na lo vereea vara tamlohi la pa tipahi na tamlohi tari sei la opoia vara la usuri mauri atu God mo opoia hin Křisto Iesu. <sup>13</sup> Pani tamlohi sasati peresi na tamlohi halu la pa mai la mele sasati jea, la pa lo halu, ale tamlohi la pa halura.

<sup>14</sup> Pani engko o lo turu řilangi na



hināu tari ko lavira moiso, ale ko levosahia mo řuhu vara enira reti-  
varařuhu, matan ko levosahi hare  
mo vujangiho hinira,<sup>15</sup> ale mo tapulo  
na rani engko ko pa lo natirihi ko pa  
levosahi na Retiulia tapu, enira natu  
purongo la eři vaiho o lelevosahi  
mata juri na malele rasua hin Křisto  
Iesu. <sup>16</sup> God mo mangovi na Reti-  
tapu tari, enira la řuhu mata vu-  
jangi, mo řuhu mata i vaitataholoi na  
řomřomi mo sopo tataholo, mo řuhu  
mata i mele vaitataholoi na posposi  
tamlohi, ale mo řuhu mata vujangi  
na malele matan mauri atu mo tata-  
holo,<sup>17</sup> matan vara tamlohi non God  
i mai tamlohi eřiēři matea matan  
mo tatamahu moiso mata vavahinau  
řuhu tari.

#### 4

<sup>1</sup> Na nahon God peresi Křisto Iesu,  
enia haratu sei i pa ari la haratu la  
lo mauri peresi la haratu la mate hin  
rani tavera atu i pa pala, ale i pa Supe  
na varama, enāu na lo vere harihi  
isam,<sup>2</sup> o retivujavujangi na Reti non  
God; o tatamahu tarea vara o vaia,  
hina purongo vara tamlohi la opoia  
teni la řohu hinia, o pisuhi na hehe  
nona tamlohi, o vere mamahunia na  
posposi lejileji, o retituetueni, ale o  
řomřomi peravu hin la hināu sei.

<sup>3</sup> Matan rani mo lo mai vara tam-  
lohi la pa sopo tapurongo na vujangi  
řuhu, pani la pa takonahi la tija atu  
sei la lo vujangi la hināu sei mo  
lo usuri na masalora purongo. La  
pa usuri na vujangi purongo sei mo  
memeje na perora. <sup>4</sup> La pa pelati  
na perora la vahaři na retivarařuhu,  
ale la pa usuri na sorasora halu mata  
hināu matan tuai.

<sup>5</sup> Pani engko, tarea řomim i lo  
mera, o turu řilangi na rani řilangi,  
o vai na vavahinau nona evange-  
list, o vai vevuhi na nom vavahinau.  
<sup>6</sup> Matan nake mauriku la sureia mo  
sohena wai silesilea matea isan God,  
noku rani mate mo mai moiso. <sup>7</sup> Na  
pete vai na valum řuhu peresi na  
maromaro moiso, matan na turu

řilangi hin retivarařuhu atu na lo vu-  
janga mo tikeli nake. <sup>8</sup> Ale nake, God  
mo tau mamahuni na řongořongo  
nona supe matakū mata noku mauri  
tataholo. Moli sei enia haratu mo lo  
ari tataholo, i pa silea isaku hin rani  
tavaera atu, ale mo sopo isaku haseku,  
pani isan la haratu řomira mo tavera  
la lo kilau mata nona mele pala na  
varama.

#### *Retireti Mata Tueni Timothy*

<sup>9</sup> Timothy, o vaihitea vara o mai  
isaku vila. <sup>10</sup> Matan Demas mo opoi  
varama nike, ale mo rovo hiniau mo  
vano Thessalonica, ale Crescens mo  
vano Galatia, ale Titus mo vano Dal-  
matia. <sup>11</sup> Luke hasena mo lo toho  
peresiau.

Mo řuhu vara o lavi Mark i mai  
matan i pa eři tueniau tavera na  
vavahinau non Moli. <sup>12</sup> Na řule Ty-  
chicus mo vano Ephesus. <sup>13</sup> Vara ko  
mai, o lavi na noku ruru hamariri  
sei na taua na iman Carpus na vanua  
Troas. O lo řomřomia vara o pa lavi  
na puku atu, ale o sopo řomalihō na  
viriviri pepa.\* <sup>14</sup> Alexander tamlohi  
atu mo lo voko na aen kopa, enia mo  
vaisatihiau, pani Moli i pa volia i tata-  
holo na sava mo vaia. <sup>15</sup> O lo kilauho  
hasem matan Alexander, matan enia  
mo lo turuleji řilangi na nořa retiso-  
hai. <sup>16</sup> Tiroma na noku vaihite na na-  
hon Supe matan Rome, tea mo sopo  
turu peresiau, pani enira mo isoiso  
la rovo hiniau, i pa řuhu vara God i  
řomira matana. <sup>17</sup> Pani Moli mo lo  
turu na pahisaku, mo sileau na suiha  
matan vara a eři retivujavujangi ve-  
vuhi na nona retisohai isana tam-  
lohi řořoha, matan vara la eři ron-  
govosahia. Pani Moli mo juriau, vara  
i vono, la viliau moiso. <sup>18</sup> Moli i pa  
juriau na vavahinau sasati tari vara  
la pa sopo komoau, ale i pa laviau a  
unu hin mauri atu mo supe hinia na  
tuka. Isana, hasohaso tavera i vano  
mata rani tui tui, tarea. Amen.

#### *Isoiso Reti*

<sup>19</sup> O sile na noku retioloolo isan  
Priscilla enia Aquila peresi na vao

\* **4:13:** viriviri pepa: Hijan hināu sei tuai la lo uli na Retiulia non God hinia la vaia na huri nani, teni pepa.

iman Onesiphorus. <sup>20</sup> Erastus mo lo toho Corinth, Trophimus na taua mo rojo na taon Miletus. <sup>21</sup> O to vaihitea vara o mai tiroma moiso i pa taro hamariri. Eubulus, Pudens, Linus, Claudia peresi na vorai tari na rasua la sohai na nora retioloalo isam.

<sup>22</sup> Noku usiusi vara Moli i pa lo toho na maurim, nona romruhu i pa lo toho isamim.

**Titus**  
**Leta**  
**Paul Mo Ulia Isan**  
**Titus**  
**Puku Nike**

Paul mo lo vere na hijan Titus na nona leta mara mo lo usuria hin rani atu mo lo vavahinai Asia Minor peresi Greece (2Co 2.13; 7.6, 13; 8.6, 16, 23; 12.18; Gal 2.3). Paul mo vereea vara i pa viřoni na patu tamlohi nona kalesia atu na Uren Crete.

Pani Paul mo vere Titus vara te hinai la pa tataholo tiroma sohen harihi: hijara la pa řuhu (1.5-9) ale i pa tataholo vara la sopo hase vaira la lumiha na posposi sei la sopo tataholo nona tamlohi non God moiso (1.10-2.9).

Paul mo vereea vara mauri paro nike mo mai matan sava God mo vaia hin Iesu Křisto: God mo jurira, mo hojera na nona reti na suihan Tanume Tapu matan vara la pa tau na nora řomtoho na mauri tui:

‘Mo juriřa, pani mo sopo matan te posposi tataholo řa vaia, pani mata nona řomopoia, mo juriřa na malele vora paro, ale mo hoje nařihi na nořa hehe, mo vaiřa řa turu na mauri paro, la hinai sei mo vaira na suihan Tanume Tapu. God mo sile purongoi na Tanume Tapu isařa hin Iesu Křisto nořa Jujuri.’ (3.5-6)

**Hin leta nike**

1. Retioloolo peresi na usiisi matan Titus (1.1-4)
2. Retileu mata patu tamlohi kalesia (1.5-16)
3. Retileu mata tamlohi kalesia (2.1-3.11)
4. Retituetueni peresi na isoiso retioloolo (3.12-15)

*Retioloolo Isan Titus*

<sup>1</sup> Leta nike, enau Paul na ulia, enau volitusi matea non God, ale vahařule non Iesu Křisto, matan vara a tueni na rasua non la haratu God mo viřonira, vara la pa levosahi na

hina varařuhu mo lo tuenira vara la pa hahau na malele God mo avulahi hinia, <sup>2</sup> i usuri řomtoho atu mata mauri tui, haratu God mo sopo halu mo retitauhi hinia na pongi tiroma. <sup>3</sup> Na rani tataholo God mo taua moiso, mo vuhesi na nona reti na malele retivujavujangi, haratu God nořa Jujuri mo silea isaku usuri na nona retileu. <sup>4</sup> Leta nike, mo vano isam Titus, natuku tataholo na nořa rasua, řomřuhu peresi na tamata non God Tamařa peresi Křisto Iesu nořa Jujuri la mai isam.

*Vavahinai Non Titus*

<sup>5</sup> Hin rani atu na malue na ureuren Crete, na tauho matan vara o pa vai vevuhi tataholoi na sava na sopo isoiso hinia, ale vara o pa viřoni na patu tamlohi mata vao kalesia na taon tari atu, sohen na vereea isam. <sup>6</sup> Patu tamlohi matea mo sopo te hinai na maurina vara tea i eři pisuhia matana, narouna matea purongo, natuna la rasu Moli, ale la sopo lavi na hija sati mata lejileji teni matan la sopo ooloo. <sup>7</sup> Patu tamlohi atu mata kilau na vavahinai non God, i pa sopo tea i eři pisuhia hin te hinai na maurina, enia i pa sopo tamlohi matea mo lo řompurongo na tinapua, i pa sopo tamlohi lolokoru vila, i pa sopo tamlohi inu hajavua matea, i sopo tamlohi valvalum matea, moiso enia i pa sopo tamlohi haluhalu matea mata mania.\* <sup>8</sup> Pani i pa tamlohi matea imana mo roi isana tamlohi tari, mo opoia vara i tueni na hinai mo řuhu, řomřomi řuhu mo lo toho isana, nona aria mo tataholo, mo vokevoke, moiso řomina mo řilangi vara i taurilati na masalona. <sup>9</sup> Enia i pa tauri řilangi reti atu řa eři rasua sei haratu la vujangia moiso matan vara i eři tueni na tinapua na vujangi tataholo, ale i turuhoro la haratu la lo turuleji hinia.

*Ha Lo Kilau Mata Vujangi Haluhalu*

\* **1:7:** tamlohi mo kilau na tamlohi rasua: Greek mara bishop - patu tamlohi mata tamlohi rasua.

<sup>10</sup> Matan, tamlohi matuvana la řohu vara la ooloo na tamlohi la lo tauri na suiha, la lo verevere vono, ale la tamlohi halu, na lo vere la haratu na vao taiřalihi. <sup>11</sup> O sopo tinařihia vara la vujangi matan la lo komo na vao ima matan la lo vujangi na hinau mo sopo tataholo vara la vujangia, la lo vaia matan vara la pa lavi na mania. <sup>12</sup> Tuai, vonara matea nora přovet matea mara Crete, mo vereva vara,  
'Mara Crete  
la lo retihalu tarea,  
la tamlohi sasati,  
la maloko vari,  
la lo sohena poi.'

<sup>13</sup> Retivuhesi sei mo lo vereva mo varařuhu. Matan haratu, o hapuhira i řilangi matan vara nora rasua i mauri i řuhu, <sup>14</sup> ale la pa sopo mele tapurongo na sorasora vono nona Jew teni na retileu non la haratu la lo řohu na retivarařuhu. <sup>15</sup> Isana tamlohi řomira la vokevoke, hinau tari la řuhu, pani isana tamlohi řomira la hehe, ale la sopo rasua, hinau tari la vaia mo sopo řuhu. Tarea hehe mo tavuni na řomira, la sopo mele levosahia vara sava mo tataholo teni sava mo sati. <sup>16</sup> La lo vereva vara la levosahi God, pani nora vavahinau mo lo vujangia mo memera vara enira la sopo levosahia, la sasati, la sopo ooloo hin God, ale la sopo řuhu matan vara la vai te hinau i řuhu.

## 2

### *Vujangi Tataholo*

<sup>1</sup> Pani engko, o pa vujangi na sava hinau mo usuri na retivarařuhu purongo. <sup>2</sup> O vujangi na vajiaha vara la pa hase taurilatira, ale posira i tataholo matan vara la lavi na ooloo matana, na nora vavahinau tari, la pa vaira i usuri na posposi lelevosahi, ale nora rasua i řilangi varařuhu peresi na nora opoia, ale nora turu řilangi tarea. <sup>3</sup> Hařai jea sohena, o vujangira vara la vai na posira i tataholo matan vara la pa lavi na ooloo matana, la sopo sorasora tamlohi, moiso la sopo slev nona wai řilangi, pani la pa vujangi na sava hinau mo

řuhu, <sup>4</sup> moiso la pa tatamahu vara la vujangi na hařai lahi vara la pa opoi na tuara peresi na natura i řuhu, <sup>5</sup> vara nora vavahinau tari la pa vaira i usuri na posposi lelevosahi, ale řomina i řilangi hin tuana purongo, ale la pa hařai řuhu na posposi kilau mamahuni na lolo imara tarea, la řomřuhu, tarea la ooloo hin tuara, matan vara i pa sopo sile te masapa vara te tamlohi i veresatihi na reti non God matara. <sup>6</sup> Uluvou sohena o pa retituetueni isara vara la vai na posira i tataholo matan vara la lavi na ooloo matana, <sup>7</sup> na vavahinau tari la lo vaira, engko o pa vujangira na tovongi řuhu na nom vavahinau vara la eři usurira, ale na nom vujangi o sopo vaia mata masalom, pani mata masalon God na posposi tataholo, <sup>8</sup> ale nom reti i pa tataholo varařuhu matan vara i pa sopo sile na masapa vara nom meresahi la pa veresatiho matan vara la haratu la meresahi isam, la pa mahanuhanu matan mo sopo te hinau sasati vara la pa vereva matařa. <sup>9</sup> O vujangi na slev vara la ooloo hin nora moli na hinau tari, la pa vaihitea vara la vaira la avulahi tarea, la sopo talai vara nora moli, <sup>10</sup> ale la sopo vavanaho isara, pani la vujangia isana nora moli vara la eři rasura, matan posira i pa vai na tamlohi la opoia vara la tapurongo na retisohai non God nořa Jujuri.

<sup>11</sup> Matan God mo vujangi na nona řomřuhu mata juri isana tamlohi tari. <sup>12</sup> Mo vujangira vara řa isoiso na posposi hehe peresi na nořa masalo varama, ale nake na varama řa lo toho na mauri řa hase taurilatira, řa tataholo, ale řa usuri posposi atu God mo opoia, <sup>13</sup> enřa řa pa usuri la hinau atu nake řa lo řasaovi matan nořa řomtoho atu, rani atu nořa God sei nořa Jujuri Iesu Křisto i pa mele pala na hasohasona tavera hinia, <sup>14</sup> enia sei mo hasena silea matařa vara i volituhuřa na suiha vaivaileu tari, ale vara i onehiřa matan vara řa mai nona tamlohi, ale matan vara řa řomjea tarea mata řa vai na vavahinau řuhu. *Psa*

130.8; *Exo 19.5* <sup>15</sup> Enira natu, la hinau atu o pa vujangira. O retituetueni, ale o retitataholoira na nom suiha mata aulu. O sopo tinañihia vara tea i hitelehilehi na nom reti.

### 3

#### *Mauri Tataholo*

<sup>1</sup> O mele vere na tamlohi rasua vara la sile na oloolo isana tamlohi aulu peresi la haratu la lo tauri na suiha, ale vara la pa oloolo hinira, la tatamahu vara la vai na hina řuhu tarea. <sup>2</sup> O vujangira vara la sopo veresatihi na tinapua, la vahaři na vasvas, ale la řomřuhu, ale posira la vujangi na řommalum isana tamlohi tari, <sup>3</sup> matan tiroma moiso enřa sohera, řa rongorongo vono, řa lejileji, tamlohi la haluřa, řa slev na masalo varama peresi na hinau řa opoira jea, řa lo usuri na posposi vaisatihi na tinapua peresi na posposi mereimerei moiso tamlohi la řohu hiniřa, ale řa řohu hinira. <sup>4</sup> Pani na rani God nořa Jujuri mo vujangi na nona řomřuhu peresi nona opoia isařa, <sup>5</sup> mo juriřa, pani mo sopo matan te posposi tataholo řa vaia, pani mata nona řomopoia, mo juriřa na malele vora paro, ale mo hoje nařihi na nořa hehe, mo vaiřa řa turu na mauri paro, la hinau sei mo vaira na suihan Tanume Tapu. <sup>6</sup> God mo sile purongoi na Tanume Tapu isařa hin Iesu Křisto nořa Jujuri, <sup>7</sup> matan vara řa pa eři mai natuna, ale matan vara řa levosahi mamahunia vara řa pa mauri jejeu, matan nona řomřuhu mo vaiřa řa tataholo na nahona.

<sup>8</sup> Reti nike, ha eři rasua, ale na opoia vara o vere mamahuni la reti nike, matan vara la haratu la tau na nora rasua hin God la pa tatamahu vara la tau na řomira vara la vai na sava mo řuhu. La reti nike, la řuhu mata tuetueni isana tamlohi tari. <sup>9</sup> Pani o vahaři na sorasora vono peresi na sorasora mata mahapira, ale o vahaři na vasvas peresi na vauriuri mata Leu, matan la sopo eři tueni tea, ale enira la sopo řuhu hin te hinau. <sup>10</sup> Isana tamlohi mo patumasa, o pa retiřoařoahai vaha

rua, pani vara mo sopo tapurongo, o tipahia, <sup>11</sup> o pa eři levosahi mamahunia vara tamlohi sohena, enia mo vahaři na retivarařuhu, mo hehe, mo hase tau na talai isana.

#### *Isoiso Reti*

<sup>12</sup> Titus, vara a řule Artemas teni Tychicus isam, na opoia vara o vaihitea vara o mai isaku Nicopolis matan enau a pa toho atu na taro hamariri. <sup>13</sup> O tueni Zenas tamlohi lelevosahi mata leu atu peresi Apolos na malelera, o silera na sava la opoia mata malelera. <sup>14</sup> Mo řuhu vara nořa tamlohi la levosahia vara la tau řomira mata tueni na tinapua, isan la haratu la vejeveju, ale o vere isara vara la sopo toho purongo. <sup>15</sup> Tamlohi tari nike peresiau, la sohai na retioloolo isam. O sile retioloolo sei isan la haratu la opoi kamam na rasua. Romřuhu non God i toho isamim mo isoiso.

## Philemon Leta Paul Mo Ulia Isan Philemon Leta Nike

Philemon enia tamlohi tadvavu matea, nona slev la lo kilau na nona ima tavera, ale kalesia matuvana la lo matavuhi ea (1.2). Korong mo lo toho Colossae, matan leta Paul mo ulia isana mara Colossae mo vere na hijan nona slev sei Onesimus (Col 4.9, 17).

Paul mo lo uliuli na ima řilangi, mo uliuli matan Onesimus mo rovo na iman Philemon. Onesimus mo mai kalesia matea na rani mo tapai Paul, ale Paul mo uliuli isan Philemon vara i mele lavi Onesimus na imana sohena tapala matea hin Moli.

### Hin leta nike

1. Retioloolo isan Philemon (1-3)
2. Paul mo vere Philemon hin Onesimus (4-22)
3. Isoiso retioloolo peresi na nona usiusi (23-25)

### *Tapulo Reti Isan Philemon*

<sup>1</sup> Enau, Paul peresi voraiřa Timothy nike, kama uli leta nike isam Philemon. Nike Rome, na lo toho na lolo ima řilangi, mata noku vavahinau na lo vaia matan Křisto Iesu. Ale engko tapalamam, kama lo hiteho sohena voraimam matea na vavahinau non Moli. <sup>2</sup> Ale leta nike, mo vano isan vevoraiřa Apphia sohena, ale isan Archippus tamlohi vuro matea mata rasua sohemam hin Iesu, ale isana vao kalesia la lo matavuhi na imam. <sup>3</sup> Romřuhu peresi na tamata non God Tamařa peresi Moli Iesu Křisto i pa toho isamim.

### *Opoia Rasua Non Philemon*

<sup>4</sup> Tarea na noku usiusi na lo vere meje isan noku God matam, <sup>5</sup> mata na rongoa vara nom rasua hin Moli Iesu peresi na nom opoia isan la haratu la tapuhi non God, mo řilangi. <sup>6</sup> Enau na lo usiusi vara nom mauri rasua sei ko lo vujangia isana tamlohi rasua tinapua, i pa ulua, matan vara

o pa levosahi mamahuni na hina řuhu matuvana na mauriřa matan Křisto. <sup>7</sup> Voraiku, nom opoia mata tamlohi tinapua mo vaiiau na avulahi mo tavera jea, ale mo tahe na řomiku matan ko lo tueni na řom tapuhi non God la mele řilangi.

### *Paul Mo Usi Philemon Matan Onesimus*

<sup>8-9</sup> Ale matan ko opoi na tapuhi non God, enřa rua řa levosahia vara i pa tataholo vara a vereho vara o vai na hinau tataholo purongo, pani na posposi opoia, na lo usiho vara o vai na hinau matea. Enau Paul na vajiaha nake, ale na lo toho na ima řilangi matan Křisto Iesu, <sup>10</sup> ale na lo retireti matan nom slev sei Onesimus, enia mo mai natuku na rani sei mo lo rohiau nike na ima řilangi. <sup>11</sup> Tiroma mo sopo řuhu matan te hinau hatea isam, pani nake mo řuhu isařa, enřa rua. <sup>12</sup> Hina purongo vara na opoia mo tavera jea, na lo řulea vara i mele hilu mai isam. <sup>13</sup> Na pa lo opoia vara i lo toho peresiau matan vara i lavi na jaram nike, vara i tueniau na noku rani řilangi mata Retiřuhu na ima řilangi. <sup>14</sup> Pani na sopo opoia vara a vai te hinau ko sopo avulahi hinia, teni matan vara te hina řuhu o pa vaia, o pa vaia i usuri na masalom purongo, pani mo sopo matan na lo ngurunguru hinia. <sup>15</sup> Korong Onesimus mo rovo hiniho mata makomo rani purongo, matan vara i mele mai isam i pa toho jejeu, <sup>16</sup> pani nake, enia mo sopo slev purongo, pani mo jeu na slev, isaku enia vorai řuhuřuhu matea, ale varařuhu enia i pa sohena isam, i pa mele hilu isam sohena tamlohi tuetueni matea, ale vorai matea hin Moli. <sup>17</sup> Ale vara ko lo řomřomia vara enřa řa tapala, o mele lavi Onesimus i mai isam sohena ko laviau. <sup>18</sup> Vara Onesimus mo lejiho teni mo ave hin te hinau isam, enia i pa noku ave. <sup>19</sup> Enau Paul, na lo hase uliuli isam, na sopo halu, enau a pa voli na nona ave, ale a pa sopo mele vereva vara maurim enia noku, matan ko pa lavi na mauri paro mata Retiřuhu isaku.

<sup>20</sup> Ale voraiku, mo řuhu vara, o pa vai te hina řuhu hatea isaku matan Moli, o vaiau a avulahi, <sup>21</sup> na lo uliuli isam, na lo levosahia mo řuhu, vara o pa vai na sava na lo vereaa. <sup>22</sup> Moiso, mele hinau matea, o tatamahuni te jaraku hatea, matan na lo řomtoho vara a pa malue na ima řilangi nike, a pa mele mai isam matan ko lo usiusi matana.

*Isoiso Reti Non Paul Isan Philemon*

<sup>23</sup> Epaphras enia soheku mo lo toho na ima řilangi matan Křisto Iesu, enia mo sohai na retioloolo isam. <sup>24</sup> Ale, Mark, Aristarchus, Demas peresi Luke, la haratu la lo vavahinau peresiau sohena, la sohai na nora retioloolo isam, <sup>25</sup> Ale řomřuhu non Moli Iesu Křisto i pa toho na mapumim mo isoiso.

## Hebrews Leta Mo Vano Isana Tavtavuin Israel Leta Nike

Leta nike, enia mo vano isana tavtavuin Israel sei la tau nora rasua hin Iesu Kristo. Hija sei Hebrew enia hija atu Israel la hase tovira hasera hinia. Tatuara la lo romkaka vara la pa usuri Iesu teni vara la mele usuri na leu non Moses. Puku ak-erihhi mo vujangia vara Iesu mo jeu na hinau tari sohena angelo, Moses, pŕovet tari tuai, teni te pŕis aulu tuai, vao pŕis matan Israel. Ale enia mo maŕivisi na hinau tari na Retitauhi Tuai (Old Testament). Mo vereva vara enŕa ŕa pa sopo romkaka na mauri rasua matan, Iesu enia noŕa tovongi ŕuhu (Heb 12.2-3).

### Hin puku nike

1. Natun God mo aulu jea (1.1-4)
2. Iesu mo jeu na angelo (1.5-2.18)
3. Iesu mo jeu Moses (3.1-4.13)
4. Iesu enia Pŕis Aulu (4.14-7.28)
5. Retitauhi ŕuhu mo mai (8.1-9.22)
6. Mo mate vahatea mata rani tari (9.23-10.31)
7. Tovongi ŕuhu mata rasua (11.1-40)
8. Tovongi ŕuhu non Iesu (12.1-13.19)
9. Isoiso usiusi (13.20-25)

### *Iesu Kristo Enia Natun God*

<sup>1</sup> Tuai tiroma, God mo retireti vaha visa moiso, ale na malele matuvana isana noŕa pua na nona pŕovet, <sup>2</sup> pani hin la pongi hitahu nike, enia mo pete retireti moiso isaŕa hin Natuna tataholo, God mo viŕonia vara hinau tari enira koruna, ale hinia sei God mo vai na varama. <sup>3</sup> Natuna enia sasarami meran God, ale enia tovongina tataholo ŕa eŕi hitea, ale enia suiha sei mo vai na hinau tari la lo toho na nona reti suiha. Ale hin rani atu mo isoiso na nona vavahinau mata vaira ŕa vokevoke na hehe, mo sahe mo sakele na tavalu liman God mata suiha tavera jea aulu na tuka.

### *Kristo Enia Mo Jeu Na Angelo*

<sup>4</sup> Harihi mo vujangia vara Natun God enia mo aulu mo jeu na angelo, sohen hija atu sei God mo silea isana sei mo aulu jea na hijara. <sup>5</sup> Matan God mo sopo vereva isan te angelo na sava mo vereva isan Iesu sei mara: 'Engko natu, natuku.

Nahapani enau na mai Tamam.'

*Psa 2.7*

Ale God mo mele vereva mara,

'Enau a pa tamana,

ale enia i pa natuku.' *2 Sam 7.14*

<sup>6</sup> Ale hin rani atu mara mo lavi Natuna vora tiroma mo unu na varama mo vereva mara,

'Angelo tari la pa lotua!' *Deut 32.43*

<sup>7</sup> Ale mo retireti mata angelo mara, 'Mo vai na nona angelo la sohena langi,

ale enira la volitusi purongo sei mo vaira na pepe hapu.' *Psa 104.4*

<sup>8</sup> Pani isan natuna mo vere na reti matea mo aulu jea matana mara,

'God, nom jara sakele mata suiha, enia i pa toho tui tui tarea.

Nom suiha mata Supe Aulu

mo pala na hinau mo tataholo.

<sup>9</sup> Engko ko opoi na sava mo tataholo, ale ko ŕohu na sava mo sasati.

Matan haratu God, enau nom God na viŕoniho,

na surei na wel mata noku avu-lahi isam mo jeu na angelo.'

*Psa 45.6-7*

<sup>10</sup> Ale mo mele vereva mara,

'Moli, na tapulo vavahinau na varama,

engko ko tau na pulon varama nike,

ale tuka enira vua nom vavahinau.

<sup>11</sup> Hina purongo vara enira la pa ti-hai,

pani engko o pa toho jejeu.

Enira la pa ŕovo sohena ruru tuai.

<sup>12</sup> O pa virivirira sohena tavalu ruru tuai,

enira la pa posi,

pani engko o pa lo sohena tarea,

o pa sopo eŕi vajiaha.' *Psa 102.25-27*

<sup>13</sup> Ale God mo sopo retireti isana angelo sohen mo vereva isan Natuna mara,

'O sakele na jara suiha na matuaku vavano a vai na nom meresahi



la toho na ruhuruhu palom!' *Psa 110.1*

<sup>14</sup> Pani mo vereea mata angelo vara enira volitusi purongo sei mo lo řulera vara la lo matahi la haratu sei God i pa jurira.

## 2

*Retiřoařoahai Mata Vahaři Hin God*

<sup>1</sup> Matan haratu řa pa tapurongo mamahu na Retiřuhu sei řa pete rongoa moiso matan vara řa pa sopo sale nařihi hinia. <sup>2</sup> Retisohai matan leu atu God mo lo silea na lima angelo isan Moses mata tamlohi enia mo lo varařuhu tarea, ale mo vai na tamlohi la lavi talai atu mo tataholo mata nora tope na leu peresi na nora lejileji. <sup>3</sup> Ra pa sopo eři rovo na talai tavera vara řa lo řomřomi purongo na vavahinau God sei mo vaia mata i jurira hinia. Retisohai mata jurira sei Moli mo vereulia isana nona tamlohi usuri tiroma, moiso enira la pa vereulia isařa. <sup>4</sup> God mo tueni na nora retisohai sei na matamařa tatavera, peresi na hinau tamlohi la hutura hinira, peresi na hinau mařurahi tinatinapua peresi na otori sei Tanume Tapu mo asera usuri na masalona isana nona tamlohi.

*Iesu Mo Mai Tamlohi*

<sup>5</sup> Matan sava kama lo vereulia nakerihi matan varama paro sei i pa mai, i pa sopo toho na lima angelo.

<sup>6</sup> Matan hin te jara na Retitapu, tamlohi mateia mo vereea isan God mara:

'Tamlohi enia sava hinau  
vara o lo řomřomia,  
ale Natun Tamlohi  
vara o lo kilaua?'

<sup>7</sup> Matan ko vaia mo atano mo jeu na angelo

mata makomo rani,  
ale ko mele tahea aulu na haso-  
haso tavera  
mata lavi na oloolo tavera.

<sup>8</sup> Ko tau na hinau tari na limana.'

*Psa 8.4*

Ale reti sei mo vereea vara mo aulu 'na hinau tari' mo řaramia vara mo sopo te hinau hatea vara mo sopo toho na ruhuruhu limana, pani nakerihi

řa sopo lo hitera vara la lo toho na ruhuruhu limana enira mo isoiso.

<sup>9</sup> Pani řa lo hite Iesu sei God, 'mo vaia mo atano jea na angelo mata makomo rani'. Nake mo mele, 'tahea aulu na hasohaso tavera mata lavi na oloolo tavera' matan enia mo vano na mateia matařa, matan vara na řomřuhu non God enia i pa lavi na mateia mata tamlohi tari. <sup>10</sup> Matan mo tataholo vara God sei mo lo vai na hinau tari, ale hinau tari enira nona, mo tataholo mata i lavi na natuna matuvana la unu na hasohasona. Hin la rani řilangi atu Iesu mo lavira, God mo vaia mo tataholo mo řuhu mata tiroma na tamlohi, enia natu mo tataholo vara i jurira.

<sup>11</sup> Ale nakerihi Iesu peresi la haratu mo vaira la tapu, enira Tamara matelete. Matan hinau atu natu, Iesu mo sopo mahanuhanu vara i toviřa tasina teni vetasina, <sup>12</sup> ale mo vereea isan God mara:

'A pa vereulia vara hijam  
mo řuhuřuhu jea sohena sava  
isana tasiku peresi na vetasiku.'

*Psa 22.22*

Ale mo mele vereea mara,  
'A pa hasohasoho na livuha vao nom  
tamlohi.'

<sup>13</sup> Mo mele vereea mara,

'A pa rasu God!'

*Isa 8.17*

ale usuri haratu mara,

'Enau nahai peresi la natuvarihi  
atu sei God mo lo silera isaku.'

*Isa 8.18*

<sup>14</sup> Matan haratu, matan natuna la vora tamlohi, enia sohena mo mai tamlohi tataholo, matan vara na nona mateia i pa komo na suihan Tiapolo sei mo lo tauri na suiha mata mateia, <sup>15</sup> ale i teri la haratu sei tarea la lo slev isana nora matahu mata mateia.

<sup>16</sup> Ra levosahi mamahunia vara Iesu mo sopo mai vara i tueni na angelo, pani matan vara i tueni na mahapin Abraham. <sup>17</sup> Matan haratu, God mo vai Iesu mo mai soheřa tasina peresi na vetasina na malele tari, matan vara i eři mai nořa Přiř Aulu na řomopoia, ale mo turu řilangi vara i vai na vavahinau isan God mata i voli nařihi na hehe nona tamlohi. <sup>18</sup> Matan enia sohena mo

lavi na rani řilangi na vaihite sei la lo mai isana tamlohi tari, ale nake enia i eři tueniřa na nořa vaihite.

### 3

#### *Iesu Mo Aulu Mo Jeu Moses*

<sup>1</sup> Matan kamim ka vorai peresi na vevorai sei God mo tapuhiřa matan na tuka, ha to řomřomi Iesu, enia Vahařule, ale Přis Aulu sei řa lo tau na nořa rasua hinia. <sup>2</sup> Enia mo lo turu řilangi na hinau tari God mo viřonia matana, sohen Moses mo lo turu řilangi mata vao iman God. <sup>3</sup> Matan mo tataholo vara Iesu i lavi na haso-haso tavera i jeu Moses, sohena tamlohi voro ima matea i pa lavi na haso-haso tavera i jeu ima atu mo lo voroa. <sup>4</sup> Matan ima tari tamlohi matea mo vorora, pani God enia haratu sei mo voro na hinau tari.

<sup>5</sup> Moses mo turu řilangi na hinau tari God mo taua na limana vara i pa kilaura, pani enia volitusi matea purongo, ale sava mo lo vaira enira tovongi matea mata vujangi na hinau sei God i pa vuhesia hitahu. <sup>6</sup> Pani Křisto mo lo turu řilangi jea na hinau tari God mo taua na limana vara i pa vaira, matan enia Natuna tataholo sei mo aulu na iman God. Ale enřa řa vao iman God, vara varařuhu vara řa lo turu řilangi na řomřilangi peresi na nořa řomtoho hin Křisto.

#### *Mapu Tataholo Non God*

<sup>7</sup> Matan hinau atu natu, Tanume Tapu mo vereea matana mara:

‘Nohorihi vara ha rongo na leoku,  
<sup>8</sup> ha sopo vai na mapumim i řilangi isaku sohen Israel la lo vaia hin rani atu la turuleji hiniau, hin rani atu la lo vaihite na noku řomperavu na tano koru.

<sup>9</sup> Hin jara atu tamamim la vaivaiau la vaihiteau,

hina purongo vara la lo hite na noku hinau mařurahi tavera mata tauni mo ngavulu vati moiso (40).

<sup>10</sup> Ale matana na lolokoru hinira, ale na vereea nara:

Tarea mapura mo lo kaka, ale la sopo levosahi na masaloku.

<sup>11</sup> Ale na noku lolokoru tavera mata nora hehe, na vai na retitauhi matea nara: La pa sopo eři unu na noku mapu hin te rani.’ *Psa 95.7-11*

<sup>12</sup> Ale matana, la vorai peresi na vevorai řuhuřuhu, ha lo kilau mamahu vara te vonamim i sopo lavi te řomřomi sati mata vai na mapuna i sopo mele rasu God sei mo mauri. <sup>13</sup> Pani ha retituetueni kamim hatehateahi na rani hatehateahi tari sei řa lo tovira ‘nohorihi’, matan vara i pa sopo tea isamim i jovi na hehe, ale mapuna i mai i řilangi isan God. <sup>14</sup> Matan řa mai řa tapala peresi Křisto na nona vavahinau, vara varařuhu řa lo turu řilangi hin nořa rasua atu tiroma i tikeli na isoisona. <sup>15</sup> Pani ha sopo řomaliho hin retiřoařoahai nike hin te rani:

‘Ha tapurongo na sava mo lo vereea nakerihi!

Ha sopo vai na mapumim i řilangi isan God sohen Israel mo vaia hin rani atu la turuleji hinia na jara tano koru.’ *Psa 95.7-8*

<sup>16</sup> Ale la tamlohi atu sei la lo turuleji hin God enira hare, hina purongo vara la rongo na leona? Enjora, enira pa la tamlohi atu sei Moses mo tiroma hinira la malue Egypt. <sup>17</sup> Ale hare natu mo vai God mo lolokoru mata tauni mo ngavulu vati? Enjora, enira pa la tamlohi atu sei la lo hehe ale la mate na tano koru. <sup>18</sup> Ale God mo retitauhi isan hare natu vara la pa sopo eři unu na nona mapu hin te rani? Mo lo retireti isan la haratu la sopo oloolo hinia. <sup>19</sup> Ale matana, řa levosahia vara la sopo eři unu na nona mapu matan la sopo rasua.

### 4

#### *Mapu Nona Tamlohi Non God*

<sup>1</sup> Matan haratu, řa lo kilau mamahu i řuhu matan, vara i vono, ha pa sopo eři lavi na vua nona retitauhi mata nona mapu sei mo lo turu. <sup>2</sup> Matan la retivujavujangi na Retiřuhu isařa sohen la vaia isan Israel tiroma moiso. Pani retisořai atu sei la rongoa mo sopo tuenira

matan la sopo lavi na vuana peresi la haratu la rasu na sava la lo rongora.

<sup>3</sup> Matan enŕa purongo sei řa rasua řa lo toho na nona mapu. Pani isan la haratu la sopo rasua, God mo vereea mara,

‘Matan na noku lolokoru tavera na vere na retitauhi matea nara:

La pa sopo eři unu na noku mapu!’

*Psa 95.11*

Hina purongo vara nona mapu mo tatamahunia moiso mo tapulo hin rani atu mo pa vai na varama. <sup>4</sup> Ra levosahia vara mo tatamahu moiso matan Retitapu mo retireti na halimaravrua rani sohen harihi vara, ‘Ale God mo mapu na halimaravrua rani na nona vavahinau tari’. *Gen 2.2*

<sup>5</sup> Pani hin pa reti atu tiroma sei God mo lo vereea mara, ‘La pa sopo eři unu na noku mapu’.

*Psa 95.11*

<sup>6</sup> Matan haratu mapu non God atu enia mo lo turu vara tamlohi la unu hinia. Pani la haratu la lo rongora na Retiřuhu tiroma la sopo unu hinia matan la sopo oloolo. <sup>7</sup> Ale matana, God mo mele tau na rani tinapua matea mata unu na nona mapu, ale rani atu enia nakerihi. God mo mele vere rani mapu tinapua atu na sava David mo vereea hin rani atu hitahu hin reti atu na vereea isamim moiso sei nara:

‘Ha tapurongo nakerihi na sava mo lo vereea.

Ha sopo vai na mapumim i řilangi isan God.’ *Psa 95.7-8*

<sup>8</sup> Mapu paro nike la sopo lo lavia hin rani atu sei Joshua mo tiromara la lo toho Canaan, matan God mo pa vere nona mapu paro nike hitahu. <sup>9</sup> Ale matana, rani mapu tataholo matea mata tamlohi non God mo lo turu. <sup>10</sup> Matan tamlohi tari sei la unu hin Sabbath nike sei rani mapu non God atu, la pa mapu na nora vavahinau sohen God mo vaia na nona vavahinau. <sup>11</sup> Ale matana, řa vaihitea vara řa unu hin mapu atu. Matan vara tea i usuri na tovongi mata lejileji atu nona tadvavin Israel tuai, i pa jovi sohera.

<sup>12</sup> Matan reti non God mo lo mauri, ale enia mo suiha. Enia mo voro mo

jeu te sita vuro tavalu rua, mo unu na lolořa mo ase na řomiřa na masalořa, mo ariřa ale mo vujangiřa vara enřa řa sava tamlohi. <sup>13</sup> Mo sopo te hina mauri hatea i eři luhu hin God. Enia mo lo hite na hinau tari. Ale enřa mo isoiso řa pa turu na nahona, ale řa pa vereuli na sava řa lo vaira isana.

*Křisto Enia Nořa Přis Aulu*

<sup>14</sup> Matana, řa lo taurilati na nořa rasua hin nořa přis aulu sei Iesu, Natun God sei mo sahe na tuka moiso. <sup>15</sup> Matan nořa přis aulu nike mo levosahi na nořa vejuveju, ale na varama enia mo lavi na vaihite tari sei řa lo lavira, pani mo sopo hehe. <sup>16</sup> Matan haratu, řa řomřilangi mata mai na naho jara sakele non nořa God řuhuřuhu jea. Atu řa pa lavi na nona řomopoia, ale i pa tueniřa usuri na nona řomřuhu mata nořa vejuveju na mauriřa.

## 5

<sup>1</sup> Matan přis aulu tari la viřonira na vao tamlohi matan vara la pa turu na nahon God mata tamlohi, enia i pa lo sile na nora silesile isan God, peresi na malamalai mata hehe.

<sup>2</sup> Enia i eři řomopoia la haratu la sopo lelevosahi teni la jalio na retivararřuhu, matan enia sohena mo sohera. <sup>3</sup> Ale matan haratu, enia i pa sile na silesile mata hehe nona tamlohi peresi na nona hehe. <sup>4</sup> Ale

tea i sopo eři mai přis aulu matea usuri na masalona hasena, pani vara God mo tovia purongo sohen mo tovi Aaron tuai. <sup>5</sup> Ale Křisto sohena, mo sopo hase tahea aulu vara i mai Přis Aulu, pani God natu mo tahea aulu, sohen reti nike sei mo lo vereea isana mara,

‘Engko natuku,

nahapani na mai Tamam.’ *Psa*

*2.7*

<sup>6</sup> Ale na jara tinapua matea na Retiřuha God mo mele vereea isana mara, ‘Engko přis matea usuri na pin

Melchizedek sei i pa toho jejeu.’

*Psa 110.4*

<sup>7</sup> Hin rani atu Křisto mo pa lo toho na varama, mo lo sohai na usiusi peresi na nona tangi na řomina

peresi na tangi tavera, ale wai matana la lo jovi, ale nona usiusi mo sahe isan haratu sei i eři juria na mateia. Ale God mo lo rongoa matan Křisto mo tau na řomina mata lotua na ooloo. <sup>8</sup> Hina purongo vara enia natun God, enia mo pa levosahi na ooloo na malele rani řilangi. <sup>9</sup> Ale hin malele sei God mo vaitataholoia mo mai Přis Aulu matea, ale mo mai pulon juri atu mata rani tui tui isana nona tamlohi tari sei la lo ooloo hinia. <sup>10</sup> Ale God mo taua vara i Přis Aulu usuri na pin Melchizedek.

### *Ha Ulua Na Mauri Rasua*

<sup>11</sup> Hinau mo mařivi mo pa lo toho sei kama opoia vara kama mele vereulira, pani kama hitea vara peromim la sopo rongo, ale mo řilangi vara kama eři vai kamim ha lelevosahi. <sup>12</sup> Kamim ka kalesia mo tuai moiso, ale i pa tataholo vara kamim ha lo vujangi na tinapua moiso, pani kama hitea vara kama lo mele vujangi kamim sohen la haratu la pa tapulo purongo na levosahi mata Retitapu. Ka mele sivo leji ka opoi na wai susu, mo sopo hanhani řilangi. <sup>13</sup> Matan tamlohi tari sei la lo mauri na wai susu, la sopo lo levosahi na vujangi mata posposi tataholo matan enira la pa lo pipi. <sup>14</sup> Pani hanhani řilangi enia hani la haratu la jea sei la lo hasera vujangira vara la eři hitevosahi na sava mo tataholo ale sava mo sasati.

## 6

<sup>1</sup> Matana haratu, řa ulua i jeu vujangi atu řa lavia na nořa mai paroparo na tapulo mauri rasua, ale řa vano řa jea, mo sopo matan vara řa pa mele vano na vujangi mata posi na vaivai vono, teni mata tau na rasua hin God, <sup>2</sup> teni na vujangi mata pap-tijo, teni tau na limařa mata usiusi na tamlohi, teni mata sauteterahi nona mate, ale mata aria tavera non God. <sup>3</sup> Ale vara na masalon God, řa pa mele ulua řa vano na lelevosahi mata hinau tinatinapua.

<sup>4</sup> Matan mo sopo mele te malele tinapua hatea vara tea i eři mele posi

na nona hehe hinia, la haratu sei tiroma moiso la lavi na levosahi hin God, teni la hatiřoro na otori řuhu sei God mo lo silera, teni la tapala peresi na Tanume Tapu moiso, <sup>5</sup> ale la hatiřoro moiso na reti řuhu non God peresi na hinau mařurahi matan pongi atu mo lo mai, <sup>6</sup> ale na isoisona la vahari hin God. Mo sopo te malele hatea isara vara la eři mele posi na nora hehe, matan la lo mele vosae Natun God na talopeilopei na nora tipahia, ale la lo vaia na naho tamlohi.

<sup>7</sup> Ha lo levosahi harihi: vara lepa sei mo lo himi na wai usa mo lo jovi hinia, mo sile na vuana řuhu isan tamlohi isa matea, lepa atu mo lavi na leřuhu isan God. <sup>8</sup> Pani vara lepa atu mo vua na pahai ngařngariha teni piko, mo sopo řuhu matan te hinau, ale tamlohi isa atu i pa řohu hin isa atu ale i pa sulia.

<sup>9</sup> Pani isamim la tapala řuhuřuhu, hina purongo vara řa lo retireti sohen harihi, kama sopo rasua vara reti sei mo lo pisuhi kamim sohen lepa sati atu. Kama levosahia vara kamim ka lo toho mata hina řuhuřuhu sei la lo mai peresi na nomim juri. <sup>10</sup> Matan God mo sopo tametame tea. I pa sopo řomaliho sohena sava ka lo voko řilangi nona, ale sohena sava ka lo vujangi na nomim opoia isana na nomim kilau řuhu na kalesia tinapua, sohen ka pa lo vaia nake. <sup>11</sup> Kama opoia mo tavera vara ha lo opoi na tinapua i tikeli na isoiso maurimim, matan vara sava ka lo řomtoho hinia i pa masese nomim. <sup>12</sup> Ale kama sopo opoia vara řomimim la mate, pani ha pa usuri na tovongi non la haratu sei la pa lavi na retitauhi non God mata nora rasua peresi na nora řomperavu.

### *Romtoho Mo Tai Na Retitauhi Non God*

<sup>13</sup> Sohen rani atu God mo retitauhi isan Abraham, God mo retitauhi na hijana purongo matan mo sopo te hija tinapua vara i mele aulu jea hinia mara:

14 ‘Varaŕuhu a pa leŕuhu hiniho i tavera jea, ale a pa vai na mahapim la maŕivi savulevule.’

*Gen 22.17*

15 Ale Abraham mo lo sasaovi peresi na ŕomperavu, ale mo lavi na sava God mo retitauhi hinia.

16 Vara tamlohi la vai na retitauhi matea, la pa vereaa na hijan tea sei mo mele aulu jea hinira, hija atu mo lihora vano hin retitauhi atu mo sopo te retusia hinia vara i pa turu teni i vono. 17 God sohena, mo lihoa na retitauhi matea matan vara la haratu sei la lavi retitauhi atu la pa levosahi mamahunia vara i pa sopo eŕi posi na ŕomina. 18 Ale God mo sileŕa na nona retitauhi ale mo tau na hijana hinia. La hinia atu mo rua la sopo eŕi posi matan God enia i sopo eŕi halu. Matan haratu, enŕa sei ŕa rovo vano isana mata luhu, ŕa eŕi mele lavi na ŕomŕilangi paro, matan ŕa eŕi taurilati na nona retitauhi mata noŕa rasua hinia.

19 Noŕa rasua hin retitauhi nike mo sohena matalalavo matea sei mo puhoni ale ŕa eŕi rasua mata mauriŕa. Rasua nike natu mo vaiŕa ŕa eŕi unu hin jara tapu sei non God na tuka. 20 Iesu mo pete unu atu tiroma moiso mataŕa. Enia mo mai noŕa Pŕis Aulu matan tui tui usuri na pin Melchizedek.

## 7

### *Melchizedek Peresi Abraham*

1 Melchizedek nike enia supe mata taon tavera matan Salem, ale enia Pŕis Aulu non God sei mo aulu jea. Hin rani atu Abraham mo lo mele mule na vuro tavera matea mo vaia peresi na supe matuvana, ale matan mo jeua, Melchizedek mo malue mo vano vara i tapaia ale mo leŕuhu hinia. 2 Ale Abraham mo sile na sangavulu hinia tari sei mo lavira na vuro isan Melchizedek. Rarami hijana enia ‘Supe Mata Ari Tataholo’. Ale enia sohena mo supe mata tamata matan ŕaramin Salem enia ‘tamata’. 3 Tea mo sopo levosahi tamana teni tinana teni te tahisana,

mo sopo te tapulo teni isoiso maurina. Enia mo lo toho jejeu sohena pŕis matea, mo sohen Natun God.

### *Melchizedek Mo Aulu Hin Abraham*

4 Ha to ŕomŕomia vara Melchizedek mo aulu sohena sava, matan Abraham hina purongo vara enia mo pulo vaon Israel, mo hitevosahia sohena sava Melchizedek mo mele aulu hinia, ale Abraham mo silea na sangavulu hinahinau sei mo lavira na vuro isan Melchizedek. 5 Ale pŕis matan Israel la tai na vaon Levi, Leu non Moses mo retileu vara la pa lavi na sangavulu hinia isana tahisara, hina purongo vara la mahapin Abraham sohera. 6 Pani Melchizedek, hina purongo mo sopo tahisan Levi, mo lavi na sangavulu hinahinau isan Abraham. Ale Melchizedek mo tau na leŕuhu matea isan Abraham, Abraham mo pete lavi na retitauhi isan God moiso. 7 Ale mo sopo te retusia hatea vara hare mo mele aulu: haratu mo lo sile na leŕuhu enia mo aulu mo jeu haratu mo lo lavi na leŕuhu.

8 Ra levosahia vara tamlohi la lo sile na sangavulu hinahinau isana pŕis nona tavitavin Israel sei la tamlohi purongo ale la pa mate hin te pongi. Pani Melchizedek mo mele aulu mo jeura matan ŕa rasua vara mo pa lo mauri. 9 Ale aulu hin haratu ŕa eŕi vereaa vara mahapin Levi, la haratu sei la lo lavi na sangavulu hinahinau, la lo sile na sangavulu nora hinahinau isan Melchizedek hin nora pua Abraham. 10 Hina purongo vara Levi mo sopo lo vora hin rani atu, enia mo lo toho na epen Abraham moiso hin rani atu sei Melchizedek mo lo lavi na sangavulu hinahinau isan Abraham.

### *Kŕisto Mo Sohen Melchizedek Tuai*

11 Ale vara pŕis na vaon Levi la eŕi vai vevuhi na masalon God, ale enira la pŕis usuri na leu, mata sava natu God mo mele sohai na pŕis tinapua matea mo sohen Melchizedek, ale mo sopo lavia isana mahapin Levi sohen Aaron sei tasin Moses?

<sup>12</sup> Ale vara la haratu la lo tauri na vavahinau nona p̄ris la sopo mele tauria matan God mo mele vīroni na tinapua, leu sohena i pa posi matan vara i majinga hinia. <sup>13</sup> Matan haratu sei řa lo retireti hinia, enia mo malue na tavgavui tinapua matea, mo sopo isan Levi sei la lo volitusi na votavota na lolo Temple.

### *Křisto Enia P̄ris Aulu*

<sup>14</sup> Ale mo memera vara nořa Moli Iesu enia tavgavuĩn Judah matea, pani řa levosahia vara Moses mo sopo vereã vara te tavgavuĩn Judah matea i eři mai p̄ris matea.

<sup>15</sup> Ale nakerihi mo memera vara Křisto enia natu p̄ris tinapua atu i pa pala mo sohen Melchizedek.

<sup>16</sup> Mo mai p̄ris matea mo sopo tai na tavgavuĩn Levi usuri na Leu, pani mo usuri na suihan mauri atu non God sei i pa sopo eři mate hin te rani.

<sup>17</sup> Ale David sei mo lo uli na psalm mo pisuhia hin rani atu God mo lo retireti hin Křisto mara, 'Engko o pa p̄ris matea tui tui,

sohen Melchizedek.' *Psa 110.4*

<sup>18</sup> Enjora, leu atu matan tuai mata p̄ris, God mo tau pahipahia matan i sopo eři mele vai te hinãu matan mo sopo mele řuhu matan te hinãu hatelete. <sup>19</sup> Matan leu mo sopo eři vai tea i mai i tataholo na nahon God, ale nake řomtoho matea mo mele řuhu jea mo pete lavi na jarana moiso, matan hin Křisto řa eři mai mariviti isan God.

<sup>20</sup> God mo retitauhi na hijana hasena vara Křisto i pa p̄ris jejeu, pani mo sopo vereã isan te p̄ris tinapua. <sup>21</sup> Pani isan Iesu hasena purongo God mo vereã mara,

'Moli God mo vai na retitauhi matea na hijana hasena,

ale i pa sopo eři tope na nona retitauhi nike:

Engko o pa p̄ris matea matan tui tui.'

*Psa 110.4*

<sup>22</sup> Matan God mo vai retitauhi atu na hijana hasena, ale matan Iesu mo lo toho hinia, retitauhi řuhu nike mo mele řuhu mo jeu retitauhi tuai atu mata Leu, matan i pa vai na sava God mo taua matana.

<sup>23</sup> Ale mele hinãu tinapua matea hin hinãu nike, enia vara tuai p̄ris mo mařivi, ale vara matea mo mate nona vavahinau mo hilu atu, ale tinapua i pa mele lavi na jarana. <sup>24</sup> Pani Iesu i pa lo toho sohena p̄ris jejeu; matan nona vavahinau mata p̄ris i pa sopo isoiso hin te rani. <sup>25</sup> Matan haratu enia i eři juri na tamlohi tari sei la lo mai isan God mo vaia vahatelete purongo matan tui tui. Enia mo lo mauri jejeu matan vara i pa lo turu na nahon God mata i usiusi matara.

<sup>26</sup> Iesu enia P̄ris Aulu tataholo sei řa opoia matan enia mo tapu ale tea i sopo eři tuvaia hin te hinãu, mo sopo te hehe isana. Nake God mo tauhasehia isana tamlohi hehe, ale mo silea na jara aulu mata oloolo mo jeu na tinapua na tuka. <sup>27</sup> Ale enia i pa sopo sile na malamalai na rani hatehateahi sohena p̄ris aulu tinapua la lo vaia. Enira la vaia mata nora hehe tiroma moiso la pa vaia mata hehe nona tamlohi tinapua. Pani Iesu mo vaia vahatelete purongo matan tui tui hin rani sei mo hasena silea sohena malamalai na talopeilopei.

<sup>28</sup> La haratu la lo p̄ris aulu na ruhuruhu leu non Moses, la sopo eři vai na tatua hinãu tinapua, matan enira la tamlohi purongo. Pani hitahu hin rani atu haratu sei God mo sile na leu, God mo vīroni Natuna na retitauhi na hijana hasena, ale God mo vai natuna mo tataholo tui tui.

## 8

### *Křisto Enia Nořa P̄ris Aulu*

<sup>1</sup> Ale řomřomi tavera kama lo vereã enia nahai:

Nořa P̄ris Aulu mo sakele na jara aulu mata oloolo mo jeu na tinapua na tuka na tavalu liman God.

<sup>2</sup> Hin jara atu nořa P̄ris Aulu Iesu mo lo vavahinau na lolo jara tapu sei Tabernacle varařuhu na tuka God sei mo voroa, mo sopo tamlohi.

<sup>3</sup> Ale matan p̄ris aulu tari la lo sile na silesilea peresi na malamalai isan God, matan haratu mo tataholo vara nořa P̄ris Aulu sohera i pa sile te hinãu sohera. <sup>4</sup> Vara enia i pa lo toho hin varama nike, i pa sopo

pŕis matea, matan pŕis la pete toho moiso mata sile na silesilea sei leu non Moses mo vereaa. <sup>5</sup> La lo volitusi na tent sei la tovia Tabernacle nike na varama, ale enia tovingin haratu na tuka purongo, hina varaŕuhu mo lo toho na tuka. Matan hin rani atu Moses mo tatamahu vara i voro Tabernacle atu, God mo sile retiŕoaŕoahai nike isan Moses mara, 'O lo kilau mamahunia vara ko lo voroa, o voroa usuri tovingi atu na vujangia isam nike na vutivuti'.

*Exo 25.40; 26.30*

<sup>6</sup> Pani noŕa Pŕis Aulu mo lavi na vavahinau matea mo aulu mo jeu la haratu la lo volitusi usuri na leu tuai. Ale matan enia natu mo lo toho hinia, retitauhi sei God mo silea mo mele ŕuhu jea matan mo turu na retitauhi ŕuhu mo jeu la haratu mo lo silera tiroma.

<sup>7</sup> Ra levosahia vara retitauhi atu tiroma usuri na leu mo sopo ŕuhu, matan God mo mele vai na harua retitauhi tinapua matea vara i lavi na jarana. <sup>8</sup> God hasena mo hitea vara tiroma retitauhi atu mo sopo ŕuhu hin haratu mo vereaa akerihi mara: 'Rani matea i pa mai, Moli God mo lo vereaa vaa:

A pa vai na retitauhi paro matea peresi na tavitavin Israel peresi la haratu Judah.

<sup>9</sup> Retitauhi paro nike i pa sopo sohen haratu na vaia tiroma peresi na nomim pua

hin rani atu na lo tauri na limara ale na tiroma hinira la malue Egypt.

La sopo usuri tataholoi na noku retitauhi ale na vahaŕi hinira, Moli God mo vereaa.

<sup>10</sup> Pani matan harihi natu, a pa vai na retitauhi paro sei

peresi na tavitavin Israel hin rani atu mo lo mai,

enau Moli God na vereaa nara:

A pa tau na noku leu na ŕomira, matan vara la eŕi rongovosahira, ale a pa ulira na mapura, matan vara la eŕi ololo hinira.

Enau a pa nora God, ale la pa noku tamlohi.

<sup>11</sup> Ale la pa sopo mele vujangi na tavitavira tinapua

teni na voraira hatehateahi lara, "Ha levosahi Moli God!"

Matan tamlohi tari, mo tapulo na tamlohi purongo

mo tikeli na tamlohi aulu, enira mo isoiso la pa levosahiau.

<sup>12</sup> Ale a pa ŕomi na nora hehe, ale a pa sopo mele ŕomŕomi na nora hehe.' *Jer 31.31-34*

<sup>13</sup> Ale hin rani atu God mo retireti hin retitauhi paro nike, mo ŕaramia vara retitauhi tuai atu mo vaia tiroma mo pete isoiso moiso. Enia mo pete vajiaha moiso ale mariviti i tihai.

## 9

### *Posposi Lotu Tuai Nona Jew*

<sup>1</sup> Ale hin retitauhi atu tiroma God mo vaia peresi Israel, mo tau na retileu mata lotu peresi na nona tent tapu mata lotu matea na varama.

<sup>2</sup> Vara la turuhi tent atu, la pa viliroto na jara mo rua na lolon tent atu. Na tiroma jara, peri lamu matea, ale tep matea sei la lo tau na pereti tapu hinia. Tiroma jara nike la tovia Jara Tapu. <sup>3</sup> Ale tavalu ruru matea mo kehohoro na harua jara sei la tovia Jara Tapu Jea. <sup>4</sup> Hin jara atu, la tau na votavota mata suli na hasori matea la vaia na gold, peresi na puhoro matea la evea na gold la tovia 'Puhoro Mata Retitauhi'.

Ale na lolon puhoro atu, potele matea la vaia na gold, manna mo lo toho na lolona, tihonin Aaron sei mo lo juliha, peresi la vatu atu Moses mo lo uli la retileu atu mo sangavulu hinira.

<sup>5</sup> La vai na tovingi angelo mo rua na gold la tovira cherubim na pusan puhoro atu. La ŕirahi na hapara vara la tavuni na pusan puhoro atu, jara tataholo atu natu pŕis aulu mo lo turusi na ŕae mata malamalai hinia. Pani nakerihi kama sopo eŕi vereuli vevuhi la hinau nike.

<sup>6</sup> Vara la tau mamahuni la hinau atu mata lotu moiso, pŕis la eŕi tapulo unu ale la lo malue mata vai na nora vavahinau hin Jara Tapu atu. <sup>7</sup> Pani pŕis aulu hasena i eŕi unu hin jara atu mo tapu jea, ale vahatelete purongo

na tauni matea, ale tarea peresi na ŋae sei mo lo silea isan God matan vara i tavuni na nona hehe peresi na hehe nona tamlohi tinapua sei la lo vaira pani la sopo levosahira. <sup>8</sup> Tanume Tapu mo vaia mo memera isaŋa nake vara malele atu sei God mo lo tinaŋihia vara tamlohi purongo la eŋi mai mariviti isana hin jara atu sei mo tapu jea mo sopo lo pala hin rani atu tent atu mo lo turu.

<sup>9</sup> Hinau nike enia tovongi matea mo lo pisuhi rani nike nahapani. Matan la otori atu peresi na malamalai sei pŋis la lo silera, la sopo eŋi vai na ŋomi tamlohi sei la lo lavira la mai mata lotua la vokevoke. <sup>10</sup> Matan retileu matan tuai usuri na leu, enia mata hanhani peresi na wai, ale hoje na hinau tinatinapua peresi la hinau sei tamlohi la lo vaira na limara purongo, enira la lo toho vavano malele paro mata mai mariviti isan God mo pala.

#### *Kŋristo Enia Malamalai Tataholo*

<sup>11</sup> Pani nakerihi Kŋristo mo mai Pŋis Aulu mo aulu na hinahinau ŋuhu tari sei la mai moiso, ale mo unu hin Jara Tapu atu na tuka sei mo tataholo jea, hara sei lima tamlohi la sopo vaia, mo sopo sopesopen varama nike, <sup>12</sup> ale mo unu hin Jara Tapu Jea atu vahatea mata rani tari, pani mo sopo unu peresi na ŋae nani teni natu buluk, pani mo unu peresi na ŋaena hasena. Ale na ŋaena mo vai tataholoi na malele mata noŋa juri matan tui tui.

<sup>13</sup> Matan vara posposi tuai mata turusi na ŋae nani peresi na ŋae buluk peresi na patmakovi mata natu buluk mo eŋi vai na epe tamlohi la vokevoke mata nora posposi mata tope na leu sei mo vaira la lumiha, <sup>14</sup> ale ha to ŋomŋomia sohena sava ŋaen Kŋristo i eŋi onehi na mapuŋa na noŋa rasua na noŋa vavahinau purongo, matan vara i vaiŋa ŋa eŋi lotu God sei mo mauri usuri na masalona. Kŋristo na suihan Tanumen God sei mata tui tui, mo hasena silea isan God sohena malamalai tataholo matea mata hehe. <sup>15</sup> Ale matan haratu, enia natu mo vai na malele matan vara retitauhi paro atu i eŋi

mai, matan vara la haratu sei God mo lo tovira la eŋi lavi na koruna sei la sopo eŋi tihai God mo retitauhi hinira. Matan Kŋristo mo mate vara i vaira la materi na talai mata hehe sei la vaira na ruhuruhun retitauhi atu tiroma.

#### *Matea Non Iesu Mo Vai Na Retitauhi Paro Mo Mauri*

<sup>16</sup> Ale vara tea mo sile na nona reti matan te koruna ale hitahu i pa mate, i pa sopo tea i eŋi lavi te koruna i tikeli rani atu la levosahia mo ŋuhu vara mo mate. <sup>17</sup> Nona reti atu mata koruna i pa lo turu i tikeli rani atu tamlohi atu mo lo ulia mo mate. Vara mo pa lo mauri, tea i sopo eŋi lavi te koruna sei mo retitauhi hinia isara.

<sup>18</sup> Matan hinau atu natu, retitauhi atu tuai mo tapulo peresi na ŋae. <sup>19</sup> Matan Moses mara mo sile na retileu isana tamlohi tari usuri na hinau tari na leu, mo lavi na ŋae natu buluk peresi na nani, ale wai peresi na vulu sipsip hahara peresi na bras rihirihia matea la vaia na ranga hysop vipahai matea, ale mo turusi na puku leu peresi na tamlohi tari na ŋae, <sup>20</sup> ale mo lo vereea mara, 'Harihi enia ŋae mata retitauhi sei God mo retileu hinia vara ha lo turu hinia'. *Exo 24.8*

<sup>21</sup> Ale hin malele atu purongo mo turusi na tent peresi na hinau tari sei la lo vavahinau peresira mata lotu God. <sup>22</sup> Varaŋuhu, ŋa eŋi vereea usuri na leu non Moses, mariviti hinau tari la mai la vokevoke na malele turusi na ŋae, ale God i pa sopo ŋomi na hehe vara ŋae i sopo roro.

<sup>23</sup> Ale la hinau atu la lo masese na lolo tent, la lo tovongi na hinau na tuka, ale pŋis mo vaira la vokevoke na ŋae maji purongo. Pani hinau atu na tuka, God mo vaira la vokevoke na malamalai ŋuhuŋuhu jea matea, mo jeu na ŋae maji.

<sup>24</sup> Matan Kŋristo mo unu na tuka tataholo vara i turu na nahon God sohena noŋa tuetueni. Enia mo sopo unu na tent mata lotu nona tamlohi varama matan haratu na varama enia tovongi matea hin Temple atu na tuka. <sup>25</sup> Mo sopo unu na tuka matan vara i mele hasena silea tarea sohena pŋis aulu matea mo lo vaia



hin rani atu mo lo unu na Jara Tapu Jea na tent hin varama nike na tauni hatehateahi vara i lo sile na ŋae maji. <sup>26</sup> Vara i sohena Křisto i pa lo mate vaha visa, i tapulo hin rani atu varama mo tapulo, pani mo vono. Mo mai vahatea mata rani tari hin rani hitahu nike vara i lavi naŋihi na suiha hehe jejeu na nona malamalai sei mo mate mataŋa.

<sup>27</sup> Ale God mo taua vara tamlohi hatehateahi la pa mate vahatea, ale hitahuna la pa turu na aria, <sup>28</sup> ale mo sohena purongo, Křisto mo mate vahatelete purongo sohena malamalai matea mata lavi naŋihi na hehe nona tamlohi matuvana. I pa mele mai, pani mo sopo mata noŋa hehe. Hin rani atu i pa lavi na juri non la haratu sei la lo kilau matana.

## 10

### *Malamalai Non Křisto*

<sup>1</sup> Posposi tuai mata leu non Moses enia ŋoŋoa hinau purongo mata hinau ŋuhu sei la pa mai, hina varaŋuhu sei Křisto mo vaia mataŋa. Malamalai na posposi tuai mata leu, la lo vaia tarea na tauni hatehateahi, la sopo eŋi vai la haratu sei la lo mai mata lotu vara la vokevoke vevuhi.

<sup>2</sup> Vara la pa lo eŋi vai na tamlohi la vokevoke vevuhi, malamalai korong mo isoiso moiso. Matan la haratu la lo lotu la pa vokevoke vahatea mata rani tari, ale puhoni nora hehe mo pete tihai isara moiso. <sup>3</sup> Pani la malamalai atu la lo vai na tamlohi la lo mele ŋomŋomi na nora hehe na tauni hatehateahi. <sup>4</sup> Matan ŋae buluk peresi na ŋae nani la sopo eŋi lavi naŋihi na hehe. <sup>5</sup> Matan hinau atu, na rani Křisto mo sinai na varama mo vereia isan God mara,

‘Ko sopo opoi na malamalai la lo vaia na maji teni na hanhahi.

Pani ko sileau na epe matea vara a mai nom malamalai tataholo.

<sup>6</sup> Varaŋuhu ko sopo avulahi na maji la lo sulira na votavota teni na silesile mata hehe.

<sup>7</sup> Ale na mele vereia nara: Ko hiteau, enau nahai na sinai

vara a vai na masalom God

vara a usuri na sava la ulia moiso na Retitapu matakū.’ *Psa 40.6-8*

<sup>8</sup> Sohen Křisto mo vereia moiso mara, ‘Ko sopo opoi na malamalai la vaira na maji teni na hanhahi teni na maji la sulira na votavota teni te silesile tinapua mata hehe, ko sopo avulahi hinira.’

(Ko hitea, Iesu mo lo vereia sohen harihi, hina purongo vara leu non Moses mo vereia vara tamlohi la pa vaira.)

<sup>9</sup> Ale Křisto mo mele vereia mara, ‘Ko hitea, enau na lo mai vara a vai na masalom.’ Iesu mo vai na retitauhi matan tiroma vara i isoiso matan vara harua retitauhi nike i eŋi turu. <sup>10</sup> Ale usuri na masalom God enia mo vaiŋa ŋa tapu na malamalai mata epen Iesu Křisto vahatea mata rani tari.

<sup>11</sup> Usuri na retitauhi tuai, pŋis la turu na naho votavota na rani hatehateahi mata sile na malamalai sei la sopo eŋi lavi naŋihi te hehe hin te rani. <sup>12</sup> Pani noŋa Pŋis Aulu mo hasena silea isan God sohena malamalai matea mata hehe sei mo ŋuhu mata rani tari. Ale nake mo lo sakele na jara ololo tavera mo aulu mo jeu na tinapua na tavalu liman God. <sup>13</sup> I pa lo sasaovi atu vavano i tikeli rani atu God i vai na nona meresahi la toho na ruhuruhi palona.

<sup>14</sup> Matan hin silesile atu matelete purongo, Křisto mo vai tataholoi na nona tamlohi sei mo lo vaira la tapu mata rani tui tui. <sup>15</sup> Ale Tanume Tapu sohena mo vereulia vara enia mo sohena; matan mo lo vereia na reti non Jeremiah mara,

<sup>16</sup> ‘Moli God mo vereia mara: Retitauhi paro akerihi natu, a pa mele vaia peresi na noku tamlohi hin rani atu.

A pa tau na noku leu na mapura, matan vara la pa levosahira, ale a pa ulira na ŋomira, matan vara la pa eŋi ololo hinira.’ *Jer 31.33*

<sup>17</sup> Ale mo mele vereia mara, ‘A pa sopo mele ŋomŋomi na nora hehe peresi na nora tope na leu.’ *Jer 31.34*

<sup>18</sup> Ale vara God mo řomi na hehe moiso, mata sava natu tea mo opoia vara i mele sile te malamalai mata hehe?

*Ra Turu Rilangi Hin Křisto*

<sup>19</sup> Ale la vorai peresi na vevorai řuhuřuhu, nake řomiřa i eři řilangi mata unu hin Jara Tapu Jea atu na tuka mata řaen Iesu. <sup>20</sup> Mateia non Křisto mo vai na malele paro sei mo lo sile na mauri, ale mo roia vara řa eři jeu tavalu ruru tapu atu řa mai mariviti isan God.

<sup>21</sup> Ale matan Iesu nořa Přis Aulu jea mo lo kilau na iman God, <sup>22</sup> mo řuhu vara řa mai mariviti isan God, řomiřa i sopo řomkaka, nořa rasua i řilangi, matan nořa řomřomi sasati God mo turusira moiso na řaen Křisto, matan vara i vai na řomiřa la vokevoke, ale mo paptijo na epeřa na wai niro.

<sup>23</sup> Ha sopo řomkaka, pani řa lo tau-rilati řomtoho nike sei řa lo vereea vara řa lavia moiso, matan řa eři rasua vara God i pa sopo tope nona retitauhi paro nike.

<sup>24</sup> Ha aleale malele vara ha eři tueni kamim hatehateahi hinia mata vujangi na nomim opoia isana tinapua. <sup>25</sup> Ale řa sopo řomřomi purongo na nořa pulutahi jara matea sohena tamlohi hai la lo řomřomia, pani řa retituetueni ale řa retiřoařoahaiřa hatehateahi, řa tau na řomiřa mata nořa pulutahi tarea matan nona mele mai mo lo mai mariviti.

<sup>26</sup> La tapala řuhuřuhu, vara řa lo opoia vara řa lo hehe, hina purongo vara řa lavi vevuhi na lelevosahi mata retivararuhu moiso, mo sopo te mele malamalai tinapua vara i eři tavuhoro la hehe atu. <sup>27</sup> Pani ha lo levosahia vara řa pa sopo eři kilau matan te hina řuhu pani řa pa lo kilau purongo mata lolokoru sasati sei mata aria non God sei i pa mai sohena hapu řilangi jea matea matan vara i suli nařihi na nona meresahi. <sup>28</sup> Tuai vara tea mo řohu vara i oloolo na leu non Moses, la pa sopo řomopoia, ale la pa vilimateia usuri na vereulia nona tamlohi mo rua teni mo tolu mata nona hehe. <sup>29</sup> Ha lo levosahia vara i pa sati jea isan la haratu sei

la rasua moiso ale la mele jovi na hehe, matan la lo varasi Natun God, ale la lo vai na řae mata retitauhi sei mo tapuhira hinia mo sohena hina purongo matea. Tamlohi sohena, la lo vaivai na Tanumen God sei mo lo lavi na řomřuhu non God mo mai isara.

<sup>30</sup> Matan řa levosahia vara haratu sei mo lo vereea mara, 'Enau a pa kele.

Enau a pa mele sile na volira i tataholo na sava la vaira.' *Deut 32.35*

Ale mo mele vereea mara, 'Moli i pa ari na nona tamlohi.'

*Deut 32.36; Psa 135.14*

<sup>31</sup> Enia hina sasati tavera mata matahu matea vara ko jovi sivo na liman God sei mo lo mauri.

<sup>32</sup> Ha sopo řomaliho hin la rani atu tiroma sei ka lavi na lelevosahi hin Křisto hinira. Ha mele řomřomia sohena sava ka lo turu řilangi, hina purongo vara ka levosahia vara ha pa lavi na rani řilangi tavera matana.

<sup>33</sup> Hin la rani atu tamlohi la verele-jileji kamim na naho tamlohi, ale la tamaji kamim, ale hin rani atu ka lo tueni na tinapua sei la lo lavi na rani řilangi sohemim. <sup>34</sup> Ka lo lavi na rani řilangi peresi la haratu sei la pulahira na ima řilangi, ale hin la rani atu la lavi nařihi na nomim hinahinai tari, ka tinařihia, ale řomimim mo sopo sati matana, matan ka levosahia moiso vara hina řuhuřuhu jea hai matan tui tui la lo saovi kamim na pongi hitahu.

<sup>35</sup> Ha sopo tinařihi na nomim rasua řilangi hin Moli, hina purongo vara sava i pa masese. Ha řomřomia vara voli nomim rasua sei i pa mai mo tavera jea matana. <sup>36</sup> Ale nakerihi ha řomperavu! Ha turu řilangi mata vai na masalon God, matan hitahu ha pa lavi vevuhi na sava mo retitauhi hinira moiso.

<sup>37</sup> Ale God mo vereea vara,

'I pa sopo tuai haratu sei mo lo mai i pa pala, ale i pa sopo vai malum.

<sup>38</sup> Ale tamlohi sei la tataholo na nahoku la pa hahau na nora rasua.

Pani a pa sopo avulahi hin la haratu sei la vahaři hiniau.’ *Hab 2.3-4*  
<sup>39</sup> Pani enra řa sopo sohen la haratu sei la vahaři hin God, ale la pelati na nora malele mauri tui. Nořa rasua nike mo vaiřa řa levosahi mamahunia vara God i pa juriřa.

## 11

### *Tovongi Ruhu Mata Rasua*

<sup>1</sup> Rasua enia sava? Enia levosahi mamahuni sei vara sava řa lo řomtoho matana i pa masese. Enia nořa levosahi mamahuni na hiniau sei řa sopo lo eři hitera nake. <sup>2-3</sup> Na rasua, řa levosahia vara varama nike mo pa pala usuri na reti non God, ale na rasua řa levosahia vara hiniau tari řa lo hitera la tai na hiniau řa sopo eři hitera.

God mo avulahi na tamlohi matan tuai mata nora rasua.

<sup>4</sup> Enia mata rasua sei, Abel mo sile na malamalai mo jeu Cain, ale God avulahi hinia ale hiniau nike mo vujangia vara Abel mo tataholo na nahon God. Ale hina purongo vara Abel mo mate tuai řuhu moiso, tovongi mata nona rasua mo pa lo retireti isařa nake.

<sup>5</sup> Enia mata rasua sei, Enoch mo sahe na tuka mo sopo mate — ‘vahatea purongo mo tihai matan God mo lavi nařihia, matan God mo avulahi hinia mata nona rasua’. *Gen 5.24* <sup>6</sup> Ale ka hitea, o sopo eři vai God i avulahi vara mo sopo te nom rasua. Tea vara mo opoia vara i mai isana, i pa rasua vara God mo lo toho ale enia i pa voli la haratu sei la lo alea varařuhu.

<sup>7</sup> Enia mata rasu sei, Noah mo voro na aka matea vara i pa juri na vao imana hin wai tatave tavera atu. Matan mo lo lotu God na matahu, mo lo ololo na nona retiřoariohai mata hiniau matea mo sopo lo masese hin te pongi. Sava mo vaia usuri na nona rasua mo sile na talai isana tamlohi tari na varama hin rani atu, ale matan nona rasua sei mo mai mo tataholo na nahon God.

<sup>8</sup> Enia mata rasua sei Abraham mo ololo hin God hin rani atu mo tovia vara i malue na jarana vara i

vano na jara tinapua matea, jara atu God i pa silea sohena koruna isana. Abraham mo vano pani mo sopo levosahia vara i pa vano tataholo epu. <sup>9</sup> Ale mara mo kakau hin jara atu God mo retitauhi hinia isana, mo lo toho atu na rasua matan enia mo sohena vinano matea, ale mo lo juruvi na tent matea. Ale Isaac enia Jacob la juruvi na tent sohena. Retitauhi atu God mo silea isan Abraham enia nora sohena. <sup>10</sup> Abraham mo pa vaia sohena matan mo lo kilau toho matan taon tavera atu sei mo puloha, ale God sei mo voroa usuri na řomina.

<sup>11</sup> Enia mata rasua sei Sarah enia Abraham la eři tape na natirihi matea, hina purongo vara la vajiaha sasati moiso ale Sarah enia mo aroaro. Abraham mo rasua vara God i pa vai na nona retitauhi isan Sarah. <sup>12</sup> Ale vao tavera sei la malue hin tamlohi nike matelete purongo sei mo vajiaha sasati moiso vara i eři vasusu, mahapina la vao vao sohena vitusarasara na masapa, ale mo sohena piri oneone na pahisa tasi sei tea i sopo eři evira.

<sup>13</sup> La tamlohi tari nike la mate, pani la sopo lo lavi na sava God mo retitauhi hinia isara, pani na nora rasua la kilau vano la hitea mo lo toho asau, ale la avulahi na retitauhi non God. La majinga vara enira la vinano purongo ale mata hahau řalihi purongo na varama. <sup>14</sup> Matan tamlohi sei la lo retireti sohen haratu na varama, la lo vujangia mo memera vara enira la lo kilau toho mata jarara tataholo. <sup>15</sup> Vara la lo řomřomi na jara sei la malue hinia, korong la mele mule moiso. <sup>16</sup> Pani enira la lo ale na jara řuhu matea aulu na tuka. Matan haratu, God mo avulahi vara la tovia nora God matan enia mo tatamahu na taon tavera matea na tuka matara.

<sup>17</sup> Enia mata rasua sei Abraham mo sile Isaac sohena malamalai matea hin rani atu God mo vaihitea aulu hin vutivuti atu. Pa Abraham atu sei mo lo lavi na retitauhi non God mo tatamahu vara i vilimatei natuna vorahese Isaac sohena malamalai. <sup>18</sup> God mo retitauhi isan Abraham

mara, 'Hin natum Isaac natu mahapim la pa lo tauri na hijam'. *Gen 21.12* <sup>19</sup> Abraham mo řomřomia mara vara Isaac i mate, God i eři mele vaia i mauri. Ale na malele matea, varařuhu Abraham mo pa mele lavi natuna na mateia.

<sup>20</sup> Enia mata rasua sei Isaac mo leřuhu hin la natuna atu mo rua, Jacob enia Esau. Enia mo levosahi mamahuni na sava God i pa vaia na pongi mo lo mai.

<sup>21</sup> Enia mata rasua sei Jacob hin rani atu mo vajiaha ale mariviti vara i mate, mo leřuhu na natun Joseph hatehateahi, ale Jacob mo popovitoho mata lotu God, ale mo lo tauri na tihonina.

<sup>22</sup> Ale enia mata rasua sei Joseph hin rani atu mariviti vara i mate, mo retireti sohen mo levosahi mamahunia vara God i pa lavi nařihi na tamlohin Israel la malue Egypt vara la sahe Canaan. Mo levosahi mamahunia hin rani atu sei mo retileu isara mara vara la malue la pa lavi na suina pearsira.

<sup>23</sup> Enia mata rasua sei taman Moses enia tinana la jarohia mata vitu mo tolu. La hitevosahia vara God mo silera na natirihia matea mo tinapua, ale la sopo matahuni na sava supe nona mara Egypt i eři vaia isara.

<sup>24</sup> Enia mata rasu sei Moses hin rani atu mo ulua, mo řohu vara la kilaua sohen natun venatun supe nona mara Egypt matea. <sup>25</sup> Moses mo tau na řomina vara i pa usuri na malele mata rani řilangi peresi na tamlohi non God. Mo sopo opoia vara i avulahi na hehe sei avulahina mo lo toho mata makomo rani purongo. <sup>26</sup> Enia mo levosahia vara i pa mele řuhu jea vara i lavi na rani řilangi matan Křisto, mo jeu haratu vara i lavi vevuhi na tavgav matan Egypt, matan mo lo kilau toho mata nona otori tavera atu sei God i pa silea isana. <sup>27</sup> Enia mata rasua sei Moses mo malue na lepan Egypt hina purongo vara supe nona mara Egypt mo lolokoru hinia. Enia mo turu mo lo vano matan mo lo kilau matan haratu sei tea i sopo eři hitea.

<sup>28</sup> Hitahu enia mata rasua sei Moses

mo retileu isana tamlohin Israel vara la taurilati na Passover, ale vara la turusi na řae na peri matarua matan vara angelo mata mateia i pa sopo vilimatei na natura vora tiroma.

<sup>29</sup> Enia mata rasua sei tamlohin Israel la hahau roto tasi sei la tovia Tasi Hahara sohen vara la lo hahau na lepa mamasa purongo. Pani hin rani atu mara Egypt lara la usurira, enira mo isoiso la pute la mate.

<sup>30</sup> Enia mata rasua sei, tamlohin Israel la hahau řalihi na taon tavera matan Jericho mata rani mo limaravrua, ale rorona la maroe la jovi.

<sup>31</sup> Enia mata rasua sei, Rahab hařai malele atu mo sopo mate peresi na tamlohi tari hin nona taon tavera atu Jericho sei la řohu vara la oloolo hin God. Mo sopo mate matan enia mo avulahi vara i jarohi la tamlohin Israel atu sei la luhu na imana. <sup>32</sup> Vara mo sohen haratu a pa mele vere na sava? I pa mele lavi na rani peravu jea vara a vere vevuhi na sorasora mata rasua non Gideon, Barak, Samson, Jephthah, David, Samuel peresi na přovet tari.

<sup>33</sup> Enia mata rasua sei la tamlohi nike la pulahi na jara nona supe tinatinapua, la aulu na jarara usuri na posposi tataholo, ale la lavi na sava God mo retitauhi hinia isara. La pelati na jingo lion, <sup>34</sup> la vuni na pepe hapu, la rovo na mateia na voro sita vuro. Epera malokoloko, mo posi mai epe řilangi. La mai la řilangi jea na vuro ale la levuti na vao tamlohi vuro tinatinapua la maro. <sup>35</sup> Hařai la mele lavi la haratu sei la opoira na mateia.

Pani hai la rasu God, tamlohi la vailejlejira, la řomřomia vara mate i pa mele řuhu, i jeua vara la vaharı hin God vara la materi na ima řilangi.

La tau na nora řomtoho na sauteterahi mata mauri řuhu jea tinapua matea. <sup>36</sup> Tamlohi la kerehi hai, ale la rupi kotkotira na asi maja. Ale hai la lihora na jen na jara řořoha na lolo ima řilangi. <sup>37</sup> Hai la mate matan la parura, ale hai la soara sopera mo rua; hai la vilira na sita vuro, ale hai la pa lo hahau la ru na huri sipsip peresi na nani purongo,

la marohati, la lavi na rani řilangi jea ale tamlohi la vailelejira. <sup>38</sup> Enira la řuhu hajavua mata toho hin varama nike. La hahau roto na tano koru peresi na vutivuti, la luhu na papa vatu ale na koko lepa.

<sup>39</sup> La tamlohi tari nike sei kama verera moiso, God mo avulahi hinira enira mo isoiso mata nora rasua, pani te vonara hatea mo sopo lo lavi na hinau tari sei God mo lo retitauhi hinira. <sup>40</sup> Matan God mo tatamahuni na hinau řuhuřuhu hai matařa matan vara God i eři vaira la tataholo řuhu peresiřa nake vahatea.

## 12

### *Aria Non God Mo Vujangi Na Nona Opoia*

<sup>1</sup> Ale matan řa eři hite vao taverna atu matan tuai sei la tovongi řuhu mata rasua, la lo turu řalihira mata vujangi mauri atu mata rasua isařa nake. Ale matana, mo řuhu vara řa pulahi nařihi na hinau tari sei la lo puhoniřa ale la vaira řa sopo eři maro řilangi, řa pulahi nařihira peresi na hehe sei la lo kaluti hiniřa, matan vara řa eři maro peravu hin maro matan mauri nike mo lo toho na nahora. <sup>2</sup> Ale řa eři vaia vara řa lo kilau isan Iesu sei enia pulo nořa rasua na tapulona mo tikeli na isoisona. Matan enia mo avulahi vara i lavi na mateia mata mahanuhanu na talopeilopei, matan mo levosahia vara hitahunia i pa avulahi taverna matana. Nake mo lo sakele na jara ooloo taverna mo jeu na tinapua na pahisa jara sakele mata supe non God na tuka. <sup>3</sup> Ha to řomřomi na rani řilangi tari mo lavira sei hin rani atu tamlohi hehe la vai na hina sasati jea isana, ha řomřomia matan vara ha sopo malokoloko, ale ha tinařihi taleu na nomim rasua hinia. <sup>4</sup> Ale kamim ka sopo lo tikeli jara atu vara ha pa mate matan ka lo valum peresi na hehe na nomim turu řilangi mata turuhoroa.

<sup>5</sup> Ale ka pete řomaliho moiso na retituetueni non God isamim, la natuna? Mo vereea mara, 'Natuku, o sopo kilau purongoi

vara Moli mo vujangiho matan te hinau ko vaia mo sopo řuhu.

Teni řomim i sopo sati matana, <sup>6</sup> matan Moli mo lo vujangi la haratu mo opoira, ale mo lo reti tataholo isana natuna tari sei mo lavira.'

*Prov 3.11-12*

<sup>7</sup> Vara God mo lo vujangi kamim matan te hinau ka vaia mo sati, ha lo řomřomia vara God mo lo vaia sohena matan kamim ka natuna tataholo. Sava natirihi mo vai na hina sati matea, pani la sopo vujangia matana? <sup>8</sup> Vara God mo sopo vujangi kamim matan te hinau ka vaia mo sati sohen mo lo vaia isana natuna tari, mo řaramia vara kamim natu malele, ale kamim ka sopo natuna tataholo. <sup>9</sup> Vara tarea řa lo ooloo na tamařa mata varama sei la lo vujangiřa matan te hinau řa vaia mo sati, i pa mele řuhu jea vara řa avulahi mata lavi na vujangi sei Tamařa na tuka mo lo silea matan te hinau řa vaia mo sati matan vara řa pa toho jejeu.

<sup>10</sup> Matan tamařa mata varama la vujangiřa matan nořa hina sati mata tauni mo visalete purongo usuri na nora lelevosahi. Pani vujangi non God matan te hina sati isařa, enia tarea mo tataholo, ale enia mo řuhu matan mo vaia matan vara řa pa lavi maurina atu sei mo tapu. <sup>11</sup> Na rani řa lo lavi na vujangi matan te hinau řa vaia mo sati, mo sopo rani matea mata avulahi pani řa rongo mo sati matana. Pani hitahu, vuana enia tamata peresi na mauri tataholo isan la haratu la ulua hinia.

<sup>12</sup> Ale matana, ha vai na limamim sei la malokoloko sati moiso vara la mele tautauri i řilangi, ale ha turu tataholo i řilangi na jaramim, hina purongo vara palomim la lo savaravara. <sup>13</sup> Ha hahau na malele tataholo, matan vara la haratu la lo usuri kamim, hina purongo vara la malokoloko, teni la pakajangjang moiso, la pa sopo eři tialahalaha vara la jovi, pani la pa mele řilangi. *Prov 4.26*

*Ha Tapurongo Hin God*

<sup>14</sup> Ha vaihitea vara ha toho na tamata peresi na tamlohi tari, ale ha alea vara ha toho na mauri vokevoke sei mo tapu, matan la haratu sei la sopo tapu, la pa sopo eři hite Moli. <sup>15</sup> Ha kilau mamahuni kamim hatehateahi, matan vara te vonamim i pa sopo eři jovi nařihi na řomřuhu non God. Ha sopo tinařihia vara te řomřomi sasati mata vahaři na rasua i malue hin kamim, vara i vono, i pa komo na vao tavera na honana, ale la pa jovi matana. <sup>16</sup> Ha sopo tinařihia vara tea i vai na posposi maji, teni i usuri na posposi varama sohen Esau. Enia mo sile na korun tamana tataholo isan tasina mata peleti hanhani matelete purongo. <sup>17</sup> Ale hitahuna, mara mo opoia vara i lavi na leřuhu non tamana, tamana mo řohu hinia. Hina purongo vara mo tangisia, pani i sopo eři mele posi na sava mo lo toho moiso.

#### *Retitauhi Mata Leu Na Vutin Sinai*

<sup>18</sup> Matan kamim ka sopo mai isan God sohen tavitavin Israel tuai la lo vaia hin rani atu la lavi na leu isan God na vutivuti Sinai sei mo tapu vara la tikelia, teni na pepe hapu tavera sei mo lo hani aulu hin vutivuti atu, teni na řořoha tavera jea ea, teni na langi poripori tavera ea. <sup>19</sup> Matan la rongong na roroa trumpet tavera matea peresi na leo matea sei mo lo sile na retisohai matea. Ale mo vaira la tangi vara God i pa sopo mele retireti! <sup>20</sup> La rongoa vara nona retileu mo řilangi jea matan mo vereea mara, 'Hina purongo vara te maji palo vati purongo hatea, i tikeli pulon vutivuti nike, ha pa parumateia'. *Exo 19.12-13* <sup>21</sup> Moses sohen, matahu tavera mo sohonina na sava mo hitea ale mara, 'Na matahu tavera, ale na savaravara'. *Deut 9.19*

#### *Retitauhi Paro Mo Mele Ruhu Jea*

<sup>22</sup> Pani kamim ka mai na Vutin Zion, taon tavera non God mauri, Jerusalem matan tuka, ale ka mai isana vao angelo tavera sei la lo pulutahi na nora avulahi tavera. <sup>23</sup> Kamim ka mai na pulutahi nona vora tiroma non God sei hijara la ulia

na tuka. Kamim ka mai isan God, hara sei i pa ari na tamlohi tari. Ale ka lo mai isana tanumen la haratu na tuka sei God mo volituhura moiso, ale mo vaira la tataholo řuhu na nahona. <sup>24</sup> Ka mai isan Iesu, hara sei mo lo turu na livuhan God peresi na tamlohi matan retitauhi paro nike, ale ka mai na řaena sei la turusia mata řomi na hehe, mo sopo sohen řaen Abel sei mo lo tangi isan God vara i sile na talai matana.

<sup>25</sup> Ha lo kilau mamahunia vara ha ooloo hin God, hara sei mo lo retireti isamim. Matan, vara tavitavin Israel la sopo eři rovo hin rani atu la řohu vara la tapurongo hin Moses sei vahařule matea enia tamlohi purongo, i pa mele sati jea vara řa řohu hin haratu mo lo retireti isařa sei mo tai na tuka! <sup>26</sup> Hin rani atu God mo retireti isara na vutin Sinai, leona mo hisuhi na varama. Pani nake mo mele vai na retitauhi tinapua matea mara, 'Mele vahatea, a pa sopo hisuhi na varama purongo, pani a pa hisuhi na tuka peresia'. *Hag 2.6*

<sup>27</sup> Haratu mo řaramia vara hinu tari na varama la pa hutehutehi, matan vara hinu matan tui tui purongo, la pa lo toho jejeu.

<sup>28</sup> Ale matan řa pa lavi mauri atu God mo aulu hinia sei i pa sopo eři řovo, mo řuhu vara řa vere meje isana, ale řa vai God i avulahi na nořa lotua na ooloo sei mo vaira řa sile na ooloo tavera jea isana. <sup>29</sup> Matan nořa God enia hapu tavera jea matea mata sulivuvuhi na hinu tari. *Deut 4.24*

## 13

#### *Isoiso Retireti*

<sup>1</sup> Ha pa opoiopoi kamim hasemim tarea na opoia varařuhu. <sup>2</sup> Ha sopo řomaliho vara ha avulahi mata lavi na vinano na imamim, matan hai la vaia moiso isana angelo pani la sopo levosahia. <sup>3</sup> Ha sopo řomaliho hin la haratu la lo vailejlejira na lolo ima řilangi, ha řomřomira sohen kamim sohen ka lo toho peresira.

<sup>4</sup> Ha řomřomi i tataholo mata lahi, ha sopo mele juruvi peresi te tinapua, matan God i pa ari la haratu la lo

vai na posposi viriu, peresi la haratu la lo vaivaileu peresi na tinapua mo lahi moiso. <sup>5</sup> Ha toho asau na opoia mata mania, ha avulahi na sava enia nomim, matan God mo vereea mara, 'A pa sopo tinaŕihiho hin te rani.

Ale a pa sopo revusehiho hin te rani.' *Deut 31.6; 31.8*

<sup>6</sup> Matan haratu, řa eři vereea vara, 'Moli enia noku tuetueni, ale matana, a pa sopo matahu.

Vara mo sohen haratu natu, tamlohi la pa eři vai na sava isaku?'

*Psa 118.6-7*

<sup>7</sup> Ha mele řomřomi la nomim patu tamlohi atu sei la lo vujangi kamim na reti non God tiroma. Ha řomřomi na hinu řuhu tari sei la mai isamim na maurira, ale ha rasu Moli sohen enira la rasua.

<sup>8</sup> Iesu Křisto mo lo sohenanovi, nahapani, ale jejeu. <sup>9</sup> Ha sopo tinaŕihia vara te vujangi paro tinapua la haluhalu kamim. Kamim ka lo lavi na suiha na maurimim mata řomřuhu non God, mo sopo na posposi tuai usuri na leu mata hanhani sei la sopo eři tueni la haratu la lo usurira.

<sup>10</sup> Enřa nořa rasua paro nike mo sohenavotavota paro matea, ale usuri řomřomi atu pŕis mata rasua tuai la sopo eři lavi na hina řuhuřuhu hinia matan malelena mo tinapua. <sup>11</sup> Usuri na rasua tuai na leu nona Jew, hin rani atu la lo toho na tano koru, pŕis aulu mo lo lavi na řae maji mo unu sivo na tent na Jara Tapu sohenamalamalai matea mata hehe, pani usuri na leu la suli na tarape maji na tavalu rope jara tamlohi atu matan vara i vai na jarara i vokevoke. <sup>12</sup> Ale rasua paro nike mo sohenapurongo, Iesu mo mate na tavalu ropen taon tavera atu Jerusalem, matan vara i eři vai na nona tamlohi la tapu na řaena sei mo roro. <sup>13</sup> Ale matana, mo řuhu vara řa malue řa vano isana hin jara sati atu na tavalu ropen taon tavera atu matan vara řa lavi na rani řilangi sei mo lo lavia. <sup>14</sup> Matan varama nike mo sopo jarařa tataholo: Enřa řa lo kilau toho matan

nořa taon tavera atu na tuka sei i pa mai.

<sup>15</sup> Hin Iesu, mo řuhu vara tarea řa lo sile na hasohaso isan God na nořa vereea vara enia mo řuhu sohenasava, sohenanořa malamalai řuhumatea řa lo silea isan God. <sup>16</sup> Ha sopo řomaliho vara ha vai na vavahinau řuhu ale ha lo ase na nomim hinahinau peresi la haratu la vejuveju, matan malamalai sohenanienia mo vai God mo avulahi tavera.

<sup>17</sup> Ha oloolo hin nomim patu tamlohi rasua, ale ha oloolo na sava la lo vereea isamim, matan enira la lo kilau na maurimim, ale la levosahia vara la pa turu na nahon God mata nora vavahinau. Mo řuhu vara ha vaira la vaia na avulahi, mo sopo na řomsati, matan vara i vono, i pa sopo tueni kamim hin rani atu mo lo mai.

<sup>18</sup> Ha usiusi matamam, matan kama levosahia vara řomimam la vokevoke, ale kama opoia vara kama toho na oloolo na hinu tari kama lo vaira. <sup>19</sup> Ale nakerihi, na opoi na nomim usiusi mo tavera jea matan vara a eři mele mai isamim vila.

<sup>20-21</sup> Ale na lo usiusi vara God mata tamata sei mo mele lavi naŕihi nořa Moli Iesu Křisto na mateia, vara i vai kamim ha tatamahu na hinu tari mata vai na masalona. Na lo usiusi vara na suihan Iesu Křisto i pa vai kamim ha vua na hinu tari sei i pa vai Iesu i avulahi. Iesu enia Tavui Sipsip aulu mata sipsip usuri na retitauhi matea matan tui tui, enia mo ulia na řaena. Ale hasohaso i pa vano isana tarea tui tui. Amen.

<sup>22</sup> Na usia řilangi isamim la vorai peresi na vevorai řuhuřuhu, vara ha tapurongo i řuhu na sava na pete vereea moiso hin noku leta vejuveju nike.

<sup>23</sup> Na opoia vara ha levosahia vara voraiřa na rasua sei Timothy, mo malue na ima řilangi moiso. Ale vara i pala nike vila, a pa lavia peresiaukama mai kama hite kamim.

<sup>24</sup> Ha sile na noku retioloolo i vano isana nomim patu tamlohi tari na rasua, peresi na kalesia tinapua sei la lo toho atu. Kalesia sei la tai Italy la sohai na nora retioloolo isamim.

<sup>25</sup> Na lo usiusi vara řomřuhu non  
God i pa toho isamim mo isoiso.



## James Leta James Mo Ulia Leta Nike

Leta nike, enia mo vano isana tavitavu in Israel sei la tau na nora rasua hin Iesu Křisto. Mo vujangia mara vara te rasua varařuhu na maurim, tamlohi la pa hite na vaivaina, vara i vono, nom rasua enia hina purongo.

Mo retireti na hinau sohen harihi: vara ko tilavono, o sopo řomatano – o tauri řilangi na nom rasua na rani vaihite la mai isam. O sopo lolokoru vilavila. O sopo kilau na huri tamlohi purongo. O vai na hina řuhu isana tamlohi. O vaitataholoi na memem. O ooloo hin God, o turuhoro Tiapolo. O sopo retihapahapa na nom voko. Vara ko tavitav, o tueni na tilavono. Sopesopen puku nike.

### Hin leta nike

1. Retioloo (1.1)
2. Rasua enia hina lelevosahi na mauri (1.2–18)
3. Tapurongo moiso ooloo hin na reti non God (1.19–27)
4. Vaia i řuhu isana tamlohi tinapua (2.1–13)
5. Rasua peresi na voko (2.14–26)
6. Lelevosahi peresi na retireti (3.1–18)
7. Retiřoařoahai isan la haratu la lo tapala peresi na varama (4.1–5.6)
8. Posi malum, řomřuhu peresi na usiusi (5.7–20)

<sup>1</sup> Enau James, slev non God enia Moli Iesu Křisto, na uli leta nike mo vano isamim Jew ka kalesia, ka lo toho hatehateahi hin varama nike.

### *Rasua Peresi Na Lelevosahi*

<sup>2</sup> La voraiku peresi na vevoraiku řuhuřuhu, vara vaihite la mai isamim, ha avulahi matara, <sup>3</sup> matan ka levosahia vara te hinau mo vaihite na nomim rasua, enia i pa vai na nomim rasua i mele řilangi jea, matan vara ha pa turu řilangi tarea. <sup>4</sup> Ale vara ha turu řilangi sohena, enia i pa eři vai na maurimim i jejea řuhu,

i pa mařivi na hinau řuhu tari, moiso ha pa sopo vejuveju hin te hinau na mauri kalesia.

<sup>5</sup> Pani vara te vonamim mo lelevosahia vara nona lelevosahi mo řihirihi purongo, enia i pa usia isan God, enia haratu mo hansohai isana tamlohi tari, mo sopo hitesatihi tea, ale enia i pa silea isana. <sup>6</sup> Pani i pa usia isana na rasua moiso i sopo řomkaka matana, matan vara tea mo lo řomkaka, enia mo sohena suhusuhu na tasi, langi mo lo serea mo lo pulahia. <sup>7</sup> Matan tamlohi atu i pa sopo řomřomia vara i pa lavi te hinau isan Moli, <sup>8</sup> matan enia tamlohi řom rua matea, enia řomina mo sopo matea na posina tari.

### *Tamlohi Tilavono Peresi Na Tamlohi Tavitav*

<sup>9</sup> Ale vorai atu na rasua sei mo tamlohi purongo i pa eři retihapahapa matan God mo tahea aulu, <sup>10</sup> ale haratu mo tavitav i pa eři retihapahapa matan God mo taua atano, matan enia mo sohena vira řuvu matea, enia i pa tihai. *Isa 40.6–7*

<sup>11</sup> Matan alo mo vele peresi na langina tutuni, ale mo vai na řuvuřuvu peresi na virana la mahoa, la jovi, ale majhira řuhuřuhu la tihai, ale i pa sohena isana tamlohi tavitav sei la lo tutungui na nora tavitav, la pa tihai.

### *Hinau Mo Vaihite Na Tamlohi*

<sup>12</sup> Avulahi isana tamlohi mo turu řilangi tarea na rani vaihite, matan vara i jeu la vaihite atu, God i pa silea na volina sei enia mauri tui mo usuri na nona retitauhi isan la haratu la lo opoia.

<sup>13</sup> I pa sopo tea mo lo toho na vaihite i eři vereea vara, “God mo lo vaihiteau!” Matan mo sopo te hina sasati hatea i eři vaihite God, ale God mo sopo vaihite te tamlohi. <sup>14</sup> Pani vaihite la vora usuri na masalon tamlohi hasena purongo, la lo reve nařihia, ale la lo haluhalu, <sup>15</sup> moiso, masalona atu mo ulua na lolona, ale hehe mo vora hinia, ale na rani hehe atu mo tavera mo řuhu, mo vasusui na mateia.

<sup>16</sup> La voraiku peresi na vevoraiku řuhuřuhu, ha sopo jalio na

řomimim. <sup>17</sup> Ha lo levosahia vara otori řuhuřuhu tari peresi na otori la tataholo řuhu tari, la tai na tuka, la tai isan Tama memera aulu, la sinai atano. Ale enia mo sopo sohera matan mo sopo posposi, ale mo sopo te řořona. <sup>18</sup> Ale na masalona, mo vaiřa řa vora na retivarařuhu matan vara řa pa mai sohena vora tiroma na nona vavahinau tari mo lo vaira.

### *Ha Vaia Ha Sopo Rongoa Purongo*

<sup>19</sup> La voraiku peresi na vevoraiku řuhuřuhu, ha levosahi harihi; ha tatamahu i řuhu vara ha tapurongo, pani ha sopo vilavila mata retireti teni lolokoru. <sup>20</sup> Matan posposi tataholo atu God mo opoia, mo sopo vora na lolokoru nona tamlohi. <sup>21</sup> Matan haratu, ha pulahi nařihi na posposi lumiha peresi na posposi sasati tari na maurimim, ale na řomatano, ha lavi reti atu God mo lavoa na mapumim moiso sei i eři juri na maurimim.

<sup>22</sup> Ale nake, ha mai tamlohi mata vai na sava reti mo vereea, ale ha sopo tamlohi mata tapurongo purongo sei la lo hase halura. <sup>23</sup> Matan vara tea enia mata tapurongo na reti purongo, ale mo sopo mata vaia, enia mo sohena tamlohi matea mo lo kilau na nahona na titiro, <sup>24</sup> matan enia mo lo kilau na niniuna, ale vara mo mele malue, ale vahatea purongo, mo řomaliho vara enia mo sohena sava. <sup>25</sup> Pani haratu mo lo kilakilau usuri na Leu řuhuřuhu non God mo řuhu, leu atu mo vaia mo materi, ale vara i lo vai na sava leu mo lo vereea, ale i sopo řomaliho na sava mo rongoa, God i pa leřuhu hinia na nona vavahinau.

<sup>26</sup> Vara tea mo řomřomia vara mo lo usuri na mauri tataholo, pani mo sopo vaitataholoi na memena, enia mo lo halu na mapuna, řomřomi mata mauri tataholo non tamlohi nike, mo sopo řuhu hin te hinahate. <sup>27</sup> Mauri tataholo varařuhu sei mo vokevoke na nahon God Tama, enia mo sohen harihi: vara o kilau mamahuni na natu mařua peresi na malepu na nora rani řilangi, ale vara o toho asau na posposi varama.

## 2

### *Ha Sopo Tametame Na Tamlohi*

<sup>1</sup> La voraiku peresi na vevoraiku, ha sopo tametame tea na mauri mata rasua hin nořa Moli Iesu Křisto, enia Moli mata hasohaso tavera jea.

<sup>2</sup> Matan vara te tamlohi la unu na nomim matavuhi, ale matea enia mo tau na gold ring na limana mo ru na ruru řuhu, ale tamlohi tinapua matea mo tilavono mo unu sohena, pani nona ruru mo mařařari, <sup>3</sup> ale vara ha sile na ololo hin haratu sei mo ru na ruru řuhu, ha vereea isana vara, "Tamlohi tavera, o sakele hin jara řuhu nike!" Pani isan haratu sei mo tilavono ha vereea vara, "O turu purongo sevano, teni o sakele purongo nike atano na paloku."

<sup>4</sup> Harakerihi, enia posposi matahi isamim hasemim, ka mai ka tamlohi aria la lo ari na řomřomi sasati.

<sup>5</sup> La voraiku peresi na vevoraiku řuhuřuhu, ha tapurongo isaku, God mo viřoni la haratu la tilavono na varama vara la pa tavgav na nora rasua, ale la pa lavi mauri atu God mo aulu hinia sei mo retitauhi hinia moiso isan la haratu la opoia. <sup>6</sup> Pani ka lo kilau purongoi na tamlohi tilavono. Mo sopo la haratu sei la tavgav natu, la lo sile na rani řilangi isamim, teni la lo reve kamim ka vano na court? <sup>7</sup> Mo sopo enira natu sei la lo veresatihi na hijan Křisto sei ka lavia?

<sup>8</sup> Pani vara ka lo ololo hin Leu atu mo aulu na Retitapu sei mo vereea vara, 'O opoi na tamlohi la lo toho řalihio sohen ko lo opoiho hasem.' *Lev 19.18* <sup>9</sup> Pani vara ka lo tametame na tinapua, ka lo vai na hehe, ale Leu mo vereea vara ka tamlohi tope na Leu.

<sup>10</sup> Matan hare mo lo ololo na leu tari, pani mo tope matelete purongo, enia mo ori na leu tari. <sup>11</sup> Matan haratu mo vereea mara, 'Ha sopo vaivaileu peresi na tinapua mo lahi moiso!' Enia haratu mo vereea mara, 'Ha sopo vili na tamlohi!' Vara ka sopo vaivaileu peresi na tinapua, pani ka vili na tamlohi, kamim ka mai tamlohi matea mata tope na Leu

moiso. *Exo 20.13-14; Deut 5.17-18*  
<sup>12</sup> Ale ha retireti, ale ha hahau sohen la haratu sei la pa lavi na aria non Leu mata materi. <sup>13</sup> Matan vara God i ari na tamlohi, i pa sopo řomopoi tea sei mo sopo eři řomopoi na tinapua. Matan řomopoia mo vuni na aria non God.

### *Rasua Peresi Na Vaivaina*

<sup>14</sup> La voraiku peresi na vevoraiku, mo řuhu sohena sava vara tea mo lo vereea vara enia tamlohi rasua, pani mo sopo te vaivaina? Nona rasua i eři juria teni i vono? <sup>15</sup> Vara te vorai teni te vevorai hatea mo sopo te nora ruru teni te hara hinau, <sup>16</sup> ale vara te vonamim matea mo vereea isana mara, “Mo řuhu, o vano, God i pa leřuhu hiniho, o pa sopo hamariri, o pa sopo marohati!” Pani ko sopo sile te hinau hatelete isana matan vara i tueni na epena, sava hinau mo řuhu hinia?

<sup>17</sup> Ale rasua mo lo toho hasena vara mo sopo te vaivaina, enia mo mate.

<sup>18</sup> Pani tea i pa vereea vara, “Engko nom rasua, pani enau na lo vai na hinau matuvana!” Ale a pa vereea isana vara, “O vujangiau na nom rasua mo sopo te vaivaina, ale a pa vujangiu na noku rasua na noku vavahinau.”

<sup>19</sup> Ko rasua vara God enia matelete, haratu mo tataholo, varařuhu tanume sasati sohena la rasua, ale la matahu tavera la lo savaravara matana.

<sup>20</sup> Pani ko lo opoia vara a vujangia isam, tamlohi rongorongono vono, vara rasua mo sopo te vaivaina enia hina purongo.

<sup>21</sup> Ko levosahia vara Abraham tamařa mo tataholo na nahon God mata vaivaina, hin rani atu mo sile natuna Isaac na votavota isan God?

<sup>22</sup> Ko hitea vara nona rasua mo sořotahi peresi na nona vavahinau, ale nona vavahinau mo mařivisi na nona rasua, <sup>23</sup> ale mo mařivisi na Retitapu sei mo vereea vara, ‘Ale Abraham mo rasu God, ale God mo vereea vara enia mo tataholo na nahona matana’. *Gen 15.6* Ale matana, la tovia tapalan God. *Isa 41.8*

<sup>24</sup> Ka hitea, tamlohi mo tataholo na nahon God na nona vavahinau, mo sopo mata rasua hasena purongo.

<sup>25</sup> Ale sohen haratu purongo Rehab, hařai malele atu, mo tataholo na nahon God na sava mo vaia, matan enia mo lavi la vahařule atu na imana, moiso mo verera na malele tinapua vara la mele malue hinia. <sup>26</sup> Matan sohena, epe tamlohi mo mate vara tanumena mo malue hinia, ale rasua mo mate vara mo sopo te vaivaina.

## 3

### *Ha Lo Kilau Na Nomim Retireti*

<sup>1</sup> La voraiku peresi na vevoraiku, mo sopo řuhu vara kamim vao tavera ha mai ha tamlohi vujangi, matan ha lo levosahia vara na rani aria, God i pa ari řilangi kamam tamlohi vujangi i jeu na tamlohi purongo.

<sup>2</sup> Matan enřa mo isoiso řa jalio na malele matuvana, ale vara tea mo sopo jalio na sava mo lo vereea, enia tamlohi tataholo matan i eři taurilati na epena tari. <sup>3</sup> Vara řa tau na bit na jingo hos matan vara la ololo hiniřa, řa eři posi vevuhi na epera sohena. <sup>4</sup> Ha řomřomia, lanis sohena, la tavera hina purongo vara langi řilangi mo lo sohaira vara i vano, pani stiana rihirihi atu i eři posi lanis tavera atu i vano na sava jara tamlohin lanis atu mo opoia. <sup>5</sup> Sohen haratu purongo, meme tamlohi enia mo rihirihi purongo, pani i eři retimangisi i tavera jea.

Ha řomřomia vara te tanume hapu rihirihi hatea purongo i eři suli na urata tavera. <sup>6</sup> Ale meme tamlohi enia hapu, hina sasati tari matan varama nike la mařivi matana, enia hina rihirihi purongo na epeřa, pani mo sati mo jeu na epeřa tari, ale mo jilangi na malele mauri mo isoiso, matan hapu sei moruhapu mo lo polopoloa.

<sup>7</sup> Matan tamlohi la eři taurilati na maji tari sohena maji jala, maji haraho, maji avuavu peresi na maji tasi, ale tamlohi la taurilatira moiso, <sup>8</sup> pani tea i sopo eři taurilati na

memena. Enia hina sasati matea mo sopo eři toho malum, mo mařivi na poison sei mo sile na mate. <sup>9</sup> Ra haso-haso God Tamařa hinia, ale hinia řa lo veresatihi na tamlohi sei God mo vaira la tataholo na nahona. *Gen 1.26* <sup>10</sup> Hin jingo atu matea purongo, leřuhu peresi na lesati la lo malue hinia. La voraiku, hinau atu mo sopo tataholo vara la sohen haratu. <sup>11</sup> Wai peresi na tasi la eři tia vutvut hin te patu wai hatea purongo? <sup>12</sup> La voraiku peresi na vevoraiku, pulo fig i eři vua olive teni grape i eři vua fig? Mo sohena purongo, paltungu tasi matea i sopo eři sile na wai purongo.

#### *Lelevosahi Atu God Mo Silea*

<sup>13</sup> Hare isamim enia tamlohi lelevosahi matea, ale mo levosahi mamahuni na hinau? Vara tea, na nona posposi řuhu, mo řuhu vara i vujangi na nona vavahinai sei la vora mata nona posposi řomatano usuri na lelevosahi varařuhu. <sup>14</sup> Pani vara ha mařivi na mereimerei sasati, ale ka lo řomřomi kamim hasemim na mapumim, ha sopo retihapahapa, ale ha sopo turuleji na retivarařuhu. <sup>15</sup> Lelevosahi sohen harihi mo sopo tai na tuka, pani enia mata varama, enia nona tamlohi purongo, enia mo tai isana tanume sasati. <sup>16</sup> Matan vara sava jara mereimerei peresi na posposi řomřomi kamim hasemim mo lo toho ea, patumasa peresi na posposi sasati tari la pa toho hinia.

<sup>17</sup> Pani lelevosahi matan tuka, tiroma hinai hinia, enia mo sopo te řomsati hinia, mo usuri na posposi tamata, mo usuri na posposi řomřuhu, mo oloolo, mo mařivi na řomopoia, ale vuana řuhu mo mařivi, mo sopo tametame tea, ale mo varařuhu. <sup>18</sup> Ale tamlohi sei la lo vai na tamata, la pa lavo na piri mata tamata, ale la vu na astauni řuhuru.

## 4

#### *Ha Mai Mařiviti Isan God*

<sup>1</sup> Sava hinai enia pulo nomim vauriuri peresi na nomim vasvas? Pula enia masalomim sei la lo valum na lolomim. <sup>2</sup> Ka řomusuri te hinai,

pani ka sopo eři lavia, ale matana, ka vilimatei na tamlohi. Ka řomijea hin te hinai nona tinapua, ale ha sopo eři lavia, ale matana, ka valum, ale ka vasvas. Ka sopo lavi te hinai matan ka sopo usia isan God. <sup>3</sup> Ka usia, pani ka sopo lavia matan ka lo usia na řomřomi sati matan vara ha pa jalahia na masalomim.

<sup>4</sup> Ka tamlohi vaivaileu! Ka sopo levosahia vara ha tapala peresi na varama i pa vai kamim ha meresahi isan God? Matana, hare mo opoia vara i tapala peresi na varama, mo hasena vaia mo meresahi isan God. <sup>5</sup> Teni ka lo řomřomia vara Retitapu mo vere purongoi vara, 'Romin God tari mo lo toho na Tanumena sei mo taua hiniřa?' <sup>6</sup> Pani God mo mele sile na řomřuhu mo jeu tiroma. Matan Retiulia mo vere vara,

'God mo lo turuhoro  
na tamlohi hapahapa  
pani mo sile na řomřuhu  
isan la haratu la řomatano.' *Pro 3.34*

<sup>7</sup> Matan hinai atu, ha hase tau kamim na ruhuruhun God. Ha turuhoro Tiapolo, ale enia i pa rovo isamim. <sup>8</sup> Ha mai mariviti isan God, ale enia i pa mai mariviti isamim. Ha sopo lavi na hina lumiha na maurimim, ka tamlohi hehe, ale ha onehi na mapumim la vokevoke, ka tamlohi řom rua. <sup>9</sup> Ha řomsati mata nomim hehe, ha tangtangi, ale ha tangi. Ha vai na nomim mana i mai tangtangi, ale nomim avulahi i mai řomsati. <sup>10</sup> Ha hase tau kamim atano na nahon Moli, ale enia i pa tahe kamim.

#### *Ha Sopo Ari Na Tamlohi*

<sup>11</sup> La voraiku peresi na vevoraiku, ha sopo veresatihi kamim hatehateahi. Haratu mo lo veresatihi na voraina matea teni mo lo ari na voraina, enia mo lo veresatihi na Leu, ale mo lo ari na Leu. Pani vara ka lo ari na Leu kamim ka sopo tamlohi vai na Leu, pani ka tamlohi ari na Leu. <sup>12</sup> God purongo mo sile na Leu, ale enia tamlohi aria, enia natu, i eři juri, ale i eři komo. Pani kamim

hare matan vara ha pa ari na tamlohi la lo toho řalihi kamim?

### *Ha Sopo Hapahapa*

<sup>13</sup> Ha tapurongo, la haratu la lo vereea vara, “Nohorihi teni pavuho řa pa vano hin te taon tavera nike, teni atu matan te tauni hatea, ale řa pa turuhi te bisnis atu mata lavi te mania tavera!” *Pro 27.1*

<sup>14</sup> Pani ka sopo levosahia vara sava i pa masese isamim pavuho? Maurimim enia sava? Matan ka sohena haravu na urata mo sinai mo toho makomona, ale mo mele tihai. <sup>15</sup> I pa mele řuhu vara ha vereea sohen harihi, “Vara na masalon Moli, řa pa mauri, ale řa pa haranike teni harasevano.” <sup>16</sup> Pani mo sohena natu, ka lo retimangisi na sava ha pa vaira. Retihapahapa tari sohen harihi enia hina sasati.

<sup>17</sup> Matan haratu, hare mo levosahi na hinau tataholo vara i vaia, pani mo sopo vaia, enia hehe isana.

## 5

### *Retiřoařoahai Isana Tamlohi Tavgav*

<sup>1</sup> Ha tapurongo! Kamim tamlohi tavgav, ha tangi na tangtangi matan la rani řilangi atu la lo mai isamim. <sup>2</sup> Nomim tavgav la řovo moiso, ale nomim ruru řuhu pepe la hatiřarihira moiso. <sup>3</sup> Nomim gold peresi na silver la řaeha moiso, ale řaehara la pa pisuhi kamim, ale la pa hani na epemim sohena hapu. Ka pete takonahi na tavgav mata pongi hitahu moiso. <sup>4</sup> Ka hitea, voli nomim tamlohi voko sei la lo vu na isamim, ka taurilati na sopena, mo lo tangi matamim, ale tangi nona nomim tamlohi vu na isamim, mo tikeli na peron Moli Suiha Tavera Jea. *Deut 24.14-15*

<sup>5</sup> Ka lo mauri hin varama nike na masalomim peresi na nomim posposi řomřomi hasemim purongo. Mapumim la řavisvis na rani mata vilimatei na tamlohi. <sup>6</sup> Ka sile na talai, ale ka vilimatei na tamlohi tataholo sei la sopo turuhoro kamim.

### *Ha Romperavu Na Nomim Rani Rilangi*

<sup>7</sup> Matan haratu la voraiku peresi na vevoraiku, ha řomperavu i tikeli rani atu Moli i mele mai hinia. Ka hitea sohena sava tamlohi isa mo lo saovi mata vua řuhuruhu mata lepa, mo řomperavu matana mo tikeli usa atu mo mai tiroma mo vano mo tikeli usa atu mo pa mai hitahu. <sup>8</sup> Ale kamim sohena, ha řomperavu. Ha vai na řomimim la turu řilangi matan mele mai non Moli mo lo mai mariviti.

<sup>9</sup> La voraiku peresi na vevoraiku, ha sopo retireti varihi hin kamim hatehateahi, matan God i pa ari kamim matana. Ka hitea! Tamlohi ari mo lo turu na matarua.

<sup>10</sup> La voraiku peresi na vevoraiku, sohena tovongi matea mata lavi na rani řilangi, ale mata řomperavu, ha řomřomi na přovet tuai sei la lo retireti na hijan Moli. <sup>11</sup> Ka hitea, řa lo řomřomi la haratu God mo leřuhu hinira sei la turu řilangi mo tikeli na isoisona. Ka pete rongoa sohena sava Job mo turu řilangi moiso, ale ka hitevosahi na řomřomi non Moli hinia moiso, ale sohena sava Moli mo vujangi na nona opoia peresi na nona řomopoia. *Job 1.21-22; 2.10; Psa 103.8*

### *Ha Retireti Varařuhu*

<sup>12</sup> Pani aulu hin la hinau sei la voraiku peresi na vevoraiku, ha sopo retitauhi hin te hinau na tuka teni na varama teni hin te hinau tinapua, pani vara ka vereea vara ‘io’, ale ha vaia, ale vara ka vereea vara ‘mo vono’, ale ha sopo vaia, matan vara ha sopo lavi na talai matana. *Mt 5.34-37*

### *Suiha Mata Usiusi*

<sup>13</sup> Te vonamim mo lo lavi na rani řilangi? I pa usiusi matana. Te vonamim mo avulahi? I pa hasohaso God na vete matana.

<sup>14</sup> Te vonamim mo rojo? I pa usi na patu tamlohi na vao kalesia vara la mai la usiusi isan God matana. La pa tau surei na wel hinia na hijan Moli. <sup>15</sup> Ale usiusi na rasua i pa juri haratu mo rojo, ale Moli i pa tahea. Ale vara mo vai te hehe, God i pa řomia.

<sup>16</sup> Matan haratu, ha taviti na nomim hehe isamim hatehateahi, ale ha usiisi matamim hatehateahi matan vara ha pa mele řuhu. Usiisi nona tamlohi tataholo matea, sui-hana mo tavera jea vara mo lo usiisi. <sup>17</sup> Elijah, enia tamlohi matea maurina mo soheřa purongo, ale mo usiisi řilangi matan vara i sopo usa, ale mata tauni mo tolu vitu mo limarave, usa mo sopo jovi na lepa. *1Ki 17.1; 18.1*

<sup>18</sup> Moiso mo mele usiisi, ale usa mo mele jovi na tuka, ale isa la mele lavi na vuara. *1 Ki 18.42-45*

*Ha Tueni La Haratu La Jovi*

<sup>19</sup> La voraiku peresi na vevoraiku, vara te vonamim hatea mo jalio na retivararřuhu, ale tea mo mele lavia mo mai, <sup>20</sup> enia i pa levosahia vara hare mo lavi na tamlohi hehe matea mo jalio mo mele mai, i pa juri na maurina na mateia, ale i pa tavuhoro na hehe matuvana. *Pro 10.12; 1Pe 4.8*

## 1 Peter Tiroma Leta Peter Mo Ulia Leta Nike

Hin leta nike Peter mo sorahi mauri atu mo lavi na rani řilangi nona kalesia hinia. Mo vujangia vara hin malele atu Moli mo lo vaihite na rasua nona nona tamlohi hinia. Leta nike mo lo vano isana kalesia tari sei la lo toho řalihi na jara matan Asia Minor. Tamlohi la sopo rasu Iesu, la sile na rani řilangi isara, ale Peter mo vereea vara la pa tatamahu mata turu řilangi matan la pa mele lavia.

Peter mo retituetuenira na nora rani řilangi, ale mo vereea mara mo tataholo vara la avulahi matana, matan vara la jeua God i pa silera na otori řuhu hin rani atu vara Iesu i mele pala na varama (1.6-7).

Peter mo vereea isara mara Křisto sohena mo lavi na rani řilangi na varama, i pa tataholo vara nona tamlohi usuri la lavia pani mata posposi tataholo purongo, mo sopo mata posposi sasati (2.18-25; 4.12-17).

Matan Křisto sohena, mo lavi na rongohaji na rani mo mate mata nořa hehe vahatea mata rani tari, enia mo sopo lo hehe hin te rani, pani mo mate mata tamlohi hehe matan vara i eři laviřa řa mai isan God. Epena mo mate, pani mo mele turu, mo mauri na suihan Tanumen God. (3.18)

### Hin leta nike

1. Retioloolo peresi na usiusi (1.1-2)
2. Hinau mata řomtoho (1.3-12)
3. Hahau usuri na posposi tapu non God (1.13-2.17)
4. Tovongi non Křisto (2.18-25)
5. Rani řilangi nona kalesia (3.1-4.19)
6. Retituetueni mata patu tamlohi kalesia (5.1-11)
7. Isoiso retioloolo (5.12-14)

<sup>1</sup> Enau Peter, vahařule matea non Iesu Křisto, na lo uli leta nike, mo vano isan la haratu God mo viřonira la lo toho sohena vinano na province matan Pontus, Galatia, Cappadocia,

Asia peresi Bithynia, <sup>2</sup> God Tama mo pete viřoni kamim tuai moiso usuri na masalona, ale Tanumena mo tapuhi kamim mata mauri tapu, ale matana, ka lo ooloo hin Iesu Křisto, ale řaena mo vai kamim ka vokevoke. Romřuhu peresi na tamata la pa mařivi savulevule hin kamim.

### Mauri Tui

<sup>3</sup> Ooloo tavera isan God sei Taman nořa Moli Iesu Křisto! Na nona řomopoia tavera mo vaiřa řa mele vora, ale nořa řomtoho mo lo mauri, mo mauri matan Iesu Křisto mo sauteterahi na mateia, <sup>4</sup> ale God mo tau mamahuni mauri atu sei mo řuhuřuhu jea matamim na tuka sei i pa sopo eři řovo, i pa sopo eři komo, ale i pa toho jejeu, <sup>5</sup> ale God na nona suiha tavera mo lo matahi kamim na malele mata rasua, i vano i tikeli rani atu i vujangi mauri řuhuřuhu atu mo tatamahunia moiso matamim na pongi hitahu. <sup>6</sup> Ale harihi natu, mo vai kamim ka avulahi tavera, hina purongo vara nake God mo opoia vara ha pa lavi te rani řilangi matan te makomo rani, <sup>7</sup> rani řilangi tinatinapua la pa lo vaihite na nomim rasua vara mo řilangi sohena sava. Nomim rasua enia hina řuhu matea mo jeu gold atu sei la sulia na hapu mata řuhina. Ale vara nomim rasua mo lo turu, ha pa lavi na hasohaso peresi na hija řuhu peresi na ooloo tavera hin pongi atu Iesu Křisto i pala hinia, <sup>8</sup> hina purongo vara ka sopo lo hitea hin te rani, ale ka sopo hitea nakerihi, pani ka lo opoia, ale ka lo rasua, ka lo avulahi tavera jea matana, avulahi tavera atu na mapumim mo sopo tea i eři vereea, <sup>9</sup> mata vua nomim rasua enia maurimim la pa juri. <sup>10</sup> La přovet atu tuai sei la lo retimangovi na hina řuhuřuhu sei vara la pa nomim, enira la alea, ale la vaihite mamahunia, <sup>11</sup> la opoia vara la levosahia vara sava tamlohi natu, teni pongi tataholo natu, Tanumen Křisto hinira mo lo vereea, matan mo lo vereulia tuai moiso vara rani řilangi atu non Křisto i pa sohena sava, ale hasohasona matan pongi hitahu atu la pa sohena sava.

<sup>12</sup> Ale God mo vereea isara vara la hinau sei la pa sopo masese isara, pani isamim nake, ale nake, God na tuka mo řule na Tanume Tapu vara i tueni la haratu la lo retivujavujangi na Retiřuhu isamim, la hinau sei angelo la opoia tavera vara la pa levosahi mamahunira.

<sup>13</sup> Matana, ha tatamahuni na řomimim mata vavahinau, ale ha hase taurilati kamim, ha tau vevuhi na nomim řomtoho hin řomřuhu atu sei i pa mai isamim hin rani atu Iesu Křisto i pa mele pala hinia. <sup>14</sup> Sohena natuvarihi la ooloo, ha sopo sarete vara ha mele sivo na masalomim matan tuai, <sup>15</sup> pani matan God atu sei mo tovi kamim enia mo tapu, ha tapu na nomim hahau. <sup>16</sup> Matan la ulia na Retiulia moiso vara, 'Ha pa tapu, matan enau na tapu'. *Lev 11.44*

<sup>17</sup> Ale sohena ka tovia Tamamim, ha lo levosahia vara enia mo sopo tametame tea na nona aria mata vavahinau nona tamlohi hatehateahi, i pa řuhu isamim vara ha hahau na nahona na ooloo tavera jea tarea matan nake ka lo vinano hin varama nike, <sup>18</sup> ka levosahia vara mo volituhu kamim na nomim posposi řomvono sei ka lavia isana pimim tuai. Mo sopo volituhu kamim na hinau la eři řovo sohena silver teni gold, <sup>19</sup> pani mo volituhu kamim na řaen Křisto, volina mo aulu jea, sohena řae natu sipsip matea mo vokevoke řuhu jea. <sup>20</sup> God mo viřonia tiroma na pulo varama, pani mo pa vuhesia na isoiso rani matamim, <sup>21</sup> hin Křisto kamim ka lo rasu God, mo sauteterahi Křisto na mateia, ale mo silea na hasohaso tavera matan vara nomim rasua peresi na nomim řomtoho la pa lo toho isan God. <sup>22</sup> Maurimim la vokevoke matan ka ooloo na retivarařuhu, ale matana, ha opoiopoi kamim varařuhu, ale ha opoiopoi kamim i řilangi na mapu vokevoke, <sup>23</sup> matan ka mele vora paro, mo sopo na piri mata řovo, pani hin haratu i pa sopo eři řovo matan enia reti mauri non God sei mo lo toho jejeu; <sup>24</sup> mo

verea vara, 'Tamlohi tari la sohena řuvuřuvu, nora hasohaso mo sohena vira řuvuřuvu. Ale vara řuvuřuvu mo mahoa, virana la pa jovi, <sup>25</sup> pani reti non Moli i pa toho jejeu.' *Isa 40.6-8* ale reti nike enia Retiřuhu atu sei la lo retivujavujangia isamim.

## 2

### *Vatu Atu Mo Mauri*

<sup>1</sup> Matan haratu, ha tau nařihi na posposi vaisatihi na tinapua tari, posposi halu tari, tapnetano, řomusuri peresi na retiřeřen tari, <sup>2</sup> ale sohena pipi matea mo pa vora, ha pa mařohu matan wai susu varařuhu atu Tanumen God mo lo silea, matan vara hinia, ha pa ulua na mauri řuhu sei ka juri hinia, <sup>3</sup> vara varařuhu ka inu rongorongo na řomřuhu non Moli moiso, <sup>4</sup> ale ka lo mai isan Křisto. Enia natu, vatu atu mo mauri, tamlohi la tipahia, pani God mo viřonia, mo řuhuřuhu jea, <sup>5</sup> kamim sohena, ka sohena vatu sei la mauri, God mo voro kamim sohena iman Tanume Tapu matea, matan vara ha pa vao přis tapu matea mata sile na silesilea sei God mo avulahi hinira hin Iesu Křisto. <sup>6</sup> Matan Retitapu mo lo vereea vara,

'Ka hitea, enau na lo tau na vatu matea hin Zion,\* enia tapulo pulo vatu sei na viřonia, mo řuhuřuhu jea, ale sava tamlohi mo tau na nona rasua hinia, řomina i pa sopo eři jovi hin te pongi matana.' *Isa 28.16*

<sup>7</sup> Ale matan haratu, isamim ka lo rasua, enia mo řuhuřuhu jea, pani isan la haratu la sopo rasua, Retiulia mo lo vereea vara,

'Vatu atu tamlohi voro ima la tipahia, enia mo mai tapulo pulo vatu mata ima.' *Psa 118.22*

<sup>8</sup> Ale, 'Tamlohi la pa tialahalaha hinia, enia vatu mata vai na tamlohi la jovi hinia.' *Isa 8.14*

La tialahalaha hinia matan la sopo ooloo na nona reti, la jovi sohen

\* **2:6:** Zion: Zion enia Jerusalem



haratu matan God mo taua sohena matara moiso.

<sup>9</sup> Pani kamim vao tamlohi matea God mo viřoni kamim isana vao tamlohi tinatinapua, ka vao pŕis matea la supe, ka vao tamlohi tapu matea, ka vao tavera matea God mo tapuhi kamim vara nona, matan vara ha pa vereuli na nona vavahinau řuhuřuhu matuvana, enia mo tovi kamim ka malue na řořoha, ale ka mai na nona malarani řuhuřuhu.

<sup>10</sup> ‘Tiroma ka sopo nona vao tamlohi matea, pani nake, ka tamlohi non God, tiroma ka sopo lavi te řomopoia, pani nake, ka lavi na řomopoia non God.’ *Hos 1.6, 9; 2.23*

<sup>11</sup> La tapalaku řuhuřuhu, kamim ka sohena vinano hin varama nike, ale na lo retituetueni kamim hinia vara ha toho asau na masalo sasati sei mo lo vai na vuro na maurimim.

<sup>12</sup> Ha vai na posposi tataholo na naho tamlohi řořoha, hina purongo vara la pa vereva vara kamim tamlohi sasati, matan la pa hite na nomim vavahinau řuhu, ale la pa tahe na hijan God aulu matana hin pongi atu vara mo pala.

### *Ha Sile Na Ooloo Isan La Haratu La Aulu*

<sup>13</sup> Ha vai Moli i avulahi tarea na nomim ooloo na tamlohi tari la aulu, vara isan te Supe nona mara Rome sei mo lo tauri na suiha, <sup>14</sup> teni isan te nona tamlohi tatavera sei mo lo řulera vara la sile na talai isan la haratu la vai te hehe, ale vara la sile na hasohaso isan la haratu la vai te vavahinau řuhu.

<sup>15</sup> Matan enia masalon God, vara ha vai na vavahinau řuhu matan i pa horo na řomvono non la haratu la rongorongo vono. <sup>16</sup> Ha lo toho sohena tamlohi materi, pani ha sopo řomřomia vara enia masapa matea mata vai te hina hehe, pani ha lo toho sohena volitusi non God. <sup>17</sup> Ha sile na ooloo isana tamlohi tari, ha opoi la haratu la rasua, ale ha matahun God, ha sile na ooloo isan supe matan Rome.

*Slev*

<sup>18</sup> Volitusi, ha hase tau kamim na liman nomim tamlohi tavera na nomim ooloo tari, mo sopo isan la haratu la řuhu teni la řommalum purongo, pani isan la haratu la tamlohi řilangi sohena. <sup>19</sup> Matan God mo avulahi hin kamim matan nomim řomřomi hin God mo vai kamim ka lo turu řilangi na rani ka lo lavi na rani řilangi mata nora posposi řilangi sei mo sopo matan te hinia ka vai mo sati. <sup>20</sup> Ka hite na sava hinia mo řuhu hinia vara ka lo turu řilangi na rani ka lavi na talai matan te nomim hehe? Pani vara ha vai na vavahinau řuhu, ale ha lavi na rani řilangi matana, pani ka turu řilangi hinia, haratu natu, God mo avulahi hin kamim matana.

<sup>21</sup> God mo tovi kamim matan harahi, matan Křisto sohena mo lavi na rani řilangi matamim, mo tau na tovongi matea vara ha pa eři usuri na palona, <sup>22</sup> enia mo sopo vai te hehe teni te halu i malue na jingona. <sup>23</sup> Na rani la lo veresatia, mo sopo kelera, ale na rani la silea na rongohaji, mo sopo talaira, pani tarea mo lo hase taua na liman God sei mo lo ari tataholo tarea. <sup>24</sup> Enia mo hasena lavi nařihi na nořa hehe na epena hin rani atu mo sevu na talopeilopei matan vara řa pa mate na nořa mauri hehe, ale řa mauri na posposi tataholo. Ka mai ka řuhu matan rongohaji atu mo lo lavia na epena. <sup>25</sup> Matan kamim ka jalio sohena sipsip, pani nake ka mele mai isan tavuimim, enia haratu mo lo matahi na maurimim.

## 3

### *Hařai Lahi*

<sup>1</sup> Ale sohena, hařai lahi ha toho na ruhuruhi suihan tuamim, hina purongo vara la sopo ooloo na reti non God, la pa rasua, mo sopo matan te reti ka vereva, pani hina posimim purongo, <sup>2</sup> vara la hite na nomim posposi vokevoke matan ka matahun God.

<sup>3</sup> Ha sopo řomřomia vara sava ka vaia na epemim purongo i pa vai kamim ha řuhu, vara hinia sohena peri vulu teni, tau na hinia

la vaia na gold, teni ka ruru na ruru ŋuhu, <sup>4</sup> pani ha ŋomŋomi na sava mo vai kamim ka ŋuhu na lolo mapumim i pa sopo eŋi ŋovo so-hena posposi ŋomatano, ale posposi malum, enira la ŋuhuŋuhu jea na nahon God, <sup>5</sup> matan tuai mo so-hena, haŋai tapu enira la haratu la lo ŋomtoho hin God, enira la hasera vaira la ŋuhu na nora posposi ololo isana tuara, <sup>6</sup> sohen Sarah mo ololo hin Abraham mo tovia mara 'noku tamlohi tavera'. Ale kamim ka mai venatuna tataholo vara ha lo vai na hina ŋuhu, ale ha sopo matahu, ha turu ŋilangi vara la ngurunguru hin kamim hin te hinahu mo sopo tataholo vara ha vaia.

### *Tamlohi Lahi*

<sup>7</sup> Tamlohi lahi, sohena, ha toho peresi na naroumim, pani ha sopo ŋomaliho vara enira la sopo ŋilangi sohemim, pani la malum matan enira haŋai. Ha sile na ololo isara matan enira sohemim, la lavi mauri paro atu God mo silea moiso, vara i vono, God i pa sopo rongu na nomim usi.

### *Kalesia Tari*

<sup>8</sup> Ale isoisona, kamim mo isoiso, ha matea na ŋomimim, ha ŋomŋomi na tinapua, ha opoiopoi kamim na ŋomopoia, ha ŋomatano, <sup>9</sup> ha sopo kele na posposi sasati teni te retileji, mo vono, pani ha leŋuhu, matan God mo tovi kamim vara ha pa lavi na nona leŋuhu. <sup>10</sup> Matan Retitapu mo vereva vara,

'Vara tea mo opoia vara i opoi na mauri, ale i hite na rani ŋuhu, i pa isoiso na nona retiretileji, ale i isoiso na nona retiretihalu; <sup>11</sup> i pa vahai na posposi hehe, ale i vai na vavahinau ŋuhu, i pa ale na tamata, i tutunguia.

<sup>12</sup> Matan, matan Moli la lo kilau la haratu la tataholo, ale perona la lo roi na nora usi.

Pani Moli mo lo turuleji isan la haratu la lo vai na hehe.'

### *Psa 34.12-16*

<sup>13</sup> Ale hare natu, i pa komo kamim vara ka opoia ŋilangi vara ha vai na

posposi ŋuhu? <sup>14</sup> Pani hina purongo vara ka lo lavi na rani ŋilangi mata nomim posposi tataholo, God i pa leŋuhu hin kamim matana. Ha sopo matahunira teni ha ŋomkaka. <sup>15</sup> Pani ha vai Kŋisto i Moli na maurimim, ale ha tatamahu terea mata ha ŋarami tea vara i usi kamim hin te retiusia vara ka lo ŋomtoho hinia mata sava. <sup>16</sup> Pani ha vaia na posposi malum peresi na ololo tavera, ha turu ŋilangi na posposi ŋuhu matan vara tea i veresatihi kamim matan te nomim vavahinau ŋuhu sei ka vaira hin Kŋisto, ale la pa mahanuhanu matana. <sup>17</sup> Vara masalon God mo sohena, mo mele ŋuhu vara ha lavi na rani ŋilangi mata nomim posposi ŋuhu ka lo vaira, mo jeua vara ha lavia mata posposi hehe.

<sup>18</sup> Matan Kŋisto sohena, mo lavi na rani ŋilangi na rani mo mate, mata noŋa hehe vahatea mata rani tari, enia mo sopo lo hehe hin te rani, pani mo mate mata tamlohi hehe matan vara i eŋi laviŋa ŋa mai isan God. Epena mo mate, pani mo mele turu, mo mauri na suiha Tanumen God.

<sup>19</sup> Ale hin suihana sei, mo sivo mo retivujavujangi isana tanume tamlohi sei God mo lo taurilatira na varama mata mateia, <sup>20</sup> isan la haratu sei la sopo ololo hin God na pongi tuai sei God mo lo saovira hin rani atu sei Noah mo lo voro na botina. God mo juri na tamlohi mo limaravtolu purongo hin wai tavei tavera atu. <sup>21</sup> Wai tavei atu, enia tovongi matea mata malele paptijo vara i juri kamim usuri na suiha sauteterahi non Iesu Kŋisto. Paptijo enia tovongi matea mo sopo hoje naŋihi na lumi epemim purongo, pani mo sohena ŋomtauhi ŋuhu matea ka lo vaia na ŋomimim ŋuhu isan God. <sup>22</sup> Ale Kŋisto sei mo sahe na tuka, mo lo tauri na suiha non God na tavaluna, ale angelo peresi la haratu la lo tauri na suiha peresi la haratu la ŋilangi, enira mo isoiso la lo toho na ruhuruhuna.

## 4

<sup>1</sup> Ale, matan Kŋisto mo lavi na rongohaji na epena, ha tau na ŋomimim

vara ha lavi na rongohaji sohen Křisto, matan haratu mo tatamahu vara i lavi na rongohaji, mo isoiso na hehe, <sup>2</sup> matan vara nake, i pa sopo usuri na masalona, pani i pa usuri na masalon God purongo i tikeli na isoiso maurina. <sup>3</sup> Matan tauni matuvana moiso, ka lo vai na opoia nona masalo tamlohi řořoha, sohena nora posposi viriu, la lo usuri na řomřomi lumiha, la lo putu na wai řilangi, la lo matavuhi mata lavilavi na tinapua, la lo matavuhi mata inu na wai řilangi, la lo vai na vaivaileu na nora lotulotu vono, <sup>4</sup> hin harihi, enira la vereva vara kamim ka tinapua, matan ka sopo mele vano peresira na nora posposi lumiha sei, mo mai sohena wai tavei, ale la lo veresatihi kamim matana, <sup>5</sup> pani enira la pa turu na nahon haratu sei mo tatamahu vara i ari la haratu la mauri peresi la haratu la mate. <sup>6</sup> Varařuhu, matan hinau atu natu, Křisto mo retivujavujangi na Retiřuhu isan la haratu la mate moiso, hina purongo vara la lavi na talai mata mate na epera, pani la pa eři mauri sohen God mo lo mauri.

<sup>7</sup> Nake, isoiso hinau tari mo lo mai mariviti; ale matana, ha hase taurilati kamim hasemim, ale ha tatamahu mata nomim usiusi, <sup>8</sup> hina aulu hin la hinau sei, enia vara ha opoiopoi kamim i řilangi, matan opoia mo kamoti nařihi na hehe matuvana. <sup>9</sup> Ha roi na imamim isamim hatehateahi, ale ha sopo ngutungutu matana.

<sup>10</sup> Ale sohen kamim hatehateahi ka lavi na otori isan God moiso, ha tuetueni kamim hinira, sohena volitusi řuhu sei la lo kilau na otori řuhu matuvana non God; <sup>11</sup> vara tea nona enia mata i retivujavujangi, i pa reti sohen God mo lo retireti hinia, ale vara tea nona enia mata i tuetueni, i pa vaia hin suiha atu God mo silea isana, matan vara na hinau tari, God i pa lavi na hasohaso hin Iesu Křisto. Isan Křisto hasohaso tavera, ale suiha i pa toho na limana mata pongi tari tui tui. Amen.

*Mauri Rilangi Nona Kalesia*

<sup>12</sup> La tapala řuhuřuhu, ha sopo mařurahi hin te rani sasati mata vaihite kamim. Ha sopo hitera sohena hina mařurahi hai la pala isamim, <sup>13</sup> pani ha avulahi jea na rani ka lo lavi na rani řilangi sohen Křisto mo lavia, matan vara ha pa avulahi i tavera jea sohena hin rani atu hasohasona i pala na naho tamlohi.

<sup>14</sup> Vara tamlohi la veresatihi kamim matan ka lo lavi na hijan Křisto, kamim la haratu sei la pa lavi na leřuhu, matan Tanume mata hasohaso tavera sei enia Tanumen God, mo lo taua isamim. <sup>15</sup> Pani i sopo tea isamim i lavi na rani řilangi mata mo ori sohena tamlohi vili tamlohi matea teni te tamlohi vavanaho matea, teni te tamlohi lejileji matea, teni sohena tamlohi matea mo lo sohai na ngalsuna na hinau nona tinapua. <sup>16</sup> Pani vara tea i lavi na rani řilangi matan enia kalesia matea, i pa sopo mahanuhanu matana, mo vono, pani i pa tahe na hijan God aulu na hijan Křisto. <sup>17</sup> Matan nake, aria i pa tapulo na lolo vaon God tiroma; ale vara i tapulo hiniřa tiroma, i pa sohena sava isan la haratu la sopo ooloo na Retiřuhu non God? <sup>18</sup> Ale, 'Vara mo řilangi jea vara tamlohi tataholo la eři juri,

i pa sohena sava isan la haratu la lo usuri na posposi varama teni la haratu la lo hehe?' *Prov 11.31*

<sup>19</sup> Ale isan la haratu la lo lavi na rani řilangi mata masalon God, mo tataholo vara na nora hahau tari la tau na maurira na limana matan enia mo lo řomturu řilangi tarea.

## 5

<sup>1</sup> Ale matan haratu, na opoia vara a sile na retituetueni isana patu tamlohi rasua isamim. Enau patu tamlohi rasua matea sohemim, na hitea sohena řava Křisto mo lavi nona rongohaji, ale enau sohena a pa lavi na hasohaso tavera atu God i pa vujangia i pa sopo tuai, <sup>2</sup> ha tavui řuhu mata sipsip non God sei enia mo taura na limamim, ha kilau mamahunira na řomavulahi sohen God mo opoia, mo sopo matan

vara tea mo ngurunguru hin kamim matana; mo sopo mata mania, pani mata nomim řomavulahi, <sup>3</sup> ha sopo vaia i řilangi isan la haratu la lo toho na ruhuruhi limamim, pani ha vai na tovongi řuhu isana sipsip. <sup>4</sup> Ale hitahu vara Patu Tavui sipsip i pala, ha pa lavi na řongořongo nona supe sei řuhuřuhuna i pa sopo eři tihai.

<sup>5</sup> Ale kamim uluvou, ha ololo hin la haratu la kalesia vajiaha. Kamim mo isoiso ha ruru na posposi řomatano, matan 'God mo lo turuleji hin la haratu la lo mangisi,

pani mo lo tueni la haratu la lo řomatano.'

*Prov 3.34*

<sup>6</sup> Ale matana, ha řomatano, ha toho na ruhuruhi suiha tavera liman God matan vara na rani tataholo i pa tahe kamim aulu. <sup>7</sup> Ha sile vevuhi na nomim řomkaka isana matan enia mo lo kilau kamim.

<sup>8</sup> Ha tatamahu, ha lo kilau matan nomim meresahi Tiapolo, enia mo lo řalihi sohena paheu matea mo lo aleale tamlohi vara i hanira.\* <sup>9</sup> Ha turuhoroa, ale ha turu řilangi na nomim rasua. Ha levosahia vara voraimim řalihi na varama sohena la lo lavi na rani řilangi tinatinapua sohen harihi.

<sup>10</sup> Ale ha pa lavi na rani řilangi mata makomo rani purongo, ale hitahuna, God mata řomřuhu tari, haratu sei mo tovi kamim ka mai na lolo hasohaso tavera non Iesu Křisto mata rani tui tui, enia hasena i pa vai mamahuni kamim, ale i pa vai kamim ha turu řilangi na nomim rasua, ale i pa vai kamim ha řilařilangi na mapumim, ale i pa vai kamim ha sopo eři juha na nomim rasua. <sup>11</sup> I pa tauri na suiha mata rani tui tui tarea, amen.

### *Isoiso Retioloolo Non Peter*

<sup>12</sup> Silas†, vorai sei mo sopo lo tope na nona retitauhi hin te rani na noku kilakilau, mo tueniau vara a uliuli isamim vara a pa vere vujavujangi kamim, ale vara a vereulia vara

řomřuhu varařuhu non God mo sohen harihi. Ha turu řilangi hinia.

<sup>13</sup> Ale la haratu la rasu nike Rome, harasei God mo viřonia sohemim, enira sohena la sohai na retioloolo isamim, ale natuku Mark sohena, mo sohaia isamim.‡ <sup>14</sup> Ha tapata-pai kamim hatehateahi na retioloolo mata opoia.

Tamata isamim tari sei ka tamlohi non Křisto.

\* **5:8:** paheu: Peter mo vere na lion nike. † **5:12:** Silas: hin Greek la ulia hija sei vara Silvanus, pani enia Silas sei tapalan Paul. ‡ **5:13:** 5.13 Rome: Peter mo lo vere Babylon, Rome enia retilulu matea matan Babylon.

## 2 Peter Harua Leta Peter Mo Ulia Leta Nike

Peter mo ulia vara kalesia la pa hahau sohen God mo opoia na maurira (1.3), ale vara la pa taurilati na retivaraŕuhu sei la lavia moiso (1.12).

Mo retiŕoaŕoahaira mara vara pŕovet peresi na tamlohi vujangi haluhalu la unu na vao kalesia matan vara la tikaulejira na retivaraŕuhu, pani Moli i pa sile na talai isana tamlohi sohen haratu (2.1-22). Kalesia la pa turu ŕilangi hin la rani atu, la pa hahau na mauri tataholo ale la pa tovongi na tovongi ŕuhu. La pa hase taurilatira, ale la usuri na malele lelevosahi, peresi na ŕomperavu, ale vujangi na posposi opoia isana tamlohi tari.

Hina purongo vara tamlohi na varama la sopo rasua, ŕa pa kilau toho matan rani atu Iesu i pa mele pala hinia (3.1-18)

‘La tapalaku ŕuhuŕuhu, ha sopo kilau purongoi hinau nike, vara isan Moli, rani matea mo sohen tauni mo tari vahatea (1000) ale tauni mo tari vahatea mo sohen rani matea. Moli mo sopo vaimalum vara i maŕivisi na nona retitauhi sohen tamlohi hai la lo ŕomŕomia vara enia mo lo vaimalum, pani mo lo ŕomperavu matamim, matan mo sopo opoia vara tea i tihai, pani vara tamlohi tari la posi na nora hehe.’ (3.8-9)

### Hin Leta Nike

1. Reti ooloo peresi na usiusi (1.1-2)
2. Kalesia la pa lo toho sohen sava (1.3-15)
3. Hasohason Kŕisto (1.16-21)
4. Tamlohi vujangi peresi na Pŕovet haluhalu (2.1-22)
5. Varaŕuhu Iesu i pa mele mai (3.1-18)

### Retiolooolo

<sup>1</sup> Enau Simon Peter, volitusi matea, ale vahaŕule non Iesu Kŕisto.

Na lo uliuli isan la haratu sei la lavi na rasua ŕuhuŕuhu sohen kamam. Iesu Kŕisto sei mo sile rasua sei isaŕa, enia noŕa God, noŕa Jujuri, enia natu, mo vaiŕa ŕa tataholo na nahon God, <sup>2</sup> noku usiusi vara God i pa leŕuhu hin kamim na nona ŕomŕuhu peresi na nona tamata vara la pa tueni kamim vara ha ulua na nomim levosahi hin God peresi Iesu noŕa Moli.

### Ulua Na Lelevosahi Hin God

<sup>3</sup> Suihan God mo sileŕa na hinau tari mata mauri, la tueniŕa na noŕa hahau na mauri sei sohen God mo opoia, la mai isaŕa na malele levosahi hin Iesu, ale enia haratu mo toviŕa matan vara ŕa pa lavi na nona hasohaso peresi na nona posposi ŕuhuŕuhu. <sup>4</sup> Hin nona suiha tavera atu, mo sileŕa na nona retitauhi tavera matuvana, la ŕuhuŕuhu jea. Mo retitauhi vara ŕa pa hitevosahia vara maurin God sei mo lo mauri na mauriŕa mo sohen sava, ale ŕa pete jelu moiso na varama peresi na nona posposi lumiha sei mo lo komo na mauri tamlohi hinia.

<sup>5</sup> Ale matana, ha vaihitea ŕilangi vara ha soŕotahi na nomim rasua peresi na posposi ŕuhu, ale nomim posposi ŕuhu peresi na levosahi, <sup>6</sup> ale nomim levosahi peresi na posposi mata hase taurilati kamim, ale nomim posposi mata hase taurilati kamim peresi na posposi turu ŕilangi, ale nomim posposi turu ŕilangi peresi na posposi sei God mo opoia, <sup>7</sup> ale nomim posposi sei God mo opoia peresi na nomim opoiopoi kamim, ale nomim opoiopoi kamim peresi na ŕomopoia varaŕuhu. <sup>8</sup> Vara ka lo ulua hin la posposi akerihi, ale la lo vua ŕuhu jea, i pa vujangia vara ka sopo toho purongo, ale nomim vavahinau mo lo ulua matan ka lo tutungui na lelevosahi isan noŕa Moli Iesu Kŕisto. <sup>9</sup> Pani vara tea mo sopo ulua hin la posposi ŕuhu sei, enia mo matavuso, ale mo sopo kilau vano ŕove, matan mo ŕomaliho vara God mo hoje naŕihi na nona hehe mata maurina tuai moiso.

<sup>10</sup> Ale matana, la voraiuku peresi na vevoraiku, ha vujangi mamahunia i memera vara God mo tovi kamim, ale vara mo viřoni kamim varařuhu, matan vara ha lo vai la hinau řuhuřuhu sei ha sopo eři tialahahaha hin te rani. <sup>11</sup> Matan hin malele sei God i pa vai na malele i roi i tavera jea vara ha pa unu hin mauri atu God mo aulu hinia sei mo lo toho jejeu, enia nořa Moli, nořa Jujuri Iesu Křisto.

### *Ha Tapurongo Na Retitapu*

<sup>12</sup> Matana, tarea enau na opoia vara a lo vere řohařohai kamim hin la hinau řuhuřuhu sei. Hina purongo vara ka pete levosahira moiso, ale ka lo turu řilangi na retivarařuhu sei ka pete lavia moiso. <sup>13</sup> Pani na lo řomřomia vara mo tataholo vara a lo vere řohařohai kamim hinia nake na pa lo mauri, <sup>14</sup> matan na levosahia vara a pa mate i pa sopo tuai sohen nořa Moli Iesu Křisto mo vujangi mo mera isaku. <sup>15</sup> Na opoia řilangi vara hitahu hin rani atu vara na vano, ha pa eři mele řomřomi la hinau sei.

<sup>16</sup> Matan kamam kama sopo usuri te sorasora la vere mamahunia mata halu sei tamlohi la opoia vara la rongora hin rani atu kama lo vere mamahuni kamim na suiha peresi na mele mai non nořa Moli Iesu Křisto, ale kamam kama hitea na matamam epena sei mo memera tavera hin rani atu.

<sup>17</sup> Matan God Tama mo sile na ooloo peresi na hasohaso tavera isana, ale leo matea mo tai isan God na masapa mo memera tavera atu, ale leo sei mo mai isana mara, "Harihi enia Natuku na opoia mo tavera jea, ale enau na avulahi tavera hinia." <sup>18</sup> Kamam sohena, kama rongo leo atu mo tai na tuka, matan kamam kama lo toho peresia hin vutivuti tapu atu.

<sup>19</sup> Matana, kama eři mele řomřilangi na retisohai nona přovet. Ha kilau mamahuni na sava la ulia matan nora reti la sohena lamu mo lo memera na jara řořoha i tikeli

rani atu Křisto i mele pala hinia, ale sohena majou matea, merana řilangi i pa merasahi na mapumim. <sup>20</sup> Tiroma hinau mo aulu, enia vara ha lo levosahia vara mo sopo te retimangovi hatea i tai isana přovet na řomira hasera, <sup>21</sup> matan mo sopo te retimangovi hatea na Retitapu i malue na masalon te tamlohi, pani tamlohi la retireti sohena God mo opoia. Ale la retireti matan Tanume Tapu mo mangovira na retireti.

## 2

### *Tamlohi Vujangi Haluhalu*

<sup>1</sup> Pani přovet haluhalu sohena la pala isana tamlohi tuai, ale sohena, tamlohi vujangi haluhalu la pa pala isamim, enira la pa lo vujangi luhu na nora halu, vujangi atu i pa komo na mauri tamlohi, enjora, la pa vunvuni na vavahinau non Moli sei mo volituhura, ale matana, talai mata komo na maurira i pa mai vilavila isara. <sup>2</sup> Moiso, tamlohi matuvana la pa usuri na nora posposi lumiha, ale matara, tamlohi la pa veresatihi na malele mauri sei mo usuri na retivarařuhu. <sup>3</sup> Ale mata nora řomusuri la pa haluhalu kamim na nora retimemeji. Ale nora talai sei God mo taua tuai tuai moiso mo sopo toho purongo, ale nora rani komo mo sopo peka.

<sup>4</sup> Matan vara God mo sopo kilau purongoi na angelo tuai mata nora hehe, pani mo pulahira la sivo Tatarus na varama mata mateia, ale hin jara atu mo pesilatira na moru řořoha tavera, la pa toho atu i tikeli na rani aria tavera.\* <sup>5</sup> Ale vara God mo sopo kilau purongoi na tamlohi na varama tuai tuai, pani mo juri Noah sei mo lo retivujavujangi na malele mata mauri tataholo, peresi na tupu limaravrua tinapua hin wai tavei tavera atu mo mai isana tamlohi sasati na varama, <sup>6</sup> ale vara God mo posi na taon tavera non Sodom enia Gomorrah la mai patmakovi, enia mo silera na talai matan vara la

\* **2:4:** Tatarus: Tatarus enia hijan jara atu mo lo toho atano na pulo varama mata mateia.

tihai, mo vaia sohena tovongi matea vara tamlohi la pa levosahia vara i pa sohena sava isana tamlohi sasati, <sup>7</sup> ale vara God mo juri tamlohi tataholo atu Lot mata řomina mo kaka jea mata posposi sasati jea nona tamlohi sasati atu, <sup>8</sup> matan tamlohi tataholo atu Lot, mo lo toho peresira na rani hatehateahi, ale řomina mo lavi na rani řilangi na sava mo lo rongora, ale mata nora vaivaileu la lo vaira na nahona.

<sup>9</sup> Ale Moli God mo levosahia sohena sava vara i pa juri na tamlohi řuhu na nora rani řilangi, ale mo levosahia sohena sava vara i pa lo sile na talai isana tamlohi hehe i tikeli na rani aria tavera, <sup>10</sup> ale, mo mele řilangi jea isan la haratu la lo hahau usuri na posposi lumiha sei mo lo komo na maurira, enira la sopo opoia vara tea i aulu hinira. La ngurunguru jea, ale la lo usuri na masalora purongo, la sopo matahu vara la veresatihi la angelo suiha sei la aulu jea na merara tavera na tuka, <sup>11</sup> ale angelo, hina purongo vara la aulu jea na suiha peresi na řilangi mo jeu la tamlohi nike, la sopo veresatihi la angelo suiha atu, na nora aria na nahon Moli.

<sup>12</sup> Pani la tamlohi nike, la sohena maji řomira mo vono, la vora matan vara la pa taurira la vilimateira, la lo verelehilehi na hinau la sopo levosahi te hinau hinira, ale nora posposi sasati i pa vano i tihai peresira. <sup>13</sup> La lo lavi na rani řilangi mata nora hehe. La opoia jea vara la vai na hehe na jara tavera. La lo toho isamim sohen hapila sasati sei la komo na naho tamlohi matea, matan la lo opoia jea na rani la lo hanhahi matavuhi peresi kamim na nora halu, <sup>14</sup> la sopo kilau purongoi na hařai, matan matara mo mařivi na vaivaileu, la lo marohati mata hehe. La lo jine na tamlohi řomira mo lo rua. Mapura la levosahi mamahuni na nora hanmarua pono. God mo pete viřonira moiso mata komo. <sup>15</sup> La sopo mele usuri na malele tataholo, ale la jalio, la usuri na malelen přovert

Balaam tuai, natun Beor sei, mo opoia vara i vai na hina sati mata mania purongo. *Num 22.2-20*

<sup>16</sup> Pani God mo reti řilangi isana mata nona hehe; mo vai donki atu mo eři retireti, pa donki atu mo reti isana, ale mo horo Balaam pa přovert atu na nona posposi rongorongo vono.

*Num 22.22-35*

<sup>17</sup> La tamlohi atu, la sohena patu wai mamasa, ale la sohena haravu sei řořo tavera la lo pulahira la lo vano, God mo tau mamahuni na řořoha puaha matara. <sup>18</sup> Nora retireti tavera la vuruvuru purongo, la retireti matan vara la reve la haratu la pa jelu purongo na masalo varama, matan vara la usuri na nora posposi lumiha sasati. <sup>19</sup> La retitauhi isara vara la pa materi, pani la tamlohi atu, enira la slev matan mauri atu mata komo purongo. Sava hinau mo jeu na tamlohi enia mo slev hinia. <sup>20</sup> Matan, vara la pete rovo moiso na posposi sasati mata varama mata nora levosahi hin nořa Jujuri, Moli Iesu Křisto, ale la mele kali na posposi sasati, suiħara mo isoiso, maurira la pa mele sati i jeu haratu tiroma. <sup>21</sup> Matan i pa mele řuhu isara vara la sopo levosahi na malele tataholo, mo jeu haratu vara la levosahia moiso, pani la mele vahaři na retileu tapu sei God mo silea isara tiroma. <sup>22</sup> Sava retilelevosahi varařuhu mo vereea mo masese isara mara, 'Viriu mo mele hani na luana, ale poi sei mo loloso moiso

mo mele hilu vano vara i vuluvului na makamaka.' *Prov 26.11*

### 3

#### *Rani Pala Non Moli Mo Lo Mai*

<sup>1</sup> La tapalaku řuhuřuhu, ka levosahia vara harihi enia harua leta na ulia isamim. Na lolon la leta nike, na lo retiřoaroahai na nomim řomřomi řuhu, <sup>2</sup> matan vara ha mele řomřomi na reti nona přovert tapu tuai peresi na retileu non Moli nořa Jujuri atu sei nomim vahařule la silea isamim.

<sup>3</sup> Hinau tiroma vara ha pa levosahia, enia vara na pongi hitahu,

tamlohi vaivai na tamlohi la pa vaivai na tamlohi, moiso la pa usuri na masalora sasati, <sup>4</sup>la pa vereva vara, 'Nene nona retitauhi sei mo vereva vara i pa mele mai? Hin rani atu tamamam la mate, hinau tari la pa lo toho sohena pongi tiroma sei God mo vai na hinau tari mo tikeli nake.'

<sup>5</sup>Matan, enira la lo kilau purongoi na retivararūhu sei vara reti non God mo vai na masapa aulu mo lo toho tuai tuai jea, ale mo vai na varama narīhi na wai, ale mo vai na varama hin wai atu, <sup>6</sup>ale hin malele atu natu wai tavei mo putehi na varama tuai, ale mo tihai. <sup>7</sup>Pani hin reti non God atu natu, nake God mo tatamahuni na masapa peresi na varama mata hapu, la pa toho i tikeli rani aria tavera atu peresi na komokomo nona tamlohi sasati.

<sup>8</sup>La tapalaku rūhuru, ha sopo kilau purongoi hinau nike, vara isan Moli, rani matea mo sohena tauni mo tari vahatea (1000) ale tauni mo tari vahatea mo sohena rani matea. <sup>9</sup>Moli mo sopo vaimalum vara i mařivisi na nona retitauhi sohena tamlohi hai la řomřomia vara enia mo vaimalum, pani mo lo řomperavu matamim, matan mo sopo opoia vara tea i tihai, pani vara tamlohi tari la posi na nora hehe. <sup>10</sup>Pani rani non Moli i pa mai sohena tamlohi vavanaho matea, tamlohi la pa hutura hinia, masapa i pa tihai na řořoa hapu tavera, ale majou peresi na vitusarasara tari la pa koru la tihai, ale varama peresi na vavahinau nona tamlohi hinia la pa toho na jara tavera.

<sup>11</sup>Matan la hinau sei la pa tihai sohen harihi, kamim ha pa usuri na posposi mo tapu, ale la řuhu sohen God mo opoia na maurimim, <sup>12</sup>ha lo saovia, ale ha vaihitea vara rani non God atu i pala vila. Matan God i pa jilangi na masapa na hapu, ale i pa tihai, ale hinau tari na masapa la pa lolo hin tutuni hapu atu. <sup>13</sup>Pani enřa řa lo usuri na nona retitauhi matan tuka paro peresi na varama paro sei mauri tataholo i pa toho hinira.

<sup>14</sup>Matana, la tapalaku rūhuru, matan ka lo saovi la hinau sei, ha vaihitea vara i pa sopo vilei te hina lumiha teni te hinau i eři tuvai kamim hinia, ale ha toho na tamata.

<sup>15</sup>Ale ha hitevosahia vara řomperavu non nořa Moli mo lo sile na masapa matan vara tamlohi la pa eři juri hinia. Mo sohen vorairā Paul mo uliuli matana moiso usuri lelevosahi atu God mo lo silea isana — <sup>16</sup>mo sohen mo lo vai na nona leta tari na rani mo lo retireti hin la hinau nike. Te hinau mo ulira la řilangi vara tea i eři levosahira, harihi, tamlohi sei la sopo lelevosahi peresi la haratu la lo řom rua, la lo pori na řaramira, ale la lo pori na řarami retireti na Retitapu sohena — pani la pa vano na nora komo matan posposi sei.

#### *Isoiso Reti Non Peter*

<sup>17</sup>Ale matana, la tapalaku rūhuru, matan ka levosahi la hinau nike moiso, ha lo kilau! Ha pa sopo majinga vara te tamlohi vaivaileu i tikauleji kamim na nona haluhalu, vara i vono, ha pa jovi na nomim pulo turu řilangi na retivararūhu sei ka lo turu hinia moiso. <sup>18</sup>Pani kamim ha ulua na hina řuhu peresi na levosahi non nořa Moli, nořa Jujuri Iesu Křisto. Isana, řa pa sile na hasohaso tavera nake pongi tui tarea, amen.



## 1 John Tiroma Leta John Mo Ulia Leta Nike

John mo opoia vara tamlohi la rasua vara God i pa řomiřa hin rani atu vara la taviti na nořa hehe (1.9).

Tamlohi la vujangia vara la rasua varařuhu vara la lo opoi opoira (3.11–24). Matan God enia opoia, nona tamlohi varařuhu la pa sohena (4.1–21). Vara tamlohi rasua la jeu na nora hehe la pa hahau na malelen opoiopoira, ale la rasua vara Iesu Natun God enia Jujuri varařuhu mo mai tamlohi vara i mate matařa (5.1–12).

‘Reti matan mauri atu mo lo toho tuai tiroma na pongi tiroma,

... haratu kama hitea na matamam’ (1.1)

### Hin leta nika

1. Reti non God mo sile na mauri (1.1–4)
2. God enia malarani, Křisto enia nořa tovongi (1.5–2.6)
3. Retileu paro (2.7–17)
4. Meresahi non Křisto peresi na tamlohi non God (2.18–3.10)
5. Opoia non God peresi na nořa opoia (3.11–4.21)
6. Jeu na varama (5.1–21)

### *Reti Sei Mo Sile Na Mauri*

<sup>1</sup> Kama lo vereuli kamim na reti mata mauri atu mo lo toho tuai na pongi tiroma, haratu kama rongoa, haratu kama hitea na matamam, ale haratu kama kilaua, ale kama tikelia na limamam tataholo, <sup>2</sup> mauri atu mo pala, kama hitea, ale kama lo vereuli na sava kama hitea moiso. Nake, kama lo vere kamim hin mauri tui atu, haratu mo lo toho peresi God Tama, ale nake mo asi isařa. <sup>3</sup> Kama lo vere varařuhu na sava kama hitea, ale kama rongoa matan vara ha pa eři lavi na mauri tui sei peresi kamam, moiso enřa řa pa matea peresi Tama enia Natuna, Iesu

Křisto. <sup>4</sup> Kama lo uli na hinau tari isamim matan vara ha pa avulahi jea.

### *God Enia Malarani*

<sup>5</sup> Haranike enia Retiřuhu kama rongoa isana, ale kama lo vere isamim: God enia malarani, ale mo sopo te řořoha hinia.

<sup>6</sup> Vara řa vere vara řa lavi na mauri peresi God, ale řa lo toho na řořoha, enřa řa lo halu, řa sopo hahau usuri na retivararřuhu. <sup>7</sup> Pani vara řa lo hahau na malarani sohen God mo lo toho na malarani, enřa řa pete pulutahi hin mauri atu moiso peresi na tatuařa, ale řaen Iesu Natuna mo lo hoje nařihi na nořa sasati. <sup>8</sup> Vara řa vere vara mo sopo te nořa sasati, řa lo haluřa haseřa, ale retivararřuhu mo sopo toho isařa.

<sup>9</sup> Vara řa taviti na nořa sasati isan God, God i pa vai na hina tataholo sohen mo vere isařa moiso mara, i pa řomi na nořa hehe, ale i pa vai na nořa hehe tari la sopo vaiřa řa lumihana nahona.

<sup>10</sup> Pani vara řa vere vara řa sopo vai te hina sasati, řa lo vere vara God enia tamlohi halu matea, ale nona reti mo sopo toho isařa.

## 2

### *Křisto Mo Tueniřa*

<sup>1</sup> La natuku, na lo uli la hinau sei matan vara ha sopo vai na hina sasati, pani vara ha vai na hina sasati, nořa tuetueni matea mo lo toho peresi God Tama, enia Iesu Křisto haratu mo tataholo. <sup>2</sup> Křisto mo hase silea vara i voli nařihi na nořa sasati, pani mo sopo matan nořa haseřa, pani peresi na hina sasati nona tamlohi tari na varama.

<sup>3</sup> Ra lo levosahia vara řa levosahi God hin malele akerihi: Ra lo levosahi God vara řa lo oloolo na nona retileu. <sup>4</sup> Vara tea mo vere vara mo levosahi God, pani mo sopo oloolo na nona retileu, enia tamlohi halu, ale hina varařuhu mo sopo toho isana, <sup>5</sup> pani haratu mo lo oloolo na nona reti, opoia non God mo jea varařuhu isana. Hin malele nika, řa pa levosahi i řuhu vara enřa řa lo toho hinia: <sup>6</sup> haratu mo vere vara enia mo lo

toho hinia, enia i pa hahau sohen Křisto mo hahau.

### *Retileu Paro*

<sup>7</sup> La tapalaku řuhuřuhu, na sopo uliuli isamim matan vara a mele sile kamim hin te retileu paro, pani enia pa haratu la lo sile kamim hinia tiroma moiso, ale enia retireti atu ka pete rongoa moiso, <sup>8</sup> pani retileu atu na lo ulia isamim mo sohen retileu paro matea, ale mo lo toho na maurin Křisto peresi na maurimim, matan ka hite na řořoha mo lo majara, ale malarani varařuhu mo lo sasarami moiso.

<sup>9</sup> Haratu mo lo vereea vara mo lo toho na malarani, pani mo lo hite-satihi na voraina, enia mo pa lo toho na řořoha mo tikeli nake. <sup>10</sup> Haratu mo lo opoi na vorain Křisto, enia mo lo toho na malarani, ale mo sopo tea i eři jalio mata nona vavahinau. <sup>11</sup> Pani haratu mo lo hitesatihi na vorain Křisto, mo pa lo toho na řořoha, mo lo hahau na řořoha, ale mo sopo levosahi na jara mo lo vano ea, matan řořoha mo vusohi na matana.

<sup>12</sup> La natuku, na lo uliuli isamim matan nomim sasati God mo řomiřa matan Křisto. <sup>13</sup> La haratu la vajiaha, na lo uliuli isamim matan ka levosahi haratu mo lo toho atu tiroma na tapulon vavahinau. La uluvou, na lo uliuli isamim matan ka jeu Tiapolo enia pulo sasati. <sup>14</sup> La natuku, na lo uliuli isamim matan ka levosahi Tama moiso, ale la vajiaha, na lo uliuli isamim matan ka levosahi haratu mo lo toho tiroma moiso na tapulo vavahinau. La uluvou, na lo uliuli isamim matan ka suiha, ale reti non God mo lo toho hin kamim, ale ka jeu haratu enia pulo sasati.

<sup>15</sup> Ha sopo opoi na varama teni te hinia non varama. Vara ha opoi na varama, ha pa eři opoi Tama sohen sava? <sup>16</sup> Matan hinia na varama mo sohen harihi: řomjea na masalom sasati, řomjea na hinia ko hitea, hapahapa na nom hinia, ale la hinia sei la sopo tai isan Tama, pani la tai na varama purongo, <sup>17</sup> moiso varama sei mo lo vano vara i tihai peresi na

masalona tari, pani haratu mo lo vai na masalon God enia i pa toho jejeu.

### *Meresahi Non Křisto La Pala*

<sup>18</sup> La natuku, nake enia isoiso rani. Sohen ka pete rongoa moiso vara meresahi non Křisto la lo mai, ale meresahi matuvana non Křisto la pala moiso, ale matana řa levosahia vara pongi hitahu mo mai moiso. <sup>19</sup> Hina purongo vara la tamlohi atu la tai na vaofa, pani enira la sopo tatuařa. Vara la pa lo tatuařa varařuhu, la pa lo toho peresiřa. Pani la malue isařa matan vara i memera vara enira la sopo tatuařa.

<sup>20</sup> Pani kamim mo isoiso ka levosahi harihi moiso, matan God Tapu mo viřoni kamim. <sup>21</sup> Na sopo uliuli isamim matan ka sopo levosahi na retivarařuhu, pani matan ka levosahia moiso, ka pete levosahia moiso vara retihaluhalu i pa sopo eři tai isana retivarařuhu. <sup>22</sup> Hare natu, enia tamlohi halu, haratu sei mo lo vereea vara Iesu enia mo sopo Křisto varařuhu sei God mo viřonia. Vara tea mo vereea sohen, enia natu, meresahi non Křisto, matan mo řohu hin Tama peresi Natuna. <sup>23</sup> Haratu mo řohu hin Natuna mo sopo lavi Tama. Pani haratu mo vereea vara Iesu enia Natun God, Tama mo lo toho peresia. <sup>24</sup> Moiso, vara ha turu řilangi tarea na sava retireti ka rongoa tiroma moiso, ale ha pa lo matea na mapumim peresi Tama enia Natuna. <sup>25</sup> Mauri tui enia retitauhi sei mo retitauhi hinia isařa.

<sup>26</sup> Enau na lo uliuli isamim matan la haratu la lo tikauleji kamim, <sup>27</sup> pani Křisto mo viřoni kamim na Tanume Tapu, ale mo lo toho hin kamim. Ale kamim ha pa sopo mele opoi te tamlohi vujangi tinapua vara i vujangi kamim. Pani mo řuhu vara ha toho hin Křisto, ale ha usuri na sava hinia Tanume Tapu mo vujangi kamim hinia matan hinia tari mo vujangia mo varařuhu, mo sopo te hina halu hinia.

### *La Natun God*

<sup>28</sup> Natuvarihi, mo řuhu vara ha toho jejeu hin Křisto, matan vara hin

rani atu i mele mai, ʻra pa sopo eʻi matahu, ale ʻra pa sopo mahanuhanu hin te hinau hin rani atu, <sup>29</sup> matan ka levosahia vara Kʻristo mo tataholo, ha pa levosahia sohena vara haratu mo lo vai na hinau mo tataholo, enia mo vora isana.

### 3

<sup>1</sup> Ka hite na opoia tavera non God Tama isaʻra mo sohena sava, matan mo toviʻra vara enʻra natuna, ale mo sohen haratu natu. Pani tamlohi varama la sopo levosahiʻra matan la sopo levosahi God Tama. <sup>2</sup> La tapalaku ʻruhuʻruhu, enʻra natuna nake, pani mo sopo pala vara ʻra pa sohena sava hin pongi hitahu, pani ʻra levosahia vara hin pongi atu Kʻristo i mele pala hinia, enʻra ʻra pa sohen Kʻristo, matan enʻra ʻra pa hitevosahia i ʻruhu vara enia mo sohena sava. <sup>3</sup> Ale la haratu la ʻromtoho sohen harihi, la hase vaira la vokevoke ʻruhu, sohen Kʻristo enia mo vokevoke ʻruhu.

<sup>4</sup> La haratu la lo vai na hehe tarea, enira la lo vaivaileu tarea, ale hehe enia vaivaileu. <sup>5</sup> Ale ka levosahia vara Kʻristo mo pala vara i lavi naʻihi na hehe, ale mo sopo te hehe isana. <sup>6</sup> Haratu la lo toho isana la sopo eʻi vai na hehe tarea, vara tea mo hehe tarea enia mo sopo levosahi Kʻristo, ale enia mo sopo hitevosahia teni levosahia hin te rani.

<sup>7</sup> Natuvarihi, ha sopo tinaʻihia vara tea i halu kamim! Harepu mo vai na hinau tataholo tarea enia mo tataholo mo ʻruhu sohen Kʻristo mo tataholo. <sup>8</sup> Harepu mo lo hehe tarea enia non Tiapolo. Tiapolo mo lo hehe tiroma na tapulo varama mo tikeli nake. Pani Natun God mo mai vara i pa vaikomokomo na vavahinau non Tiapolo. <sup>9</sup> Haratu la vora isan God, la sopo eʻi vai na hehe tarea matan suihan God mo lo toho na maurira, mo vaira la mai natuna, ale matan haratu la pa sopo eʻi vai na hehe tarea.

#### *God Enia Opoia*

<sup>10</sup> Ha pa levosahi la haratu la natun God isan la haratu la natun Tiapolo

sohen harihi: haratu la sopo taura vara la vai na hinau i tataholo tarea la sopo non God, ale sohen haratu, la sopo opoi na voraira. <sup>11</sup> Pani retisohai sei enia retisohai atu ka rongoa moiso na pongi tiroma vara, ʻra pa opoiopoiʻra, <sup>12</sup> moiso, vara ha sopo sohen Cain atu tuai sei mo vilimatei tasina, enia non Tiapolo. Mo vilimateia mata sava? Mo vaia matan tarea tasina enia mo lo vai na hinau mo lo tataholo, pani enia mo lo vai na hinau mo lo hehe matan enia tamlohi hehe.

#### *Gen 4.8*

<sup>13</sup> La voraiku peresi na vevoraiku ʻruhuʻruhu, ha sopo maʻurahi tavera vara tamlohi varama la ʻrohu hin kamim. <sup>14</sup> Ra levosahia vara ʻra tai na mateia moiso ʻra vano na mauri moiso matan ʻra opoi na voraiʻra kalesia. Pani haratu mo sopo te nona opoia, enia mo pa lo toho na suiha mateia.

<sup>15</sup> Vara tea mo lo hitesatihi na voraina, enia tamlohi vili tamlohi matea moiso, ale ka levosahia vara mo sopo te tamlohi vili tamlohi hatea vara mauri tui mo lo toho isana. <sup>16</sup> Ra levosahia vara opoia varaʻruhu enia hin posposi sei; Iesu mo sile na maurina mataʻra, ale matan haratu, mo ʻruhu vara ʻra sile na mauriʻra mata vorai kalesia tinapua. <sup>17</sup> Ale matana, vara tea nona hinau mo matuvana, ale mo hite na vonana matea mo vejuveju na hinau matea, pani mo sopo tuenia, opoia non God mo lo toho hinia sohena sava? <sup>18</sup> Natuvarihi, ʻra sopo retireti vono purongo, pani ʻra pa opoi na tinapua na noʻra vavahinau peresi na retivaraʻruhu.

<sup>19</sup> Vara ʻra opoi na tinapua ʻra lo vujangia vara enʻra non retivaraʻruhu, ale ʻromiʻra la sopo tialahalaha na nahon God, <sup>20</sup> hina purongo vara ʻromiʻra la lo ariʻra hin te hinau, God mo aulu na ʻromiʻra, ale enia mo levosahi na hinau tari la varaʻruhu. <sup>21</sup> La tapalaku ʻruhuʻruhu, vara ʻromiʻra la sopo hase ariʻra na nahon God, enʻra ʻra pa eʻi ʻromʻrilangi vara ʻra mai mariviti isana, <sup>22</sup> moiso enia i pa sileʻra na sava hinau ʻra usia isana matan ʻra opoia vara ʻra oloolo na

nona retileu, ale tarea řa lo vai na sava God mo avulahi hinia. <sup>23</sup> Ale God mo sile nona retileu akerihi: vara řa tau na nořa rasua hin Natuna Iesu Křisto, ale řa opoiopoiřa sohena Iesu mo retileu hinia isařa moiso. <sup>24</sup> Ale haratu mo lo ololo na retileu non God, mo lo toho hin God, ale God mo lo toho hinia, moiso hin malele akerihi natu, řa levosahia vara God mo lo toho isařa, matan Tanumena atu mo silea mo lo toho isařa.

#### 4

##### *Ha Pa Rasu Na Sava Hinau*

<sup>1</sup> La tapalaku řuhuřuhu, ha sopo rasu na tanume tari vara la vereia vara la lo retireti na suihan Tanume Tapu, pani ha vaihitera vara la tai isan God teni mo vono, matan přovet haluhalu matuvana la vano na varama moiso, <sup>2</sup> ale kamim ha pa eři levosahia varařuhu vara sahara mo tai isan God sohen harihi: haratu mo vereia vara Iesu enia Křisto, ale vara mo vereia vara Iesu mo mai tamlohi varařuhu, tanume atu natu mo tai isan God. <sup>3</sup> Pani haratu mo sopo taviti vara Iesu enia Křisto mo sopo tai isan God, ha pa levosahia vara enia meresahi non Křisto sei ka rongoa moiso vara i pa mai, ale nake mo pete toho na varama moiso.

<sup>4</sup> Natuvarihi, kamim non God, ale kamim ka jeu la meresahi atu moiso matan Tanumen God mo lo toho hin kamim, ale enia mo suiha mo jeu haratu mo lo toho na varama. <sup>5</sup> La meresahi nike, la tai na varama, ale matana, tamlohi na varama mo tapurongo isara matan la lo retireti na masalon varama.

<sup>6</sup> Enřa non God, ale la haratu sei la levosahi God la pa tapurongo isařa, pani la haratu la sopo levosahi God la pa sopo tapurongo isařa. Hin posposi atu natu, řa pa eři levosahia i řuhu vara hare mo lo retireti: Tanume Tapu atu mo varařuhu teni te tanume haluhalu.

<sup>7</sup> La tapalaku řuhuřuhu, řa pa opoiopoiřa mata opoia mo tai isan God, ale haratu mo lo sile na opoia, enia mo vora isan God, ale mo levosahi God. <sup>8</sup> God enia opoia. Ale vara tea mo sopo opoi na tinapua,

enia mo sopo levosahi God. <sup>9</sup> God mo vuhesi na nona opoia isařa sohen harihi: mo řule Natuna vorahese mo mai na varama matan vara řa pa mauri hinia. <sup>10</sup> Pulo opoia varařuhu enia mo sohen harihi; enřa řa sopo opoi God tiroma, pani God mo opoiřa tiroma. God mo řule Natuna vara i voli nařihi na nořa sasati. <sup>11</sup> La tapalaku řuhuřuhu, matan God mo opoiřa mo tavera sohen harihi, mo řuhu vara řa pa opoiopoiřa.

<sup>12</sup> Tea mo sopo lo hite God hin te pongi, pani vara řa opoiopoiřa, God mo lo toho hiniřa, ale nona opoia mo lo toho varařuhu na mapuřa.

<sup>13</sup> Matan God mo sileřa na Tanumena, řa levosahia vara enřa řa lo toho hinia, sohen enia mo lo toho hiniřa. <sup>14</sup> Ale kama hitea, kama lo vereulia isana tinapua vara God mo řule Natuna vara i mai Jujuri mata varama. <sup>15</sup> Vara tea mo taviti vara Iesu enia Natun God, God mo lo toho isana, ale enia mo lo toho isan God. <sup>16</sup> Ale řa levosahi mo řuhu moiso, řa rasua vara God mo opoiřa varařuhu. God enia opoia. Vara řa lo opoiopoiřa, enřa řa pa matea na mapuřa peresi God, ale enia i pa toho peresiřa. <sup>17</sup> Hin malele akerihi, opoia mo jea varařuhu matan vara řa pa eři řomřilangi hin rani aria atu, ale matana, řa pa hahau sohen Křisto mo lo hahau na varama. <sup>18</sup> Opoia jea sohena, i pa levuti nařihi na matahu. Ale haratu mo lo matahu enia mo matahu mata řomřomi mata aria, ale mo vujangia vara nona opoia mo pa lo makire.

<sup>19</sup> Ra opoi God matan God mo opoiřa tiroma. <sup>20</sup> Pani vara tea mo vereia vara mo opoi God, pani mo sopo opoi na voraina, enia tamlohi halu. Mo sopo eři hite God nake, pani mo sohena sava natu, vara mo vere vara mo opoi God, pani mo sopo opoi na voraina mo eři hitera? <sup>21</sup> Retileu sei God mo sileřa hinia mo sohen harihi, "Haratu mo opoi God, enia i pa opoi na voraina."

#### 5

##### *Jeu na Varama*

<sup>1</sup> La haratu la rasua vara Iesu enia Křisto, enira natun God. Ale la haratu la opoi God Tama, la pa opoi na natuna tari. <sup>2</sup> Ra levosahia vara řa opoi na natuna tari hin posposi sei: matan řa opoi God, ale matan řa ooloo na nona retileu. <sup>3</sup> Matan řa vujangi na nořa opoia hin God na nořa ooloo na nona retileu, ale mo sopo řilangi mata usurira.

<sup>4</sup> Haratu la vora isan God la pa eři jeu na varama mata nora rasua, enia natu, mo vaira la jeu na varama. <sup>5</sup> Ale haratu mo jeu na varama enia haratu mo rasua vara Iesu enia Natun God.

### *Iesu Enia Hare*

<sup>6</sup> Iesu Křisto mo mai na malele wai peresi na řae, mo sopo na wai hasena, pani wai peresi na řae.\* Tanume Tapu mo vereulia matan Tanume Tapu mo varařuhu. <sup>7</sup> Varařuhu, hinau mo tolu la vereulia, <sup>8</sup> Tanume Tapu, wai peresi na řae la turu na jara matea purongo.

<sup>9</sup> Vara řa lo rasu na retireti nona tamlohi purongo, sava God mo vereulia hinia hin Natuna mo mele řuhu jea. Retivuhesi atu mo sohen harihi: <sup>10</sup> Vara řa tau na nořa rasua isan Natun God, řa lo vujangia vara řa rasu na vereulia non God hin Natuna. Pani vara řa sopo rasu na sava God mo vereulia hinia hin Natuna, řa lo vereia vara God enia tamlohi halu. <sup>11</sup> Ale vereulia atu mo sohen harihi: God mo sile na mauri tui moiso, mauri tui atu mo lo toho isan Natuna. <sup>12</sup> Ale vara haratu mo lavi Natun God mo lavi na mauri tui, pani haratu mo sopo lavi Natun God, mo sopo lavi na mauri tui.

### *Vujangi Mata Mauri Tui*

<sup>13</sup> Na lo uliuli isan la haratu la rasu Natun God, matan vara ha pa levosahia i řuhu vara kamim ka lavi na mauri tui moiso. <sup>14</sup> Ale řa pa levosahia vara řa usiusi i usuri na masalon God, enia i pa tapurongo isařa. <sup>15</sup> Ale vara řa levosahia vara God mo lo tapurongo na nořa usiusi, řa pa

levosahia varařuhu vara řa pa lavi na sava řa usia isana.

<sup>16</sup> Vara tea mo hite na voraina matea mo lo vai na hehe sei mo sopo matan vara i mate matana, i pa eři usiusi vara God i silea na mauri. Pani vara hehe atu enia hehe mata mate, i pa sopo eři usiusi matana. <sup>17</sup> Lejileji tari enira hina sasati, pani hina sasati tari la pa sopo sile na mateia.

<sup>18</sup> Ra lo levosahia i řuhu vara haratu la vora isan God la pa sopo eři vai na hehe tarea. Natun God mo lo tingi horora, ale Tiapolo i pa sopo eři komora.

<sup>19</sup> Ra levosahia mo řuhu vara enřa řa tai isan God, pani tatuara tinapua tari na varama la lo toho na suihan Tiapolo.

<sup>20</sup> Ra levosahia vara Natun God mo mai mo sile na levosahi vara řa pa eři levosahi God varařuhu. Ale řa lo toho hin haratu mo varařuhu, Natuna Iesu Křisto enia God varařuhu, enia mauri tui.

<sup>21</sup> Natuvarihi, ha toho asau na posposi mata lotulotu vono.

\* **5:6:** wai peresi na řaena: wai peresi řaena mo roro hin rani atu tamlohi vuro matea mo urai Iesu. Hite: Jn 19.34. John mo ulia nike, vara řa levosahia vara Iesu mo lavi na epe tamlohi, mo sopo nunua purongo sohenai hai la lo vereia.

## 2 John Harua Leta John Mo Ulia Leta Nike

John mo uli leta nike, matan vara tamlohi rasua la pa eñi levosahia vara opoia enia hina aulu na mauri rasua. Mo vujangia vara opoia peresi na retivarañuhu la pa toho jara matea na mauri rasua. Mo vujangia vara Iesu enia tamlohi varañuhu matea. John vujangia vara enña ña pa opoiopoiña.

### Hin leta nike

1. Retioloolo (1–3)
2. Opoia peresi na retivarañuhu (4–11)
3. Isoiso reti (12–13)

<sup>1</sup> Leta nike, enau patu tamlohi rasua sei John, na ulia isan hañai sei God mo viñonia peresi na natuna.\* Enau peresi la haratu la levosahi na retivarañuhu, kama opoi kamim mo isoiso. <sup>2</sup> Kama opoi kamim mata retivarañuhu mo lo toho na mapuña, ale i pa toho atu na pongi tui. <sup>3</sup> Moiso na usiusi vara God Tama peresi Natuna Iesu Křisto vara la pa řomñuhu hiniña, ale la řomopoiña, moiso vara la pa sileña na nora tamata, na nora retivarañuhu, ale na nora opoia. <sup>4</sup> Enau na avulahi tavera matan na rongoa vara te natum la lo ooloo na retivarañuhu sohen God Tama mo retileu hinia isaña moiso.

### *Tamlohi Vujangi Haluhalu*

<sup>5</sup> Vetasiku řuhuñuhu, na sopo uliuli vara a vereho vara o pa ooloo hin te retileu paro hatea, mo vono, pani na lo uli haratu mo vereha tiroma moiso vara ña opoiopoiña. <sup>6</sup> Opoia varañuhu enia vara ña vai na sava God mo retileu hinia moiso, ale haratu ka rongoa moiso na tapulo rani, vara ña pa hahau hinia. <sup>7</sup> Matan ka levosahia vara tamlohi haluhalu matuvana la vano na varama moiso. La tamlohi haluhalu atu la retihalu vara Iesu Křisto mo sopo mai tamlohi

varañuhu. La tamlohi haluhalu atu enira meresahi non Křisto. <sup>8</sup> Ha lo kilau matara! Mo sopo řuhu vara sava kama voko řilangi matana matamim i vano hina purongo, pani ha vaihitea vara ha lavi vevuhi na nomim otori isana. <sup>9</sup> Haratu řomina mo lo vano asau na hinau la vujangia hin Křisto moiso, ale mo sopo turu hinia, haratu natu, God Tama mo sopo lo toho peresia. Pani vara tea mo toho jejeu na sava hinau la vujangia moiso, God Tama peresi Natuna la pa lo toho peresia. <sup>10</sup> Vara tea i mai, pani mo lavi na vujangi tinapua, ha sopo tinañihia vara i unu na imamim, ha sopo silea na retioloolo, <sup>11</sup> matan, vara haratu mo sile na retioloolo isara, enia mo lo tuenira na nora hehe.

### *Isoiso Retioloolo*

<sup>12</sup> Varañuhu na opoia vara a mele vere kamim na hinau matuvana, pani na sopo opoia vara a uli na leta purongo. I pa mele řuhu vara a mai vara enña tolu ña pa sorasora, ale ña pa avulahi tavera matana. <sup>13</sup> Reti ooloo mo lo mai isamim mo tai isan la natun vetasimim nike God mo viñonia.

\* **1:1:** hañai peresi na natuna: reti sei hañai peresi na natuna la vereha vara John mo lo řaramia vara hañai atu enia vao kalesia matea, ale natuna enia vao kalesia matan vao kalesia atu.

## 3 John Hatolu Leta John Mo Ulia Leta nike

John mo uli leta nike matan vara kalesia la pa řomiřomi mata tueni la haratu la lo vai na vavahinau non Moli na jara tinatinapua na varama. Mo ulia isan Gaius, tamlohi tavera matea na rasua ale mo lo usuri posposi akerihi moiso.

### Hin Leta Nike

1. Retioloolo isan Gaius (1–4)
2. Kalesia la pa hase tuetuenira (5–12)
3. Isoiso retioloolo (13–15)

<sup>1</sup> Leta nike, enau patu tamlohi rasua sei John na ulia isan tapalaku řuhuřuhu sei Gaius, na opoiho na retivararahu. <sup>2</sup> Tapalaku řuhuřuhu, na usiisi vara hinau tari la pa řuhu isam, na lo řomtoho vara epem i pa suiha sohen ko suiha na nom mauri rasua. <sup>3</sup> Na rani vorai kalesia la rohi kamam nike, la vereia vara engko, ko lo hahau usuri na retivararahu, ale enau na avulahi tavera matana. <sup>4</sup> Mo sopo te hinau hatea i vaiiau a avulahi tavera sohen harihi hin haratu na rongoa vara natuku la lo hahau usuri na retivararahu. <sup>5</sup> Tapalaku řuhuřuhu, ko vai na hina tataholo mata rasua matan ko lo tueni na vorai kalesia sei la lo mai isam, hina purongo vara enira la tamlohi tinapua, <sup>6</sup> enira la vere na nom opoia isan la vao kalesia nike. Ale mo řuhu vara o řulera na nora hahau na posposi mo tataholo na nahon God, <sup>7</sup> matan la lo hahau mata hijan Moli, la hatihia moiso vara la pa sopo lavi te tuetueni isan te tinapua vara mo sopo levosahi God. <sup>8</sup> Matana, mo řuhu vara řa tueni na tamlohi sohen harihi, matan vara řa eři voko peresira na retivararahu. <sup>9</sup> Na uliuli mo vano isana vao kalesia atu moiso, pani Diotrefes mo opoia vara enia i pa tiroma hinira, mo řohu vara i tapurongo hin kamam. <sup>10</sup> Ale vara a mai, a pa reti isana matan mo lo verelejileji kamam, ale mo sopo

haratu purongo mo vaia, pani mo lo turuhoro na voraiřa la lo mai vara la rohi na vorai rasua ea. Ale mo tau nařihi na tamlohi mata vao kalesia matan la opoia vara la sile na retioloolo isara. <sup>11</sup> Tapalaku, o sopo tisuri na posposi sasati, pani o tisuri na posposi řuhu matan haratu la lo vai na hina řuhu enira natun God, pani la haratu la lo lejileji tarea la pa sopo levosahi God. <sup>12</sup> Tamlohi tari la vereia vara Demetrius enia tamlohi řuhu matea, ale nona vujangi mo vararahu matan la vujangia vara enia tamlohi řuhu. Kamam sohen, kama lo vereia vara enia tamlohi řuhu matea, ka levosahia vara kama lo vereia vararahu.

### *Isoiso Retioloolo*

<sup>13</sup> Vararahu na opoia vara a mele vere kamim na hinau matuvana, pani na sopo opoia vara a ulia hin leta nike purongo. <sup>14</sup> Pani na lo řomtoho vara a pa mai nohorihia purongo, ale řa pa sorasora matavuhi. <sup>15</sup> Na usiisi vara tamata non God i pa toho isam. Tapalam nike, la sohai na nora retioloolo isam, ale o pa sile na retioloolo isana tapalařa hatehateahi atu.

## Jude Leta Jude Mo Ulia Leta nike

Jude mo vere na hinau matuvana mata tamlohi vujangi haluhalu, enira tamlohi sasati ale God i pa sile na talai tavera isara, matana, kalesia la pa lo kilau mamahu vara la pa sopo tapurongo na nora vujangi.

Isoiso reti non Jude hin leta nike enia usiisi matea mo lo sile na leʻuhuhū isan God:

‘Ale nake, ʻra pa sile na ololo tavera isan God, matan enia hasena i pa eʻi turuhoro kamim vara ha sopo jovi, ale enia i pa lavi kamim i tau kamim na nahona ha vokevoke, ale ha pa avulahi tavera jea. Mo tataholo vara God noʻa Jujuri hin noʻa Moli Iesu Kʻristo, i lavi na ololo tavera, auluna, suiha, ale suiha mata i aulu na hinau tari. Amen.’ (24-25)

### Hin leta nike

1. Retiololo (1-2)
2. Turu ʻrilangi na rasua (3-13)
3. Turuhoro na tamlohi vujangi haluhalu (14-23)
4. Isoiso usiisi (24-25)

<sup>1</sup> Leta nike, enau Jude na ulia. Enau slev non Iesu Kʻristo, enau tasin James. Na uliuli isan la haratu, God Tama mo viʻonira, ale mo taura na nona opoia, Iesu Kʻristo mo lo matahira.

<sup>2</sup> Na lo usiisi vara tarea, God i pa leʻuhuhū hin kamim i tavera jea, ale vara tarea, i pa silea kamim na nona ʻromopoia peresi na nona tamata peresi na nona opoia!

### *Tamlohi Vujangi Haluhalu*

<sup>3</sup> La tapalaku ʻruhuʻruhu, a pa vereā vara, tiroma na lo ʻromʻromia vara a uliuli isamim vara God mo juriʻa sohena sava, pani nake, na hitea vara a pa uliuli vara a retituetueni kamim vara ha pa valum ʻrilangi tarea mata taurilati vujangi varaʻuhuhū atu, God mo lo silea isana nona tapuhi moiso

na rani matea mata rani tui tui. <sup>4</sup> Te tamlohi la mai luhu, la unu matan te ʻromira na livuhaʻa, ale la lo vereā lara, ‘Mo ʻruhu purongo vara ʻra vai na hehe peresi na haʻai teni ʻra vai te hina sasati matuvana, matan ʻromʻruhu non God i pa vai God i ʻromiʻa.’ Posposi sohen harihi, mo lo vujangia vara la vahaʻi hin Moli Iesu Kʻristo noʻa Tamlohi Tavera, enia sei mo matelete. Pani tuai jea, la ulia moiso, ale Retiulia mo retiʻoʻaʻoahai vara God i pa ari na tamlohi sei la ʻrohu na posposi tataholo non God sohen harihi.

### *Angelo Sasati Matan Tuai*

<sup>5</sup> Pani nake na opoia vara a mele vereā isamim na sava ka levosahia mo ʻruhu moiso, vara sava mo masese isana tamlohi atu Moli God mo jurira tuai Egypt, pani hitahun haratu, enia mo komo la haratu la sopo rasua. *Exo 12.51; Num 14.29-30* <sup>6</sup> Ale sohena sava, God mo pesi la angelo atu tuai, haratu la sopo avulahi na suiha sei God mo taua isara, ale la malue na jarara tataholo, ale matana, God mo lo taurilatira na jara ʻroʻroha tavera matea. La pa toho atu, i tikeli na rani tavera mata aria. *2Pe 2.4, 9* <sup>7</sup> Ale ha ʻromʻromi na sava mo masese isana taon matan Sodom enia Gomorrah peresi na taon la lo toho mariviti hinira tuai, matan nora tamlohi la vaia sohen la angelo atu tuai, matan la lo hahau usuri na posposi viriu matuvana peresi la haratu la sopo tataholo isara, ale sohena sava God mo komora na hapu, mo vaia sohena tovongi matea isaʻa mata talai tui tui. *Gen 19.1-24*

*2Pe 2.4, 9* <sup>7</sup> Ale ha ʻromʻromi na sava mo masese isana taon matan Sodom enia Gomorrah peresi na taon la lo toho mariviti hinira tuai, matan nora tamlohi la vaia sohen la angelo atu tuai, matan la lo hahau usuri na posposi viriu matuvana peresi la haratu la sopo tataholo isara, ale sohena sava God mo komora na hapu, mo vaia sohena tovongi matea isaʻa mata talai tui tui. *Gen 19.1-24*

### *Tamlohi Sasati La Mangisi*

<sup>8</sup> Sohen la haratu tuai, la tamlohi nike la unu, la vai na posposi hehe na epera mo sati, matan la vereā na tamlohi vara la pa vai na sava la lo mavuho hinira. Ale la tipahi na suiha tari sei la aulu hinira, ale la verelehilehi na angelo aulu. <sup>9</sup> Pani Michael moli nona angelo, mo sopo vaia sohena. Hin rani atu



mo opoia vara i lavi naʻihi na tarapen Moses, enia Tiapolo la vauriuri matana, pani hina purongo hin haratu vara enia mo angelo aulu matea, mo sopo retilehilehi na hijan Tiapolo, mo vono, Michael mo vereea purongo mara, “Moli God i pa sileho na talai!” *Dan 10.13, 21; 12.1; Rev 12.7; Zec 3.2*

<sup>10</sup> Pani la tamlohi nike, la unu, tavalura matea la lo kerekerehi, ale la lo kali na hinau la sopo levosahi te hinau hinira, pani mele tavalura tinapua, la lo usuri na nora rongovosahi purongo sohena maji, ale ʻromira mo vono, pani hitahuna posira i pa komora hasera.

#### *Talai Tavera I Pa Jovi Isara*

<sup>11</sup> Rani sasati tavera i pa mai isara, matan la lo usuri na sava Cain mo vaia tuai, ale la lo vai na hehe sohen Balaam mo vaia tuai, matan la lo ʻromʻromi na mania purongo. Ale sohena posposi sei non Korah tuai, la lo usuri na posposi lejileji atu, mo vaia tuai isan God, ale la pa tihai sei matana. *Gen 4.3-8; Num 22.1-35*

<sup>12</sup> La tamlohi nike, la sohena ratarata sasati na lolo tasi, boti la lo takosa hinira, matan la lo toho na nomim hanhani matavuhi kalesia, pani la sopo mahanuhanu vara la lo ʻromʻromira hasera purongo. La tamlohi nike, la sohena telangi langi mo lo serera, pani la sopo eʻi sile te usa na rani alo mo ʻrilangi. La mate vevuhi sohena pahai sei, mo marivu mo kuru, mo sopo te vuana, mo sopo te rauna. <sup>13</sup> Nora hinau mahanuhanu la pala sohena valval loloputu tavera na tasi langivili. La sohena vitusarasara sei la jalio na malelera, ale la pa toho jejeu na jara ʻroʻroha tavera atu God mo tau mamahunia matara.

#### *Enoch Mo Retimangovi Hin Moli*

<sup>14</sup> Ale sohena Enoch sei, enia mo halimaravrua pina mo usuri Adam, ale enia mo lo retireti hin la tamlohi nike moiso, mo vereea mara, ‘Ha hitea! Ha kilau sahe aulu, Moli God

mo lo mai peresi na nona vao angelo tapu, tea i sopo eʻi evira, *Gen 5.18, 21-24* <sup>15</sup> matan vara i ari na tamlohi tari. I pa sile na talai isan la haratu la ʻrohu na posposi tataholo sei God mo opoia, matan nora sasati tari la vaira na nora lejileji vano isan God. Moli i pa sile na talai isan la tamlohi lejileji sei, mata nora retihehe tari sei la vereea isana. <sup>16</sup> La tamlohi nike, la lo retireti varihi, ale la lo ngutungutu, la lo usuri na masalora purongo. La lo retimangisi hinira hasera, ale la lo haluhalu na tinapua mata lavi te hinau isara.

#### *Pongi Hitahu*

<sup>17</sup> La tapalaku ʻruhuʻruhu, ha sopo ʻromaliho na retiʻroaʻroahai sei vahaʻule nona Moli Iesu Kʻristo la silea isamim moiso. <sup>18</sup> La vereea isamim vara mariviti na isoiso rani, tamlohi hanmarua peresi na tamlohi lejileji la pa tapulo kerehi God. <sup>19</sup> Ale la tamlohi nike, tarea enira la pulo patumasa matan enira tamlohi non varama purongo, ale Tanumen God mo sopo toho isara. <sup>20</sup> Pani la tapalaku ʻruhuʻruhu, ha tuetueni kamim vara ha ulua na nomim rasua tapu, ale na rani vara ka lo usiusi, ha tinaʻihia vara Tanume Tapu i pa tiroma hin kamim. <sup>21</sup> Ha vujangia vara ka opoi God na nomim hahau, ale ha tau na ʻromimim na ʻromopoia non Moli Iesu Kʻristo sei vuana enia mauri tui. <sup>22</sup> Ha vujangi na nomim ʻromopoia isan la haratu sei, la lo ʻromkaka mata nora rasua,\* <sup>23</sup> Ale ha juri na tinapua, ha reve naʻihira na hapu aria. Ale tatua tamlohi ha pa ʻromopoirā, pani ha lo kilau vara ha vaia, ha pa nikei na nora ruru sohena vara nora hehe mo lo kaluti hinira.

#### *Isoiso Reti*

<sup>24</sup> Ale nake, ʻra pa sile na ololo tavera isan God, matan enia hasena i pa eʻi turuhoro kamim vara ha sopo jovi, ale enia i pa lavi kamim i tau kamim na nahona ha vokevoke, ale ha pa avulahi tavera jea. <sup>25</sup> Mo tataholo vara God noʻra Jujuri hin

\* **1:22:** vujangi: hai la vereea vara ‘vaira la rongovosahi’.

nořa Moli Iesu Křisto, i lavi na ololo  
tavaera, auluna, suiha, ale suiha mata  
i aulu na hinau tari. Amen.

## Revelation Puku Nike

Puku nike, John mo ulia hin rani atu mo lo toho na Ureuren Patmos. Patmos mo sohena ima řilangi matea mara Rome la lo tau na tamlohi hinia. La tau John ea matan enia mo retivujavujangi hin Křisto. John mo lo vere na hinau God mo vujangia isana hin rani atu mata vavahinau non Iesu Křisto matan pavuho na pongi hitahu (1.2). Retisohai sei sopena mo tolu. (1) Suiha sasati la lo toho na varama, la lo řohu na tamlohi non God, ale la opoia vara la vilimateira; (2) Iesu enia Moli Aulu, enia i pa jeu na tamlohi tari peresi na suiha aulu sei la lo řohu hin God; (3) God i pa sile na silesilea řuhu jea isana nona tamlohi sei la lo turu řilangi na nora rasua hinia, ale i pa leřuhu tavera hin la haratu la mate matan Iesu.

Retisohai sei mo tueni na tamlohi rasua sei tuai hin rani řilangi atu la mate mata nora rasua. Tamlohi rasua la levosahia vara hina purongo vara suiha na varama sohena nona mara Rome tuai la lo turu, pani God mo vujangia vara Natu Sipsip non God i pa jeu vevuhira. Levosahi atu mo vaira la řomřilangi na maurira.

Na tapulon puku nike, leta mo limaravrua la vano isana vao kalesia mo limaravrua, la lo vujangia na posposi tamlohi na vao kalesia hatehateahi, haratu mo řuhu, haratu mo sati (2.1-3.22).

John mo uli na hinau tari mo hitea sohen God mo vujangia isana. Mo sohena mavuho matea, pani John mo sopo juruvi. Mo hite na hinau matuvana la lo vujangi na suihan God peresi na talai tavera sei i pa silea isan la haratu la lo řohu hinia. Mo hite na jara sakele nona supe non God (4.1-11) peresi na viriviri pepa non Natu Sipsip (5.1-14). Natu Sipsip hasena i eři roi la pulu atu mo limaravrua hin viriviri pepa atu (6.1-8.5), angelo la tiv na trumpet non God (8.6-11.19), la surerei na jilivi mata talai (16.1-21) hin haratu la lo

vujangi na aria tavera non God sei i pa mai.

Hitahu vara la rani řilangi atu la isoiso, tamlohi non God sei la jeua, la pa lavi na leřuhu tavera non God sohen harihi:

‘Ka hitea! Nake, jaran God sei mo lo toho hinia, i pa toho peresi na tamlohi. I pa toho peresira, ale enira la pa nona tamlohi, ale God hasena i pa toho peresira, sohena nora God. I pa kamoti na wai matara tari na matara, i pa sopo te mateia, řomsasati teni tangi teni epe varihaji, matan hinau matan tuai la tihai.’ (21.3-4)

### Hin puku nike

1. Reti mata hinau la pa masese (1.1-8)
2. John mo hite Moli (1.9-20)
3. Leta la vano isan la vao kalesia atu mo limaravrua (2.1-3.22)
4. Haratu la lo lotu na tuka (4.1-11)
5. Viriviri pepa peresi la pulu atu mo limaravrua (5.1-6.17)
6. La lotu God na tuka (7.1-17)
7. Trumpet mo limaravrua (8.1-11.19)
8. Dragon peresi na maji jala sasati mo rua (12.1-13.18)
9. God mo vujangi na nona aria (14.1-15.8)
10. Jilivi mo limaravrua mata talai (16.1-21)
11. God mo jeu na nona meresahi (17.1-20.10)
12. Aria tavera non God (20.11-15)
13. Tuka Paro peresi na Varama Paro (21.1-8)
14. Jerusalem Paro (21.9-22.5)
15. I pa sopo tuai Křisto i pa mele mai (22.6-21)

### Reti Mata Hinau I Pa Masese

<sup>1</sup> God mo silea vara Iesu Křisto i vujangi na sava hinau mo viřonia vara la pa masese, i pa sopo tuai, isana nona volitusi hin malele sei; Iesu mo řule na nona angelo vara i vujangia isan nona volitusi John. <sup>2</sup> Ale enia mo vereuli na reti non God, peresi na sava hinau Iesu Křisto mo vujangia isana, hinau tari sei mo hitera. <sup>3</sup> Ale avulahi isan haratu mo evi reti sei isana tamlohi, mata hinau la pa

masese i vano isana tamlohi tinapua, ale avulahi isana tamlohi tari sei la rongoa, ale la ooloo hinia, matan pongi atu mo mariviti. <sup>4-5</sup> Uliuli non John mo vano isan la vao kalesia atu, mo limaravrua na province matan Asia.

Romŕuhu peresi na tamata la mai isamim, la tai isan God Tama, isan Iesu Kŕisto peresi la tanume ŕuhu atu mo limaravrua sei la lo toho na naho jara sakele nona supe non God. God enia mo lo toho nake, mo lo toho tiroma, ale enia i pa mai hitahu.

*Exo 3.14; Zec 4.1-10* Ale Iesu Kŕisto, haratu sei mo lo turu ŕilangi na nona vereulia, enia vora tiroma hin la haratu la pa mele turu na mateia, enia mo aulu na supe tari na varama.

Iesu Kŕisto enia haratu mo opoiŕa tavera, ale ŕaena mo roro, ale mo volituhuŕa na noŕa aria mata noŕa hehe. *Isa 55.4; Psa 89.27* <sup>6</sup> Ale enia mo vaiŕa ŕa mai na vao matea mata pŕis, ŕa tauri na suiha aulu isan nona God sei Tamana, i pa lavi na hasohaso, ale suihana i lo turu rani tui tui tarea, Amen. <sup>7</sup> Ka hitea! Iesu mo lo mai na telangi, ale tamlohi tari la pa hitea na matara, la haratu la lo ŕurua tuai sohena, la pa hitea, ale tavitavui tari na varama la pa tangi matana. Enia i pa sohena natu, amen. <sup>8</sup> Ale Moli God mo vereea mara, “Enau pulo hinau tari, enau na isoiso hinau tari, enau na lo toho nake, ale enau na lo toho tiroma, enau a pa mai. Enau suiha aulu atu mo tavera jea.”

### *Hinau John Mo Hitea*

<sup>9</sup> Enau John, voraimim matea, ale enŕa ŕa lo turu matea na rani ŕilangi hin mauri atu God mo aulu hinia, ŕa lo turu ŕilangi na ŕomperavu hin Iesu purongo, enau, la tauau na ureuren Patmos matan na lo retivujavujangi na Reti non God, ale matan na lo sorahi Iesu. <sup>10</sup> Ale, na rani lotu non Moli, Tanumen Moli mo maŕivisiau, ale na rongoa na leo matea mo tavera mo memera na haŕiku sohena leo

trumpet matea, <sup>11</sup> leo atu mo vereea mara, “O uli na hinau ko lo hitea na lolon te puku hatea, ale o sohaia i vano isan la vao kalesia atu mo limaravrua: isan Ephesus, isan Smyrna, isan Pergamum, isan Thyatira, isan Sardis, isan Philadelphia peresi Laodicea.” <sup>12</sup> Na posi vara a hitea vara leon hare natu, mo lo retireti isaku, ale na posi moiso, na hite na peri lamu mo limaravrua la vaira na gold la lo turu atu. <sup>13</sup> Ale na hite matea mo sohen Natun Tamlohi\* mo lo turu na livuhara. Mo ruru na ruru matea mo peravu mo tikeli na palona atano, ale ruru matea la vaia na gold mo eve ŕalihi na ŕumana hinia. *Dan 7.13; Dan 10.5*

<sup>14</sup> Patuna peresi na vuluna la lulu sohena katen, matana, o hitea la mera sohena pepe hapu. *Dan 7.9; Dan 10.6* <sup>15</sup> Palona la lo angiangi sohena bronze aen sei la tunia na hapu tavera, ale leona mo puhoni sohena ŕum tasi tavera matea. *Ezek 1.24; 43.2* <sup>16</sup> Mo lo tauri na vitusarasara mo limaravrua na matuana, ale sita matea mo voro tavalu rua mo lo malue na jingona. Nahona mo memera mo sohena alo tavera. <sup>17</sup> Nara na hitea, na jovi na palona sohena tamlohi matea mo mate, pani mo tau na matua limana hiniau mo vereea mara, “O sopo matahu, enau natu, Pulo Hinau Tari, ale enau Hitahu, <sup>18</sup> ale enau sei na lo mauri, na mate, pani ko hitea, nake na mele mauri, ale a pa mauri jejeu, ale na lavi na kia mata mate peresi na kia mata varama mata mateia.† <sup>19</sup> Ale matan haratu o uli na sava ko hitea. Haratu ko hitea moiso, ale na sava mo lo toho nake peresi na sava la pa masese hitahu. <sup>20</sup> A pa vereuli na ŕaramin la vitusarasara atu mo limaravrua sei ko lo hitera na matuaku peresi la peri lamu atu mo limaravrua sei la vaira na gold. La vitusarasara atu mo limaravrua, enira angelo matan la vao kalesia atu mo limaravrua, ale la peri lamu mo

\* **1:13:** Natun Tamlohi: enia natu, Iesu. † **1:18:** kia mata mate peresi na kia mata varama mata mateia: Kia mo lo ŕarami na suihan Iesu matan mo jeu na suihan mate peresi na jara atu mate la lo toho hinia matan i eŕi vaira la mele turu.

limaravrua atu, enira la vao kalesia atu mo limaravrua.”‡

## Leta La Vano Isana Vao Kalesia

### 2

#### *Leta Isan Ephesus*

Ale mo vereea vara:

<sup>1</sup> “Hinai akerihi natu, o pa ulia i vano isan angelo mata vao kalesia hin Ephesus: ‘Harihi retisohai sei non haratu mo lo tauri na vitusarasara mo limaravrua na matuana, ale mo lo hahau na livuhan la peri lamu mata gold atu mo limaravrua.’

<sup>2</sup> Mara, ‘Na levosahi na nom vavahinau, nom voko peresi na nom romperavu vara o lo turu rilangi na mauri rasua. Na levosahia vara ko sopo lavi te tamlohi sasati, ale ko vaihite na tamlohi hai sei la vereea lara enira la vahaŕule, pani mo vono, ale ko vileia vara enira la tamlohi halu. <sup>3</sup> Na levosahia vara ko lo tauri na nom romperavu na rani rilangi mata hijaku, ale ko sopo tinaŕihi na nom rasua.

<sup>4</sup> Pani hinai matea na sopo avulahi hinia isam! Enia mo sohen harihi: Nom opoia mo sopo mele rilangi sohen tiroma. <sup>5</sup> Matana, o to romromia vara ko jovi epu na nom opoia matan tiroma, o mele posi na nom hehe, ale o vai na nom opoia sohen tiroma. Pani vara i vono, a pa mele sinai a lavi naŕihi na nom peri lamu vara o sopo posi. <sup>6</sup> Pani mele hinai matea ko vaia mo tataholo, ko rohu na sava hinai tamlohi non Nicholas\* la lo vaira, ale enau sohen na rohu hinira.

<sup>7</sup> Isan haratu mo lo rongo, o tapurongo na sava Tanume Tapu mo lo vereea isan la vao kalesia atu, haratu mo jeu na suiŕhan sasati, ale mo turu rilangi mo tikeli na isoiso maurina, enau a pa majinga vara i hani na vuan vipahai atu mo lo sile mauri sei mo lo toho Paradise na tuka non God.’ ”

#### *Leta Isan Smyrna*

‡ **1:20:** angelo: Angelo akerihi enia angelo teni patu tamlohi, pani la sopo levosahia i ruhu vara mo lo vereea isan hare. \* **2:6:** tamlohi non Nicholas: Tamlohi hai la lo romromia lara Iesu mo lo retireti na tamlohi non Nicholas mara Antioch (O hite: Acts 6.5).

Mo mele vereea mara: *Rev 22.2; Ezek 28.13*

<sup>8</sup> “Hinai akerihi natu, o pa ulia i vano isan angelo mata vao kalesia hin Smyrna: ‘Harihi retisohai sei non haratu enia pulo hinai tari, enia isoiso hinai tari hitahu, mo mate, pani nake mo mele mauri!’

<sup>9</sup> Mara, ‘Na levosahia vara ko lavi na rani rilangi sohen sava moiso, ale na levosahia vara ko tilavono, pani engko ko tavitav, na levosahi la retisasati sei la vereea matam mo tai isan la haratu la vara enira Jew, pani enira la sopo Jew tataholo, mo vono enira vaon Setan.

<sup>10</sup> O sopo matahu matan la hinai rilangi sei la tatamahu moiso vara la mai isam, ale ko hitea, i pa sopo tuai, Tiapolo i pa tau te tatuamim na ima rilangi vara i vaihite kamim, ale ha pa rongo i sati mata rani i sangavulu, pani vara o romturu rilangi, hina purongo vara o mate matana, pani a pa sileho na nom rongoŕongo nona supe mata mauri.

<sup>11</sup> Isan haratu mo lo rongo, o tapurongo na sava Tanume Tapu mo lo vereea isan la vao kalesia atu, isan haratu mo jeu na suiŕhan sasati, ale mo turu rilangi mo tikeli na isoiso maurina, i pa sopo eŕi vano na harua mateia!’ ”

#### *Leta Isan Pergamum*

Mo mele vereea mara:

<sup>12</sup> “Hinai akerihi natu, o pa ulia i vano isan angelo mata vao kalesia hin Pergamum: ‘Harihi retisohai non haratu sei mo lo tauri na sita voro tavalu rua mata vuro!’

<sup>13</sup> Mara, ‘Na levosahia vara ko lo toho na jara sei Setan mo supe ea, pani ko lo taurilati na hijaku, ale ko sopo vunvuni na nom rasua hinai, hina purongo vara la taurilati Antipas noku tuetueni sei mo lo romturu rilangi, la vilia mo mate hin jara atu sei Setan mo lo toho ea.

<sup>14</sup> Pani na hite na hinai hai ko lo vaia mo sopo ruhu: tatuamim

la lo usuri na vujangi non Balaam. Tuai mo vere Balak vara i vujangi na natun Israel vara la eři hani na hanhahi sei la silea isana tamasi moiso, ale vara la usuri na mauri maji,<sup>15</sup> ale tatuamim sohena la lo usuri na vujangi non tamlohi non Nicholas,<sup>†</sup><sup>16</sup> Ale matana, o posi! Vara i vono, nakerihi purongo vara a mai a pa valum peresi la tamlohi sei la lo usuri Nicholas, ale a pa taira na sita tavalu rua mata vuro na jingoku.

<sup>17</sup> Isan haratu mo lo rongo, o tapurongo na sava Tanume Tapu mo lo vere a isan la vao kalesia atu, Isan haratu mo jeu na suiha sasati, ale mo turu řilangi mo tikeli na isoiso maurina, enau a pa silea hin hanhahi atu sei la tovia mana sei la jarohia.‡ Moiso enau a pa silea na vatu lulu matea isana, ale hin vatu atu hija paro matea mo lo toho hinia, pani haratu mo lavia enia hasena purongo i pa levosahi na řaramin hija atu.’ ”

#### *Leta Isan Thyatira*

Moli mo mele mauri mo vere a mara:

<sup>18</sup> “Hinai akerihi natu, o pa ulia i vano isan angelo mata vao kalesia hin Thyatira: ‘Reti nika enira retin Natun God! Mataka la lo hani sohena pepe hapu, paloku la lo angiangi sohena bronze aen mo tutuni.’

<sup>19</sup> Mara, ‘Na levosahi na nom vavahinau, nom opoia, nom rasua peresi na nom řomperavu mata turu řilangi, ale na levosahia vara ko lo vai na hinai nake mo jeu haratu tiroma.

<sup>20</sup> Pani hinai matea na sopo avulahi hinia isam: hařai sei Jezebel sei mo lo hase vere a vara enia pŗovet matea, ko majinga vara i lo vujangi na noku volitusi na malele halu matan vara la lo usuri na mauri maji, ale la hani na hanhahi sei la silea isana tamasi moiso. <sup>21</sup> Na silea na masapa isana moiso vara i posi na nona hehe, pani mo sopo opoia vara

i isoiso na nona mauri maji. <sup>22</sup> O lo levosahia vara a pa ari Jezebel na rojo matea na vatana, ale la haratu la lo vaivaileu peresia, la pa lavi na rongohaji tavera vara la sopo isoiso hin nona posposi sei, <sup>23</sup> ale a pa vilimatei na natuna, ale vao kalesia tari la pa levosahia vara enau haratu mo lo ale na hinai tari na lolo řomi tamlohi peresi na lolo mapu tamlohi. A pa silea na volimim i tataholo isamim hatehateahi i tataholo na nomim vavahinau. *Psa 7.9; Jer 17.10*

<sup>24</sup> Pani isana tatuamim Thyatira la haratu la sopo lelevosahi teni la usuri na vujangi non Jezebel sei hai la lo vere a vara enia vujangi puhoni non Setan, ale isamim a pa sopo eři mele vere te retileu tinapua hatea isamim matan vara a sopo mele tau te hinai puhoni isamim, <sup>25</sup> pani na vere a vara ha lo tauri řilangi na sava ka lo tauria moiso i tikeli pongi atu a pa mele mai hinia.

<sup>26</sup> Isan haratu mo jeu na suiha sasati, ale mo lo turu řilangi na noku vavahinau mo tikeli na isoiso maurina, a pa silea na suiha vara i aulu na mara jara tinatinapua, *Psa 2.8-9*

<sup>27</sup> ale i pa aulu hinia, i pa kilaura na maja aen, ale i pa viliroiroira sohena jilivi lepa purongo, i pa sohen suiha atu Tamaku mo sileau hinia, <sup>28</sup> ale a pa silera na majou řalavuhu. §

<sup>29</sup> Isan haratu mo lo rongo, o tapurongo na sava Tanume Tapu mo lo vere a isan la vao kalesia atu.’ ”

### 3

#### *Leta Isan Sardis*

Mo mele vere a mara:

<sup>1</sup> “Hinai akerihi natu, o pa ulia i vano isan angelo mata vao kalesia hin Sardis: ‘Harihi enia retisohai non haratu mo lo lavi la tanume řuhu non God atu mo limaravrua peresi la vitusarasara atu mo limaravrua.’

† 2:15: tamlohi non Nicholas: hite: 2.6. ‡ 2:17: mana: Hin rani atu tavitavin Israel la lo hahau na jara tano koru tuai, God mo vahanira hin hanhahi sei la tovia mana. Hai la vere a lara matea mo jarohi na sopesopena hai na puhoro tapu, vara i toho i tikeli rani atu Messiah i pa mele mai hinia matan vara i pa vahani na nona tamlohi hinia. § 2:28: majou řalavuhu: Rev 22.16 Hija atu Křisto enia ‘Majou řalavuhu’.

Mara, 'Na levosahi na nom vavahinau, ale tamlohi tari la lo rasua vara nom rasua mo lo mauri, pani mo mate! <sup>2</sup> O lo kilau! Na hitea sohena vara nom rasua ko sopo ooloo varaʻuhu hin God, ale o mele vai na nom rasua i mele suiha matan vara i vono, i pa tihai. <sup>3</sup> O mele ʻomʻomi haratu sei ko lavia moiso peresi haratu ko rongoa moiso, o taurilatia i ʻrilangi, ale o posi mata nom hehe. Vara o sopo tatamahu, enau a pa mai sohena tamlohi vavanaho matea, o pa sopo levosahia vara a pa mai isam pangisa.

<sup>4</sup> Pani tatuamim Sardis nomim ruru la sopo lumiha na hehe. La pa hahau peresiau na ruru lulu matan mo tataholo vara la vaia sohena.

<sup>5</sup> Isan haratu mo jeu na suihan sasati, ale mo turu ʻrilangi mo tikeli na isoiso maurina, i pa ruru na ruru lulu sohera, a pa sopo jarai na hijana na Puku mata Mauri,\* pani enau a pa vere na hijana isan Tamaku peresi na nona angelo vara enia noku. *Psa 69.28; Rev 20.12*

<sup>6</sup> Isan haratu mo lo rongo, o tapurongo na sava Tanume Tapu mo lo vereea isan la vao kalesia atu.' "

#### *Leta Isan Philadelphia*

Mo mele vereea vara:

<sup>7</sup> "Hinau akerihi natu, o pa ulia i vano isan angelo mata vao kalesia hin Philadelphia: 'Harihi retisohai sei non haratu mo tapu, enia mo varaʻuhu, ale enia mo lo lavi na kia mata suiha non Supe David, enia mo roi na pelati, i pa sopo te hatea i eʻi mele pelatia, vara enia mo pelati na matarua, i pa sopo te hatea i eʻi mele roia.' *Isa 22.22; Job 12.14*

<sup>8</sup> Mara, 'Na levosahi na nom vavahinau, ale ko levosahia, enau na tau na matarua mo lo roi na nahom, i pa sopo te hatea i eʻi pelatia. Na levosahia vara engko ko sopo ʻrilangi, pani ko lo ooloo na noku reti, ale ko sopo vunvunia vara engko noku tamlohi. <sup>9</sup> Ale ko levosahia, a pa vai haratu la vereea vara enira Jew, pani

enira tamlohi halu vaon ima lotu non Setan, o pa hitea, enau a pa vaira la mai vara la papaohi na palom matan vara tamlohi la pa hitevosahia vara enau na opoiho. *Isa 49.23; Isa 43.4*

<sup>10</sup> Matan ko lo taurilati na noku reti vara o pa ʻomperavu mata turu ʻrilangi, ale matana, a pa kilau mamahuniho na rani vaihite atu mo lo mai mata tamlohi mo isoiso na varama vara la pa vano hinia. <sup>11</sup> I pa sopo tuai a pa mai, ale o tauri ʻrilangi na sava ko lo tauria matan vara tea i sopo eʻi lavi narihi na nom ʻrongoʻongo nona supe.

<sup>12</sup> Isan haratu mo jeu na suihan sasati, ale mo lo turu ʻrilangi mo tikeli na isoiso maurina, enau a pa vaia i mai peri tavera matea na ima lotu non noku God, ale i pa toho jejeu atu. A pa uli na hijan noku God peresi na hijan taon tavera atu non noku God hinia, jara atu enia Jerusalem Paro atu noku God i pa sohaia i sevuti na tuka i pa mai na varama. Ale enau sohena a pa uli na hijaku paro hin tamlohi atu.

<sup>13</sup> Isan haratu mo lo rongo, o tapurongo na sava Tanume Tapu mo lo vereea isan la vao kalesia atu.' "

#### *Leta Isan Laodicea*

Mo mele vereea vara:

<sup>14</sup> "Hinau akerihi natu, o pa ulia i vano isan angelo mata vao kalesia hin Laodicea: 'Harihi retisohai non haratu la lo tovia Amen! Enia haratu sei enia tuetueni atu mo lo ʻomturu ʻrilangi enia mo varaʻuhu, ale enia pulo vavahinau non God.' *Prov 8.22*

<sup>15</sup> Mara, 'Na levosahi na nom vavahinau, pani ko sohena hanhahi mo sopo ʻruhu hin te hinau, ko sopo noha, ale ko sopo koru, pani enau na opoia vara o noha teni o koru, <sup>16</sup> ale matan ko sopo noha teni koru, pani ko wai wai purongo, a pa hasorihio na jingoku, <sup>17</sup> matan, ko vereea kora, "Enau na tavitav, na takonahi na hinau matuvana, na sopo mele opoi te hinau hatea." Pani ko sopo levosahia vara engko tamlohi marua matea, engko tamlohi matea la sopo

\* **3:5:** Puku mata Mauri: Puku atu God mo uli na hijan nona tamlohi hinia.

eři řomřomiho, engko ko tilavono, engko ko matavuso, ale engko ko malamala.

<sup>18</sup> Ale matana, na lo retituetueni vara o voli te gold isaku, gold sei la kuku nařihi na utauta hinia, ale enia i pa vaiho o tavgav, ale vara o voli te ruru lulu isaku matan vara o eři tatavuhoro na nom malamala hinia. O voli te meresin matan vara o eři pasia na matam vara o eři kilau.

<sup>19</sup> Isan haratu na opoira, na vereuli na nora hehe, ale na sile na talai isara. Ale matana, o tuntuni na maurim, ale o posi na nom hehe. <sup>20</sup> O kilau nike! Enau na lo turu na lo řirangi na pelati; vara tea mo rongo na leoku, ale mo roi na matarua, enau a pa unu, ale a pa hanhani peresia, ale enia i pa hanhani peresiau.

<sup>21</sup> Isan haratu mo jeu na suiham sasati, ale mo lo turu řilangi mo tikeli na isoiso maurina, a pa majinga vara i sakele peresiau na noku jara sakele nona supe, sohen enau na jeu na noku meresahi moiso, ale na lo sakele peresi Tamaku na nona jara sakele nona supe.

<sup>22</sup> Isan haratu mo lo rongo, o tapurongo na sava Tanume Tapu mo lo vereia isan la vao kalesia atu.’ ”

#### 4

<sup>1</sup> Hitahun la hinau atu na kilau sahe, e! Matarua matea mo roi na tuka. Ale leo atu tiroma sei mo sohena trumpet mo mele retireti isaku mara, “O sinai nike aulu! A pa vujangiho na sava mo viřonia vara la pa malue hitahu na hinau ko hitera moiso.” <sup>2</sup> Vahatea atu suiham Tanume Tapu mo mai isaku, e! Jara sakele non supe matea mo lo turu na tuka, ale na hite haratu mo lo sakele hinia, <sup>3</sup> ale haratu mo lo sakele atu mo lo angiangi, majhina mo sohena vatu řuhu sei jasper mo joriha řořoha, ale sohena vatu řuhu sei carnelian mo hahara. Nuenue matea mo řalihi jara sakele non supe atu, majhin nuenue atu mo sohena vatu řuhu sei emerald mo heja rau pahai.

<sup>4</sup> Moiso, jara sakele non supe mo ngavulu rua mo vati tinapua la toho

řalihi jara sakele non supe atu na livuha jara. Ale hin la jara sakele nona supe hatehateahi atu, tamlohi aulu mo ngavulu rua mo vati la lo sakele hinira, la ruru na ruru lulu, ale la tau na řongořongo mata gold nona supe na patura. <sup>5</sup> Vaha mo vilasi, piri mo roroa la lo malue hin jara sakele non supe atu na livuhan jara atu. Hapu jilangi mo limaravrua la lo hani na nahon jara sakele non supe atu, enira natu, la tanume řuhu mo limaravrua atu non God. *Exo 19.16; Ezek 1.13; Zec 4.2* <sup>6</sup> Ale na nahon jara sakele non supe atu, lepa mo sohena tasi mata glas mo niro sohena crystal. Ralihi na jara sakele non supe na livuha jara, hinau mauri mo vati la lo turu ea, matara mo lavi vevuhi na epera na nahora peresi na hařira. *Ezek 1.5-10, 22; 10.14*

<sup>7</sup> Ale tiroman la hinau mauri atu mo sohena Lion, haruana mo sohena natu buluk, ale hatoluna mo lavi na naho matea mo sohena naho tamlohi, ale havatina mo sohena mala mo lo avu aulu. <sup>8</sup> La hinau mauri atu enira hatehateahi, hapara mo limarave, ale epera tari la mařivi na matara. Ale la lo lalavete tarea na rani peresi na vutepongi mo sopo te isoisona lara, *Ezek 1.18; 10.12; Isa 6.2-3*

“Tapu, tapu, Moli God sei mo tapu, enia suiha aulu atu mo tavera jea,

mo lo toho moiso, ale mo lo toho nake, ale i pa mai!”

<sup>9</sup> Ale vara la hinau mauri atu la lo sile na hasohaso peresi na ololo, ale la lo vere meje isan haratu sei mo lo sakele na jara sakele non supe atu mo lo mauri mata rani tui tui tarea, <sup>10</sup> ale la tamlohi aulu atu mo ngavulu rua mo vati (24) la lo sakele řalihi haratu sei mo lo sakele na jara sakele non supe, la lo papaohi na nahona, ale la lo lotu haratu sei mo lo mauri mata rani tui tui, ale la pulahi na nora řongořongo mata gold nona supe na naho jara sakele non supe atu, ale la lo vereia lara,

<sup>11</sup> “Nomam Moli, nomam God,



mo tataholo vara o lavi na haso-  
haso,  
ale oloolo tavera peresi na nom suiha  
tavera,  
matan engko ko vai na hinau  
tari,  
ale masalom ko vaira la lo toho.”

## 5

### *Natu Sipsip Mo Roi Na Viriviri Pepa*

<sup>1</sup> Ale na hite na matua liman haratu sei mo lo sakele na jara sakele non supe, na hitea mo lo tauri na viriviri pepa matea sei la uliuli hinia tavalu rua.\* ale la puluia na jara mo limaravrua tinatinapua. *Ezek 2.9-10; Isa 29.11*

<sup>2</sup> Na hite na angelo suiha tavera matea, ale mo vereea na leo tavera matea mara, “Hare mo tataholo vara i roi viriviri pepa nike, ale vara i řari na puluna?” <sup>3</sup> Pani mo sopo tea na tuka teni na varama teni na lolo varama mata mateia vara i tataholo vara i roi viriviri pepa atu teni i hite na lolona.

<sup>4</sup> Ale, na tangi tavera matan mo sopo tea mo tataholo vara i roi viriviri pepa atu teni i hite na lolona.

<sup>5</sup> Ale vonan la tamlohi aulu atu matea mo vereea isaku mara, “O sopo tangi, o to kilau vano, haratu la tovia Lion sei enia tavgavuın Judah matea,† ale enia pin David mo jeu na nona meresahi moiso, ale, enia i eři roi viriviri pepa atu peresi la puluna atu mo limaravrua.” *Gen 49.9; Isa 11.1, 10*

<sup>6</sup> Ale na hite na natu sipsip matea mo lo turu na livuhan jara atu. Hin jara atu natu, la hinau mauri mo vati atu peresi la tamlohi aulu atu mo ngavulu rua mo vati (24)

la lo sakele řalihi na jara sakele non supe ea. Ale natu sipsip atu, mo sohena la vilimateia moiso, pani mo lo turu, ale palana mo limaravrua, ale matana mo limaravrua, enira la tanume řuhu atu mo limaravrua non

God sei mo lo řulera vara la vano na jara tari na varama. *Isa 53.7; Zec 4.10*

<sup>7</sup> Ale Natu Sipsip mo sinai mo lavi viriviri pepa atu na matua liman haratu sei mo lo sakele na jara sakele non supe, <sup>8</sup> ale mo lavia moiso natu, la hinau mauri mo vati atu peresi la tamlohi aulu atu mo ngavulu rua mo vati (24) la juruvi

popovi na lepa atano na nahon Natu Sipsip, enira hatehateahi la tauri na pue tangtangi matematea peresi na puru mata gold la mařivi na hasori,‡ hasori sei natu, enia usiusi non nona tapuhi. *Psa 141.2*

<sup>9</sup> Ale la lavi na vete paro matea lara, “Engko hasem ko tataholo vara o lavi viriviri pepa atu,

o roi na puluna matan la vilimateiho,

ale řaem mo volituhu na tavgavui tari, na leo tari,

ale tamlohi purongo peresi na mara jara tinatinapua tari vara la mai non God,

<sup>10</sup> ale ko viřonira la mai na vao matea mata přis

la tauri na suiha aulu isan nořa God,

ale la pa tauri na suiha na varama.”

*Exo 19.6; Rev 1.6*

<sup>11</sup> Ale na kilau vano, na rongo na leo angelo matuvana la toho řalihi na jara sakele non supe atu peresi na leon hinau mo vati atu peresi la tamlohi aulu atu, peresi la vao tavera hajavua atu, tea i sopo eři evira. *Dan 7.10*

<sup>12</sup> Ale la lo vereea na leo tavera matea lara,

“Natu Sipsip la vilimateia,

enia mo tataholo matan vara i lavi na suiha,

tavgav, lelevosahi, řilangi, oloolo,

hija aulu peresi na hasohaso.”

<sup>13</sup> Ale na rongo na hinau tari la lo mauri na tuka, na varama, na lolo varama, ale na tasi, ale hinau mo

\* **5:1:** viriviri pepa: Scroll la vaia tuai na huri nani teni pepa, ale la tau puluna peresi wax mata kandeli. † **5:5:** Lion: Lion enia puskat jala mo tavera jea la suiha. Vaon Israel enia Judah la tovia Lion, Supe David mo tai isan tavgavuın Judah. ‡ **5:8:** hasori: Hinau sohena tobak la sulia mata, ale asuna mo hasori mo řuhu.

isoiso sei la lo toho hinira, la lalavete isan la tupra rua atu lara,  
 “Isan haratu sei mo lo sakele na jara sakele non supe,  
 peresi Natu Sipsip, la pa avulahi řuhu,  
 ale la pa lavi na hasohaso,  
 peresi na hija aulu,  
 peresi na suiha tavera tarea mata rani tui tui tarea!”

<sup>14</sup> La hinau atu mo vati atu la vereea lara, “Amen!” Ale la tamlohi aulu atu la juruvi popovi na lepa atano, ale la lotu.

## 6

### *Mo Roi Na Pulu Viriviri Pepa Atu*

<sup>1</sup> Na pa lo kilau na hite Natu Sipsip mo roi na pulu matea vonan la haratu mo limaravrua, ale na rongo vonara matea hin la hinau mauri mo vati atu mo ulo, ale leona mo sohena roroa piri mo vereea mara, “O mai!” <sup>2</sup> Ale na kilau sahe, e! Hos lulu matea. Haratu mo lo sakele hinia mo lavi na paka matea, ale la silea na řongořongo matea nona supe. Ale tarea enia mo lo jeu na nona mere-sahi, ale mo malue vara i mele jeu tea. *Zec 1.8; 6.3, 6*

<sup>3</sup> Na hite Natu Sipsip mo roi na harua pulu, ale na rongo na haruan hinau mauri atu mo vereea mara, “O mai!” <sup>4</sup> Ale hos tinapua matea majhina mo hahara mera mo malue. Ale haratu mo lo sakele hinia la majinga vara i lavi nařihi na tamata na varama matan vara tamlohi la pa vilivilira na vuro, ale la silea na sita tavera matea mata valum. *Zec 1.8; 6.2*

<sup>5</sup> Natu Sipsip mara mo roi na hatolu pulu, na rongo na hatolun la hinau mauri atu mo vereea mara, “O mai!” Ale na kilau sahe, e! Hos viriha matea. Haratu mo lo sakele hinia mo lo tauri na skele matea mo lo keho na limana matea. *Zec 6.2, 6*

<sup>6</sup> Ale na rongo na hinau matea sohena leo matea mo lo malue na livuhan la hinau mauri mo vati atu, mo vereea mara, “Kilo wit matea volina i pa tataholo na volvoli mata rani matea. Ale kilo barley mo tolu

volina i pa tataholo na volvoli mata rani matea. Pani o sopo komo na wel mata olive peresi na waen.”

<sup>7</sup> Ale Natu Sipsip mara mo roi na havati pulu, na rongo na havatin la hinau mauri atu mo vereea mara, “O mai!” <sup>8</sup> Ale na kilau vano, e! Hos matea majhina mo heja joriha. Hijan haratu mo lo sakele hinia enia Mateia, ale varama mata mateia mo lo usuria. La sile na suiha isara vara la vilimatei na tamlohi matea na tamlohi tupu vati na varama. La pa vilira sohen harihi: peresi na sita vuro, peresi na marua, peresi na rojoa sati tinatinapua, ale na maji jala. *Ezek 14.21*

<sup>9</sup> Ale Natu Sipsip mara mo roi na halima pulu, na hite na pulo votavota na Temple, tanumen la haratu sei la vilimateira na varama mata la lo vereuli na reti non God, ale mata nora rasua. <sup>10</sup> La ulo řilangi na leo matea lara, “Moli Suiha, engko ko tapu, engko ko varařuhu, pangisa o pa sile na talai isara, pangisa o pa kele na řaemam isan la haratu na varama?”

<sup>11</sup> Ale la silera hatehateahi na ruru lulu matematea, ale la vereea isara vara la lo mapu makomona tako, i vano tikeli na rani evin la voraira volitusi tinapua peresi na voraira na rasua la mate sohera.

<sup>12</sup> Natu Sipsip mara mo roi na halimarave pulu, ale na kilau vano, e! Mihi tavera matea, ale alo mo posi mo viriha řořoha, ale vitu mo posi mo hahara sohena řae. <sup>13</sup> Ale vitusarasara na masapa la jovi na varama sohena poroti vua pahai la jovi na langivili. *Isa 34.4* <sup>14</sup> Masapa mo mařari mo tihai sohena la viriviri nařihi na epa matea, ale vutivuti tari peresi na ureure tari la juha la rovo na jarara. *Rev 16.20*

<sup>15</sup> Ale supe mata varama peresi na tamlohi la lo lavi na hija tavera, patu tamlohi mata vuro peresi haratu la tavgav peresi la haratu la suiha, ale tamlohi tari, slev peresi tamlohi materi la luhu na papa peresi na patu-malo na vutivuti. *Isa 2.19-21*

<sup>16</sup> La ulo isana vutivuti peresi na patumalo lara, “Ha jovi, ha tatavuhi kamam, ale ha jarohi kamam na nahon haratu mo lo sakele na jara sakele non supe peresi na talai lolokoru mata hehe non Natu Sipsip, *Hos 10.8* <sup>17</sup> matan rani tavera atu mata talai lolokoru non God mata hehe peresi non Natu Sipsip mo mai, ale hare natu, i pa efi turu hinia?” *Joel 2.11; Mal 3.2*

## La Lotu God Na Tuka

### 7

#### 144,000 Non God

<sup>1</sup> Hitahun haratu na hite la angelo atu mo vati, la lo turu hin la pulo varama atu mo vati, ale la angelo atu la lo taurilati la langi atu mo vati na varama vara i pa sopo te langi hatea i efi sere na varama teni i sere na tasi teni i sere te vipahai hatea. <sup>2</sup> Ale na hite na angelo tinapua matea mo lo vele Opae mo tauri na taipulu non God mauri, ale mo ulo tavera isan la angelo atu mo vati sei la lavi na suiha vara la pa efi komo na varama peresi na tasi, *Jer 49.36; Dan 7.2; Zec 6.5* <sup>3</sup> mo verea mara, “Ha sopo komo na varama teni tasi teni te vipahai hatea tako matan ra sopo lo tau na taipulu na punghori volitusi non nofa God.” *Ezek 9.4, 6*

<sup>4</sup> Ale na rongo na evin la tamlohi atu la tau na taipulu hinira, mo tikeli 144,000 ale la tamlohi atu la tai na tavitavui tari matan Israel:

- <sup>5</sup> 12,000 na tavitavuin Judah,
- 12,000 na tavitavuin Reuben,
- 12,000 na tavitavuin Gad,
- <sup>6</sup> 12,000 na tavitavuin Asher,
- 12,000 na tavitavuin Naphtali,
- 12,000 na tavitavuin Manasseh,
- <sup>7</sup> 12,000 na tavitavuin Simeon,
- 12,000 na tavitavuin Levi,
- 12,000 na tavitavuin Issachar,
- <sup>8</sup> 12,000 na tavitavuin Zebulun,
- 12,000 na tavitavuin Joseph, peresi
- 12,000 na tavitavuin Benjamin.

#### Vao Tari Na Varama

<sup>9</sup> Hitahun haratu na kilau vano, e! Vao tavera matea tea i sopo efi evira, la mara jara tinatinapua tari,

tavitavui tari, ale tamlohi purongo tari, peresi na leo tari la lo turu na naho jara sakele non supe, ale na nahon Natu Sipsip. La ruru na ruru lulu peravu, ale la lo tauri na rau viniu na limara, <sup>10</sup> ale la lo ulo lara, “Suiha mata juri na tamlohi mo lo toho na liman nofa God, mo lo sakele na jara sakele non supe peresi Natu Sipsip.”

<sup>11</sup> Ale angelo tari sei la lo turu ralihi na jara sakele non supe peresi la tamlohi aulu tari atu peresi la hinau mauri atu mo vati, enira mo isoiso la juruvi popovi na lepa atano na naho jara sakele non supe, ale la lotu God.

<sup>12</sup> Lara, “Amen! Avulahi isana, hasohasona, lelevosahi, vere meje, oloolo, suiha peresi na rilangi, enira non nofa God mata rani tui tui tarea! Amen!”

<sup>13</sup> Ale vonan la tamlohi aulu atu matea mo usia isaku mara, “Ko levosahi la tamlohi nike sei la lo ruru na ruru lulu peravu? Ko levosahia vara la tai epu?”

<sup>14</sup> Na raramia nara, “Tapala, mo vono, pani engko ko levosahia!”

Ale mo verea isaku mara, “La haranike natu, la jelu hin pongi rilangi tavera atu. La hoje na nora ruru peravu na raen Natu Sipsip ale mo vaira la lulu. <sup>15</sup> Ale matana, la efi turu na naho jara sakele nona supe non God vara la lotua tarea na nona Temple, ale haratu mo lo sakele na jara sakele nona supe enia i pa lo kilaura. <sup>16</sup> La pa sopo efi marohati teni la marohu hin te rani, ale alo i pa sopo efi vilira, teni langi tutuni i komora, <sup>17</sup> matan Natu Sipsip sei na livuha jara mata jara sakele nona supe i pa kilaura, ale i pa tiromara la vano na patu wai sei la sile na mauri, ale God i pa kamoti na waimata na matara.”

### 8

#### Mo Roi Na Halimaravrua Pulu

<sup>1</sup> Ale moiso Natu Sipsip mo roi na halimaravruan la pulu atu, ale mo sopo te vaore na tuka korong mata

sope aoa matea. <sup>2</sup> Ale na hite la angelo atu mo limaravrúa sei la lo turu na nahon God la silera na trumpet matematea.

<sup>3</sup> Ale angelo tinapua matea mo lavi na jilivi mata gold matea mata i suli na hasori, mo sinai mo turu na votavota atu. Ale la silea na hasori matuvana matan vara i sohaia peresi na usiusi nona tapuhi tari na votavota sei la vaia na gold na naho jara sakele non supe. <sup>4</sup> Ale asu hasori peresi na usiusi nona tapuhi la tai na liman angelo atu, la sahe aulu na nahon God.

<sup>5</sup> Moiso angelo atu mo sohoni na vara hapu hani mata votavota na jilivi hasori, ale mo pulahia na varama, ale piri mo roroa, vaha mo vilasi, ale mihi matea mo hisu.

### *Trumpet La Tiv*

<sup>6</sup> Ale la angelo atu mo limaravrúa la lo tauri na trumpet la tatamahu vara la tiv la trumpet atu.

<sup>7</sup> Ale tiroma angelo mo tiv na nona trumpet, ale vatu aes peresi na hapu la hoi peresi na ŕae la jovi na varama, ale mo suli na hatolu vipahai tari peresi na hatolu ŕuvuŕuvu tari na varama.

<sup>8</sup> Harua angelo mo tiv na nona trumpet, ale hinau matea mo sohena vutivuti tavera mata hapu hani, la pulahia mo sivo na lolo tasi, ale hatolu tasi na varama mo mai ŕae, <sup>9</sup> hatolu maji tasi tari na varama la mate, ale mo komo na hatolu lanis tari sohena.

<sup>10</sup> Hatolu angelo mo tiv na nona trumpet, ale vitusarasara tavera matea mo jovi na masapa mo hani mo pepe tavera mo jovi na hatolu wai roro tari peresi na hatolu patu wai tari na varama. <sup>11</sup> Ale hijan vitusarasara atu enia Hohona, ale hatolu wai tari atu la mai la hohona, ale tamlohi matuvana la mate matan wai hohona atu. <sup>12</sup> Havati angelo mo tiv na nona trumpet, ale hinau matea mo vili naŕihi na hatolu mera alo, peresi na hatolu mera vitu peresi na hatolu mera vitusarasara. Alo mo sopo mera na hatolu rani matea, ale

vitu peresi na vitusarasara la sopo mera na hatolu vutepongi matea.

<sup>13</sup> Ale na hite na mala matea mo hasena avu roto na masapa, mo lo ulo mara, “Rani sasati, rani sasati, rani sasati isana tamlohi tari sei la lo toho na varama matan la angelo atu mo tolu la tatamahu vara la tiv na nora trumpet.”

## 9

<sup>1</sup> Halima angelo mo tiv na nona trumpet, ale na hite na vitusarasara matea matan tuka mo jovi na varama, ale la sile vitusarasara atu na kia mata mataruan koko tavera jea atu sei mo sivo atano jea na lolo varama mata mateia. <sup>2</sup> Ale mo roi koko tavera jea atu sei mo sivo atano jea na lolo varama mata mateia, ale asuna mo lo malue sohena asu hapu tavera matea. Alo peresi na masapa la ŕoŕoha na asun koko atu. <sup>3</sup> Ale hatpoha la malue na asun koko atu la tatavu na varama. La silera na suiha mo tataholo na suiha novu lepa.

<sup>4</sup> La vereá isan la hatpoha atu vara la pa sopo komo na ŕuvu teni te hinau mo lo ulua teni te vipahai hatea, pani vara la pa komo la tamlohi atu purongo sei la sopo lavi na matamata non God na pungorira. <sup>5</sup> La majinga na hatpoha vara la vailejilejira mata vitu i lima, pani la horora vara la sopo vilimateira, ale epe varihaji la silea mo sohena novu lepa mo hatira. <sup>6</sup> Hin la rani atu tamlohi la pa opoi na mate, pani la pa sopo eŕi mate. La pa ŕomtau mata mate, pani mateia i pa rovo hinira.

<sup>7</sup> La hatpoha atu la sohena hos la tatamahu mata vuro. Na patura la tau na hinau sohena ŕongoŕongo mata gold nona supe, ale la lavi na naho tamlohi, <sup>8</sup> vulura mo peravu sohena vulu haŕai, ale huŕura la sohena huŕu lion. <sup>9</sup> Na ŕumara la ruru na ruru vuro la vaira na aen. Rum hapara mo sohena ŕum palo takonahi hos la lo reve na kartira la maro na vuro. <sup>10</sup> Viŕira la sohena viŕi novu lepa, ale suiha varihaji matana, i pa tikeli na vitu i lima. <sup>11</sup> Nora supe enia pa angelo atu sei mo lo aulu hin koko

tavera jea atu sei mo sivo atano jea na lolo varama mata mateia, hijana na leon tavitavin Israel enia 'Abaddon', ale na leo mara Greek enia 'Apollyon'.\*

<sup>12</sup> Ale tiroma rani sasati mo masese moiso, pani ka hitea, rani sasati mo rua la lo usukurira la lo mai.

<sup>13</sup> Halimarave angelo mo tiv na nona trumpet, ale na rongo na leo matea mo malue hin la pala atu mo vati na pingo votavota atu la vaia na gold sei mo lo turu na nahon God, <sup>14</sup> leo atu mo vereia isan angelo atu mo lo tauri na trumpet mara, "O uli na'ihira la angelo atu mo vati sei la pesilatira na pahisa wai roro tavera Euphrates." <sup>15</sup> Ale la tatamahuni la angelo sei mo vati moiso matan aoa ak'erihira, rani ak'erihira, vitu ak'erihira peresi tauni ak'erihira vara la pa uli na'ihira matan vara la pa vilimatei na hatolu tamlohi tari na varama. <sup>16</sup> Na rongoa vara evin la tamlohi vuro atu la lo sakele na hos mo tikeli 200,000,000.

<sup>17</sup> Na hinau sei God mo vujangiau hinia, na hite la tamlohi atu la lo maro na hos la ruru na ruru vuro mata ŋumara, majhira mo hahara mera, ale mo heja tasi, ale mo joriha. Patu hos la sohena patu lion, hapu peresi asu hapu peresi na vatu tutuni mata volkeno la lo malue na jingora. <sup>18</sup> Ale hatolu tamlohi tari na varama la pa mate matan rongo-haji sasati mo tolu sei, ale hapu atu peresi na asu hapu peresi na vatu tutuni mata volkeno mo lo malue na jingora. <sup>19</sup> Matan suiha la hos atu mo lo toho na jingora peresi na vi'ihira matan vi'ihira la sohena mata, ale patura la sile na epe varihaji.

<sup>20</sup> Vao tamlohi na varama la sopo mate hin la rongohaji sasati atu, pani la sopo posi na nora vavahinau, ale la sopo isoiso na nora lotu mata tanume sasati peresi na tamasi sei la vaira na gold, silver, bronze, vatu teni laho pahai atu la sopo e'ihira kilau, teni tea i rorongona teni i hahau. <sup>21</sup> La sopo isoiso na nora vilimatei na tamlohi, na nora

sui, na nora mauri maji peresi na nora vavanaho.

## 10

### *Angelo Atu Peresi Na Viriviri Pepa Rihirihira*

<sup>1</sup> Ale na mele hite na angelo suiha tinapua matea mo lo sevuti na tuka. Telangi matea mo leputia, ale nuenuenu matea mo lo toho aulu na patuna. Nahona mo sohena alo, ale palona mo sohena peri hapu mo lo hani, <sup>2</sup> ale na limana mo lo tauri na viriviri pepa rihirihira matea sei mo roi moiso. Mo lo turu atu, ale matua palona na tasi, ale marau palona na lepa, <sup>3</sup> ale mo ulu na leo matea ŋumuna mo puhoni sohena ulu lion, ale na rani mo ulu na rongo la piri atu mo limaravrua la roroa na leora.

<sup>4</sup> Piri atu mo limaravrua la roroa, ale na pa lo tatamahu vara a uli na sava la vereia, pani leo matea mo tai na tuka mo ulu mara, "O sopo uli na hinau la vereia! O jarohira vara tea i pa sopo levosahia."

<sup>5</sup> Ale angelo atu na hitea mo lo turu na tasi peresi na lepa mo tahe na matua limana na tuka, <sup>6</sup> Ale mo vai na retitauhi matea na hijan God atu mo mauri mata rani tui tui sei mo vai na tuka peresi na varama peresi na tasi peresi na hinau tari la mauri. Angelo atu mo vereia vara God i pa sopo mele sasaovi, <sup>7</sup> ale sava God mo vereia moiso isan la nona volitusi sei la p'ovet mata nona hina luhu tavera, mo vara nakerihira hinau tari la pa masese hin rani atu vara halimaravruan la angelo atu i tiv na nona trumpet.

<sup>8</sup> Ale leo atu mo tai na tuka mo mele retireti isaku mara, "O vano o lavi viriviri pepa atu mo vuhesi moiso na liman angelo atu mo lo turu na tasi peresi na lepa!"

<sup>9</sup> Ale na vano isan angelo atu na usia vara i sileau hin viriviri pepa rihirihira atu. Ale angelo atu mo vereia mara, "O lavi viriviri pepa atu o hania! I pa vai na pangem i nini, pani na jingom i pa memeje sohena wai

\* **9:11:** Abaddon: Raramin hija sei Abaddon enia 'Haratu mata komokomo'.

sugabag.” <sup>10</sup> Ale na lavi viriviri pepa rihirihi atu na liman angelo atu, ale na hania. Memejina mo sohena wai sugabag, pani na pangeku mo nini.

<sup>11</sup> Hitahu la vereea isaku lara, “O pa mele vere na hinau la pa masese isana tamlohi purongo matuvana peresi na mara jara tinatinapua matuvana peresi na leo matuvana, ale peresi na supe matuvana.”

## 11

### *Tuetueni Mo Rua*

<sup>1</sup> Hitahun haratu la sileau na vipahai ava matea, ale la vereea lara, “O turu o ava řalihi na Temple non God, ale o sopo řomaliho na votavota peresi na evi tamlohi la lo lotu ea. <sup>2</sup> Pani o sopo ava na jara mo řalihi hin rope atu na jingoima Temple matan God mo majinga vara i pa toho na lima vao tamlohi jara tinapua tari atu na varama sei la sopo noku tamlohi vara la pa varasi taon tavera tapu atu Jerusalem, i tikeli te vitu i ngavulu vati i rua. <sup>3</sup> A pa sile na suiha isan la noku tuetueni nike mo rua sei la ruru na ruru mata řomsati sei mo sohena paki niu, vara la pa retimangovi mata rani i tari vahatea i ngav sangavulu rua i ngavulu limarave (1,260).”

<sup>4</sup> La tupra rua nike, enira pulo olive mo rua peresi na peri lamu mo rua la vaira na gold sei la lo turu na nahon Moli God non varama. <sup>5</sup> Ale tea vara i vaihitea vara i komora, hapu i pa malue na jingora i pa komo na nora meresahi. Ale vara tea mo opoia vara i komora, enia i pa mate. <sup>6</sup> Hin rani atu vara la lo retimangovi, la lavi na suiha vara na sava rani la opoia, la pa horo na masapa matan i sopo sile na usa i jovi, ale la eři posi na wai tavera la mai řae, ale la pa eři vili na tamlohi na varama na rongohaji tavera tinatinapu.

<sup>7</sup> Hin rani atu vara la tamlohi tuetueni tupra rua atu la isoiso na nora vereulia, maji jala sasati atu i pa malue hin koko tavera jea atu sei mo sivo atano jea na lolo varama mata mateia vara i valum peresira, ale i

pa jeura i vilimateira. <sup>8</sup> Tarapera la plahau hinira na malelen taon tavera atu sei tuai la vosae nora Moli na talopeilopei hinia. Taon tavera atu řaramina mo sohen taon sati atu Sodom teni jara tavera atu Egypt.

<sup>9</sup> Ale ko hitea, mata rani mo tolu peresi na sope rani matea, tatua tamlohi purongo, tavgavui tamlohi, leo tari, ale mara jara tinatinapua la pa lo varoi na tarapen la tamlohi tuetueni tupra rua atu. La pa sopo majinga vara la taura na taptap, <sup>10</sup> ale tamlohi tari na varama la pa vai na hanhani tavera, ale la pa avulahi moiso la pa silesilera na otori mata sava mo masese isan la tamlohi tuetueni atu mo rua matan la lo sile na rani řilangi isan la haratu na varama. <sup>11</sup> Pani rani mo tolu sopena matea mo vano moiso, ale God mo mongovira, ale la mele mauri. La mele turu moiso tamlohi sei la hitera la matahu tavera matara.

<sup>12</sup> Ale la tamlohi tuetueni atu mo rua la rongo na leo tavera matea mo tai na tuka mo vereea mara, “Ha mai nike!” Ale nora meresahi la hitera la sahe aulu na tuka na telangi matea. <sup>13</sup> Vahatea mihi tavera matea mo komo na sopen taon tavera atu matea hin la haratu mo sangavulu. Evi tamlohi la mate hin mihi tavera atu mo tikeli tari vaha limaravrua (7,000). Ale sope vaon taon atu la pa lo mauri, la sile na hasohaso isan God haratu mo aulu na tuka. <sup>14</sup> Harua rani sasati atu mo masese moiso! Pani ka hitea, hatolu rani sasati mo lo mai vilavila.

### *Halimaravruan La Trumpet Atu*

<sup>15</sup> Halimaravruan la angelo atu mo tiv na nona trumpet, leo tavera hai la retireti na tuka lara, “Suiha mata aulu hin varama nike, nake i pa vano na liman nořa God peresi nona Křisto, ale i pa tauri na suiha mata rani tui tui tarea.”

<sup>16</sup> Ale la tamlohi aulu atu mo ngavulu rua mo vati (24) sei la lo sakele na nora jara sakele nona supe na nahon God, la juruvi popovi na lepa atano, ale la lotu God, <sup>17</sup> lara, “Moli God engko suiha aulu atu mo tavera jea,

ko lo toho nake, ale ko toho tuai moiso.  
 Kama vere meje isam matan ko tapulo vara o vavahinau na nom suiha tavera vara o aulu na hinau tari.  
 18 Mara jara tinatinapua tari na varama la lolokoru, pani nom talai lolokoru mata hehe mo mai, ale nake rani mo mai vara o sile na nom aria isan la haratu la mate, ale nake rani mo mai vara o sile na otori isana nom volitusi, haratu la p̄ovet peresi na tapuhi, ale isan la haratu la lo ololo na hijam, la haratu la tamlohi purongo, peresi la haratu la tamlohi aulu jea, ale rani mo mai vara o komo la haratu la lo komo na varama.”  
 19 Ale Temple non God aulu na tuka mo roi, ale o efi hite na puhoro mata nona retitauhi mo lo toho na lolo nona Temple, ale vaha mo vilasi, piri mo roroa, ale mihi tavera mo hisu, ale řořo vatu aes tavera la jovi.

## 12

### *Hařai Matea Peresi Na Dragon*

1 Ale matamata mařurahi tavera matea mo pala na tuka: enia hařai matea mo ruru na alo sohena ruru, ale vitu mo lo toho na ruhururu palona, ale vitusarasara mo sangavulu řomana mo rua la vai na řongořongo nona supe matea na patuna, 2 mo pangepange, ale mo tangi aulu mata rongohaji tavera, mo lo tangi matan mo tatamahu vara i lavilavi.

3 Ale matamata tinapua matea mo pala na tuka, e! Dragon hahara tavera matea. Patuna mo limaravrua la lavi na řongořongo matematea, ale palana mo sangavulu. 4 Ale viřina mo haro na hatolu vitusarasara tari na tuka mo pulahira la sivo na varama. Moiso dragon atu mo turu na nahon hařai atu mo tatamahu vara i řolomi na natuna vara hařai atu i lavilavi.

5 Hařai atu mo vasusui na natirihii lamane matea sei enia i pa aulu

na mara jara tinatinapua tari na varama, ale i pa tamajira na maja aen matea. La reve nařihii natirihii lamane atu mo sahe isan God, ale mo sakele na nona jara sakele nona supe. 6 Ale hařai atu mo rovo mo vano na jara hasetoho matea sei God mo tatamahunia matana moiso. Ale la pa kilaua atu mata rani i tari vahatea i ngav sangavulu rua i ngavulu limarave (1,260).

### *Vuro Na Tuka*

7 Hitahun haratu vuro mo tapulo na tuka, ale Michael patu angelo peresi na nona angelo la valum peresi dragon atu tolu na nona angelo, ale dragon atu peresi na nona angelo la vai na vuro peresi Michael, 8 pani enira la jeu na dragon peresi na nona angelo hin vuro atu, ale la titiura na tuka, 9 Ale dragon tavera atu, enia mata sasati atu tuai, haratu la tovia Tiapolo teni Setan, tarea enia mo lo halu na tamlohi tari na varama, la pulahia peresi na nona angelo la sivo na varama.

10 Ale na rongo na leo tavera matea na tuka mo vereea mara, “Nake rani mo mai moiso vara vavahinau mata juri non nořa God la masese, nake i pa turu na nona řilangi peresi na nona suiha mata supe, nake rani vara Křisto i tauri na nona suiha, enia sei God mo viřonia vara enia i pa Jujuri. Ale matana, mo pulahi nařihii meresahi atu vara i sivo na varama, enia haratu mo lo tuvai na voraiřa na nahon God tarea. 11 Ale la jeu Setan mata řaen Natu Sipsip ale mata nora vereulia na retivarafuhu matan la tatamahu vara la mate mata nora rasua. 12 Matana, tuka aulu ha pa avulahi peresi la haratu la lo toho atu, pani varama peresi na tasi ha řomsati matan la pulahi Tiapolo mo sivo isamim, ale mo lolokoru patuna matan mo levosahia vara nona rani mo vejuveju.”

13 Na rani dragon atu mo hitevosahia vara la titiua mo sivo na varama, mo levuti pa hařai atu sei mo lo vasusui natuna lamane atu. 14 Pani la sile na hapa mala tavera mo rua isana vara i avu i rovo i vano hin jara

atu God mo tatamahunia matana, vara la pa kilaua hin jara hasetoho atu. Dragon i pa sopo eʻi komoa hin jara atu mata tauni i tolu peresi na sope tauni matea.

<sup>15</sup> Ale dragon atu mo sosoro na wai sohena wai roro matea, mo malue na jingona mo usuri haʻai atu, ale mo vaihitea vara i tivesi naʻihia hin wai tatave atu, <sup>16</sup> pani lepa mo tuenia, lepa mo roi, ale mo ʻrolomi wai tatave atu sei mo lo malue na jingon dragon atu. <sup>17</sup> Ale dragon atu mo lolokoru sasati hin haʻai atu. Ale mo malue mo vano vara i vai na vuro peresi te natun haʻai atu tinapua. Enira la tamlohi atu sei la lo oloolo na retileu non God, ale la lo usuri na vereulia sei Iesu mo vujangia isara. <sup>18</sup> Moiso dragon atu mo turu na pahisa tasi na oneone.

## 13

### *Maji Jala Sasati Mo Rua La Mai*

<sup>1</sup> Ale na kilau vano na hite na maji jala sasati matea mo lo malue na tasi. Palana mo sangavulu, ale patuna mo limaravrua. Ale ʻrongoʻrongo nona supe mo sangavulu la lo toho na palana matematea. Ale la uli na hija hai na patuna hatehateahi, enira mo isoiso la lo kali God. <sup>2</sup> Maji jala sasati atu na hitea mo lavi na epe leopard, palona mo sohena palo bear, ale jingona mo sohena jingo lion. Dragon atu mo silea na nona ʻrilangi peresi na nona jara sakele nona supe vara i tauri na nona suiha tavera. <sup>3</sup> Sola matea mata mate mo lo toho na patuna matea, mo sohena vara i pa mate matana, pani mo mele mavo, ale tamlohi tari na varama la usuria matan la maʻurahi hin maji jala sasati atu, <sup>4</sup> ale la lotu dragon atu sei mo lo sile na nona suiha isan maji jala sasati atu, ale la lotu maji jala sasati atu lara, “Mo sopo tea i sohena maji jala sasati nike! Tea i pa sopo eʻi valum peresia!” <sup>5</sup> God mo majinga vara maji jala sasati atu i retihapahapa, ale i kalia moiso mo silea na vitu mo ngavulu vati mo rua (42) matan vara i vaihite na suihana.

<sup>6</sup> Maji jala sasati atu mo kali God, ale mo kali na hijan God, ale mo kali jara atu God mo lo toho ea peresi na tamlohi sei la lo toho atu peresia na tuka. <sup>7</sup> Ale God mo majinga vara i vai na vuro peresi na nona tapuhi, ale vara i jeura. God mo silea na suiha vara i aulu na tavitavi tari, tamlohi purongo, leo tari peresi na mara jara tinatinapua tari, <sup>8</sup> ale la haratu la lo toho na varama la pa lotu maji jala sasati atu, enira mo isoiso hijara la sopo ulira na Puku mata Mauri sei la ulia tuai tiroma na vavahinau mata varama.

<sup>9</sup> Haratu mo lo rongo, i tapurongo!

<sup>10</sup> Vara engko mata la pa taurilatiho, la pa taurilatiho,

vara engko mata la pa vilimateiho na sita vuro,

la pa vilimateiho na sita vuro.

Raramina mo sohen harihi: tapuhi non God la pa tatamahu mata turu ʻrilangi na ʻromʻromi matea na nora hahau mata rasua.

<sup>11</sup> Ale na mele hite na maji jala sasati tinapua matea mo malue na lepa. Palana mo rua mo sohena natu sipsip, ale mo retireti sohena dragon. <sup>12</sup> Mo lavi na suiha maji jala sasati atu tiroma sei solana mo mavo moiso. Ale mo vai na varama peresi na tamlohi hinia la lotu maji jala sasati atu tiroma. <sup>13</sup> Ale mo vai na hina maʻurahi tatavera tinatinapua, sohen mo vai na hapu mo tai na masapa mo sinai na varama na naho tamlohi, <sup>14</sup> ale hin la hinia maʻurahi atu God mo majinga hinira vara i vaira na nahon maji jala sasati tiroma atu, mo halu na tamlohi tari la lo toho na varama, ale mo vereea mara la vai na tamasin maji jala sasati atu tiroma sei la vilia na sita vuro, pani mo pa lo mauri, <sup>15</sup> ale God mo majinga vara harua maji jala sasati atu i mangovi tamasi atu vara i mauri matan vara i eʻi retireti, ale matan vara tamasin maji jala sasati atu i pa vilimatei la haratu la sopo lotu tamasin maji jala sasati atu, <sup>16</sup> ale enia mo sile na retileu matea vara tamlohi tari la pa lavi na taipulu na matua limara



teni na pungorira. Hina purongo vara la aulu, teni la tamlohi purongo, teni la tavitav, teni la tilavono, teni la tamlohi materi, teni la slev, <sup>17</sup> matan vara tea i sopo lavi taipulu atu, enia i sopo eʻri volvoli teni i haʻrehi te hinau hatea. Taipulu atu řaramina enia hijan maji jala sasati atu peresi na evi hijana.

<sup>18</sup> Hinau nike, mo opoi na lelevosahi. Vara ko opoia vara o levosahi na evin maji jala sasati atu, enia evi hija tamlohi matea, ale evina enia 666.

## 14

### *Natu Sipsip Peresi Na Vaona 144,000*

<sup>1</sup> Ale na kilau vano, e! Natu Sipsip mo lo turu na vutin Zion,\* ale tamlohi mo 144,000 la lo turu peresia. Hijana peresi na hijan Tamana la ulia na pungorira. <sup>2</sup> Ale na rongo na vaore matea na tuka, mo sohena řum tasi tavera, ale mo sohena roroa piri tavera. Leo atu na lo rongoa mo sohena leo pue tangtangi sei tamlohi mata roro na pue tangtangi la lo roro hinira, <sup>3</sup> la lo lalavete na vete paro matea na naho jara sakele nona supe non God peresi la hinau mauri mo vati atu peresi la tamlohi aulu atu. Tea i sopo eʻri levosahi vete atu, pani la tamlohi atu purongo evira 144,000 sei God mo volituhura na varama. <sup>4</sup> Enira mo isoiso la lamane, la sopo lo juruvi peresi te haʻrai hin te rani, ale vara Natu Sipsip mo haipu, la lo usuria. God mo volituhura na varama matan vara la mai sohena asitauni mata varama isan God enia Natu Sipsip. <sup>5</sup> Enira la sopo eʻri halu, ale la vokevoke.

### *Retisohai Nona Angelo Tupu Tolu*

<sup>6</sup> Hitahun haratu na hite na angelo tinapua matea mo lo avu aulu na livuha masapa. Mo lo lavi na Retiřuhu matan tui tui matan vara i vereea isana mara jara tinatinapua tari, tavitavui tari, leo tari, ale tamlohi purongo tari la lo toho na varama, <sup>7</sup> angelo atu mo ulo mara, “Ha sile

na oloolo isan God, ale ha tahe na hijana aulu, matan rani mo masese moiso matan vara i ari na tamlohi. Ha lotua matan enia haratu sei mo vai na tuka peresi na varama peresi na tasi peresi na patu wai.”

<sup>8</sup> Harua angelo mo usuria mo ulo mara, “Babylon mo tavera mo jovi, mo jovi. Mo reve na mara jara tinatinapua tari la inu na waen nona mauri maji tinatinapua.”

<sup>9</sup> Hatolu angelo mo lo usuri la haratu mo rua tiroma mo pala mo ulo mara, “Hinana nike natu, i pa pala isamim vara tea i lotu maji jala sasati atu teni tamasina teni i lavi na nona taipulu na limana teni na pungorina, <sup>10</sup> ale enia sohena i pa inu waen atu mata talai lolokoru non God mata hehe sei mo sureia na nona paniken mata nona lolokoru, ale i pa rongohaji na hapu peresi na vatu tutuni mata volkeno, pani i pa sopo eʻri mate. La pa vaia na naho angelo tapu peresi Natu Sipsip. <sup>11</sup> Ale vara tea i lotu maji jala sasati atu peresi na tamasina teni i lavi na nona taipulu mata hijana, ale i pa sopo eʻri isoiso na nona rongohaji na hapu mata rani tui tui.”

<sup>12</sup> Haranike enia reti matea mo vano isana tamlohi viřoni non God vara la turu řilangi, la haratu la lo taurilati na retileu non God peresi na nora rasua hin Iesu.

<sup>13</sup> Ale na rongo na leo matea na tuka mo vere mara, “O uli harihi: mo tapulo nake, avulahi tavera isan la haratu non Moli la pa mate.”

Ale Tanume Tapu mo řaramia mara, “Enjora! Avulahi řuhu isara matan la pa mapu na nora vavahinau la lo kalvono hinira, ale vua nora vavahinau řuhu la pa lavia hitahu.”

### *Angelo Atu Mo Lo Sakele Na Telangi*

<sup>14</sup> Ale na kilau sahe, e! Telangi lulu matea. Na hite matea mo lo sakele hinia sohen Natun Tamlohi. Rongořongo matea la vaia na gold mo lo toho na patuna, ale mo lo

\* **14:1:** Zion: Zion enia Jerusalem.

tauri na sita kole voro matea na limana. <sup>15</sup> Ale angelo tinapua matea mo malue na Temple mo ulo isan haratu mo lo sakele na telangi mara, “O tapulo taitai na nom sita kole. Rani mata lavi na asitauni na varama la mena.” <sup>16</sup> Moiso haratu mo lo sakele na telangi mo vuřahi na nona sita kole, ale mo lavi na asitauni na varama.

<sup>17</sup> Hitahun haratu angelo tinapua matea mo malue na Temple, ale enia sohena mo lo tauri na sita kole voro matea. <sup>18</sup> Ale angelo tinapua matea mo malue na jara votavota enia mo lo kilau na hapuna, ale mo ulo na leo tavera matea mo vano isan angelo atu mo lo tauri na sita kole voro mara, “Vua grape tari na varama la mena! O vuvu na vurungina na nom sita kole voro.” <sup>19</sup> Ale angelo atu mo vuřahi na nona sita kole na varama, ale mo vu na vua grape mo pulahira la sivo na koko varavarasi mata talai lolokoru non God mata hehe. <sup>20</sup> Ale la varasihira na koko varavarasi sei mo lo toho na jingoiman taon tavera, ale řaera la roro la malue hin koko varavarasi atu mo vano mo tikeli 296 kilometre asau hinia, ale puahana mariviti vara i lovi te hos.

## 15

### *Isoiso Talai Tavera La Lo Mai*

<sup>1</sup> Hitahun haratu na kilau sahe na tuka, na mele hite na matamata tinapua matea, enia hina mařurahi tavera matea, ale angelo mo limaravrua la lo lavi la isoiso rongohaji sasati tavera atu mo limaravrua, ale enira mo isoiso talai lolokoru non God mata hehe.

<sup>2</sup> Ale na hite na hinau matea mo sohena tasi mata glas mo hoi peresi na hapu, ale la tamlohi atu sei la jeu na suiħan maji jala sasati atu peresi na tamasina peresi na evi hijana, la lo turu na pahisan tasi mata glas atu. La lo tauri na pue tangtangi non God, <sup>3</sup> ale la lo lalavete na vete non Moses volitusi non God peresi na vete non Natu Sipsip lara,

“Moli God engko suiħa aulu atu mo tavera jea,  
nom vavahinau la tavera jea,

ale la řuhuřuhu jea,  
nom vavahinau la tataholo,  
ale la varařuhu,  
engko ko Supe nona vao tamlohi jara tinatinapua tari na varama!

<sup>4</sup> Moli, hare natu, i sopo eři sile na oloolo tavera isam,  
teni i tahe na hijam aulu?

Matan engko hasem ko tapu,  
ale mara jara tinatinapua tari

la pa mai la pa lotuho  
matan ko vujangi nom aria sei,  
mo tataholo mo řuhu.”

<sup>5</sup> Hitahun haratu, na mele kilau, ale na hite na jara tapu na lolo Temple na tuka mo roi. <sup>6</sup> Ale na hite na angelo mo limaravrua sei la lo tauri na jilivi talai mata rongohaji sasati atu mo limaravrua la malue na lolo Temple. La ru na ruru lulu peravu, la eve na řumara na oti la vaia na gold. <sup>7</sup> Ale vonan pa la hinau mauri atu matea mo sile na jilivi talai mo limaravrua la vaira na gold matematea isan la angelo atu mo limaravrua, jilivi talai atu la lavi na talai lolokoru non God mata hehe sei mo mauri mata rani tui tui, <sup>8</sup> ale Temple mo mařivi na asu memeran God mata suiħana, ale tea i sopo eři unu na Temple vavano la hinau rongohaji sasati tavera sei la angelo atu mo limaravrua la lo lavira, la pa vaira i isoiso.

## 16

### *Jilivi Talai Mata Lolokoru Tavera Non God*

<sup>1</sup> Hitahun haratu na rongo na leo tavera matea mo malue na Temple mo vereā isan la angelo atu mo limaravrua mara, “Ha vano ha surei la jilivi talai mata talai lolokoru non God mata hehe atu mo limaravrua na varama!”

<sup>2</sup> Ale tiroma angelo mo vano mo surei na nona jilivi na varama, vahatea vosavosa řanga la pala isan la tamlohi atu sei la lavi na taipulu non maji jala sasati atu peresi la haratu la lo lotu na tamasina.

<sup>3</sup> Harua angelo mo surei na nona jilivi na tasi, vahatea tasi mo posi mo

mai sohena řae tarape moiso hinai tari na lolo tasi la mate matana.

<sup>4</sup> Hatolu angelo mo surei na nona jilivi na wai roro peresi na patu wai moiso la mai řae.

<sup>5</sup> Ale na rongo angelo atu sei wai la lo toho na ruhuruhu suišana, mo vereia isan God mara, “God, talai ko silea mo tataholo, matan engko hasem ko tapu, ko lo toho nake, ale ko lo toho tuai moiso. <sup>6</sup> Mo tataholo vara tamlohi la inu řae sei ko silera hinia matan la vili na tapuhi non God peresi na nom pŗovet matan řaera la roro na varama.”

<sup>7</sup> Ale na rongo na leo matea mo tai na votavota mara, “Io, Moli God engko suiha aulu atu mo tavera jea, nom talai tari la vokevoke, ale la varařuhu.”

<sup>8</sup> Ale havati angelo mo surei na nona jilivi na alo, ale alo mo tapulo sulii na tamlohi na hapuna. <sup>9</sup> Tamlohi tari tutuni alo mo sulira, ale la kali na hijan God matan mo lo vai la rongohaji sasati tavera sei, pani tea mo sopo posi i vano isan God teni i silea na ololo.

<sup>10</sup> Halima angelo mo surei na nona jilivi na jara sakele nona supe non maji jala sasati atu, vahatea řořoha mo tavuni jara atu mo lo tauri na suiha hinia, ale nona tamlohi la tapulo hatihati na memera matan la lo rongohaji. <sup>11</sup> Ale matan la lo rongohaji tavera peresi la nora vosavosa řanga atu la hajira, la kali God na tuka, pani la řohu vara la posi na nora hehe.

<sup>12</sup> Halimarave angelo mo surei na nona jilivi hin wai tavera atu Euphrates, ale wai atu mo mamasa matan vara la supe atu la tai Opae, la eři hahau rotoa. <sup>13</sup> Ale na hite na tanume sasati mo tolu la sohena puroko, matea mo malue na jingon dragon atu, matea na jingon maji jala sasati atu, ale matea isan nona pŗovet haluhalu. <sup>14</sup> Matan la tanume sasati atu la lavi na suiha matan vara la vai na hinai mařurahi, ale la vano isana supe tari na varama vara la takonahira matan vara la pa vai na

vuro peresi God, enia suiha aulu atu mo tavera jea na nona rani tavera.

<sup>15</sup> Ale Moli mara, “Ha levosahia! A pa mai sohena tamlohi vavanaho matea, avulahi tavera isan haratu mo sopo juruvi, pani mo lo kilau moiso mo tatamahu na nona ruru matan vara i vono i pa hahau řalihi i mala-mala, ale i mahanuhanu matana.”

<sup>16</sup> Ale la tanume sasati atu la takonahira na jara matea la lo tovia Armageddon na leon tavgavin Israel.

<sup>17</sup> Ale halimaravruan la angelo atu mo surei na nona jilivi na masapa, ale leo tavera matea mo tai na jara sakele nona supe aulu na lolo Temple mara, “Mo isoiso!” <sup>18</sup> Moiso piri mo roroa, ale vaha mo vilasi, ale mihi tavera matea mo sopo lo tea i sohena na varama i jeu haratu, matan enia mo tavera jea. <sup>19</sup> Mihi atu mo vuhai na taon tavera matan Babylon tavaluna mo tolu, ale mo sohena isana taon tavera tari nona mara jara tinatinapua tari la jovi. God mo mele řomřomi na hehe tari non Babylon taon tavera atu, ale mo vaia mo inu vevuhi na waen mata nona lolokoru sasati na nona talai lolokoru mata hehe sei mo mařivi hin paniken atu. <sup>20</sup> Ale ureure tari la tihai, ale vutivuti tari la tihai. <sup>21</sup> Vatu aes tatavera na tuka la jojovi sivo isana tamlohi, puhonira matematea la tikeli na kilo mo ngavulu vati (40). Pani tamlohi la kali God matan rongohaji sasati atu mo tavera jea.

## 17

### *Hařai Malele Peresi Pa Maji Jala Sasati Atu*

<sup>1</sup> Ale vonan la angelo atu matea hin la haratu mo limaravrua sei la lo tauri na nora jilivi, mo mai isaku mara, “O mai, a pa vujangiho na talai non hařai malele atu sei mo lo sakele na wai matuvana, <sup>2</sup> ale supe mata varama la vai na mauri maji peresia, ale tamlohi na varama la drong na nona mauri maji tinatinapua.” <sup>3</sup> Ale angelo atu mo laviau na vano na suihan Tanume Tapu na jara hasetoho matea. Hin jara atu na hite

na haʻrai matea mo lo sakele na maji jala sasati hahara ʻroʻroha matea, ale maji jala sasati atu mo lavi na hija matuvana na epena la lo kali God, ale na hite na patuna mo limaravrua, ale palana mo sangavulu. <sup>4</sup> Haʻrai atu mo ruru na ruru peravu majhina mo perpel, ale mo hahara ʻroʻroha, ale mo ruru na gold peresi na vatu vilasi ʻruruʻruru peresi na huʻrutavila. Na limana mo lo tauri na paniken waen matea la vaia na gold mo maʻrivi na nona posposi lumiha peresi na nona posposi viriu. <sup>5</sup> La uli na hija matea na pungorina ʻraramina mo vara:

**Enau Taon Tavera  
Matan Babylon  
Tina Ha Rai Malele  
Peresi Na Posposi Lumiha  
Mata Varama**

<sup>6</sup> Ale na hite haʻrai sati atu mo drong na ʻrae tapuhi non God peresi na ʻrae tuetueni non Iesu. Na hitea na maʻfuraahi tavera hinia.

<sup>7</sup> Pani angelo atu mo vereau hinia mara, “Ko maʻfuraahi mata sava? A pa vereuliho na ʻraramin haʻrai nike peresi maji jala sasati atu mo lo sakele hinia sei patuna mo limaravrua, ale palana mo sangavulu. <sup>8</sup> Maji jala sasati atu ko lo hitea mo lo toho, pani nake mo tihai, ale i sopo tuai i pa malue hin koko tavera jea atu sei mo sivo atano jea na lolo varama mata mateia i mai, ale i pa vano na nona komo. Ale tamlohi tari na varama sei God mo sopo uli na hijara na Puku mata Mauri tiroma moiso mo pa tapulo vai na varama, la haratu natu, la pa maʻfuraahi tavera hin maji jala sasati atu matan mo lo toho tiroma moiso, ale mo tihai, ale i pa mele pala.

<sup>9</sup> Ale tea vara i tamlohi lelevosahi, i pa levosahi hinau nike. La patuna sei mo limaravrua enira vutivuti atu mo limaravrua sei haʻrai atu mo lo sakele hinira. La vutivuti atu la ʻrarami na supe mo limaravrua. <sup>10</sup> Supe mo lima hin la haratu la jovi moiso, ale matea mo lo toho nake, ale matea mo sopo lo mai, ale i pa mai, pani God i pa majinga hinia mata makomo rani purongo. <sup>11</sup> Ale maji jala sasati atu sei

mo lo toho tiroma moiso, pani nake mo tihai, enia i pa halimaravtolura, pani enia vonan la haratu mo limaravrua atu, ale enia i pa vano na nona komo. <sup>12</sup> Ale la palana atu mo sangavulu ko lo hitera enira supe mo sangavulu sei la sopo lo lavi na sui-hara, pani la pa tauri na suiha sohena supe peresi maji jala sasati atu mata makomo rani purongo. <sup>13</sup> La supe atu ʻromira mo matea, ale la sile na nora suiha isan maji jala sasati atu vara i tauri na suiha. <sup>14</sup> La pa vai na vuro peresi Natu Sipsip, pani Natu Sipsip i pa jeura matan enia Moli nona Moli, ale Supe nona Supe, ale la haratu la lo toho peresia, enia mo tovira, ale mo viʻronira, ale ʻromira la ʻromturu ʻrilangi.”

<sup>15</sup> Ale angelo atu mo vereau isaku mara, “Wai matuvana atu ko lo hitera sei haʻrai malele atu mo lo sakele hinira, enira tamlohi purongo peresi na vao matuvana, peresi na mara jara tinatinapua peresi na leo tinatinapua. <sup>16</sup> Ale la palana mo sangavulu atu ko lo hitera peresi maji jala sasati atu, la pa ʻrohu hin haʻrai malele atu, ale la pa komoa, ale la pa vaia i mala-mala, ale la pa hania moiso la pa sulia na hapu. <sup>17</sup> Matan God mo taua na mapura vara la vai na masalona vara la mai matea na ʻromira, ale la pa sile na nora suiha isan maji jala sasati atu vara i tauri na suiha, vavano reti non God la masese.

<sup>18</sup> Ale haʻrai atu ko lo hitea, enia taon tavera sei suihana mo aulu na supe tari na varama.”

## 18

### *Babylon Mo Jovi*

<sup>1</sup> Hitahun harihi, na mele hite na angelo tinapua matea mo lo sevuti na tuka. Enia mo lavi na suiha tavera jea, ale sasaramina mo vai na varama mo mera, <sup>2</sup> ale enia mo ulo na leo tavera matea mara, “Babylon tavera, mo jovi, mo jovi! Enia mo mai jara luhu nona tanume sasati, jara luhu nona tanume lumiha tari, tau maji avuavu lumiha tari, ale jara

luhu nona maji jala sasati sei la lumiha, tamlohi la nikehira. <sup>3</sup> Matan mara jara tinatinapua la inu na waen mata opoia řilangi mata nona mauri maji, supe tari na varama la vai na hehe peresia, ale tamlohi ařeařehi, la tavgav mata nona mauri maji.”

<sup>4</sup> Ale na mele rongo na leo tinapua matea mo tai na tuka mara, “Noku tamlohi, ha rovo hinia! Ha sopo pulutahi peresia na nona hehe matan vara ha pa sopo lavi nona rongohaji sasati peresia, <sup>5</sup> matan nona hehe la takonahia mo sahe vara la tikeli na tuka, ale God mo tatamahu vara i aria mata nona hehe. <sup>6</sup> O vaia isana sohen haratu mo vaia isana nom tamlohi. O mele kelea aulu vaha rua hin haratu mo silea isara. O vaia i inu na mana wai mata rongohaji i vaha rua hin haratu mo lo silea isara. <sup>7</sup> Hařai atu mo řomaulu hinia hasena na nona hina tavgav matuvana, ale o vailejilejia, o vai na řomina i sati matan enia mo vereea mara, ‘Na sakele sohen vesupe matea, enau a pa sopo malepu hin te rani teni a pa řomsati’. <sup>8</sup> Matan hinau atu nona rongohaji sasati la pa mai isana na rani matelete purongo, mateia, řomsati, ale marua, hapu i pa komo na tarapena, matan Moli God suiha, enia haratu mo aria.”

<sup>9</sup> Ale supe mata varama sei la vai na mauri maji peresia, ale la lavi na tavgav matana, la pa tangisia hin rani atu vara la hite na asu tarapena i lo koru. <sup>10</sup> Ale la lo turu asau hinia matan la matahuni na nona rongohaji, ale lara, “Rani sasati, rani sasati mo mai isam taon tavera, ko taon suiha, Babylon! Matan, vila řuhu purongo, nom talai mo mai isam.” <sup>11</sup> Tamlohi ařeařehi na varama la pa tangi, ale la tangtangi matana, matan tea mo sopo voli na nora hinahinau, <sup>12</sup> nora gold, silver, vatu řuhuřuhu, huřutavila, ruru řuhu, ruru perpel, silk, ruru hahara řořoha, vipahai pona řuhu tinatinapua, hinau la tai nařihira na huřu elephant, hinau la vaira na vipahai řuhuřuhu jea, bronze, aen peresi na vatu sei mar-

ble, <sup>13</sup> cinnamon peresi na spaes sei tamlohi la lo hanhani peresira, hasori, hasori sohen myrrh peresi na frankincense, waen, wel mata olive, flaua řuhu, wit, buluk, sipsip, hos, kart mata vuro peresi na slev, enira tamlohi mauri.

<sup>14</sup> Ale leo atu mo mele vereea mara, “La vua atu sei mapum mo lo opoira la rovo hiniho moiso peresi na nom hina řuhuřuhu peresi na nom lakolako řuhuřuhu la tihai isam, ale o pa sopo eři mele hitera hin te rani.”

<sup>15</sup> Tamlohi ařeařehi matan la hinau sei, la tavgav matana, la pa turu asau matan la matahuni na nona rongohaji, la tangi la tangtangi, <sup>16</sup> lara, “Rani sasati, rani sasati isan taon tavera, haratu sei mo lo ru na ruru řuhu, ale mo lo ru na ruru perpel, ale ruru hahara řořoha. Mo ru na gold peresi na vatu řuhuřuhu, peresi na huřutavila, <sup>17</sup> pani vila řuhu purongo, nona tavgav la tihai!”

Captain mata lanis tari peresi na tamlohi voko na lanis peresi na tamlohi la lo lingira peresi la haratu la lo vai na mania na tasi la turu asau, <sup>18</sup> ale la tangi aulu matan la hite na asuna mo lo koru lara, “Sava taon mo sohen taon tavera akerihi!”

<sup>19</sup> Ale la lo tangi aulu, ale na nora řomsati la pulahi na tangotango na patura, ale lara, “Rani sasati rani sasati isan taon tavera! Haratu sei la lo maro na lanis na tasi la tavgav matan nona tavgav, pani vila řuhu purongo, mo maroe, <sup>20</sup> ale matana, tuka o avulahi peresi na tapuhi non God peresi na vahařule peresi na přovet, matan God mo sile na talai isana matamim.”

<sup>21</sup> Ale angelo řilangi matea mo lavi na vatu matea sohen vatu tavera matea mata pete na piri wit, ale mo pulahia mo sivo na lolo tasi, ale mo ulo mara, “Hin malele řilangi akerihi natu, taon tavera matan Babylon i pa jovi hinia, ale la pa sopo eři mele hitea hin te rani, <sup>22</sup> ale Babylon, roroan la haratu la lo roro na pue tangtangi, ale tamlohi roro, ale haratu la lo roro na flute, ale haratu la lo

tiv na trumpet la pa sopo eři mele rongora na lolom, ale tamlohi eři eři la lo vai na nora vavahināu hiniho, la pa sopo mele hitera hiniho hin te rani, ale roroa mata pete na wit la pa sopo mele rongoa hiniho hin te rani, <sup>23</sup> lamu la sopo eři mele memera hiniho hin te rani, ale leo tamlohi i pa lahi peresi na nona hařai la pa sopo eři mele rongora hiniho hin te rani, matan nom tamlohi ařeařehi tiroma enira tamlohi tatavera mata varama, pani nake sava? Ale nom mahu mo halu na mara jara tinatinapua tari, <sup>24</sup> ale řae přovet peresi na řae tapuhi non God peresi na řaen la haratu ko vilimateira na varama mo lo toho hiniho.”

## 19

### *La Lalavete Na Tuka*

<sup>1</sup> Hitahun haratu na rongo na hināu matea mo sohena leo vao tavera matea na tuka mo ulo mara, “Hasohaso God! God enia Jujuri! Hasohasona tavera peresi na suiha, enira non nořa God, <sup>2</sup> matan nona aria la tataholo, ale la vokevoke matan enia mo ari tina hařai malele atu sei mo lo komo na varama na nona posposi viriu, ale God mo kele na řae nona volitusi sei la lo toho na liman hařai malele atu.” <sup>3</sup> Ale vao tavera atu la mele ulo lara, “Hasohaso God! Asun hařai malele atu i pa sahe aulu, rani tui tui tarea.”

<sup>4</sup> Ale la tamlohi aulu atu mo ngavulu rua mo vati (24) peresi la hināu mauri atu mo vati la juruvi popovi atano na lepa, ale la lotu God mo lo sakele na nona jara sakele nona supe. La ulo aulu lara, “Amen! Hasohaso God!”

<sup>5</sup> Ale leo matea mo tai na jara sakele nona supe mara, “Hasohaso nořa God kamim mo isoiso nona volitusi sei ka lo sile na ololo isana, haratu la aulu peresi la haratu sei la atano.”

<sup>6</sup> Ale na rongo na vavaore nona vao tavera matea mo sohena řum tasi tavera, mo sohena roroa piri matuvana, mo ulo mara, “Hasohaso Moli nořa God, enia suiha aulu atu mo tavera jea mo lo sakele na

nona suiha. <sup>7</sup> Ra avulahi řa avulahi tavera, ale řa sile na hasohaso tavera isana matan lahi non Natu Sipsip mo masese, ale nona hařai mo hase tatamahunia. <sup>8</sup> God mo silea vara i ruru na ruru lulu mera mo vokevoke.” Matan ruru lulu atu, mo lo řarami na vavahināu řuhu nona tapuhi.

<sup>9</sup> Ale angelo atu mo vereā isaku mara, “O uli harihi: Avulahi isan la haratu la usira vara la pa mai na hanhani lahi non Natu Sipsip.” Ale mo mele vereā mara, “Retivarařuhu sei la tai isan God.”

<sup>10</sup> Ale na jovi na juruvi popovi atano na palona vara a lotua, pani mo vereā isaku mara, “O pa sopo vai hināu atu! Enāu volitusi matea sohem peresi na vorai peresi na vevorai, la haratu la lo taurilati na vujangi non Iesu. O lotu God.” Vara tamlohi la lo vereuli Iesu enira la lo retiman-govi na suihan Tanume Tapu.

### *Reti Non God Mo Vai Na Vuro*

<sup>11</sup> Ale na hite tuka mo roi, e! Hos lulu matea, ale haratu mo lo sakele na hos la tovia:

#### **Romturu Rilangi**

#### **ale**

#### **Vara Ruhu**

ale nona aria mo tataholo, ale mo vai na vuro. <sup>12</sup> Ale matana mo sohena pepe hapu matea, ale řongořongo matuvana nona supe aulu jea la lo toho na patuna, ale hija matea mo lo toho hinia, pani enia hasena purongo mo levosahia.

<sup>13</sup> Mo ruru na ruru peravu matea la řuřunia na řae, ale hija sei la tovia hinia enia:

#### **Reti Non God**

<sup>14</sup> Ale vao tamlohi vuro tavera na tuka la lo usuria hin hos lulu atu, la ruru na ruru lulu řuhu la vokevoke.

<sup>15</sup> Na jingona, sita voro tavalu rua matea mo lo malue hinia vara i vilijovjovi na mara jara tinatinapua. I pa kilaura peresi na maja aen mata tamajira hinia, mo varasi na koko varavarasi mata lolokoru sasati mata talai lolokoru non God mata hehe sei enia suiha aulu atu mo tavera jea.

<sup>16</sup> Ale hija matea la ulia na nona ruru peresi na vosena mara:

### **Supe nona Supe Moli nona Moli**

<sup>17</sup> Moiso, na hite na angelo matea mo lo turu na alo, ale mo ulo na leo tavera matea isana maji avuavu tari sei la lo avuavu aulu na masapa mara, “Ha sinai! Ha pulutahi mata hanhani tavera non God, <sup>18</sup> matan vara ha pa hani na visihon la haratu la supe, peresi la haratu la patu tamlohi mata vuro, peresi la haratu la lo tauri na suiha, peresi na hos peresi na tamlohira, peresi la haratu la materi, haratu la slev, tamlohi aulu peresi na tamlohi purongo.”

<sup>19</sup> Ale na hite pa maji jala sasati atu peresi na supe tari na varama peresi na nora vao tamlohi vuro la mai jara matea vara la vai na vuro peresi haratu mo lo sakele na hos tolu na nona vao tamlohi vuro. <sup>20</sup> Ale la tauri maji jala sasati atu peresi p̄rovet haluhalu atu, enia haratu mo lo vai na matamata tavera na nahon maji jala sasati atu sei mo lo halu la haratu la lo lavi na nona taipulu, ale la lo lotu na tamasina. La pulahi maji jala sasati atu peresi p̄rovet haluhalu atu la pa lo mauri, la sivo hin tasi hapu sei mo lo hani na vatu tutuni mata volkeno. <sup>21</sup> Ale isoisoro, la mate hin pa sita tavalu rua atu sei mo lo malue na jingon haratu mo lo sakele hin pa hos atu, ale maji avuavu tari la masu maʻari na visihora.

## **20**

### *Tauni 1000*

<sup>1</sup> Moiso, na hite na angelo matea mo tai na tuka mo lo lavi na kia matan koko tavera jea atu sei mo sivo atano jea na lolo varama mata mateia na limana, ale mo lo tauri na jen tavera matea. <sup>2</sup> Mo tauri-lati dragon atu, enia mata sasati atu matan tuai sei la tovia Tiapolo teni Setan, <sup>3</sup> ale angelo atu mo pulahia mo sivo hin koko tavera jea atu sei mo sivo atano jea na lolo varama mata mateia, ale mo pelati horoa, ale mo ringea vara dragon atu i pa sopo eʻi mele halu na mara jara tinatinapua vavano i tikeli na tauni i tari vahatea

(1000) i vano, ale hitahuna i pa mele materi mata makomo rani purongo.

<sup>4</sup> Ale na hite te jara sakele nona supe peresi haratu la lo sakele hinira sei la silera na suiha vara la ari, ale na hite na maurin la tamlohi atu sei la tai roto na patura matan la lo vereuli Iesu, ale mata reti non God. Enira la sopo lotu maji jala sasati atu teni tamasina teni la lavi na nona taipulu na pungorira teni na limara. Enira purongo la mele mauri vara la tauri na suiha vara la aulu peresi K̄risto mata tauni i tari vahatea (1000).

<sup>5</sup> Haranike enia tiroma sauteterahi. Haratu la sopo mauri la pa sopo eʻi mele mauri i tikeli na isoison tauni atu mo tari vahatea (1000).

<sup>6</sup> Avulahi tavera isan la haratu la tapuhi non God sei la turu na tiroma sauteterahi, matan harua mateia i pa sopo eʻi taurira na suihana. Enira la pa p̄ris non God peresi K̄risto, ale la pa aulu peresira mata tauni i tari vahatea (1000).

### *Isoison Setan*

<sup>7</sup> Ale na isoison tauni atu mo tari vahatea (1000), la pa teri Setan na nona ima ʻilangi, <sup>8</sup> ale i pa malue vara i halu na mara jara tinatinapua la tovira Gog peresi Magog vara i pulutahira na jara matea vara la vai na vuro; evira mo sohena evi oneone na tasi. <sup>9</sup> Ale enira la hahau roto na jara tari na varama vara la ʻialihi vao tapuhi tavera atu la lo toho ʻialihi hin taon tavera atu God mo opoia, pani hapu mo tai na tuka mo jovi isan la haratu la lo mai mo hani tihaira. <sup>10</sup> Ale la pulahi Tiapolo haratu mo lo halura peresi pa maji jala sasati atu peresi pa p̄rovet haluhalu atu, la sivo hin tasi atu sei mo lo hani na vatu tutuni mata volkeno, ale la pa vailejlejira na rani na pongi ea mata rani tui tui tarea.

### *Aria Tavera Non God*

<sup>11</sup> Ale na hite na jara sakele mo lulu non God, ale enia mo lo sakele hinia. Varama peresi na tuka la rovo na nahona, la tihai jejeu. <sup>12</sup> Ale na

hite la haratu la mate, haratu la tamlohi aulu peresi la haratu la tamlohi purongo, la lo turu na naho jara sakele nona supe, ale puku la roi, ale puku tinapua matea mo roi enia — Puku mata Mauri. La ari la haratu la mate na sava la ulia hin la puku atu, mo tataholo na hinu tari la lo vaira na maurira.

<sup>13</sup> Tasi mo sile la haratu la mate hinia, ale mateia peresi na varama mata mateia la sile la haratu la mate hinira. Ale la arira enira hatehateahi usuri na sava la lo vaira na maurira.

<sup>14</sup> Moiso, la pulahi mateia peresi na varama mata mateia na tasi hapu. Nipu hapu atu la tovia Harua Mateia.

<sup>15</sup> Vara tea hijana la sopo hitea na Puku mata Mauri, enia, la pulahia mo sivo na tasi hapu.

## 21

### *Tuka Paro Peresi Na Varama Paro*

<sup>1</sup> Hitahuna, na hite na tuka paro matea peresi na varama paro matea. Tuka tuai peresi na varama tuai la tihai moiso, ale mo sopo te tasi hinia. <sup>2</sup> Ale na hite taon tapu atu — Jerusalem Paro, mo lo tai aulu na tuka isan God. Mo sohena haʻai matea mo ruru na ruru lahi mo tatamahu matan tuana.

<sup>3</sup> Ale na rongo na leo tavera matea mo tai na jara sakele nona supe, mo vereea mara, “Ka hitea! Nake, jaran God sei mo lo toho hinia, i pa toho peresi na tamlohi. I pa toho peresira, ale enira la pa nona tamlohi, ale God hasena i pa toho peresira, sohena nora God. <sup>4</sup> I pa kamoti na wai matara tari na matara, i pa sopo te mateia, ʻromsasati teni tangi teni epe varihaji, matan hinu matan tuai la tihai.”

<sup>5</sup> Ale haratu mo lo sakele na jara sakele nona supe mo vereea mara, “Ale ha levosahia! Na lo vai na hinu tari la paro.” Ale mo vereea isaku mara, “O uli hinu nike, matan la reti nike, o pa eʻi rasura, ale la varaʻuhu.” <sup>6</sup> Ale mo mele vereea isaku mara, “Mo isoiso! Enau pulo hinu tari! Enau isoisona! Enau tapulo hinu tari! Enau hitahu hinu tari!

Isan haratu mo maʻohu, a pa silea hin patu wai mauri atu, mo sopo te volina. <sup>7</sup> Haratu mo jeu na nona meresahi i pa lavi la hinu atu. Enau a pa nona God, ale enia i pa natuku.

<sup>8</sup> Pani isan la haratu ʻromira mo sopo ʻrilangi; teni haratu la lo vahaʻi na nora rasua; haratu posira la lumihia; teni haratu la lo vilimatei na tamlohi; teni haratu la lo vai na posposi viriu; teni haratu la lo mahumahu na suiha tanume; teni haratu la lo lotu na hinu mo sopo God, ale haratu la lo halu, jarara enia tasi hapu atu sei mo lo hani na vatu tutuni mata volkeno, enia Harua Mateia.”

### *Jerusalem Paro Mo Tai Na Tuka*

<sup>9</sup> Ale na hite na angelo matea mo mai isaku, enia vonan la angelo atu mo limaravrua sei, tiroma la lo lavi na jilivi mo limaravrua sei la maʻivi na rongohaji sasati mo limaravrua, ale mo vereea isaku mara, “O mai, a pa vujangihio hin haʻai atu i pa lahi, enia naroun Natu Sipsip.”

<sup>10</sup> Ale angelo atu mo laviau na sui-han Tanume Tapu na sahe aulu na patu vutivuti tavera matea. Angelo atu mo vujangiau hin taon tapu atu Jerusalem, mo lo tai aulu na tuka isan God, <sup>11</sup> sasaramin God mo lo malue hinia, mo mera ʻuhu sohen vatu vilasi ʻuhuʻuhu matea, sohen vatu atu jasper majhina mo heja rau, ale mo hahara, mo niro ʻuhu sohena crystal glas. <sup>12</sup> Taon tavera atu ropena mo tavera mo aulu, ale mataruana mo sangavulu ʻromana mo rua, ale angelo mo sangavulu ʻromana mo rua la lo turu hin la mataruatu. Hin la mataruatu la uli la hija tavitavin Israel atu mo sangavulu ʻromana mo rua na <sup>13</sup> tavaluna vano Opae mataruana mo tolu, tavaluna sahe Auta mataruana mo tolu, tavaluna sivo Tahuna mataruana mo tolu, ale tavaluna sivo Marino mo tolu. <sup>14</sup> Ropen taon tavera atu, pulona mo sangavulu ʻromana mo rua, ale hija vahaʻule mo sangavulu ʻromana mo rua non Natu Sipsip la lo toho hinira.



<sup>15</sup> Haratu mo lo retireti isaku mo tauri na ava matea la vaia na gold vara i ava na taveran taon tavera atu tolu na mataruana peresi na ropena.

<sup>16</sup> Ale avana mo sohen harihi: taverana peresi na peravuna la sohesohera purongo, ale taverana peresi na peravuna peresi na auluna avara mo tikeli 12,000 stadia (2,220 km) enira hatehatea. <sup>17</sup> Moiso mo ava na aulun rope atu mo tikeli 144 cubit (66 m) angelo sei mo ava harihi mo tataholo na tamlohi la lo ava hin pongi atu.

<sup>18</sup> Ropena la voroa na vatu řuhuřuhu sei jasper, ale taon tavera atu la vaia na gold vokevoke mo niro sohena glas. <sup>19</sup> La pulo ropen taon tavera atu la lakolakora na vatu vilasi řuhuřuhu sei majhira la tinatinapua. Tiroma vatu enia jasper, haruana enia sapphire, hatolura enia agate, havatira enia emerald, <sup>20</sup> halimara enia onyx, halimaravera enia carnelian, halimaravruara enia chrysolite, halimaravtolura enia beryl, halimaravatira enia topaz, sangavulura enia chrysoprase, sangavulu řomana mateara enia jacinth, sangavulu řomana mo ruara enia amethyst. <sup>21</sup> La vai la mataruana atu mo sangavulu řomana mo rua na huřutavila tavera mo sangavulu řomana mo rua, ale malele na lolon taon tavera atu la vaia na gold mo niro sohena glas.

<sup>22</sup> Na sopo hite te Temple na lolon taon tavera atu, matan Moli God enia suiha atu mo tavera jea peresi Natu Sipsip enira natu, nona Temple. <sup>23</sup> Ale taon tavera atu mo sopo opoi na alo peresi na vitu vara la sasarami hinia matan memeran God mo lo sasarami hin taon tavera atu, ale Natu Sipsip enia nona lamu.

<sup>24</sup> Mara jara tinatinapua la pa hahau na memerana, ale supe tari na varama la pa lavi na nora tavgav la sivo hinia, <sup>25</sup> Ale mataruana la pa sopo pelati hin te rani hatea matan mo sopo te řořoha mata vutepongi.

<sup>26</sup> Mara jara tinatinapua la pa lavi na nora tavgav peresi nora na nora ooloo la unu na lolona. <sup>27</sup> Pani i pa

sopo te hina lumiha hatea i eři unu hinia teni haratu posira mo lumiha teni haratu la halu, pani la haratu purongo sei la lo uli na hijara na lolo Puku mata Mauri non Natu Sipsip.

## 22

<sup>1</sup> Ale angelo atu mo vujangiau hin wai roro mata mauri atu sei mo niro sohena glas sei crystal, ale mo lo roro mo lo malue na jara sakele nona supe non God enia Natu Sipsip. <sup>2</sup> Ale mo roro usuri na livuha malele tavera hin taon tavera atu. Na tavalun wai roro atu hatehateahi vipahai sei mo lo sile na mauri peresi na vuana mo sangavulu řomana mo rua tinatinapua, la mena na vitu hatehateahi na tauni matea, ale raura la pa vai mamahuni na rojoa nona mara jara tinatinapua. *Gen 2.9*

<sup>3</sup> I pa sopo te hinia hatea God i pa řohu hinia atu, matan jara sakele nona supe non God peresi Natu Sipsip i pa lo toho ea, ale nona volitusi la pa lotua. *Zec 14.11; Gen 3.17*

<sup>4</sup> Ale la pa lo hite na nahona, ale hijana i pa toho na pungorira. <sup>5</sup> Vutepongi i sopo eři mele pala, ale la haratu la lo toho ea, la pa sopo eři opoi na memera lamu teni alo matan Moli God enia i pa sasarami isara moiso, enira la pa tauri na suiha mata rani tui tui tarea. *Isa 60.19; Dan 7.18*

### *I Pa Sopo Tuai Křisto I Pa Mai*

<sup>6</sup> Ale angelo atu mo vereia isaku mara, "La reti atu o pa eři rasura, ale la varařuhu. Ale Moli enia God mata tanume přovet, ale enia natu, mo řule na nona angelo vara i vujangi na sava God mo viřonia vara i pa masese i pa sopo tuai isana nona volitusi."

<sup>7</sup> Iesu mo vereia mara, "Ha lo levosahia! A pa mele mai i sopo tuai! Avulahi isan la haratu la lo taurilati la reti hin puku mata retimangovi nike."

<sup>8</sup> Enau John, enau natu na hitea, ale na rongo la hinia nike, nara na rongora, ale na hitera, na juruvi popovi atano na palon angelo atu mo lo vujangiau hin la hinia sei vara a lotua, <sup>9</sup> pani angelo atu mo vereia isaku

mara, “O sopo vaia sohena! Enau volitusi matea sohem peresi na voraim la p̄rovet tolu la haratu la ooloo na reti hin puku nike. O lotu God!”

<sup>10</sup> Ale mo vereea isaku mara, “O sopo jarohi na reti mata retimangovi hin puku nike, matan i pa sopo tuai la pa masese. <sup>11</sup> Haratu mo lo vai na hehe, i pa lo vai na hehe; haratu řomina mo lumiha, řomina i pa lo lumiha; ale tamlohi tataholo i pa lo vai na hina tataholo, ale haratu mo tapu i pa lo tapu.”

<sup>12</sup> Ale Moli mara, “Ka levosahia! Enau na lo mai vila, ale a pa sile na voli tamlohi tari i tataholo na sava la vaia moiso. <sup>13</sup> Enau na tiroma na hinau tari, enau na isoiso hinau tari, enau pulo hinau tari, enau na hitahu, enau tapulo hinau tari, enau isoiso hinau tari.”

<sup>14</sup> Avulahi isana tamlohi tari sei la lo hoje na nora ruru peravu matan vara la pa tataholo vara la hani na vuan vipahai atu sei mo lo sile na mauri, ale la pa eři unu hin taon tavera atu na mataruana. *Gen*

*2.9; 3.22* <sup>15</sup> Pani na jingoima hin taon tavera atu, viriu sei haratu la lumiha peresi na tamlohi mahumahu na suiha tanume peresi haratu posira la lumiha peresi na tamlohi vilimatei na tamlohi peresi la haratu la lo lotu-

lotu vono, ale tamlohi tari sei tarea la opoia vara la lo halu.

<sup>16</sup> “Enau Iesu, enau na řule na noku angelo vara i vereuli la hinau tari sei isamim mata vao kalesia tari. Enau tahisan mahapin Supe David, ale enau na majou řalavuhu sei mo memera.”

*Isa 11.1, 10*

<sup>17</sup> Ale, Tanume Tapu peresi hařai atu i pa lahi lara, “O mai!” Ale isan haratu mo eři rongo, o vereea vara “O mai!” Ale isan haratu mo mařohu, “O mai!” Ale isan haratu mo opoia, o lavi na wai mata mauri mo sopo te volina.

<sup>18</sup> Haranike enia noku re-tiřoařoahai isana tamlohi tari sei la rongo la reti mata retimangovi hin puku nike. *Deut 4.2; 12.32*

Vara tea i mele tau te reti tinapua na sava la ulia moiso, God i pa tau la rongohaji sasati atu puku nike, mo lo vereea isana. <sup>19</sup> Ale vara tea i lavi nařihi te reti hin retimangovi nike, God i pa lavi nařihi na rungana hin vipahai atu mata mauri peresi taon tapu atu sei la uliuli matana hin puku nike.

<sup>20</sup> Ale haratu mo lo vereuli la hinau nike mara,

“Io, enau na lo mai vila!”

Amen! O mai Moli Iesu!

<sup>21</sup> Romřuhu non Moli Iesu i toho isamim mo isoiso. Amen.